


# I Fiyowe Uret



New Testament in Tiruray

# I Fiyowe Uret

## New Testament in Tiruray

copyright © 2002 Wycliffe Bible Translators, Inc.

Language: Tiruray

Translation by: Wycliffe Bible Translators

Contributor: Wycliffe Bible Translators, Inc.

### Copyright Information

© 2002, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9718260234

#### **The New Testament**

in Tiruray

© 2002, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

---

PDF generated using Haiola and XeLaTeX on 22 Feb 2024 from source files dated 29 Jan 2022

b0fb0c95-f209-5a97-9de8-b336c1289708

## Contents

Mateo . . . . .	1
Markos . . . . .	37
Lukas . . . . .	60
Juan . . . . .	96
Rénigoy de Apostol . . . . .	123
Roma . . . . .	159
1 Korinto . . . . .	175
2 Korinto . . . . .	191
Galasia . . . . .	201
Efeso . . . . .	207
Filipos . . . . .	213
Kolosas . . . . .	217
1 Tesalonika . . . . .	221
2 Tesalonika . . . . .	225
1 Timoteo . . . . .	227
2 Timoteo . . . . .	232
Tito . . . . .	235
Filemon . . . . .	237
De Judio . . . . .	238
Santiago . . . . .	250
1 Pedro . . . . .	254
2 Pedro . . . . .	259
1 Juan . . . . .	262
2 Juan . . . . .	266
3 Juan . . . . .	267
Judas . . . . .	268
Kéfégétigan . . . . .	270

## I Fiyowe Uret Sénulat Mateowe

Been i niy Fiyowe Uret sénulat Mateowe fantag bé Jesu Kristowe. Sénulat Mateowey de ténoro Jesus, sani Nga i Tuluse, brab de mékgaif do rénigo no. Sénulat Mateowe soy Jesuse, Been i “Kristowe”. I atag i “Kristowe”, sani fénéмили i Tuluse méguléw. Bé do géta, ménongot-ongot i de Judio bé kégumah i fénéмили i Tuluse méguléw. Ménongot-ongot ro non bé do géta wén i de sénarigoy Tuluse muret bé kébéreh ne, bénreh roy wén i gégumahe ségétéw fénéмили i Tuluse méguléw bé de Judio. Fénggétiga Mateowey ni étéw bé Beeney Jesuse, sani “Kristowe”.

Endob i de odoroy de Judio, méndaléw ro fo bé Jesuse brab ménrarék ro de. Mélaw nongot ro bé de gémamak kukuman, sani méguléwe tidéw dob ingéde Roma, bé féluhuén i Jesuse. Endob amun ménléhuén i Jesuse dob kruse, brab amun ménlébéngén, méntébu. Mélaw tintu gétiga tom bé i Jesuse Beene foy tintuwe Nga i Tuluse.

I Mateowe, sani sémenulate bé ni Fiyu Uret, ségétéw so bé de kuyug Jesus amun ménbati sénay Jesuse dob duniyae ni. Mélaw gétiga tom bé i kéluhanay do sénulatén toow fo toow.

### *I de katufua Jesu Kristowe*

<sup>1</sup> Ay niy de dawét i de katufua Jesu Kristo, sani ségétéwe séfu Datu Dabide séfu Abraham. <sup>2</sup> I Abrahamey boh Isake. Atin i Isakey boh Jakobe. Atin i Jakobey boh Judeahe brab de dumo no sétiman boh. <sup>3</sup> Atin i Judahey boh Farese brab Sarawe. (Tamar i idéng ruwe.) Atin i Faresey boh Esrome. Atin i Esromey boh Rame. <sup>4</sup> Atin i Ramey boh Aminadabe. Atin i Aminadabey boh Nasone. Atin i Nasoney boh Salmone. <sup>5</sup> Atin i Salmoney boh Boose. (Rahab i idéng ne.) Atin i Boosey boh Obede. (Rut i idéng ne.) Atin i Obedey boh Jesewe. <sup>6</sup> Atin i Jesewey boh Datu Dabide. Atin i Dabidey boh Solomone. (I idéng ne been i bawag Uriase bé do géta.) <sup>7</sup> Atin i Solomoney boh Roboame. Atin i Roboamey boh Abiase. Atin Abias i boh Asawe. <sup>8</sup> Atin i Asawey boh Josefate. Atin i Josefatey boh Jorame. Atin i Joramey boh Osiase. <sup>9</sup> Atin i Osiasey boh Jotame. Atin i Jotamey boh Akase. Atin i Akasey boh Esekayawe. <sup>10</sup> Atin i Esekayawey boh Manasese. Atin i Manasesey boh Amone. Atin i Amoney boh Josiase. <sup>11</sup> Atin i Josiasey boh Jekoniase brab de dumo no sétiman boh. Kéluhana ro mén-uwit mangéy dob mérayue ingéd féndawét Babilonia amun ténabanan i karowe ingéd

bé girawe. <sup>12</sup> Amun diyo ron bati dob Babilonia, i Jekoniase wén i ngaén féndawét Salatiel. Atin i Salatieley boh Sorobabele. <sup>13</sup> Atin i Sorobabeley boh Abiude. Atin i Abiudey boh Eliakime. Atin i Eliakimey boh Asore. <sup>14</sup> Atin i Asorey boh Sadoke. Atin i Sadokey boh Akime. Atin i Akimey boh Eliude. <sup>15</sup> Atin i Eliudey boh Eleasare. Atin i Eleasarey boh Matane. Atin i Mataney boh Jakobe. <sup>16</sup> Atin i Jakobey boh Josehe, sani bawag Mariahe. Atin i Mariawey idéng Jesuse féndawét Kristo non Been i fénéмили i Tuluse méguléw. <sup>17</sup> Mélaw folo bra fot gékansad i de katufuan tidéw dob Abrahamey taman dob Dabide. Atin tidéw dob Dabide taman dob gaiwe mén-uwit i de Judio mangéy Babilonia folo bra fot so gékansad i de katufuan. Atin tidéw béno taman bé kéumah Kristowe folo bra fot so gékansad i de katufuan.

### *I kéumah Jesu Kristowe*

<sup>18</sup> Ay ni urete fantag bé kéumah Jesu Kristowe. I idéng ne Maria. Atin i Mariahe télnaana nén fébawagén dob ségétéwe lagéy féndawét Jose. Endob amun énda séna sébawag ro de, ménwaléy obor i Mariahe non fénobor i Rémogor i Tuluse. Enggétiga Mariahey ni. <sup>19</sup> Atin i Josehe, méntintu étéw, mélaw ménika sébawag bé Mariahe non oborén. Endob fiyo étéw i Josehe, mélaw mika de ké kémalanan i Mariahe. Mélaw ménuyot i Josehe de ké sérontos bé Mariahe sékémén saén. <sup>20</sup> Dob lala Josehe mégitung fantag bé de ni, méntéfégitoy télakiwe tidéw dob Kadnane dob téginéf ne. Ménbéreh i télakiwe ni mano, “O Jose, séfu Datu Dabid, kago magalang-galang mawag bé Mariahe, non i funa nuwe mén-obor sabaf bé barakat i Rémogor i Tuluse. <sup>21</sup> Mégénga moso i Mariahe ségétéw nga lagéy. Atin fédawétém Jesus, non Been i mémukase bé de étéwén dob de sala ro.” Been i bénreh i télakiwe.

<sup>22</sup> I funane ménrigoy kéluhanay de ni inok méttaman i fénbéreh i Kadnane bé sénarigo nuwe étéw mano, <sup>23</sup> “I kénogone waléy obor, brab mégénga nga lagéy, atin fédawétén Emanuel.” (I atag i dawéte Emanuel “Bati i Tuluse dob betome.”)

<sup>24</sup> Tidéw béno, énggétékéna i Josehe, atin nunuro noy fémandu i télakiwe de, mélaw bénawagén i Mariahe. <sup>25</sup> Endob énda ménsétifon ro fidong taman énda séna mumah i nga ne. Brab amun ménumahén, féndawétén Jesus.

## 2

### *I kégumah i de géttuwan étéw*

<sup>1</sup> I Jesuse ménumah dob ingéde féndawét Betlehem dob sakuf i dakéle ingéd féndawét Judea, amun Herod sénay méguléwe de. Atin énda mérugayén tidéw bé kéumah Jesuse, wén i de géttuwan do étéw tidéw dob

mérayue ingéd dob sébangan ménagew ro mangéy dob ingéde Jerusalem. I de ni do lagéy furung gésobut bé de tanda dob de gitoon. <sup>2</sup> Atin amun énggumah ro dob Jerusalem, ménénginsa ro maro, “Hon i gonoy Ngae, sani waléye moso Datu i de Judio? Non énggito gey i gitoone dob sébangan tanda i kéumah ne. Atin mélaw angéyé key féngadafén.”

<sup>3</sup> Atin i Herode méguléw, amun énggelingoo noy fantage bé ni ségiyo datu, toow fo ménbuku, brab beroy de kéluhanay de étéw bati dob Jerusalem. <sup>4</sup> Mélaw lénimud Herodey kéluhanay de odoroy de fadi brab de témoro bé kitab i de Judio, atin ménénginsa dob berowe mano, “Hon i gonoy umaha Kristowe de, sani fénémili i Tuluse méguléw?”

<sup>5</sup> Atin séménumbul ro maro, “Fatut mumah i Kristowe dob ingéde Betlehem dob sakuf i dakéle ni ingéd Judea. Non been i niy sénulat i sénarigoy Tuluse muret bé kébéreh ne mano, <sup>6</sup> I beeme, o Betlehem, dob dakéle ingéd Judawe, tintu békén go toow na fo gérifantad bé kéluhanay de ingéd dob Juda. Non tidéw dob beume moso i odorone méguléw bé de étéw gu do Judio.”

<sup>7</sup> Tidéw béno, féntawag Herodey de ni gétuwan do étéw tidéw dob sébangan mangéy sélimud dob beene énda i ségiyo étéw de gétingan. Atin fénénginsaa no bero ké ati tintuwe gai énggito roy gitoone ni. Amun énggétiga Herode, <sup>8</sup> sénuaguén bero mangéy Betlehem mano, “Agéw gom, toow gom fo sélédi Ngao no. Atin buluk gito gom, fégétiga kom begén inok angéyé ku so féngadafén.” <sup>9-10</sup> Tidéw béno, amun énggelingoo roy béréh Datu Herode, ménagew ro. Atin énggito ro man i gitoone ni, sani gitoone so énggito ro dob sébangane bé gétahe. Toow ro fo ménoror amun énggito ro. Atin i gitoone ni ménagew métah bero taman téménrén dob gatagay gonoy Ngae ni. Atin ménfuray ro bé gitoone ni taman dob no lawi. <sup>11</sup> Amun énggumah ro diyo, ménahur ro brab énggito roy Ngae ni brab Mariahe idéngén. Atin ménlingkuwéd ro dob adafay Ngae ni méngadaf de. Tidéw béno, bénungkal roy de balilaga tamuk nuwit ro do bélowon, do dukah, brab do fégféamut féndawét mira. Atin niray ro dob Jesuse.

<sup>12</sup> Tidéw béno, i Tuluse féningatén bero dob téginéf ruwe bé békénén séfule ro mangéy dob Datu Herode. Mélaw ménule ro mangéy dob karowe ingéd dob ségiyowe aguwon.

### *I kéféraréy ruwe mangéy Egipto*

<sup>13</sup> Amun ménagew i de ni gétuwan do étéw, méntéfégitoy télakiy Kadnane dob Josehe dob téginéf ne. Atin béréhén dob Josehe mano, “Tek go, brab uwitém i Ngae brab idéng ne méraréy mangéy dob ingéde Egipto.

Atin bati gom diyo taman béréhé ku beam ké fakay gomén mule. Non i Datu Herode séléde noy Ngae ni inok féléhué no.”

<sup>14</sup> Mélaw méntek i Josehe fiyon fo ké kérara kélungonon, atin nuwitén i Ngae ni brab idéng ne mangéy Egipto. <sup>15</sup> Atin ménbati ro diyo taman bé kéléhu Herode. Ménrigoy ni inok métuman i fénbéréh i Kadnane bé sénarigo nuwe mano, “Ténawag guy Nga guwe inok mésut tidéw Egipto.”

<sup>16</sup> Endob i Herode, amun énggétiga noy féngakaray de gétuwan do étéw tidéw sébangan, toow fo ménkérit. Mélaw sénuaguén i de sundalo mangéy Betlehem brab dob de ingéd géliwét de, inok féléhué roy kéluhanay de nga lagéy tidéw ruwo gébélintuwa i idad ne mangéy fantad. I Herode énggétiga noy idad i Ngae ni sabaf bé kébéreh i de gétuwan do étéw bé gaiwe ménsut i gitoone no.

<sup>17</sup> Mélaw méntuman i ménrugayén kébéreh i ségétéwe sénarigoy Tuluse muret bé kébéreh ne féndawét Jeremia mano, <sup>18</sup> “Wén i émbérehe énggelingoon dob ingéde Rama, kémérew brab rémuung. Non kémérew i Rakele sabaf bé de ngaén. Enda i géféror de non i kéluhanay de ngaén ménléhu.”

### *I késéfule ruwe mangéy Nasaret*

<sup>19</sup> Amun ménléhu i Datu Herode, i télakiy Kadnane méntéfégito dob Josehe dob Egipto dob téginéf ne. <sup>20</sup> Atin ménbéréh i télakiwe ni mano, “Tek go brab uwitém i Ngae ni brab idéng ne mule mangéy dob ingéde Israel. Non ménléhuén i de méméléhu damén bé Ngae ni.” <sup>21</sup> Mélaw méntek i Josehe atin nuwitén i Ngae brab idéng ne mule mangéy Israel.

<sup>22</sup> Endob énda ménbati ro dob Judea non ménggilak i Josehe non énggelingoo noy Arkelaowe ménwaléy méguléw amun ménléhu i boh ne Datu Herod. Atin féningatén man i Josehe dob téginéf ne, mélaw méntaus ro mangéy dob sakuf i dakéle ingéd féndawét Galilea. <sup>23</sup> Atin ménbati ro diyo dob ingéde féndawét Nasaret. Mélaw méntuman i ménrugayén kébéreh i de sénarigoy Tuluse muret bé kébéreh ne maro, “Fédawétén i Kristowe ‘ségétéw tidéw dob Nasaret.’”

## 3

### *I kéuret Juan Bautistawe*

<sup>1</sup> Bé no do gai, amun ménifus i firoye gébélintuwa, i Juan Bautistawe énggumah dob gonone énda i étéw de bati dob sakuf i dakéle ingéd Judea. Atin nuretén mano, <sup>2</sup> “Kailanga kom gésénule bé de sala gom brab témagak bé de tete adat gom non gedétén gumah i gaiwe méguléw i Tuluse dob de étéwén.” <sup>3</sup> I Juane ni, been i béréh i méntélatae sénarigoy Tuluse muret bé kébéreh ne féndawét Isaias mano, “Wén i ségétéwe mékes dob gonone

énda i étéw de bati mano, ‘Tafay gom i aguwoy Kadnane. Fééntang gom i aguwo nuwe.’”

<sup>4</sup> Atin kéménégal i Juane nawél buk dakél binatang féndawét kameliyo, brab kulit binatang i légét ne. Atin i amaé nuwe kasuk brab téné. <sup>5</sup> Atin ménangéy dob beeny médoowe do étéw tidéw Jerusalem, brab tidéw dob kéluhanay de ingéd sakuf Judeawe, brab de étéw bati dob de ingéd gédét dob wayége Jordan. <sup>6</sup> Atin amun fénayag roy de sala ro, bénautis Juane bero dob wayége Jordan.

<sup>7</sup> Atin médooy soy de Fariseo brab de Saduseo ménangéy dob Juane inok fébautis ro. Endob amun énggito no bero, ménbéréh i Juane mano, “I begome maak do ulé gom non tete i de rigoné kom. Sedek mangéy gom dini? Enda géféraréy gom tidéw dob kékukum i Tuluse moso ké fébautis gom saén.

<sup>8</sup> Buluk toow gomén gésénule bé de sala gom brab ténagakom i de tete adat gom, féténgténg gom i kégésénule gome bé de fiyo ula-ulané kom. <sup>9</sup> Atin kagom fégitungén de ké i Tuluse fukase no begom dob de sala gom sabaf bé begom i de séfu Abraham. Béréhé ku begom, fakay géféwaléyoy Tuluse séfu Abrahamey de batéw ni. <sup>10</sup> Béleewe ni, gédétén i kékukum i Tuluse bé de tete étéw. Ségiléw bé falakule méntafayén ménténa dob darir i kayéwe inok i de kayéw énda mégonok ro fiyo, tuwongén atin ibéréndob aféye inok métuwég. <sup>11</sup> I begéne, bautiso ku begom bé wayége inok fégitu gom énggésénule gom bé de sala gom. Endob wén nay gégumah gétung begén brab bautisé no begom bé Rémogor i Tuluse brab aféye. Toow na fo gérotor bé begéne. Fiyon foy safatos ne, énda médaitu de mibit. <sup>12</sup> Féganané noy de fiyo étéw bé de tete étéw ségiléw bé ségétéwe métof. I fégétéof ne diyo dob kémér ne inok fégétéofen bé énré ne brab fégétimuén bé faréye dob kiwot ne. I de ukofén tuwégé no dob aféye énda émfandaén.”

#### *I kébautise bé Jesuse*

<sup>13</sup> Bé no do gai, ménagéw i Jesuse tidéw Galilea mangéy dob wayége ni Jordan. Atin ménfégédét dob Juane inok fébautis de. <sup>14</sup> Endob géléé Juane damén mano, “Bégéney fatute bautiso mo, sedek Beem uman i mangéy fébautis begén?”

<sup>15</sup> Endob séménumbul i Jesuse mano, “Fédayaém saén béleewe ni. Non fatut rigoné toy kéluhanay kétayay Tuluse.” Mélaw ménagayun i Juane.

<sup>16</sup> Atin amun ménbautisén i Jesuse, géménaun tidéw dob wayége. Sonom béno, ménungka i lawayo, brab énggito noy Rémogor i Tuluse ménlus maak marafati brab méntérimféna dob Beene. <sup>17</sup> Atin wén i ménbéréhe tidéw dob lawayo mano, “Been

i niy Nga guwe. Toow fo kégédawa ku brab tintu késuwata ku.”

## 4

### *Téngkad Satanasey Jesuse*

<sup>1</sup> Tidéw béno, i Rémogor i Tuluse fénanangguwitén i Jesuse mangéy dob gonone énda i étéw de bati, inok i odoroy de saitan féndawét Satanas géténgkada noy Jesuse rémigo tete. <sup>2</sup> Atin amun diyo i Jesuse, énda ménamaén bé rugay i ménfote folo gétérésangan. Mélaw toow fo ménlayaf. <sup>3</sup> Atin énggumah i Satanase dob Beene brab ménbéréh mano, “Amuk Beemey Nga i Tuluse, féwaléyém amaén i de batéw ni.”

<sup>4</sup> Endob séménumbul i Jesuse mano, “Wén i Ménsulate Kébéréh i Tuluse mano, ‘Békén amaén saén i funay étéwe méuyag. Yamula kailangay étéwey kéluhanay kébéréh i Tuluse.’”

<sup>5</sup> Tidéw béno, nuwit Satanasey Jesuse mangéy dob Jerusalem brab nuwitén mangéy dob toowe fo gérotor bérunyoy lawi i Tuluse. <sup>6</sup> Atin ménsébéréh man bé Jesuse mano, “Amuk Beemey Nga i Tuluse, antéfor go. Non wén i Ménsulate Kébéréh i Tuluse mano, ‘Suguéy Tulusey de télaki no démiyaga Beem. Brab sakémé ro Beem inok énda émfali go bé de batéw, fiyon i de sékéyém.’”

<sup>7</sup> Tidéw béno, séménumbul i Jesuse mano, “Endob wén soy Ménsulate Kébéréh i Tuluse mano, ‘Kago téngkadén i Kadnane Tulusém rémigo bé kétaya muwe rigonén.’”

<sup>8</sup> Tidéw béno, nuwit Satanasey Jesuse mangéy dob uruk i gérotore fo tuduk. Brab fénténgténgén dey kéluhanay de ingéd dob duniyae ni brab kéluhanay de ungangéy de ni. <sup>9</sup> Atin ménbéréh man i Satanase mano, “Buluk lingkuwédo mo begén brab féngadafé mo begén, iray gu Beem i kéluhanay de ni.”

<sup>10</sup> Endob séménumbul i Jesuse mano, “Féraréy gon Satanas! Enda féngadafé ku beem non wén i Ménsulate Kébéréh i Tuluse mano, ‘Lingkuwéd go saén dob adafay Kadnane Tulusém. Been saén i féngadafé muwe.’”

<sup>11</sup> Tidéw béno, i Satanase ténagakén i Jesuse. Atin énggumah i de télaki brab ténalima roy Jesuse.

### *Féngganay Jesusey galbék ne*

<sup>12</sup> Atin i Herode fénféférisu noy Juan Bautistawe. Atin amun énggélíngoo Jesuse, ménule mangéy Galilea. <sup>13</sup> Atin téménara saén dob ingéd ne Nasaret, brab ménangéy bati dob Kafernaum dob fédoror i dogote Galilea, fíngé dob ingéde Sabuton brab Nef-tali. <sup>14</sup> Ménrigoy ni inok métuman i kébéréh i sénarigoy Tuluse féndawét Isaias mano, <sup>15</sup> “I de étéw bati dob de ingéd Sabuton brab Nef-tali, brab fíngé dob dogote, brab dob

difar i wayége Jordan, brab de étéw békén Judio bati dob Galilea, <sup>16</sup> fiyon fo ké i de ni étéw maak bati ro dob délémoné non békén ro do méngintulus, gégito ro dakél solo. Atin fiyon fo ké maak kélungonon dob berowe non mégilak ro bé kéléhue, réméndaw i soloe ni dob berowe.”

<sup>17</sup> Atin tidéw bé no gai, féngganaya Jesusey kéuret ne mano, “Fatut gésénule gom bé de sala gom brab tagak gom i de tete adat gom, non gédétén i gaiwe féguléwoy Tulusey de étéwén.”

*Ténawag Jesusey de fot gétéw fatatugés*

<sup>18</sup> Wén i no sébaan fuweh, ménagéw i Jesusey dob doror i dogote Galilea. Atin bé lala ne magéw, énggito noy ruwowe gétéw lagéy sétiman idéng. I dawét ruwe Andres brab Simon (féndawét so Pedro). Nibér roy biyala ruwe dob dogote non fatatugés ro. <sup>19</sup> Ménbéréh i Jesusey dob berowe mano, “Enggomén, odor gom Begén, atin kagomé séméléd sédo. Tidéw béleewe ni, fésélédé ku begom étéw, inok modor ro so Begén.” <sup>20</sup> Sonom béno, ténagak roy de biyala ro atin ménodor ro bé Jesuse. <sup>21</sup> Bé lala ruwe magéw, énggito Jesusey de ségiyo lagéy do sétiman idéng. I dawét ruwe Santiago brab Juan. Diyo ro dob awang ruwe beroy boh ruwe féndawét Sebedeo. Fégiimué roy biyala ruwe. Atin ténabar Jesuse bero. <sup>22</sup> Atin sonom béno, ténagak roy boh ruwe dob awange atin ménodor ro bé Jesuse.

*Nuwa Jesusey de médoó do étéw*

<sup>23</sup> Atin i Jesuse séménugud mangéy dob kéluhanay de ingéd dob Galilea. Atin téménoro dob de lawi féngadafan kay de Judio, brab nuretén i Fiyowe Uret fantag bé kféféguléw i Tuluse, brab nuwaén i de déméruun do séségiyo-giyo do déruun. <sup>24</sup> Atin, ménsélalag i bantuga Jesusey dob kéluhanay de ingéd dob Siria. Mélaw i de étéw nuwit ro mangéy dob Beeney kéluhanay de déméruun bé séségiyo-giyowe do déruun, do démwawét, brab do rénahuko saitan, brab do rebengén, brab do kimoyén. Atin énggéféadi-adino Jesuse bero kéluhanan. <sup>25</sup> Atin toow fo médooy de étéw ménfuray bé Jesuse, do tidéw Galilea, brab do tidéw Dekapolis (i atag i Dekapolise “Do Folo Ingéd”), brab tidéw Jerusalem, brab tidéw Judea, brab tidéw dob difar i wayége Jordan.

## 5

*I urete dob burure*

<sup>1</sup> Atin i Jesuse amun énggito noy médoowe do étéw ménlimud, ménénagé mangéy dob burure, atin ménsar diyo. Atin i de kuyugén ménfégédét ro dob Beene. <sup>2</sup> Atin ténoro Jesuse bero mano, <sup>3</sup> “Moror i de étéw gétiga ro énda gérigo ro fiyo saliyo ké tabangay Tuluse bero, non féguléwoy Tuluse bero. <sup>4</sup> Moror i

de étéw rémuung, non i Tuluse féfiyoné noy de fédéw ro. <sup>5</sup> Moror i de térifantad étéw non gédoté roy ati fénasad i Tuluse. <sup>6</sup> Moror i de étéw toow fo méuyot ro rémigo bé kétayay Tuluse, non tabangay Tuluse de bero inok gérigono ro. <sup>7</sup> Moror i de étéw mégédaw bé de ségiyo étéw, non mégédaw i Tuluse bero. <sup>8</sup> Moror i de étéw malinis i de fédéw ro dob adafay Tuluse, non gito roy Tuluse moso. <sup>9</sup> Moror i de étéw do gémélé bé de sétiboh étéw, non fédawétén ro do nga i Tuluse. <sup>10</sup> Moror i de étéw férasayén sabaf bé kétintuy adat ruwe dob adafay Tuluse, non féguléwoy Tuluse bero.

<sup>11</sup> “Moror gom ké féngirasén gom brab férasayén gom brab béréhon gome tete bé kéluhanay tugie sabaf bé kéunur gome Begén. <sup>12</sup> Féguwaya gom bé no gai gégumah, non i baras gome toow fo médoó diyo dob lawayo. Non loo so bé niy kféférasay i de étéw bé do énggétah do sénarigoy Tuluse muret bé kébéréh ne.”

<sup>13</sup> Atin féntaus Jesusey kétoro ne mano, “I begome ségiléw gom bé timuse lénawék dob amaéne inok fiyoy nonom ne. Non sabaf bé begome, waléy fiyoy de étéw dob duniyae ni. Endob amuk mékédan i kétasik i timuse, éndaén géséfule i kétasik ne. Endaén i lagaén, brab fatut ibéréh brab gédaay de étéw ké témara ro.

<sup>14</sup> “Atin i begome ségiléw gom bé soloe réméndaw dob délémoné ni duniya. Loo so bé ni, i ingéde féntindég dob uruk i burure, énda mébunyéén. <sup>15</sup> Atin énda i ségétéw tumumon solo inok ahuré no dob fénléngkébé kuréng. Yamula fédiyoé no dob fédongone de inok réméndaw dob lawie. Mélaw gégitoy kéluhanay de étéw diyo. <sup>16</sup> Mélaw ségiléw gom bé de solo, non fatut rigo gom i fiyowe sénga tékélid, inok i de étéw gito ro, atin dayéw ro mélaw i Abay gome Tuluse dob lawayo.”

*Fantag bé kitabé*

<sup>17</sup> Atin féntaus Jesusey kétoro ne mano, “Kagom fégitungén de ké ménagéyu dini inok kédané kuy kitabé niray Moiseuse taloo noy de kétoro i de sénarigoy Tuluse muret bé kébéréh ne. Non énda ménangéyu dini inok kédané ku, yamula ménangéyu dini inok tumané ku. <sup>18</sup> Béréhé ku begom i toowe, taman énda méalfa i duniyae ni brab lawayo, énda so mékédan i kitabe, fiyon kloh saén, taman énda méutan i kéluhanane. <sup>19</sup> Mélaw i étéwe mémélis bé kitabé fiyon fo ké toow saén fo kloh sugu, brab toroé no so dob de étéw i éndaén kailanga no odoron, toow na fo gérifantad bé de étéw féguléwoy Tuluse. Endob i étéwe modor bé kitabé brab toroé noy de étéw bé fatut odororo, toow fo gérotor bé de étéw féguléwoy Tuluse. <sup>20</sup> Béréhé ku begom, amuk énda toow na fo métintuy de rigoné kom bé de rigonéy

de Fariseo brab de témoro bé kitabe, énda géahur gom dob kéféguléw i Tuluse.”

*Fantang bé kékérite*

<sup>21</sup> Atin féntaus Jesusey kétoro ne mano, “Enggélíngoo kom i ténoro i de katufua kom maro, ‘Kagom méméléhu, atin i méméléhue fatut mékukum.’ <sup>22</sup> Endob toroé ku begom béleewe ni: I étéwe mékérít bé dumo nuwe, mékukum. Atin amuk wén i étéw béréhé no, ‘Léngléngén go’ dob dumo nuwe, fatut mékukum dob adafay de kékédéwan. Atin amuk wén i étéw émbéréh dob dumo nuwe mano, ‘Dufang go’, médait mangéy dob gonoy aféye dob uleono emferno. <sup>23</sup> Mélaw amuk diyo go dob féngadafane témulak dob Tuluse, atin gétédémo mo wén i rénigo mo sala dob dumo muwe, <sup>24</sup> tagakém nay tulaké muwe dob adafay ahayane tulakan, atin fagayay go angéy dob dumo muwe brab séfiyo gom inok éndaén tete i de fédéw gom. Tidéw béno, séfule go brab irayém i tulak me dob Tuluse.

<sup>25</sup> “Atin buluk wén i dumo mo sébanil beem, atin uwité no beem dob kémukume inok sétiyawan gom, buluk diyo gom séna dob de aguwon, béréh go fiyo inok géséfagayun gom, brab éndaén mélaw kailanga kom i, mangéye dob adafay kémukume. Non amuk Enda, atéé no beem dob kémukume, brab i kémukume atéé no beem dob de sundalo, brab i de sundalo férisuné ro beem. <sup>26</sup> Atin béréhé kuy toowe, énda moso géésut go tidéw dob férisunone taman énda gébayada moy kéluhanay késalaa muwe.”

*Fantang bé kélamfae*

<sup>27</sup> Atin féntaus Jesusey kétoro ne mano, “Enggélíngoo kom i kétoroe mano, ‘Kago sétayan saliyo bé bawag me.’ <sup>28</sup> Endob toroé ku begom béleewe, bé fiyon fo ké ténéngténg i lagéye saén i libune brab mingar de sétayan, énggésalaén non maak léménamfa i fédéw ne. <sup>29</sup> Mélaw amuk i funa muwe ménsala i moto muwe fingé kuwonon, lésitém atin ibéré. Non mas na fiyo ké kulang i réfa i lowoh me ké ganaf i lowoh me atin géangéy go dob uleono emferno. <sup>30</sup> Atin amuk i funa muwe ménsala i kuwonone kéméré, kéléngém, atin ibéré. Non mas na fiyo ké kulang i réfa i lowoh me ké ganaf i lowoh me atin géangéy go dob uleono emferno.”

*Fantang bé késégélake*

<sup>31</sup> Atin féntaus Jesusey kétoro ne mano, “Wén soy kétoroe mano, ‘I lagéye gémélak bé bawag ne fatut iraya no bé sulate émbéréh ménségélak ron.’ <sup>32</sup> Endob toroé ku begom béleewe, amuk wén i ségétéw lagéy gélaké noy bawag ne éndob énda mon bigaén i ni libun, toow fo ménsala i nan lagéy. Non been i ménfélamfae bé libuno no ké mawag

man ségiyo lagéy. Atin énggélamfa soy lagéye ménawag bé libune gélak loo bé nan.”

<sup>33</sup> Atin féntaus Jesusey kétoro ne mano, “Enggélíngoo kom soy ténoro i katufua tome mano, ‘Amuk sémafa go dob Kadnane, tintu kailanga mo tumanén i safa me ni.’ <sup>34</sup> Endob toroé ku begom béleewe, amuk rémigo gom fasad, kagom sémafa. Kagom fégésafa i lawayo non been i niy saray Tuluse. <sup>35</sup> Atin kagom fégésafa i duniyae ni non been i niy ténaa nuwe bé de sékéyén. Atin kagom fégésafa i ingéde Jerusalem non been i niy gonoy barakatane Datu bati moso. <sup>36</sup> Atin kagom sémafa ké makom, ‘Méléhu na dob ni.’ Non énda géféfuteo kom taloo no géféitama kom i fiyon suwaréw bé de buk gom. <sup>37</sup> Béréh gom saén, ‘Hoo’, taloo no ‘Enda.’ Amuk umana kom i nan bé de safa, tidéw dob Satanasey nan kébéréh gom.”

*Fantang bé késulie*

<sup>38</sup> Atin féntaus Jesusey kétoro ne mano, “Enggélíngoo kom i kétoroe mano, ‘Fatut séfésuliém i motowe bé motowe, brab i kiféne bé kiféne.’ <sup>39</sup> Endob toroé ku begom béleewe ni, kagom sulion i étéwe réménigo tete dob begome. Ufama, amuk wén i téménamfiling bé fiféy me fingé kuwonon, fédayaém de témamfiling so bé ségéalae de. <sup>40</sup> Atin amuk wén i muwit beem dob adafay kémukume inok gédoté noy kégal me irayém soy kamisita muwe de. <sup>41</sup> Atin amuk wén i sundalo fégésé no beem mobo bé de uwitéw bé ségékilomitrowe saén, oboém taman ruwo gékilometro. <sup>42</sup> Atin iraya moy mongote dob beeme. Atin amuk wén i méuyot méléet dob beeme, fééléto mo.”

*Fantang bé késébanile*

<sup>43</sup> Atin féntaus Jesusey kétoro ne mano, “Atin énggélíngoo kom i kétoroe mano, ‘Fégédaw go bé de dumo mo séloyuk, atin férarék go bé de sébanil beem.’ <sup>44</sup> Endob ay niy kagéne kétoro begom: Fégédaw gom bé de sébanil begom. Atin dasala kom i de émférasay begom, <sup>45</sup> inok waléy gom do nga i Abay gome Tulus dob lawayo. Non i Tuluse féréndawé no soy térérsange dob de fiyo étéw loo so dob de tete étéw. Atin féranaay Tuluse soy de étéw rémigo fiyo loo soy de étéw rémigo tete. <sup>46</sup> Amuk mégédaw gom saén bé de étéw mégédaw begom, énda i baras i Tuluse de begom. I de lémfiful kémubra buwis rignoné roy nan, fiyon fo ké énda fiyo ro étéw. <sup>47</sup> Atin amuk sébéréh gom saén bé de dumo gom séloyuk, énda i funa kom médayéw. Non fiyon i de bekén méngintulus rignoné roy nan. <sup>48</sup> I Abay gome Tulus dob lawayo, rignoné no saén i fiyowe. Brab i begome fatut so rignoné kom saén i fiyowe.”



## 6

<sup>1</sup> Atin féntaus Jesusey kétoro ne mano, “Kagom rémigo bé fiyowe émfésuwat bé Tuluse dob téngaangay de étéw saén inok dayéwéy de étéw begom. Non amuk rigoné kom i ni, énda i ségiyo baras gédoté kom tidéw dob Abay gome Tulus dob lawayo.

<sup>2</sup> “Mélaw amuk tabanga moy ségétéwe méskinan bé kéiraya muwe de limus, kago fégetuwan de dob de ségiyo loo bé de étéw do ubo-ubo saén méngintulus rigoné ro dob de lawi féngadafan brab dob de aguwon. Rigoné roy ni inok dayéwéy de étéw bero. Mélaw béréhé ku begom i toowe, énggédot roy kéluhanay de baras ro, atin énda i baras i Tuluse de bero. <sup>3-4</sup> Endob amuk tabanga moy ségétéwe méskinan, kago fégito-gitoy kériyo muwe de inok fiyon i de dumo mo do séloyuk énda gétiga ro de. Endob fiyon fo ké énda gitoy de étéw de, i Abay me Tulus gito noy réningo muwe brab Been i marasane beem.”

*Fantag bé kédasale*

<sup>5</sup> Atin féntaus Jesusey kétoro ne mano, “Buluk démasal gom, kagom iringén i de étéw do ubo-ubo saén méngintulus. Méuyot ro témindég démasal dob de lawi féngadafan brab dob de aguwon inok gitoy de étéw bero. Béréhé ku begom i toowe, i gédoté ruwe saén bé nan rigoné roy kédayéw i de dumo étéw bero. <sup>6</sup> Endob buluk démasal gom, angéy gom dob sibéy gome brab fintu gom, atin dasal gom dob Tuluse Abay gom dob lawayo énda gito gom de. Amuk rigoné kom i ni, gédoté kom i baras gome tidéw dob Tuluse Abay gom. Beene saén i gégitowe bé kéluhanay rigoné kome.

<sup>7</sup> “Buluk démasal gom, kagom dulién i kédasale énda i atagén. I de étéw énda gétiga roy Tuluse rigoné roy ni non maro ké fégélíngoyéy Tuluse bero ké mérugay i kédasal ruwe. <sup>8</sup> Kagom iringén bero. Enda kailanga kom i mérugaye kédasal non gétagay Abay gomey kailanga kome bé énda séna nongot gom de.

<sup>9</sup> “Ay niy ufamawe de. Dasal gom loo bé ni, ‘Abay gey dob lawayo, kéluhanay étéwe damén féngadafé ro Beem. <sup>10</sup> Fégléwo mo damén i kéluhanay de étéw inok i kétaya muwe mériyo dob fantade ni loo so bé mérigowe dob lawayo. <sup>11</sup> Irayan gey bé amaé keye bé ni gai. <sup>12</sup> Fésagada mo begey bé de sala gey loo so bé kérésagad geye bé de énggésala begey. <sup>13</sup> Kago fédayaén begey météngkad rémigo sala. Brab diyaga mo begey bé Satanase.’

<sup>14</sup> “Buluk fésagada kom i de étéw réménigo tete dob begome, i Boh gome dob lawayo fésagada no so begom. <sup>15</sup> Endob buluk énda fésagada kom i de ménsala dob begome, i Abay gome Tulus énda so fésagada no begom.”

<sup>16</sup> Atin féntaus Jesusey kétoro ne mano, “Atin amuk fuwasa gom inok tintu méngintulus, kagom féélumén i falas gome loo bé rigonéy de ubo-ubo saén méngintulus. Féélumé roy falas ruwe inok fégétiga ro bé de étéw bé mélayaf ro non fuwasa ro. Béréhé ku begom i toowe, énda i ségiyo baras gédoté ro saliyo bé kédayéw i de étéw. <sup>17</sup> Endob amuk fuwasa gom, furauf gom brab suwat gom, <sup>18</sup> inok i de ségiyo étéw, énda gétiga ro de ké fuwasa gom. Atin mélaw i Abay gome Tulus énda gitono. Been saén i gégitowe bé rigoné kome, atin barasa no begom.

<sup>19</sup> “Atin kagom mitong kurta brab do languntaman dob duniyae ni, non mébinasa ro. Non i de tamuk dob duniyae ni keke i de ifés taloo non tangisén taloo no fénakawén non géahur i de ménakaw dob de lawi gom. <sup>20</sup> Endob fatut itong gom i de baras gom dob lawayo non énda i ifés de méminasa taloo no tangisén taloo no fénakawén. <sup>21</sup> Non i gonoy de tamuk gom, been soy gulaané kome.

<sup>22</sup> “I motowe maak solo i lowohe. Buluk fiyoy moto muwe, maak géfékaya i kéluhanay lowoh me non gégitoy go. <sup>23</sup> Endob buluk ménsadil i de moto mo, maak délémon i lowoh me non énda gégitoy go. Mélaw buluk i solo me waléy délémon, toow fo délémon mon.

<sup>24</sup> “Enda i sugu-suguén fakay galbéko no séréngan i ruwowe gétéw amu. Non amuk mégédaw bé ségétéwe de, mérarék bé ségétéwe de. Taloo no odoroy noy kétayag ségétéwe de, brab siyawé noy ségétéwe de. Mélaw énda fakay gom modor bé Tuluse amuk fégitungé kom saén i kurtae.

<sup>25</sup> “Mélaw béréhé ku begom, kagom émbuku fantag bé kéuyag gome, bé ati amaé kome look inémé kome, taloo noy lowoh gome, bé ati kégalé kome. Non wén nay labi na fo mélaga bé amaéne funa kom méuyag, brab wén nay labi na mélaga bé kégalé kay de lowoh gom. <sup>26</sup> Fégitung gom i de kloh manok. Enda mohok ro taloo no kémétéw ro, brab énda mitong ro amaén dob de kiwot. Endob i Abay gome Tulus féamaé no so bero. Atin mas gom na balilaga bé de kloh manok! <sup>27</sup> Enda i étéw géfétaah bé umul ne bé kébuku ne, fiyon ségéuras saén.

<sup>28</sup> “Enda soy funa kom émbuku fantag bé kégale. Fégitung gom i de flores. Méruk ro fiyon fo ké énda gémalbék ro taloo no rémigo ro do kégal ro. <sup>29</sup> Endob béréhé ku begom, fiyon i Solomone toow fo kawasa datu, énda i kégalén loo bé de fiyo do falasén do flores. <sup>30</sup> Endob buluk loo bé nan i kékéfégal i Tuluse bé de kéroon méuyag ro saén singkow, atin bé démoe Ibérén ro brab inohén, békén ba fékégalé no so begom? Toow fo kloh i kékéféginugut gome.

<sup>31</sup> “Mélaw kagom émbuku bé amaé kome brab inémé kome brab kégalé kome. <sup>32</sup> Non

i de étéw énda méngintulus ro, been i nan i fégitungé ruwe taman émbuku ro. Endob i Abay gome Tulus gétiga noy kéluhanay kailanga kome. <sup>33</sup> Mélaw kagom émbuku. Yamula fatut kétaya kom ké méguléw i Tuluse dob begome brab kétaya kom rémigo bé métintuwe, atin mélaw irayay Tuluse begom bé kéluhanay de éntingayén kailanga kom. <sup>34</sup> Atin mélaw kagom émbuku béleewe ni fantag bé ati mérigowe démo, fégitung gom fo ké gégumahén. Kagomén umanan i kékérégéna kome béleewe bé kébukue fantag bé démoe.”

## 7

### *Kagom kémukum*

<sup>1</sup> Atin féntaus Jesusey kétoro ne mano, “Kagom kukumén i de étéw, inok i Tuluse énda so kukumé no begom. <sup>2</sup> Non i kékukum gome bé de ségiyo étéw, iringéy Tuluse so ké kukumé no begom. Atin i kériyo gome bé de ségiyo étéw, rigonéy Tuluse so dob begome. <sup>3</sup> Sedek gito moy klohe sala i dumo muwe, endob énda gito moy kaame sala toow na fo dakél? <sup>4</sup> Atin béréhé mo dob dumo muwe mamó, ‘Adih, téréno moy nan salaém.’ Endob wén i kaame sala toow na fo dakél. <sup>5</sup> Fédayéw-dayéw go, éndob békén go fiyo étéw. Téréno mo na métah i kaame sala toow na fo dakél, inok gétabanga moy dumo muwe émfétéren bé kaane kloh sala.

<sup>6</sup> “Atin kagom iray i mékétéfuwe dob de itu. Non amuk rigoné kom, kekeé ro saén begom. Atin kagom iray i balilagae fégonoén perlas dob de babuy. Non amuk rigoné kom, daa ro saén. Mélaw kagom témoro bé Fiyowe Uret dob de étéw miika mégélingo.”

### *Ongot gom dob Tuluse*

<sup>7</sup> Atin féntaus Jesusey kétoro ne mano, “Ongot gom dob Tuluse atin irayén begom. Séléd gom, atin gito gom. Tawag gom dob bégawane, atin i fintue ungraén inok géahur gom. <sup>8</sup> Non i kéluhanay de mongot dob Tuluse, gédoté ro. Atin i kéluhanay de séméléd, gito ro. Atin i kéluhanay de témawag dob bégawane, géahur ro. <sup>9</sup> Ufama, ségétéw go boh, atin i nga me mongot fan, énda iraya mo de batéw. <sup>10</sup> Taloo no mongot sédo, énda iraya mo de ulé. <sup>11</sup> Fiyon fo ké tete gom étéw, gétiga kom soy miraye bé éntingayéne fiyo dob de nga gom. Labi nay Tuluse toow fo fiyo, gétiga noy miraye fiyo na dob begome. Beeny Boh gome dob lawayo, brab irayén i de fiyo do éntingayén dob de étéw mongot dob Beene.

<sup>12</sup> “Buluy kétaya kome rigonéy de étéw dob begome, rigo gom so dob berowe. Non been i atag i kéluhanay de sugu dob kitabé niray Moiseuse brab de kétoro i de sénarigoy Tuluse muret bé kébéréh ne.”

### *I mérate bégawan*

<sup>13</sup> Atin féntaus Jesusey kétoro ne mano, “Ahur gom dob mérate bégawan mangey dob lawayo. Non toow fo buka i bégawane mangéy dob uleone emferno atin médooy de étéw muntul de non magad i kéagéw ruwe diyo. <sup>14</sup> Endob i mérate bégawan mangéy dob umule magufusa, mérégén i kéuntule de. Mélaw énda médooy étéwe géuntul de.

<sup>15</sup> “Atin ingat gom inok énda géunur gom bé de ubo-ubo sénarigoy Tuluse muret bé kébéréh ne. Non fiyon fo ké ubo-ubo ro mégédaw maak do ménorom ayam, tintu tete i adat ruwe brab binasané ro begom. Non i toowe, ségiléw ro bé de mérayar do binatang. <sup>16-18</sup> Endob gélolo gom bero sabaf bé de rigoné ro. Ufama, énda i fiyo kayéw mégonok bé tete onok, taloo no tete kayéw mégonok bé fiyowe onok. I sulu-suluwe énda mégonokén bé manggae. Brab i kayéwe suwaran énda mégonokén saging. I fiyowe kayéw mégonok saén fiyo, atin i tete kayéw mégonok saén tete. <sup>19</sup> Atin i kayéwe énda mégonokén fiyo, tuwongén brab ibéréh dob aféye inok inohén. <sup>20</sup> Mélaw gélolo gom i de ubo-ubo sénarigoy Tuluse sabaf bé de tete rigoné ro.

<sup>21</sup> “Enda kéluhanay de étéw témawag Bégén maro, ‘Kadnan, o Kadnan,’ géangéy ro dob lawayo. Endob i de étéw rémigo bé kétayay Abay guwe Tulus, bero saén i géangéy dob lawayo. <sup>22</sup> Bé gaiwe gégumah i kékukum i Tuluse, médooy de étéw émbéréh dob Bégéne maro, ‘Kadnan, o Kadnan, nuret gey i kébéréh i Tuluse nusar gey i dawét me. Atin nusar gey soy dawét me fégédédél bé de saitan tidéw dob de étéw rénahuko ro, brab rénigo gey i de médooy do mékégaif dob dawét me.’ <sup>23</sup> Endob béréhé ku bero maku, ‘Enda gélolo gu begom. Férayu gom dob Bégéne. Begom i de étéw do rémigo tete.’

<sup>24</sup> “Béréhé ku begom i fantage bé de mégélingo bé kébéréh guwe brab odoro ro. Berowey ségiléwe bé ségétéwe métilédédéw réménigo lawi brab féntindégén i de liléyén dob émbagére batéw. <sup>25</sup> Amun mérégés i ranae brab énggégumah i dunuke brab énggébéla diyo i émbagére réfuruh, énda méntuwongén non féntindég dob rotor i batéwe.

<sup>26</sup> “Endob i étéwe énggélingo bé de kébéréh gu éndob énda odoro no de, ségiléw bé du-fange étéw féntindégén i lawi ne dob faréke saén. <sup>27</sup> Mélaw amun ménrégés i ranae brab énggégumah i dunuke brab énggébéla diyo i émbagére réfuruh, méntuwong brab toow fo mémbinasa.”

<sup>28</sup> Amun énggilid i Jesuse témoro bé de ni, ménggaif i de médooy do étéw bé kétoro ne. <sup>29</sup> Non békén ségiléw i kétoro ne bé de maistéroy kitabé i de Judio. Non énda saén ténoroen i kékégitung i de ségiyo étéw. Yamula ténoroen i kaane kékégitung.

## 8

*Nuwa Jesusey ségétéwe fémuteén*

<sup>1</sup> Tidéw béno, lémnudug i Jesuse tidéw dob burure ni. Atin ménfuray i de médoo do étéw.

<sup>2</sup> Tidéw béno, wén i ségétéwe étéw fémuteén ménangéy dob Beene brab léméningkuwéd dob adafa nuwe. Atin ménbéréh i fémuteéne ni étéw mano, “Kadnan, buluk méuyot go, géféadi-adino mo begén.”

<sup>3</sup> Atin i Jesuse béntéréh i kémér ne brab kénuwahén, brab ménbéréh mano, “Méuyotu. Adi-adi go.” Sonom béno, ménkédan i fémute ne brab ménadi-adi. <sup>4</sup> Atin bénréh Jesuse dob beene bé békén ureté no dob de ségiyo étéw, brab sénuguén mano, “Ay go dob fadie inok féténgtégém ménadi-adi gon. Tidéw béno, tulak go, loo bé ménbéréhe dob kitabé tidéw dob Moisesé inok gétingay kéluhanay de étéw ménadi-adi gon.”

*Nuwa Jesusey sugu-suguéy sundalowe*

<sup>5</sup> Amun énggumah i Jesuse dob ingéde Kafernaum, wén i ségétéwe Romano kafitay de sundalo ménangéy dob Beene. Atin ménongot tabang dob Jesuse mano, <sup>6</sup> “Maistéro, wén i sugu-sugué kuwe toow fo fasang déméruun béni. Diyo dob lawi guwe énda gélékutohén.”

<sup>7</sup> Atin ménbéréh i Jesuse mano, “Na, mangéyu diyaan atin uwaé ku.”

<sup>8</sup> Endob bang i kafitane, “Kagonén damén mangéy dob lawi guwe. Non toow go fo gérotor étéw atin mélaw énda médaitu témangaf Beem dob lawi guwe. Endob toow go fo barakatan, mélaw béréhéme saén i sugu me mamó, ‘Adi-adi gon,’ atin gétiga kuy waléy adi-adiy sugu-sugué kuwe. <sup>9</sup> Gétiga kuy ni non wén i mas gérotor sundalo mémanduon begén. Brab wén soy do sundalo fémanduo ku. Atin buluk béréhé ku dob ségétéwe de, ‘Angéy go diyoo,’ mangéy diyo. Brab buluk maku dob ségétéwe de, ‘Énggon,’ témingé. Brab buluk béréhé ku dob sugu-sugué kuwe, ‘Rigo moy ni,’ rignoné no.”

<sup>10</sup> Amun énggélungoo Jesusey ni, ménggaif de. Atin ménbéréh dob de étéw furay dob Beene mano, “Béréhé ku begom i toowe, fiyon foy de Judio, énda i ségétéw énggito gu loo bé ni kéféngintoowén étéw. <sup>11</sup> Béréhé ku begom, bé gaiwe gégumah méguléw i Tuluse, médooy de étéw gégumah tidéw dob kéluhanay sugud i duniyae, fiyon i de békén Judio. Atin i Tuluse féguléwo no bero beroy de katufua tom ro Abraham, Isak, brab Jakob. <sup>12</sup> Endob wén i de Judio diyo ro so damén éndob kénda no bero mangéy dob délénone gonon dob liyuwe. Diyo ro kémérew brab kémigét i de kifé ro.” <sup>13</sup> Atin ménbéréh i Jesuse dob kafitane ni mano, “Ule gon, ménadi-adinén i sugu-sugué muwe loo bé kéunur me mérigó.”

Atin i sugu-sugué nuwe, ménadi-adi bé no so uras.

*Nuwa Jesusey de médoo do étéw*

<sup>14</sup> Tidéw béno, méntaus i Jesuse mangéy dob lawi Pedrowe. Diyo énggito noy térima Pedrowe libun déméruun gara-gara toow fo méduf. <sup>15</sup> Atin i Jesuse kénuwahén i kémér i libune ni. Atin sonom béno, ménkédan i kééduf ne brab ménadi-adi. Atin méntek dénuwoto no bero.

<sup>16</sup> Amun mélédén i térésange, i de étéw nuwit roy de médoo do sénaitan ménangéy dob Jesuse. Ménbéréh saén i Jesuse atin fénféraryén i de saitan. Atin nuwa Jesusey kéluhanay de déméruun diyo. <sup>17</sup> Réngigo noy ni inok tumané noy kébérah i sénarigoy Tuluse muret bé kébérah ne féndawét Isaias mano, “Uwaé noy de déruu tom, atin kédané noy de tete tom.”

<sup>18</sup> Atin amun énggito Jesusey de médoo étéw géliwét de, sénuguén i de kuyugén mifar dob dogote. <sup>19</sup> Tidéw béno, wén i témoroé bé kitabé ménfégdét dob Jesuse brab ménbéréh mano, “Maistéro, modoru Beem fiyon udenén ayo mo.”

<sup>20</sup> Endob ménbéréh i Jesuse mano, “I de kufés, wén i tosong ahuro ro. Brab i de kloh manok, wén i salag ro. Endob i Nga i Kéilawane, saní Begéne, énda i gono ku témérén taloo no fidong. Mélaw toow go fo kérégénan amuk modor go Begén.”

<sup>21</sup> Atin wén i ségétéwe kuyugén ménbéréh dob Jesuse mano, “Maistéro, modoru Beem. Endob tungkasém na begén métah mangéy lémbéng bé boh guwe.”

<sup>22</sup> Endob séménumbul i Jesuse mano, “Félébéngém bé de étéw énda munur Begén i de ménléhu ro. Endob i beeme, odor go Begén.”

*Féntéré Jesusey défuke*

<sup>23</sup> Tidéw béno, i Jesuse brab de kuyugén ménda ro awang mifar dob dogote. <sup>24</sup> Atin téménékow ménggumah i émbagére défuk. Atin séndamfa-damfaay de bagél i awange, taman gédét méléled. Endob i Jesuse énggéfidong. <sup>25</sup> Atin ménangéy i de kuyugén dob Beene, brab nulég ro maro, “Kadnan, tabangén gey! Gédét tom méléhu!”

<sup>26</sup> Séménumbul i Jesuse mano, “Sedek mégilak gom? Toow fo kloh i kéunur gome.” Tidéw béno, téménindég i Jesuse brab ménbéréh dob réfuruhe brab dob de bagél mano, “Térén gom!” Sonom béno, téménrén i défuke brab méntinanék i dogote. <sup>27</sup> Ménggaif i kéluhanay de kuyugé Jesus. Atin ménsébéréh-béréh ro maro, “Ati keeyén i Jesuse ni? Fiyon i réfuruhe brab de bagél modor ro bé sugu ne.”

*Dénédel Jesusey de saitan*

<sup>28</sup> Amun énggumah i ro Jesuse dob difar i dogote dob ingéde Gerasa, béalak i de ruwo gétéw lagéy rénahukoy de saitan. Bati ro dob

de takub do lébéng atin toow ro fo émaraw. Mélaw énda i do étéw gétara diyo. <sup>29</sup> Atin ménkes ro maro, “Nga i Tuluse, ati rigoné muwe dob begeye? Aw ménangéy go ba dini inok kukumé mo begey fiyon fo ké énda séna gégumah i fatute gai?”

<sup>30</sup> Enda mérayuén dob no gonon, diyo i médoowe do babuy témabtab. <sup>31</sup> Atin nongot i de saitan dob Jesuse maro, “Amuk féféraréy mo begey, féahurém begey dob do babuy diyo.”

<sup>32</sup> Atin bang Jesuse, “Agéw gom.” Mélaw ménsut i de saitan tidéw dob do étéw no brab ménahur ro dob de babuy ni. Sonom béno, i kéluhanay de babuy ni, ménraréy ro mangéy dob fingase brab ménantéfor ro mangéy dob dogote atin ménléné ro.

<sup>33</sup> Atin i de étéw témalima bé de babuy ni amun énggito roy ni ménrigo, ménségéta ro mangéy dob ingéde brab nuret roy kéluhanay de rénigo Jesus brab ati ménrigowe dob de lagéy sénaitanan bé gétahe. <sup>34</sup> Mélaw ménangéy diyo i kéluhanay de étéw dob ingéde ni inok malak bé Jesuse. Atin amun énggito ro, nongot roy Jesuse ké tékédan dob no gonon ro.

## 9

### *Nuwa Jesusey ségétéwe kimoyén*

<sup>1</sup> Tidéw béno, ménda i Jesuse dob awange atin ménséfulé mifar dob dogote brab ménule mangéy dob ingéd ne. <sup>2</sup> Diyo, énggumah i de étéw ménuwit bé ségétéwe kimoyén ténanggung ro mangéy dob Jesuse. Amun énggito Jesusey kéféngintoow ruwe, ménbéréh dob ni étéw kimoyén mano, “Adih, kago émbuku! I de salaém ménfésagadén.”

<sup>3</sup> Tidéw béno, wén i de témoro bé kitabé ménsébéréh ro dob de fédéw ro maro, “Embéréh mékémurka i ni étéw, non réféngé noy Tuluse.”

<sup>4</sup> Edob i Jesuse gésobuto noy de itunga ro. Mélaw ménbéréh mano, “Sedek tete i kéféngitung gome loo bé nan? <sup>5</sup> Toow na fo mélému ké béréhén, ‘I de salaém ménfésagadén.’ Non énda gito no ké wén i barakat gu de rémigo. Endob toow fo mérégén ké béréhén. ‘Tindég go brab agéw go.’ Non giton ké wén i barakat gu de rémigo. <sup>6</sup> Endob féfégétiga ku begom i fantage bé Nga i Kéilawane, sani Begéne. Wén i barakat gu brab kuwagib gu dob duniyae ni émfésagad bé de sala.” Tidéw béno, bénrénéh dob ni kimoyén mano. “Tindég go brab ule go unwitém mule i iroo muwa nan.”

<sup>7</sup> Sonom béno, téménindég i kimoyéne ni brab ménagéw mule. <sup>8</sup> I de médoow do ménlimud do étéw diyo, amun énggito roy ni, ménggilak ro, atin dénayéw roy Tuluse non

nirayén dob Jesusey kuwagibé émfésagad bé de sala.

### *I kétawage bé Mateowe*

<sup>9</sup> Tidéw béno, méntékédan i Jesuse dob no gonon. Atin i lala ne magéw, énggito noy ségétéwe étéw kémubra buwis féndawét Mateo, ménsar dob de kubranan buwis. Atin ménbéréh i Jesuse mano, “Odor go Begén.” Atin téménindég i Mateowe brab ménodor de.

<sup>10</sup> Tidéw béno, i Jesuse beroy de kuyugén ménama ro dob lawi Mateowe séréngan bé de médoow do kémubra buwis brab de ségiyo so do tete étéw. <sup>11</sup> Atin amun énggito de Fariseoy ni, ménénginsa ro dob de kuyugéy Jesus maro, “Sedek ménsélawék i Maistéro gome mama bé de kémubra buwis brab de ségiyo tete étéw?”

<sup>12</sup> Endob i Jesuse énggélungoo no brab ménbéréh mano, “I de fiyo kéfélowoho no, énda kailanga roy muwae, éndob kailangay de wén déruu no. <sup>13</sup> Enda ménangéy dini inok tabaré kuy de métintu étéw, éndob ménangéy dini inok tabaré kuy de wén salaén inok gésénule ro. Basa gom brab tantu gom féngitung i ni Ménsulat Kébéréh i Tuluse mano, ‘Mas méuyotu de ké ségédaw gom bé kétulak gome.’ ”

### *Fantag bé kéfuwasawe*

<sup>14</sup> Tidéw béno, wén i de kuyugéy Juan Bautista ménangéy ro dob Jesuse brab ménénginsa ro maro, “I begeye, sénga tékélid fuwasa gey. Loo so bé de Fariseo. Sedek énda fuwasay de kaam kuyug?”

<sup>15</sup> Atin sénumbulo Jesuse bero mano, “Ufama, i de kana dob uyote énda waléy tete i de fédéw ro taman énda tékédan i témérimawe lagéy. Endob amuk gégumah i gaiwe ké édotén nén i témérimawe lagéy dob berowe, been nay no fuwasa ro. Ségiléw so bé de kagéng kuyug. non amuk diniwu séna, énda fuwasa ro.”

<sup>16</sup> Tidéw béno, nuret Jesusey sébaane binuwaya fantag bé sébidanay mantuwe kétoroén brab tafaye kétoro i de Judio. Ménbéréh mano, “Enda i étéw usaré noy mantuwe safut féngétabungén bé tafaye kégal. Non amuk rigoné no, kéménkén i mantuwe safut, atin méfendet i tafaye kégal, atin minut gétimeal i rédet ne. <sup>17</sup> Brab énda i étéw mahur bé mantuwe arak dob tafaye ahuron arak rénigo bé kulit i ayame. Non amuk rigoné no, mébétus i mantuwe arak dob tafaye ahuron brab mébinasa brab méitis i mantuwe arak. Yamula fatut i mantuwe arak ahuréng dob mantuwe kulit féféngon de, atin méitong kéluhanan.”

### *Nuwa Jesusey ruwowe gétéw libun*

<sup>18</sup> I lala Jesuse émbéréh séna, énggégumah i ségétéwe odoroy de Judio, brab

ménlingkuwéd dob adafa Jesuse brab ménbéréh mano, "I nga guwe libun mantu séna ménléhu. Endob amuk modor go begén brab angéyé mo gamakén, gétiga kuy tébule." <sup>19</sup> Mélaw téménindég i Jesuse brab ménodor bé ni lagéy. Ménodor soy de kuyugén.

<sup>20-21</sup> Amun ménagéw ro, ménggéta i ségétéwe libun bero. I ni libun foloén bra ruwo gébelintuwa i kéranas i adat ne. Amun ménfuray bé Jesuse, ménggitung mano, "Amuk gékuwaha ku saén i kégal ne, adi-adiwu." Mélaw ménangéy dob ségang Jesuse brab kénuwahén i kégal ne.

<sup>22</sup> Tidéw béno, séménling i Jesuse brab amun énggito noy ni libun, sénbérého no mano, "Di, kago émbuku. I kéféngintoo mey funa muwe ménadi-adi." Sonom beno, i ni libun ménadi-adi.

<sup>23</sup> Tidéw béno, méntaus i Jesuse mangéy dob lawi i odoroy de Judio ni. Amun énggumah, énggito noy de médoos do étéw diyo. Rémuung ro brab selekén ro brab émbaat ro fo.

<sup>24</sup> Ménbéréh i Jesuse mano, "Tékédan gom! Enda ménléhu i ngae ni. Fidong saén." Tidéw béno, sénbayat roy Jesuse bé bénréh ne.

<sup>25</sup> Amun ménsut i de étéw dob lawie, ménahur i Jesuse dob sibéy i ngae ni libun, brab génamakén dob kémér ne. Bé béno so, méntek i ngae ni. <sup>26</sup> Tidéw béno, i urete fantag bé ni réngo Jesuse ménlégébé dob kéluhanay de ingéd diyo.

#### *Nuwa Jesusey ruwowe gétéw langafén*

<sup>27</sup> Tidéw béno, méntékédan i Jesuse tidéw diyo. Atin bé lala ne magéw, ménfuray i ruwowe gétéw lagéy do langafén. Méntek ro maro, "Séfu Datu Dabid, fégedaw go begey!"

<sup>28</sup> Atin amun ménahur i Jesuse dob lawie, ménfégedét i de langafén ni. Atin fénénginsaa Jesuse bero mano, "Aw munur gom ba ké géuwaa ku begom?"

Atin séménumbul ro maro, "Hoo Maistéro, munur gey."

<sup>29</sup> Tidéw béno, i Jesuse kénuwahén i de moto ro brab ménbéréh mano, "Mérido dob begome loo bé kéunur gome de." <sup>30</sup> Atin sonom béno, énggégito ro. Atin ménégét i kébérah Jesuse de bero mano, "Kagom uretén i ni dob de étéw."

<sup>31</sup> Endob amun ménagéw ro, nuret roy ni réngo Jesuse. Atin mélaw ménséfélalag i bantuga nuwe dob kéluhanay de ingéd diyo.

#### *Nuwa Jesusey ségétéwe mow*

<sup>32</sup> Lala ruwe magéw i de ni ruwo gétéw do éndaén do langafén ro, énggumah i de étéw nuwit ro dob Jesusey ségétéwe mow sabaf bé saitané rénahuko no. <sup>33</sup> Atin dénédél Jesusey saitané ni. Atin sonom béno, énggébéréh i lagéye ni non éndaén mowén. Atin i kéluhanay de étéw diyo ménggaif ro, brab ménbéréh ro maro, "Enda

séna énggégito gey bé mékégaife loo bé ni dob ingéd tome ni Israel."

<sup>34</sup> Endob ménbéréh i de Fariseo maro, "I funa nuwe gédédél do saitan non wén i barakatén tidéw dob Satanase sani odoroy de saitan."

<sup>35</sup> Tidéw béno, ménagéw i Jesuse mangéy sémgud dob kéluhanay de ingéd diyo. Atin téménoro dob de lawi féngadafan kay de Judio, brab nuretén i Fiyowe Uret fantag bé kéfégulab i Tuluse bé de étéwén. Atin nuwaén soy de médoos do étéw bé ségiyogiyowe do déruun. <sup>36</sup> Atin amun énggito noy de médoos do étéw ménlimud dob Beene, ménuray i na nuwe bero, non ménbuku ro brab kailanga roy tabange. Maak do bili-bili énda i mifat bero. <sup>37</sup> Mélaw ménbéréh dob de kuyugén mano, "I de ni do médoos do étéw méuyot munur dob Begéne, ségiléw ro bé bukae safad fatutéw kétéwén. Endob kloh saén i kémétéwe de, sani de témoro bero munur. <sup>38</sup> Mélaw dasal gom dob Tuluse inok umana noy de gémbalék témabangan betom kémétéw."

## 10

### *I de folo bra ruwo gétéw kuyug Jesuse*

<sup>1</sup> Atin i Jesuse ténawagéw i de folo bra ruwo gétéw kuyugén mangéy dob Beene. Atin niraya no bero barakat inok gédédél ro do saitan brab géuwaa roy de kéluhanay de ségiyogiyoo do déruun. <sup>2</sup> Ay niy de dawét i de Apostol, sani de sénuwu: Simon (féndawétén so Pedro), brab Andres dumo no séteman idéng, Santiago brab Juan sani de nga Sebedeo, <sup>3</sup> brab Filipi, brab Bartolome, brab Tomas, brab Mateo sani kémubrawe buwis, brab Santiago nga Alfeo, brab Tadeo, <sup>4</sup> brab Simon ségétéw toow fo gulaané noy ingéd ne, brab Judas Iskariot sani ménfékéfoe bé Jesuse.

### *Sénuwu Jesusey de folo bra ruwo gétéw kuyugén*

<sup>5</sup> Atin sénuwu Jesusey de ni folo bra ruwo gétéw kuyugén mano, "Kagom mangéy dob de ingéd i de békén Judio taloo no dob de ingéd sakuf i dakéle ingéd Samaria. <sup>6</sup> Yamula, agéw gom mangéy dob de étéw dob Israel non ségiléw ro bé de méntadin do bili-bili. <sup>7</sup> Agéw gom brab uret gom makom, 'Gédétén i gaiwe féguléwuy Tulusey de étéwén.' <sup>8</sup> Atin uwa gom i de déméruun, tébule gom i de ménléhu, féadi-adi gom i de fémuteén, féféraréy gom i de saitan. Atin kagom fébayadén i de étéw, non énda fébayadé ku begom bé kéiraya kuwe begom. <sup>9</sup> Atin kagom muwit kurta, fiyon bélowon look filak, taloo no do kloh kurta. <sup>10</sup> Atin kagom muwit réban, taloo no tugé, taloo no lékasa kom kégal look sinilas. Non i de tabanga

kom fatut tabanga ro so begom bé atiy kailanga kome.

<sup>11</sup> “Atin amuk gégumah gom dob sébaane ingéd, séléd gom i sэгэтéwe méuyot témayakuf begom. Atin bati gom diyo taman tékédan gom tidéw dob no ingéd. <sup>12</sup> Atin buluk mahur gom dob lawie, béréh gom bé féfiyonéy Tulusey de étéw bati dob ni lawi. <sup>13</sup> Buluk i de étéw dob nan lawi tayakufé ro begom, féfiyonéy Tuluse bero. Endob buluk énda tayakufé ro begom, énda so féfiyonéy Tuluse bero. <sup>14</sup> Atin buluk gégumah gom dob sébaane ingéd énda tayakufé ro begom taloo no énda fégingoé ro begom, tékédan gom diyo. Atin tag-tag gom i de bubuk sébuwan dob de sékéy gom inok fégétiga kom bero bé kukuméy Tuluse bero. <sup>15</sup> Béréhé ku begom i toowe, bé gaiwe kémukum i Tuluse, toow na fo gétimal i kékukum ne bero bé de tete étéw ménbati dob de ingéd Sodom brab Gomorah bé gétahe.

<sup>16</sup> “Fégélingo gom, féuwit gu begom maak do bili-bili mangéy dob kérara i de itu talun. Mélaw ingat gom brab fatut rigo gom saén i fiyowe. <sup>17</sup> Ingat gom non wén i de étéw kémfo begom brab uwité ro begom mangéy dob adafay kémukume. Atin badasé ro begom dob de lawi féngadafan kay de Judio. <sup>18</sup> Atin uwité ro begom dob adafay de méguléw begom brab de datu inok kukumé ro begom sabaf begom i do kuyug gu. Endob been i niy gaiwe uret gom i Fiyowe Uret dob berowe brab dob de békén Judio. <sup>19</sup> Atin amuk kéfoé ro begom brab kukumé ro begom, kagom émbuku fantag bé atiy béréhé kome bero look ati kébéréh gome. Non bé no gai, iray begom i fatute kébéréh fégésambul gom bero. <sup>20</sup> Non i kébéréhe békén tidéw dob itunga kome, yamula i Rémogor i Abay gome Tulus i émfébéréhe begom.

<sup>21</sup> “Atin bé no gai, wén i de étéw atéé roy de dumo ro sétiman idéng inok féléhuén. Loo soy rignonéy de abay dob de nga ro. Atin wén soy de nga waléy sébanil bé de lukés ro brab féféléhu ro. <sup>22</sup> Atin i kéluhanay de étéw mérarék ro begom sabaf bé kéunur gome Begén. Endob ati fédaydaye munur taman dob tamfadane, méfukas ro. <sup>23</sup> Atin amuk férasayé ro begom dob sébaane ingéd, féraréy gom mangéy dob ségiyowe ingéd. Béréhé ku begom i toowe, énda séna géfégilido kom i galbék gome dob kéluhanay de ingéd dob Israel, séfuleun mangéy dini, sani Nga i Kéilawane.

<sup>24</sup> “I méganade békén gérotor na bé témoroe de. Atin i sugu-suguéne békén gérotor na bé amu ne. <sup>25</sup> Mélaw i méganade fatut moror ké iringé noy témoroe de. Atin i sugu-suguéne fatut moror ké iringé noy amu ne. Atin amuk i uléw i ségékurénge féndawét do étéw Beelsebul sani Satanase, labi na fo tete i fédawét ruwe bé kuréngo nuwe. Mélaw

amuk féngiras i de étéw Begén, toow na fo gétimal i kéféngiras ruwe begom.

<sup>26</sup> “Mélaw kagom mégilak bé étéwe. I kéluhanay rignonéy de étéw do méntéléb, mébukeh so moso. Brab i kéluhanay de méntéléb, mébukeh so moso. Brab i kéluhanay de ménbunéy, giton so moso. <sup>27</sup> Atin i béréhé kuwe ni dob begome saén, fatut béréhé gom so dob de médoó do étéw. Atin i ségurawé kuwe dob begome, fatut toro gom dob de médoó do étéw. <sup>28</sup> Atin kagom mégilak bé de géféléhu bé lowoh gome, éndob énda géféléhuo roy rémogor gome. Yamula fatut gom mégilak bé Tuluse non wén i barakatén méminasa bé de lowoh gom loo soy de rémogor gom dob uleono emferno. <sup>29</sup> Ufama, i de kloh manok toow fo méméumy kéfébélye bero dob fadiyane. Endob énda i sébaan mélawu bero dob fantade ké énda fédayaéy Abay tome de Tulus. <sup>30-31</sup> Atin i begome mas gom na balilaga bé de kloh manok. Mélaw kagom mégilak, non i Tuluse tunganulé no begom. I Tuluse gétiga no fiyon i kédooy de buk gom dob de uléw gom.

<sup>32</sup> “Atin ati murete fantag bé kéunur ne Begén dob de étéw, uret ku soy fantage bé kéunur ne dob Abay guwe Tulus dob lawayo. <sup>33</sup> Endob ati démirunge bé kéunur ne Begén dob adafay de étéw, dirungé ku so moso i kéunur ne dob adafay Abay guwe Tulus.

<sup>34</sup> “Atin kagom fégitungén de ké ménangéy dini inok kédané kuy késétibohe dob duniyae ni. Békén. Yamula ménangéy dini inok sétiboh i de étéw. Non i de étéw munur Begén brab de étéw énda munur Begén waléy ro sébanil. <sup>35</sup> Non ménangéy dini inok fésébanilé kuy de boh brab de nga ro lagéy. Loo so bé de idéng brab de nga ro libun. Loo soy de libun bé de térima ro libun. <sup>36</sup> Atin mélaw i toowe na fo sébanil i de étéw, beroy de dumo no ségékuréng.

<sup>37</sup> “Atin i étéwe mas nay kéimu ne bé de lukésén bé Begéne, énda médaítén waléy kuyug gu. Atin i étéwe mas nay kéimu ne bé de ngaén bé Begéne, énda so médaítén waléy kuyug gu. <sup>38</sup> Atin fiyon atiy étéwe énda furayén Begén bé kékédayday ne bé de mérégén fiyon fo ké féléhuén dob kruse, énda médaítén waléy kuyug gu. <sup>39</sup> Atin i étéwe méuyot émféraru bé umul ne dob duniyae ni, méléhu. Endob i étéwe méléhu bé kékufay ne Begén, gédoté noy umule magufusa.

<sup>40</sup> “I étéwe témayakuf begom, tayakufé no so Begén. Atin i étéwe témayakuf Begén, tayakufé no soy Tuluse ménféuwit Begén.

<sup>41</sup> Atin i étéwe témayakuf bé sénarigoy Tuluse sabaf sénugu i Tuluse, gédoté noy barase ségiléw bé nan sarigon. Atin i étéwe témayakuf bé métintuwe étéw sabaf bé kékintuy adat ne, gédoté noy barase ségiléw bé nan métintu étéw. <sup>42</sup> Atin béréhé ku begom i toowe, i étéwe miray

fiyon ségétabu saén mélégénéy wayég dob ségétéwe gérifantad kuyug ro sabaf bé been i kuyug gu, tintu gédoté noy barase.”

## 11

### *I kéfénginsa Juan Bautistawe*

<sup>1</sup> Amun énggilid i kétoro Jesuse bé de folo bra ruwo gétéw kuyugén, ménagéw mangéy dob de ingéd diyo inok témoro brab muret diyo.

<sup>2</sup> Bé béno do gai, ménférisuy Juan Bautistawe. Atin amun énggélino noy fantage bé de rigoéné Kristo, sénuéno i de dumo bé de kuyugén mangéy dob Beene inok ménginsa. <sup>3</sup> Atin fénénginsaa ro maro, “Beeme bay no bénréh Juane gégumah ongot-ongoté key, taloo no ongot-ongot gey na ségiyo?”

<sup>4</sup> Atin séménumbul i Jesuse mano, “Séfulé gom mangéy dob Juane brab uret gom i de énggito gom do rénigo gu brab de énggélino kom. <sup>5</sup> I de langafén énggégito ro, brab i de fikat énggéagéw ro, brab i de fémutéén ménadi-adi ro, brab i de bokongén énggégélingo ro, brab i de ménléhu méntébule ro. Atin ureté kuy Fiyowe Uret dob de méskinan. <sup>6</sup> Atin béreh gom so dob Juane bé toow fo moror i étéwe énda ruwo-ruwoy kéféngintoow ne Begén.”

<sup>7</sup> Amun ménséfulé i de kuyug Juan, ménbéreh i Jesuse dob de médoos do étéw fantag bé Juane mano, “Ati nangéy gome ténéngténg dob gonone énda i étéw de bati? Ségétéw maak kéroon faniréy réfurehe? Békén, non i kéumur Juane énda méfélukén loo bé kéroone. <sup>8</sup> Aw ménangéy gom diyo inok angéy kom téngténgén i ségétéwe lagéy toow fo fiyoy kégal ne? Békén, non i de étéw kémégal ro fiyo bati ro dob de toow fo fiyo lawi kay de datu. <sup>9</sup> Ati nangéy gome ténéngténg? Ségétéw étéw sénarigoy Tuluse muret? Hoo, éndob bérehé ku begom, i Juane békén saén sénarigon muret bé kébéreh i Tuluse. <sup>10</sup> Non been i Juane niy fantage bé Ménsulate Kébéreh i Tuluse mano, ‘Sugué kuy sugu-sugué kuwe métah Beem. Been i témafaye bé kégumah me métah Beem.’ ”

<sup>11</sup> Atin féntaus Jesusey kébéreh ne mano, “Bérehé ku begom i toowe, énda i toow na fo gérotor bé Juane bé kéluhanay de étéw ménumah. Endob dob gaiwe féguléwoy Tulusey de étéwén, i kéluhanay de térifantad étéw sakuf i Tuluse, toow ro na fo gérotor bé Juane béleewe ni. <sup>12-13</sup> Bé énda séna témoro i Juane de, i Moisesé brab de sénarigoy Tuluse nuret ron i fantage bé kéféguléw i Tuluse bé de étéwén. Atin tidéw dob gaiwe féngganaya Juaney kéuret ne taman so béleewe ni, médooy de étéw sétiboh inok fégésé ro mahur de. <sup>14</sup> Wén i kébéreh i de énggétah do sénarigoy Tuluse muret bé

gégumah Eliase inok ureté noy kégumah Kristowe. Atin Juan i téménumane bé nan kébéreh. Fiyo ké géunur gom bé ni. <sup>15</sup> Mélaw féntay gom fo toow amuk méuyot gom de ké gésobuto kom i de ni.

<sup>16</sup> “Ati féségiléwo kuwe bé de étéw méuyag béni? Ségiléw gom bé de nga ménsar dob fadiyane brab mika ro mégérémet. Tabar i de dumo ro bero maro, <sup>17</sup> ‘I begeye ménségagung gey, éndob énda ménsayag gom. Brab léméninggég gey linggég ménléhuon, éndob énda kéménrew gom.’ <sup>18</sup> Non ménangéy diniy Juan Bautistawe ménfuwasa brab énda méninémen arak. Brab bénréh i de étéw sénaitanan kun. <sup>19</sup> Endob i Nga i Kéilawane, sani Begéne, ménangéy dini, brab mamau atin minému. Brab ménbéreh i de étéw, ‘Ay niy ségétéwe étéw arumén mama brab miném arak, brab wén i dumo no do lémful kémubra buwis brab do tete étéw.’ Endob i kégétigay Tuluse, énggigon toow fo méntintu sabaf bé de rénigo no.”

<sup>20</sup> Tidéw béno, dénowoy Jesusey de étéw dob de ingéd gonon no réménigo médoos do mékégaif. Non énda fo ténagak roy de sala ro fiyon fo ké énggito roy de mékégaif rénigo Jesuse. <sup>21</sup> Ménbérehé mano, “Mékégédaw-gédaw gom do étéw bati dob Korasin, brab de begom do bati dob Betsaida. Buluk i de mékégaif rénigo gu dob begome ménrigo so dob de ingéd Tiro brab Sidon, ménrugayén damén i de étéw diyo kéménégal do saku brab rénigono ro awéw i de lowoh ro inok fégétiga roy énggésénule ro bé de sala ro. <sup>22</sup> Mélaw bérehé ku begom, dob gaiwe kémukum i Tuluse, toow na fo gétimeal i kékukum ne begom bé kékukum ne bé de étéw dob Tiro brab Sidon. <sup>23</sup> Brab begome do étéw bati dob Kafernaum, méuyot gom téfégérotor taman dob lawayo. Endob ibéren gom mangéy dob uleono emferno. Amuk i de mékégaif rénigo gu dob begome ménrigo so dob ingéde Sodom, énda damén ménbinasa no non énggésénule ro damén. <sup>24</sup> Bérehé ku begom, dob gaiwe kémukum i Tuluse, toow na fo gétimeal i kékukum ne begom bé kékukum ne bé de étéw dob Sodom.”

<sup>25</sup> Bé béno, i Jesuse déménasal mano, “Abay, Kadnay lawayo brab fantade, fésalamata ku Beem non fénggétiga moy toowe dob de étéw énda i féngganad ro, brab bénuméyém i toowe dob de étéw do métilédted brab énggéféganad. <sup>26</sup> Hoo Abay, ménrigo ni non kaam kétayan brab késuwatan.”

<sup>27</sup> Tidéw béno, ménbéreh man i Jesuse dob de étéw mano, “Sénarig i Abay guwey kéluhanane dob Begéne. Enda i gétigan bé atiy Ngae saliyo bé Abaye. Brab énda i gétigan bé atiy Abaye saliyo bé Ngae, brab fiyon atiy kétayay Ngae fégétiga no de.

28 “I kéluhana kome do lugotén gémalbék bé kéfukas gome bé de lowoh gom dob de sala gom, angéy gom dob Begéne atin fétéréne ku begom non fukasé ku begom. 29 Unur gom Begén brab iring gom Begén. Non térifantadu mégédaw begom brab fétéréne ku begom. 30 Non i de sugu gu begom toow fo magad, brab énda mérégén i de férijo gu begom.”

## 12

### *Fantag bé gaiy kétérene*

1 Enda mérugayén tidéw béno, wén i no sébaan fuweh gai kétéren, i Jesuse brab de kuyugén téménara ro dob de médoos do faréy. Atin mélayaf i de kuyugén, mélaw méndot ro do faréy atin ménama ro. 2 Endob i de Fariseo diyo, amun énggito roy ni réniro, ménbéréh ro dob Jesuse maro, “Téngténgém! I de kuyugém fénlis roy kitab tome fantag bé gaiwe kétéren.”

3 Séménumbul i Jesuse mano, “Aw énda ba énggébasana kom i réniro Datu Dabide? Wén i no gai toow fo ménlayaf beroy de sundalo no. 4 Atin ménahur ro dob lawi i Tuluse brab namaén i fane niray dob Tuluse beroy de sundalo no. Réniro noy ni fiyon fo ké dob kitabe, fadi saén i fakaye mama bé ni fan. 5 Aw énda séna énggébasana kom i ni dob kitabé niray Moise? Sénulatén bé fatut gémalbék i de fadi dob lawi i Tuluse sénga gai kétéren. Endob békén sala i ni. 6 Béréhé ku begom, wén i ségétéwe étéw dini mas na balilaga bé lawi i Tuluse. 7 Wén i Ménsulate Kébéréh i Tuluse mano, ‘Mas na méuyotu de ké ségédaw gom bé kétulak gome.’ Amuk énggésoboto kom i ni, énda damén kukumé kom i de étéw énda i sala ro. 8 Non i Nga i Kéilawane, sani Begéne, wén i kuwagib gu fantag bé ati fakaye dob gaiy kétérene.”

### *Nuwa Jesusey ségétéwe étéw ménsadil i kémérne*

9 Tidéw béno, méntékédan i Jesuse diyo atin ménagéw mangéy dob sébaane lawi féngadafan kay de Judio. 10 Atin diyo soy ségétéwe lagéy ménsadil i ségéalae bé kémérne. Atin diyo soy de étéw méuyot témba bé Jesuse réniro bé éndae fakay dob kitabe. Mélaw ménénginsa ro dob Jesuse maro, “Aw fakay ba dob kitab tomy muwae ké gai kétéren?”

11 Atin séménumbul i Jesuse mano, “Ufama, buluk i bili-bili gome mélawu dob ménaléme kalut bé gai kétérene, ati rigoné kome? Békén ba abangé kom inok géésut fiyon fo ké gai kétéren? 12 Atin i étéwe toow na fo balilaga bé bili-biliwe! Mélaw fakay dob kitab tomy témabange fiyon fo ké gai kétéren.” 13 Tidéw béno, ménbéréh i Jesuse dob lagéy ni ménsadil i kémérne mano, “Bétéren i kémérne me.”

Atin béntéren i kémérne, atin sonom béno ménadi-adi loo bé ségéalae de. 14 Tidéw béno, i de Fariseo ménsut ro, atin ménséuret-uret ro bé ati kéléféhu ruwe bé Jesuse.

15 Atin énggétiga Jesusey de rigoné ro, mélaw méntékédan diyo. Atin ménfuray dob Beeney de médoos do étéw. Atin nuwaén i kéluhanay de démériun bero. 16 Endob sénuguén bero bé békén ureté roy fantage bé Beene dob de ségiyo étéw, 17 inok métuman i fénbéréh i Tuluse bé sénarigo nuwe muret féndawét Isaias mano, 18 “Beeney sugu-sugué kuwe fénemili gu. Toow fo kégedawa ku brab késuwata ku. Fédiyoé kuy Rémogor guwe dob Beene, atin ureté noy fantage bé kékukum guwe dob kéluhanay de étéw. 19 Enda sédélén taloo no méngeng ké émbéréh, atin énda métanugén ké émbéréh dob de aguwon. 20 Enda ikaa noy de étéw do maak fénréku férebong taloo no lémat-lémat solo. Yamula tabanga no bero. Atin fédayday taman géfétabana noy kéintuwe. 21 Atin médooy de étéw dob séngae ingéd sémarig dob Beene.” Been i béréh Isaiase.

### *Dénédel Jesusey saitane*

22 Tidéw béno, wén i de étéw nuwit ro dob Jesusey ségétéwe langafén brab mow sabaf bé rénahukoy saitane. Atin nuwa Jesuse inok gégiro brab gébéreh. 23 Atin i kéluhanay de étéw ménggaif ro brab ménséfenginsanginsa ro maro, “Aw Been keyén i séfu Datu Dabide, sani Kristowe ongot-ongoté tom?”

24 Endob i de Fariseo, amun énggélango roy kébéreh i de étéw ni, ménbéréh ro maro, “Beelsebul, sani Satanase, odoroy de saitan, i ménirayane de barakat inok gédédél bé de saitan.”

25 Endob énggétiga Jesusey de itunga ro, mélaw ménbéréh dob berowe mano, “Ufama, amuk i de étéw dob sébaane ingéd énda géséfagayun ro brab sétiboh ro, mébinasay nan ingéd. Taloo no i ségékurénge étéw dob sébaane lawi énda so géséfagayun ro brab sékirit ro, éndaén séko sétifon ro. 26 Mélaw buluk i Satanase démedél bé saitan, mésebaad ro brab énda so gétingég i fangangatura nuwe. 27 Bénéh guy ni non béréhé kom i démedélu saitan bé barakat i Satanase. Atin i fégdédél i de kuyug gom de, énda usaré roy barakat i Satanase. Mélaw fégitoy de kuyug gom békén ka Satanas i barakat guwe. 28 Endob démedélu saitan bé barakat i Rémogor i Tuluse. Atin mélaw énggiton énggégumah dob begomey gaiwe méguléw i Tuluse dob de étéwén.”

29 Tidéw béno, fénggétiga Jesuse bero bé toow na fo barakatan i Beene bé Satanase mano, “Ufama, i Satanase ségiléw bé ségétéwe émbagé étéw mantay bé lawi ne. Enda i ségétéw étéw géahur dob lawi i émbagére ni étéw atin tulisé noy tamuk ne



taman énda na géikéto no de na méta. Tidéw béno, gétuliso noy kéluhanay tamuk ne.

<sup>30</sup> “I éndae modor Begén, sébanil Begén. Brab i éndae témabangan Begén, alangé no Begén. <sup>31</sup> Mélaw béréhé ku begom, i kéluhanay sala i de étéw brab de tete kébéreh ro, géfésagadan. Endob i émbéréhe tete fantag bé Rémogor i Tuluse, énda géfasagada no. <sup>32</sup> I émbéréhe tete fantag bé Nga i Kéilawane, sani Begéne, émfésagadan. Endob i émbéréhe tete fantag bé Rémogor i Tuluse, énda émfésagada no bé de ni gai taloo no dob de gai gégumah moso.”

<sup>33</sup> Atin ménbéréh man i Jesuse mano, “Ufama, i fiyowe kayéw mégonok bé fiyowe onok, atin i tete kayéw mégonok bé tete onok. I de séségiyo-giyo do kayéw gélolon ro dob onok ruwe. <sup>34</sup> I de begom maak do ulé gom. Enda gébéreh gom fiyo non toow gom fo tete. Non ati diyoe dob de fédéw gom, been soy nan i béréhéy de ba gom. <sup>35</sup> I métintuwe étéw rémigo fiyo, non i diyoe dob fédéw ne fiyo. Atin i tete étéw rémigo tete non i diyoe dob fédéw ne tete.”

<sup>36</sup> “Atin béréhé ku begom, dob gaiwe kémukum i Tuluse, i séngae étéw mékukum sabaf bé de kébérehén énda i lantékén. <sup>37</sup> Non i de kébéreh gom, been i nan i fégekukume begom. Amuk i kébéreh gome fiyo, énda mékukum gom. Endob amuk tete, mékukum gom.”

<sup>38</sup> Tidéw béno, wén i de Fariseo brab do témoro bé kitabé ménbéréh dob Jesuse maro, “Maistéro, méuyot gey de ké gito gey Beem rémigo mékégaif.”

<sup>39</sup> Atin ménbéréh i Jesuse dob berowe mano, “I begome do étéw méuyag béleewe ni, toow gom fo do tete brab békén gom méngintulus. Mongot gom sébaan mékégaif. Endob énda i féténg-téng de begom saliyu bé mékégaife loo bé ménrigowe dob Jonase, sani énggétahe sénarigoy Tuluse. <sup>40</sup> Non i Jonase, ménbati téléw gétérésangan dob sur i toowe fo dakél sédo. Atin loo bé nan i Nga i Kéilawane, sani Begéne, batiu moso téléw gétérésangan dob bukag i fantade. <sup>41</sup> Atin dob gaiwe kémukum i Tuluse, i de énggétah do étéw dob Ninibé témindég ro témo begom do étéw méuyag béni. Non ménunur ro brab énggésénule ro bé uret Jonase. Endob béleewe ni, wén i mas na gérotor bé Jonase ay ni. Gido loo énda gésénule gom. <sup>42</sup> Atin dob gaiwe kémukum i Tuluse, témindég i baiwe tidéw dob ingéde Seba, brab téboé no begom. Non séménugud tidéw dob mérayue inok fégélinoé noy kégétigay Datue Solomon. Endob béleewe ni wén i ségétéwe mas na gérotor bé Solomone ay ni.”

<sup>43</sup> Ménbéréh man i Jesuse mano, “Buluk i saitane mésut tidéw dob étéwe rénahuko no, sémuğud dob tikare gonon séméled téréno no. Endob buluk énda i gito no téréno no,

<sup>44</sup> émbéréh mano, ‘Séfuleu dob étéwe sungu gono ku téngak gu. Tidéw béno, séfule brab gito noy tafaye ténidéwo no malinis brab métintu nén, non énda i saitane bati diyoe. <sup>45</sup> Tidéw man béno, mésut brab muwit fitéw gétéw mas na tete saitane dumo no mahur dob no étéw brab bati ro diyoe. Mélaw i no étéw toow na fo kéfasangan bé énggétahe goho no. Loo so bé nan i mérigowe dob de tete étéw méuyag béni.”

<sup>46</sup> I lala Jesuse émbéréh séna dob de étéw, énggumah i idéng ne brab de tuwaréyén lagéy. Atin téméning ro do liyuwe brab nongot ro ké géségito ro de. <sup>47</sup> Mélaw wén i ménbéréhe dob Jesuse mano, “I idéng me brab do tuwaréyén diyoe ro dob liyuwe. Méuyot ro géségito Beem.”

<sup>48</sup> Séménumbul i Jesuse mano, “Béréhé ku begom atiy idéng guwe brab do tuwaréy gu.” <sup>49</sup> Tidéw béno, ténénduén i de kuyugén brab ménbéréh mano, “Ay niy maake idéng gu brab do tuwaréy gu. <sup>50</sup> Non i kéluhanay étéwe rigoné roy kétayay Abay guwe Tulus, beroy maake idéng gu brab do tuwaréy gu.”

## 13

### *I binuwayae fantag bé sémabuge*

<sup>1</sup> Dob béno so gai, méntékédan i Jesuse tidéw dob lawie ni, brab ménangéy dob dogote atin ménsar dob dénsaane. <sup>2</sup> Atin toow fo médooy étéwe ménlimud géliwét de. Atin non médoo ro, ménda i Jesuse dob awange ménsar diyoe bé lala i de étéw diyoe dob dénsaane. <sup>3</sup> Atin ténoro Jesuse bero bé médoowe kétoro fén-agéw dob de binuwaya. Ménbéréh mano, “Wén i ségétéwe ménangéy sémabug bé béne ne. <sup>4</sup> Atin amun sémanabug, i dumoy de béneén ménbigodoy dob doror i aguwone. Atin énggumah i de klohe manok nama ro. <sup>5</sup> Atin i dumoy de béneén ménsawér dob fantade médooy de batéw de, éndob klohe saén i fantade de. Atin magad téménuh i de béne non énda ménalém i fantade de. <sup>6</sup> Endob amun sémbang i tésange, ménlaay i de nohokén brab ménléhu, non énda ménalém i darir ruwe. <sup>7</sup> Atin i dumoy de béneén ménsawér dob fantade brab dob de duwaléy suwar énda séna témunoh ro. Ménruk mélaw i de suwar séréngan bé de nohok, atin ménléhu i de nohok non lénimfung i de suwar. <sup>8</sup> Endob i dumoy de béneén ménsawér dob fiyowe fantade. Atin i de ni nohok ménggonok ro médooy taman téléw folo takéf, ném folo takéf, brab mératu takéf i séngae sébaan béne.” <sup>9</sup> Atin féntaus Jesusey kébéreh ne mano, “Fégitung gom i fantage bé ni bénréh gu begom amuk méuyot gom de ké gésobuto kom.”

<sup>10</sup> Tidéw béno, ménangéy i de kuyugén dob Jesuse atin fénénginsaa ro maro, “Sedek minuwaya go dob de étéw ké ureto mo bero?”

<sup>11</sup> Séménubul i Jesuse mano, “Dob be-gome do kuyug gu, Tulus i émfégétigane be-gom fantag bé kéfégüléw ne bé de étéwén. Endob i de ni éntingayén ménbunéy, énda émfayagéñ dob de ségiyo étéw. <sup>12</sup> Non i étéwe munur bé kétoro guwe, umana kuy kétoro guwe de inok gésobut ro médo. Endob i étéwe énda munurén bé kétoro guwe, dotén dob beeney kétoroe. <sup>13</sup> I de ségiyo étéw, bérého ku saén bero fén-agéw dob de bin-uwaya, inok fiyon fo ké téngténgé ro, énda gito ro de. Brab fiyon fo ké féngélingoé ro, énda gélingoo ro de brab énda gésobuto ro de. <sup>14</sup> Mélaw méntuman i Ménsulate Kébéréh i Tuluse nuret i sénarigo nuwe féndawét Isaias mano, ‘Fiyon fo ké témantu ro mégélingo, énda gésobuto ro de, brab fiyon fo ké témantu ro téméngténg, énda gito ro de. <sup>15</sup> Non i de ni étéw, ménwaléy métégas i de fédéw ro, brab méntéléb i de kélingo ro, brab méntéléféféng i de moto ro. Amuk énda, gégito ro brab gégélingo ro brab gésobuto ro. Atin waléy ro damén do munur dob Begéne atin mélaw fukasé ku damén bero dob de sala ro.’”

<sup>16</sup> Atin féntaus Jesusey kébéreh ne mano, “Endob i begome, fatut moror gom, non gégitoy de moto gom brab gégélingo i de kélingo gom. Atin mélaw gésobuto kom. <sup>17</sup> Non béréhé ku begom i toowe, médooy de sénarigoy Tuluse muret bé kébéreh ne brab de ségiyo métintu étéw toow fo ménuyot gégito bé énggito gome do rénigo gu. Brab ménuyot ro fo gégélingo bé énggélingoo kome do kétoro gu. Endob énda énggito ro de brab énda énggélingoo ro de.

<sup>18</sup> “Fégélingo gom i atag i binuwayae fantag bé sémabuge. I atag i ni béne, been i kébéreh i Tuluse. Atin i de ségiyo-giyo gékélasi do fantad ségiléw bé de ségiyo-giyo gékélasi do étéw. Atin i sémabuge ureté noy kébéreh i Tuluse dob de ségiyo-giyo do étéw.

<sup>19</sup> “Wén i do étéw énggélingoo roy fantage bé kéfégüléw i Tuluse, éndob énda gésobuto ro de. Enggumah i Satanase inok kédané noy de kébéreh énggélingoo ro. Fénggiring ro bé de béne ménbigodoy dob doror i agu-wone brab nama i de kloh manok. <sup>20</sup> Atin ay ni atag i de béne ménsawér dob fantade médooy de batéw de. Fénggiring ro bé de étéw énggélingoo roy kébéreh i Tuluse brab ménoror ro de témayakuf. <sup>21</sup> Endob énda méégét i kéunur ruwe. Mélaw amuk kérégénan ro loo ké mérasay ro sabaf bé kébérehe ni, énda taus ro modor de. Ségiléw ro bé de nohok énda i do darir ro, non mélaay ro ké méduf i térésange. <sup>22</sup> Atin ay niy atag i de béne ménsawér dob de duwaléy suwar. Fénggiring ro bé de étéw énggélingoo roy kébéreh i Tuluse éndob téngak ro non ménangga ro saén bé de kébuku ro bé de kéfaguyag ro brab kéuyot ruwe waléy kawasa dob ni duniya. Ségiléw ro bé de nohok

ménléhu non ménéfuk ro bé de suwar. Enda mélaw ménggonok ro. <sup>23</sup> Endob ay niy atag i de béne ménsawér dob fiyowe fantad. Fénggiring ro bé de étéw énggélingoo roy kébéreh i Tuluse brab énggésobuto ro. Atin munur ro de, mélaw rénigo roy kétayay Tuluse ségiléw bé kéfégonok i de nohok dob fiyowe fantad médooy de onok ro. I de dumo étéw rénigo roy fiyowe, i de dumo bero rénigo roy médoowe fiyo, brab i de dumo bero rénigo roy toowe fo médooy fiyo.”

### *I binuwayae fantag bé de kéroon*

<sup>24</sup> Atin ménuret man i Jesuse sébaan binuwaya mano, “Ikéfégüléw i Tuluse loo bé ni. Wén i ségétéwe lagéy wén i safadén. Atin sénabugén i fiyowe béneén diyo. <sup>25</sup> Endob wén i étéwe sébanil bé ni lagéy. Mélaw wén i no sébaan kélungonon, ménangéy i sébanile de étéw dob safad ne bé lala i kéluhanay de étéw fidong. Atin séménabug so do onok kéroon dob safade ni. Tidéw béno, ménraréy. <sup>26</sup> Mélaw amun téménunoh i de nohok brab ménggonok téménunoh soy de kéroon séréngan bero. <sup>27</sup> Atin i de sugu-suguéy ni lagéy ménangéy ro dob beene brab ménénginsa ro maro, ‘Amu, aw békén ba séménabug go fiyo béne dob safad me? Sedek ménsélawéki i de kéroon de?’ <sup>28</sup> Atin séménubul i gefee de mano, ‘Rénigoy ségétéwe sébanil begén.’ Atin ménénginsa man i de sugu-suguén ni maro, ‘Aw méuyot go de ké angéyé key randutéñ i de kéroon de?’ <sup>29</sup> Séménubul i gefee de mano, ‘Kagom. Non amuk randuté kom i de kéroon de, géranduto kom soy de dumo bé de nohok faréy. <sup>30</sup> Fédaya gomén méruk i de kéroon séréngan bé de faréy taman bé gaiy kékétéwe de. Tidéw béno, béréhé ku bé de kémétéw de maku, Randut gom sunguy de kéroon. Tidéw béno, timu gom brab raga gom inok tuwégén dob aféye. Tidéw béno, kétéw gom i faréye brab fédiyo gom dob kiwot guwe.’”

<sup>31</sup> Atin ménuret man i Jesuse sébaan binuwaya mano, “Ségiléw i kéfégüléw i Tuluse bé sébaane toow fo kloh béne, éndot i étéwe brab nohokén dob safad ne. <sup>32</sup> Fiyon fo ké toow fo kloh béne, amun téménunoh brab ménruk, ménwaléy toow fo dakél kayéw bé kéluhanay de nohokén. Atin fiyon i de kloh manok sémalag ro dob de fongo no.”

<sup>33</sup> Atin ménuret man i Jesuse sébaan binuwaya mano, “Atin i kéfégüléw i Tuluse ségiléw bé féféféruke fan. Endot i libune brab sénlawékén dob téléwe géasad arinah taman ménruk i kéluhana nuwe.”

<sup>34</sup> I de ni, téménoro i Jesuse dob de ménsélumud do étéw fén-agéw dob de binuwaya. Enda i sébaan uret bénréhén bero ké békén fén-agéw dob binuwayae. <sup>35</sup> Rénigo noy ni inok métuman i Ménsulate Kébéréh i Tuluse nuret i sénarigo nuwe mano, “Ureto

kuy de étew dob de binuwaya. Atin béréhé ku beroy de ménbunéy tidéw féganay bé kélimbag i duniyae.”

<sup>36</sup> Tidéw béno, i Jesuse ténagakén i de ménlimud ni do étew atin ménahur dob lawie. Tidéw béno, i de kuyugén ménfégedét ro dob Beene brab ménbéréh ro maro, “Béréhéme begey i atag i binuwayae fantag bé de kéroon dob safade.”

<sup>37</sup> Atin séménambul i Jesuse mano, “I lagéye séménabug bé béne ne dob safad ne, been i Begéne, sani Nga i Kéilawane. <sup>38</sup> Atin i safade, been i duniyae ni. Atin i fiyowe do béne, beroy de munur bé Tuluse brab fédayaé roy Tuluse méguléw bero. Atin i de kéroon, beroy de békén méngintulus. Satanas i méguléwone bero. <sup>39</sup> Atin i sébanile étew séménabug bé de kéroon, been i Satanase. Atin i kékétéwe, been i tamfaday duniyae ni. Atin i de kémétéw de, beroy de télaki. <sup>40</sup> I de kéroon timuén brab tuwégén dob aféye. Ségiléw so bé niy mérigowe dob tamfaday duniyae ni. <sup>41</sup> I Nga i Kéilawane, sani Begéne, sugué kuy de télaki gu. Atin timué roy de tete étew brab de ménfésala bé de dumo ro. Atin féganané do beroy tidéw dob de étew fédayaé roy Tuluse méguléwone bero. <sup>42</sup> Atin ibéré ro bero dob uleono emferno. Diyo kémérew ro brab kémigét i de kifé ro. <sup>43</sup> Tidéw béno, i de métintu do étew réméndaw ro maak fébéngang dob kéfégüléw i Abay ruwe Tulus. Fétuntay gom i ni ké méuyot gom de ké gésobuto kom.”

<sup>44</sup> Atin ménuret man i Jesuse do binuwaya mano, “I kéfégüléw i Tuluse loo bé ni. Wén i do bélowon ménrugayén ménbunéy lénébéng dob fantade. Atin wén i ségétéwe étew énggégito de. Tidéw béno, lénébéngén man. Atin toow fo moror, ménule brab fénbéléyén i kéluhanay languntama nuwe. Tidéw béno, ménséfule brab béléyéni i fantado no.

<sup>45</sup> “Atin i kéfégüléw i Tuluse loo bé ni. Wén i ségétéwe étew démagang brab séméléd bé toowe fo balilaga perias. <sup>46</sup> Amuk gégito sébaan perlas toow fo balilaga, ménagéw brab fénbéléyén i kéluhanay languntama nuwe brab béléyéni noy perlaso no.

<sup>47</sup> “Atin i kéfégüléw i Tuluse loo bé ni. Wén i fukéte lénawu dob bukag i dogote. Atin médooy de séségiyo-giyo do sédo géahur de. <sup>48</sup> Atin amuk ménfeno, i de fatatugés béngéngé ro mangéy dob fédoror i dogote. Tidéw béno, mésar ro inok féganané roy de sédo. Ahuré roy de fiyo sédo dob baskete ahuron de. Endob ibéré roy de tete sédo. <sup>49</sup> Loo so bé niy mérigowe dob tamfaday duniyae. I de télaki angéy ro féganané i de tete étew bé de métintu étew. <sup>50</sup> Atin ibéré roy de tete étew dob emfernowe. Diyo ro kémérew brab kémigét i de kifé ro.”

<sup>51</sup> Tidéw béno, ménénginsa i Jesuse dob de kuyugén mano, “Aw gésobuto kom i de ni bénréh gu?”

Atin séménambul ro maro, “Hoo.”

<sup>52</sup> Atin ménbéréh man i Jesuse mano, “Mélaw i séngae témoro bé Ménsulate Kébéréh i Tuluse, féganadé ro soy kétoro guwe fantag bé kéfégüléw i Tuluse, gétoro bé tafaye brab mantuwe kétoro. Ségiléw mélaw bé ségétéwe étew usaré noy tafaye brab mantuwe insodén.”

<sup>53</sup> Amun énggilid i Jesuse muret bé de ni binuwaya, méntékédan diyo. <sup>54</sup> Atin ménule mangéy dob ingéd ne. Atin diyo téménoro dob lawie féngadafan kay de Judio. Atin i kéluhanay de énggégélingo bé kétoro ne toow ro fo ménggaif. Atin ménséfénginsa ro maro, “Ati tidéwoy kégétigay ni étew témoro? Ati tidéwoy barakat ne rémigo bé de mékégaif ni? <sup>55</sup> Aw békén ba, Been i Nga i fandaye rémigo lawi? Aw békén ba Maria i idéng ne? Atin békén ba Santiago brab Jose brab Simon brab Judas i de tuwaréyén? <sup>56</sup> Békén ba i de libu no bati so dini? Tidéwoy kégétiga nuwe de, loo soy barakat ne?” <sup>57</sup> Mélaw ménika ro de.

Mélaw ménbéréh i Jesuse dob berowe mano, “I sarigoy Tuluse muret bé kébéréh ne, basanan dob kéluhanay de gonon saliyo saén dob kaane ingéd brab dob de kaan do samung brab dob de kaan do étew sétifon lawi.” <sup>58</sup> Atin énda réménigo no do médooy mékégaif diyo non énda méginugut ro de.

## 14

### *I kéléhu Juan Bautistawe*

<sup>1</sup> Bé béno, i Herode, sani méguléwe dob Galilea, énggégélingoo noy de rénigo Jesus. <sup>2</sup> Atin ménbéréh i Herode dob de sarigo no mano, “Been keeyén i Juan Bautistawe méntébule. Been keeyén i funa nuwe wén i barakatén rémigo do mékégaif.”

<sup>3</sup> Bénréhén i ni non fénkéfoén i Juane, brab fénikétén, brab fénahurén dob férisunone. Rénigo noy ni sabaf bé ibo ne féndawét Herodiyas lénamfaén tidéw dob dumo nuwe sétiman idéng féndawét Filipi. <sup>4</sup> I Herode fénférisu noy Juane non dénowoy Juane mano, “Fénlisém i kitabé non énda damén fatut bawagé moy bawag i dumo muwe.” <sup>5</sup> Mélaw i Herode ménuoy méméléhu bé Juane, éndob ménggilak bé de Judio non kénarang roy Juane ségétéw sénarigoy Tuluse muret.

<sup>6</sup> Endob amun réménigo karagiya i Herode fégétédémoo no bé kéumah ne, ménsayaw i kénogo Herodiyase dob adafay de médooy do étew diyo. Atin toow fo ménsuwat i Herode de. <sup>7</sup> Mélaw fénasada noy ni kénogon bé irayén dey atiy kétaya nuwe ongoté no. Atin rénigo noy safae dob beene.

<sup>8</sup> Atin fénbéréh i idéng i kénogone ni mano, “Uwit gom diniy uléw Juan Bautistawe dob biléwe, atin irayém begén.”

<sup>9</sup> Tidéw béno, i Datu Herode toow fo méntete i fédéw ne non mika damén rémigo bé ni. Endob non bé fasad ne rénigo no dob adafay de kana no, sénuguén bé iray dob kénogone ni. <sup>10</sup> Mélaw fénkélingén i uléw Juane dob férisunone. <sup>11</sup> Atin wén i ménuwit bé uléw ne dob biléwe brab nirayén dob kénogone ni. Tidéw béno, nuwitén dob idéng ne. <sup>12</sup> Atin i de kuyug Juan nangéy roy bangkay no brab lénébéng ro. Tidéw béno, ménangéy ro dob Jesuse brab fénggétiga ro de.

*Fénwaléy Jesuse médooy klohe amaén*

<sup>13</sup> Atin amun énggélíngoo Jesusey ni uret fantag bé kéléhu Juane, méntékédan diyo brab ménda dob awange mangéy dob géfélebue gonon. Endob amun énggélíngoo de étéw i ayo Jesuse, méntékédan ro dob de ingéd ro atin ménémantad ro ménggéta ro bé Jesuse. <sup>14</sup> Amun téménéfadén i Jesuse, énggito noy de médooy ni do étéw ménlimud. Atin ménuray i na nuwe bero brab nuwaén i de déméruun bero.

<sup>15</sup> Amun témégénén i de kuyugén ménangéy ro dob Beene brab ménbéréh ro maro, “Enda i lawi dini, atin témégénén béni. Féagéw mon bero inok mangéy ro dob de ingéd gédét dini. Diyo gébéley ro amaé ro.”

<sup>16</sup> Endob ménbéréh i Jesuse mano, “Enda kailanga roy magéwe. Iraya kom bero amaé ro.”

<sup>17</sup> Endob séménumbul i de kuyugén maro, “Enda i amaén dini saliyyu bé limowe timan fan brab ruwo timan sédo.”

<sup>18</sup> Atin bang Jesuse, “Uwit gom dini.” <sup>19</sup> Atin sénuguén i de étéw mésar dob de kéroon diyo. Tidéw béno, éndot Jesusey limowe timan fan brab ruwowe timan sédo, atin léménéngag dob lawayo brab ménfésalamat dob Tuluse. Tidéw béno, sénbaad-baadén i de fan brab nirayén dob de kuyugén. Atin sénaar ro dob de étéw. <sup>20</sup> Atin i kéluhanay de étéw téménantu ro mama taman ménbésor ro. Tidéw béno, ténimu i de kuyugé Jesus i de sama i de amaén brab ménféno i foloe bra ruwo timan dakél biton. <sup>21</sup> Ikédooy de étéw ménama limo ngibu ro do lagéy saliyyu bé de libun brab do nga.

*Ménagéw i Jesuse dob rotor i wayége*

<sup>22</sup> Tidéw béno, fénéda Jesusey de kuyugén dob awange, atin féntahén bero mangéy fingé difar bé dogote, bé lala ne émféule bé de médooy ni do étéw. <sup>23</sup> Atin amun énggéféuleo noy de étéw, ménénagé dob burure énda i dumo no inok démasal. Amun kélungonónén, diyo i Jesuse dob burure énda i dumo no. <sup>24</sup> Bé béno, i awange diyoén dob kérara i dogote. Atin kérégénan i de kuyugén non énggébéla i de bagél dob awang ruwe, non rumfakéy réfuruhe.

<sup>25</sup> Amun lingkuwog mangéy fuweh, ménangéy i Jesuse dob berowe ménagéw dob rotor i wayége. <sup>26</sup> Atin i de kuyugén, amun énggito roy Jesuse magéw dob rotor i wayége, toow ro fo ménggilak. Ménkes ro sabaf bé kégilak ruwe brab maro, “Ménayam!”

<sup>27</sup> Endob sonom béno, ménbéréh i Jesuse mano, “Kagom mégilak! Begén. Fétana gom i de fédéw gom.”

<sup>28</sup> Tidéw béno, ménbéréh i Pedrowe mano, “Kadnan, amuk tintu Beem, féagéwém so begén dob rotor i dogote mangéy dob Beeme.”

<sup>29</sup> Atin bang Jesuse, “Enggon.” Mélaw méntéfor i Pedrowe tidéw dob awange atin ménagéw dob rotor i wayége saréw dob Jesuse. <sup>30</sup> Endob amun énggétérédama noy émbagére réfuruh, ménwaléy mégilak, atin minut méléd dob dogote. Atin ménkes mano, “Kadnan, tabangénu.”

<sup>31</sup> Sonom béno, béntér Jesusey kémér ne atin génamakén i Pedrowe. Atin ménbéréh i Jesuse mano, “Toow fo kloh i kéunur me. Sedek ruwo-ruwoy fédéw me?”

<sup>32</sup> Tidéw béno, ménda ro dob awange, atin téménrén i réfuruhe. <sup>33</sup> Atin i de kuyugén dob awange fénggadaf roy Jesuse brab ménbéréh ro maro, “Tintu fo Beem i Nga i Tuluse!”

*Nuwa Jesusey de médooy do déméruun*

<sup>34</sup> Atin méntaus ro mifar dob dogote brab énggumah ro dob ingéde Genesaret. <sup>35</sup> I de étéw diyo énggélolo roy Jesuse. Mélaw fénsamfay roy kébérehe dob de déméruun dob de ingéd géliwét brab nuwit ro dob Jesuse. <sup>36</sup> Atin nongot roy Jesuse bé tungkasé noy de déméruun fiyon gékuwaha ro saén damén i tamanay kégal ne. Atin i kéluhanay de énggékawah de, ménadi-adi.

## 15

<sup>1</sup> Tidéw béno, wén i do Fariseo brab do témoro bé kitabé ménangéy dob Jesuse tidéw Jerusalem. Ménénginsa ro maro, <sup>2</sup> “Sedek i de kuyugén énda odoro roy adat tome tidéw dob de katufua tom? Non énda méguse ro ké mama ro loo bé adat tome.”

<sup>3</sup> Atin séménumbul i Jesuse mano, “Sémuliu ménginsa begom. Sedek félisé kom i de sugu i Tuluse inok odoro kom i kagome kétoro? <sup>4</sup> Non ménbéréh i Tuluse mano, ‘Basana moy abay me brab idéng me.’ Atin ménbéréh so mano, ‘Buluk wén i ségétéw émbéréh tete fantag bé abay ne look idéngén, fatut féléhuén.’ <sup>5</sup> Endob i begome, témoro gom bé amuk wén i ségétéw kérégénan i abay ne look idéngén, brab wén i fégétabangén irayén damén, fakay émbéréh mano, ‘Kay Tulusey ni.’ <sup>6</sup> Mélaw dob kétoro gome, éndaén kailangay de étéw i masanane bé de lukés ro. Mélaw ténagak gom i kébérehe i Tuluse

inok odoro kom i kagome kétoro. <sup>7</sup> Enda toow i kéunur gome bé Tuluse, ubo-ubo saén. Toow i kébéreh Isaiase, sani ségétéwe sénarigoy Tuluse muret bé kébéreh ne, amun sénulatén i fantage bé begome mano, <sup>8</sup> Bang i Tuluse, basanay de ni do étéw Begén dob kébéreh ruwe saén. Endob énda munur ro Begén dob de fédéw ro. <sup>9</sup> Enda i atag i kéféngadaf ruwe Begén, non toroé roy de sugu réngoy kéilawane brab béréhé ro tidéw dob Begéne: ”

### *Fantag bé amaéne*

<sup>10</sup> Tidéw béno, ténawag Jesusey de étéw mangéy dob Beene. Atin ménbéréh dob berowe mano, “Fégélingo gom Begén brab fégésobut gom. <sup>11</sup> I funay de étéw waléy mékérésik dob adafay Tuluse, békén sabaf bé atiy amaé ruwe. Yamula, i de tete kébéreh ro mésut tidéw dob de ba roy funa ruwe waléy mékérésik dob adafay Tuluse.”

<sup>12</sup> Tidéw béno, ménfégedét i de kuyugén dob Jesuse, atin ménbéréh ro maro, “Gétiga mo, i de Fariseo méntete i de fédéw ro sabaf bé kébéreh ma nan?”

<sup>13</sup> Endob séménumbul i Jesuse mano, “Mékédan i de békén katabuwan kétoro ro békén tidéw dob Abay guwe Tulus, ségiléw bé ségétéwe rémandut bé de kéroon géliwét bé de nohokén. <sup>14</sup> Fédaya gom bero. Maak do langafén ro marak bé de dumo ro langafén. Atin amuk wén i langafén marak bé ségétéwe so langafén, ruwo ro mélawu dob kalute.”

<sup>15</sup> Atin ménbéréh i Pedrowe mano, “Fékéntayém dob begeyey nan binuwaya.”

<sup>16</sup> Atin bang Jesuse, “Aw énda séna wayo gésobuto kom de? <sup>17</sup> I funay Tuluse énda mésuwat bé de étéw békén sabaf bé de amaé ro. Non i amaéy étéwe, mahur dob sur ne brab taus so mésut tidéw dob lowoh ne. <sup>18</sup> Endob i de tete kébéreh mésut tidéw dob ba i étéwe, tintu fo tidéw dob fédéw ne. Atin been i niy funay étéwe waléy mékérésik dob adafay Tuluse. <sup>19</sup> Non tidéw dob tete fédéwén mésut i de tete kéfégitungén inok méméléhu, brab sétayan bé békéne bawagén, brab sébaga, brab ménakaw, brab témugi, brab témifu. <sup>20</sup> Been i niy funay de étéw waléy mékérésik dob adafay Tuluse. Endob fiyon fo ké énda méguse i étéwe loo bé adat tome do Judio ké mama, énda waléyén mékérésik dob adafay Tuluse.”

<sup>21</sup> Tidéw béno, méntékédan i Jesuse diyo brab ménangéy dob de ingéd gédét dob Tiro brab Sidon. <sup>22</sup> Atin wén i ségétéwe libun békén Judio bati diyo. Been i séfu i de étéw tidéw Kanan. Atin ménfégedét dob Jesuse. Atin ménbéréh métanug mano, “Séfu Datu Dabid, fégedawanu! I kénogo kuwe rénahukoy saítane atin mélaw toow fo kéfasangan.”

<sup>23</sup> Endob ménantés i Jesuse brab énda sénumbulo noy libune ni. Tidéw béno, i de kuyugén ménangéy ro dob Jesuse brab non-got ro maro, “Féagéwém i ni libun non toow fo selekén furay betom.”

<sup>24</sup> Tidéw béno, bénreh Jesuse mano, “Sénuguu saén mangéy témabang bé de Judio non ségiléw ro bé de méntadin do bili-bili.”

<sup>25</sup> Tidéw béno, i libune ni ménfégedét brab léméningkuwéd dob adafa nuwe. Atin ménfégedaw-gédaw mano, “Maistéro, tabangénu.”

<sup>26</sup> Tidéw béno, nuret Jesusey sébaane binuwaya inok fégétiga no de bé tabangé noy de Judio sungu, atin tidéw béno tabangé noy de békén Judio. Ménbéréh mano, “Enda fatutén ké dotén i amaéy de nga atin ibéréh dob de itu.”

<sup>27</sup> Endob ménbéréh i libune ni mano, “Toow, Maistéro, éndob fiyon foy de itu géamaa roy de mumu mélawu tidéw dob amaéy gefee de.”

<sup>28</sup> Tidéw béno, ménbéréh i Jesuse mano, “Di, méégét i kéunur me fo toow. Mélaw rignoné kuy nan ongoté mo.” Atin bé no so uras i kénogo nuwe ménadi-adi.

### *Nuwa Jesusey de médo do étéw*

<sup>29</sup> Tidéw béno, ménagéw i Jesuse ménémantad mangéy bé doror i dogote Galilea. Atin ménénagé dob burure brab ménsar diyo. <sup>30</sup> Atin médooy de ménlimud do étéw ménangéy ro dob Beene, atin nuwit roy de fikát, brab do langafén, brab do ménsadil i de kémér ro brab de sékéy ro, brab do mow, brab do médo so étéw do déméruun. Atin féndiyo ro bero dob adafa Jesuse. Atin nuwa Jesuse bero. <sup>31</sup> Atin toow fo ménggaif i de étéw amun énggito roy de mow énggébéréh, brab de ménsadil do kémér ro ménadi-adi, brab de fikát énggéagéw, brab de langafén énggégito. Atin dénayéw roy Tuluse féngadaféy de Judio.

### *Fénwaléy Jesuse médooy klohe amaén*

<sup>32</sup> Tidéw béno, ténawag Jesusey de kuyugén mangéy dob Beene. Atin ménbéréh dob berowe mano, “Méuray i na guwe bé de étéw ni, non téléwén gétérésangan ro dob Begéne, atin béleewe ni ménétéyén i de amaé ro. Atin mikau émféule bero ké mélayaf ro non mésumba ro keeyén dob de aguwon.”

<sup>33</sup> Atin ménénginsa i de kuyugén maro, “Ati kéfingé-fingé i kéféama geye bé de médo ni do étéw dob ni gonon mérayu tidéw dob de lawi?”

<sup>34</sup> Atin i Jesuse fénénginsa no bero mano, “Fiyro timan i fa koman?”

Séménumbul ro maro, “Fitéw timan brab wén soy koy klohe de klohe sédo.”

<sup>35</sup> Tidéw béno, i Jesuse sénuguén i de ménlimud do étéw ménsar dob fantade. <sup>36</sup> Atin éndotén i fitéwo no timan fan brab do

sédo, brab ménfésalamat dob Tuluse. Tidéw béno, sénbaad-baadén, brab nirayén dob de kuyugén. Atin sénaar ro dob de étéw. <sup>37</sup> Atin i kéluhanay de étéw téménantu ro mama taman ménbésor ro. Tidéw béno, i de kuyugén ténimu roy de sama i de amaén brab ménféno i de fitéw timan biton. <sup>38</sup> I kédoow ruwe do ménama fot ro ngibu do lagéy saliuyu bé de libun brab de nga.

<sup>39</sup> Tidéw béno, fénule Jesusey de ménlimud do étéw. Tidéw man béno, ménda dob awange atin ménagéw mangéy dob ingéde Magadan.

## 16

<sup>1</sup> Wén i no sébaan fuweh, wén i do Fariseo brab do Saduseo ménagéy dob Jesuse. Ménuyot ro téméngkad bé Jesuse. Mélaw non-got ro dob Beene rémigo mékégaif inok fégito no tidéw dob Tuluse. <sup>2</sup> Endob séménumbul i Jesuse mano, “Amuk gito gom furoy lawaye ké méléd i térésange, émbéréh gom makom, ‘Enda rémanaén démo.’ <sup>3</sup> Atin buluk gito gom furo brab délémon i lawaye ké sémbang i térésange, béréhé kom makom, ‘Rémana séko.’ Mélaw gétiga kom i atag i de tanda dob de rawén. Endob énda gétiga kom i atag i de tanda dob de ni do gai. <sup>4</sup> I begome do étéw méuyag béni, toow gom fo tete brab békén gom méngintulus. Ongoté kom ké rémigowu mékégaif inok gétiga kom Begéney Kristowe. Endob énda i féténgtég gu begom saliuyu bé sébaane mékégaif ségiléw bé ménrigowe dob Jonase bé do gétah.” Tidéw béno, ténagak Jesuse bero brab ménagéw.

<sup>5</sup> Tidéw béno, i de kuyug Jesuse ménifar ro dob dogote. Endob énggélifoto roy muwite fan. <sup>6</sup> Atin nuret Jesuse beroy sébaane binuwaya fantag bé de tete adatén do étéw. Ménbéréh mano, “Ingat gom brab sénggila gom i fégeféeruke fan kay de Fariseo brab kay de Saduseo.”

<sup>7</sup> Endob i de kuyugén, énda énggésobuto roy ni binuwaya. Marok bénréh Jesusey fantag bé tintuwe fégeféeruk fan. Mélaw ménségeno-géno ro falan saén bero maro, “Bénréhén i ni non énda i fa tom.”

<sup>8</sup> Endob i Jesuse énggétiga noy de kébéréh ro. Mélaw ménbéréh mano, “Sedek ségeno-géno gom fantag bé kékulang i fa tome? Toow fo kloh i kéunur gome. <sup>9</sup> Aw énda séna énggésobuto kom de? Aw énggélifoto kom i rénigo guwe? Amun sénbaad-baad guy de limo timan do fan dob de limo ngibu do lagéy, firoy gébiton i énggétimuo kome samaén? <sup>10</sup> Atin amun sénbaad-baad guy de fitéw timan do fan dob de fot ngibu lagéy, firoy gébiton i énggétimuo kome samaén? <sup>11</sup> Sedek énda séna énggésobuto kom i békén fantag bé faney bénréh guwe? Ingat gom brab sénggila gom i fégeféeruk i de Fariseo brab de Saduseo.”

<sup>12</sup> Tidéw béno, i de kuyugén énggésobuto ro bé féingaté Jesuse bero bé kétoro i de Fariseo brab de Saduseo. Atin énggétiga ro békén nuretén i fantage bé tintuwe fégeféeruk fan.

### *I kéunur Pedrowe*

<sup>13</sup> Wén i no sébaan fuweh, i Jesuse ménagéw gedét dob ingéde Sesarea Filipino. Diyo fénénginsaa noy de kuyugén mano, “Ati kébéréh i de étéw ké ati Begéne ni, sani Nga i Kéilawane?”

<sup>14</sup> Séménumbul ro maro, “Wén i do ménbéréh maro, Juan Bautista go kun. I de dumo de maro, Elias go kun. Brab i de dumo de maro, Beemey Jeremiase kun, taloo no ségétéw bé de gétah sénarigoy Tuluse.”

<sup>15</sup> Tidéw béno, ménénginsa i Jesuse man mano, “Dob begome, ati kébéréh gome fantag bé Begéne?”

<sup>16</sup> I Simon Pedrowe séménumbul mano, “Beemey Kristowe, Nga i méuyage Tulus.”

<sup>17</sup> Atin bang Jesuse, “Simon, nga Juan, fénfiyoy Tuluse beam. Non békén kéilawan i ménfégétigane beam bé ni. Yamula i Abay guwe Tulus i ménfégétigane de beam. <sup>18</sup> Atin béréhé ku beam, beam i Pedrowe, atin dob batéwu ni féfindégé kuy simbaa kuwe. Enda méléhu i de étéw munur Begéne loo bé kéunur me. <sup>19</sup> Atin iray gu beam i aturane bé de étéw féguléwoy Tuluse. Mélaw ati sugué muwe énda fakayén rigonén dob fantade ni, énda so fakayén dob lawayo. Atin ati sugué muwe fakay rigonén dini dob fantade, fakay so dob lawayo.”

<sup>20</sup> Tidéw béno, sénugu Jesuse dob de kuyugén bé békén ureté ro dob de ségiyo étéw ké Been i Kristowe.

### *I kéuret Jesuse fantag bé kéléhu ne*

<sup>21</sup> Tidéw bé no gai, i Jesuse fénkéntayén i kébéréh ne dob de kuyugén mano, “Kailanga kuy mangéye Jerusalem brab diyo i de odoroy de Judio brab de odoroy de fadi brab de témoro bé kitabé, férasayé ro fo Begén toow. Atin wén soy do méméléhu Begéne. Endob dob gétéléw ne gétérésangan, tébuléu.”

<sup>22</sup> Sonom béno, i Pedrowe nuwitén i Jesuse mangéy dob géliyu-liyuwe inok bero saén, atin génléén mano, “Kadnan, énda damén fédayaéy Tuluse de mérijo dob Beemey ni bénréhém.”

<sup>23</sup> Endob sénaréw Jesusey Pedrowe atin ménbéréh mano, “Maak Satanas go! Férayu go Begén. Alangé mo Begén non i kékégitung me békén tidéw dob Tuluse, yamula tidéw sa dob kéilawane.”

<sup>24</sup> Tidéw béno, bénréh Jesuse dob de kuyugén mano, “Buluk atiy méuyote furay Begén, kailanga no diguré noy kaane kétayan inok odoro noy kétayay Tuluse. Tidéw béno, kailanga no fédayday bé de kérégenon ségiléw bé Begéne, fiyon fo ké

féléhuén dob kruse. <sup>25</sup> Non atiy méuyote émférraru bé umul ne, méléhu. Endob i méléhue bé kéfuray ne Begén, gédoté noy umule magufusa. <sup>26</sup> Ufama, fiyon fo ké i ségétéwe étew gédoté noy kéluhanay éntingayéne dob duniyae ni, énda i lagaén buluk méléhu atin géangéy dob uleono emferno. Enda i fégebalway étéwe de inok méuyag man. <sup>27</sup> Non i Begéne, sani Nga i Kéilawane, séfuleu moso begey i de télaki gu, réméndawu bé barakat i Abay guwe Tulus. Atin bé béno gai, barasa kuy de étew loo bé fatute sabaf bé de rénigo ro. <sup>28</sup> Béréhé ku begom i toowe, wén i do dumo begom énda méléhu ro taman gito roy késéfule guwe inok méguléw.”

## 17

### *Enggiton i kéréndaw Jesuse*

<sup>1</sup> Ném gétérésangan tidéw bé béno, nuwit Jesusey Pedrowe brab Santiagowe brab Juane dumo Santiagowe sétiman idéng dob uruk i gérotore tuduk sébero-bero saén. <sup>2</sup> Atin i falas Jesuse ménfégalin dob téngasang ruwe. Réménéndaw i rangih ne maak téréasang. Atin ménwaléy fute i kégal ne maak géfékaya. <sup>3</sup> Atin i de ni kuyugén, métékow énggito ro soy Moiseuse brab Eliase sébéngé-béréh ro bé Jesuse. <sup>4</sup> Ménbéréh i Pedrowe dob Jesuse mano, “Kadnan, toow fo fiyo non dob ni tom. Amuk kétaya mo, rémigowu téléw timan dung-dung. Sébaan i kaame de, sébaan i ka Moiseuse de, brab sébaan i ka Eliase de.”

<sup>5</sup> Amun émbéréh sénay Pedrowe, méntégalung dob berowey réméndawe rawéne. Atin wén i ménbérehe tidéw dob rawéne mano, “Been i niy kénimuo kuwe Nga gu, toow fo kénsuwata ku. Fégélingo gom.”

<sup>6</sup> Amun énggélingooy de kuyugén i ni, toow ro fo ménggilak. Mélaw méntélingkéb ro tédunsum. <sup>7</sup> Endob i Jesuse fénggédeto no bero brab kénuwahén bero. Atin ménbéréh mano, “Tek gom brab kagom mégilak.” <sup>8</sup> Amun léménéngag ro téméngténg, énda i saliyyu énggito ro bé Jesuse saén.

<sup>9</sup> Atin bé lala ruwe léménudug tidéw dob tuduko no, sénugu Jesuse bero mano, “Kagom uretén i fantage bé ni énggégito gom taman tébuleu, sani Nga i Kéilawane.”

<sup>10</sup> Tidéw béno, i de ni kuyugén ménénginsa ro dob Jesuse maro, “Sedek bénréh i de témoro bé kitabé bé kailanga Eliasey séfuleu, tidéw béno méguléw i Kristowe?”

<sup>11</sup> Atin séménumbul i Jesuse mano, “Toow i nan bé fatut séfule i Eliase sungu inok tafayé noy kéluhanane. <sup>12</sup> Endob béréhé ku begom, énggumahén i Eliase, éndob énda énggéloloy de étew de. Yamula fénrasy ro loo bé kétaya ruwe. Atin loo so bé nan i kéférasay ruwe moso Bégen.”

<sup>13</sup> Tidéw béno, i de ni kuyugén énggésoboto roy bénréh Jesuse fantag bé Juan Bautistawe.

### *Dénédel Jesusey saitane*

<sup>14</sup> Amun ménséfule ro dob de ménlimud étew, ménfégédét i ségétéwe lagéy dob Jesuse brab léméninkuwéd dob adafa nuwe. <sup>15</sup> Atin ménbéréh mano, “Maistéro, fégedaw go bé nga guwe lagéy. Non rebengén brab toow fo kérasayan. Ségamét métuwar dob aféye brab mélawu dob wayége. <sup>16</sup> Nuwit gu dob de kuyugém, éndob énda géuwaa ro de.”

<sup>17</sup> Atin ménbéréh i Jesuse dob de ménlimud do étew mano, “Enda sémarig gom bé Tuluse, brab toow gom fo do tete étew. Lugoténun sétafik begom. Enda gétuwa ku de ké ati nay kérugay i kétingkél guwe sétafik begom. Uwit gom diniy ngao no.” <sup>18</sup> Atin dénédel Jesusey saitane bé kébéréh ne. Mélaw ménraréy i saitane, atin sonom béno, ménandi-adiy ngae ni.

<sup>19</sup> Tidéw béno, i de kuyugén ménangéy ro dob Jesuse sébero-bero saén. Atin ménénginsa ro maro, “Sedek énda géféféraréyo key i no saitan?”

<sup>20</sup> Séménumbul i Jesuse mano, “Non kulang foy kéunur gome. Béréhé ku begom i toowe, amuk wén saén i kloh kéunur gom ségiléw bé kékloh i oloy sabie, gébéreh gom dob tuduke ni makom, ‘Ay go diyoo.’ Atin magéw ba. Atin mélaw amuk wén i kéunur gom, gérigono kom i kéluhanay éntingayéne. <sup>21</sup> Endob i ni klasi saitan, géféféraréyo kom saén bé kédasal gome brab kéfuwasa gome. Endaén i saliyyu de fakay.”

### *I kéuret Jesuse fantag bé kéléhu ne*

<sup>22</sup> Amun ménlimud i de kuyug Jesus dob Galilea, bénréhén bero mano, “I Nga i Kéilawane, sani Begéne, fékéfo séko bé de étew sébanil Begén. <sup>23</sup> Atin féléhué ro Begén. Endob dob gétéléw ne gétérésangan, tébuleu.”

Atin toow fo méntete i de fédéw i de kuyugén amun énggélingoo roy ni.

<sup>24</sup> Amun énggumah i Jesuse beroy de kuyugén dob Kafernaum, ménangéy dob Pedrowey de kémubra kurta kay lawi i Tuluse dob Jerusalem. Atin ménénginsa ro maro, “Aw mayad ba kurta i Maistéro gome kay lawi i Tuluse?”

<sup>25</sup> Séménumbul i Pedrowe mano, “Hoo, mayad.”

Tidéw béno, amun ménahur i Pedrowe dob lawie, bénréh Jesuse sungu mano, “Simon, ati karang me de? Ati isuwe mayad buwis dob datue, do ngaén taloo no do ségiyo étew?”

<sup>26</sup> Séménumbul i Pedrowe mano, “I de ségiyo étew.”

Atin ménbéréh man i Jesuse mano, “Amuk loo, énda kailangay de ngaén i mayade buwis dob datue. Atin mélaw énda so

kailanga kuy mayade kurta kay lawi i Abay guwe Tulus. <sup>27</sup> Endob énda méuyotu de ké mérarék Beto y de étéw ni. Mélaw ay go dob dogote atin duray go. Edotém i sun-guwe sédo geduraya mo. Atin féténganga mo brab gito moy félatahe fakayén fégebayad i ruwowe gétéw dob lawi i Tuluse. Dotém brab bayada moy katowe de.”

## 18

<sup>1</sup> Bé béno do gai, ménangéy i de kuyug Jesuse dob Beene brab ménénginsa ro maro, “Ati isuwe begey toow na fo gérotor dob kéféguléw i Tuluse?”

<sup>2</sup> Tidéw béno, ténawag Jesusey ségétéwe nga atin féntindégén dob téngaanga ruwe. <sup>3</sup> Atin béréhén bero mano, “Béréhé ku begom i toowe, amuk énda émfégalin i de fédéw gom inok iringé kom i kétérifantad i de nga, énda géahur gom dob kéféguléw i Tuluse. <sup>4</sup> Non i toowe na fo gérotor bé de étéw féguléwoy Tuluse, been i gérifantade loo bé ngae. <sup>5</sup> Atin atiy étéwe témayakuf bé ngae loo bé ni sabaf bé kéunur ne Begén, tayakufé no so Begén.

<sup>6</sup> “Endob amuk wén i émfésala bé ségétéwe mantu séna munur dob Begéne loo bé ni nga, toow fo mékégedaw-gédaw. Toow fo gétimal ké mékukum, mélaw mas na fiyo dob beene ké ibéréndob dogote níkéton dakél batéw i reer ne. <sup>7</sup> Mékégedaw-gédaw i de étéw dob duniyae ni non wén i de étingayén émfésala bero. Démoyun wén i do étéw émfésala bé de dumo ro. Endob mékukum ro fo toow moso.

<sup>8</sup> “Mélaw amuk been i kémér me taloo no sékéyéw i funa muwe gésala, kéléngém brab ibéréw. Non mas na fiyo ké gédoté moy umule magufusa ménkéléng i bala i kémér me taloo no sékéyéw, bé géangéy go dob uleono emferno énda i kulang bé lowoh me. Non diyo wén i aféye énda émfandaén taman sa taman. <sup>9</sup> Atin amuk i moto muwey funa muwe gésala, léstitém brab ibéréw. Non mas na fiyo ké gédoté moy umule magufusa énda i bala moto mo, bé géangéy go dob emfernowe énda i kulang bé lowoh me.

<sup>10</sup> “Atin kagom siyawén i de étéw gérifantad segiléw bé ni nga. Non béréhé ku begom, wén i karo télaki démiyaga bero, atin bati ro dob lawayo beroy Abay guwe Tulus. <sup>11</sup> Non i Nga i Kéilawane, sani Begéne, ménangéyu dini inok fukasé kuy de étéw ménsala do maak do méntadin ro.

<sup>12</sup> “Fégitung gom i fantage bé ni ufama. Wén i ségétéwe étéw wén i mératu bili-bili no. Endob méntadin i sébaane de. Ati rigoné nuwe? Tagaké noy siyowe de folo bra siyow dob fétabtabane, atin angéy no sélédén i sébaane de méntadin. <sup>13</sup> Tidéw béno, buluk énggito no, toow fo moror. Béréhé ku begom, toow na fo moror sabaf bé nan sébaan méntadin bili-bili énggito no bé de siyow de

folo bra siyow énda méntadin ro. <sup>14</sup> Ségiléw so bé ni, i Abay gome Tulus do lawayo toow fo mika de ké wén i sébaan bé de ni gérifantad do méngintulus mékukum.

<sup>15</sup> “Amuk wén i ségétéw dumo mo brab ménsala dob beeme, ay go dob beene inok sébegom-begom saén. Tidéw béno, toroém dey sala ne. Amuk gésénule de, tintu fo ténabanga mo séfule dob Tuluse. <sup>16</sup> Endob amuk énda gésénuleén de, uwitéw i ségétéwe taloo no ruwo gétéw bé de dumo mo séfule mangéy dob beene. Mélaw wén i dumo mo émbéréh toow i kébéreh me fantag bé sala ne. <sup>17</sup> Endob amuk énda fo gésénuleén de, téboém dob kéluhanay de munur dob lawie féngadafan. Atin amuk énda na fo gésénuleén de, fiyon fo ké téboéy kéluhanay munure de, kagom séloyuk de maak ségétéw békén méngintulus look ségétéw lémiiful kémubra buwís.

<sup>18</sup> “Atin béréhé ku begom i toowe, amuk wén i sugué kom bé énda fakayén rigoné dob fantade ni, énda so fakayén dob lawayo diyo. Brab amuk wén soy sugué kom fakay rigoné dob fantade ni, fakay so dob lawayo diyo.

<sup>19</sup> “Atin béréhé ku so begom, amuk wén i ruwo gétéw begom dob duniyae ni séfagayun bé kédasal gome, i Abay guwe Tulus dob lawayo rigoné no. <sup>20</sup> Non fiyon fo ké wén saén i ruwo taloo no téléw gétéw sélimud méngadaf Begén, diyou so dob berowe.”

### *Fantag bé kéfézagade*

<sup>21</sup> Tidéw béno, ménfégedét i Pedrowe brab ménénginsa mano, “Kadnan, amuk wén i dumo gu démoyunén gésala dob begéne, firoy gule fatut fézagada ku? Aw fézagada ku taman fitéw gule?”

<sup>22</sup> Séménambul i Jesuse mano, “Médoo na gule tidéw bé nan. Kago térénon i émfézagade. <sup>23</sup> Ureté ku begom i sébaane binuwaya fantag bé kéféguléw i Tuluse. Wén i ségétéwe datu méguléw, éntukén i de utong i de sugu-sugué no dob beene. <sup>24</sup> Atin amun féngganaya no, nuwitéw dob beeney ségétéwe bé de sugu-sugué no, laksaén i utong ne. <sup>25</sup> I ni sugu-suguén énda gébayada noy utong ne. Mélaw i datue, fébéléyén i ni sugu-suguén brab bawag ne brab de ngaén, inok waléy ro do rifén. Brab i kéluhanay étingayéne kaan, fébéléyén so inok gébayada noy utong ne. <sup>26</sup> Endob méningkuwéd i ni sugu-suguén dob adafay datue, brab ménfégedaw-gédaw mano, ‘Tingkelonu na. Enda sénay kurta gu, éndob bayada ku so beem ké wén i kurta gu.’ <sup>27</sup> Ménuray i nay datue de. Mélaw fénsagada no, brab éndaén fénbayadén de. Tidéw béno, fénuuléén.

<sup>28</sup> “Tidéw béno, i sunguwe ni sugu-suguén ménagéw brab énggéalaka noy ségétéwe bé de dumo no sugu-suguén, énggéutong



dob beene kloh kurta. I ni sugu sugu-suguén génamakén i dumo nuwe ni dob reer ne brab kénrangén. Atin ménbéréh mano, 'Bayadanu bé utong me begén!' <sup>29</sup> Tidéw béno, ménlingkuwéd i géruwowe ni sugu-suguén, brab ménfégedaw-gédaw mano, 'Tingkelonu na. Enda sénay kurta gu, éndob bayada ku so beem ké wén i kurta gu.' <sup>30</sup> Endob i sunguwe ni sugu-suguén énda fo fénggélangoén de. Yamula fénférisu no taman énda gébayada noy utong ne. <sup>31</sup> Amun i de dumo sugu-suguén énggito roy ni ménrigo, toow fo méntete i fédwé ruwe de. Atin ménangéy ro dob datue ménlolk, brab nuret roy kéluhanay ménrigowe. <sup>32</sup> Tidéw béno, féntawag i datuey sunguwe ni sugu-suguén brab ménbéréh mano, 'Toow go fo tete étéw. Fénsagada ku beem bé kéluhanay utong me begén non ménfégedaw-gédaw go. <sup>33</sup> Fégedaw go so damén bé dumo muwe sugu-suguén loo bé kégedaw guwe beem.' <sup>34</sup> Toow fo ménkérit i datue, mélaw fénférisu noy ni sugu-suguén taman énda gébayada noy kéluhanay utong ne."

<sup>35</sup> Atin féntama Jesusey ni binuwaya bé ni kébéréh mano, "Loo bé nan i kérigoy Boh guwe dob lawayo bé séngae ségétéw begom, buluk énda toow fo fénsagada kom i de étéw énggésala dob begome."

## 19

### *Fantag bé ségélake*

<sup>1</sup> Tidéw béno, amun énggilid i Jesuse témoro bé de ni, ménangéw tidéw Galilea brab ménangéy dob sakuf i dakéle ingéd Judea dob difar i wayége Jordan. <sup>2</sup> Atin ménfuray i de médoos do ménlimud do étéw. Atin diyo féntadi-adi noy de déméruun bero.

<sup>3</sup> Atin wén i de Fariseo ménangéy dob Beene inok téngkadé ro inok gésumbulo no bero bé békéne damén katabuwan. Ménénginsa ro maro, "Aw fakay dob kitab tome ké gélakéy lagéyey bawag ne sabaf bé de udenén do funa no?"

<sup>4</sup> Atin séménumbul i Jesuse mano, "Aw énda séna énggébasana kom i Ménsulate Kébéréh i Tuluse mano, 'Dob féganaye, amun léménimbag i Tuluse, rénigo noy ségétéwe lagéy brab ségétéwe libun.' <sup>5</sup> Atin bang i Tuluse, 'Been i niy funay lagéye témagak bé boh ne brab idéng ne atin sétifon bé bawag ne. Atin mélaw i ruwowe gétéw waléy ro ségétéw.'"

<sup>6</sup> Atin féntaus Jesusey kébéréh ne mano, "Mélaw éndaén ruwo ro gétéw non ménwaléy ron maak sébaan. Mélaw békén fatut ké fésésuwayéy kéilawane bero, non Tulus i ménféwaléye bero ségétéw."

<sup>7</sup> Tidéw béno, ménénginsa man i de Fariseo maro, "Sede mélaw ké niray Moisesey sugue bé fakay gélakéy lagéyey bawag ne amuk

iraya no sulat bé kégelak ne de, tidéw béno fakayén féagéwé no?"

<sup>8</sup> Séménumbul i Jesuse mano, "Niray Moisesey nan sugu non toow fo métégas i de uléw gom. Endob bé gétaho, amun lénimbag i Tulusey de étéw, énda ténungkas i Tulusey de ménsébabawag ségélak. <sup>9</sup> Mélaw béréhé ku begom, ati lagéye gémelak bé bawag ne saliyo bé kébigae funa no de, atin mawag ségiyo libun, énggélamfa."

<sup>10</sup> Tidéw béno, ménbéréh i de kuyugén maro, "Amuk loo bé nan i késébabawage, i ségétéwe étéw mas fiyo ké énda mawagén."

<sup>11</sup> Atin bang Jesuse, "I kétoros ni békén kay kéluhanay de étéw. Yamula kay do étéw saén fénémili i Tuluse inok énda mawag ro. <sup>12</sup> Wén i de séségiyo-giyo do funay de étéw énda mawag ro. Wén i de étéw énda gébabawag ro non ménsadil ro tidéw fanay kéumah ro. Wén soy do kafun de. Atin wén soy do étéw énda mawag ro inok mégéror ro gémalbék témoro fantag bé kéféguléw i Tuluse bé de étéwén. Mélaw amuk fénémili i Tuluse beem inok énda mawag go, odoro mo."

<sup>13</sup> Wén i no sébaan fuweh, wén i do étéw ménuwit bé de nga ro dob Jesuse inok tégéné no bero bé lala ne démasalan bero. Endob amun énggitoy de kuyugén, génlé roy de étéw ni. <sup>14</sup> Endob ménbéréh i Jesuse mano, "Féangéy gom i de kloh nga dob Begéne. Brab kagom alangén bero, non i de étéw sémarig loo bé késarig i de ni do nga, féguléwoy Tuluse bero."

<sup>15</sup> Atin ténége noy de nga ni brab féntayo no bero. Tidéw béno, ménangéw i Jesuse.

### *Fantag bé kékawasawe*

<sup>16</sup> Wén i no sébaan fuweh, i ségétéwe kénogo lagéy ménangéy dob Jesuse atin ménénginsa mano, "Maistéro, ati fiyowe rignoné ku inok gédoté kuy umule magufusa?"

<sup>17</sup> Séménumbul i Jesuse mano, "Sedek féngingsaa mo Begén fantag bé ati fiyowe? Énda i ségiyo fiyo saliyo saén bé Tuluse. Amuk kétaya mo gédoté moy umule magufusa, odoro moy de sugu tidéw dob Moisesese."

<sup>18</sup> Ménénginsa man i ni lagéy mano, "Ati isuwe de bé de sugu?"

Atin séménumbul i Jesuse mano, "Kago méméléhu, kago lémamfa, kago ménakaw, kago uretén i dumo muwe bé békéne toow, <sup>19</sup> fégadata moy boh me brab idéng me, atin fégedaw go bé de dumo mo étéw loo bé kégedaw me bé kaame lowoh."

<sup>20</sup> Atin bang i lagéye ni, "I kéluhanay de ni nodoro ku. Ati nay fatute rignoné ku?"

<sup>21</sup> Atin séménumbul i Jesuse mano, "Amuk kétaya moy waléye fo métintu dob adafay Tuluse, ule go brab fébéléyé i kéluhanay éntingayéne kaam atin irayém i kurtae dob

de méskinan. Atin mélaw kawasa go moso dob lawayo. Tidéw béno, énggonén, odor go Begén.”

<sup>22</sup> Amun énggélíngoooy étéwe niy ni, toow fo méntete i fédéw ne atin ménagéw non toow fo kawasa.

<sup>23</sup> Tidéw béno, ménbéréh i Jesuse dob de kuyugén mano, “Béréhé ku begom i toowe, toow fo mérégén i kéahur i de kawasa dob kéféguléw i Tuluse.” <sup>24</sup> Atin béréhé ku begom, mas mélémuy kéahur i dakéle ayam dob tosong i darume bé kéahur i ségétéwe étéw kawasa dob kéféguléw i Tuluse.”

<sup>25</sup> Amun énggélíngoooy de kuyugén i ni, toow ro fo ménggaif. Atin ménénginsa ro maro, “Ati mélaw i de fakay méfukas?”

<sup>26</sup> Atin ténéngténg Jesuse bero atin séménumbul mano, “Enda fakayén rigonéy de étéw, éndob i Tuluse fakay gérigono noy kéluhanane.”

<sup>27</sup> Tidéw béno, ménbéréh i Pedrowe mano, “Ténagak gey i kéluhanane atin ménfuray gey Beem. Ati mélaw i gédoté keye de?”

<sup>28</sup> Séménumbul i Jesuse mano, “Béréhé ku begom i toowe, dob mantuwe duniya amuk mésar i Nga i Kéilawane, sani Begéne, dob gérotore saray méguléwe, i de begom do kuyug gu mésar so dob de folo bra ruwo saray méguléwe inok féguléwo kom i de folo bra ruwo gétribo do Judio.” <sup>29</sup> Atin atiy étéwe téménagak bé lawi ne taloo no dumo no sétiman idéng, taloo no bohén brab idéngén, taloo no ngaén, taloo no fantadén inok ureté noy fantage bé kéunur ne Begén, gégédot mératuh takéfé bé de ténagakén brab gédoté no soy umule magufusa. <sup>30</sup> Endob médooy de étéw gérotor béni waléy do gérifantad moso. Atin médooy de gérifantad béni waléy do gérotor moso.”

## 20

### *I binuwayae fantag bé de gémalbék*

<sup>1</sup> Atin ménbéréh i Jesuse sébaan binuwaya mano, “I kéféguléw i Tuluse bé de étéwén ségiléw bé ni. Wén i ségétéwe étéw, wén i safadén. Wén i no sébaan fuweh ménagéw toow géfuwén séméled do étéw inok gémalbék dob safad ne.” <sup>2</sup> Atin ménagayun bayada no bero sébaan félatih loo bé fatute sahud bé ségétérésangane galbék. Tidéw béno, sénuguén bero mangéy gémalbék dob safad ne. <sup>3</sup> Amun géraaran lémwot i térésange, ménangéy man i gefee ni safad dob fadiyane. Diyo, énggito noy de étéw téménindég énda i rigoné ro. <sup>4</sup> Mélaw ménbéréh dob berowe mano, ‘Angéy gom so galbék dob safad guwe, atin bayada ku begom bé katabuwane.’ <sup>5</sup> Mélaw ménagéw ro mangéy gémalbék. Tidéw béno, rénigo noy ni bé géutuhe de, atin rénigo no so man bé géraaran lémwudug i térésange de. <sup>6</sup> Amun alas

singko nén témégénén, ménangéy man dob fadiyane. Atin diyo énggito noy de lagéy téménindég énda i rigoné ro. Atin fénénginsaa no bero mano, ‘Sedek énda gémalbék gom bé ni térésang?’ <sup>7</sup> Séménumbul ro maro, ‘Enda i galbék gey non énda i fégalbék begey.’ Tidéw béno, ménbéréh i gefee ni safad mano, ‘Angéy gom so galbék dob safad guwe.’ Mélaw ménangéy ro gémalbék. <sup>8</sup> Amun sémingkufén, i gefee bé safade ni ménbéréh dob sarigo nuwe mano, ‘Tabarém i de gémenalbék atin sukaya mo bero. Bayada mo sunguy de mantu séna gémalbék taman dob de énggétah de.’ <sup>9</sup> Tidéw béno, i de gémenalbék bé témégéne nén, énggédot roy sébaane félatih sénga ségétéw bero fiyon fo ké gémenalbék ro ségéuras saén. <sup>10</sup> Mélaw i de énggétah do gémenalbék tidéw géfuwén taman sémingkuf, marok gégédot ro mas na médooy kurta. Endob amun bénayada no bero, niraya no so bero sébaan félatih. <sup>11</sup> Tidéw béno, amun éndot roy sahud ruwe, ménbutég-butég ro dob gefee bé safade ni. <sup>12</sup> Ménbéréh ro maro, ‘I de étéw énggéfuray do gémenalbék, ségéuras saén i kégalbék ruwe. Endob sénahudo mo bero ségiléw so bé begeye fiyon fo ké gémenalbék gey ségétérésangan tidéw géfuwén taman sémingkuf. Fatut damén bayada mo begey mas gérotor non gémenalbék gey ségétérésangan dob kééduf i térésange.’ <sup>13</sup> Endob ménbéréh i gefee ni safad dob ségétéwe bero mano, ‘Adih, énda léniful gu begom. Ménagayun tom bé gémalbék gom ségétérésangan atin bayada ku begom sébaan félatih sénga ségétéw. Mélaw rénigo guy ati fénasad guwe. <sup>14</sup> Mélaw dot gomén i sahud gome atin taus gom ule. I ni ségétéw énggéfuray gémalbék, méuyotu mirayan de ségiléw bé kéiraya kuwe begom. <sup>15</sup> Békén ba wén i kuwagib gu rémigo ké udenén i kériyo gu bé kurta guwe loo bé kétaya kuwe de? Médaléw gom keeyén sabaf mégédawu bé de ségiyo étéw.’”

<sup>16</sup> Tidéw béno, fénggilid Jesusey binuwaya ne mano, “Mélaw i de gérifantad béni, waléy ro moso do gérotor. Atin i de gérotor béni, waléy ro moso do gérifantad.”

### *I kéuret Jesuse fantag bé kéléhu ne*

<sup>17</sup> Tidéw béno, i lala Jesuse ménagé mangéy Jerusalem, nuwitén i de folo bra ruwo gétyw kuyugén inok sébero-bero ro saén. Atin ménbéréh dob berowe bé lala ruwe magéw mano, <sup>18</sup> “Na, magéw tom mangéy dob Jerusalem, sani Ingéd i Nga i Kílawane, sani Begéne, irayu dob de odoroy do fadi brab dob de témoro bé kitabé. Atin kukumé ro Begén féléhuén. <sup>19</sup> Atin atéé ro Begén dob de békén Judio. Atin i de békén Judio, diyangkaé ro Begén, brab tafésé ro Begén, brab féléhué ro Begén dob kruse.

Endob amuk méifus i téléwe gétérsangan, tébuleu.”

<sup>20</sup> Tidéw béno, i bawag Sebedeowe ménangéy dob Jesuse beroy de ngaén Juan brab Santiago. Atin léoméningkuwéd dob adafa Jesuse atin wén i nongotén dob Beene.

<sup>21</sup> Atin ménénginsa i Jesuse mano, “Ati kétaya muwe?”

Séménumbul i ni libun mano, “Suguém bé amuk Beem i méguléwe moso, i de nga gu ni géésar ro so fingé dob kuwono muwe brab i ségétéwe de fingé dob biwong me.”

<sup>22</sup> Atin bang Jesuse, “Enda gétiga kom i nan ongoté kom. Aw géfédayday gom bé de kérégenon loo bé mérigowe séko dob Begéne?”

Séménumbul ro maro, “Hoo, gagané key.”

<sup>23</sup> Atin ménbéréh man i Jesuse mano, “Toow méri go dob begomey de kérégenon mérigowe dob Begéne. Gido loo, békén kagén kuwagib i mémilie bé ati mé sare fingé dob kuwono kuwe brab fingé dob biwong guwe. I de ni saran kay de étéw fénémili i Abay guwe Tulus mé sar diyo.”

<sup>24</sup> Tidéw béno, i de folo gétéw dumo ro do kuyugén amun énggélíngoo roy ni nongot ro, ménkérít ro bé Juane brab Santiagowe.

<sup>25</sup> Mélaw ténawag Jesuse bero kéluhanan mangéy dob Beene, atin ménbéréh dob berowe mano, “Gétiga kom i de méguléw dob de békén Judio, wén i kuwagib ro méguléw bero, atin démoyun sugué ro bero. <sup>26-27</sup> Endob békén fatut loo bé nan dob begome. Amuk wén i ségétéw begom méuyot waléy odoron, fatut waléy sugu-suguéy de dumo no. Atin amuk wén i ségétéw begom méuyot waléy gérotor, fatut térifantad. <sup>28</sup> Fatut miring Begén, sani Nga i Kéilawane, non énda ménangéyu dini inok wén i do sugu-sugué ku. Yamula ménangéyu dob duniyae ni inok waléyu sugu-suguén brab inok iray guy umul guwe fégu fukas bé médoowe étéw dob de sala ro.”

### *Nuwa Jesusey ruwowe gétéw langafén*

<sup>29</sup> Amun ténagag Jesusey ingéde Jeriko beroy de kuyugén, wén i de médoo do ménlimud do étéw ménfuray de. <sup>30</sup> Atin wén i ruwowe gétéw langafén ménsar dob doror i aguwone. Amun énggélíngoo roy Jesuse témara, ménkes ro maro, “Séfu Datu Dabid, fégedawan gey!”

<sup>31</sup> Endob i de ménlimud do étéw génlé ro maro, “Kagom selekén!” Endob taus ro so mékes toow na fo métanug maro, “Séfu Datu Dabid, fégedawan gey!”

<sup>32</sup> Tidéw béno, téménrén i Jesuse atin ténawagén bero. Atin ménénginsa dob berowe mano, “Ati kétaya kome rignoné ku dob begome?”

<sup>33</sup> Séménumbul ro maro, “Kadnan, méuyot gey de ké féadi-adiné mo begey inok gégito gey damén.”

<sup>34</sup> Atin ménuray i na Jesuse bero atin kénuwahén i de moto ro. Sonom béno, énggégito ro nén. Atin ménfuray ro bé Jesuse.

## 21

### *I kéahur Jesuse dob Jerusalem*

<sup>1</sup> Atin méntaus i Jesuse beroy de kuyugén mangéy Jerusalem. Amun gédét ron dob Jerusalem, énggumah ro dob ingéde féndawét Betfage dob tuduke féndawét Olibo. Tidéw béno, sénu gu Jesusey ruwowe gétéw bé de kuyugén métah. <sup>2</sup> Ménbéréh dob berowe mano, “Taus gom agéw mangéy dob nan ingéd gé saréwo kom. Buluk gé gumah gom diyo, gito gom i kudae féndawét ‘asno’ ménikét diyo beroy nati nuwe. Ukoh gom bero atin uwit gom bero dob Begéne. <sup>3</sup> Atin amuk wén i ménénginsa dob begome, béréh gom de makom, ‘Kailangay Kadnane bero.’ Atin i ménénginsae magad tungkasé no begom.”

<sup>4</sup> I ni ménrigo inok métuman i kébéreh i sénarigoy Tulus muret bé kébéreh né mano, <sup>5</sup> “Béréh gom dob de étéw bati dob Jerusalem mamó, “Téngténg gom, gé gumah i datu gome térifantad kémuda dob natiwe asno.”

<sup>6</sup> Tidéw béno, ménagéw i de ni ruwo gétéw kuyugén brab nodoro roy sugu Jesuse. <sup>7</sup> Atin ménséfulé ro nuwit roy kudae féndawét asno brab nati nuwe. Tidéw béno, namféno roy natiwe bé de kégal ro brab kéménuda i Jesuse. <sup>8</sup> Diyo wén i de médoó do étéw ménlimud. Bénékah roy de dumo bé de kégal ro dob aguwó Jesuse. Atin i de dumo bero kéménleng ro do dau bongo brab bénékah ro dob agéwone inok fégito roy kébasana ruwe de. <sup>9</sup> Atin i de médoó do étéw magéw ro métah bé Jesuse brab i de médoó de furay ro bé Jesuse, ménkes ro maro, “Dayéwé tom i séfu Datu Dabide! Féfionéy Tulusé damén i ni étéw gé gumah tidéw dob Kadnane! Dayéwé tom i Tuluse!”

<sup>10</sup> Amun énggumah i Jesuse dob Jerusalem, kélogoyan i kéluhanay de étéw. Mén sébéreh ro maro, “Ati ni étéw?”

<sup>11</sup> Atin i de médoó do étéw ménodor bé Jesuse séménumbul ro maro, “Been i niy sarigoy Tulusé muret bé kébéreh né féndawét Jesus tidéw Galilea.”

### *Dénédel Jesusey de démagang dob lawi i Tulusé*

<sup>12</sup> Tidéw béno, ménangéy i Jesuse dob lawi i Tulusé. Amun ménahur, dénédelén i de étéw démagang brab do méléy-méléy diyo. Atin bénluweén i de ahayay de lémuluk kurta brab ténuwarén i de saray de émfébély do fégétulak do marafati. <sup>13</sup> Atin ménbéréh dob berowe mano, “Wén i Mén sulfate Kébéreh i

Tuluse mano, 'I lawi guwe fédawétén lawi gonon démasal.' Endob fénwaléy gom lawi i de ménakaw."

<sup>14</sup> Tidéw béno, i de langafén brab de fikat ménangéy ro dob Jesuse dob lawi i Tuluse. Atin fén-adi-adi no bero. <sup>15</sup> Endob i de odoroy de fadi brab de témoro bé kitabé ménwaléy ro ménkérit amun énggito roy de ni fiyo rénigo Jesuse brab amun énggélíngoo roy kéékes i de nga dob lawi i Tuluse maro, "Dayéwé tom i séfu Datu Dabide." <sup>16</sup> Mélaw ménbéréh i de ni odoron dob Jesuse maro, "Aw énggélíngoo moy de kébéréh i de ni nga? Sedek énda féteréné mo bero?"

Séménumbul i Jesuse mano, "Hoo, énggélíngoo ku. Atin fiyo ké dayéwé ro Begén. Aw énda séna énggébasana kom i Ménsulate Kébéréh i Tuluse mano, 'Fédáyéw i Kadnane bé de nga.'"

<sup>17</sup> Tidéw béno, ténagak Jesuse bero atin méntékédan dob Jerusalem mangéy dob ingéde Betania. Diyo ménbati bé no kélungonon.

<sup>18</sup> Bé géfuwéne de, bé lala ne séfule mangéy Jerusalem, ménlafay i Jesuse. <sup>19</sup> Atin énggito noy sébaane kayéw féndawét igos doror i aguwo. Mélaw fénggédéto no inok médot bé onok ne. Endob amun séménléd de, énda i énggito no onokén saliyo bé de dau no. Tidéw béno, ménbéréh dob kayéwe ni mano, "Éndaén damén mégonok go!" Sonom béno ménlaay i kayéwe ni.

<sup>20</sup> I de kuyugén, amun énggito roy ni, ménggaif ro. Atin ménénginsa ro maro, "Sedek ménagad ménlaay i kayéwo no?"

<sup>21</sup> Atin séménumbul i Jesuse mano, "Béréhé ku begom i toowe, amuk tintu gom munur brab énda ruwo-ruwoy fédéw gome, gérigono kom i loowe bé rénigo guwe dob kayéwe. Atin békén saén i ni, non gébérého kom dob tudukey ni makom, 'Angéy go dob dogote', atin mérigon ba. <sup>22</sup> Non amuk munur gom, gédoté kom i ati ongoté kome ké démasal gom dob Tuluse."

<sup>23</sup> Tidéw béno, ménangéy man i Jesuse dob lawi i Tuluse, atin diyo téménoro. Atin i de odoroy de fadi brab de odoroy de Judio ménangéy ro dob Jesuse atin ménénginsa ro maro, "Ati atura muwe rémigo bé de ni? Ati ménirayane Beem kuwagib bé ni?"

<sup>24</sup> Séménumbul i Jesuse mano, "Sémuliu ménginsa an begom. Amuk sumbulo kom Begén, sumbulo ku so begom ké ati kuwagib guwe rémigo bé de ni. <sup>25</sup> Ati séménugue bé Juane inok mautis, Tulus loo ké étéw saén?"

Atin séédél ro maro, "Amuk béréh tom 'Tidéw dob Tuluso', fénginsaa no betom sedek énda fénéngintoowo tom i Juane. <sup>26</sup> Endob buluk béréhé tom, 'Tidéw dob étéwe,' kéluhanay de ni étéw mékérit ro betom." Ménggilak ro bé de étéw non ménunur i de ménlimud bé Juaney ségétéwe

sénarigoy Tuluse. <sup>27</sup> Mélaw séménumbul ro dob Jesuse maro, "Énda gétiga key de."

Atin mélaw béréh Jesus mano, "Énda so béréhé ku dob begome ké ati kuwagib guwe rémigo bé de ni rigoné ku."

<sup>28</sup> Tidéw béno, nuret Jesusey sébaane binuwaya mano, "Fégitung gom i fantage bé ni. Wén i ségétéwe lagéy wén i ruwo gétéw ngaén lagéy. Ménangéy dob ofoe de atin ménbéréh mano, 'Adu, agéw go mangéy dob safade gémalbék béni.' <sup>29</sup> Endob i ni nga ménbéréh mano, 'Mikau.' Endob énda mérugayén tidéw béno, ménagéw non ménfégalin i fédéw ne. <sup>30</sup> Atin ménangéy soy boh ne dob tuwaréye bé de ngaén. Atin ménbéréh mano, 'Adu, angéy go galbék dob safade béleewe ni.' Atin bang i ni nga, 'Hoo, magéwu.' Endob énda fo ménagéwén. <sup>31</sup> Na, ati karang gome de, ati isuwe bé de ngaén i ménodorone bé kétayay boh ruwe?"

Séménumbul ro maro, "I ofoe de."

Atin bang Jesuse man, "Hoo, atin béréhé ku begom i toowe, i de ménsala étéw loo bé de lémfifol do kémubra buwis brab de sundal géahur dob kéféguléw i Tuluse géétah na begom. <sup>32</sup> Non i Juan Bautistawe ménangéy dob begome fégétiga no begom i méntintuwe aguwo, éndob énda ménunur gom de. Endob i de lémfifol kémubra buwis brab de sundal énggésénule ro ménunur ro de. Atin fiyon fo ké énggito gom i kégésénule ruwe, énda fo gésénule gom taloo no munur gom de."

### *I binuwayae fantag bé de tete témalima*

<sup>33</sup> Atin ménbéréh man i Jesuse mano, "Fégélingo gom nay ni ségiyo binuwaya. Wén i ségétéwe étéw wén i safadén nohoko no do ubas. Atin fénlakatén i lémiwéte de, atin kénalutén i fédongo nuwe bé fégékérese bé de onokén. Atin réménigo so tambala. Tidéw béno, féntalimaén bé de ségiyo étéw. Tidéw béno, ménagéw mangéy dob mérayue ingéd. <sup>34</sup> Amun énggumah i gaiy kékétéwe de, sénuguén i de sugu-sugué no inok doté roy kaane de baad bé de onokén. <sup>35</sup> Endob i de témalima bé safade, génamak roy de ni sugu-suguén. Atin lénu bag roy ségétéwe de, atin fénléhu roy ségétéwe de, atin nibéro ro batéw i gétéléwe de taman ménléhu. <sup>36</sup> Tidéw béno, i gefee bé safade ni, sénuguén man i de ségiyo do sugu-sugué no éndob mas na médo. Endob i de témalima bé safade, ségiléw soy rénigo ruwe dob berowe. <sup>37</sup> Tidéw béno, i gefee bé safade ni, sénuguén i tintuwe ngaén non fénggitungén mano, 'Fégadata roy nga guwe.' <sup>38</sup> Endob amun énggito de témalima bé safad ne, ménsébéréh-béréh ro maro, 'Been i niy nga i gefee bé ni safad. Féléhué tom inok gékatom i ni safad.' <sup>39</sup> Mélaw génamak ro, atin fénsut ro dob liyuy safade. Tidéw béno, fénléhu ro."

<sup>40</sup> Atin féntaus Jesusey kéberéh ne mano, “Amuk gégumah i gefee bé safade ni, ati rigoné nuwe dob de téménalima bé safad ne?”

<sup>41</sup> Séménambul ro maro, “Angéyé no féluhuén i de ni tete étéw. Tidéw béno, irayén man dob ségiyowe témalima inok iray ro dey kaane baad bé de nohok ké gégumah i kékétewe de.”

<sup>42</sup> Atin ménberéh i Jesuse dob berowe mano, “Aw énda séna énggébasana kom i Ménsulate Kéberéh i Tuluse mano, ‘I batéwe nikaay de réménigo bé lawie, been i ménwaléye toow na fo balilaga fiyo batéw. I ni réniyog Kadnane ula-ula, atin mégaif tom de.’ ”

<sup>43</sup> Atin féntaus Jesusey kéberéh ne mano, “Mélaw bérehé ku begom i Tuluse éndaén sarigé noy safad ne dob begome. Yamula sarigé no dob de ségiyo étéw rigoné roy kétaya nuwe. I atag i ni, éndaén féguléwoy Tuluse begom. Yamula féguléwoy noy de ségiyo étéw munur dob Beene. <sup>44</sup> Atin atiy mélawue dob nan batéw toow fo mébinasa. Brab buluk i batéwe ni mélawu dob de étéw, rénahé no bero maak bubuk sébuwan.”

<sup>45</sup> I de odoroy de fadi brab de Fariseo, énggélíngoo roy de ni binuwaya nuret Jesuse. Atin gétiga ro beroy bérhéno nuwe fantag bé de ni. <sup>46</sup> Mélaw ténlama ro kénéfo i Jesuse, éndob énda gagané ro de non ménggilak ro bé de médoos do ménlimud do étéw diyo. Non i de ni étéw kénarang roy Jesuse ségétéw sénarigoy Tuluse muret bé kéberéh ne.

## 22

### *I binuwayae fantag bé uyote*

<sup>1</sup> Atin ménuret man i Jesuse binuwaya dob de étéw. <sup>2</sup> Ménberéh mano, “I kéféguléw i Tuluse loo bé ni. Wén i ségétéwe datu réménigo karagiya dob uyot i nga ne lagéy fébawagén. <sup>3</sup> Amun énggumah i gaiwe, sénuguén i de sugu-sugué no mangéy témawag bé de étéw sénéngkat ro brab émbéréh dob berowe bé énggumahén i gaiy uyote brab fatu magéw ro mangéy dob lawi ne. Endob ménika ro magéw. <sup>4</sup> Mélaw i datue ni sénuguén man i de ségiyo sugu-sugué no mangéy méréh dob de ni do étéw sénéngkat ro mano, ‘Méntafayén i karagiya béleewe ni. Ménsubalién i de bobo ayam atin méntogohén i kéluhanane. Enggomén, angéy gomén dob uyote ni.’ <sup>5</sup> Endob i de étéw sénéngkat ro, énda fo nifat ro de brab énda fo ménangéy ro dob uyote ni. Yamula i ségétéwe de ménangéy dob safad ne, atin i ségétéwe de ménangéy dob daganga nuwe. <sup>6</sup> Atin i de dumo bé de ni étéw sénéngkat ro génamak roy de sugu-suguéy datue ni. Atin lénu bag ro brab fénléhu ro bero. <sup>7</sup> Mélaw i datue ni toow fo ménkérít. Mélaw sénuguén i de sundalo no atin fénléhu

roy de ni étéw ménméléhu, atin ténuwég roy ingéd ruwe. <sup>8</sup> Tidéw béno, ménberéh dob de sugu-suguén mano, ‘Méntafayén i uyote, éndob i de sungu do étéw sénéngkat gu énda fo médait ro mangéy dini. <sup>9</sup> Agéw gom mangéy dob de dakél aguwon atin séngkat gom médoos do étéw taman atiy gito gome de.’ <sup>10</sup> Mélaw i de sugu-suguén ménagéw ro dob de aguwon atin lénimud roy de médoos do étéw, sani kéluhanay de énggito ro do fiyo étéw brab do tete étéw. Atin mélaw i gonoy uyote ni toow fo ménféno bé étéwe. <sup>11</sup> Endob amun ménahur i datue inok téngténgé noy de kana, énggito noy ségétéwe lagéy énda kéménégalén loo bé fatute dob uyote. <sup>12</sup> Atin ménénginsa i datue mano, ‘Adih, sedek ménahur gom dob ni uyot énda kéménégal go loo bé fatute?’ Endob énda séménambul i lagéye ni. <sup>13</sup> Tidéw béno, bérhéh i datue dob de sugu-sugué no mano, ‘Ikét gom i de kémérén brab de sékéyén, atin íber gom dob liyuy lawie ni mangéy dob délémoné. Diyo kémérew brab kémigét i de kifé no.’ ”

<sup>14</sup> Atin fénggilid Jesusey binuwayae ni mano, “Non fiyon fo ké médooy de étéw sénéngkat i Tuluse, kloh saén i méfémilie de waléy do étéwén.”

### *Fantag bé buwisse*

<sup>15</sup> I de Fariseo, ménangéy ro sélimud séberobero saén. Atin ménberéh-béréh ro fantag bé ati kéténgkad ro bé Jesuse inok géberéh bé békéne damén katabuwan. <sup>16</sup> Tidéw béno, sénugu roy de dumo bé de kuyug ro brab de dumo bé de kuyug Datu Herod mangéy ménginsa dob Jesuse. Atin ménberéh i de ni étéw dob Jesuse maro, “Maistéro, gétiga key toow i kétoro me. Brab métintu go, énda i isu ramigo mo bé de étéw. Yamula toroé moy toowe fantag bé kétayay Tuluse toow. <sup>17</sup> Mélaw bérhéhém begey, ati karang me de, aw fatut gey ba mayad buwis dob Sesare, sani datue dob Roma taloo no énda?”

<sup>18</sup> Endob i Jesuse énggétiga noy tete kétaya ro brab bérhéhén bero mano, “I de begom do ubo-ubo gom saén méngintulus. Sedek télamané kom Begén fagakaran? <sup>19</sup> Féténgténg gom Begén i félatahe kurta fégébuwis.”

Amun niraya ro de, <sup>20</sup> ménénginsa i Jesuse dob berowe mano, “Ati gefee dawét brab falas gito gom dob nan?”

<sup>21</sup> Séménambul ro maro, “Ka Sesar.”

Tidéw béno, bérhéh Jesuse mano, “Iray gom dob Sesarey ka Sesare. Brab iray gom dob Tulusey kay Tuluse.”

<sup>22</sup> Amun énggélíngoo roy ni, ménggaif ro bé késumbul Jesuse. Atin ménagéw ro ténggak roy Jesuse.

### *Fantag bé kétébulee*

<sup>23</sup> Bé no so téréasang, wén i de Saduseo ménangéy ro dob Jesuse. (Been i berowey de énda méngintoow bé kéfétébule i Tuluse bé de étéw moso.) <sup>24</sup> Ménbéréh ro dob Jesuse maro, “Maistéro, bénréh Moisee bé buluk i ofo i ménléhue, brab énggéfélodo noy bawag ne, énda i nga ro, fatut bawagéy tuwaréy ne inok wén i séfu i ni étéw bé tuwaréy ne. <sup>25</sup> Na, wén i fitéw gétéw sétuwaréy falan lagéy ménbati dini Brab i ofo de ménawag. Tidéw béno, ménléhu énda i nga ro. Tidéw béno, i gétunduge de bénawagén soy bawage féndel i ofo ne. <sup>26</sup> Atin ménléhu so énda i nga ro. Atin i gétéwéwe de bénawagén so taman dob géfitéw ruwe. Endob ménléhu ro kéluhanan énda i nga ro. <sup>27</sup> Tidéw béno, ménléhu soy ni libun. <sup>28</sup> Mélaw bé gaiy kétébulee moso, ati isuwe bawag i ni libun bé de ni fitéw gétéw sétiman idéng? Non énggébawaga no bero kéluhanan bé méuyag ro de séna.”

<sup>29</sup> Séménubul i Jesuse mano, “Tintu békén katabuwan i kéfégitung gome. Non énda gétiga kom i Ménsulate Kébéréh i Tuluse taloo noy barakat ne. <sup>30</sup> Non amuk tébule i de étéw, ségiléw ro bé de télaki dob lawayo atin énda sébawag ro. <sup>31</sup> Atin fantag bé kétébulee, aw énda séna énggébasana kom i Ménsulate Kébéréh i Tuluse dob begome? <sup>32</sup> Fiyon fo ké ménléhu i ro Abrahame, Isak, brab Jakob, bang i Tuluse, ‘Begéney Tuluse féngadafé Abrahame, Isake, brab Jakobe.’ I atag i ni, i Tuluse féngadaféy de méuyag do étéw, békén i de ménléhu.”

<sup>33</sup> Atin amun énggélíngooy de étéw i ni kétoro Jesuse, ménggaif ro.

### *I toowe na fo gérotor sugu*

<sup>34</sup> I de Fariseo, amun énggélíngoo roy fantage bé kéféantés Jesuse bé de Saduseo, ménsélimud ro. <sup>35</sup> Atin i ségétéwe bero témoro bé kitabe, ténéngkadén i Jesuse inok énda damén katabuwan i késumbul ne. <sup>36</sup> Ménénginsa mano, “Maistéro, ati isuwe toow fo gérotor bé de sugu dob kukumay Tuluse?”

<sup>37</sup> Séménubul i Jesuse mano, “Féimu go bé Kadnane Tulusém bé kéluhanay fédév me, brab kéluhanay kámatu me, brab kéluhanay itunga muwe. <sup>38</sup> Been i niy toowe fo gérotor sugu. <sup>39</sup> I géruwowe toow fo gérotor sugu ringon so bé sunguwe de. Féimu go bé dumo muwe ringon so bé kéimu me bé kaame lowoh. <sup>40</sup> I toowe atag i kéluhanay de kukuman niray Moisee betom tidéw dob ni ruwo timan sugu. Tidéw so dob niy kéluhanay ténoro i de sénarigoy Tuluse muret bé kébéréh ne.”

<sup>41</sup> Amun ménlimud sénay de Fariseo, ménénginsa i Jesuse dob berowe mano, <sup>42</sup> “Ati antaf gom bé Kristowe? Ati katufua nuwe?”

Séménubul i de Fariseo maro, “Dabid i katufua Kristowe.”

<sup>43</sup> Ménbéréh man i Jesuse mano, “Amuk loo, ati kéfanu-fanu nuwe ké fénbéréh i Rémogor i Tuluse bé Dabide bé fédawétén i Kristowe ‘Kadnan?’ Non ménbéréh i Dabide mano, <sup>44</sup> ‘I Kadnane ménbéréh dob Kadna kuwe, sar go dob kuwono kuwe taman témabanu bé de sébanil Beem.’ <sup>45</sup> Amuk féndawét Dabidey Kristowe ‘Kadnan’, ati kéfanu-fanu nuwe ké i Kristowe séfu Dabide saén?”

<sup>46</sup> Endob énda i ségétéw bero énggésumbul, ménantés ro. Atin tidéw bé no gai, éndaén i étéw émbaraw ménginsa dob Jesuse.

## 23

<sup>1</sup> Tidéw béno, ménbéréh i Jesuse dob de ménsélimud étéw brab dob de kuyugén mano, <sup>2</sup> “I de témoro bé kitabe brab de Fariseo, beroy de étéw sénarigon témoro bé kitabé niray Moisee. <sup>3</sup> Mélaw fatut odoro kom démoyun i kéluhanay kétoro ruwe begom. Endob kagom iringén i de rignon ro non énda modor ro bé karowe kétoro. <sup>4</sup> Sugué roy de étéw bé médoowe, maak féobo ro beroy de toow fo émbégat do obo, éndob énda témabang ro de. <sup>5</sup> Fédayéw-dayéw ro saén dob téngaangay de étéw. Féndakél roy de fédongo ro bé Ménsulate Kébéréh i Tuluse ténaléy ro bé de kémér ro inok gitoy de étéw. Atin féntaah roy de kégal ro maak do tintu fo méngintulus. <sup>6</sup> Atin méuyot ro mésar dob de fiyo saran dob kandulie brab dob de lawi féngadafan. <sup>7</sup> Atin méuyot ro fégadatan ségifaén dob de fadiyan brab fédawét i de étéw bero ‘Maistéro.’ <sup>8</sup> Endob kagom fédayaén i de étéw fédawét ro begom ‘Maistéro’, non fantay-fantay gom sédumon atin ségétéw saén i Maistéro gome. <sup>9</sup> Atin kagom fédawét i de étéw dob duniyae ni ‘Abay’, non ségétéw saén i Abay gome sani Tuluse dob lawayo. <sup>10</sup> Atin kagom so fédayaén i de étéw fédawét ro begom ‘Uléw’, non ségétéw saén i Uléw gome sani Begéne, Kristo. <sup>11</sup> I toowe na fo gérotor dob begome fatut waléy sugu-suguén. <sup>12</sup> Atiy étéwe téréférotor, féférifantadén. Atin i étéwe téréfantad, féférotorén.

<sup>13</sup> “I begome do Fariseo brab do témoro bé kitabé, mékukum gom fo toow. Ubo-ubo saén i kéféngintulus gome. Alangé kom i de étéw méuyot mahur dob kéféguléw i Tuluse. Mika gom mahur atin alangé kom i de étéw méuyot mahur. <sup>14</sup> Mékukum gom fo toow do témoro bé kitabe brab begome so do Fariseo. Ubo-ubo saén i kéféngintulus gome. Lafisé kom i de libun baléw inok afasé kom i de lawi ro. Tidéw béno, démasal gom bé de métaah kédasal dob téngaangay de étéw non makom ké médirung i de ni tete rignoné kom.



## 24

*Fantag bé tamfaday duniyae*

<sup>1</sup> I lala Jesuse magéw tidéw dob lawi i Tuluse, i de kuyugén ménfégédét ro dob Beene toroé roy de fiyo falasén do lawi bé lawi i Tuluse. <sup>2</sup> Endob ménbéréh i Jesuse mano, "Gito gom i de ni? Béréhé ku begom i toowe, i kéluhanay de ni mébinasa, brab fiyon i de batéw fénggérigo de émbéragar ro."

<sup>3</sup> Amun ménsar i Jesuse dob tuduke féndawét Olibo, ménangéy i de kuyugén dob Beene sébero-bero saén. Atin ménbéréh ro maro, "Béréhé begey kédiron mérigoy de ni. Brab ati féngélonone de ké gédétén gégumah i késéfule me brab tamfaday de gai?"

<sup>4</sup> Séménambul i Jesuse mano, "Ingat gom inok énda méfagakaran gom. <sup>5</sup> Non médoosoy de étéw gégumah usaré roy dawét guwe, brab béréhé ro maro, 'Begéney Kristowe.' Atin médooy de géfagakara ro. <sup>6</sup> Atin gélingoo kom i kébéreh i sétibohe brab gélingoo kom soy fantage bé de gira. Endob kagom mégilak de. I de ni kailangan mériego éndob békén sénay ni tamana nuwe. <sup>7</sup> I de ingéd sétiboh ro bé de ségiyo ingéd. Brab i de sakuf fangangaturan sétiboh ro bé de ségiyo. Atin wén mosoy lénggob brab do luba dob de séségiyo-giyo do ingéd. <sup>8</sup> Endob i de ni féganaya no saén loo bé kékéfanay i kékédawétay ségétéwe libun obor gédétén méngéna.

<sup>9</sup> "Atin i kéluhanay de étéw mérarék ro begom sabaf bé kéunur gome Begén. Atin mélaw kéfoén gom inok férasayé ro begom brab féléhué ro begom. <sup>10</sup> Atin bé béno, wén i médoosoy do étéw témérén munur. Atin sékéfo ro brab méserarék ro. <sup>11</sup> Tidéw béno, médooy de ubo-ubo sarigoy Tuluse muret bé kébéreh ne gégumah brab fégakara roy de médoosoy do étéw. <sup>12</sup> Atin sabaf bé kélégéb i tetee, éndaén ségédaw i de étéw. <sup>13</sup> Endob ati géfédaydaye munur taman dob tamfadane, méfukas ro. <sup>14</sup> Atin i ni Fiyo Uret fantag bé kékéfuléw i Tuluse uretén dob kéluhanay de ingéd dob duniyae ni inok gétigay kéluhanay de étéw. Tidéw béno, gégumah i tamanane.

<sup>15</sup> "Atin gito gom i 'Mékésirang-sirange Surga' béréh i sénarigoy Tuluse féndawét Daniel bé do géhah. Atin témindég dob mékétéfuwe gonon." (Fégésobutéy masawe.) <sup>16</sup> Atin féntaus Jesusey kébéreh ne mano, "Bé béno gai, i de étéw bati dob Judea fatut méraréy ro dob de tuduk. <sup>17</sup> Atin i étéwe dob liyuy lawi ne, békénén fatut mahur dob lawi ne inok angéyé noy insod ne. Fatut magayasén méraréy. <sup>18</sup> Atin i étéwe diyo dob safad ne, békénén fatut séfule dob lawi ne inok angéyé noy géruwowe lafin kégalén. <sup>19</sup> Bé do no do gai, toow fo mékégedaw-gédaw i de libun obor brab de mériton do idéng. <sup>20</sup> Dasal gom dob Tuluse brab ongot gom

dob Beene inok dob gaiwe kailanga kom i méraréye bé de gai ménfégénéy taloo no gai kétérén. <sup>21</sup> Non toow na fo gétimal i kérégégéy ni bé kéluhanay de ségiyo do kérégénéon dob ségiyowe gai tidéw bé kélimbang i Tuluse bé duniyae taman so béleewe ni. Atin éndaén i kérégénéon loo bé ni tidéw bé béno gai. <sup>22</sup> Endob i Tuluse fénfokoén i do no gai. Amuk énda rénigo noy ni, énda i ségétéw méuyag. Féfokoé noy de gai non ménuray i na nuwe bé de fénémilién étéw.

<sup>23</sup> "Bé béno gai, amuk wén i émbéréh dob begome mano, 'Téngténg gom, ay niy Kristowe,' taloo no 'Diyoo, ay nan,' kagom munur de. <sup>24</sup> Non gégumah i de émbéréh, 'Begén i Kristowe,' brab do ubo-ubo sénarigoy Tuluse. Atin gérigono roy de dakél mékégaif inok géfagakara roy de fénémili i Tuluse, amuk fakay. <sup>25</sup> Fétuntay gom i de ni. Béréhé ku dob begome lokut énda séna mériego no.

<sup>26</sup> "Atin amuk wén i émbéréh dob begome mano, 'Téngténg gom, diyo i Kristowe dob gonone énda i étéw de bati,' kagom mangéy diyo. Look amuk émbéréh ro maro, 'Téngténg gom, ay diyo ménrékunéy,' kagom munur de. <sup>27</sup> Non i Nga i Kéilawane, sani Begéne, giton i késéfule guwe ségiléw bé kékigtone bé kilote réméndaw tidéw sébangan mangéy élédon.

<sup>28</sup> "Fiyon atiy gonoy de ménléhu, diyo soy de uwak sétimu.

<sup>29</sup> "Enda mérugayén tidéw bé de mérégén do gai, i térésange waléy délémon, brab i térésang kélungonone éndaén réméndawén, brab i de gitoo mélawu ro tidéw dob lawayo brab i de étingayén dob lawayo mékuyung. <sup>30</sup> Tidéw béno, giton dob lawayoy féngélonone bé kégumah guwe, sani Nga i Kéilawane. Atin i kéluhanay de étéw dob duniyae ni kémelew ro bé kékilak ruwe. Tidéw béno, gito ro Begén dob rawéne gégumah tidéw dob lawayo barakatan brab réméndaw. <sup>31</sup> Atin dob métanuge béréh i témburiwe, sugué kuy de télaki gu mangéy dob séngae gonon dob duniyae ni. Atin timué roy de fénémilién étéw gu tidéw dob kéluhanay de ingéd."

<sup>32</sup> Tidéw béno, nuret Jesusey sébaane binuwaya mano, "Fétuntay gom i ni ufama fantag bé kayéwe. Dini dob betome ni, sonom lémbud i de fongo no brab émféantu daun, gétiga kom gédétén i basa médufe. <sup>33</sup> Ségiléw so bé béno gai. Amuk gito gomén mérigoy de ni béréh gu, gétiga kom gédétén i késéfule guwe. <sup>34</sup> Atin béréhé ku begom i toowe, i de étéw méuyag béni, énda ménléhu ro taman mérigoy de ni. <sup>35</sup> I lawayo diyo brab duniyae ni méalfa, éndob i kébéreh guwe énda méalféen.

<sup>36</sup> "Endob énda i ségétéw gétigan bé gaiy kégumah i no gai séfuleu. I de télaki dob



lawayo énda gétiga ro de, brab fiyon i Begéne, sani Nga i Tuluse, énda so gétiga ku de. I Abay guwe saén Tulus i gétigane bé nan gai. <sup>37</sup>I késéfule guwe ségiléw bé gai Noehe. <sup>38</sup>Non bé gai Noehe, amun gédétén gégumah i dunuke, i de étéw énda ménbuku ro. Yamula ménama ro, méniném ro, ménawag ro taman bé gaiy kéahur Noehe dob barkowe. <sup>39</sup>Non i de étéw énda énggétiga roy ati mérigowe séko. Endob tékow énggumah i dunuke atin ménléné ro kéluhanan saliyo bé Noehe brab de samungén. Ségiléw so bé niy kétékow i késéfule guwe. <sup>40</sup>Bé béno gai, wén i ruwo gétéw lagéy diyo gémalbék dob safade, atin i ségétéwe de dotén brab i ségétéwe de méféled. <sup>41</sup>Atin wén i ruwo gétéw do libun gémilng, atin i ségétéwe de dotén, brab i ségétéwe de émféled. <sup>42</sup>Ingat gom mélaw, non énda gétiga kom i gaiy késéfule i Kadna kome, sani Begéne. <sup>43</sup>Fétuntay gom i ni ufama. Amuk i gefee bé lawie gétiga noy gaiwe gégumah i ménakawe, énda fo fidongén brab énda fédayaé no mahur i ménakawe. <sup>44</sup>Mélaw fatut tafay gom sénga tékélid. Non séfuleu bé gaiwe énda karangé kom de.

<sup>45</sup>“Ati géсариге brab géтуwane sugu-suguén? Been i sugu-suguéne sénarigoy amu ne méguléw bé de dumo no sugu-suguén, inok irayén i de amaén bé fatute gai. <sup>46</sup>Toow fo moror i ni sugu-suguén ké séfule i amu ne brab gito no rémigo bé kaane galbék loo bé fatute. <sup>47</sup>Béréhé ku begom i toowe, i amue ni sarigé noy kéluhanay de kaan do éntingayén dob ni sugu-suguén. <sup>48</sup>Endob amuk tete i adat i ni sugu-suguén atin fégitungé no mano, ‘Mérugay sénay késéfule i amu guwe.’ <sup>49</sup>Atin féganaya noy lémbubage bé de dumo no sugu-suguén, atin mama brab miném séréngan bé de molon. <sup>50</sup>Tidéw béno, séfule i amu ne bé gaiwe énda gétigay ni de sugu-suguén, atin kétékowan. <sup>51</sup>Mélaw i amu ne, kukumé noy ni sugu-suguén atin fédiyoé no dob gonoy de ubo-ubo étéw. Diyo kémérew brab kémigét i de kifé no.”

## 25

### *I binuwayae fantag bé de folo gétéw kénogon*

<sup>1</sup>Atin nuret Jesuse man i sébaane binuwayae fantag bé késéfule ne mano, “I kénéfuguléw i Tuluse loo bé ni. Wén i do folo gétéw kénogon. Nangéy ro bénalak i ségétéwe témérima lagéy. I séngae kénogon wén i kaan solo nuwit. <sup>2</sup>Endob i limowe de gétéw do béngu brab i de limo de gétéw do métilédtdé. <sup>3</sup>Non i de limo de do béngu ménuwit ro do solo éndob énda i do wayégén. <sup>4</sup>Endob i de limo de gétéw do métilédtdé nuwit roy de solo brab de katiya ménféno fitroliyo. <sup>5</sup>Tidéw béno, ménlis i témérimawe ni lagéy.

Atin mélaw ménwaléy manat i de ni folo gétéw kénogon. Atin énggéfudong ro.

<sup>6</sup>“Amun kérara kélungononén, wén i mékese mano, ‘Ay ni nén i témérimawe lagéy énggumahén! Enggomén, angéy gom balak.’ <sup>7</sup>Sonom béno, méntek i de folo ni gétéw kénogon, atin ténumo roy de solo ro. <sup>8</sup>Tidéw béno, i de béngu ni do kénogon béréh ro dob de métilédtdé do kénogon maro, ‘Irayan gey bé fitroliyo goma nan, non ménfadéng i de solo gey.’ <sup>9</sup>Endob séménumbul i de métilédtdé do kénogon maro, ‘Enda fakayén non kulang i fitroliyo geyé ké tukido key de begom. Fatut angéy gom de bélyé kagom.’ <sup>10</sup>Mélaw ménagéw i de béngu ni do kénogon inok méléy ro do fitroliyo. Atin amun ménagéw ro, énggumahén i témérimawe lagéy. Atin i limowe de do énggétafay, ménodor ro bé témérimawe ni lagéy ménahur ro dob uyote. Tidéw béno, ménfintuén i béngawane.

<sup>11</sup>“Enda mérugayén tidéw béno, énggumah man i de béngu do kénogon. Atin téménawag ro maro, ‘Maistéro, féahurén gey.’ <sup>12</sup>Endob séménumbul i témérimawe ni lagéy mano, ‘Tintu fo énda gélolo gu begom.’”

<sup>13</sup>Atin fénggilid Jesuse binuwayae ni mano, “Been i funa kome fatut mingat. Non énda gétiga kom i gai guwe séfule.”

<sup>14</sup>Atin ménuret man i Jesuse sébaan binuwayae fantag bé kénéfuguléw i Tuluse bé de étéwén mano, “Wén i ségétéwe étéw ménagéw mangéy dob mérayue ingéd. Amun énda séna magéwén de, ténawagén i de sugu-sugué no atin sénarigén i de languntama no dob berowe. <sup>15</sup>Nirayén dob séngae sugu-suguén loo bé kénéfudtdé ruwe. Dob sunguwe de niraya no limo ngibu kurta. Atin dob géruwowe de niraya no ruwo ngibu, atin dob gétéléwe de niraya no séngibu kurta. Tidéw béno, ménagéwén i ni étéw ménangéy dob mérayue ingéd. <sup>16</sup>Sonom so bé kéagéw i amu ruwe, i sunguwe sugu-suguén méndagang-dagang. Atin énggéinség de limo ngibu kurta. <sup>17</sup>Atin loo so bé niy réngoy géruwowe sugu-suguén, atin énggéinség de ruwo ngibu kurta. <sup>18</sup>Endob i gétéléwe sugu-suguén ménagéw brab kéménalut dob fantade, atin lénébéngén i séngibuwe kurta sénarig dob beene.

<sup>19</sup>“Tidéw béno, amun ménrugayén, ménséfule i amu ruwe atin ténawagén i de sugu-sugué no inok étuké noy kurta ne. <sup>20</sup>Atin i sunguwe sugu-suguén, téméningé brab ménbéréh dob amu ne mano, ‘Amu, ay niy limowe ngibu kurta sénarigém dob begéne. Ay ni soy limowe ngibu kurta inségén.’ <sup>21</sup>Atin ménbéréh i amu ne mano, ‘Fiyu, méсаригон go brab fiyo go sugu-suguén. Non méсаригон go bé klohe, méсаригон go so bé médoowe. Méuyotu ké moror go séréngan begén.’ <sup>22</sup>Tidéw béno, i géruwowe sugu-suguén téméningé brab

ménbéréh mano, 'Amu, ay niy ruwowe ngibu kurta sénarigém dob begéne. Atin ay ni soy ruwowe ngibu inségén.' <sup>23</sup> Tidéw béno, ménbéréh i amu ne mano, 'Fiyó, méсарigon go brab fiyo go sugu-suguén. Non méсарigon go bé klohe, méсарigon go so bé médoowe. Méuyotu ké moror go séréngan begén.' <sup>24</sup> Tidéw béno, téméningé i gétéléwe sugu-suguén. Atin ménbéréh mano, 'Amu, gétiga ku beem métégas go fo étéw. Edoté moy békéne kaam, brab kétéwé moy békéne nohokém. <sup>25</sup> Mélaw mégilaku fo beem. Atin mélaw, ménagéwu brab bénunéy guy kurta me dob fantade inok énda métadino. Atin téngténgém, ay niy séngibuwe kurta sénarigém dob begéne.' <sup>26</sup> Tidéw béno, ménkérít i amu ne, atin ménbéréh mano, 'Tete go fo sugu-suguén brab faukén go fo toow. Aw gétiga mo médotu kun bé békéne kagén, brab kéntéw guy békéne nohok gu? <sup>27</sup> Amuk kémarang go loo bé nan, fatut damén féndiyoém i kurtae dob faukue inok buluk séfuleu, fakay doté ku brab wén i inségén.' <sup>28</sup> Tidéw béno, bénréh i amue ni dob de étéw dob sékulo ruwe téméningé mano, 'Dot gom i kurta ne atin iray gom dob ségétéwe wén i folo ngibu kurtaén. <sup>29</sup> Non i de étéw méсарigon ro, umanan irayan inok waléy médooy karowe de. Endob i de étéw énda méсарigon ro, fiyon i klohe dob berowe dotén so. <sup>30</sup> Atin i ni tete sugu-suguén, ibér gom dob liyuwe dob délémoné gonon. Diyo kémerew brab kémigét i de kifé no.' "

### *I de bili-bili brab do kambing*

<sup>31</sup> Atin ménuret man i Jesuse ségiyo binuwaya mano, "I Nga i Kéilawane, sani Begéne, amuk séfuleu begey i de télaki gu inok méguléw, méсарu dob sarane kay méguléwe. <sup>32</sup> Atin mélimud dob adafa kuwey kéluhanay de étéw. Atin féganané kuy de fiyo étéw bé de tete étéw ségiléw bé kéféganay témalimae bili-bili bé de bili-bili no brab de kambing. <sup>33</sup> Atin fédiyoé kuy de fiyo étéw dob kuwono kuwe atin fédiyoé kuy de tete étéw dob biwong guwe. <sup>34</sup> Atin i Begéne, sani méguléwe, béréhé ku dob de fiyo étéw dob kuwono kuwe maku, 'Fénfiyoy Abay guwe Tulus begom. Enggomén, ahur gom dob kéfégüléw i Tuluse loo bé kébantak ne de tidéw bé kélimbag ne bé duniyae ni. <sup>35</sup> Non amun ménlayafu, fénama gom Begén. Atin amun ménτέρuménu, féniném gom Begén. Atin amun énda séna gélolo gom Begén, tényakuf gom Begén dob de lawi gom. <sup>36</sup> Atin amun énda i kégal gom, fénkégal gom Begén. Atin amun déménruunu, ténalima gom Begén. Atin amun ménférisuwu, ténukaw gom Begén.' <sup>37</sup> Tidéw béno, i de ni fiyo étéw émbéréh dob Begéne maro, 'Kadnan, kédiron i kégito geye Beem mélayaf atin fénama gey Beem, taloo no térumén go atin féniném

gey Beem? <sup>38</sup> Brab kédiron i kétayakuf geye Beem dob de lawi gey fiyon fo ké énda séna gélolo gey Beem? Brab kédiron i kégito geye Beem félawas atin féngkégal gey Beem? <sup>39</sup> Brab kédiron i kégito geye Beem démérúun taloo no ménférisu go atin ténukaw gey Beem?' <sup>40</sup> Tidéw béno, béréhé ku bé de fiyo étéw maku, 'Béréhé ku begom i toowe, amun ménggédaw gom bé ségétéwe gérifantad dumo gu, maak ménggédaw gom so Begén.' <sup>41</sup> Tidéw béno, béréhé ku dob de étéw dob biwong guwe maku, 'I begome médat gom mékukum, férayu gom tidéw dob Begéne. Angéy gom dob aféye énda émfandaén taman sa taman ménfafayén ka Satanase brab de kaan do kuyug do saitan. <sup>42</sup> Non amun ménlayafu, énda fénama gom Begén. Atin amun ménτέρuménu, énda féniném gom Begén. <sup>43</sup> Atin amun énda gélolo gom Begén, énda tényakuf gom Begén dob de lawi gom. Atin amun énda i kégal gu, énda fénkégal gom Begén. Atin amun déménruunu brab amun ménférisuwu, énda ténalima gom Begén.' <sup>44</sup> Tidéw béno, i de ni tete étéw émbéréh ro maro, 'Kadnan, kédiron wayoy kégito geye Beem mélayaf taloo no térumén, taloo no ségétéw go énda gélolo gey de, taloo no énda i kégalém, taloo no démérúun, taloo no ménférisu, atin énda tényakuf gey Beem?' <sup>45</sup> Atin i Begéne, sani méguléwe, sumbulo ku bero maku, 'Béréhé ku begome i toowe, amun énda tényakuf gom i ségétéwe toow fo gérifantad kuyug gu, maak énda so tényakuf gom Begén.' <sup>46</sup> Tidéw béno, i de ni do tete étéw, féangéy ku bero dob uleono emferno inok mékukum ro taman sa taman. Endob i de métintu do étéw gédoté roy umule magufusa."

## 26

### *I bantak i de odoroy de Judio*

<sup>1</sup> Amun énggilid i Jesuse témore bé de ni, ménbéréh dob de kuyugén mano, <sup>2</sup> "Gétiga kom amuk méfíus i ruwowe gétérésangan, gégumah i gaiy kanduli tome do Judio féndawét 'Témara.' Bé béno, i Begéne sani Nua i Kéilawane, atéénu inok féléhué ro Begén dob kruse."

<sup>3</sup> Bé béno so, i de odoroy de fadi brab de odoroy de Judio, ménlimud ro dob lawi i gérotore fadi féndawét Kayafas. <sup>4</sup> Diyo ménséfagayun ro kéfoé roy Jesuse inok féléhuén. Endob béntak ro rigoéné ké énda i ségiyo étéw de gétigan. <sup>5</sup> Ménsébéreh ro maro, "Békén saén bé lala tome kémanduli, kinok wén i mérimbur bé de étéw."

<sup>6</sup> Atin diyo i Jesuse dob lawi i ségétéwe ménadi-adinén fémuteén féndawét Simon, dob ingéde Betania. <sup>7</sup> Atin bé lala Jesuse mama, énggumah i ségétéwe libun wén i fiyo katiyaén ménféno bé balilagae nor fégéfamut. Atin ménfégdédét dob Jesuse,

atin lénukaén dob uléw ne. <sup>8</sup> Endob i de kuyugén, amun énggito roy ni réningoy libune ni, ménwaléy ro mékérít. Atin ménbéréh ro maro, “Sedek séninggula saén i nan fégeféamut? <sup>9</sup> Non amuk fénbéléy damén i nan nor, wén i médoó kurta gédotén de brab iray damén dob de méskinan.”

<sup>10</sup> Endob i Jesuse énggétiga noy kébéréh ruwe, atin ménbéréh mano, “Kagom dowoyén i libune ni. Non toow fo fiyoy réningo nuwe dob Begéne. <sup>11</sup> I de méskinan taus ro bati dob begome sénga tékélid, éndob i Begéne énda démayunu bati dob begome. <sup>12</sup> Bé kéluka ne bé fégeféamute dob Begéne, fégefáfay bé lowoh guwe ké lébéngénu. <sup>13</sup> Atin béréhé ku begom i toowe, dob séngae gonon dob duniyae ni uretén i Fiyowe Uret, uretén soy kérigo nuwe Begén. Mélaw i de étéw gétedémo roy ni libun.”

### *I réningo Judase*

<sup>14</sup> Tidéw béno, i ségétéwe bé de folo bra ruwo kuyugén féndawét Judas Iskariot ménangéy dob de odoroy de fadi. <sup>15</sup> Atin ménénginsa dob berowe mano, “Fiyoy i iray gome begén ké fékéfo guy Jesuse dob begome?” Atin bénayada ro téléw folo félatah. <sup>16</sup> Tidéw bé no gai, sénléd Judasey fiyowe gai fékéfoén i Jesuse.

<sup>17</sup> Amun dob sunguwe fuweh bé kékanduli i de Judio féndawét “Fan énda i Fégeféeruk de” look “Témara”, i de kuyugén ménangéy ro dob Jesuse atin ménénginsa ro maro, “Hon i kétaya muwe gono key témafay bé amae muwe bé ni kanduli?”

<sup>18</sup> Atin séménambul i Jesuse mano, “Angéy gom Jerusalem atin béréh gom dob étéwe diyo makom, ‘Enggumahén kun i uras i Maistérowe. Mélaw mamung bé kékandulie “Témara” begey i de kuyugén dob lawi me.’”

<sup>19</sup> Mélaw i de kuyugén nodoro roy kébéréh Jesuse, atin ténafay roy amae ruwe kay kandulie féndawét “Témara” dob no lawi.

<sup>20</sup> Amun kélungononén, i Jesuse ménsar mama séréngan bé de folo bra ruwo gétéw kuyugén. <sup>21</sup> Bé lala ruwe mama, béréhé Jesuse mano, “Béréhé ku begom i toowe, wén sékoy ségétéwe begom émfékéfo Begén.”

<sup>22</sup> Tidéw béno, toow fo méntete i de fédéw i de kuyugén, atin ménénginsa i séngae ségétéw bero dob Jesuse maro, “Kadnan, békén begén, hay?”

<sup>23</sup> Séménambul i Jesuse mano, “I ségétéwe séréngan Begén méréf fan, beeney émfékéfoe séko Begén. <sup>24</sup> I Nga i Kéilawane, sani Begéne, méléhuu loo bé kébéréh i Ménsulate Kébéréh i Tuluse. Endob toow fo mékégedaw-gédaw i émfékéfoe Begén. Mas na fiyo dob beene ké énda damén ménumah i ni étéw, non mékukum fo toow.”

<sup>25</sup> Tidéw béno, ménbéréh i Judase sani ménfékéfoe de mano, “Maistéro, békén begén, hay?”

Atin séménambul i Jesuse mano, “Hoo, beam.”

### *I kéama i Kadnan*

<sup>26</sup> I lala ruwe mama, éndot Jesusey fane brab ménfésalamat dob Tuluse. Tidéw béno, sénkébéng-kébéngén, brab sénaarén dob de kuyugén. Atin ménbéréhé mano, “Ay niy lowoh guwe. Dot gom brab ama gom.”

<sup>27</sup> Tidéw béno, éndot Jesusey tabue wén i arak de atin ménfésalamat dob Tuluse. Atin nirayén dob berowe mano, “Iném gom de, kéluhana kom. <sup>28</sup> Non been i niy dara guwe, sani tandae bé fasad i Tuluse, réménanas inok méfésagadan i de sala i de médoó do étéw. <sup>29</sup> Béréhé ku begom, éndaén minému arak taman dob gaiwe minému mantu arak séréngan begom amuk méguléw i Abay guwe Tulus dob de étéwén.”

<sup>30</sup> Tidéw béno, kéménanta ro sébaan kanta démayéw bé Tuluse. Tidéw béno, ménagéw ro mangéy dob tuduke féndawét Olibo.

### *Nuret Jesusey fantage bé Pedrowe*

<sup>31</sup> Atin ménbéréhé i Jesuse dob de kuyugén mano, “Kino séko bé ni kélungonon méraréy gom kéluhanan tagaké kom Begén non wén i Ménsulate Kébéréh i Tuluse mano, ‘Féléhué kuy témalimae bé de bili-bili, atin i de bili-bili no émbéragar ro.’” <sup>32</sup> Atin féntaus Jesusey kébéréhé me mano, “Endob amuk tébuleu, magéwu métah begom mangéy Galilea.”

<sup>33</sup> Tidéw béno, ménbéréhé i Pedrowe dob Jesuse mano, “I begéne, énda fo tagaké ku Beam, fiyon fo ké méraréy i kéluhanay de dumo gu.”

<sup>34</sup> Endob ménbéréhé man i Jesuse mano, “Béréhé ku beam i toowe, bé énda séna ukoro i férufete bé ni kélungonon, dirungé mo Begén téléw gule bé énda gélolo mo Begén.”

<sup>35</sup> Ménbéréhé man i Pedrowe mano, “Enda fo dirungé ku Beam, fiyon fo ké méléhuu séréngan Beam.”

Atin loo so bé niy kébéréhé i de kéluhanay de dumo kuyugén.

<sup>36</sup> Tidéw béno, ménagéw i Jesuse beroy de kuyugén dob gonone féndawét Getsemani. Amun énggumah ro diyo, ménbéréhé i Jesuse dob berowe mano, “Sar gom dob ni bé lala guwe mangéy démasal dob diyoo.” <sup>37</sup> Atin nuwitén i Pedrowe brab de ruwo gétéw lagéy nga Sebedeowe, sani Santiagowe brab Juane. Atin méntete i fédéw Jesuse brab ménbuku fo toow. <sup>38</sup> Atin ménbéréhé dob de ni téléw gétéw kuyugén mano, “I fédéw guwe toow fo ménbuku taman toow fo démawét. Bati gom dini, brab tulik gom.”

<sup>39</sup> Tidéw béno, ménagéw i Jesuse gumaha témabar. Atin méntélengkéb méntédunsum brab déménasal mano, “Abay, amuk fakay

saén, kago fédayaén Begén mérasay. Endob i kaame saén kétayan i mérigowe damén, békén kagén kétayan.”

<sup>40</sup> Tidéw béno, ménséfule dob de téléw ni gétéw kuyugén. Atin énggito no bero énggéfidong. Ménbéréh dob Pedrowe mano, “Aw énda wayo gétulik go fiyon ségéuras saén?” <sup>41</sup> Atin ménbéréh dob berowe téléw gétéw mano, “Tulik gom, atin dasal gom inok énda métukawan gom. Méuyot gom rémigo bé kétaya kuwe, éndob i de lowoh gom mélubay brab magad géfélis bé de sugu gu.”

<sup>42</sup> Tidéw béno, ténaqak Jesuse man bero, atin déménasal mano, “Abay, amuk énda fakayén ké géséliyahu bé ni kérasay, mériqo damén i kétaya muwe.” <sup>43</sup> Tidéw béno, ménséfule man i Jesuse mangéy dob de téléw ni gétéw kuyugén. Atin énggito no bero énggéfidong non toow ro fo manat.

<sup>44</sup> Tidéw béno, ténaqak Jesuse man bero bé gétéléwe gule inok démasal. Atin déménasal ségiléw so bé énggéetahe de. <sup>45</sup> Tidéw béno, ménséfule man mangéy dob de téléw ni gétéw kuyugén atin ménbéréh dob berowe mano, “Aw tafay gom so fidong brab témérén? Téngténg gom! Enggumahén i urase fékéfo i Nga i Kéilawane, sani Begéne, atin aténu dob de ménsala étéw. <sup>46</sup> Na, tek gom, magéw tomén. Téngténg gom, ay nan nén géngumah i émfékéfoe Begén!”

#### *I kékéfoe bé Jesuse*

<sup>47</sup> Amun émbéréh sénay Jesuse, énggumah i Judase sani ségétéwe bé de folo bra ruwo gétéw kuyugén. Atin wén i dakéle ménlimud étéw dob beene énggumah. Non sénugu i de odoroy de fadi brab de odoroy de Judio bero. Atin ménuwit ro do sundang brab do bastun. <sup>48</sup> Atin énggétiga roy ati féglolono ruwe bé Jesuse, non amun énda séna gégumah ro diyo, béréh Judase bero mano, “I étéwe aréké ku, kéfo gom non Been.”

<sup>49</sup> Mélaw sonom so bé kégumah Judase, ménfégedét dob Jesuse brab ménbéréh mano, “Fiyo kélungonon, Maistéro.” Tidéw béno, narék Judasey Jesuse.

<sup>50</sup> Tidéw béno, ménbéréh i Jesuse dob Judase mano, “Adih, fétausém i kériqo muwe bé rigoné muwe.”

Tidéw béno, i de étéw ménodor bé Judase, ménfégedét ro dob Jesuse brab kénéfo ro. <sup>51</sup> Atin wén i ségétéwe kuyugén Jesuse bénindasén i sundang ne atin ténibohén i ségétéwe riféy gérotore fadi brab ménsilaf i ségéalae bé kélingo ne. <sup>52</sup> Endob ménbéréh i Jesuse mano, “Rumaém i sundang ma nan. Non i kéluhanay de témiboh, méléhu ro so bé sundange. <sup>53</sup> Aw énda ba gétiga mo de? Amuk kétaya ku, gétawagu mongot tabang dob Abay guwe Tulus, atin sugué noy lak-saéne do télaki no témabang Begén matuhon

bé de ni étéw. <sup>54</sup> Endob amuk rigoné kuy nan, énda métuman i de Ménsulat Kébéréh i Tuluse fantag bé ati mérigowe dob Begéne.”

<sup>55</sup> Tidéw béno, ménbéréh i Jesuse dob de ménlimud do étéw mano, “Sedek ménuwit gom do sundang brab do bastun, inok kéfoé kom Begén maak ségétéwu tulisan kéfoé kom? Sénga fuweh diyou dob lawi i Tuluse témoro, éndob énda kénéfo gom Begén. <sup>56</sup> Endob ménrigoy kéluhanay de ni inok métuman i Ménsulate Kébéréh i Tuluse sénulat i de sénarigo no.”

Tidéw béno, kéluhanay de kuyugén ménraréy ténaqak roy Jesuse.

#### *I kékukume bé Jesuse*

<sup>57</sup> Atin i de étéw kénéféfo bé Jesuse nuwit ro dob lawi i gérotore fadi féndawét Kayafas. Diyo ménlimud i de témoro bé kitabé brab de odoroy de Judio. <sup>58</sup> Atin i Pedrowe ménfuray ro bero éndob énda ménfégedétén, méntaman saén dob fésayaway lawi i gérotore ni fadi. Atin ménahur dob fésayawane ni brab ménsar diyo beroy de guwardiya inok gétiga noy ati mérigowe dob Jesuse. <sup>59</sup> Atin i odoroy de fadi brab kéluhanay de ménlimud do odoron séménléd ro do tugi kétébo bé Jesuse inok kukumé ro méléhu. <sup>60</sup> Endob énda i énggélíngoo ro funa ro de méméléhu, fiyon fo ké médooy de téménindég brab ménbéréh do tugién kétébo bé Jesuse. Tidéw béno, wén i ruwowe gétéw lagéy téménindég brab ténébo roy Jesuse. <sup>61</sup> Ménbéréh ro maro, “Ménbéréh i ni étéw mano, ‘Gébinasana kuy lawi i Tuluse atin fétindégé ku man bé téléwe gétérésangan.’”

<sup>62</sup> Tidéw béno, i gérotore fadi téménindég brab ménbéréh dob Jesuse mano, “Ati késumbul me bé ni kétébo ro Beem?” <sup>63</sup> Endob ménantés i Jesuse. Tidéw béno, ménbéréh man i gérotore ni fadi mano, “Sugué ku Beem sémafa dob adafay méuyage Tulus, aw Beeme bay Kristowe Nga i Tuluse?”

<sup>64</sup> Atin séménumbul i Jesuse mano, “Toow i nan béréhém bé Nga i Tuluse Begén. Atin béréhé ku begom i toowe, gito gom i Nga i Kéilawane, sani Begéne, mésar moso dob kuwonoy barakatane Tulus brab gito gom Begén dob de rawén séfuleu tidéw dob lawayo.”

<sup>65</sup> Sonom béno, i gérotore ni fadi amun énggélíngoo noy ni kébéréh Jesuse, kénusién i kégal ne inok fégitu noy kékérit ne de. Atin ménbéréh mano, “Mékémurka fo toow i kébéréh ne non réféngé noy Tuluse! Endaén kailanga tom i téméboe de dob betome. Non énggélíngoo tomén i mékémurkae kébéréhén béleewe ni. <sup>66</sup> Ati karang gome de fatut rigoné tom?”

Atin séménumbul i de odoron maro, “Fatut mékukum méléhu.”

<sup>67</sup> Tidéw béno, dénuraa roy rangih Jesuse atin léubag ro. Atin wén soy do téménamfiling bé Jesuse. <sup>68</sup> Atin ténléb roy de moto no bé munsalawe brab ménbéréh ro maro, “Amuk Beem i Kristowe, antukém ké ati téménamfilinge Beem.”

### *Dénirung Pedrowe Jesuse*

<sup>69</sup> I lala i de ni mérijo, i Pedrowe diyo ménsar dob fésayawane. Atin ménfégedét i ségétéwe kénogon sugu-suguéy gérotore fadi. Atin ménbéréh dob Pedrowe mano, “Beem soy dumo Jesuse tidéw Galilea.”

<sup>70</sup> Endob dénirung Pedrowe dob téngaangay de étéw diyo mano, “Enda gétiga kuy nan béréhé mo.” <sup>71</sup> Tidéw béno, ménangéy i Pedrowe dob béngaway fésayawane. Diyo wén i ségiyowe kénogon sugu-suguén énggito noy Pedrowe. Atin ménbéréh dob de lagéy diyo mano, “Ay niy ségétéwe dumo Jesuse tidéw Nasaret.”

<sup>72</sup> Atin dénirung Pedrowe man mano, “Méléhuu so dob ni, énda gélolo guy nan lagéy.”

<sup>73</sup> Enda ménrugayén tidéw béno, i de lagéy téménindég diyo ménfégedét ro dob Pedrowe. Atin ménbéréh ro maro, “Tintu fo beem i ségétéwe bero. Non dob kébéreh me énggélolo gey beem ségétéw go so tidéw Galilea.”

<sup>74</sup> Tidéw béno, séménafa foy Pedrowe dob berowe mano, “Amuk tugio ku begom, kukuméy Tuluse begén. Enda gélolo guy nan étéw!”

Sonom béno, ménukoro i férufete. <sup>75</sup> Atin énggétédémó Pedrowe kébéreh Jesuse mano, “Bé énda séna ukoro i férufete, dirungé mo Begén téléw gule bé énda gélolo mo Begén.” Mélaw i Pedrowe, ménsut tidéw diyo atin kéménrew fo toow.

## **27**

<sup>1</sup> Amun toow géfuwén, i kéluhanay de odoroy de fadi brab de odoroy de Judio, ménlimud ro inok bantaké roy kéféléhu ruwe bé Jesuse. <sup>2</sup> Atin nikét roy Jesuse brab nangéy ro naté dob Pilatowe sani méguléwe tidéw Roma.

### *I kéléhu Judase*

<sup>3</sup> I Judase, sani ménfékéfoe de, amun énggito noy kékukume bé Jesuse, énggésénule. Mélaw nuwitén séfule i téléwe folo félatih mangéy dob de odoroy de fadi brab dob de odoroy de Judio. <sup>4</sup> Atin ménbéréh mano, “Ménsalau non fénkéfo gu inok féléhuén i ni ségétéw étéw énda i réniyo no tete.”

Endob séménumbul i de odoron maro, “Ulanden dob begeye. Kaam saén sala i nan.”

<sup>5</sup> Tidéw béno, i Judase nibéréh i de kurta ni dob lawi i Tuluse, atin ménagéw tidéw diyo. Atin ménfétoyó méntébitin.

<sup>6</sup> I de odoroy de fadi ténimu roy de félatih ni brab ménbéréh ro maro, “I ni kurta fénggéféléhu bé étéwe, mélaw énda fakayén dob kitab tome itongén dob tulakane dob lawi i Tuluse.” <sup>7</sup> Atin amun ménagayun ro, nusar roy kurtae ni féngbéley bé fantad i ségétéwe rémigo binangga, inok wén i fantad lébéngon bé de étéw énda bati ro dob Jerusalem. <sup>8</sup> Been i funay fantade ni féndawét “Démara Fantad” taman béleewe ni.

<sup>9</sup> Mélaw méntuman i kébéreh i sénarigoy Tuluse muret bé kébéreh ne bé do gétaéh féndawét Jeremias mano, “Endot roy téléwe folo félatih, sani kurtae ménagayun i de Judio fénggébéléy de. <sup>10</sup> Atin nusar roy ni kurta fénggébéléy bé fantad i ségétéwe rémigo do binangga, loo bé sugu i Kadnane Begén.” Been i niy kébéreh Jeremiase bé gétahe.

### *I kékukume bé Jesuse*

<sup>11</sup> Atin i Jesuse téménindég dob adafay méguléwe tidéw Roma féndawét Pilato. Atin fénénginsaa noy Jesuse mano, “Aw Beem i Datu i de Judio?”

Atin séménumbul i Jesuse mano, “Beem i ménbéréh de.” <sup>12</sup> Endob amun ténébo i de odoroy de fadi brab de odoroy de Judio, ménantés saén i Jesuse.

<sup>13</sup> Mélaw ménbéréh i Pilatowe dob Jesuse mano, “Sedek énda sumbulo moy kéluhanay de kétobo ro ni Beem?”

<sup>14</sup> Endob énda séménumbul i Jesuse, ménantés saén. Mélaw ménggaif fo toow i méguléwe.

<sup>15</sup> I ni ménrigowe bé gaiy kékandulie Témaro. Atin i adat i méguléwe, sénga kanduli ro Témaro témangéy ségétéw férisu fémiliey de ménlimud do Judio. <sup>16</sup> Bé no gai, wén soy ségétéwe bantugén férisu féndawét Barabas. <sup>17</sup> Mélaw amun ménlimud i de étéw, ménénginsa i Pilatowe dob berowe mano, “Ati isuwe kétaya kom tangéy ku inok géésut dob begome? Barabas loo ké Jesuse féndawét so Kristo?” <sup>18</sup> Réniyo noy ni non énggétiga no i de odoroy de Judio, naté roy Jesuse non méndaléw ro de.

<sup>19</sup> Amun diyo ménsar i Pilatowe dob saray kémukume, fénsamfay i bawag ney sébaane kébéreh mano, “Kago rignonén i éntingayéne dob ni étéw énda i salaén. Non wén i énggétéginéfo kuwe na kélungonono atin toowu fo ménbuku fantag bé Beene.”

<sup>20</sup> Endob i de odoroy de fadi brab de odoroy de Judio, fénfagayu roy de ménlimud do étéw bé ongoté ro dob Pilatowey tangéy noy Barabase, atin féléhuén i Jesuse. <sup>21</sup> Endob i Pilatowe ménénginsa mano, “Aw ati isuwe wayo kétaya kom tangéyén inok géésut dob begome?”

Atin séménumbul i de étéw maro, “Barabas.”

<sup>22</sup> Atin ménénginsa i Pilatowe mano, “Ati mélaw i rigoné kuwe dob Jesuse féndawét so Kristo?”

Séménumbul ro kéluhanan maro, “Féléhuén dob kruse!”

<sup>23</sup> Endob ménénginsa man i Pilatowe mano, “Endob ati tetee rénigo no?”

Tidéw béno, ménkes i de étéw minut métanug maro, “Féléhuén dob kruse!”

<sup>24</sup> Amun énggétiga Pilatowe énda fo magayun i de étéw atin sérimbur ro séko, éndotén i wayége atin méngguse dob téngaangay de étéw. Atin ménbéréh dob berowe mano, “Békén kagén sala i kéléhu i ni étéw énda i salaén. Kagom saén aturan.”

<sup>25</sup> Atin ménbéréh i kéluhanay de étéw maro, “Kagey aturan i kéléhu ne brab aturay de séfu gey so.”

<sup>26</sup> Tidéw béno, ténangéy Pilatowey Barabase mésut mangéy dob de étéw. Atin féntafésén i Jesuse. Tidéw béno, natéén dob de sundalo inok kélabo ro dob kruse.

<sup>27</sup> Tidéw béno, i de sundalo Pilato nuwit roy Jesuse mahur dob lawi Pilatowe. Atin i kéluhanay de dumo ro sundalo ségébataliyon ménlimud ro géliwét bé Jesuse. <sup>28</sup> Atin lénékas roy de kégalén brab fénkégal ro bé furowe kégal maak datu. <sup>29</sup> Tidéw béno, lénuku roy suwarane kélég atin fénsayaf ro bé Jesuse, atin féndiyo roy kayéwe dob kuwonone kémérén ubo-ubo maak datu. Tidéw béno, ménlingkuwéd ro dob adafa nuwe brab déniyangka ro. Atin ménbéréh ro maro, “Méraru damén i datu i de Judio.” <sup>30</sup> Atin dénuraa ro, brab éndot roy ni kayéw tidéw dob kémér ne brab bénadas roy uléw ne. <sup>31</sup> Amun énggilid ro déniyangka, lénékas roy furowe ni kégalén brab fénkégal ro man bé kaane kégal. Tidéw béno, nuwit ro mésut inok kélaboné ro dob kruse.

#### *Kénlabo roy Jesuse dob kruse*

<sup>32</sup> I lala ruwe magéw tidéw Jerusalem, énggéalaka roy étéwe féndawét Simon tidéw dob ingéde Siren. Atin i de sundalo fénéngés ro démuwal bé krus Jesuse. <sup>33</sup> Atin énggumah ro dob sébaane gonon féndawét Golgota (i atag ne “gonoy kulobong uléwe.”) <sup>34</sup> Diyo niray roy arake sénlawék bé uwaé fégékédan démawét féniném ro bé Jesuse. Endob amun énggéttemo no, ménika de miném.

<sup>35</sup> Tidéw béno, kénlabo ro dob kruse. Atin sénbaad roy de kégalén bé késékungkungo ruwe de. <sup>36</sup> Tidéw béno, ménsar ro diyo ténéngténg roy Jesuse. <sup>37</sup> Atin féndiyo roy sénulat ruwe fingé rotor bé uléw Jesuse bé kétébo ruwe de mano, “Ay niy Jesuse, sani datu i de Judio.” <sup>38</sup> Tidéw béno, kénlabo ro dob de krus i ruwowe gétyw tulisan, i ségétéwe de fingé dob kuwono nuwe brab i ségétéwe de fingé dob biwong ne.

<sup>39</sup> Atin i de étéw, téménara ro dob adafa Jesuse atin déniyangka ro brab dénangu-danguo ro inok dowoyé ro. <sup>40</sup> Atin ménbéréh ro dob Jesuse maro, “Bénréhém bé binasané moy lawi i Tuluse atin féindégé mo man bé téléwe géitérésangan. Amuk tintu Nga i Tuluse Beem, tabangém i lowoh me atin lus go tidéw dob krusa nan inok énda méléhu go.”

<sup>41</sup> Atin ségiléw so bé ni, i de odoroy de fadi brab de témoro bé kitabe brab de odoroy de Judio déniyangka ro. <sup>42</sup> Ménbéréh ro maro, “Ténabangén i de ségiyo étéw inok énda méléhu ro, éndob énda gétabanga roy lowoh ne inok énda méléhuén. Amuk Beeney datu tome do Judio, fatut mélus tidéw dob krusa nan inok géunur tom de. <sup>43</sup> Sémarig bé Tuluse brab bénréhén bé Been kun i Nga i Tuluse. Na, énténgé tom ké féimuéy Tuluse brab tabangé no béleewe ni inok énda méléhuén.”

<sup>44</sup> Atin fiyon i de tulisan séréngan bé Jesuse kénlabo dob de krus, déniyangka ro so.

#### *I kéléhu Jesuse*

<sup>45</sup> Amun géutuhén, ménwaléy délémon i kéluhanay fantade taman ménifus i téléwe géuras. <sup>46</sup> Amun géraaraan lému dug i térésange de, ménkes i Jesuse mano, “Eli, Eli, lama sabaktani?” I atag ne, “Tulus gu, Tulus gu, sedek ténagakém Begén?”

<sup>47</sup> Atin i de dumo bé de étéw témindég diyo, énggélungoo roy ni kébérehén, atin ménbéréh ro maro, “Tawagé noy Eliase.” <sup>48</sup> Atin wén i ségétéwe bero ménagayas éndotén i maake gafas, nérémén dob mélémuwe arak, féndiyoén dob kayéwe, brab ténanggulén dob ba Jesuse inok fééséfén de damén.

<sup>49</sup> Endob i de dumo bé de étéw téméngténg, ménbéréh ro maro, “Fédayaém mon, non méuyot gey de téméngténg ké gégumah i Eliase témabangan de inok énda méléhuén.”

<sup>50</sup> Tidéw béno, ménkes man i Jesuse atin ménléhuén.

<sup>51</sup> Tidéw béno, i rindunge dob lawi i Tuluse ruwoy ménsésédaya nuwe tidéw rotor mangéy fantad. Atin wén i émbagére luba brab wén i de dakél batéw ménséufak. <sup>52</sup> Atin wén i de takub do lébéng ménungka brab médooy de ménléhu do étéw i Tuluse méntébule ro. <sup>53</sup> Ménagéw ro tidéw dob de lébéng ro. Atin amun méntébule i Jesuse, ménangéy ro mahur dob mékétéfuwe ingéd Jerusalem brab méntéfégito dob médoowe do étéw.

<sup>54</sup> I odoroy de sundalo brab de sundalo no ténulik roy Jesuse, amun énggito roy ni luba brab kéluhanay de ni ménrigo, toow fo ménggilak ro. Atin ménbéréh ro maro, “Tintu fo Been i Nga i Tuluse.”

<sup>55</sup> Diyo soy de médo do libun, kémulay ro tidéw dob gétangkae. Beroy de libun ménfuray bé Jesuse tidéw Galilea brab

ténabang ro. <sup>56</sup>Bero ro Maria tidéw Magdala, brab Maria idéng Santiagowe brab Jose, brab idéng Juane brab Santiagowe sani de nga Sebedeo.

### *I kélébéngé bé Jesuse*

<sup>57</sup> Amun témégénén, énggumah i ségétéwe lagéy kawasa tidéw Arimatea. I dawét ne Jose atin been soy ségétéwe kuyug Jesuse. <sup>58</sup> Ménangéy dob Pilatowe, atin nongotén i bangkay Jesuse. Atin sénuguén i Pilatowe ké fakay ro iray i bangkay Jesuse dob Josehe ni. <sup>59</sup> Mélaw éndot Josehe, atin bénausén bé mantuwe fute safut. <sup>60</sup> Tidéw béno, féndiyoén dob kaane lébéng, mantu séna ténosong dob rangih i fingase. Tidéw béno, kénringén i dakéle batéw fénggétélébén bé bégaway lébéngé ni. Atin tidéw béno, ménagéw i Josehe tidéw diyo. <sup>61</sup> Atin diyo i Mariahe tidéw Magdala brab dumo nuwe féndawét so Maria. Ménsar ro dob saréwoy lébéngé.

<sup>62</sup> Bé gétunduge de fuweh, Sabado. Atin i de odoroy de fadi brab de Fariseo ménlimud ro bero ro Pilato. <sup>63</sup> Atin ménbéréh ro maro, "Datu, gétédémó key bé méuyag sénay nan étéw ubo-ubo datu gey, bénréhén bé tébule kun ké méifus i téléwe gétérésangan. <sup>64</sup> Mélaw fiyo ké sugu go bé de guwardiya inok tintu bantayan i lébéng ne taman bé gétéléwe gétérésangan, inok i de kuyugén énda géahur ro témulis bé bangkay ne atin béréhé ro dob de étéw bé méntébuté. Non toow na fo gétimal i nan tugé bé sunguwe de."

<sup>65</sup> Séménumbul i Pilatowe mano, "Dot gom bé de sundalo gu mantay bé lébéng ne inok énda i géahur diyo."

<sup>66</sup> Mélaw ménagéw ro atin rénigo roy tандаe dob bégaway lébéngé inok gito ro ké wén i mahur de. Tidéw béno, féndiyo roy de guwardiya mantayan de.

## 28

### *I kétébuté Jesuse*

<sup>1</sup> Amun ménifus i Sabadowe de, toow géfuwén bé Duminggue de, i Mariahe tidéw Magdala ménagéw mangéy dob lébéng Jesuse beroy dumo nuwe libun féndawét so Maria inok angéy ro téngténgén i lébéngé ni. <sup>2</sup> Atin méntékow wén i émbagér luba, atin i télakiy Kadnane ménlus tidéw dob lawayo. Kénringén i dakéle batéw tidéw dob bégaway lébéngé, atin ménsar diyo dob batéwo no. <sup>3</sup> I falas ne maak kilot atin toow fo fute i kégal ne. <sup>4</sup> Sonom béno, i de guwardiya diyo ménwaléy ro toow fo ménggilak, brab léménukub ro. Atin méntéléngkéb ro maak do ménléhu ro.

<sup>5</sup> Atin i télakiwe ni ménbéréh dob de libun ni mano, "Kagom mégilak, Gétiga ku sélédé kom i Jesuse, sani fénléhu ruwe dob kruse. <sup>6</sup> Endob éndaén dini no, non méntébutéén loo bé bénréh ne mérijo. Enggomén ahur

gom, téngténg gom i gono nuwe méniro. <sup>7</sup> Na, fagayas gom agéw mangéy dob de kuyugén atin uret gom dob berowe makom, 'Méntébutéén i Jesuse. Atin mangéy béni Galilea méta begom. Gito gom diyo.' Na, taus gom brab fégétédém gom i ni bénréh gu begom."

<sup>8</sup> Mélaw ménagayas ro ménagéw tidéw dob lébéngé ni. Atin fiyon fo ké ménggilak ro, ménoror ro so. Atin léménéntu ro mangéy dob de kuyugén inok ureté ro dob berowe.

<sup>9</sup> Atin tékow béalak Jesusey de libun ni atin ménbéréh dob berowe mano, "Fiyo térésang." Tidéw béno, ménféngédét ro dob Beene brab génamak roy sékéy ne atin fénéngadaf ro. <sup>10</sup> Atin ménbéréh i Jesuse dob berowe mano, "Kagom mégilak. Agéw gom atin béréh gom dob de kuyugén gu bé fatut magéw ro mangéy Galilea, atin gito ro Begén diyo."

<sup>11</sup> Amun ménagéw i de ni libun, i de dumo bé de sundalo mantay bé lébéngé ni ménséfule ro mangéy Jerusalem atin nuret ro dob de odoroy de fadi i kéluhanay ménrigowe. <sup>12</sup> Mélaw i de odoroy de fadi brab de odoroy de Judio, ménsélimud ro. Atin ménagayun ro ké ati rigo né ruwe. Niraya ro médoó kurta i de sundalo. <sup>13</sup> Atin bénréh ro bero maro, "Béréh gom bé nangéy i de kuyugén i bangkay ne bé kélungonone atin fénénakaw ro bé lala gome fidong. <sup>14</sup> Atin amuk énggélangooy méguléwey fantage bé ni, béréhé key dob beene inok énda mékiritén begom atin mélaw énda i funa kom mégilak."

<sup>15</sup> Tidéw béno, i de guwardiya, éndot roy kurtae ni atin nodoro roy sugu i de odoroy de Judio ni. Atin mélaw, taman so béleewe ni, wén i do Judio muret bé ni uret.

### *Méntéfégito man i Jesuse*

<sup>16</sup> Tidéw béno, i de folo bra sébaan kuyugén ménagéw ro mangéy Galilea dob sébaane tuduk bénréh Jesuse fatut ayo ro. <sup>17</sup> Atin amun énggito roy Jesuse, fénéngadaf ro, fiyon fo ké wén i de dumo bero ruworuwoy de fédéw ro munur de. <sup>18</sup> Atin ménféngédét i Jesuse dob berowe atin ménbéréh mano, "I kéluhanay kuwagibé méguléw dob lawayo brab dob fantade niray dob Begéne. <sup>19</sup> Mélaw angéy gom dob kéluhanay de ingéd dob duniyae ni atin féunur gom i kéluhanay de étéw bé Begéne. Bautis gom bero dob dawét i Abaye Tulus, brab Nga i Tuluse, brab Rémogor i Tuluse. <sup>20</sup> Atin toro gom bero bé fatut odoroy kéluhanay de sugu gu begom. Atin fégétédém gom i ni, diniwu dob begome sénga tékélid taman dob tamfaday duniyae ni."

## I Fiyowe Uret Sénulat Markose

Been i niy Fiyowe Uret sénulat Markose fantag bé Jesu Kristowe. Sénulat Markosey médoowe do mékégaif réningo Jesuse amun ménbati séna dob duniyae ni. Sénulat Markose soy dumoy de ténoro Jesus.

I Markose ni, sani séménulate bé ni Fiyu Uret, beeny dumo Pedrowe ménangéy muret fantag bé Jesuse. Ségétéw so bé de kuyug Jesus i Pedrowe ni, amun ménbati sénay Jesuse dob duniyae ni. Mélaw gétiga tom i kéluhanay de sénulat Markos toow fo toow.

### *I kéuret Juan Bautistawe*

<sup>1</sup> Ay niy Fiyowe Uret fantag bé Jesu Kristowe, sani Nga i Tuluse. <sup>2</sup> Bé gétaho, wén i ségétéwe sénarigoy Tuluse muret bé kébéréh ne féndawét Isaias. Sénulatén mano, “Bang i Tuluse, ‘Sugúe kuy sarigo kuwe métah Beem inok tafayé noy aguwo muwe.’ <sup>3</sup> Diyo dob gonone énda i étéw de bati, brab mékes mano, ‘Gégumah i Kadnane! Tafay gom i aguwo nuwe, brab féántang gom i de aguwo no.’” Been i bénréh Isaiase.

<sup>4</sup> Mélaw énggumah i Juane dob gonone énda i étéw de bati. Mautis bé de étéw brab ménuret mano, “Fatut gom gésénule bé de sala gom brab féka gom i de tete adat gom. Tidéw béno, fébautis gom inok fégitto gom i kégésénule gome. Atin, i Tuluse fésagadé noy de sala gom.” <sup>5</sup> Atin médooy de étéw dob Judea brab dob ingéde Jérusalem ménangéy ro dob Juane. Fényag roy de sala ro brab fébautisén bero dob lowoh i wayége Jordan.

<sup>6</sup> I Juane ni kéménégal nawél buk dakél ayam féndawét kamelyo, brab kulit binatang i légét ne. Atin i amaé nuwe kasuk brab téné. <sup>7</sup> Atin ménuret i Juane mano, “Wén i ségétéwe témundug begén. Toow na fo gétoro begén. Fiyon foy ikét i safatos ne, énda métororu de mukoh. <sup>8</sup> Wayég i fégebautis guwe begom, éndob i Beene, bautisé no moso begom bé Rémogor i Tuluse.”

### *I kébautise bé Jesuse*

<sup>9</sup> Bé no do gai, énggégumah i Jesuse tidéw dob Nasaret dob sakuf i dakéle ingéd Galilea. Atin bénautis Juane so dob wayégo no Jordan. <sup>10</sup> Amun geménaunén i Jesuse tidéw dob wayége, sonom béno énggito noy lawaye ménungka brab i Rémogor i Tuluse ménlus maak marafati brab méntérimféna dob Beene. <sup>11</sup> Brab wén i ménbéréhe tidéw dob lawayo mano, “Beem i Nga guwe. Toow fo mégédawu de brab mésuwatu de.”

<sup>12</sup> Tidéw béno, féngagéw i Rémogor i Tulusey Jesuse mangéy dob gonone énda i do

étéw de bati. <sup>13</sup> Atin ménbati diyo fot folo gétérésangan. Bé béno, sénga tékélid ténéngkad Satanasey Jesuse rémigo tete damén. Diyo soy de mérayar do binatang, éndob énggumah i de télaki brab ténabanga ro.

### *I kéféganay i galbék Jesuse dob Galilea*

<sup>14</sup> Amun ménférisunén i Juane, ménséfule i Jesuse mangéy Galilea, brab nuretén i Fiyowe Uret tidéw dob Tuluse. <sup>15</sup> Ménbéréh mano, “Enggumahén i fatute gai. Endaén mérugayén taman gégumah i kéféguléw i Tuluse bé de étéwén. Fatut gésénule gom bé de sala gom brab féka gom i de tete adat gom, brab unur gom dob Fiyowe Uret.”

<sup>16</sup> Wén i no sébaan fuweh ménagéw i Jesuse dob doror i dogote féndawét Galilea. Atin énggito noy ruwowe gétéw fatatugés féndawét Simon brab Andrese tuwarayén. Ibéré roy de biyala ro dob dogote. <sup>17</sup> Atin bérehé Jesuse bero mano, “Odor gom Begén. Kagomén séméléd sédo. Tidéw béleewe, fésélédé ku begom étéw inok modor ro so Begén.” <sup>18</sup> Sonom béno, ténagak roy de biyala ro brab ménodor ro bé Jesuse.

<sup>19</sup> Atin amun méntaus magéw i Jesuse kloh, énggito noy Santiagowe brab Juane sani de nga Sebede. Diyo ro dob awang ruwe sékafété roy de biyala ro. <sup>20</sup> Sonom béno, ténawagén bero. Atin ténagak roy boh ruwe Sebede dob awange beroy de témabang do sukayan do fatatugés, atin ménodor ro bé Jesuse.

### *Dénédel Jesusey saitane*

<sup>21</sup> Atin i Jesuse beroy de kuyugén ménangéy ro dob ingéde Kafernaum. Amun gai kétérén, ménahur i Jesuse dob lawie féngadafay de Judio, brab téménoro. <sup>22</sup> Atin i de étéw do mégélingo de, toow ro fo ménggaif bé kétoro ne. Non békén ségiléw i kétoro ne bé de Judio témoro bé kitab ruwe. Non i berowe, ténoro ro say de kéfégitung i de ségiyo étéw. Endob ténoro Jesusey kaane kéfégitung.

<sup>23</sup> Amun téménoro i Jesuse, tékew ménahur dob lawie féngadafan i ségétéwe étéw rénahukoy saitane. <sup>24</sup> Amun énggito noy Jesuse, ménkes mano, “Ati amungé muwe begey, Jesus tidéw Nasaret? Ménangéy go ba dini inok binasané no begey? Enggétiga ku ké ati Beeme. Beem i Mékétéfuwe tidéw dob Tuluse.”

<sup>25</sup> Endob génlé Jesusey saitane ni mano, “Kago selekén, brab tékédan go tidéw dob beena nan!”

<sup>26</sup> Tidéw béno, i saitane, toow fo fénkikilén i étéwo no brab ménkes métanug, atin méntékédan. <sup>27</sup> Atin toow fo ménggaif i de étéw bé ni. Ménsébéréh ro maro, “Ati ni? Mantu keye kétoro. I ni étéw wén i kuwagibén sémuğu bé de saitan, brab odoro roy késuğu ne!”



<sup>28</sup> Mélaw i kéurete fantag bé Jesuse magad ménlégéb dob kéluhanay de gonon dob dakéle ingéd Galilea.

*Nuwa Jesusey de médoó étéw*

<sup>29</sup> Tidéw béno, ténagak roy lawie ni féngadafan, brab ménagéw ro mangéy dob lawi Simone brab Andrese. Atin ménodor soy Santiagowe brab Juane. <sup>30</sup> Atin diyo gara-gara i térima Simone libun non déméruun toow fo méduf. Amun énggumah i Jesuse dob ni lawi, bénréh ro dey fantage bé ni déméruun. <sup>31</sup> Atin i Jesuse ménangéy dob tébing ne atin génamakén i kémér ne brab fénétekén. Sonom béno, ménkédan i kééduf ne brab ménadi-adiy libune ni. Tidéw béno, dénuwoto no bero.

<sup>32</sup> Bé no kélugonon, amun ménléd i térésange, i de étéw nuwit ro mangéy dob Jesusey kéluhanay de déméruun brab de étéw rénahukoy de saitan. <sup>33</sup> Atin médooy de étéw dob no ingéd ménlimud ro dob fésayaway lawie ni. <sup>34</sup> Atin i Jesuse énggéféadi-adino noy médoowe déruunan bé médoowe gékélassi déruun, brab fénféararéyén i médoowe saitan. Atin i de ni saitan, énda fénbéréhén bero non gétiga roy ati Beene.

<sup>35</sup> Amun lingkuwog mangéy fuweh bé sébaane de géfuwén, méntek i Jesuse brab ménsut dob lawie ménangéy dob géfélebue gonon dob liyuy ingéde. Atin diyo déménasal. <sup>36</sup> Mélaw i Simone brab de dumo no, nangéy ro sénléd i Jesuse. <sup>37</sup> Amun énggito ro, ménbérahé ro maro, “Sélédéy kéluhanay de étéw Beem.”

<sup>38</sup> Endob séménumbul i Jesuse mano, “Fatut taut tom magéw mangéy dob de dumo ingéd gédét dini inok géuretu so diyo, non been i niy funa kuwe ménangéy dini.”

<sup>39</sup> Mélaw lénégébén sénugudon i séngae gonon dob Galilea. Atin ménuret dob de lawi féngadafay de judio, brab fénféararéyén i de saitan.

*Nuwa Jesusey ségétéwe fémuteén*

<sup>40</sup> Wén i no sébaan fuweh, i ségétéwe fémuteén ménangéy dob Jesuse, brab léméningkuwéd dob adafa nuwe mongot tabang. Ménbérahé mano, “Amuk kétaya mo, géféadi-adino mo begén.”

<sup>41</sup> Atin toow fo ménuray i na Jesuse de. Mélaw béntér Jesusey kémér ne brab kénuwahén. Atin ménbérahé mano, “Kétaya ku. Adi-adi go.” <sup>42</sup> Sonom béno, ménkédan i fémute ne, brab ménfiyoy lowoh ne. <sup>43</sup> Tidéw béno, i Jesuse féngagéwén brab ménbagér i kébérahé ne de mano, <sup>44</sup> “Fégélingoém, kago bérahén i fantage bé ni réningo gu dob fiyon udenén étéw. Endob taut go agéw mangéy dob fadie brab féténgtégém i lowoh me inok gétiga no adi-adi gon. Tidéw béno, irayém i tulake loo bé sénug i kitabe tidéw

dob Moiseuse inok fégito moy kéadi-adi muwe dob kéluhanay de étéw.”

<sup>45</sup> Ménagéw bangnoor i ni étéw, éndob nuretén dob séngae étéw énggéalaka no, tidéw béno ménséfélalag foy ni uret. Mélaw éndaén géréngkay-réngmah i Jesuse rémahur dob kéluhanay de ingéd. Yamula ménbati saén dob de liyu. Atin i de étéw tidéw dob de kéluhanay de gonon ménangéy ro dob Beene.

## 2

*Nuwa Jesusey ségétéwe kimoyén*

<sup>1</sup> Amun ménifus i firoye gétérésangan tidéw béno, ménséfule i Jesuse mangéy Kafernaum. Atin ménlégéb i urete bé ménule mangéy diyo. <sup>2</sup> Mélaw toow fo médooy de étéw ménangéy sélimud dob lawie batio Jesuse. Atin non toow ro fo médoó, éndaén i gonon de fiyon fo dob fésayawane. Atin nuret Jesuse beroy kébérahé i Tuluse. <sup>3</sup> Bé lala ne témoro, énggumah i fote gétéw lagéy ténanggung roy ségétéwe kimoyén, uwité ro damén mangéy dob Beene. <sup>4</sup> Endob énda i fiyo kélawang ro dob Jesuse, non bé médoowe do étéw. Mélaw ménénik ro dob atéf i lawie. Tidéw béno, ténosong roy atéfe dob gataga Jesuse. Amun ménosongén, ténuntu roy ténanggungé ni kimoyén. <sup>5</sup> Amun énggito Jesusey kéféngintoo ruwe, ménbérahé dob ni étéw kimoyén mano, “Adih, i de salaém ménférsagadén.”

<sup>6</sup> Tidéw béno, i de témoro bé kitab i de Judio ménsar diyo, séfénginsa-nginsa i de fédéw ro maro, <sup>7</sup> “Sedek émbéréh mékémurka i ni étéw? Enda i géférsagad bé de sala ké békén i Tuluse saén!”

<sup>8</sup> Endob bé béno so, énggétiga Jesusey de itunga ro. Mélaw ménbérahé dob berowe mano, “Sedek sébérahé gom loo bé nan dob de fédéw gom? <sup>9</sup> Toow na fo mélému bérahén, ‘I de salaém ménférsagadén.’ Non énda gito no ké wén i barakat gu de rémigo. Endob toow fo méréngén bérahén, ‘Tindég go, furutém i iroo muwa nan, brab agéw go.’ Non giton ké wén i barakat gu de rémigo. <sup>10</sup> Endob féfégétiga ku begom i fantage bé Nga i Kéilawane, sani Begéne. Wén i barakat gu brab kuwagib gu dob duniyae ni émfésagad bé de sala.” Tidéw béno, bénréhén dob kimoyéne ni mano, <sup>11</sup> “Béréhé ku beem, tindég go, furutém i iroo muwa nan, brab ule go.”

<sup>12</sup> Sonom béno, téménindég i kimoyéne ni dob téngaanga ruwe, brab fénurutén i iroo nuwe, brab ménagéw. Atin i kéluhanay de étéw diyo, toow ro fo ménggaif brab dénayéw roy Tuluse maro, “Enda nay énggito tom tidéw féganay loo bé ni.”

<sup>13</sup> Tidéw béno, i Jesuse ménangéy man dob fédoror i dogote Galilea. Atin énggumah i de médoó do étéw brab ménlimud ro dob

Beene. Atin fénnganaya noy témoroero bero. <sup>14</sup> Tidéw béno, méntaus i Jesuse magéw. Atin énggito noy ségétéwe étéw kémubra buwis féndawét Lebi, nga Alfeo ménsar dob de kubranan buwis. Brab ménbéréh i Jesuse do beene mano, “Odor go Begén.” Tidéw béno, téménindég brab ménodor bé Jesuse.

<sup>15</sup> Enda mérugayén tidéw béno, diyo i Jesuse mama dob lawi Lebiwe. Atin diyo soy médoowe do étéw kémubra buwis brab médoow do ménsala étéw ménsar mama séréngan bé Jesuse brab de kuyugén, non médoow ro ménfuray bé Jesuse. <sup>16</sup> Atin i de témoroero bé kitab i de Judio do Fariseo, amun énggito roy Jesuse mama séréngan bé de ménsala étéw brab de kémubra buwis, ménénginsa ro dob de kuyug Jesus maro, “Sedek ménsélawék i Jesuse mama bé de kémubra buwis brab de ségiyo tete étéw?”

<sup>17</sup> Endob i Jesuse énggelingoo noy ni brab séménumbuli mano, “I de fiyo kégélowohoo no, énda kailanga roy muwae, éndob kailangay de wén déruu no. Enda ménangéyu dini inok tabaré kuy de métintu étéw, éndob ménangéyu dini inok tabaré kuy de wén salaén inok gésénule ro.”

<sup>18</sup> Wén i no sébaan fuweh, ménfuwasay de kuyug Juan Bautista brab de Fariseo. Atin wén i de étéw ménangéy dob Jesuse brab ménénginsa ro maro, “I de kuyug Juan brab de kuyug i de Fariseo, fuwasa ro. Sedek i de kaam do kuyug énda fuwasa ro?”

<sup>19</sup> Séménumbuli i Jesuse mano, “Ufama, i de kana dob uyote, énda fuwasa ro ké diyo soy témérimawe lagéy. Taman diyo sénay témérimawe lagéy, énda fuwasa ro. <sup>20</sup> Endob gégumah i gaiwe, ké méédot dob berowey témérimawe lagéy. Atin been nay noy gaiwe fuwasa ro. Ségiléw so bé de kagén kuyug, non amuk diniwu séna, énda fuwasa ro.”

<sup>21</sup> Tidéw béno, nuret Jesusey sébaane binuwaya fantag bé sébidanay mantuwe kétoroén brab tafaye kétoro i de Judio. Ménbéréh mano, “Enda i ségétéw étéw fégétabungén i mantuwe safut dob tafaye kégal. Non amuk rigoné no, kéménkén i mantuwe safut, atin méfendet i tafaye kégal, atin minut gétimeal i rédet ne. <sup>22</sup> Brab énda i étéw mérowo bé mantuwe arak dob tafaye ahuron arak rénigo bé kulit i ayame. Non amuk rigoné no, bétus i mantuwe arak i tafaye ahuron brab mébinasa méitis i mantuwe arak. Endob fatut i mantuwe arak ahurén dob mantuwe kulit ayam fédéngon de.”

### *Fantag bé gaiy kétéreéne*

<sup>23</sup> Wén i no sébaan fuweh gai kétéreén, i Jesuse brab de kuyugén téménara ro dob de médoow do faréy. Atin amun ménagéw ro, i de kuyugén méndot ro bé de onok faréy. <sup>24</sup> Tidéw béno, i de Fariseo ménbéréh ro dob

Jesuse maro, “Sedek rigoné roy ni, non dob kitab tome énda fatut i gémalbéke ké gai kétéreén?”

<sup>25</sup> Séménumbuli i Jesuse mano, “Aw énda ba énggébasana kom i rénigo Datu Dabide? Wén i no gai toow fo mélayaf beroy de sundalo no. <sup>26</sup> Mélaw ménahur ro dob lawi i Tuluse brab méndot bé ténulake fan brab namaén, atin niraya no soy de dumo no de. Rénigo noy ni fiyon fo ké dob kitabe fadi saén i fakaye mama bé ni fan. Rénigo noy ni dob gaiwe Abitar sénay gérotore fadi.”

<sup>27</sup> Atin féntaus Jesusey kétéreén ne mano, “Rénigoy gai kétéreéne kay de étéw, békén i étéwey rénigowe kay gai kétéreéne. <sup>28</sup> Mélaw i Nga i Kéilawane, sani Begéne, wén i kuwagib gu fantag bé atiy fakaye rigonén bé gaiwe kétéreén.”

## 3

### *Nuwa Jesusey étéwe ménsadil i kémér ne*

<sup>1</sup> Tidéw béno, ménangéy i Jesuse man dob lawie féngadafay de Judio. Diyo soy ségétéwe lagéy ménsadil i kémér ne. <sup>2</sup> Endob diyo soy de Fariseo méuyot témo bé Jesuse. Mélaw ténulik ro, inok gito ro ké muwa bé no gai kétéreén. <sup>3</sup> Atin ménbéréh i Jesuse dob lagéy ni ménsadil i kémér ne mano, “Ay go dini dob téngaangay de étéw ni.” <sup>4</sup> Tidéw béno, fénénginsaa noy de étéw mano, “Ati karang gome de, ati isuwe fakay dob kitabe bé gaiwe kétéreén? Rénigo fiyo, loo ké tete? Témbang bé étéwe inok énda méléhuén, loo ké féléhuén?”

Endob ménantés ro. <sup>5</sup> Atin ménkérit i Jesuse bé lala ne téméngténg bé de étéw géliwét de. Endob tete soy fédéw ne non bé de kétégas i de atura ro énda fo méuray i na ruwe bé ni lagéy. Tidéw béno, ménbéréh dob lagéy ni mano, “Bétéreén i kémér ma nan.” Atin béntéren i kémér ne atin sonom béno, ménadi-adi. <sup>6</sup> Tidéw béno, i de Fariseo toow ro fo ménkérit atin ménsut ro tidéw dob lawie féngadafan. Atin ménsélimud ro bé de étéw do modor bé Datu Herode brab ménséfagayun ro bé féléhué roy Jesuse brab rénigo roy bantak fédéw ruwe.

<sup>7</sup> Atin i Jesuse brab de kuyugén ménagéw ro man mangéy dob dogote Galilea, brab médooy de étéw ménfuray de. Tidéw ro Galilea brab Judea, <sup>8</sup> brab tidéw Jerusalem, brab Idumea, brab tidéw fingé sébangay wayége Jordan, brab tidéw dob géliwéte bé Tirowe brab Sidone. I de ni do médoow étéw ménangéy ro dob Jesuse non énggelingoo roy kéluhanay de rénigo no do mékégaif. <sup>9</sup> Atin non toow fo daké i de ménlimud do étéw, i Jesuse bénréhén bé de kuyugén bé témafay ro sébaan awang édaa no inok énda mérasékén. <sup>10</sup> Non énggéféadi-adino noy de médoow do étéw. Mélaw i kéluhanay de wén do déruuno sédéri ro fégédét dob Jesuse inok

gékuwaha ro. <sup>11</sup> Atin i kéluhanay de étéw rénahukoy de saitan, amun énggito roy Jesuse, méntélangkéb ro dob adafa nuwe brab mékes ro maro, "Beemey Nga i Tuluse."

<sup>12</sup> Endob i Jesuse génléén bero bé énda fégitiga ro de dob de ségiyo.

*Fénémili Jesusey de folo bra ruwo gétéw apostol*

<sup>13</sup> Tidéw béno, i Jesuse ménénagé mangéy dob burure brab ténawagén mangéy dob Beeney de fénémilién do waléy do sarigo no. Atin ménangéy ro dob Beene. <sup>14</sup> Atin fénémilién i de folo bra ruwo gétéw, atin féndawétén bero do apostol (i atag ne "do sénugu"). Non féndorén bero dob Beene, brab sugué no bero muret. <sup>15</sup> Atin niraya no bero barakat inok gédédél ro do saitan rémahuk dob de étéw.

<sup>16</sup> Ay niy de dawét i de apostol do fénémilién: Simon (féndawét Jesuse Pedro so), <sup>17</sup> Santiago brab Juan, sani de nga Sebedeo. I Jesuse féndawétén so bero Boanerges (i atag ne "do nga dégu"), <sup>18</sup> brab Andres, Filipi, Bartolome, Mateo, Tomas, Santiago nga Alfeo, Tadeo, Simon sani ségétéwe toow fo gulaané noy ingéd ne, <sup>19</sup> brab Judas Iskariot, sani ménfékéfoe bé Jesuse.

<sup>20</sup> Tidéw béno, i Jesuse ménule. Atin ménlimud man i médoowe étéw dob Beene. Mélaw i Jesuse brab de kuyugén, énda i uras ro mama. <sup>21</sup> Atin i de samungén, amun énggélíngoo roy ni, nangéy ro kénéfo, non béréh i de étéw bunéy kun.

<sup>22</sup> Atin wén i de témoro bé kitab i de Judio énggumah ro tidéw Jerusalem. Ménbéréh ro maro, "I Jesuse ni rénahuko Beelsebule, sani Satanase, i odoroy de saitan. Been i funa nuwe wén i barakatén démédel bé de saitan."

<sup>23</sup> Mélaw i Jesuse ténawagén i de ni étéw mangéy dob Beene, brab nuretén beroy de binuwaya mano, "Enda fakayén ké féféraréy Satanasey de dumo no saitan. <sup>24</sup> Ufama, amuk wén i ingéd énda géséfagayun ro brab sétiboh ro, mébinasa. <sup>25</sup> Taloo no i ségékurénge étéw dob sébaane lawi amuk énda so géséfagayun ro brab sékérit ro, waléy mébinasa. <sup>26</sup> Ségiléw so bé Satanase. Buluk i de sugu-sugué no mésebaad énda géséfagayun ro, énda so gétingéy i fangangatura nuwe, brab mébinasa.

<sup>27</sup> "I Begéne, ténabana kun i Satanase. Been i niy funa kuwe géféféraréyo kuy de kuyugén sani de saitan. Ufama, énda i ségétéw étéw géahur dob lawi i émbagére étéw atin tulisé noy tamuk ne taman énda na géikéto no de métah.

<sup>28</sup> "Béréhé ku begom i toowe, i kéluhanay de sala brab de tete kébéréh i de étéw fakay

émfésagad. <sup>29</sup> Endob i émbéréhe tete fantag bé Rémogor i Tuluse énggérigo sala énda émfésagada no non énda mékédan i nan sala taman sa taman." <sup>30</sup> Bénréh Jesusey ni non wén i de ménbéréh maro, "Rénahuko saitan i Jesuse, funa no géféféraréy bé de saitan." Endob i toowe, Rémogor i Tulusey mananguwite bé Jesuse.

<sup>31</sup> Tidéw béno, énggumah i idéng Jesuse brab de tuwaréyén lagéy. Téménindég ro dob liyuy lawie, brab fén-uwito ro kébéréh bé tawagé roy Jesuse. <sup>32</sup> Wén i de médo do étéw ménlimud ménsar géliwét bé Jesuse, atin ménbéréh ro maro, "I idéng me brab de tuwaréyém diyo ro dob liyuwe. Méuyot ro géségito Beem."

<sup>33</sup> Atin séménumbul i Jesuse mano, "Wén i ségiyo idéng gu brab do tuwaréy gu." <sup>34</sup> Atin iling-iling dob de étéw ménsar géliwét de brab ménbéréh mano, "Téngténg gom, ay niy de maak idéng gu brab do tuwaréy gu. <sup>35</sup> Non i de étéw rémigo bé kétayay Tuluse, beroy do maak idéng gu brab do tuwaréy gu."

## 4

### *I binuwayae fantag bé sébabuge*

<sup>1</sup> Wén i no sébaan fuweh, téménoro man i Jesuse diyo dob dogote Galilea. Atin toow fo dakél i ménlimude do étéw géliwét de. Mélaw ménda dob awange brab ménsar diyo gédét dob dénsaane, bé lala i de étéw téménindég dob dénsaane. <sup>2</sup> Atin médooy de ténoroén bero féngagwén dob de binuwaya.

<sup>3</sup> Ménbéréh mano, "Fégingo gom. Wén i ségétéwe étéw ménangéy sébabug bé béne ne. <sup>4</sup> Amun sénabugén i béne ne, i de dumo bé béne ne ménbigodoy dob doror i aguwone. Diyo énggumah i de kloh manok, atin nama ro. <sup>5</sup> I de dumoy de béneén ménsawér dob fantade médooy de batéw de, éndob kloh saén i fantade médooy de batéw de, éndob kloh saén i fantade de. Tidéw béno, ménagad téménunoh non énda ménalém i fantade de. <sup>6</sup> Endob amun sémbang i térése, atin démawét foy médufe, ménlaay i nohoke brab ménléhu, non énda toow ménalém i de kédarir ro. <sup>7</sup> I de dumoy de béneén ménsawér dob fantade wén i do suwar de énda séna téménunoh ro. Atin ménsérangan téménunoh i de suwar brab de nohok. Mélaw ménéfuk i de nohok brab énda énggéfogonok ro. <sup>8</sup> Endob i de dumo bé de béne ménsawér dob fiyowe fantad, brab témunoh ro brab ménruk ro brab ménggonok ro médo taman téléw folo takéf, néw folo takéf brab mératu takéf i séngae sébaan béne."

<sup>9</sup> Atin féntaus Jesusey kébéréh ne mano, "Fégitung gom i fantage bé ni béréh gu begom amuk méuyot gom de ké gésobuto kom."

<sup>10</sup> Tidew béno, amun sébaa Jesuse séden, i de dumo bé de étew énggélíngo bé ni binuwaya, beroy de folo bra ruwo gétew do kuyugén ménangéy fégedét dob Beene. Atin ménénginsa ro fantag bé atag i de ni binuwaya. <sup>11</sup> Atin séménumbul i Jesuse mano, “Dob begome do kuyug gu, fégesobutéy Tuluse begom i de ménbunéy fantag bé kéféguléw i Tuluse bé de étewén. Endob dob de ségiyo étew, énggélíngo ro saén i de ni fén-agéw dob de binuwaya, <sup>12</sup> inok fiyon fo ké téngténgé ro fo toow, énda gito ro de. Brab fiyon fo ké gélingoo ro fo toow, énda gésobuto ro de. Non amuk gésobuto ro, gésénule ro bé de tete adat ro brab munur ro bé Tuluse, atin fésagada no bero.”

<sup>13</sup> Atin féntaus Jesusey kébéreh ne mano, “Aw énda gésobuto kom i ni binuwaya? Ati mélaw i kégesobut gome bé de ségiyo kétoro gu fén-agéw dob de binuwaya? <sup>14</sup> Ay niy atag i ni binuwaya énggélíngo kom. I atag i ni béne, been i kébéreh i Tuluse. Atin i de séségiyo-giyo gékélasi do fantad ségiléw bé de séségiyo-giyo gékélasi do étew. Atin i sémabuge ureté noy kébéreh i Tuluse dob de séségiyo-giyo do étew. <sup>15</sup> I de dumo bé de béne ménlawu dob doror i aguwone. Diyo nama i de kloh manok. I atag i ni, wén i do étew énggélíngo roy uret i Tuluse, éndob énggégumah i Satanase, atin kénda noy ni uret énggélíngo ro. <sup>16</sup> I dumoy de béne ménsawér dob fantade médooy de batéw de. I atag i ni, wén i do étew énggélíngo roy uret i Tuluse brab ténayakuf ro brab ménoror ro de. <sup>17</sup> Endob loo bé de nohok énda ménalém i darir ruwe, énda so méégét i kéunur ruwe. Sémarig ro bé Tuluse singkow saén. Endob amuk kérégénan ron taloo no férasayén ro sabaf bé uret i Tuluse, magad mékédan i késarig ruwe. <sup>18</sup> I de dumoy de béne ménsawér ro dob de duwaléy suwar. I atag i ni, wén i do étew énggélíngo roy uret i Tuluse, <sup>19</sup> éndob non bé de bukué ro fantag bé de kéuyag ro, brab kéuyot ruwe waléy kawasa, brab kéuyot ruwe bé de ségiyo do languntaman, been i niy funa ruwe gélifoto roy uret i Tuluse brab énda gérigono roy fatute kétayay Tuluse rigoné ro. <sup>20</sup> Atin i de dumoy de béne ménsawér ro dob fiyowe fantad. I atag i ni, wén i de étew énggélíngo roy uret i Tuluse brab toow fo nunuro ro. Mélaw rigoné roy kétayay Tuluse rigoné ro. I de dumo bero gérigono roy de fiyo, brab i de dumo bero gérigono ro na foy médoowe do fiyo, brab i de dumo bero toow na fo gérigono ro do médooy do fiyo.”

<sup>21</sup> Atin ménbéreh man i Jesuse mano, “Enda i témumon solo inok bunéy no dob bukag i kurénge fénléngkéb, taloo no fédiyoé no dob fantad i katriwe. Yamula fédiyoé no dob fégonone de. <sup>22</sup> Ségiléw so bé ni, i de kétoro gu ménbunéy béleewe, giton

moso. Atin i kéluhanay éndae gésobuton béni, gésobuton moso. <sup>23</sup> Komon fégitung gom fantag bé ni bénreh gu begom amuk méuyot gom de ké gésobuto kom.”

<sup>24</sup> Atin ménbéreh man i Jesuse mano, “Fétuntay gom i gélingoo kome. Non i kékukum gome bé de dumo gom do étew, iringéy Tuluse so ké kukumé no begom, éndob toow na fo gétimeal. <sup>25</sup> Atin i étewe mégélingo brab munur, méumanan nay kégesobut ne. Endob i étewe énda munurén, fiyon foy klohe fégitungé no gésobuto no, dotén dob beene.”

<sup>26</sup> Atin ménbéreh man i Jesuse mano, “I kédakél i kéféguléw i Tuluse bé de étewén ségiléw bé kéeruk i de béne sénabug i ségétéwe étew dob fantade. <sup>27</sup> Tidew béno, témunoh i de béne fiyon fo ké énda gésobutoy sémabugey funay de nohok témunoh. Méruk i de nohok fiyon fo ké fuweh ké gémalbék taloo no kélungonon ké fidong. <sup>28</sup> Non i fantade fétunohé noy de nohok brab féfégonoké no. Dob sunguwe de, démaun. Tidew béno, musu. Tidew man béno, kémifénén. <sup>29</sup> Atin amuk lagasén, fakayén kétéwé no non énggumahén i gaiy kékétewe de.”

<sup>30</sup> Atin ménbéreh man i Jesuse mano, “Ati fégingo tom bé kéféguléw i Tuluse bé de étewén? Ati binuwayae ureté tom? <sup>31</sup> Ségiléw na bé toowe fo kloh béne, éndot i étewe brab nohoké dob fantade. <sup>32</sup> Tidew béno, téméunoh brab ménruk taman ménwaléy toow fo dakél nohok. Atin ménongo dakél fongo, inok i de kloh manok salaga ro.”

<sup>33</sup> I uret i Tuluse nuret Jesuse dob de étew fén-agéw dob de médooy do binuwaya loo bé ni. Nuretén bero taman énggésobuto ro. <sup>34</sup> Enda i no kétoroén bero ké békén binuwaya. Endob amuk beroy de kuyugén saén brab énda i do ségiyo étew diyo, fégétiga no beroy de atag i de binuwaya.

#### *Féntéré Jesusey défuke*

<sup>35</sup> Bé béno gai, amun sémingkufén, bénreh Jesuse dob de kuyugén mano, “Mifar tom mangéy dob difar i dogote ni.” <sup>36</sup> Mélaw ténagak roy de ménlimud do étew, brab i de kuyugén ménda ro dob awange énsara Jesuse. Tidew béno, ménifar ro. Wén soy do ségiyo awang ménodor bero. <sup>37</sup> Tidew béno, amun diyo ron dob kérara i dogote, tékow énggumah i émbagére défuk. Atin nahuroy de bagél i awang ruwe taman gedét ménféno bé wayége. <sup>38</sup> Endob i Jesuse diyo dob ulinay awange, ménfidong déménanan. Atin téningé i de kuyugén atin nulég ro maro, “Maistéro, aw énda i ula mé de ké mégra tom?”

<sup>39</sup> Tidew béno, méntek i Jesuse brab génléén i réfuruhe brab de bagél mano, “Fétinanék gom!” Sonom béno, téménrén i réfuruhe, atin ménlingén-ngén i dogote. <sup>40</sup> Atin ménbéreh i Jesuse dob de kuyugén

mano, “Sedek mégilak gom? Aw énda séna sémarig gom?”

<sup>41</sup> Endob toow ro fo ménggilak atin ménsébéréh-béréh ro maro, “Ati nén mon i ni étéw? Fiyon i défuke brab de bagél géfétéréno no!”

## 5

### *Dénédél Jesusey de saitan*

<sup>1</sup> Atin méntaus ro taman énggégumah ro dob difar i dogote, dob ingéde Gerasa. <sup>2</sup> Amun téménéfad i Jesuse, béalak i étéwe rénahukoy saitanane. Tidéw dob de takub do lébéng, <sup>3</sup> non bati diyo. Brab éndaén fo méikétén, fiyon fo ké sangkali. <sup>4</sup> Non médoonén gule nikét bé sangkaliey de sékéyén brab de kéméréén. Endob i de sangkali sékétusé no, brab de futow fénggéfating bé de sékéyén séfindasé no. Atin énda nay ségétéw étéw émbagér ménggéfifit de. <sup>5</sup> Fuweh na kélungonan i kéagéw ne dob de duwaléy lébéng brab dob de tuduk. Diyo mékes brab falié noy lowoh ne bé de batéw.

<sup>6</sup> Atin amun énggito noy Jesuse dob mérayue, léménentu mangéy féngédét brab ménlingkuwéd dob adafa nuwe. <sup>7-8</sup> Atin i Jesuse sénuguén i saitanane mano, “Saitan, sut go tidéw dob beena nan!”

Tidéw béno, ménkés métanug i étéwe rénahukoy saitanane ni. Ménbéréh i saitanane mano, “Jesus, Nga i toowe fo gérotor Tulus, ati kérigo muwe begén? Ongoté ku Beem, fasad go dob Tuluse bé kago fédawéton begén.”

<sup>9</sup> Atin féninginsaa Jesuse mano, “Ati dawét me?”

Atin séménumbul mano, “Laksaén i dawét guwe non bé médoow gey do saitan dob ni étéw.” <sup>10</sup> Atin féntausén i kéféngédaw-gédaw ne dob Jesuse bé békén damén dédelé Jesuse bero mangéy dob mérayue.

<sup>11</sup> Enda mérayuén dob no gonon, diyo i médoowe do babuy témabtab dob méngulandige. <sup>12</sup> Atin nongot i de saitan dob Jesuse maro, “fénggégén gey dob do babuy diyo, brab fédayaém begey mahur dob berowe.” <sup>13</sup> Atin ténungkas Jesuse bero. Mélaw i de saitan ménsut ro dob étéwe ni brab ménahur ro dob de babuy ni. Wén i ruwo ngibu kédooy de ni babuy, brab kéluhana ro ménraréy ro ménangéy dob fingase brab ménantéfor ro mangéy dob dogote, atin ménléné ro.

<sup>14</sup> I de étéw témalima bé de babuy ni, amun énggito roy ni ménrigo, ménségéta ro brab nuret roy ni dob ingéde brab dob de ségiyo gonon géliwét. Atin ménangéy diyo i de étéw inok susiné roy ni ménrigo. <sup>15</sup> Ménféngédét ro dob Jesuse brab énggito roy étéwe ni bé gétaho rénahukoy de médoow do saitan. Ménsar diyo, kéménégal brab méntintunén i kéféngitung

ne. Atin kéluhana ro mégilak ro de. <sup>16</sup> Nuret i kéluhanay de énggégito de ké ati ménrigoowe dob étéwe ni bé gétaho sénaitanan brab ati ménrigoowe dob de babuy.

<sup>17</sup> Mélaw i de étéw nongot roy Jesuse tékédan dob ingéd ruwe ni.

<sup>18</sup> I lala Jesuse ménda dob awange, i lagéyo no ténkédanay de saitan nongotén dob Jesuse mano, “Modoru Beem.”

<sup>19</sup> Endob énda ténungkas Jesuse de. Yamula ménbéréh mano, “Ule go brab uretém dob de samungém i kéluhanay fiyowe rénigoy Kadnane Tulus dob beeme brab kéngédaw ne beem.”

<sup>20</sup> Mélaw ménagéw brab ménsugud-sugud dob gonone diyo féndawét “Do Folo Ingéd”, brab nuretén i kéluhanay rénigo Jesuse dob beene. Atin i kéluhanay de étéw énggégélingo de, ménggaif ro de.

### *Nuwa Jesusey ruwowe gétyw libun*

<sup>21</sup> Tidéw béno, ménséfule i Jesuse mifar dob dogote. Amun énggumah dob difare, diyo dob fédoror i dogote ménlimud i médoowe étéw géliwét de. <sup>22</sup> Atin énggumah i ségétéwe étéw féndawét Jairo, ségétéw odoron dob lawie féngadafan kay de Judio. Amun énggito noy Jesuse, ménféngédét dob Beene brab ménténgkéb dob adafa nuwe. <sup>23</sup> Atin toow fo nongotén dob Jesuse mano, “I klohe kénogo ku toow fo kétimalan déméruun. Enggonén angéyém gamak inok adi-adi brab inok énda méléhuén.”

<sup>24</sup> Mélaw ménodor i Jesuse de. Atin ménodor i médoowe étéw brab mésérasék ro lémiwét bé Jesuse.

<sup>25</sup> Diyo soy ségétéwe libun kéfasangan non foloén bra ruwo gébélintuwa i kéranas i adat ne. <sup>26</sup> Brab ménétéyén i kurta ne fénggébayadén bé de doktor, éndob énda foy ségétéw géuwa de. Yamula minut gétimal i déruu nuwe. <sup>27</sup> Enggélíngoo noy de uret fantag bé Jesuse, mélaw ménfuray so bé de médoow ni do étéw ménlimud inok gékuwaha noy kégal Jesuse. <sup>28</sup> Non fénggitungén mano, “Amuk gékuwaha ku saén i kégal ne, adi-adiwu.”

<sup>29</sup> Mélaw kénuwahén i kégal Jesuse. Sonom béno, téménrén i kéranas i adat ne, atin énggétérédama no ménadi-adi bé déruu nuwe. <sup>30</sup> Endob bé béno so, énggétiga Jesuse bé ménsut i barakat ne tidéw dob Beene. Mélaw méntékélid brab ménénginsa dob de ménlimud do étéw mano, “Ati kéménuwahe bé kégal guwe?”

<sup>31</sup> Atin séménumbul i de kuyugén maro, “Gito moy médoowe ni étéw géliwét Beem brab séndantélo ro Beem. Sedek fénginsaa moy ati kéménuwahe Beem?”

<sup>32</sup> Endob i Jesuse féntausén i kéling-iling ne téméngténg ké atiy kéménuwahe de. <sup>33</sup> Tidéw béno, i libune ni énggétiga no atiy ménrigoowe

dob beene. Mélaw ménfégedét lé mukub bé kégilak ne, atin méntélingkéb dob adafa Jesuse. Brab bénréhén i kéluhanay toowe. <sup>34</sup> Tidéw béno, bénréh Jesuse de mano, "Di, i kéféngintoo mey funa muwe ménadi-adi. Taus go le brab kagonén émbuku. Endaén déméruun go bé ni déruun."

<sup>35</sup> Amun béréhé Jesusey ni, énggumah i de étéw tidéw dob lawi Jairowe. Ménbéréh ro dob Jairowe maro, "Déménigurén i nga me. Endaén kailanga mo féangyé mo diyo i Maistérowa nan."

<sup>36</sup> Endob i Jesuse, énda ténula noy kébéreh ruwe ni, yamula bénréhén dob Jairowe mano, "Kago mégilak. Féginugat go saén." <sup>37</sup> Atin i Jesuse, énda i ségétéw fénodorén saliyo bé ro Pedrowe, Santiagowe, brab Juane dumo Santiagowe sétiman idéng. <sup>38</sup> Amun énggumah ro dob lawi i odorono no, énggito Jesusey ménribuke, atin énggelingoo noy de ni médoó étéw toow fo selekén non kémérew ro brab rémuung ro. <sup>39</sup> Tidéw béno, ménahur i Jesuse brab bénréhén mano, "Sedek ménribuk gom brab selekén gom kémérew? Non i ngae ni énda ménléhuén, éndob ménfidong saén."

<sup>40</sup> Mélaw sénbayat roy Jesuse. Tidéw béno fénsutén bero kéluhanan, atin nuwitén i abay i ngae ni brab idéng ne brab de téléw gétéw kuyugén ménedor de, atin ménahur ro mangéy dob sibéye gonoy ngae ni méniro. <sup>41</sup> Tidéw béno, génamak Jesusey kémér ne brab ménbéréh mano, "Talita kumi." (I atag ne "Di, tek go!")

<sup>42</sup> Sonom béno, méntek i ngae ni atin ménagéw. Folo bra ruwo gébélintuwa i idad ne. Toow ro fo ménggaif bé ni rénigo Jesuse. <sup>43</sup> Endob i Jesuse fénggétén i kébéreho nuwe bero bé békén ureté ro dob ségiyowey ni ménrigo. Atin sénuguén bero émféama bé ni nga.

## 6

<sup>1</sup> Tidéw béno, ménagéw man i Jesuse tidéw diyo atin ménule mangéy dob kaane ingéd. Atin ménodor i de kuyugén so. <sup>2</sup> Atin bé gaiy kétéréne, ménangéy témoro dob lawie féngadafan kay de Judio. Médooy de étéw diyo, atin amun énggelingoo roy kétoro Jesuse, ménggaif ro. Mélaw ménséfénginsa ro maro, "Ati ni dakél kégetuwan, brab tidéwo nuwe de? Sedek gérigono noy mékégaife galbék?" <sup>3</sup> Aw békén ba Beeney fandaye rémigo lawi nga Maria brab ofo Santiago, Jose, Judas brab Simon? Brab aw békén ba dini dob betomey de libu no?" Mélaw ménika ro de.

<sup>4</sup> Atin ménbéréh i Jesuse dob berowe mano, "I ségétéwe sarigoy Tuluse muret bé kébéreh ne, basanan dob kéluhanay de gonon saliyo saén dob kaane ingéd brab dob

de kaan do samung brab dob de kaan do étéw sétifon lawi."

<sup>5</sup> Atin énda i gérigono no mékégaif galbék saliyo saén bé gémamake bé firoye déméruun atin géféadi-adino no bero. <sup>6</sup> Atin ménggaif i Jesuse non énda ménunur ro dob Beene.

*Sénugu Jesusey de folo bra ruwo gétéw kuyugén*

Tidéw béno, ménagéw i Jesuse sémgud témoro dob de ingéd gédét diyo. <sup>7</sup> Atin ténawag Jesuse mangéy sélimud dob Beeney de folo bra ruwo gétéw do kuyugén. Tidéw béno, sénuguén bero sémgud séruwo-ruwo gétéw. Atin niraya no bero barakat inok géféféraréyo roy de saitan. <sup>8</sup> Atin bénréhén bero mano, "Kagom muwit éntingayén saliyo saén bé tugée. Kagom muwit amaén, taloo no réban, taloo no kurta. <sup>9</sup> Fatut séminilas gom, éndob kagom muwit lékasa kom kégal." <sup>10</sup> Atin bénréhén so bero mano, "Fiyon atiy lawie témayakuf begom, bati gom diyo taman tagaké kom i nan ingéd. <sup>11</sup> Buluk wén i no ingéd énda tayakuféy de étéw begom, tékédan gom diyo, brab tag-tag gom i de bubuk sébuwan dob de sékéy gom émfégetigan bé kukuméy Tuluse bero."

<sup>12</sup> Tidéw béno, ménagéw i de kuyugén ni brab nuret roy fatut gésénule i de étéw bé de sala ro brab tagaké roy de tete adat ro. <sup>13</sup> Atin énggéféfararéy ro do médoó saitan, brab lénuwara ro nor i de médoó do déruunan atin ménadi-adi ro.

*I kéléhu Juan Bautistawe*

<sup>14</sup> Bé béno, i Herode, sani méguléwe dob Galilea, énggelingoo noy de rénigo Jesus non ménbantug dob kéluhanay de gonon. Wén i do étéw ménbéréh ro bé i Juan Bautistawe méntébule non maro ké Juan i Jesuse. Been kun i niy funa nuwe wén i barakatén gérgo do mékégaif.

<sup>15</sup> Brab i de dumo de béréhé roy Elias kun i Jesuse, sani méntélatae sarigoy Tuluse bé do géta. Brab i de dumo de béréhé roy Jesus kun i toowe fo énggétah sénarigoy Tuluse muret.

<sup>16</sup> I Herode, amun énggelingoo noy de ni, ménbéréh mano, "Beeney Juan Bautistawe fénkéling moy uléw ne, éndob méntébule." <sup>17-18</sup> Ay niy funa Herode ménfékéling bé uléw Juane. I Herode lénamfaén i bawag i tuwaréy ne Filipi. I dawét i ni libun Herodiyas. Tidéw béno, bénréh Juane dob Herodey ménsala non énda fakayén dob kitab i de Judio ké bawagén i iboe. Tidéw béno, i Herode fénkéfoén i Juane brab fénférisu no.

<sup>19</sup> Mélaw i Herodiyase ménkérit bé Juane brab ménuyot de méméléhu, éndob énda féndaya Herode de. <sup>20</sup> Non i Herode ménggilak bé Juane non gétiga noy métintu étéw i Juane brab fiyoy adat ne. Mélaw

dényaga no. Atin méuyot de mégélingo, fiyon fo ké ménriyarah de ké féngélingoé noy Juane.

<sup>21</sup> Endob énggumah i gaiwe rigoné Herodiyasey tetee dob Juane. Non réménigo karagiya i Herode féngétédemo no bé kéumah ne. Atin sénéngkatén i médoowe do odoron brab de sarigo datu Herode brab de odoroy de sundalo, brab de gérotor do étéw dob ingéde Galilea. <sup>22</sup> Atin i kénogo Herodiyase ménahur dob karagiyaé ni, atin ménsayaw. Mélaw ménfuyoy fédéw Herode beroy de kana no. Atin béréh Herode dob kénogone ni mano, “Ongotém dob begéney atiy kétaya muwe, brab iray gu.” <sup>23</sup> Atin séménafa mano, “Fasada ku beem, iray gu dob beemey atiy ongoté muwe dob begéne, fiyon fo ké ségébala bé ni ingéd fénguléwo ku.”

<sup>24</sup> Mélaw ménsut brab ménénginsa dob idéng ne mano, “Ati ongoté kuwe?”

Atin séménumbul i Herodiyase mano, “Ongotém i uléw Juan Bautistawe.”

<sup>25</sup> Tidéw béno, ménagayas séfule mangéy dob datu Herode brab ménongot mano, “Kétaya ku ké béleewe ni irayém begén i uléw Juan Bautistawe dob biléwe.”

<sup>26</sup> Atin toow fo méntete i fédéw datu Herode, non mika rémigo bé ni. Endob sabaf bé méégéte fasadén rénigo no dob téngaangay de kana no, ménika ké énda magayun no bé ni ongoté. <sup>27</sup> Mélaw féngagayasén sénugu i ségétéwe guwardiya mangéy dob férisunone inok kéléngé noy uléw Juane brab uwité no séfule. Tidéw béno, i guwardiyawe ni, ménagéw dob férisunone brab kénéngén i uléw Juane. <sup>28</sup> Atin nuwitén i uléw ne dob biléwe, brab nirayén dob ni kénogon. Atin niray i kénogone ni dob idéng ne. <sup>29</sup> I de kuyug Juan, amun énggélíngoo roy ni, nangéy roy bangkay ne, atin lénébéng ro.

### *Fénwaléy Jesuse médooy klohe amaén*

<sup>30</sup> Amun ménséfuleén i de apostol mangéy dob Jesuse, béréh roy kéluhanay de rénigo ro brab de ténoro ro. <sup>31</sup> Atin toow fo médooy de étéw ménangéy ségito bé Jesuse, mélaw énda i uras Jesuse brab de kuyugén mama. Mélaw béréh Jesuse dob de kuyugén mano, “Enggomén, magéw tom dob géfélébue gonon inok gétéren tom singkow.” <sup>32</sup> Mélaw ménda ro dob awange inok mangéy ro dob géfélébue gonon.

<sup>33</sup> Endob médooy de étéw énggégito bero magéw, brab énggétiga ro bero. Mélaw ménagayas i de étéw tidéw dob kéluhanay de ingéd léméntu mangéy dob ayo Jesuse beroy de kuyugén. Atin énggétah ro na énggégumah bé Jesuse. <sup>34</sup> Amun déménunggu i awange ni brab ménlus i Jesuse dob dénsaane, énggito noy de médoow do étéw ménlumud. Atin ménuray i na nuwe bero, non géségiléw ro bé de bili-bili énda i témalima bero. Mélaw féngganayén i kétoro ne nero bé médoowe

kétoroén. <sup>35</sup> Amun témégénén, i de kuyug Jesus ménangéy ro dob Beene brab ménbéréh ro maro, “Témégénén, atin i ni gonon mérayu dob dakéle ingéd. <sup>36</sup> Mélaw féngagém i de étéw ni inok mangéy ro dob de ingéd gédét dini. Diyo gébéléy ro amaé ro.”

<sup>37</sup> Endob i Jesuse ménbéréh dob de kuyugén mano, “Traya kom bero amaé ro.”

Atin ménbéréh ro maro, “Ay aba-aba, aw méuyot go de ké méléy gey amaén kay de médoowe ni étéw? Labi ruwo ngibu filak i nan!”

<sup>38</sup> Atin fénénginsaa Jesuse bero mano, “Firoy timan i fa tome? Ay gom ta langu.”

Amun gétiga ro, séménumbul ro maro, “Limo timan fan brab ruwo timan sédo.”

<sup>39</sup> Tidéw béno, ménbéréh i Jesuse dob de kuyugén mano, “Féésar gom i de étéw sésélumfuk-lumfuk dob de mélnéw kéroon.” <sup>40</sup> Mélaw i de étéw, ménsar ro ménsélumfuk-lumfuk, sémératuh-ratuh brab sélimo-limo folo. <sup>41</sup> Tidéw béno, éndot Jesusey limowe timan fan brab ruwowe timan sédo, atin léménéngag saréw dob lawayo brab ménfésalamat dob Tuluse. Tidéw béno, sénbaad-baadén i de fan, brab nirayén dob de kuyugén inok saaré ro dob de étéw. Atin loo so bé niy rénigo nuwe bé ruwowe timan sédo. <sup>42</sup> Atin i kéluhanay de étéw, téménantu ro mama taman ménbésor ro. <sup>43</sup> Tidéw béno, ténimu i de kuyug Jesus i de sama i de fan brab sédo brab ménféno i foloe bra ruwo timan biton. <sup>44</sup> I kédooy de ménama, limo ro ngibu do lagéy saliyo na bé de libun brab de nga.

### *Ménagéw i Jesuse dob rotor i dogote*

<sup>45</sup> Tidéw béno, fénda Jesusey de kuyugén dob awange atin fénétahén bero mangéy fingé difar bé dogote dob ingéde Betsaida, bé lala ne émféule bé de étéw ménlumud. <sup>46</sup> Atin amun ménggétawén dob berowe, ménangéy i Jesuse dob sébaane burur inok démasal. <sup>47</sup> Atin amun sémingkufén, i awange diyoén dob kéréra i dogote. Atin i Jesuse ségétéwén saén dob fantade. <sup>48</sup> Atin énggito no kéréngénan i de kuyugén mémurah bé awang ruwe, non gérumfaka roy réfuruhe. Mélaw amun lingkuwogén mangéy fuweh, ménangéy i Jesuse dob berowe magéw dob rotor i dogote. Géfédéw damén gélamfasa no bero, <sup>49</sup> éndob énggito ro magéw dob rotor i wayége. Atin maro ké ménayam. Mélaw ménkes ro. <sup>50</sup> Non kéluhana ro ménggilak amun énggito ro.

Endob sonom béno, i Jesuse ménbéréh dob berowe mano, “Kagom mégilak! Begén. Fétana gom i de fédéw gom.” <sup>51</sup> Tidéw béno, ménda dob awang ruwe. Atin téménrén i réfuruhe. Atin toow fo ménggaif i de kuyugén, <sup>52</sup> non fiyon fo ké énggito roy mékégaife

rénigo Jesuse dob de amaén, énda gésobuto ro de non métégas i de atur ro.

<sup>53</sup> Atin amun énggéifar ro, déménunggu ro dob ingéde Genesaret, atin ménamfil ro fédoror. <sup>54</sup> Atin amun téménéfad ron dob awange, sonom béno énggiloloy de étéw bati diyo i Jesuse. <sup>55</sup> Mélaw ménagayas ro léméntu dob séngae ingéd diyo inok fégétiga ro dob de étéw. Tidéw béno, nuwit roy de déméruun ténanggung ro mangéy dob énggélungoo ruwe gono Jesuse. <sup>56</sup> Atin dob séngae nayo no, fiyon fo ké kloh ingéd taloo no dakél, nuwit roy de déméruun dob de fadiyan, atin nongot ro dob Beeney kuwahé ro saén i féruung-fung i kégal ne. Atin i séngae gékuwah de adi-adi.

## 7

### *I kétoroe fantag bé adat i de Judio*

<sup>1</sup> Wén i no sébaan fuweh, i de Fariseo brab de témoro bé kitab i de Judio, do tidéw Jerusalem, téningé roy Jesuse. <sup>2</sup> Atin énggito roy dumoy de kuyugén mama énda méngguse ro loo bé adat i de Judio.

<sup>3</sup> Non i de Fariseo, brab kéluhanay de Judio, énda mama ro taman énda géfénguse ro non odoro roy adate tidéw dob de katufua ro bé do géta. <sup>4</sup> Brab buluk méléy ro amaén dob fadiyane, énda amaé ro de taman énda méurahén. Atin médoonay de dumo adat ro loo bé kéurahe bé de tabu brab de kuréng brab de galang ahur-ahuron brab de katri.

<sup>5</sup> Mélaw i de Fariseo brab de témoro bé kitabe, ménénginsa ro dob Jesuse maro, “Sedek i de kuyugém énda odoro roy adat tome tidéw dob de katufua tom, non énda méguse ro ké mama ro?”

<sup>6</sup> Atin séménumbul i Jesuse mano, “Enda toow i kéunur gome bé Tuluse, ubo-ubo saén. Toow i kébéreh Isaiase, sani ségétéwe méntélata sénarigoy Tuluse muret bé kébéreh ne, amun sénulatén i fantage bé begome mano, ‘Bang i Tuluse, basanay de ni étéw Begén dob kébéreh ruwe saén. Endob énda munur ro Begén dob de fédéw ro. <sup>7</sup> Enda i atag i kéféngadaf ruwe Begén, non toroé roy de sugu réngigoy kéilawane brab béréhé ro tidéw dob Begéne.’”

<sup>8</sup> Atin féntaus Jesusey kébéreh ne mano, “Mélaw ténagak gom i de sugu i Tuluse inok odoro kom i adat i kéilawane saén. <sup>9</sup> Furung gom miika bé de sugu i Tuluse inok modor gom bé kagome kétoro. <sup>10</sup> Non wén i sugu i Tuluse niray Moisesé bé do géta mano, ‘Basana moy abay me brab idéng me.’ Atin bénréhén so mano, ‘Buluk wén i ségétéw émbéréh tete fantag bé abay ne look idéng ne, fatut féluhuén.’ <sup>11</sup> Endob i begome, témoro gom bé amuk wén i ségétéw étéw émfasang i abay ne look idéng ne, brab wén i tabang irayén damén, tungkasé kom de émbéréh ‘Korban’. (I atag i Korbane ‘Kay

Tuluse’.) <sup>12</sup> Mélaw éndaén tungkasé kom de témabang bé de lukésén. <sup>13</sup> Mélaw ténagak gom i kébéreh i Tuluse inok modor gom bé adate toroé kom. Brab do médoonay de rignoné kom ula-ula loo bé ni.”

### *I kétoroe fantag bé amaén*

<sup>14</sup> Tidéw béno, ténawag Jesuse man i de étéw mangéy dob Beene. Atin ménbéreh dob berowe mano, “Fégélingo gom Begén, kéluhana kom, brab fégésobut gom. <sup>15</sup> I funay de étéw waléy mékéresik dob adafay Tuluse, békén non bé atiy amaé ruwe. Yamula, i de tete kébéreh mésut tidéw dob de ba ro, been i funay de étéw waléy mékéresik dob adafay Tuluse. <sup>16</sup> Fétuntay gom i ni bénréh gu.”

<sup>17</sup> Tidéw béno, amun ténagak Jesusey de médoonay do étéw ménlimud brab énggégrahur dob lawie, ménénginsa i de kuyugén dob Beene fantag bé atag i ni kébérehén. <sup>18</sup> Atin sénumbulo Jesuse bero mano, “Ségiléw gom bé kéluhanay de ségiyo étéw, non énda gésobuto kom i ni kétoro gu. I funay Tuluse énda mésuwatén bé de étéw békén sabaf bé de amaé ro. <sup>19</sup> Non i amaéy étéwe, mahur dob sur ne brab mésut so dob lowoh ne. Enda mahurén dob fédéw ne.” Bé ni kébéreh Jesuse, ténoroén bé i kéluhanay amaéne fiyo, fakay amaéy de étéw.

<sup>20</sup> Atin féntaus Jesusey kébéreh ne mano, “I géésute tidéw dob étéwe, been i funa nuwe mékéresik. <sup>21</sup> Non tidéw dob fédéwe, gégumah i tete kéféngitung, brab sébiga, brab ménakaw, brab méméléhu, <sup>22</sup> brab sétayan bé bawag i ségiyowe, brab arumén, brab lémfif, brab tete i rignoné de lowoh ro, brab mingar, brab témbo bé éndae toow, brab félangka-langka, brab dufang, brab kéluhanay de tete rignoné. <sup>23</sup> I kéluhanay de ni tete tidéw dob fédéw i étéwe brab funa no mékéresik.”

<sup>24</sup> Tidéw béno, ménagéw i Jesuse tidéw diyo mangéy dob de ingéd gédét dob ingéde Tiro. Diyo réménahur dob lawie, atin ménuyot ké énda gétagay de étéw i gono nuwe. Gido loo, ménsélalag i Jesuse diyo bati. <sup>25</sup> Atin diyo i libune wén i klohe kénogo no rénahukoy saitané. Atin énggélungoo noy fantage bé Jesuse. Mélaw ménagayas ménagéy dob Beene brab méntélléngkéb dob adafa nuwe. <sup>26</sup> Atin nongotén dob Jesuse bé féféraréy noy saitané tidéw dob kénogo nuwe ni. Endob i ni libun, békén Judio. Yamula, tidéw dob ségiyowe ingéd féndawét Fenisia dob Siro. <sup>27</sup> Mélaw nuret Jesusey sébaane binuwaya inok fégétiga no de bé tabangé noy de Judio sungu, atin tidéw béno tabangé noy de békén Judio. Ménbéreh mano, “Féamaén na métah i de nga. Non énda fatutén ké dotén i amaéy de nga atin ibéréh dob de itu.”

<sup>28</sup> Endob ménbéreh i libune ni mano, “Toow, Maistéro, éndob fiyon foy de itu



géamaa roy de mumu mélawu tidéw dob amaéy de nga."

<sup>29</sup> Mélaw séménambul i Jesuse mano, "Fiyoy nan kébérehém. Mélaw ule go non ménsutén i saitane tidéw dob nga me."

<sup>30</sup> Tidéw béno, ménule i ni libun, brab énggito noy nga ne méniro, brab i saitane éndaén rénahuko no de.

*Nuwa Jesusey ségétéwe bokongén brab mow*

<sup>31</sup> Tidéw béno, ménagéw i Jesuse tidéw dob de ingéd gédét dob Tiro brab ménémanték mangéy bé ingéde Sidon atin méntaus dob dogote Galilea. Atin téménara dob gonone féndawét "Do Folo Ingéd". <sup>32</sup> Atin wén i de étéw nuwit ro mangéy dob Jesusey lagéye bokongén brab énda toowén gébéreh fiyo. Atin nongot ro dob Beeney gamaké no inok adi-adi. <sup>33</sup> Mélaw i Jesuse, nuwitén férayu tidéw dob de ménlimud do étéw. Tidéw béno, féndiyóén i de dau kémérén dob de kélingo i bokongéne ni, brab fénrén i dau kémér ne brab kénuwahén i dila ne. <sup>34</sup> Tidéw béno, léménéngag i Jesuse saréw dob lawayo, brab fénsénarén i kéférenawa nuwe, atin ménbéréh dob beene mano, "Ifata". (I atag ne "Méungka go.")

<sup>35</sup> Sonom béno, i de kélingoén ménadi-adi brab énggégélingo, atin i kébéreh ne ménadi-adi so. Mélaw méngganay ménbéréh fiyo. <sup>36</sup> Tidéw béno, i Jesuse sénuguén i de étéw diyo bé békén béréhé roy ni rénigo no dob de ségiyo. Endob amun sénuguén bero bé békén ureté ro, ménlabi na foy kéuret ruwe de. <sup>37</sup> Atin i kéluhanay de énggégélingo de toow ro fo ménggaif. Ménbéréh ro maro, "Fiyoy wayoy kéluhanay de rignoné no ula-ula. Géféféfélingoo noy de bokongén brab géfébérehé noy de mow."

## 8

*Fénwaléy Jesuse médooy klohe amaén*

<sup>1</sup> Enda mérugayén tidéw béno, ménlimud man i de médoó étéw. Amun méntéy i de amaé ro, ténawag Jesusey de kuyugén mangéy dob Beene, brab ménbéréh dob berowe mano, <sup>2</sup> "Méuray i na guwe bé de ménlimud ni do étéw, non méntéléwén gétérésangan i kédni ruwe ni dob Begéne, atin béleewe méntéy i amaé ruwe. <sup>3</sup> Atin amuk féuléé ku bero mélayaf ro, mésumba ro dob de lowoh aguwon, non i de dumo bero mérayu i de kétidéw ro."

<sup>4</sup> Atin ménbéréh i de kuyugén mano, "Ati kéfingé-fingé i kéféamae bé de médoó ni étéw dob ni gonon mérayu tidéw dob de lawi?"

<sup>5</sup> Atin i Jesuse fénénginsaa no bero mano, "Fiyoy timan i fa koman?"

Séménambul ro maro, "Fitéw timan."

<sup>6</sup> Tidéw béno, sénuguén i de ménlimud ni do étéw bé mésar ro dob fantade. Atin

éndotén i fitéwe timan fan brab ménfésalamat dob Tuluse. Tidéw béno, sénbaad-baadén, brab nirayén dob de kuyugén inok saaré ro dob de étéw. Atin rénigo roy ni. <sup>7</sup> Brab wén soy do kloh sédo ro, éndob énda médoó no. Atin ménfésalamatén man dob Tuluse brab bérénhén bé de kuyugén bé saaré ro so. <sup>8</sup> Atin i kéluhanay de étéw, téménantu ro mama taman ménbésor ro. Fot ngibuy kédoó ruwe. <sup>9</sup> Tidéw béno, i de kuyugén ténimu roy de sama ro brab ménféno i fitéwe timan biton. Tidéw béno, fénule Jesusey de ménlimud ni do étéw. <sup>10</sup> Sonom béno, ménda dob awange beroy de kuyugén, atin ménangéy ro dob ingéde Dalmanuta.

<sup>11</sup> Wén i no sébaan fuweh, i de Fariseo ménangéy ro dob Jesuse brab ménséédél ro de. Ménuoyot ro téméngkad bé Jesuse, mélaw nongot ro bé rigo no bero sébaan mékégaif galbék inok fégitto no bero tidéw dob Tuluse. <sup>12</sup> Endob i Jesuse fénsénarén i kéférenawa nuwe sabaf bé kététe i fédwé ne. Brab ménbéréh mano, "I de begom do étéw méuyag béleewe ni, sedek ongoté kom i mékégaife? Béréhé ku begom i toowe, énda rignoné kuy mékégaife inok méngintooow gom."

<sup>13</sup> Tidéw béno, i Jesuse beroy de kuyugén ténagak roy de étéw ni, atin ménda ro man dob awange mifar dob dogote.

<sup>14</sup> Atin i de kuyugén énggélifoto roy muwite fan saliyo bé sébaane saén fan dob awange. <sup>15</sup> Atin nuret Jesuse beroy sébaane binuwaya fantag bé de tete adatén do étéw. Ménbéréh mano, "Ingata kom brab sénggila gom i féféfééruke fan kay de Fariseo brab datu Herode brab de kuyugén."

<sup>16</sup> Endob i de kuyugé Jesus, énda énggésobuto roy ni binuwaya. Marok bérénhén Jesusey fantage bé tintuwe féféfééruk fan. Mélaw ménségeno-géno ro maro, "Bénrénhén i ni non énda i fa tom."

<sup>17</sup> Endob i Jesuse énggétiga noy kéfégitung ruwe. Mélaw ménbéréh mano, "Sedek ségeno-géno gom fantag bé kékulang i fa tome? Aw énda séna gésobuto kom de? Maak do léngléngén gom. <sup>18</sup> Wén i do moto gom éndob maak do langafén gom. Wén soy do kélingo gom éndob maak do bokongén gom. Aw énggélifoto kom i rénigo guwe? <sup>19</sup> Amun sénbaad-baad guy de limo timan fan dob de limo ngibu étéw, firoy gébiton i énggétimuo kome samaén?"

Atin séménambul ro maro, "Folo bra ruwo."

<sup>20</sup> Atin ménénginsa i Jesuse man mano, "Atin amun sénbaad-baad guy de fitéw timan fan dob de fot ngibu étéw, firoy gébiton i énggétimuo kome samaén?"

Atin séménambul ro maro, "Fitéw."

<sup>21</sup> Atin ménbéréh man i Jesuse mano, "Aw énda séna fo gésobuto kom de?"

*Nuwa Jesusey ségétéwe langafén*

<sup>22</sup> Wén i no sébaan fuweh, énggumah i Jesuse beroy de kuyugén dob ingéde Betsaida. Atin wén i de étéw nuwit ro mangéy dob Beeney ségétéwe langafén lagéy, brab non-got roy gamaké no inok adi-adi. <sup>23</sup> Atin i Jesuse, narakén i ni langafén brab ménsut ro kloh dob no ingéd. Tidéw béno, dénuraa noy de moto no brab ténégé noy langaféne ni. Tidéw béno, ménénginsa i Jesuse mano, “Aw wén i gito mo?”

<sup>24</sup> Atin iling-iling i lagéye ni brab séménumbul mano, “Hoo, gégitowu do étéw éndob maak do kayéw magéw.”

<sup>25</sup> Tidéw béno, i Jesuse ténégé no man féruman i de moto no. Sonom béno, téménngténg i ni lagéye brab énggégitonén fiyo non ménadi-adinén i de moto no. <sup>26</sup> Atin i Jesuse sénuguén mule brab béréhén mano, “Kago mawét dob nan ingéd.”

*I kéunur Pedrowe*

<sup>27</sup> Tidéw béno, méntaus i Jesuse brab de kuyugén mangéy dob de ingéd gédét dob ingéde Sisarea Filipino. Brab amun diyo ro séna dob de lowoh aguwon, fénénginsaa Jesuse bero mano, “Ati kébéréh i de étéw ké ati Begéne?”

<sup>28</sup> Séménumbul ro maro, “Wén i de émbéréh maro, Juan Bautista go kun. I de dumo maro, Elias go kun. Brab i de dumo maro, Beem kun i énggétahe sénarigoy Tuluse muret.”

<sup>29</sup> Tidéw béno, ménénginsa i Jesuse man mano, “Dob begome, ati kébéréh gome fantag bé Begéne?”

I Pedrowe séménumbul mano, “Beemey Kristowe sénugu i Tuluse inok méguléw go dob de étéw.”

<sup>30</sup> Tidéw béno, béréh Jesuse bero mano, “Kagom béréhén i ni fantag bé Begéne dob de ségiyo.”

*I kéuret Jesuse fantag bé kéléhu ne*

<sup>31</sup> Tidéw béno, i Jesuse féngganayén i kétoro ne bero fantag bé mérigowe dob Beene. Ménbéréh mano, “I Nga i Kéilawane, sani Begéne, médooy rasayé kuwe. Brab i de odoro tom do Judio brab de odoroy de fadi brab de témoro bé kitabe ikaa ro Begén. Atin féluéhu ro Begén. Endob dob gétéléwo nuwe gétérésangan tébuleu.” <sup>32</sup> Ménkéntay i kébéréh ne bé ni dob berowe. Mélaw i Pedrowe nuwitén i Jesuse inok ruwo ro saén, atin génléén. <sup>33</sup> Endob séménling i Jesuse brab ténéngténgén i de kuyugén. Atin génléén i Pedrowe mano, “Férayu go dob Begéne, non maak Satanas go. Non énda mégitung go loo bé Tuluse, éndob mégitung go loo bé kéilawane.”

<sup>34</sup> Tidéw béno, ténawag Jesusey de ménlimud do étéw brab de kuyugén inok mangéy ro dob Beene. Atin ménbéréh

dob berowe mano, “I étéwe méuyot furay Begén, kailangan diguré noy kaane kétayan inok odoro noy kétayay Tuluse. Tidéw béno, kailanga no gédayday bé de kérégénéon ségiléw bé Begéne, fiyon fo ké féluéhuén dob kruse. <sup>35</sup> Non i étéwe méuyot émférraru bé umul ne, méléhu. Endob i méléhue bé kéfuray ne Begén brab sabaf bé Fiyowe Uret, gédoté noy umule magufusa. <sup>36</sup> Ufama, fiyon fo ké i ségétéwe étéw gédoté noy kéluhanay éntingayéne dob duniyae ni, énda i atagén buluk méléhu atin mangéy dob emfernowe. <sup>37</sup> Enda i tamuk fakay féglululuk i étéwe inok gédoté no saén i umule magufusa. <sup>38</sup> Mélaw buluk wén i mémala muret fantag bé kéunur ne Begén brab de kétoro gu dob duniyae ni méfeno bé de énda méngintulus béleewe ni, i Begéne, sani Nga i Kéilawane, malané ku so buluk séfuleu moso begey i de télakiy Tuluse. Bé béno, réméndawu loo bé Abay guwe Tulus.”

**9**

<sup>1</sup> Atin féntaus Jesusey kébéréh ne mano, “Béréhé ku begom i toowe, wén i do dumo begom énda méléhu ro taman énda gito roy kéfégluléw i Tuluse bé de étéwén, gégumah darabayay barakat ne.”

*Enggiton i kéréndaw Jesuse*

<sup>2</sup> Amun ménifus i néme gétérésangan, nuwit Jesusey Pedrowe brab Santiagowe brab Juane, atin ménangéy ro dob uruk i gérotore tuduk, énda i ségiyo étéw diyo. Atin i lala ruwe téménngténg bé Jesuse, i falas ne ménfégalin. <sup>3</sup> Brab i kégal ne ménwaléy fute réméndaw. Enda nay étéw dob duniyae ni gétumaka noy kégale inok fute loo bé ni. <sup>4</sup> Sonom béno, méntéfégitoy Eliase brab Moisesese brab ménsébéréh ro bé Jesuse. <sup>5</sup> Atin i Pedrowe ménbéréh dob Jesuse mano, “Maistéro, toow fo fiyo non dob ni tom. Rémiyo gey téléw timan dung-dung. Sébaan i kaame de, sébaan i ka Moisesese de, brab sébaan i ka Eliase de.” <sup>6</sup> Enda gétiga Pedrowey fiyowe béréhé no non toow ro fo ménggilak.

<sup>7</sup> Tidéw béno, wén i rawéne ténggalungo no bero. Atin wén i ménbéréh tidéw dob rawéne ni mano, “Been i niy toowe fo kénimuo ku Nga gu. Fégléngingom.” <sup>8</sup> Sonom béno, méniling-iling i de kuyugén éndob énda i énggito ro saliyo saén bé Jesuse.

<sup>9</sup> Amun léménudug ro tidéw dob tuduko no, i Jesuse fénégétén i kébéréh ne dob berowe mano, “Kagom génoén dob ségiyowey ni énggito gom taman i Nga i Kéilawane, sani Begéne tébuleu.”

<sup>10</sup> Atin nodoro roy sugu Jesuse ni éndob séfénginsa ro sébero-bero saén maro, “Ati keey i atag i kébéréh ne mano, “Tébuleu?”” <sup>11</sup> Atin fénénginsa ro dob Jesuse maro,

“Sedek i de témoro bé kitabe émbéréh ro bé kailangan géétah na gégumah i Eliase, atin tidéw béno gégumah i Kristowe kun?”

<sup>12</sup> Atin séménambul i Jesuse mano, “Toow, géétah gégumah i Eliase inok tafayé noy kéluhanane. Endob sedek ménsulat i kébéréh i Tuluse bé i Nga i Kéilawane mérasay médooy brab ikaay de étéw? <sup>13</sup> Endob béréhé ku begom, i Eliase énggégumahén, éndob i de étéw fénsaray ro loo bé kétaya ruwe. Been soy ménbéréhe dob Ménsulate Kébéréh i Tuluse mérigo dob beene.”

### *Dénédel Jesusey saitane*

<sup>14</sup> Atin amun énggumaha ro Jesusey de ségiyo kuyugén, énggito roy dakéle ménlimud do étéw diyo so. Atin wén i de témoro bé kitab i de Judio séédél bé de kuyugén. <sup>15</sup> I kéluhanay de étéw do ménlimud, amun énggito roy Jesuse, toow fo ménggaif ro, atin ménségéta ro mangéy dob Beene atin sénggifa ro. <sup>16</sup> Atin fénénginsaa Jesusey de kuyugén mano, “Ati no funa kom séédél bé do étéw diyo?”

<sup>17</sup> Atin wén i ségétéwe lagéy dob de étéw ni ménlimud séménambul mano, “Maistéro, nuwit guy nga guwe lagéy mangéy dob Beeme, non rénahukoy saitane funa no mow. <sup>18</sup> Atin wén i no férsayéy saitane, atin tuwaré no dob fantade. Atin rémbéw i ba ne, brab kémigét i de kifé no, brab waléy de témingkog. Nongot gu bé de kuyugém bé féféraryéy roy saitane, éndob énda gagané ro de.”

<sup>19</sup> Atin ménbéréh i Jesuse dob berowe mano, “Enda sémarig gom bé Tuluse. Lugoténun sétafik begom. Enda gétiga ku ké ati nay kéréugay i kétingkél guwe sétafik begom. Uwit gom dinyi ngaa nan.” <sup>20</sup> Mélaw nuwit roy ngae dob Beene.

Atin i saitane ni amun énggito noy Jesuse, ténuwarén i ngae ni dob fantade brab ménkériring, rémbéw i ba ne so. <sup>21</sup> Atin fénénginsaa Jesusey abay ne mano, “Ménfiroyén i kégedam ne bé ni?”

Atin séménambul mano, “Tidéw na fo kékelohén. <sup>22</sup> Brab médoonén gule féléhuéy saitane damén méibér dob aféye brab dob wayége. Mélaw amuk wén i fiyo gérigono mo, fégedawan gey brab tabangén gey.”

<sup>23</sup> Atin séménambul i Jesuse mano, “Sedek fénginsaa mo Begén ké wén i fiyo gérigono ku? Fakay i kéluhanane dob étéwe munur dob Tuluse.”

<sup>24</sup> Sonom béno, ménbéréh métanug i boh i ngae ni mano, “Munuru, éndob kulang i kéunur guwe. Féégétém i kéunur guwe.”

<sup>25</sup> Tidéw béno, énggito Jesusey médoowe do étéw ségéta fégedét dob berowe. Mélaw sénuguén i saitane mano, “I beeme saitan émfémow brab émfébokong bé étéwe. Sugué

ku beem, sut go tidéw dob ni nga, brab kagonén séfuleon del!”

<sup>26</sup> Sonom béno, i saitane ni ménkes, brab gétimal i kéfékikil ne de. Tidéw béno, ménsut i saitane atin i ngae ni maak ménléhuén non éndaén lékutohén. Mélaw médooy de étéw ménbéréh ro maro, “Ménléhuén.” <sup>27</sup> Endob i Jesuse génamakén i kémér ne brab féntekén, atin téménindég i ngae ni.

<sup>28</sup> Tidéw béno, i Jesuse brab de kuyugén ménule ro. Atin amun ménahur ro dob lawie, brab énda i ségiyo étéw diyo, ménénginsa i de kuyugén dob Jesuse maro, “Sedek énda gagané key i émféféraryé bé no saitan?”

<sup>29</sup> Séménambul i Jesuse mano, “I ni klase saitan, énda médédélén bé fiyon udenén fégedédél de, saliya saén bé kédasale.”

### *I kéuret Jesuse fantag bé kéléhu ne*

<sup>30</sup> Tidéw béno, ménagéw ro man tidéw diyo atin téménara ro dob ingéde Galilea. Atin ménika i Jesuse ké gétigay de étéw i gonu nuwe. <sup>31</sup> Non ténoroen i de kuyugén mano, “I Nga i Kéilawane, sani Begéne, fékéfo dob de étéw moso sani de sébanil Begén. Atin féléhué ro Begén. Endob amuk méfus i téléwe gétérésangan, tébuleu.”

<sup>32</sup> Endob bé béno gai, i de kuyugén énda énggésobuto roy béréhé Jesuse. Atin mégilak ro de ménginsa ké ati atag ne.

<sup>33</sup> Atin méntaus ro taman énggumaha ro dob ingéde Kafernaum. Atin amun énggératur ro dob lawie diyo, i Jesuse ménénginsa dob de kuyugén mano, “Ati funa kome séédél dob de lowoh aguwon?”

<sup>34</sup> Endob mémala ro sémambul non amun diyo ro séna lowoh aguwon, ménséédél ro ké ati isuwe bero toow fo gérotor. <sup>35</sup> Tidéw béno, i Jesuse ménsar brab ténawagén i de folo bra ruwo gétéw do kuyugén mangéy dob Beene. Atin ménbéréh dob berowe mano, “Amuk wén i ségétéw témayan toow fo gérotor, ay niy fatute rigoné no. Fatut térifantad brab waléy ségétéw sugu-suguéy kéluhanay de dumo no.” <sup>36</sup> Tidéw béno, éndot Jesusey ségétéwe nga brab féndiyoen dob adafa ruwe. Atin sénfifi Jesuse brab ménbéréh dob berowe mano, <sup>37</sup> “Fiyon atiy étéwe témayakuf bé ngae loo bé ni sabaf bé kéunur ne Begén, tayakufé no so Begén. Brab atiy témayakufe Begén, tayakufé no soy Tuluse ménféuwit Begén.”

<sup>38</sup> Atin ménbéréh i Juane mano, “Maistéro, énggito gey i ségétéwe étéw démedél do saitan nusarén i dawét me. Endob génlé gey non békén dumo tom.”

<sup>39</sup> Bang Jesuse, “Kagom géléén de. Non amuk wén i rémigo mékégaif usaré noy dawét guwe, énda magadén émbéréh tete fantag bé Begéne. <sup>40</sup> Non i békéne sébanil beton, dumo tom. <sup>41</sup> Béréhé ku begom i toowe, buluk wén i témabang begom, fiyon

iraya no saén begom ségétabu wayég inémén sabaf begomey de kuyug gu, tintu gédoté noy barase moso.

<sup>42</sup> “Endob amuk wén i émfésala bé ségétéwe loo bé ni nga munur dob Begéne, toow fo gétimeal i kékukume de. Mélaw mas na fiyo dob beene ké ibéréndob dogote ikéton dakél batéw i reer ne. <sup>43-44</sup> Mélaw amuk sébaan bé kémér mey émfésalae beem, kéléngém. Non mas na fiyo ké gédoté moy umule magufusa ségébala saén i kémér me, bé géangéy go dob uleono emferno ké ruwoy kémér me. Non diyo dob emfernowoy de sofot énda méléhu ro, brab i aféye énda méfandaén. <sup>45</sup> Atin amuk i funa muwe mésala i sébaane bé sékéy me, kéléngém. <sup>46</sup> Non mas na fiyo ké gédoté moy umule magufusa ségébala saén i sékéy me, bé géangéy go dob emfernowo, ruwoy de sékéyém. <sup>47</sup> Atin amuk ségébala bé moto muwey funa muwe mésala, léstitém. Non mas fiyo ké géahur go dob kéféguléw i Tuluse ségébala saén i moto muwe, bé géangéy go dob emfernowo ruwoy de moto mo. <sup>48</sup> Non diyo dob emfernowoy de sofot énda méléhu ro, brab i aféye énda méfandaén.

<sup>49</sup> “Atin i aféye fédiyoén moso dob kéluhanane ségiléw bé timuse fédiyoén dob amaéne.

<sup>50</sup> “I timuse fiyo, non émféfiyo bé amaéne. Endob buluk mékédan i kétasik ne, éndaén i nonoméni brab éndaén géséfule i kétasik ne. Atin ségiléw so bé ni, i de rigoné kom fatut géring bé timuse inok émféfiyo gom bé de étéw. Atin békén fatut sékérit gom.”

## 10

### *Fantag bé késégélake*

<sup>1</sup> Tidéw béno, ménagéw i Jesuse tidéw Kafarnaum mangéy dob sakuf i dakéle ingéd Judea brab dob difar i wayége Jordan. Atin diyo médooy de ménangéy sélimud man dob Beene. Atin ténoroén bero loo bé adat ne.

<sup>2</sup> Atin wén i de Fariseo ménangéy dob Jesuse inok téngkadé ro inok gébéhéno noy békéne katabuwan. Mélaw fénénginsaa ro maro, “Aw fakay dob kitab tome ké i lagéye gélaké noy bawag ne?”

<sup>3</sup> Atin séménumbul i Jesuse mano, “Ati sugu Moisesé dob kitabe fantag bé késégélake?”

<sup>4</sup> Atin séménumbul i de Fariseo maro, “Ténungkas Moiseséy lagéye gémélak bé bawag ne amuk irayén i sulate bé késégélake.”

<sup>5</sup> Endob ménbéréh i Jesuse dob berowe mano, “I funa Moisesé ténungkasén begom ségélak non métégas i de atur gom. <sup>6</sup> Endob dob féganayo bé kélimbage bé kéilawane, réningoy Tulusey ségétéwe lagéy brab ségétéwe libun. <sup>7</sup> Atin been i niy funay lagéye tagaké noy abay ne brab idéng ne

atin sétafik bé bawag ne. <sup>8</sup> Atin i ruwowe ni gétéw waléy sébaan. Mélaw éndaén ruwo ro gétéw, éndob ségétéw saén. <sup>9</sup> Mélaw buluy fénwaléy i Tuluse sébaan, énda fakayén séfériyaséy étéwe.”

<sup>10</sup> Atin i de kuyug Jesus, amun ménule ro ménahur ro dob lawie bero Jesuse, ménénginsa ro dob Beene fantag bé késégélake. <sup>11</sup> Atin séménumbul mano, “Fiyon atiy lagéye gémélak bé bawag ne atin mawag man ségiyo libun, léménamfa, brab ménsala dob sunguwo bawagén. <sup>12</sup> Atin amuk wén i libun géniakén i bawag ne atin mawag ségiyo lagéy, léménamfa.”

<sup>13</sup> Wén i no sébaan fuweh, wén i do étéw nuwit roy de nga ro dob Jesuse inok féfiyoné no bero. Endob i de kuyugén génlé roy de étéw ni, non marok énda fiyo no ké félugotén i Maistérowe. <sup>14</sup> Endob amun éngitoy réningoy de kuyugén, ménkérit i Jesuse. Atin ménbéréh dob de kuyugén mano, “Fédaya gom i de nga mangéy dob Begéne. Brab kagom alangén bero non i de étéw sémarig loo bé késarig i de ni nga, fégüléwoy Tuluse bero. <sup>15</sup> Béréhé ku begom i toowe, buluk i késarig i ségétéwe békén loo bé késarig i ngae, énda fégüléwoy Tuluse de.” <sup>16</sup> Tidéw béno, sénfifi noy de nga brab ténége noy de uléw ro féfiyoné no bero.

### *I kawasawe étéw*

<sup>17</sup> Atin amun i ro Jesuse méntaus ro magéw, wén i ségétéwe lagéy ménséfégéta mangéy dob Jesuse brab méningkuwéd dob adafa nuwe. Atin ménénginsa mano, “Fiyon Maistéro, ati rigoné kuwe inok gédoté kuy umule magufusa?”

<sup>18</sup> Séménumbul i Jesuse mano, “Sedek fédawété mo Begén fiyo? Enda i ségiyo fiyo saliyo saén bé Tuluse. <sup>19</sup> Gétiga moy de sugu. Kago méméléhu, kago lémamfa, kago ménakaw, kago uretén i dumo muwe bé békéne toow, kago lémiiful, brab fégadato moy boh me brab idéng me.”

<sup>20</sup> Séménumbul i lagéye ni mano, “Maistéro, i kéluhanay de ni nodoro ku tidéw féganay klohu de séna.”

<sup>21</sup> Atin ténéngténg Jesuse brab ménimu de. Atin ménbéréh mano, “Sébaan i kulange beem. Ule go brab fébélyém i kéluhanay éntingayéne kaam atin irayém i kurtae dob de méskinan. Atin mélaw kawasa go moso dob lawayo. Tidéw béno, énggonén, odor go Begén.” <sup>22</sup> Amun énggélingooy étéwe niy ni, énggiton ménwaléy tete i fédéw ne. Atin ménagéw loo bé nan, non toow fo kawasa.

<sup>23</sup> Tidéw béno, i Jesuse méningiling dob de kuyugén brab ménbéréh dob berowe mano, “Toow fo mérégén i kéahur i de kawasa dob kéféguléw i Tuluse.”

<sup>24</sup> Atin i de kuyugén ménggaif ro bé ni bénréh Jesuse. Gido loo, féntaus Jesusey

kébéréh ne mano, “Do kuyug gu, toow fo mérégén i kéahure dob kéféguléw i Tuluse. <sup>25</sup> Mas na mélémuy kéahur i dakéle ayam dob tosong i darume bé ségétéwe étéw kawasa dob kéféguléw i Tuluse.”

<sup>26</sup> Tidéw béno, ménumanan i kégaif i de kuyugén brab ménsébéréh ro maro, “Ati mélaw i de fakay méfukas?”

<sup>27</sup> Atin ténéngténg Jesuse bero brab séménumbul mano, “Amuk dob rigonéy kéilawane saén, énda fo fakayén. Endob i Tuluse gérigono no, non fakay gérigonoy Tulusey kéluhanane.”

<sup>28</sup> Tidéw béno, ménbéréh i Pedrowe mano, “Ténagak gey i kéluhanane atin ménfuray gey Beem.”

<sup>29</sup> Atin bang Jesuse, “Béréhé ku begom i toowe, i ségétéwe témagak bé lawi ne, taloo no de dumo no sétiman idéng, taloo no do lukésén, taloo no do ngaén, taloo no do fantadén inok uretéw noy Fiyowe Uret fantag bé Begéne, <sup>30</sup> gégédot toow na fo médoos bé de ni do gai. Gégédot mératuh takéf bé de lawi, brab dumo no sétiman idéng, brab do lukésén, brab do ngaén, brab do fantadén. Atin saliyyu na bé nan, gédoté noy umule magufusa dob de gai moso. Endob amuk dini séna, férasayén sabaf bé Fiyowe Uret. <sup>31</sup> Endob i de médoos do énggéétah béleewe ni, do géfuray moso. Atin i de médoos do énggéfuray béleewe, waléy do géétag moso.”

*Nuret Jesusey fantage bé kéléhu ne*

<sup>32</sup> Atin i Jesuse beroy de kuyugén, amun diyo ro dob aguwone mangéy dob Jerusalem, ménagéw i Jesuse dob métag ruwe. Atin méngaif i de kuyugén brab ménggilak i de ménfuray bero, non magéw ro mangéy dob Jerusalem. Atin i Jesuse nuwitén man i de fole bra ruwo gétéw do kuyugén, inok sébero-bero saén, brab béréhén beroy ati mérigowe moso dob Beene. <sup>33</sup> Ménbéréh mano, “Fégélingo gom, mangéy tom Jerusalem. Diyo, i Begéne, sani Nga i Kéilawane, irayu dob de odoroy de fadi brab dob de témoro bé kitabe. Atin kukumé ro Begén méléhu. Tidéw béno, atéé ro Begén dob de békén Judio. <sup>34</sup> Atin i de békén Judio, diyangkaé ro Begén, brab duraa ro Begén, brab badasé ro Begén, brab féléhué ro Begén. Endob amuk méifus i téléwe gétérésangan, tébuleu.”

*I ongoté ro Santiagowe brab Juane*

<sup>35</sup> Tidéw béno, i Santiagowe brab Juane, sani de nga Sebedeo, téningé roy Jesuse. Atin ménbéréh ro maro, “Maistéro, wén i ongoté keye dob Beeme rigoné mo.”

<sup>36</sup> Atin bang Jesuse, “Ati kétaya kome rigoné ku begom?”

<sup>37</sup> Atin séménumbul ro maro, “Amuk Beem i méguléwe moso brab mésar go dob saray méguléwe, tungkasém so begye mésar dob

sékulo muwe ségétéw i fingée dob kuwono muwe brab ségétéw i fingée dob biwong me.”

<sup>38</sup> Endob ménbéréh i Jesuse dob berowe mano, “Enda gétiga kom i ongoté kome. Aw gagané kom i de émfasang mérigo dob Begéne séko? Aw gagané kom i kéléhue loo bé mérigowe dob Begéne?”

<sup>39</sup> Atin séménumbul ro maro, “Hoo, gagané key.”

Atin bang Jesuse bero, “Toow, mérasayu fo séko toow, atin mérasay gom so. Atin féléhuénu, atin féléhuén gom so. <sup>40</sup> Endob békén Begén i mémilie bé ati mé sare fingé dob kuwono kuwe taloo no fingé dob biwong guwe. I de ni saran kay de étéw fénéмили i Abay guwe Tulus mé sar diyo.”

<sup>41</sup> Atin i de folo gétéw dumo do kuyugén, amun énggélingoo roy ni ongoté ro Santiagowe brab Juane, ménkerit ro bero. <sup>42</sup> Mélaw ténawag Jesusey kéluhana ruwe inok sélimul ro, brab ménbéréh dob berowe mano, “Gétiga kom i de étéw kun odoron, wén i atura ro bé de étéw brab méguléwon bero. <sup>43</sup> Endob békén loo bé niy begome. Amuk wén i ségétéw begom méuyot waléy odoron, fatut waléy sugu-suguéy kéluhanay de dumo no. <sup>44</sup> Atin amuk wén i ségétéw begom méuyot waléy gérotor, fatut térifantad. <sup>45</sup> Non fiyon i Begéne sani Nga i Kéilawane, énda ménangéyuni dini inok wén i do sugu-sugué ku. Yamula ménangéyuni dob duniyae ni inok waléyuni sugu-suguén brab inok iray guy umul guwe fégefukas bé médoowe étéw dob de sala ro.”

*Nuwa Jesusey langaféne*

<sup>46</sup> Atin énggumah i ro Jesuse dob ingéde Jeriko. Atin amun méntaus ro ménagéw tidéw diyo beroy dakéle do ménlimud étéw, ténaraa roy ségétéwe étéw langafén ménsar dob doror i aguwone mongot limus. I dawét ne Bartimeo, nga Timeo. <sup>47</sup> Atin amun énggélingoo noy Been i Jesuse tidéw Nasaret témara, téménawag métanug mano, “Jesús, séfu Datu Dabid, fégedaw go begén!”

<sup>48</sup> Médooy de étéw génlé ro maro, “Kago selekén!” Endob taus so mékes toow na fo métanug mano, “Séfu Datu Dabid, fégedaw go begén!”

<sup>49</sup> Atin téménrén i Jesuse brab ménbéréh mano, “Tawag gom i étéwa nan.”

Mélaw ménbéréh ro dob langaféne ni maro, “Oror go! Tindég go non tawagé Jesuse beem.”

<sup>50</sup> Mélaw kéndá noy géruwome lafin bé kégal ne brab ménagayas téménindég brab ménagéw mangéy dob Jesuse.

<sup>51</sup> Atin fénénginsaa Jesuse mano, “Ati kétaya muwe rigoné ku dob beeme?”

Séménumbul i langaféne ni mano, “Maistéro, méuyotu ké gégitowu damén.”

<sup>52</sup> Atin ménbéréh i Jesus mano, “I kéféginugut mey funa muwe ménadi-adi. Na, ule gon.” Sonom béno, énggégito nén i lagéye ni, atin ménfuray bé Jesuse dob aguwone.

## 11

### *I kéahur Jesuse dob Jerusalem*

<sup>1</sup> Amun i Jesuse brab de kuyugén gédét ron dob ingéde Jerusalem, énggégumah ro dob sébaane tuduk féndawét Olibo, gédét dob de ingéd féndawét Betfage brab Betania. Atin sénugu Jesusey ruwowe gétéw bé de kuyugén inok métah ro magéw. <sup>2</sup> Atin ménbéréh dob berowe mano, “Taus gom agéw mangéy dob nan ingéd gésaréwo kom. Buluk gégumah gom diyo, gito gom i natiwe kuda nikét, énda sénay énggékuda de. Ukoh gom brab uwit gom dini. <sup>3</sup> Buluk wén i ménginsa dob begome, ‘Sedek rigoné kom i ni?’ béréh gom de, ‘Kailangay Kadna tome, atin féséfuleén so magad.’”

<sup>4</sup> Mélaw ménagéw ro brab énggito roy natiwe ni kuda dob no ingéd, diyo dob aguwone nikét dob béngaway sébaane lawi. Amun nukoh ron, <sup>5</sup> i de étéw diyo ménénginsa ro maro, “Sedek ukohé kom i kudda nan?”

<sup>6</sup> Atin séménumbul ro loo bé kébéreh Jesuse de bero. Mélaw fénnagéw i de étéw bero muwit bé natiwe ni kuda. <sup>7</sup> Atin nuwit ro mangéy dob Jesuse. Brab namfénro ro bé de kégal ro. Atin kénudda Jesuse. <sup>8</sup> Atin médooy de étéw bénékah roy de dumo bé de kégal ro dob aguwone Jesuse féngito roy kébasana ruwe de. Atin wén soy de étéw bénékah roy de daun kénléng ro dob de kayéw dob de safad. <sup>9</sup> Atin i de méntah do étéw brab de ménfuray, ménkes ro maro, “Dayéwé tom i Tuluse! Féfiyonéy Tuluse damén i ni étéw gégumah tidéw dob Kadnane. <sup>10</sup> Féfiyonéy Tuluse damén i kéféguléw ne émfétaus bé kéféguléw i séfu tome Datu Dabid. Dayéwé tom i Tuluse!”

<sup>11</sup> Atin méntaus i ro Jesuse mangéy Jerusalem. Amun énggumah ro diyo, ménangéy i Jesuse dob lawi i Tuluse. Atin amun énggilidén ténéngténgén i kéluhanay de languntaman diyo, ménsut atin ménséfule mangéy Betania beroy de folo bra ruwo gétéw kuyugén, non témégénén.

<sup>12</sup> Atin dob sébaane de fuweh, bé lala ruwe magéw tidéw Betania mangéy Jerusalem, mélayaf i Jesuse. <sup>13</sup> Atin énggékulaya no tidéw mérayu i kayéwe féndawét igos méramfung i dau nuwe. Mélaw nangyéén lénangu kinok wén i onokén. Endob amun énggumah, énda i ségiyo énggito no saliyo bé de dau no, non békén séna gaiyo no do kayéw igos mégonok. <sup>14</sup> Atin ménbéréh dob ni kayéw mano, “Tidéw béleewe ni, éndaén i géama

bé onok me féruman.” Atin énggélíngooy de kuyugén.

### *Dénédel Jesusey de démagang dob lawi i Tuluse*

<sup>15</sup> Amun énggumah i ro Jesuse dob Jerusalem, méntaus so dob lawi i Tuluse. Amun ménahur, dénédelén i de étéw démagang brab do méléy-méléy diyo. Atin bényluweén i de ahayay de lémuluk kurta brab ténuwarén i de saray de émfébély do féngétulak do marafati. <sup>16</sup> Atin énda fédayaé no de ké wén i étéw muwit do éntingayén témara dob fésayaway lawi i Tuluse ni. <sup>17</sup> Atin ténoroén i de étéw mano, “Ménsulat dob Ménsulate Kébéreh i Tuluse mano, ‘I lawi guwe, fédawétén lawi gonon démasal kay kéluhanay de étéw.’ Endob fénnwaléy gom lawi i de ménakaw.”

<sup>18</sup> Atin i de odoroy de fadi brab de témoro bé kitabé énggélíngooy roy ni. Mélaw sénalikél roy fiyowe kéféléhu ro de. Non ménggilak ro bé Jesuse non ménggaif i de ni médo do étéw bé kétoro ne.

<sup>19</sup> Atin amun sémingkufén, méntékédan i Jesuse brab de kuyugén tidéw dob Jerusalem.

<sup>20</sup> Atin bé géfuwéne de, bé lala ruwe magéw dob aguwone, énggito roy kayéwo no féndawét igos ménggangu taman dob de darirén. <sup>21</sup> Atin i Pedrowe, énggétédemo noy ati ménrigowe. Mélaw ménbéréh dob Jesuse mano, “Maistéro, téngténgem. I kayéwo diyo fénnémulaém, ménggangu.”

<sup>22</sup> Atin bang Jesuse, “Sarig gom dob Tuluse. <sup>23</sup> Béréhé ku begom i toowe, fiyon udenén méréhon bé tuduke ni mano, ‘Angéy go dob dogote’, atin énda ruwo-ruwoy féféw ne, endob ménginugut bé kébéreh ne méagéwon, méagéwon ba. <sup>24</sup> Mélaw béréhé ku begom, fiyon udenén ongoté kom ké démasal gom, fénginugut gom bé gédoté kom, atin gédoté kom ba. <sup>25</sup> Atin amuk démasal gom, fénsagada kom i étéwe ménsala dob begome, inok i Abay gome Tulus fénsagada no soy de sala gom. <sup>26</sup> Non amuk énda fénsagada kom i de dumo gom, i Abay gome dob lawayo, énda so mon fénsagada no begom bé de sala gom.”

<sup>27</sup> Atin ménséfule man i ro Jesuse dob Jerusalem. Atin amun diyo sémnugud i Jesuse dob lawi i Tuluse, i de odoroy de fadi brab de témoro bé kitabé brab de odoroy de Judio, ménféngédét ro dob Jesuse. <sup>28</sup> Atin fénnénginsaa ro maro, “Béréhé begey ké ati atura muwe rémigo bé de ni? Ati méniraye Beem kuwagib?”

<sup>29</sup> Sénumbulu Jesuse bero mano, “Sémuliu ménginsa dob begome. Amuk sénumbulu gom, sénumbulu so ké ati tidéwoy kuwagib guwe rémigo bé de ni. <sup>30</sup> Béréh gom Bégen, ati sémnugue bé Juane inok mautis, Tulus loo ké étéw saén?”

<sup>31</sup> Atin i de odoroy de Judio séédél ro maro, “Amuk béréhé tom ‘Tidéw dob Tuluse’, fénginsaa no betom ké sedek énda féngintooow tom i Juane. <sup>32</sup> Endob buluk béréhé tom, ‘Tidéw dob étéwe’, mékérít i de étéw betom.” Non mégilak ro bé de étéw non féngintooow de étéw i Juane sénarigoy Tuluse muret bé kébéreh ne. <sup>33</sup> Mélaw séménambul ro dob Jesuse maro, “Enda gétiga key de.”

Mélaw bénréh Jesuse mano, “Enda so béréhé ku de begom ké ati ménirayane Begén kuwagib rémigo bé de ni rigoné ku.”

## 12

### *I binuwayae fantag bé de tete témalima*

<sup>1</sup> Tidéw béno, téménoro man i Jesuse binuwaya. Ménbéréh mano, “Wén i ségétéwe étéw wén i safadén nohoko no do ubas. Atin bénunsudo no kayéw féngélangkatén de lémiwét, brab kéménalut féngonon bé fégékérése bé wayég i de onokén. Brab réménigo tambala. Tidéw béno, féntalimaén bé de ségiyo étéw, brab ménagéw mangéy dob mérayue ingéd. <sup>2</sup> Amun énggégumah i gaiy kékétéwe de, séménugu ségétéw sugu-sugué no inok gédoté noy kaane de baad bé de onokén. <sup>3</sup> Endob i de témalima bé ni safad génamak ro brab lénubag roy ni sugu-suguén. Brab fénule ro énda i suwaréw nuwitén. <sup>4</sup> Tidéw béno, i gefee bé safade sénugu non man i géruwowe sugu-sugué no. Endob i de témalima bé safad ne, fénali roy uléw ne brab fénémala ro. <sup>5</sup> Tidéw béno, i gefee sénugu non man i gétéléwe sugu-sugué no. Endob i de témalima bé safad ne, fénléhu ro. Loo so bé noy kérgo ruwe bé de médoow do sugu-suguéy gefee bé safade ni. Wén i do lénubag ro de, wén soy dob fénléhu ro de. <sup>6</sup> Tidéw béno, i gefee bé ni safad, wén nay ségétéwe sénuguén, sani kénimuo nuwe ngaén lagéy. Mélaw sénuguén mangéy dob berowe non féngitugén mano, ‘Fégadata roy nga guwe.’ <sup>7</sup> Endob amun énggitoy de témalima bé safad ne, ménsébéreh-béreh ro maro, ‘Been i niy nga i gefee bé ni safad. Féléhu tom inok gékatom i ni safad.’ <sup>8</sup> Mélaw génamak ro atin fénléhu ro, brab nibér ro dob liyuy safade ni.”

<sup>9</sup> Atin féntaus Jesusey kébéreh ne mano, “Ati rigonéy gefee bé safade ni dob de ni téménalima bé safad ne? Angyé no féléhuén bero. Brab irayén man dob ségiyowe témalima. <sup>10</sup> Aw énggébasana kom i ni Ménsulat Kébéreh i Tuluse mano, ‘I batéwe nikaay de réménigo bé lawie, been i ménwaléye toow na fo ballilaga fiyo batéw. <sup>11</sup> I ni réngigoy Kadnane ula-ula, atin mégaif tom de.’”

<sup>12</sup> Atin i de odoroy de Judio, ténulama ro kénéfo i Jesuse non énggébéla dob berowey

ni binuwaya. Endob énda fakayén non mégilak ro bé de médoow do étéw. Mélaw ténagak roy Jesuse brab ménagéw ro.

### *Fantag bé buwiese*

<sup>13</sup> Tidéw béno, i de odoroy de Judio sénugu roy de Fariseo brab de kuyug Herod mangéy dob Jesuse inok téngkadé ro émbéréh bé békéne katabuwan. <sup>14</sup> Mélaw ménangéy ro dob Jesuse ménginsa maro, “Maistéro, gétiga key toow i kétoor me. Brab métintu go, énda i isu ramigo mo bé de étéw. Endob tooré moy toowe fantag bé kétayag Tuluse toow. Mélaw béréhéme begéy, aw fatut ba mayad gey buwis dob Sesare sani datue dob Roma taloo no énda?”

<sup>15</sup> Endob énggétiga Jesusey akar ruwe, mélaw bénréhén bero mano, “Sedek férudio kom Begén? Uwitonu sélafin félatah, brab féténgténg gom Begén.”

<sup>16</sup> Amun niraya ro de, ménénginsa i Jesuse mano, “Ati gefee dawét brab falas gito gom dob nan?”

Séménambul ro maro, “Ka Sesar.”

<sup>17</sup> Tidéw béno, bénréh Jesuse mano, “Iray gom dob Sesarey ka Sesare. Atin iray gom dob Tulusey kay Tuluse.” Atin toow ro fo ménggaif bé kébéreh Jesuse ni.

### *Fantag bé kétébulee*

<sup>18</sup> Atin wén i de Saduseo ménangéy ro dob Jesuse. I de Saduseo do étéw énda méngintooow ro bé kétébulee i Tuluse bé de étéw moso. <sup>19</sup> Atin ménénginsa ro dob Jesuse maro, “Maistéro, sénulat Moisee betom i kukumane bé buluk i ofo i étéwe ménléhu, brab énggéfélédo noy bawag ne, énda i nga ro, fatut bawagéy tuwaréy ne inok wén i séfu i ni étéw bé tuwaréy ne. <sup>20</sup> Ufama, wén i fitéw gétéw sétuwaréy falan lagéy. Brab i ofoe de ménawag. Tidéw béno, ménléhu énda i nga ro. <sup>21</sup> Tidéw béno, i géruwowe de bénawagén soy bawage fénelé i ofo ne. Atin ménléhu so énda soy nga ro. Ségiléw soy ménrigowe dob gétéléwo ruwe. <sup>22</sup> Atin ségiléw so dob kéluhana ruwe. I fitéwo no gétéw énggébawaga roy ni libun éndob ménléhu ro kéluhanan énda i nga ro. Tidéw béno, ménléhu soy ni libun. <sup>23</sup> Mélaw bé gaiy kétébulee i kéluhanay de étéw moso, ati isuwe bawag i ni libun bé ni fitéw gétéw sétiman idéng? Non énggébawaga no bero kéluhanan bé méuyag ro de séna?”

<sup>24</sup> Séménambul i Jesuse mano, “Toow fo békén katabuwan i kéfégitung goma nan, non énda gétiga kom i de Ménsulat Kébéreh i Tuluse taloo noy barakat ne. <sup>25</sup> Non amuk tébulee i de étéw, éndaén sébawag ro. Non ségiléw ro bé de télaki diyo dob lawayo. <sup>26</sup> Atin i fantage bé kétébulee, aw énda énggébasana kom de dob librowe sénulat Moisee fantag bé mérinoe kayéw? Non diyo ménsulat i bénréh i Tuluse dob Moisee

mano, 'Bégén i Tuluse féngadafé Abrahame, Isake, brab Jakobe.' <sup>27</sup> I atag i ni, i Tuluse féngadaféy de méuyag étéw, békén do ménléhu. Mélaw tintu békén katabuwan i kékégitung gome."

*I toowe na fo gérotor sugu*

<sup>28</sup> Diyo soy ségétéwe témoro bé kitabe brab énggélíngoo noy de ni do étéw séédél bé Jesuse. Atin amun énggétiga noy toow fo fiyoy késumbulo Jesuse bé de Saduseo, ménfégedét dob Jesuse brab ménénginsa mano, "Ati isuwe bé de sugu dob kitabe toow na fo méлага?"

<sup>29</sup> Atin séménumbul i Jesuse mano, "Ay niy toowe na fo méлага sugu: 'Féglíngoo gom do Judio, i Kadna kome Tulus sébaan saén. <sup>30</sup> Féimu go bé Kadnane Tulusém bé kéluhanay fédéw me, brab bé kéluhanay kamatu me, brab bé kéluhanay itunga muwe, brab bé kéluhanay bagér me.' <sup>31</sup> Atin ay niy géruwowe sugu: 'Féimu go bé de dumo mo ringon so bé kéimu me bé kaame lowoh.' Enda i ségiyo sugu gérotor na bé de ni."

<sup>32</sup> Atin ménbéréh i témoroé bé kitabe dob Jesuse mano, "Fiyoy kébéréh ma nan, Maistéro. Toow i no bénréhémm sébaan saén i Tuluse brab énda i ségiyo saliyo bé Beene. <sup>33</sup> Atin fatut féimu tom bé Tuluse bé kéluhanay fédéw tome, brab bé kéluhanay itunga tome, brab bé kéluhanay bagér tome, brab fatut féimu tom bé de dumo tom ringon so bé kéimu tome bé de katome lowoh. Toow na méлага i de ni ruwo sugu bé kéluhanay ténuwége ténulak do ayam brab do nirayén dob Tuluse."

<sup>34</sup> Atin énggétiga Jesusey fiyoy késumbul i ni lagéy. Mélaw ménbéréh dob ni lagéy mano, "Magad saén i kékégluléwoy Tuluse beem." Atin tidéw béno, énda nay ségétéw ménbaraw ménénginsa dob Beene.

<sup>35</sup> Amun téméno i Jesuse dob lawi i Tuluse, ménénginsa mano, "Ati kéfanu-fanu nuwe ké béréh i de témoro bé kitabey Kristowe séfu Dabid saén? <sup>36</sup> Non fénbéréh i Rémogor i Tuluse bé Dabide mano, 'I Kadnane ménbéréh dob Kadna kuwe, sar go dob kuwono kuwe, taman témabanu bé de sébanil Beem.' " <sup>37</sup> Atin féntaus Jesusey kébéréh ne mano, "Amuk féndawét Dabidey Kristowe 'Kadnan', ati kéfanu-fanu Kristowe séfu Dabide saén?"

Atin i dakélé ménlimud do étéw ménoror ro méglíngoo bé kétoro Jesuse. <sup>38</sup> Atin ténoroén bero mano, "Ingat gom bé de témoro bé kitabe non méuyot ro sugud-sugud bé de toow fo fiyo kégal ro, brab méuyot ro fégadatan ségifaén dob de fadiyan. <sup>39</sup> Brab méuyot ro mésar dob de fiyo saran dob de lawi féngadafan brab dob de kanduli. <sup>40</sup> Endob lafisé roy de libun baléw inok afasé roy de lawi ro. Tidéw béno, démasal ro bé

de métaah kédasal dob téngaangay de étéw non marok médirung i de ni tete rigné ro. Endob i ni do étéw toow na fo gétimal ké mékukum ro moso."

<sup>41</sup> Wén i no sébaan fuweh, amun diyo i Jesuse dob lawi i Tuluse, ménsar gédét dob ahurone kurta. Atin ténéngténén i de étéw lémwawu bé kurta ruwe. Médooy de kawasa do étéw lémnawu ro médooy kurta. <sup>42</sup> Tidéw béno, énggito no soy ségétéwe libun baléw méskinan. Enggumah i ni baléw brab méniray saén ruwo lafin furo kurta tintu énda balilagaén. <sup>43</sup> Atin i Jesuse ténawagén i de kuyugén mangéy dob Beene, brab mano bero, "Béréhé ku begom i toowe, i ni méskinan libun baléw maak mas na médooy niray ne bé kéluhanay de dumo étéw kawasa. <sup>44</sup> Non i de ni étéw do kawasa, méniray ro saén kloh tidéw dob de médooy kurta ro. Endob i ni baléw éntéyén i kéluhanay kurta ne fégefaguyagén."

## 13

*Fantag bé tamfaday duniyae*

<sup>1</sup> I lala Jesuse mésut tidéw dob lawi i Tuluse, i ségétéwe bé de kuyugén ménbéréh dob Beene mano, "Téngténém, Maistéro. Toow fo dakél i de ni batéw fénggérigo bé de lawi i Tuluse ni, mélaw toow fo fiyoy de ni lawi."

<sup>2</sup> Endob ménbéréh i Jesuse mano, "I de dakél ni do lawi, gégumah mosoy gaiwe i kéluhanane gito gom mébinasa. Brab fiyon i de batéw fénggérigo de, émbéragar ro."

<sup>3</sup> Atin amun diyo i ro Jesuse ménsar dob Tuduke Olibo, dob gatagay lawi i Tuluse, fénénginsaa ro Pedrowe brab Santiagowe brab Juane brab Andrese sébero-bero saén. <sup>4</sup> Ménénginsa ro dob Jesuse maro, "Kédiron mérigoy de ni, sani kébinasay lawi i Tuluse? Brab ati fégélolonone de bé ni gai ké gédétén gégumah?"

<sup>5</sup> Atin séménumbul i Jesuse mano, "Ingat gom inok énda i méfagakaran begom. <sup>6</sup> Non médooy mosoy de étéw gégumah usaré roy dawét guwe, brab émbéréh ro maro, 'Bégéney Kristowe'. Atin médooy de géfagakara ro. <sup>7</sup> Atin kagom mégilak ké gélingoo kom i de sétiboh brab fantag bé de gira. I kéluhanay de ni mériigo, éndob békén sénay niy tamana nuwe. <sup>8</sup> I de ségiyo ingéd sétiboh ro bé de ségiyo ingéd. Brab i de ségiyo sakuf fangangaturan sétiboh ro bé de ségiyo. Atin wén mosoy do luba dob de médooy do gonon, brab lénggob. I de ni mériigo ségiléw bé ségétéwe obor libun kéararan non been sénay niy féganay rasay ne.

<sup>9</sup> "Endob ingat gom, non kéfoén gom moso brab uwitén gom dob adafay de kékukum. Atin mébadas gom moso dob de lawi féngadafan kay de Judio. Brab uwitén gom dob adafay de datu brab do méguléw



inok kukumén gom sabaf begom i do kuyug gu. Endob been i niy gaiy kéuret gome bé Fiyowe Uret dob berowe. <sup>10</sup> Atin bé énda séná gégumah i tamanane, i Fiyowe Uret kailangan uretén na métaf dob kéluhanay ingéde. <sup>11</sup> Atin amuk kéfoé ro begom brab uwitén gom dob adafay kémukume, kagom émbuku fantag bé atiy késumbul gome. Non amuk diyo gomén, béréh gom saén i atiy iraye dob begome fatut késumbul gom. Non i kébéréh gome bé béno, békén tidéw dob de itunga kom. Yamula fébéreh i Rémogor i Tuluse begom. <sup>12</sup> Atin bé béno, wén i do étéw iray roy de dumo ro sétiman idéng inok féluhuén. Loo so bé niy rigoNEY de lukés, féféluhu roy de nga ro. Loo soy de nga féféluhu roy de lukés ro. <sup>13</sup> Atin i kéluhanay de étéw mérarék begom sabaf bé kéunur gome Begén, éndob ati fédaydaye munur taman dob tamfadane, beeney méfukase.

<sup>14</sup> “Atin gito gom i ‘Mékésirang-sirange Surga’ diyo dob mékétéfuwe gonon békén fatut gonon. (Fégésobut i masawe.) Amuk mérigoy ni, i de étéw bati dob Judea, fatut ro méraréy dob de tuduk. <sup>15</sup> Atin bé béno, i étéwe diyoén dob liyuy lawi ne, éndaén fatutén séminggula bé urase mahur dob lawie inok uwité noy de tamukén. <sup>16</sup> Atin bé béno, i étéwe diyo dob safad ne, éndaén fatutén mule inok angéyé noy géruwowe lafin kégalén. <sup>17</sup> Bé do no do gai, toow fo mékégedaw-gédaw i de libun obor brab de libun mériton. <sup>18</sup> Dasala kom inok énda mérigoy de ni dob gaiwe mélégénéy. <sup>19</sup> Non bé no do gai, toow na fo géttimal i kérasay i de étéw, sani kérasaye énda sénay énggéagéw de tidéw féganay bé kélimbag i Tuluse bé duniyae taman so béleewe ni. Atin énda na moso i géréféng de. <sup>20</sup> Atin amuk énda féfokoéy Kadnaney do no gai, énda nay kéilawan méuyag. Endob sabaf bé de fénémilién do étéwén, féfokoé noy do no gai.

<sup>21</sup> “Atin amuk wén i émbéréh dob begome mano, ‘Téngténg gom, ay niy Kristowe!’ look ‘Téngténg gom, ay diyoo!’ kagom unuron de. <sup>22</sup> Non wén i do tugién do étéw gégumah brab béréhé ro bero kun i Kristowe taloo no sarigoy Tuluse. Atin gérigo ro do mékégaif brab do tanda, inok fégakara roy de fénémili i Tuluse do étéw ké fakay. <sup>23</sup> Mélaw ingat gom. Bénréh gun begom i kéluhanay de ni bé énda séná mériGO no.

<sup>24</sup> “Bé do no gai moso, amuk gilid i dakéle ni késélibug, waléy délémon i térésange brab éndaén réméndaw i térésang kélungonone. <sup>25</sup> Atin i de gitoon médagdag ro tidéw dob lawayo, brab i de éntingayén dob lawayo mékuyung. <sup>26</sup> Tidéw béno, i Nga i Kéilawane, sani Begéne, téfégitowu tidéw dob lawayo dob de rawén toow fo barakatan brab réméndaw. <sup>27</sup> Atin sugué kuy de télaki gu

mangéy dob séngae gonon dob duniyae ni. Atin séfélimudé kuy de fénémili i Tuluse do étéw tidéw dob tamanay fantade brab dob lawayo.”

<sup>28</sup> Tidéw béno, nuret Jesuse beroy ni binuwaya mano, “Fégitung gom i de kayéw. Dini dob betome ni, sonom lémbud i de fongoy kayéwe brab émféantu daun, gétiga kom gédétén i basa médufe. <sup>29</sup> Loo so bé ni amuk gito gom i de ni bénréh gu bé gétahe mériGO, gétiga kom gédétén i késéfule guwe. <sup>30</sup> Béréhé ku begom i toowe, i de étéw méuyag béni, énda méléhu ro taman mérigoy de ni. <sup>31</sup> I lawaye brab fantade méalfa, éndob i kébéréh guwe énda méalfaén.

<sup>32</sup> “Endob i gaiwe mérigoy de ni, énda i gétigan de, fiyon foy de télaki dob lawayo, fiyon i Begéne, sani Nga i Tuluse. I Abaye Tulus saén i gétigane de. <sup>33</sup> Ingat gom, brab tulik gom, non énda gétiga kom de ké kédiron i kégumah i ni gai. <sup>34</sup> Ségiléw bé ségétéwe ménagéw tidéw dob lawi ne mangéy dob ségiyowe ingéd. Atin sénarigén i lawi ne dob de sugu-sugué no. Mélaw wén i galbék fatut rigoNEY de sugu-sugué no. Atin bénréhén dob sugu-sugué nuwe dob béngawane mantay brab békén fidong. <sup>35</sup> Mélaw ingat gom, non énda gétiga kom i gaiwe séfuleu, ségiléw bé de sugu-suguén énda gétiga roy gaiwe séfule i gefee bé lawie, ké témégén, look kérarra kélungonon, look ukoro i de manok, look géfuwén. <sup>36</sup> Kinok métékow i kégumah ne atin gito no bero fidong. Enda fatut mériGO no dob begome. <sup>37</sup> Mélaw béréhé ku begom brab dob de kéluhanay de étéw so: Tulik gom.”

## 14

<sup>1</sup> Bé béno gai, ruwo séden gétérésangan i méifuse tidéw béno gégumah i kékanduli i de Judio féndawét “Témara”. Bé no kanduli, amaé roy fane énda i fénggéféeruk de. Atin i de odoroy de fadi brab de témoro bé kitabe séléde roy ati kékéfo ruwe bé Jesuse brab féluhé ro. Endob méuyot ro de rémigo ké énda gétigay de ségiyo de étéw. <sup>2</sup> Ménsébéreh ro maro, “Enda fakayén ké rigoNÉ tom ké kanduli tom, kinok méсылibug i de étéw.”

<sup>3</sup> Wén i no sébaan fuweh, diyo i Jesuse dob Betania dob lawi i ségétéwe lagéy féndawét Simon. I ni lagéy ménadi-adi bé déruene fémuté. Amun mama ro, énggumah i ségétéwe libun uwitén i fiyowe katiya ménféno bé mamute nor toow fo balilaga féndawét nardo. Atin ménfégédét dob Jesuse brab rénébéen i reer i katiyae ni atin lénukaén i nore ni dob uléw Jesuse. <sup>4</sup> Atin i de dumo bé de étéw diyo, amun énggito roy ni, ménkérit ro brab ménsébéreh ro maro, “Sedek séninggula saén i nan fégéféamut? <sup>5</sup> Non amuk fénbéléy damén i nan nor, wén

i médoos kurta gédotén de brab iray damén dob de méskinan.” Atin nugar roy ni libun.

<sup>6</sup> Endob ménbéréh i Jesuse mano, “Fédaya gom i ni libun. Sedek dowoyé kom? Toow fo fiyoy ni rénigo no dob Begéne. <sup>7</sup> Démoyun gom gésébegom i de méskinan, atin fakay gom témabang bero do dob gaiwe kétaya kom. Endob i Begéne, éndaén mérugayu bati dini dob begome. <sup>8</sup> I ni libun, rénigo noy gagané nuwe. Lénulawa no fégeféamut i lowoh guwe inok métafayan i kélébéngé Begén. <sup>9</sup> Béréhé ku begom i toowe, fiyon udenén gonon dob duniyae urret i Fiyowe Uret, i rénigo nuwe dob Begéne méuret so funa no métédém.”

### *I rénigo Judase*

<sup>10</sup> Tidéw béno, i Judas Iskariote, sani ségétéwe bé de folo bra ruwo kuyug Jesuse, ménangéy dob de odoroy de fadi inok sébéhé bero bé ati kékékéfoe bé Jesuse dob berowe. <sup>11</sup> Atin toow ro de fo ménoror, brab fénasada ro iraya ro kurta i Judase. Mélaw sénlédén i fiyowe gai kékéfo de.

<sup>12</sup> Dob sunguwe gai bé kandulie féndawét “Témara” taloo na “Kéama bé Fane Enda i Fénggéféeruk de”, bé béno gai fatut ro sénumbali nati bili-bili fégékanduli ro. Mélaw i de kuyugén ménénginsa ro dob Jesuse maro, “Hon i gonone kétaya mo tafayé key i amaé muwe bé ni kanduli ‘Témara’?”

<sup>13</sup> Tidéw béno, sénuvu Jesusey ruwowe bé de kuyugén mano, “Agéw gom mangéy Jerusalem. Diyo wén i ségétéwe lagéy ménuwit ségébinangga wayég gébalaka no begom. Furay gom de. <sup>14</sup> Atin amuk mahur dob lawie, ahur gom so. Brab béréh gom dob gefee bé lawie makom, ‘Méuyot i Maistérowe de ké gétiga no hon i sibéye de gono no mama beroy de kuyugén bé ni kékanduli.’ <sup>15</sup> Atin i gefee bé lawie toroé no begom i dakéle sibéy wén i do ténafay do kasangkafan dob rotor i lawie. Diyo tafay gom i kéluhanay amaé tome.”

<sup>16</sup> Tidéw béno, ménagéw i de ruwo ni gétéw do kuyugén brab ménahur ro dob Jerusalem. Atin énggito roy kéluhanane loo bé kékéréh Jesuse de bero. Tidéw béno, ténafay roy de amaé ro kay kandulie “Témara”.

<sup>17</sup> Atin amun sémingkufén, énggumah diyo i Jesuse beroy de folo bra ruwo gétéw kuyugén. <sup>18</sup> Amun ménsar ro mama dob doror i ahayane, ménbéréh i Jesuse mano, “Béréhé ku begom i toowe, wén sékoy ségétéw begom émfékéfo Begén, sani ségétéwe séréngan Begén mama.”

<sup>19</sup> Tidéw béno, ménwaléy tete i fédéw i de kuyugén. Atin ménsétundug-tundug i séngae ségétéw bero ménénginsa dob Jesuse mano, “Békén begén, hay?”

<sup>20</sup> Atin sénumbulo Jesuse bero mano, “I beene ségétéw begom do folo bra ruwo gétéw kuyug gu, sani ségétéwe begom

séréngan Begén mérém bé fa nuwe dob biléwe. <sup>21</sup> I Begéne, sani Nga i Kéilawane, méléhuu loo bé Ménsulate Kékéréh i Tuluse fantag bé Begéne. Endob toow fo mékégedaw-gédaw i étéwe ni émfékéfo Begén. I nan étéw, mas na fiyo dob beene ké énda damén ménumahén, non mékukum fo toow.”

### *I kéama i Kadnane*

<sup>22</sup> Atin bé lala ruwe mama, éndot Jesusey fane, brab ménfésalamat dob Tuluse, brab sénkébéng-kébéngén, brab sénaarén dob de kuyugén. Atin ménbéréh mano, “Ay niy fane. Been i lowoh guwe. Ama gom.”

<sup>23</sup> Tidéw béno, éndotén i tabue, brab ménfésalamat dob Tuluse, brab nirayén bero. Atin kéluhana ro méniném de. <sup>24</sup> Atin ménbéréh i Jesuse mano, “I ni arak, been i dara guwe réménanas sabaf bé médoowe étéw. Been i niy tanda i fasad i Tuluse bé de étéwén. <sup>25</sup> Béréhé ku begom i toowe, éndaén minénu arak taman géinénu mantu arak dob gaiwe féguléwoy Tulusey de étéwén.”

<sup>26</sup> Tidéw béno, kéménanta ro sébaan kanta démayéw bé Tuluse. Tidéw béno, ménagéw ro mangéy dob tuduke Olibo.

### *Nuret Jesusey fantage bé Pedrowe*

<sup>27</sup> Atin bang Jesuse dob de kuyugén, “I kéluhana kome méraréy séko tagaké kom Begén. Non wén i Ménsulate Kékéréh i Tuluse mano, ‘Féléhué kuy témalimae bé de bili-bili, atin mélaw mésébéragar i de bili-bili.’ ” <sup>28</sup> Atin féntaus Jesusey kékéréh ne mano, “Endob amuk tébuleu, métaahu magéw begom mangéy dob Galilea.”

<sup>29</sup> Atin bang Pedrowe, “Enda fo tagaké ku Beem, fiyon fo ké i kéluhanay de ségiyo kuyugén méraréy ro tagaké ro Beem.”

<sup>30</sup> Endob ménbéréh i Jesuse dob Pedrowe mano, “Béréhé ku beem i toowe, bé ni kélungonon, bé énda séna ukoro i férufete ruwo gule, dirungé mo Begén téléw gule bé énda gélolo mo Begén.”

<sup>31</sup> Atin ménbéréh man i Pedrowe toow na fo méégét mano, “Fiyon fo ké géodoru Beem méléhu, énda dirungé ku Beem.” Atin i kéluhanay de dumo no do kuyug ménbéréh loo bé nan dob Jesuse.

<sup>32</sup> Tidéw béno, ménagéw i ro Jesuse dob gonone féndawét Getsemani. Amun énggumah ro, ménbéréh i Jesuse dob de kuyugén mano, “Sar gom dob ni bé lala guwe démasal.” <sup>33</sup> Tidéw béno, nuwit Jesusey ro Pedrowe, Santiagowe, brab Juane, atin méntaus ro magéw kloh. Atin ménwaléy toow fo tete i fédéw Jesuse brab ménbuku. <sup>34</sup> Atin ménbéréh dob de ni téléw kuyugén mano, “I fédéw guwe toow fo ménbuku taman toow fo démwawét. Bati gom dini, brab tulik gom.”

<sup>35</sup> Tidéw béno, ménférayu dob berowe gumaha témabar. Atin méntéléngkéb dob

fantade brab déménasal mongot bé amuk fakay saén, énda damén mérigoy ni kérasay dob Beene. <sup>36</sup> Déménasal mano, “Abay, fakay gérigono moy kéluhanane. Mélaw kago fédayaén Begén mérasay séko. Endob i kaame kétayan i mérigowe damén, békén i kagéne kétayan.”

<sup>37</sup> Tidéw béno, ménséfule mangéy dob de téléw ni gétéw kuyugén, atin énggito no bero énggéfidong. Atin ménbéréh dob Simon Pedrowe mano, “Simon, géfidong go? Aw énda wayo gétulik go fiyon ségéuras saén?”

<sup>38</sup> Atin ménbéréh dob berowe téléw gétéw mano, “Tulik gom, brab dasal gom inok énda métukawan gom. Méuyot gom rémigo bé kétaya kuwe, éndob mélubay i de lowoh gom, brab magad géfélis bé de sugu gu.”

<sup>39</sup> Tidéw béno, ménagéw man i Jesuse, brab déménasal so loo bé énggétahe de. <sup>40</sup> Tidéw béno, ménséfule man, brab énggito no bero énggéfidong man, non toow ro fo manat. Atin énda gétiga roy ati fiyowe kébéreh ro dob Jesuse.

<sup>41</sup> Atin ménagéw man i Jesuse atin énda mérugayén tidéw béno, ménséfule dob gétéléw ne gule, brab ménbéréh dob berowe mano, “Aw tafay gom séna fidong brab témérén? Na, énggumahén i urase. Téngténg gom, i Nga i Kéilawane, sani Begéne fékéfo dob de ménsala étéw. <sup>42</sup> Na tek gom, magéw tomén. Téngténg gom, ay nan nén gégumah i émfékéfoe Begén.”

### *I kékéfoe bé Jesuse*

<sup>43</sup> Amun émbéréh sénay Jesuse, énggégumah i Judase, sani ségétéwe bé de folo bra ruwo gétéw kuyugén. Atin ménodor i de médo do étéw sénuugi i de odoroy de fadi brab de témoro bé kitabe brab de odoroy de Judio. Ménuwit ro do sundang brab do bastun. <sup>44</sup> Atin i ménfékéfoe de, sani Judase, bé gétahe niraya noy de étéw fégétigana ro de non bénréhén bero mano, “I étéwe aréké ku, been i no. Kéfo gom brab toow gom fo bantayan bé lala gome de muwit.”

<sup>45</sup> Mélaw amun énggégumah i Judase, ménfégedét dob Jesuse brab ménbéréh mano, “Maistéro.” Atin narékén. <sup>46</sup> Mélaw i de étéw kénéfo roy Jesuse. <sup>47</sup> Endob i ségétéwe bé de kuyug Jesus diyo, rénau noy sundang ne brab ténibohén i riféy gérotore fadi brab ménsilaf i ségéalae bé kélingo ne. <sup>48</sup> Tidéw béno, ménbéréh i Jesuse dob de kéméfo de mano, “Sedek ménuwit gom do sundang brab do bastun, maak ségétéwu tulisan kéfoé kom? <sup>49</sup> Sénga fuweh diyou dob lawi i Tuluse témoro. Diyo gom so, éndob énda kénéfo gom Begén. Endob mérigoy ni inok métuman i Ménsulate Kébéreh i Tuluse.”

<sup>50</sup> Tidéw béno, i kéluhanay de kuyugén ténagak roy Jesuse brab ménraréy ro.

<sup>51</sup> Wén i ségétéwe kénogo lagéy ménfuray bé Jesuse. I ni kénogo lagéy énda i kégalén, ménggélomot saén mut. Atin ténlama ro so kénéfo. <sup>52</sup> Endob ménraréy ménfélawas non énggétagaka noy mut ne bé kéfagayas ne.

### *I kékukume bé Jesuse*

<sup>53</sup> Tidéw béno, nuwit roy Jesuse dob lawi i gérotore fadi. Diyo ménlimud i kéluhanay de odoroy de fadi brab de odoroy de Judio brab de témoro bé kitabe. <sup>54</sup> Atin ménfuray i Pedrowe éndob ménférayu kloh. Brab ménahur dob fésayaway lawi i gérotore ni fadi. Diyo ménsar beroy de guwardiya géliwét dob aféye télagang ro.

<sup>55</sup> Atin i de odoroy de fadi brab kéluhanay de kéfédewan, salkélé roy gétimale kétébo ro bé Jesuse inok wén i funa ro de méméléhu, éndob énda gérigono ro de. <sup>56</sup> Médooy de tugién do étéw téménébo bé Jesuse bé bekéne toow, éndob i de kébéreh ro énda géséodorén.

<sup>57</sup> Tidéw béno, wén i do téménindég émbéréh bé ni tugién kétébo maro, <sup>58</sup> “Énggélingoo key i kébéreh ne mano, ‘Binasané kuy lawi i Tuluse ni rénigoy de kéilawan, brab amuk méifus i téléwe gétérésangan, rémigowu man ségiyo lawi i Tuluse békén rénigoy kéilawane.’” <sup>59</sup> Gido loo, énda géséfagayun i kébéreh i de ni étéw tugién.

<sup>60</sup> Tidéw béno, i gérotore fadi téménindég dob téngaang de ménlimud do odoron brab ménénginsa dob Jesuse mano, “Ati késumbul me bé ni kétébo ro Beem?”

<sup>61</sup> Endob énda séménumbul i Jesuse, ménantés saén. Atin ménénginsa man i gérotore fadi mano, “Aw Beemey Kristowe, Nga i ménbantuge Tulus?”

<sup>62</sup> Atin séménumbul i Jesuse mano, “Hoo, Begén. Atin gito gom moso Begén, sani Nga i Kéilawane, mésar fingé dob kuwonoy barakatane Tulus. Atin gito gom Begén dob de rawén séfuleu tidéw dob lawayo.”

<sup>63</sup> Tidéw béno, i gérotore ni fadi kénusién i kégal ne émféténgténg bé kékérit ne bé kébéreh Jesuse ni. Atin ménbéréh mano, “Endaén kailanga tom i téméboe de dob betome. <sup>64</sup> Non énggélingoo tomén i mékémurkae kébérehén. Ati karang gome de fatut rigoné tom?”

Atin kéluhana ro kénukum ro bé fatut féléhuén.

<sup>65</sup> Tidéw béno, i de dumo bero dénuraa roy Jesuse. Atin ténléb roy de moto no bé munsalawe brab ténafés ro brab fén-antuk ro de ké ati téménafése de. Atin i de guwardiya, génamak ro brab lénuabag ro.

### *Dénirung Pedrowey Jesuse*

<sup>66</sup> Atin amun diyo sénay Pedrowe dob fésayaway lawie ni, téménara i ségétéwe kénogon sugu-suguéy gérotore fadi. <sup>67</sup> Amun énggito noy Pedrowe télagang, fénandangén

brab mémbéréh mano, “Beem soy dumo Jesuse tidéw Nasaret.”

<sup>68</sup> Endob dénirung Pedrowe mano, “Enda gétiga ku de brab énda gésobuto kuy nan béréhé mo.” Amun bénréhén i ni, ménagéw mangéy dob bégawane. Atin sonom béno, ménukoro i férufete.

<sup>69</sup> Atin i kénogone ni sugu-suguén, amun énggito no man i Pedrowe diyo dob bégawane, bénréhén man dob de étéw diyo mano, “Beeney lagéye dumo Jesuse.”

<sup>70</sup> Endob dénirung Pedrowe man. Enda mérugayén tidéw béno, i de étéw diyo ténébo roy Pedrowe man maro, “Tintu go dumo no, non ségétéw go so tidéw Galilea.”

<sup>71</sup> Tidéw béno, toow fo séménafa i Pedrowe mano, “Kukuméy Tuluse damén begén ké tugiénu. Toow fo énda gétiga kuy nan étéw béréhé kom.”

<sup>72</sup> Sonom béno, ménukoro i férufete bé géruwo nuwe gule. Bé béno so, énggétédémó Pedrowey bénréh Jesuse dob beene mano, “Enda séna ukoro i manoke bé géruwo nuwe gule, dirungé mo Begén téléw gule bé énda gélolo mo Begén.” Mélaw toow fo kéménrew i Pedrowe.

## 15

### *I kékukume bé Jesuse*

<sup>1</sup> Atin modor géfuwén, i de odoroy de fadi ménsélimud ro beroy de odoroy de Judio brab de témoro bé kitabe brab kéluhanay de kéfédeWAY de Judio. Atin ménagayun ro. Mélaw nikét roy Jesuse bé de sangkali brab narak ro nuwit ro mangéy dob Pilatowe, sani méguléwe tidéw Roma, atin naté ro dob beene. <sup>2</sup> Atin fénéngingsaa Pilatowey Jesuse mano, “Aw Beem i Datu i de Judio?”

Atin séménumbul i Jesuse mano, “Beem i mémbéréh de.”

<sup>3</sup> Atin i de odoroy de fadi ténébo roy Jesuse bé médoowe kétébo ro de. <sup>4</sup> Mélaw ménénginsa man i Pilatowe mano, “Sedek énda sémumbul go? Non énggélíngoo moy de médoo do kétébo ro Beem.”

<sup>5</sup> Endob énda fo séménumbul i Jesuse. Atin mélaw ménngaif i Pilatowe.

<sup>6</sup> Ménrigoy ni dob gaiwe kanduli ro féndawét Témaro. Atin i adat Pilatowe, sénga kanduli Témaro, témangéy ségétéw férisu, been i niy ongotéy de étéw de. <sup>7</sup> Atin bé béno gai, wén i ségétéwe férisu féndawét Barabas. Ménférisu beroy de dumo no ménsétiboh bé de gémamak kukuman. Ménméléhu étéw bé no késétiboh ro. <sup>8</sup> Mélaw amun ménlimud i de étéw ménfégdédét ro dob Pilatowe ongoté ro ké témangéy ségétéw férisu, <sup>9</sup> ménénginsa i Pilatowe mano, “Kétaya kom ké fésuté kuy datu gome do Judio?” <sup>10</sup> Rénigo noy ni non énggétiga noy funay de odoroy de fadi ménaté bé Jesuse non méndaléw ro de.

<sup>11</sup> Endob i de odoroy de fadi fénkérit roy de ménlimud do étéw atin mélaw nongot ro dob Pilatowe ké tangéyé noy Barabase mangéy dob berowe. <sup>12</sup> Atin mémbéréh man i Pilatowe dob de étéw mano, “Ati mélaw i kérigo gu bé ni lagéy féndawét gom ‘Datu i de Judio?’”

<sup>13</sup> Endob i de étéw ménkes ro maro, “Kélabo gom dob kruse!”

<sup>14</sup> Atin ménénginsa i Pilatowe mano, “Sede? Ati tetee rénigo no ula-ula?” Endob i de étéw ménkes ro man minut fo métanug bé i Jesuse kélabonén dob kruse.

<sup>15</sup> Tidéw béno, ménuyot i Pilatowe ké fiyoy de féféw i de ménlimud do étéw. Mélaw féntangéyén i Barabase, atin fénbadasén i Jesuse brab fénatéén dob berowe inok kélaboné ro dob kruse.

<sup>16</sup> Tidéw béno, i de sundalo nuwit roy Jesuse mangéy mahur dob fésayaway lawi i odorone tidéw Roma. Atin lénimud roy kéluhanay de dumo ro sundalo ségébataliyon. <sup>17</sup> Atin fénkégal roy Jesuse bé furowe métaah kégal maak datu, brab lénuke roy suwarane kélég atin fénsayaf ro bé Jesuse. <sup>18</sup> Tidéw béno, ubo-ubo basana ro maro, “Méraru damén i Datu i de Judio!” <sup>19</sup> Atin bénadas roy uléw ne bé kayéwe brab dénuraa ro, brab léningkuwédo ro ubo-ubo basana ro. <sup>20</sup> Atin amun énggilid ro déniyangka, kéndo roy furowe kégal brab fénkégal ro dey kaane insod. Tidéw béno, nuwit ro mésut dob Jerusalem atin nangéy ro kénlabo dob kruse.

### *Kénlabo roy Jesuse dob kruse*

<sup>21</sup> Atin amun diyo ro séna dob de aguwon, énggéalaka roy étéwe féndawét Simon tidéw dob ingéde Siren, abay Alejandrowe brab Rufo. Béno sénay kégumah ne dob no ingéd tidéw dob de safadén. Atin fénégés ro démuwal bé krus Jesuse. <sup>22</sup> Atin nuwit roy Jesuse mangéy dob gonone féndawét Golgota (i atag ne “gonoy kulobong uléwe”). <sup>23</sup> Atin niraya roy Jesuse arak lénawékon uwa, éndob énda éndotén de. <sup>24</sup> Tidéw béno, i de sundalo kénlabo roy Jesuse dob kruse brab sénsaarsaar roy de kégalén, sénkungkungo roy ati gégédote bé séngae de sélafin. <sup>25</sup> Géraraan lémwot i térésange bé kékélabo ruwe bé Jesuse dob kruse. <sup>26</sup> Atin diyo dob kruse wén i ménténae sulat bé kétébo ruwe de mano, “Datu i de Judio”. <sup>27</sup> Kénlabo ro soy ruwowe gétéw ménakaw dob de krus. I sébaane de fingé dob kuwono Jesuse, brab i sébaane de fingé dob biwong Jesuse. <sup>28</sup> Mélaw méntuman i Ménsulate Kébéréh i Tuluse mano, “Kénarang roy Beene ségétéw bé de ménsala étéw.”

<sup>29</sup> Atin i de témara dob no, déniyangka roy Jesuse brab dangu-danguo ro inok duwoyé ro, brab maro, “Hoy! Aw békén ba Beem i mémbéréhe bé binasané moy lawi i Tuluse

brab rigoné mo man bé téléwe gétérésangan?  
<sup>30</sup>Lus go mélaw dob krusa nan brab tabanga moy kaame lowoh.”

<sup>31</sup>Atin ségiléw so bé niy kédiyangka i de odoroy de fadi de brab de témoro bé kitabe. Ménsébéréh-béréh ro maro, “Ténabangén i de ségiyo étéw inok énda méléhu ro, éndob énda gétabanga noy kaane lowoh inok énda méléhuén.” <sup>32</sup>Amuk Beeney Kristowe, sani datu tome do Judio, fatut mélus béleewe ni tidéw dob kruse ni inok gito tom brab géféginugut tom de.”

Atin i de ruwo gétéw énggésérangan de ménklabo dob de krus, déniyangka ro soy Jesuse.

### *I kéléhu Jesuse*

<sup>33</sup>Amun géutuhén, ménwaléy délémon i kéluhanay de gonon dob duniyae taman géraaran lé mudug i térésange de. <sup>34</sup>Atin amun géraaran lé mudug i térésange de, téménawag i Jesuse métanug mano, “Eloi, Eloi, lama sabaktani?” I atag ne “Tulus gu, Tulus gu, sedek ténagakém Begén?”

<sup>35</sup>Atin i de dumoy de étéw diyo énggégélingo de, ménbéréh ro maro, “Fégélingo gom, tawagé noy Eliase.” <sup>36</sup>Atin i ségétéwe bero diyo, ménagayas éndotén i maake gafas brab nérémén dob mélémuwe arak. Tidéw béno, féndiyoén dob kayéwe brab féndiyoén dob ba Jesuse inok éséfé no. Atin ménbéréh i ni étéw mano, “Fédaya gomén. Tuliké tom ké gé gumah i Eliase émfélus de.”

<sup>37</sup>Tidéw béno, ségule man ménkes i Jesuse, atin ménléhuén.

<sup>38</sup>Sonom béno, i rindunge dob lawi i Tuluse ruwoy ménsésédaya nuwe, ménkusi tidéw rotor mangéy fantad. <sup>39</sup>Atin i odoroy de sundalo téménindéw dob adafay krus Jesuse, énggégélingoo noy kéékes Jesuse brab énggito noy kéléhu ne. Ménbéréh i ni sundalo mano, “Tintu fo Nga i Tulusey ni lagéy.”

<sup>40</sup>Atin diyo soy de libun kémulay gé tangka tidéw dob no, ro Maria Magdalena, brab Maria idéng Jose brab ménguwéde séna Santiago, brab diyo soy libune Salome. <sup>41</sup>I de ni do libun, ménfuray ro bé Jesuse brab ténabang ro amun diyo de séna dob Galilea. Atin diyo soy de médo na do libun ménodor de mangéy Jerusalem.

### *I kélébéngé bé Jesuse*

<sup>42</sup>Bé béno gai, témégénén i térésange bé kétafay ruwe bé gé tunduge de fuweh, sani gai kétére. <sup>43</sup>Mélaw énggumah i ségétéwe lagéy féndawét Jose, tidéw Arimatea. Beeney ségétéwe bé de kéfédéway de Judio, brab toow fo fé gadataan. Brab ongot-ongoté noy ké gumah i kéfé guléw i Tuluse. Atin i Josehé ménbaraw ménangéy dob Pilatowe nongotén i bangkay Jesuse. <sup>44</sup>Atin i Pilatowe, ménggaif non magad i

kéléhu Jesuse. Mélaw féntawagén i odoroy de sundalo brab ménénginsa ké ménrugayén i kéléhu Jesuse. <sup>45</sup>Amun énggégélingoo noy kébéreh i odoroy de sundalo bé tintu fo ménléhuén i Jesuse, ténungkasén i Josehé médot de. <sup>46</sup>Mélaw i Josehé, bényénén i futee safut brab amun ménkédanén i bangkay Jesuse dob kruse, bénausén bé safuto no. Atin féndiyoén dob lébéngé ténosong dob rangih i fingase. Tidéw béno, kénringén i dakéle batéw mangéy dob béngaway lébéngé ni fénggétélébén de. <sup>47</sup>I Maria Magdalénawe brab Mariahe idéng Josehé ténéngténg ro brab énggito roy lébéngé fénggonon bé bangkay Jesuse.

## 16

### *I kétébule Jesuse*

<sup>1</sup>Amun ménifus i gaiy kétére, i Maria Magdalénawe, brab Mariahe idéng Santiagowe, brab Salomewe, ménléy ro do fé gégéamut inok fédiyoé ro dob bangkay Jesuse. <sup>2</sup>Atin toow séna fo géfuwén bé no Duminggu, amun sémbang i térésange, ménangéy ro dob lébéngé. <sup>3-4</sup>Atin amun diyo ro dob de aguwon, ménséuret-uret ro maro, “Ati sékoy kéméringe bé batéwe tidéw dob béngaway lébéngé no inok géahur tom?” Non toow fo dakél i batéwo no. Endob amun énggumah ro, brab ténéngténg ro, énggito roy batéwe fénggétéléb bé béngawane ménkéring. <sup>5</sup>Amun ménahur ro dob lébéngé ni, énggito roy ségétéwe kénogo lagéy ménsar fingé kuwonon, brab kéménégal fute. Atin toow ro fo ménggaif.

<sup>6</sup>Atin ménbéréh i ni lagéy mano, “Kagom mégaif. Gétiga ku séléde kom i Jesuse tidéw Nasaret, sani fénléhu dob kruse. Endob éndaén dini no, non méntébuleén. Téngténg gom, ay ni féniroo ruwe de. <sup>7</sup>Na, agéw gom, brab uret gom i ni kébéreh dob de kuyugén labi na fo dob Pedrowe, bé métah gom i Jesuse mangéy Galilea. Diyo gito gom, loo bé kébéreh ne de dob begome bé do gé tah.”

<sup>8</sup>Tidéw béno, i de ni libun, ménsut ro tidéw dob lébéngé ni brab lé ménéntu ro magéw. Non toow ro fo ménggilak brab ménggaif. Atin énda énggéureto roy ni dob de ségiyo non ménggilak ro.

### *I de kétéfégitu Jesus*

<sup>9</sup>Amun méntébule i Jesuse bé toowe géfuwén bé no Duminggu, méntéfégitu sungu dob Maria Magdalénawe, sani libune fénfé raréy Jesusey de fitéw gétéw saitan tidéw dob beene. <sup>10</sup>Atin i Mariahe ni, ménangéy dob de kuyugé Jesus, bé lala ruwe rémuung brab kémérew fantag bé kéléhu Jesuse. Atin nuretén dob berowey fantage bé kétébule Jesuse. <sup>11</sup>Endob amun énggégélingoo roy kébéreh ne bé méntébule i Jesuse brab énggito no, énda ménunur ro de.

<sup>12</sup> Amun énggilid i ni, méntéfégito man i Jesuse bé ségiyowe falasén dob ruwowe gétéw bé de kuyugén bé lala ruwe magéw dob de aguwon mangéy dob de safad. <sup>13</sup> Atin ménséfulé ro mangéy Jerusalem brab nuret roy ni dob de dumo ro do kuyug. Endob énda ménunur ro bero.

<sup>14</sup> Atin tidéw béno, méntéfégito man i Jesuse dob de folo bra sébaan gétéw do kuyugén bé lala ruwe mama. Atin nugarén bero sabaf bé kulang i kéunur ruwe, brab sabaf métégas i de uléw ro funa ro énda munur bé kéuret i de énggégito de tidéw bé kétébule ne. <sup>15</sup> Atin ménbéréh i Jesuse dob berowe mano, “Angéy gom dob kéluhanay de gonon dob duniyae ni, brab uret gom i Fiyowe Uret dob kéluhanay de étéw. <sup>16</sup> Atin i kéluhanay de munur brab mébautis, méfukas ro. Atin i kéluhanay de énda munur, mékukum ro. <sup>17</sup> Atin i de munur géféténgténg ro bé de ni do tanda bé barakat guwe: Géféfeararéy ro do saitan, usaré roy dawét guwe. Atin gésébéréh ro bé de ségiyo késébéréh énda gétiga ro de. <sup>18</sup> Atin amuk géfurut ro do ulé, taloo no géiném ro udenén bisa, énda gésug-sug ro. Atin tégéné roy de uléw i de déméruun brab géféadi-adino ro bero.”

*I kédiyat Jesuse*

<sup>19</sup> Atin amun énggilid i Kadnane Jesus bé kébéréh ne dob berowe, féndiyat i Tuluse mangéy dob lawayo brab ménsar fingé dob kuwonoy Tuluse. <sup>20</sup> Atin i de kuyugén ménagéw ro mangéy muret dob kéluhanay de ingéd. Atin i Kadnane té nabanga no bero brab fénggito noy toow i kéuret ruwe bé kéférigo nuwe bero bé de mékégaif galbék.

## I Fiyowe Uret Sénulat Lukase

Been i niy Fiyowe Uret sénulat Lukase fantag bé Jesu Kristowe. Sénulat Lukasey médoowe bé de mékégaif rénigo Jesuse brab de ténoroén. Fénggito Lukasey Jesuse, sani Nga i Tuluse, ménwaléy kéilawan brab féndawét “Nga i Kéilawane”. I funa Jesuse ménwaléy kéilawan inok fukasé noy de étéw tidéw dob de sala ro. Fukasé noy de étéw bé kéléhu ne dob kruse.

I Lukase, sani séménulate bé ni Fiyu Uret, ségétéw doktor, mélaw toow fo métilédéd. Féngginsaa noy médoowe bé de kuyug Jesus inok gésulata noy de toow fo rénigo Jesuse brab de bénréhén brab ati toowe fo ménrigo dob Beene. Mélaw gétiga tom bé i kéluhanay de sénulat Lukas toow fo toow. Sénulat Lukasey ni Fiyu Uret dob gérotore étéw féndawét Teofilo.

### 1 Teofilo,

Wénén i médoow séménulat fantag bé kéluhanay ménrigo fantag bé Jesuse dob kérara geye. <sup>2</sup> Sénulat roy tintuwe ségiléw bé kéuret i de ménuret de betom fantag bé Jesuse, sani de énggégito de tidéw féganay. <sup>3</sup> Atin fiyon i begéne, toow gu féngganad i kéluhanay de ni ménrigo tidéw féganay. Mélaw fatutu so sémulat bé mékéntaye mangéy dob beeme bé urete fantag bé Jesuse. <sup>4</sup> Rigoné kuy ni inok gétiga moy toowe bé ténoroé nén beem.

*I kébéreh i télakiwe fantag bé Juan Bautistawe*

<sup>5</sup> Brab i ni sulaté ku beem tafayén tidéw féganay bé Herodi i méguléwe séna dob Judea. Bé béno, wén i ségétéwe lagéy féndawét Sakarias, ménamung dob ségéklaasiwe fadi féndawét Abias. I Sakariase ni, wén i bawagén féndawét Elisabet. Tidéw so dob katufua Aaroné ségétéw fadi. <sup>6</sup> Atin i Sakariase brab Elisabete bawagén, méntintu ro dob adafay Tuluse. Odooro ro brab tumané roy kéluhanay sugu i Tuluse. <sup>7</sup> Endob énda i nga ro, non i Elisabete atir; brab do lukés ro nén.

<sup>8</sup> Amun énggégumah i gaiwe gémalbék i ni ségéklaasi fadi féndawét Abias, ménamung soy Sakariase diyo dob lawi i Tuluse beroy de dumo no. <sup>9</sup> Atin sénbunuto ro loo bé adat ruwe do fadi ké mémili ro ségétéw dumo ro mangéy témuwég dukah dob lawi i Tuluse. Atin Sakarias i ménfémilie. <sup>10</sup> Amun tuwégé Sakariase nén i dukahe dob lawi i Tuluse, i kéluhanay de ménlimud do méngadaf déménasal ro dob liyuwe. <sup>11</sup> Tidéw béno, i télakiwe tidéw dob Kadnane méntéfégito téménindég fingé dob kuwonoy ahayane féngadafan tuwégon bé dukahe. <sup>12</sup> Amun

énggito Sakariasey ni, toow fo ménggaif brab ménggilak. <sup>13</sup> Endob i télakiwe ménbérehé mano, “Kago mégilak Sakarias. Enggélinooy Tulusey kédasal me. Mélaw i bawag me Elisabet géféngénga ségétéw nga lagéy. Atin fédawétém Juan. <sup>14</sup> Atin waléy go méoror brab méoror soy de médoow étéw ké mumah. <sup>15</sup> Non waléy moso gérotor dob adafay Tuluse brab énda minémén éntingayén arak mékéolon. Atin énda séna ménféngéngaén, i Rémogor i Tulusey mémanduone de. <sup>16</sup> Atin sabaf bé kétoro i nga me, médooy de Judio gésénule brab munur bé Kadnane Tulus ro. <sup>17</sup> Beeney géétahe bé Kadnane brab fémanduoy Rémogor i Tuluse brab iraya no barakat rémigo do mékégaif loo bé rénigo Eliase bé do gétahe. Brab beeney émféséulite bé de ménsébanil do lukés bé de nga ro. Brab i de étéw énggésala, gésénule ro sabaf bé kétoro ne, brab méginugot ro dob Tuluse, brab waléy ro man méntintu. Atin mélaw waléy médooy étéwe géingat ongot-ongot bé kéggéguhah i Kadnane,” bang i télakiwe ni.

<sup>18</sup> Tidéw béno, ménbérehé i Sakariase mano, “Endob ati kégétiga kuwe de ké toow i ni bénréhém? Non i begéne brab bawag guwe toow geyén fo lukés.”

<sup>19</sup> Séménumbul i télakiwe mano, “Begéney Gabriele, sugu-suguéy Tuluse démoyon dob adafa kuwe. Sénugu i Tuluse begén inok béréhé ku dob beemey ni fiyo uret. <sup>20</sup> Atin béleewe waléy go émwow. Enda gébérehé go taman énda métuman i ni bénréh gu, non énda munur go bé de bénréh gu beem, sani kébérehé métuman dob gaiwe kétayay Tuluse métuman.”

<sup>21</sup> Bé béno, i de étéw dob liyuy lawi i Tuluse, ongot-ongoté roy Sakariase ké mésut, brab ménggaif ro de non ménrugay dob bukag i lawi i Tuluse. <sup>22</sup> Amun ménsut, énda gésébérehén bero. Atin énggétiga roy wén i méntéfégito de dob bukag i lawi i Tuluse, non séniniyasa no sa bero bé de kémérén, non émwowén.

<sup>23</sup> Amun énggilidén i galbék Sakariase ni dob lawi i Tuluse, ménule. <sup>24</sup> Enda mérugayén tidéw béno, i bawag ne Elisabet ménwaléy obor. Atin ménbati i Elisabete dob bukag i lawie, énda ménsut-sutén bé ménlimowe gétérésang kélungonon. <sup>25</sup> Bang Elisabete, “Toow fo mégédaw i Tuluse begén, non géféngéngau. Réniyoy Tulusey ni inok éndaén kémalananu dob de étéw.”

*I kébérehé i télakiwe fantag bé Jesuse*

<sup>26</sup> Dob gééném ne gétérésang kélungonon bé kéobor Elisabete, sénugu i Tulusey télakiwe féndawét Gabriel mangéy dob sébaane ingéd dob Galilea féndawét Nasaret. <sup>27</sup> Wén i nuwitén kébérehé fénsamfayén dob ségétéwe kénogon féndawét Maria. I Mariahe ténlaana nén fébawagén dob ségétéwe lagéy féndawét

Jose. Beeneý séfu i ségétéwe méntélata datu i de Judio féndawét Dabid. <sup>28</sup> Ménggégumah i télakiwe dob Mariahe brab ménbéréh mano, “Oror go! I Kadnaney dumo muwe, brab niraya no beem dakél bantugan.”

<sup>29</sup> Toow fo ménbuku i Mariahe bé bénréh i télakiwe ni, brab fénggitungén ké ati atag i ni bénréhén. <sup>30</sup> Atin ménbéréh man i télakiwe mano, “Kago mégilak, Maria. Been i niy dakéle bantugan niray i Tuluse beem. <sup>31</sup> Waléy go obor, brab mégénga go ségétéw nga lagéy, atin fédawétém Jesus. <sup>32</sup> Waléy mébantug lagéy brab i fédawét i de étéw de Nga i Toowe Gérotor Tulus. Féwaléyéy Kadnane Tulus datu ségiléw bé katufua nuwe Dabid. <sup>33</sup> Waléy datu dob de étéw Israel taman sa taman. I kéfégüléw ne énda métamano.”

<sup>34</sup> Atin ménbéréh i Mariahe dob télakiwe mano, “Endob kénogonu séna, énda i bawag gu, non énda séna ménsétifonu bé mawage begén. Ati kéfingé-fingé i ni mériغو?”

<sup>35</sup> Séménumbul i télakiwe mano, “I Rémogor i Tuluse mangéy dob beeme brab i barakat i Tuluse dob beeme. Been i niy funay mékétéfuwe nga fédawétén Nga i Tuluse. <sup>36</sup> Fégitungém i Elisabete samungém. Bénréh i de étéw éndaén kun fakayén géfégénga, non toowén fo lukés. Endob fiyon fo ké loo bé nan, mén-énémén gétérésang kélungonon obor. <sup>37</sup> Non gérigonoy Tulusey kéluhanay éntingayéne.”

<sup>38</sup> Atin bang Mariahe, “Begéney sugu-suguéy Tuluse. Mériغو dam i ni kéluhanan loo bé bénréh manan.” Tidéw béno, méntékédan i télakiwe.

#### *Ténukaw Mariahey Elisabete*

<sup>39</sup> Tidéw béno, i Mariahe ménagayas ménagéw ménangéy dob sébaane ingéd dob de tuduk dob de sakuf Juda. <sup>40</sup> Ménangéy dob lawi Sakariase brab ténukawén i Elisabete. <sup>41</sup> Amun i Elisabete énggélíngoo noy béréh Mariahe sémégifa, i ngae dob ésur ne énggékédu, atin i Rémogor i Tuluse fénémanduo noy Elisabete. <sup>42</sup> Amun toow fo méoror i Elisabete, méntanug i kébéreh ne mano, “Bé kéluhanay de libun, toow fo fénfiyoy Tuluse beem, brab toow so fo féfiyoné noy ngae oboré mo. <sup>43</sup> Endob mégaiфу non begéne soy fénfiyoy Tuluse, non i idéng i Kadna kuwe nangyéén ténukaw begén ségétéw gérifantad. <sup>44</sup> Gétiga kuy de ni non amun énggélíngoo kuy béréh me sémégifa, i ngae dob ésur guwe ni énggékédu bé kéoror ne. <sup>45</sup> Féfiyonéy Kadnane damén beem non nunuro mo métuman i kébéreh ne.”

<sup>46</sup> Tidéw béno, ménbéréh i Mariahe mano, “Dayéwéy rémogor guwey Kadnane, <sup>47</sup> brab toow fo méororu fantag bé Tuluse sani Mémukase begén. <sup>48</sup> Non fénggétédémén

begén ségétéw térifantad sugu-sugué no. Tidéw béleewe tabaráy de étéw begén fénggédawan. <sup>49</sup> Non i barakatane Tulus réniغو noy mékégaife dob begéne. Mékétéfuy dawét ne. <sup>50</sup> Tidéw féganay taman béleewe, toow fo mégédaw bé de étéw mégadatan de. <sup>51</sup> Réniغو noy de mékégaife galbék bé barakat ne. I de étéw téfégérotor, bigodoyéy Tuluse bero inok énda mégulit i de tete bantak ro. <sup>52</sup> Kédané noy de datu dob de gono ro, brab fégérotoré noy de étéw térifantad. <sup>53</sup> I de méskinan fégedét dob Tuluse, fébésoré no bero bé de fiyo. Endob i de kawasa énda fégedétén dob Beene, énda i iray i Tuluse bero. <sup>54-55</sup> Ténabanga no betom do étéwén do Judio, non gétédémoo noy fasad ne dob katufua tome Abraham bé mégédaw de brab kéluhanay de séfuén taman sa taman,” bang Mariahe.

<sup>56</sup> Tidéw béno, ménbati i Mariahe dob ro Elisabete téléw gétérésang kélungonon, atin béno na ménule.

#### *I kéumah Juan Bautistawe*

<sup>57</sup> Atin amun énggumahén i gaiwe kéumahan i Elisabete, ménggénga ségétéw nga lagéy. <sup>58</sup> I de dumo no ségédét brab do samungén, énggélíngoo ro toow fo mégédaw i Tuluse de, atin mélaw kéluhana ro ménoror.

<sup>59</sup> Atin amun waléwén gétérésangan i ngae ni, ténuma roy adat i de Judio, mélaw ténuli ro. Atin sébéreh-béréh i de étéw bé fédawétén Sakarias, ségiléw bé dawét i boh ne. <sup>60</sup> Endob ménbéréh i idéng ne mano, “Békén Sakarias i dawét ne. Fédawété tom Juan.”

<sup>61</sup> Tidéw béno, séménumbul ro maro, “Endob énda i dumo no bé nan dawét.” <sup>62</sup> Tidéw béno, séniniyasa roy boh ne non énda gégélíngoo. Fénénginsaa ro ké ati dawét i ngae kétaya no fédawét de.

<sup>63</sup> Atin ménongot i Sakariase sulatan brab sénulatén, “I dawét ne Juan.” Tidéw béno ménggaife i de étéw. <sup>64</sup> Sonom béno, énggébéréh i Sakariase, atin méngganay démayéw bé Tuluse. <sup>65</sup> I de dumo ro ségédét toow ro fo ménggaife. Brab i urete fantag bé ni ménriغو, ménlégeb dob kéluhanay de ingéd dob de tuduk sakuf i Judeawe. <sup>66</sup> Atin i kéluhanay énggélíngoo bé ni uret fégitungé ro brab ménénginsa ro maro, “Ati keeyén i kéwaléyoy ni nga?” Non gétiga ro Kadnan i mémanduone de.

<sup>67</sup> Atin i boh ne Sakarias fénémanduoy Rémogor i Tuluse, mélaw ménuret bé kébéreh i Tuluse mano, <sup>68</sup> “Dayéwé tom i Tuluse Kadna tom do Judio, non énggégumahén inok maun émfésagad bé de étéwén. <sup>69</sup> Niraya no betom barakatan Mémukas tidéw dob de séfu i sugu-sugué nuwe Datu Dabid. <sup>70</sup> Been i Mémukase bénréh i de sénarigo no muret bé de kébérehén bé do gétah. <sup>71</sup> Réménigo



fasadén dob betome bé sugué no dob betomey Mémukase inok témaban tom bé de sébanil betom brab de mérarék betom. <sup>72</sup> Bé késugu ne de, ténuma noy fasad ne mégédaw bé de katufua tom. Mélaw gétédémó noy fasad ne, <sup>73</sup> ténlaa no bé katufua tome Abraham, <sup>74</sup> bé fukasé no betom dob de sébanil betom inok rigoné tom i kétaya nuwe, énda i gilak tom. <sup>75</sup> Atin fakay tom méngintulus bé toowe brab fiyowe dob adafa nuwe sénga fuweh taman méuyag tom.” <sup>76</sup> Tidéw béno, bénréh Sakariase dob nga ne mano, “I beeme nga gu fédawétén go sarigon muret bé kébéreh i Toowe Fo Gérotor Tulus. Métaħ go bé Kadnane inok tafayé moy aguwó nuwe. <sup>77</sup> Embéreh go dob de étéw bé méfukas ro bé kéfésagad i Tuluse bero. <sup>78</sup> Non toow fo mégédaw i Tuluse betom. I kékukas ne betom ségiléw bé réndaw i térésange dob sébangane. <sup>79</sup> Non i kégédaw i Kadnane betom do étéw mégilak méléhu, ségiléw bé kéréndaw i térésange dob délémone, inok fémanduo no betom dob aguwone énda i bukuén de.” Been i bénréh Sakariase.

<sup>80</sup> Atin i ngae ni ménruk émbagé brab ménwaléy méntintu. Atin amun dakélen, ménbati dob sébaane gonon énda i étéw de bati, taman bé gaiwe ménuret dob de étéw Judio.

## 2

### *I kéumah Yesus*

<sup>1</sup> Dob de gai bé béno, wén i ségétéwe méngguléw dob Roma féndawét Augusto. Méniray sugu dob kéluhanay de étéw félista ro inok iraya ro buwis. <sup>2</sup> Been i niy sunguwe kékélista bé de étéw, atin ménrigoy ni amun Kireniowey méguléwe dob Siria. <sup>3</sup> Atin mélaw i kéluhanay étéwe ménule ménangéy dob de karo ingéd, sani de gonoy de katufua ro, inok émfélista ro.

<sup>4</sup> Mélaw i Josehe ménagéw tidéw Nasaret sakuf i dakéle ingéd Galilea, mangéy dob ingéd ne féndawét Betlehem sakuf i dakéle ingéd Judea. I Betleheme ni, been i niy ingéde numahay méntélatae Datu Dabid. Ménangéy diyo i Josehe non beeny séfu Dabide. <sup>5</sup> Ménangéy diyo bero Mariahe ténlaana no bawagé no moso. Bé béno gai, gédétén kéumahan i Mariahe. <sup>6</sup> Amun diyo ron dob Betlehem, ménggégumah i gai kékéumaha nuwe. <sup>7</sup> Endob éndaén i gonoro dob de lawi kay de kana diyo. Mélaw ménangéy ro dob kayab i de ayam. Atin diyo ménkéumahan i Mariahe bé de ngae lagéy sungu ngaén. Atin bénausén bé de safut brab féndiyoén dob amaay de ayam.

<sup>8</sup> Bé no so kélungonon, énda mérayuén tidéw diyo wén i do témalima bé de bili-bili dob de fétabtaban. <sup>9</sup> I télakiwe tidéw dob Kadnane méntéfégito dob berowe. Brab i géfékayae

réndaw tidéw dob Kadnane réménéndaw dob berowe. Toow ro fo ménggilak. <sup>10</sup> Endob ménbéreh i télakiwe mano, “Kagom mégilak. Wén i fiyowe uret gu funay kéluhanay étéwe méoror. <sup>11</sup> Béleewe ni, i Mémukase begom ménumah dob Betlehem. Been i Kristowe Kadnan. <sup>12</sup> Gito gom bénaus bé de safut, féniro dob amaay de ayam. Been i nan i funa kome gétigan bé uret guwe ni toow.”

<sup>13</sup> Atin bé béno so, méntékom méntéfégitoy de médoó dumo no télaki brab kémanta ro dayéwé roy Tuluse maro, <sup>14</sup> “I kéluhanay de étéw damén démayéw bé Tuluse diyo dob toowe fo gérotor laway. Irayén damén i fiyowe kébati énda i bukuén de, loo bé fasad ne dob de étéw dob duniyae ni mésuwat i Tuluse bero.”

<sup>15</sup> Amun ménséfule i de télaki mangéy dob lawayo, ménsébéreh-béreh i de témalima bé de bili-bili maro, “Fénggétigay Kadnane betom i fantage bé ménrigowe dob ingéde Betlehem. Magéw tom angéy tom téngténgén.”

<sup>16</sup> Mélaw ménagayas ro magéw brab énggito roy Mariahe brab Josehe brab énggito roy klohe nga féniro dob amaay de ayam. <sup>17</sup> Amun énggito ro, bénréh ro dob Mariahe brab Josehey kébéreh i télakiwe fantag bé ni kloħ nga. <sup>18</sup> Atin nuret i de témalima bé de bili-bili dob de ségiyo étéw gébalaka ro, atin ménggaif i kéluhanay énggégélingoe de. <sup>19</sup> Énggétédémó Mariahey kéluhanay ni ménrigoy brab sénga tékélid fégitungé no. <sup>20</sup> I de témalima bé de bili-bili ménséfule ro kémanta dayéwé roy Tuluse, non bé de énggito ro brab de énggégélingoo ro. Ménrigoy kéluhanane loo bé kébéreh i télakiwe de bero.

<sup>21</sup> Amun énggégumah i géwaléwe gétérésangan, i ngae ni ténuli, brab niraya ro dawét Yesus, sani dawéte niray i télakiwe de bé énda séna obor i Mariahe de.

<sup>22</sup> Amun énggégumah i gaiwe bé kétuma ruwe bé sugu Moisesé fantag bé kékélinise dob adafay Tuluse amun mégénga, i Josehe brab Mariahe nuwit roy ngae ni dob lawi i Tuluse dob ingéde Jerusalem. <sup>23-24</sup> Atin i Mariahe brab Josehe téménalak ro loo bé ménsulate dob Kukumay Tuluse ruwo timan lé mugén inok félinis i Mariahe dob adafay Tuluse. I funa ruwe ménuwit bé ngae ni inok odoró roy ménsulate dob Kukumay Tuluse mano, “Fatut iray dob Kadnaney sunguwe nga lagéy.”

<sup>25</sup> Bé béno so, wén i ségétéwe lukés lagéy dob Jerusalem féndawét Simeon. Ségétéw méntintu étéw brab toow fo modor bé kukumay Tuluse. Atin sénga tékélid ongot-ongoté noy kékúkase bé de Judio. Brab i Simeone ni sénga tékélid fémanduoy Rémogor i Tuluse.

<sup>26</sup> Fénggétigay Rémogor i Tuluse de bé énda méléhuén taman énda gito noy Kristowe, sani fénasad i Kadnane sugué no Mémukas. <sup>27</sup> Fénémanduoy Rémogor i Tulusey Simeone

mangéy dob lawi i Tuluse bé kéuwit i de lukés Jesus de inok rigoné roy adate dob Ménsulate Kébéréh i Tuluse. <sup>28</sup> Tidéw béno, éndot Simeoney Jesuse brab sénfifi no brab ménfésalamat bé Tuluse mano, <sup>29</sup> “Barakatan Kadnan, ténuma moy fasad me begén, brab fakayén méléhuu. <sup>30</sup> Non énggito gun i Mémukase sénuguém, <sup>31</sup> sani ténafay me inok i kéluhanay de étéw gito ro. <sup>32</sup> Ségétéw maak solo réméndaw dob de étéw békén Judio inok fégétiga no beroy fantag bé Beeme. Brab Been i funay de étéw démayéw so begey do Judio.”

<sup>33</sup> Tidéw béno, ménggaif i de lukés Jesus bé ni kébéreh Simeone fantag bé Jesuse. <sup>34-35</sup> Atin déménasal i Simeone dob Tuluse inok féfiyoné no bero, brab bénréhén dob Mariahe idéng Jesuse mano, “I ni nga fénémili i Tuluse émféingat bé de étéw dini dob Israel inok i itungay médoowe émfayag. Médooy de étéw mika bé nga me ni moso, brab funa mo tete i fédéw me. Endob mékukum i de énda de munur, brab méfukas i de munur de.” Been i niy bénréh Simeone.

<sup>36</sup> Atin wén soy ségétéwe libun muret bé kébéreh i Tuluse, féndawét Anah, nga Fanuel tidéw dob katufua ro Asere. Toowén fo lukés brab ménsétifon bé bawag ne fitéw gébélintuwa tidéw fanay ménsébawag ro. <sup>37</sup> Endob ménbaléw taman waléw folo bra éfot gébélintuwa i kélukés ne. Brab énda fo méntékéda no dob lawi i Tuluse non fuweh na kélungonon i kéféngadaf ne démasal brab fuwasa. <sup>38</sup> Atin amun diyo sénay lukés Jesuse dob lawi i Tuluse, énggégumah i ni lukés libun. Sonom béno, ménfésalamat dob Tuluso, atin nuretén i fantage bé Jesuse bé Beeney ongot-ongoté ruwe tidéw dob Tuluse. Nuretén dob de étéw diyo dob Jerusalem ongot-ongoté ro soy kékukase bero.

<sup>39</sup> Atin i Josehe brab Mariahe, amun énggéodoro ron i kéluhanay sénugue dob Kukumay Tuluse, ménule ro mangéy dob Nasaret dob sakuf i Galileawe. <sup>40</sup> Atin ménruk i ngae ni, brab ménwaléy émbagér brab toow fo métilédéd. Atin toow fo mégédaw i Tuluse de.

#### *I Jesuse beroy de maistéro*

<sup>41</sup> Senga bélintuwa i idéng Jesuse brab boh ne mangéy Jerusalem inok mamung ro kanduli féndawét “Témara”. <sup>42</sup> Amun folo bra ruwo gébélintuwa i idad Jesuse, ménodor bero, loo bé adat i de Judio. <sup>43</sup> Amun gilid i kékanduli ruwe, i de lukés Jesus ménule ro tidéw Jerusalem. Enda gétiga ro de ké méntéféled i Jesuse. <sup>44</sup> Maro ké ménodor so bé kédoono ruwe ménule. Amun ménségétérsangan ron magéw, sénléd roy Jesuse dob de samung ro brab dob de dumo ro. <sup>45</sup> Endob énda énggito ré de.

Mélaw dob géruwowe de gai, ménséfule ro mangéy Jerusalem séléde ro. <sup>46</sup> Dob gétéléw ne gétérsangan, énggito ro dob lawi i Tuluse. Ménsar beroy de maistéroy de Judio, féngélingoé no bero brab féngingsaa no bero. <sup>47</sup> I kéluhanay de méngélingoé, ménggaif ro bé de fiyo féngingsaé no brab de katabuwan késumbulén. <sup>48</sup> Atin i de lukés Jesus ménggaif ro bé kégito ruwe de diyo. I idéng ne ménsébéréh de mano, “Jesus, i boh me brab begéne ménbuku gey fantag bé Beeme. Méntaluwan gey séméled Beem. Sédek réningo moy ni?”

<sup>49</sup> Endob séménumbul i Jesuse mano, “Enda kailanga no séléde kom Begén. Gétiga kom damén ay niwu dob lawi i Boh guwe.” <sup>50</sup> Endob i de lukés Jesus énda énggésobuto roy atag i bénréh Jesuse.

<sup>51</sup> Tidéw béno, ménodor i Jesuse mule bé de lukésén mangéy Nasaret, brab nunuro no bero bé kéluhanay rigoné nuwe ula-ula. Enggétédémooy idéng ney kéluhanay de ni, atin sénga tékélid fégitungé no. <sup>52</sup> Amun ménruk i Jesuse, ménwaléy émbagér brab métilédéd. Atin kéluhanay de étéw méuyot ré de, brab i Tuluse toow fo ménoror de.

### 3

#### *I kéuret Juan Bautistawe*

<sup>1</sup> Dob géfelo ne bra limo gébélintuwa bé kékéguléw Tiberiowe, atin Ponsio Pilato sénay méguléwe bé Judeawe, brab Herod i méguléwe bé Galileawe, brab i Filipiwe dumo no sétiman idéng i méguléwe bé Itureawe brab Trakanite, brab Lisaniasey méguléwe bé Abiliniawe, <sup>2</sup> atin i de toow do gérotor fadi ro Anas brab Kaifas dob Jerusalem, ménsébéréh i Tuluse bé Juane nga Sakarias. Bé béno gai, ménbati i Juane dob gonone énda i étéw de bati. <sup>3</sup> I kéluhanay de ingéd gédét dob wayége Jordan sénugudo no muret mano, “Kailanga kom gésénule bé de sala gom brab fébautis gom. Atin fésgadaya Tuluse begom.” <sup>4</sup> I réningo Juane diyo loo bé sénulat i méntélatea sénarigoy Tuluse muret féndawét Isaias mano, “Wén i ségétéwe mékes dob gonone énda i étéw de bati mano, ‘Tafay gom i aguwoy Kadnane. Fééntang gom i aguwo nuwe. <sup>5</sup> Tamfurén i kéluhanay de géléna, brab fédatarén i kéluhanay de tuduk brab do buntud fédatarén, brab féntangén i de aguwon bingkug, brab i de kémérih fédosoen. <sup>6</sup> Brab i kéluhanay de étéw gégito bé Mémukase tidéw dob Tuluso.’”

<sup>7</sup> Atin médooy étéwe ménangéy dob Juane inok fébautis ro. Endob i juane ménbéreh mano, “I begome maak do ulé gom non tete i de rigoné kom. Sedek mangéy gom dini? Enda géféreréy gom tidéw dob kékukum i Tuluse ké fébautis gom saén. <sup>8</sup> Buluk toow

gomén gésénule bé de sala gom, féténgténg gom i de fiyo ula-ulané kom. Atin kagom fégitungén i Tuluse fukasé no begom dob de sala gom sabaf bé begom i de séfu Abraham. Béréhé ku begom, fakay géféwaléy i Tuluse séfu Abrahame tidéw dob de batéw. <sup>9</sup>Bélewe ni, gédétén i kékukum i Tuluse bé de tete étéw. Ségiléw bé falakule méntafayén ménténa dob darir i kayéwe inok i de kayéw énda mégonok ro fiyo, tuwongén atin ibéréndob aféye inok métuwég.”

<sup>10</sup> Atin i de médoó étéw fénénginsa ro dob beene maro, “Ati fatute rigoné key?”

<sup>11</sup> Atin séménumbul i Juane mano, “Ati wéne ruwo lafin kégalén, fatut iraya noy éndae de. Brab ati wéne amaé no, fatut témukid de so.”

<sup>12</sup> Enggégumah soy de kémubra buwis inok fébautis ro. Atin ménbéréh ro maro, “Maistéro, ati fatute rigoné key?”

<sup>13</sup> Séménumbul i Juane mano, “Amuk kémubra gom, kagom lifuléni i de étéw. Yamula édot gom saén i katabuwane.”

<sup>14</sup> Atin i de sundalo ménénginsa ro so dob beene maro, “I begeye, ati fatute rigoné key?”

Atin séménumbul i Juane mano, “Kagoméndot kurta féngéw dob kéfégése. Taloo no témébo gom bé békéne toow. Kasukudan gomén bé sukay gome.”

<sup>15</sup> Atin i de médoó étéw amun énggélíngoo roy kétoro Juane, kémarang ro brab mégitung ro ké beeney Kristowe ménggumah dob duniyae. <sup>16</sup> Mélaw i Juane ménbéréh dob bero mano, “I begéne, bautiso ku begom bé wayége, éndob wén nay gégumahe mas na gérotor begén. Fiyon foy ikét i safatos ne, énda métororu de mukoh. Brab bautiso no begom bé Rémogor i Tuluse brab aféy. <sup>17</sup> Féngané noy de fiyo étéw bé de tete étéw ségiléw bé ségétéwe métof. I féngéétof ne diyo dob kémér ne inok féngéétofén bé ének ne brab féngétimuén bé faréye dob kiwot ne. Brab i de ukofén tuwégé no dob aféye énda émfandaén.”

<sup>18</sup> Brab wén soy médoowe gékélasí kéuret Juane bé de étéw fantag bé Fiyowe Uret.

<sup>19-22</sup> Amun médooy de étéw ménbautisén, i Jesuse bénautis Juane so. Amun ménbautis i Jesuse, déménasal, brab i lala ne démasal, ménungka i lawaye. Atin i Rémogor i Tuluse ménlus maak marafati brab méntérimféna dob Jesuse. Atin wén i ménbéréhe tidéw dob lawayo mano, “Beem i Nga guwe. Toow fo kégedawa ku brab késuwata ku.”

Atin i Herode datu, dénowoy Juane fantag bé Herodiyase lénamfaén bawag i dumo nuwe sétiman idéng brab fantag bé de médoona do tete réningo Herode. Tidéw béno, numana no nay sala ne bé kéféférisu nuwe bé Juane.

### *I de katufua Jesus*

<sup>23</sup> Bé kéfénganay Jesuse bé galbék ne, téléw folo gébélintuwa i kélukés ne. Brab i de étéw maro ké Jesusey nga Josehe. Been i nga Elihe. <sup>24</sup> Been i nga Batate. Been i nga Lebihe. Been i nga Melkihe. Been i nga Janahe. Been i nga Josehe. <sup>25</sup> Been i nga Matatiase. Been i nga Amose. Been i nga Nahume. Been i nga Eslihe. Been i nga Nagehe. <sup>26</sup> Been i nga Maate. Been i nga Matatiase. Been i nga Semeihe. Been i nga Josehe. Been i nga Judahe. <sup>27</sup> Been i nga Joanahe. Been i nga Resahe. Been i nga Sorababele. Been i nga Salatiele. Been i nga Nerihe. <sup>28</sup> Been i nga Melkihe. Been i nga Adie. Been i nga Kosame. Been i nga Elmodame. Been i nga Ere. <sup>29</sup> Been i nga Josuehe. Been i nga Eliesere. Been i nga Jorime. Been i nga Matate. Been i nga Lebihe. <sup>30</sup> Been i nga Simeone. Been i nga Judahe. Been i nga Josehe. Been i nga Jonane. Been i nga Eliakime. <sup>31</sup> Been i nga Meleawe. Been i nga Mainane. Been i nga Matatawe. Been i nga Natane. Been i nga Dabide. <sup>32</sup> Been i nga Jessehe. Been i nga Obede. Been i nga Boose. Been i nga Salmone. Been i nga Naasone. <sup>33</sup> Been i nga Aminadabe. Been i nga Admine. Been i nga Arniwe. Been i nga Esrome. Been i nga Farese. Been i nga Judahe. <sup>34</sup> Been i nga Jakobe. Been i nga Isake. Been i nga Abrahame. Been i nga Tarehe. Been i nga Nakore. <sup>35</sup> Been i nga Seruge. Been i nga Ragauwe. Been i nga Pelege. Been i nga Hebere. Been i nga Salae. <sup>36</sup> Been i nga Kainane. Been i nga Arfakade. Been i nga Seme. Been i nga Noehe. Been i nga Lameke. <sup>37</sup> Been i nga Matusleme. Been i nga Enoke. Been i nga Jaredé. Been i nga Mahalaleele. Been i nga Kainane. <sup>38</sup> Been i nga Enoke. Been i nga Sete. Been i nga Adame. Been i nga i Tuluse.

## 4

### *Téngkad Satanasey Jesuse*

<sup>1</sup> Atin i Jesuse fénémanduoy Rémogor i Tuluse, ménule tidéw dob wayége Jordan, brab fénanangguwit i Rémogor i Tuluse mangéy dob de gonon énda i étéw de bati. <sup>2</sup> Amun diyoén i Jesuse, ménggégumah i odoroy de saitan féndawét Satanas inok téngkade noy Jesuse rémigo tete. I kéréngay i ni éfot folo gétérésangan. Bé do no gai, énda ménama i Jesuse, atin toow fo ménlayaf.

<sup>3</sup> Ménggégumah i Satanase dob Beene brab ménbéréh mano, “Amuk Beemey Nga i Tuluse, féwaléyém amaén i de batéw ni.”

<sup>4</sup> Endob séménumbul i Jesuse mano, “Wén i Ménsulate Kébéréh i Tuluse mano, ‘Békén amaén saén i funay étéwe méuyag.’”

<sup>5</sup> Tidéw béno, méntékow nuwit Satanasey Jesuse mangéy dob gérotore gonon. Brab fénténgtégén dey kéluhanay de ingéd dob duniyae. <sup>6</sup> Atin ménbéréh i Satanase mano, “Buluk lingkuwédo mo begén brab féngadafé mo begén, iray gu beem i kéluhanay ature méguléw bé de ni inok médayéw go. Géiraya ku kuwagib i étéwe fémilié ku magatur bé kéluhanay de ni, non begéney wéne atura no bé de ni béleewe. <sup>7</sup> Lingkuwédonu brab féngadafénu, atin kéluhanay de ni gédoté mo.”

<sup>8</sup> Endob séménumbul i Jesuse mano, “Wén i Ménsulate Kébéréh i Tuluse mano, ‘Lingkuwéd go saén dob adafay Kadnane Tulusém. Been saén i féngadafé muwe.’”

<sup>9</sup> Tidéw béno, nuwit Satanase mangéy dob ingéde Jerusalem, brab nuwitén mangéy dob toowe gérotor bérungoy lawi i Tuluse. Atin ménbéréh man bé Jesuse mano, “Amuk Beemey Nga i Tuluse, antéfor go. <sup>10</sup> Non wén i Ménsulate Kébéréh i Tuluse mano, ‘Suguéy Tulusey de télaki no démiyaga Beem, <sup>11</sup> brab sakémé ro Beem inok énda émfali go bé de batéw dob fantade, fiyon i de sékéyém.’”

<sup>12</sup> I Jesuse séménumbul mano, “Endob wén soy Ménsulate Kébéréh i Tulus mano, ‘Kago téngkadén i Kadnane Tulusém rémigo bé kétaya muwe rigonén.’”

<sup>13</sup> Atin i Satanas ténéngkadén i Jesuse rémigo tete bé médoowe ségiyo-giyo kéténgkadén de. Endob énda génaga né de. Tidéw béno, ténagakén i Jesuse singkow.

#### *I kéféganay i galbék Jesuse dob Galilea*

<sup>14</sup> Tidéw béno, ménséfule i Jesuse mangéy Galilea, brab i barakat i Rémogor i Tuluse dob Beene. Atin i urete fantag bé Jesuse méraan ménlégeb dob de ingéd diyo. <sup>15</sup> Atin téménoro i Jesuse dob de lawi féngadafan kay de Judio brab kéluhanay de étéw dényéw ro.

<sup>16</sup> Tidéw béno, énggégumah i Jesuse dob Nasaret, sani gono nuwe ménruk. Atin bé gaiwe kétérén, ménahur dob lawie féngadafan loo bé adat ne, atin téménindég inok basané noy Ménsulate Kébéréh i Tuluse. <sup>17</sup> Brab wén i niraye de basané senuat i Méntélate sarigoy Tuluse muret féndawét Isaias, brab amun nukabén, énggébasa na noy ménsulate diyo mano, <sup>18</sup> “I Rémogor i Tuluse ay ni dob Begéne, non fénémilién Begén inok muret bé Fiyowe Uret dob de méskinan. Senuguén Begén inok muretu fantag bé kétangéye bé de ménkalabusu, brab émféséfule bé de fiyo kéténgtég i de langafén, brab témabang bé de kéfasangan. <sup>19</sup> Atin senuguén Begén muret fantag bé bélintuwaé féngétigay Tulusey kégedaw ne bé de kéilawan.”

<sup>20</sup> Tidéw béno, amun énggilid i kébasa nuwe de, dénili noy ni basané, atin fénséfuleén dob sugu-suguéne gémalbék dob féngadafane.

Atin ménsar i Jesuse inok témoro. Atin ténéngtég i kéluhanay de étéw diyo. <sup>21</sup> Atin ménbéréh mano, “Bé ni gai, i ni ménsulat méntuman dob adafa kome.”

<sup>22</sup> Tidéw béno, i kéluhanay de étéw diyo énggédawéno roy Jesuse, brab ménggaif ro bé kéfiyoy de kébéréhén. Mélaw ménséfénginsa ro maro, “Aw békén bay ni nga Josehe saén?”

<sup>23</sup> Atin ménbéréh i Jesuse mano, “Béréhé kom sékoy sébaane binuwaya mano, ‘Amuk beemey muwaé, uwaém i lowoh me. Non amuk beemey ségétéwe tintu sarigoy Tuluse, rigo moy de mékégaif galbék dini dob kaame ingéd ségiléw bé de rénigo mo kun dob Kafernaum.’” <sup>24</sup> Féntaus Jesusey kébéréh ne mano, “I toowe béréhé ku begom, énda i ségétéw sarigoy Tuluse tayakufén dob kaane gonon. <sup>25</sup> Endob béréhé ku begom i toowe fantag bé gai Eliase. Énda fénrana i Tuluse de bé téléwe gébelintuwa brab éném gétérésang kélungonon. Atin énggégumah i lénggobé dob de ni gonon. Bé béno gai, médooy de baléw do libun Judio. <sup>26</sup> Endob fiyon ségétéw bé no do baléw dumo tom Judio dob Israel, énda féngégédét i Tulusey Eliase dob berowe. Yamula senuguén i Tuluse mangéy dob ségétéwe libun baléw békén Judio dob sébaane ingéd féndawét Sarepta dob Sidon. <sup>27</sup> Loo so bé gai Eliseawe ségétéw so sarigoy Tuluse. Wén i do médoow étéw déméruun fémute bé de dumo tom Judio. Endob énda i ségétéw bero fén-adi-adi saliyo bé ségétéwe étéw békén Judio féndawét Naaman tidéw Siria.” <sup>28</sup> Atin i de kéluhanay de étéw diyo dob lawie féngadafan toow ro fo ménkérit bé kégelingo ruwe bé ni béméréh Jesuse. <sup>29</sup> Mélaw dénédel ro taman dob uruk i tuduke diyo, sani féntindégo ro bé karowe ingéd, inok dérié ro damén dob fingase inok mélawu. <sup>30</sup> Endob ménagéw i Jesuse témara dob kérara ruwe atin méntaus magéw ténagakén bero.

#### *Dénédel Jesusey de saitan*

<sup>31</sup> Atin méntaus i Jesuse léménudug mangéy Kafernaum sani sébaane ingéd sakuf i Galileawe. Diyo bé gaiy kétéréne, téménoro dob de étéw dob lawie féngadafan. <sup>32</sup> Atin éngkéségiyanon i de étéw bé de kétoroén non énda saén ténoroén i kéfégitung i de ségiyo étéw. Yamula ténoroén i kaane kéfégitung. <sup>33</sup> Atin diyo dob lawie féngadafan, wén i étéwe rénahukoy saitané. Brab ménkes toow fo métanug mano, <sup>34</sup> “Adéhoyoy! Ati amungé muwe begey, Jesus tidéw Nasaret? Ménangéy go ba dini inok binasné mo begey? Enggétiga key ké ati Beeme. Beem i Mékétéfuwe tidéw dob Tuluse.”

<sup>35</sup> Endob génlé Jesusey saitané ni mano, “Kago selekén, brab tékédan go.” Sonom béno, ténuwar i saitanéy étéwe ni rénahuko

no. Atin méntékédan brab énda ménkaid i étéwe ni.

<sup>36</sup> Atin éngkéséjyonan ro kéluhanan. Brab ménsébéréh-béréh ro maro, "Ati ni kébéréh? Dob kébéréh ne saén wén i barakatén. Sugué noy saitané tékédan atin modor tékédan."

<sup>37</sup> Atin i urete fantag bé Jesuse ménlégéb dob de kéluhanay de ingéd diyo.

*Nuwa Jesusey de médoo étéw*

<sup>38</sup> Tidéw béno, méntékédan i Jesuse tidéw dob lawie féngadafan brab ménangéy dob lawi Simone, atin diyo i térima Simone libun déméruun toow fo méduf. Atin nongot roy Jesuse bé uwaé no. <sup>39</sup> Atin téménindég i Jesuse dob tébing i libune ni, atin féntékéda noy kééduf ne. Sonom béno, ménadi-adiy libune ni. Atin méntek dénuwoto no bero.

<sup>40</sup> Amun mélédén i térésange, i de médoo do étéw wén i déméruu ro, nuwit ro dob Jesuse inok uwaé no bero. Atin kénuwah Jesuse bero brab ménadi-adi ro kéluhanan.

<sup>41</sup> Fénféraréyén soy médoowe saitan. Brab ménkes ro maro, "Beemey Nga i Tuluse." Endob génléén bero inok métanék ro, non énggétiga roy Beeney Kristowe.

<sup>42</sup> Amun géfuwénén, méntékédan i Jesuse ménangéy dob sébaane gonon énda i étéw de bati. Endob i de étéw selédé ro brab ménangéy ro dob Beene brab nongot ro ké énda damén tagaké no bero. <sup>43</sup> Endob béréhén bero mano, "I funa kuwe sénugu mangéy dini inok ureté ku dob de dumo ingéd i Fiyowe Uret fantag bé kéféguléw i Tuluse dob de étéwén. Mélaw fatut ureté ku dob de dumo ingéd."

<sup>44</sup> Atin i Jesuse ménagéw ménuret dob de féngadafan dob Judea.

## 5

*Ténawag Jesusey de sungu kuyugén*

<sup>1</sup> Wén i no sébaan fuweh, diyo i Jesuse dob doror i dogote féndawét Genesaret. Ménfégédét i de médoo do étéw sédantélo ro inok mégélingo ro bé kébéréh i Tuluse ureté Jesuse. <sup>2</sup> Atin i Jesuse énggito noy ruwowe do awang diyo dob doror i dogote. Brab i de gefe de méntéfor ro non urahé roy de fukét ro. <sup>3</sup> Amun i Jesuse ménda dob sébaane bé de awang ni ka Simon, nongotén bé féangéy no kloh dob ménaléme de. Brab diyo ménsar ménuret bé kébéréh i Tuluse dob de étéw diyo ménribuk dob doror i dogote.

<sup>4</sup> Amun énggilid témoro i Jesuse, béréhén bé Simone mano, "Fékérara tom dob ménaléme de brab lawu gom i da fukét goma nan inok gégédot gom do sédo."

<sup>5</sup> Endob i Simone séménumbul mano, "Maistéro, méntérasay gey ségékélungonon brab énda foy énggédot gey de. Endob amun béréhén, lawué key de fukét gey."

<sup>6</sup> Amun ménunur ro bé lénawu roy de fukét

ro, énggégédot ro toow fo médoo sédo, brab i de fukét ro gedét mékusi. <sup>7</sup> Tidéw béno, nabit roy de dumo ro dob ségiyowe awang, inok témabang ro médot bé de sédo. Brab amun énggégumah ro, fénéno roy ruwowe timan awang taman gedét ro mééléd. <sup>8</sup> Amun énggito Simon Pedrowey ni fénrigo Jesuse ula-ula, ménlingkuwéd dob adafa nuwe brab ménbéréh mano, "Kadnan, kago fégédét begén, non ségétéwu étéw ménsala."

<sup>9</sup> I funa nuwe énggébéréh loo bé ni non toow fo ménggaif i Simone brab de dumo no bé kédooy de sédo énggédot ro. <sup>10</sup> Fiyon foy de nga Sebedeo, ro Santiago brab Juan dumo Simone gémalbék, ménggaif ro so. Atin ménbéréh i Jesuse dob Simone mano, "Kago mégilak. Brab éndaén séméled gom sédo. Tidéw béleewe, féselédé ku begom étéw inok furay ro so Begén."

<sup>11</sup> Amun féndunggu roy de awang ro, fénled roy kéluhanane, atin ménodor ro bé Jesuse.

*Nuwa Jesusey ségétéwe fémuteén*

<sup>12</sup> Wén i no sébaan fuweh dob sébaane ingéd, énggéalaka Jesusey ségétéwe étéw fémuteén. Atin bé kégito nuwe bé Jesuse, méntédunsum dob fantade brab ménfégédaw-gédaw bé Jesuse mano, "Kadnan, buluk méuyot go, géféadi-adino mo begén."

<sup>13</sup> Atin i Jesuse béntéren i kémér ne brab kénuwahén, brab ménbéréh mano, "Méuyotu. Adi-adi go!" Sonom béno, ménkédan i fémute ne brab ménadi-adi. <sup>14</sup> Atin béréh Jesuse bé békén ureté no dob ségiyowe étéw brab sénuguén mano, "Ay go dob fadie inok, féténgténgém i ménadi-adi gon. Tidéw béno, tulak go loo bé ménbéréhe dob Kitabé tidéw dob Moisesé inok gétigay kéluhanay de étéw ménadi-adi gon."

<sup>15</sup> Endob i urete fantag bé Jesuse ménlégéb mangéy mérayu. Mélaw wén i toow fo médoo étéw ménangéy dob Beene inok mégélingo ro bé uret ne brab féuwa ro bé de déruu ro. <sup>16</sup> Wén i no do gai, i Jesuse ménangéy dob sébaane gonon énda i étéw de bati inok félébu brab démasal diyo.

*Nuwa Jesusey ségétéwe kimoyén*

<sup>17</sup> Wén i no sébaan fuweh, téménoro i Jesuse. Atin diyo i de odoroy de Judio féndawét Fariseo ménsar beroy de témoro bé kitabe. Tidéw ro dob de sakuf Galilea brab Judea brab tidéw dob ingéde Jerusalem. Atin i barakat i Tuluse méndiyo dob Jesuse inok uwaé noy de déméruun bé de étéw. <sup>18</sup> Atin énggumah i de étéw ménuwit bé kimoyéne ténggungu ro. Kétaya ro uwitén mahur inok fédiyoé ro dob téngaanga Jesuse. <sup>19</sup> Endob énda i fiyo kéfélawang ro de, non bé médoowe do étéw. Mélaw ménénik ro dob atéf i lawie. Tidéw béno, ténosongo ro féagéwo ro de témuntun mangéy fantad dob kérara i de

étew dob adafa Jesuse. <sup>20</sup> Amun énggito Jesusey kéféngintoow ruwe, ménbéréh dob ni étew kimoyén mano, “Adih, i de salaém ménfésagadén.”

<sup>21</sup> Tidéw béno, i de Fariseo brab de témoro bé kitabé fénggitung ro maro, “Sedek émbéréh mékémurka i ni étew? Enda i géfésagad bé de sala ké békén i Tuluse saén!”

<sup>22</sup> Endob i Jesuse gésobuto noy de itunga ro. Mélaw séménumbul mano, “Sedek séfénginsa gom dob de fédéw gom fantag bé kébéréh guwe? <sup>23</sup> Toow na fo mélému béréhén, ‘I de salaém ménfésagadén.’ Non énda gito no ké wén i barakat gu de rémigo. Endob toow fo mérégén béréhén, ‘Tindég go brab agéw go.’ Non giton ké wén i barakat gu de rémigo. <sup>24</sup> Endob féféngétiga ku begom i fantage bé Nga i Kéilawane, sani Begéne. Wén i barakat gu brab kuwagib gu dob duniyae ni émfésagad bé de sala.” Tidéw béno, béréhén dob kimoyéne mano, “Béréhé ku beem, tindég go brab agéw go uwitém i iroo muwe mule mangéy dob lawi me.”

<sup>25</sup> Sonom béno, téménindég i kimoyéne ni dob téngaanga ruwe brab ménagéw nuwitén i iroo nuwe brab ménule mangéy dob lawi ne démayéw bé Tuluse. <sup>26</sup> Atin i kéluhanay de étew diyo, toow ro fo ménkéségiyanon brab ménggilak ro. Atin dénayéw roy Tuluse maro, “Enggégito tom do mékégaif bé ni gai.”

<sup>27</sup> Amun énggilidén ni de rénigo Jesus, ménagéw brab énggito noy ségétéwe étew kémubra buwis féndawét Lebi, ménsar dob de kubranan buwis. Brab ménsébéréh i Jesuse de mano, “Odor go Begén.” <sup>28</sup> Tidéw béno, i Lebiwe fénlédén i kéluhanane brab téménindég ménodor bé Jesuse.

<sup>29</sup> Atin rénigo Lebiwey sébaane dakél karagiya dob lawi ne. Brab diyo i médoowe do étew kémubra buwis brab médo na étew ménsar mama brab miném bero Jesuse. <sup>30</sup> Atin i de témoro bé kitabé brab de Fariseo, ménbutég-butég ro brab ménbéréh ro dob de kuyug Jesus maro, “Sedek ménsélawék gom mama bé de kémubra buwis brab de ségiyo tete étew?”

<sup>31</sup> Endob séménumbul i Jesuse mano, “I de fiyo kéglowoho no, énda kailanga roy muwae, éndob kailangay de wén déruu no. <sup>32</sup> Enda ménangéyu dini inok tabaré kuy de métintu étew. Yamula ménangéyu dini inok tabaré kuy de wén salaén inok gésénule ro.”

<sup>33</sup> Atin wén i de ménénginsa dob Jesuse maro, “I de kuyug Juan sénga tékélid démasal ro brab fuwasa. Loo so bé de kuyug i de Fariseo. Endob i de kaam do kuyug mama brab miném ro.”

<sup>34</sup> Endob i Jesuse sénombulo no bero mano, “Ufama, i de kana dob uyote énda waléy tete i de fédéw ro taman énda tékédan i témérimawe lagéy. <sup>35</sup> Endob gégumah i

gaiwe ké édotén nén i témérimawe lagéy dob berowe, brab been nay no fuwasa ro bé do no gai. Ségiléw so bé de kagén kuyug, non amuk diniwu séna, énda fuwasa ro.”

<sup>36</sup> Tidéw béno, nuret Jesusey sébaane binuwaya fantag bé sébidanay mantuwe kétoroén brab tafaye kétoro i de Judio. Ménbéréh mano, “Enda i étew rémiyas bé mantuwe kégal inok féngétabung bé tafaye kégal. Non amuk rigoné no, mésinggula i mantuwe kégal, brab énda fo médaít féséféfaén i mantuwe bé tafaye de. <sup>37</sup> Brab énda i étew mahur bé mantuwe arak dob tafaye ahuron arak rénigo bé kulit ayame, non mébétus i mantuwe arak dob tafaye ahuron brab mébinasa brab méitis i mantuwe arak. <sup>38</sup> Endob fatut i mantuwe arak ahurén dob mantuwe kulit fédénong de. <sup>39</sup> Brab énda i étew buluk géiném bé tafaye arak méuyot bé mantuwe de non mano, ‘I tafaye arak mas na fiyo.’ ”

## 6

### *Fantag bé gaiy kétérené*

<sup>1</sup> Wén i no sébaan fuweh gai kétéren, i Jesuse brab de kuyugén téménara ro dob de médo do faréy. Atin i de kuyugén méndot ro de brab kénugut ro. Tidéw béno, ménama ro. <sup>2</sup> Endob i de Fariseo diyo ménbéréh ro maro, “Sedek rigoné roy ni, non békén fatut rigonén galbék bé gaiwe kétéren?”

<sup>3</sup> Séménumbul i Jesuse mano, “Aw énda ba énggébasana kom i rénigo Datu Dabide? Wén i no gai toowén fo mélayaf beroy de sundalo no. <sup>4</sup> Atin ménahur ro dob lawi i Tuluse brab méndot bé ténulake fan brab namaén, atin niraya no soy de dumo no de. Rénigo noy ni fiyon fo ké dob kitabe, do fadi saén i fakaye mama bé ni fan.”

<sup>5</sup> Atin féntaus Jesusey kébéréh ne mano, “I Nga i Kéilawane, sani Begéne, wén i kuwagib gu fantag bé ati fakaye bé gaiwe kétéren.”

### *Nuwa Jesusey ménsadile kémérén*

<sup>6</sup> Bé sébaane man gai kétéren, ménahur i Jesuse dob lawi i de Judio féngadafan inok témoro. Atin diyo soy ségétéwe lagéy ménsadil i kuwonone bé kémér ne. <sup>7</sup> Atin i de Fariseo, sani de odoroy de Judio, diyo so beroy de témoro bé de kitab. Atin ténulik roy Jesuse inok gito roy funa ruwe de témbó rémigo énda fakayén dob kitabe. Mélaw ténéngténg ro inok gito ro ké muwa i Jesuse bé gaiwe kétéren. <sup>8</sup> Endob i Jesuse, gétuwa noy de itunga ro. Atin ménbéréh dob lagéy ni ménsadil i kémér ne mano, “Ay go dini, tindég go dob adafay kéluhanay de étew ni.” Mélaw téménindég brab ménagéy diyo. <sup>9</sup> Tidéw béno, ménbéréh i Jesuse dob de Fariseo brab dob de maistéro mano, “Ati karang gome de, ati isuwe fakay dob kitabé bé gaiwe kétéren? Rémigo fiyo loo

ké tete? Témabang bé étéwe loo ké féféluén?”  
<sup>10</sup> Atin iling-iling i Jesuse brab ménbéréh  
 dob lagéye ni mano, “Bétérem i kémér me.”  
 Atin ménétérén i kémér ne atin sonom béno  
 ménadi-adi.

<sup>11</sup> Tidéw béno, toow fo ménkérít i de  
 Fariseo brab de témoro. Atin ménséuret-uret  
 ro bé ati rigóné ruwe bé Jesuse.

*Fénémili Jesusey de folo bra ruwo Apostol*

<sup>12</sup> Atin ménagéw i Jesuse bé béno gai  
 ménangéy dob burure inok démasal, atin  
 déménasal diyo dob Tuluse ségékélungonon.  
<sup>13</sup> Amun géfuwénén, ténabarén i de kuyugén,  
 atin ménémili folo bra ruwo féndawét do  
 Apostol, sani de sénugu. <sup>14</sup> Fénémilién i Si-  
 mone (féndawétén so Pedro), brab Andrese  
 dumo no sétiman idéng, brab Santiago, brab  
 Juan, brab Filipi, brab Bartolome, <sup>15</sup> brab  
 Mateo, brab Tomas, brab Santiagowe nga  
 Alfeo, brab Simone ségétéw toow fo gulaané  
 noy ingéd ne, <sup>16</sup> brab Judase nga Santiago,  
 brab Judas Iskariote beeney ménfékéfoe bé  
 Jesuse.

*Nuwa Jesusey de médoó étéw*

<sup>17</sup> Atin léménudug i Jesuse beroy de Apos-  
 tolén, brab téménindég dob sébaane gonon  
 datar. Diyo soy médoowe do étéw do  
 kuyugén brab do étéw tidéw Judea brab  
 Jerusalem brab tidéw do Tiro brab Sidon  
 gédét dob dogote. <sup>18</sup> Ménangéy ro diyo inok  
 mégélingo bé kébéréh Jesuse brab féuwa bé  
 de déruu ro. Atin nuwa Jesusey de déméruun  
 brab de rénahukoy saitane, atin ménadi-adi  
 ro. <sup>19</sup> Atin i kédoonoy de étéw magafas ro  
 inok gékuwaha ro, non i barakat ne ménsut  
 tidéw dob Beene funay kéluhanane ménfiyo.

<sup>20</sup> Tidéw béno, ténéngtég Jesusey de  
 kuyugén, atin ménbéréh mano, “Méoror gom  
 do méskinan, non féguléwoy Tuluse begom.  
<sup>21</sup> Méoror gom do mélayaf béni, non fébéSORén  
 gom moso. Méoror gom do kémérew béni,  
 non gébayat gom moso.

<sup>22</sup> “Méoror gom amuk wén i mérarék be-  
 gom sabaf bé kéunur gome Begén. Brab  
 méoror gom amuk wén i séniyaw begom  
 brab béreho ro begom tete fémalanén gom  
 sabaf bé kéunur gome Begén, sani Nga i  
 Kéilawane. <sup>23</sup> Féguwaya gom bé béno gai non i  
 baras gome toow fo médoó diyo dob lawayo.  
 Non loo so bé niy rénigoy de katufua tom bé  
 de gétaH sénarigoy Tuluse muret bé kébéréh  
 ne.

<sup>24</sup> “Endob mékégedaw-gédaw gom do  
 kawasa, non énggétéy gomén i de funa kom  
 méguwaya. <sup>25</sup> Mékégedaw-gédaw gom do béSOR  
 béleewe ni, non félayafén gom moso. Brab  
 mékégedaw-gédaw gom do gébayat béleewe,  
 non fébukuén brab fékérewén gom moso.

<sup>26</sup> “Mékégedaw-gédaw gom amuk kéluhanay  
 de étéw émbéréh do fiyo fantag bé begome,  
 non loo bé niy kérigoy de katufua tom bé

de gétaH tugién do ubo-ubo sénarigoy Tuluse  
 muret.”

*Fantag bé kégedawe*

<sup>27</sup> Atin féntaus Jesusey kétoro ne mano,  
 “Endob bérehé ku begom, fégedaw gom bé  
 de sébanil begom brab rigo gom i fiyowe dob  
 de mékérít begom. <sup>28</sup> Béréh gom i fiyowe  
 dob de mingon begom brab dasala kom i de  
 démufang begom. <sup>29</sup> Amuk wén i témamfiling  
 bé fiféy me, fédayaém de témamfiling so bé  
 ségéalaa de. Brab buluk wén i mafas bé de  
 kégal gom, iray gom soy kamisita gome. <sup>30</sup> I  
 kéluhanay mongote dob begome, iraya kom.  
 Brab i de médot bé de éntingayén kagom,  
 kagom étukén de. <sup>31</sup> Brab buluy kétaya kome  
 rigónéy de étéw dob begome, rigo gom so  
 dob herowe.

<sup>32</sup> “Amuk mégédaw gom bé de mégédaw  
 begom saén, énda médaít gom médot baras.  
 Non fiyon foy de énda do métintu étéw  
 mégédaw ro so bé de mégédaw bero. <sup>33</sup> Brab  
 amuk rémigo gom fiyo dob de rémigo fiyo  
 dob begome saén énda médaít gom médot  
 baras. Non fiyon foy de énda métintu do  
 étéw rigóné roy loowe bé nan. <sup>34</sup> Atin amuk  
 émféélét gom dob de wén fégebayadén de,  
 énda médaít gom médot baras. Non fiyon  
 foy de tete étéw émféutong ro so dob de  
 dumo ro tete étéw inok géSéfule so kéluhanan.  
<sup>35</sup> Endob fégedaw gom bé de sébanil be-  
 gom, brab rigo gom i fiyowe dob berowe.  
 Atin féélét gom brab kagom ongot-ongotén i  
 baliwa nuwe. Atin i baras gome dakél brab  
 waléy gom do nga i Toowe Gérotor Tulus,  
 non ségiléw gom bé Tuluse mégédaw bé de  
 énda gétingan émféSalamat brab de tete étéw.  
<sup>36</sup> Komon fégedaw gom loo bé kégedaw i Boh  
 gome dob lawayo.

<sup>37</sup> “Kagom kémukum bé de dumo gom,  
 inok i Tuluse énda so kukumá no begom.  
 Atin i de dumo gom ménsala, kagom du-  
 sanén bero, inok énda so dusanéy Tuluse  
 begom. FéSagada kom i de dumo gom atin  
 mélaw féSagaday Tuluse begom. <sup>38</sup> Iray gom  
 dob de dumo gom étéw, atin irayay Tuluse  
 begom. I kédooy iray gome ségiléw bé kédooy  
 iray i Tuluse begom. Atin toow fo médooy  
 iray i Tuluse taman gaba-gaba.”

<sup>39</sup> Brab ménbéréh man i Jesuse sébaan bin-  
 uwaya mano, “Fakay bay langaféne marak  
 bé dumo nuwe so langafén? Békén ba  
 mélawu ro dob kalute? <sup>40</sup> I méganade  
 békén gérotor na bé témoro de. Endob i  
 ségétéwe étéw amun énggéféganadén fo toow,  
 ségiléwén bé téménoro de.

<sup>41</sup> “Sedek gito moy klohe sala i dumo  
 muwe, éndob énda gito moy kaame sala toow  
 na fo dakél? <sup>42</sup> Atin bérehé mo dob dumo  
 muwe mamó, ‘Adih, téréno moy nan salaém.’  
 Endob wén i kaame sala toow na fo dakél.  
 Fédayéw-dayéw go, éndob békén go fiyo étéw.

Téréno mo na métaħ i kaame sala toow na fo dakél, inok gétabanga moy dumo muwe témérén bé kaame kloħ sala."

*Fantag bé fiyowe brab tetee étéw*

<sup>43</sup>Féntaus Jesusey kébéreh ne mano, "Enda i fiyo kayéw mégonok bé tetee onok, taloo no tete kayéw mégonok bé fiyowe onok. <sup>44</sup>I ségiyo-giyowe kayéw gélonon bé onok ne. Ufama, i sulu-suluwe énda mégonokén bé mangae. Brab i kayéwe suwaran énda mégonokén saging. <sup>45</sup>Ségiléw so bé étéwe. I méintuwe étéw rémigo fiyo, non tidéw dob fédéw ne fiyo. Atin i tetee étéw rémigo tete, non tidéw dob fédéw ne tete. Non i bae émbéréħ bé atiy diyoe dob fédéwe.

<sup>46</sup>"Sedek fédawété kom Begén 'Kadnan', éndob énda rigoné kom i de bérehé ku begom? <sup>47</sup>Atiy méuyote fégdét Begén brab mégélingo bé bérehé kuwe brab odoró noy de kétoro gu, fégétiga ku begom ké ati kélasa nuwe étéw. <sup>48</sup>Beeney ségiléwe bé étéwe réménigo lawi brab féntindégén i liléy ne dob émbagére batéw. Atin énggégumah i dunuke brab énggébéla. Endob énda méntuwongén non féntindég dob rotor i batéwe. <sup>49</sup>Endob i étéwe énggégélingo bé de kébérehé gu éndob énda odoró no de, ségiléw bé étéwe émféntindég lawi dob fantade énda i batéw féntindégo no bé de liléyén. Atin énggégumah i dunuke brab énggébéla dob nan lawi. Atin méntuwong brab toow fo ménbinasa."

**7**

*Nuwa Jesusey sugu-suguéy sundalowe*

<sup>1</sup>Amun énggilidén i Jesuse témoro bé de étéw, ménagéw mangéy Kafernaum. <sup>2</sup>Atin diyo i ségétéwe Romano kafitay de sundalo. Wén i sugu-sugué nuwe déméruun gédétén méléhu. Toow fo mégédaw i kafitane de. <sup>3</sup>Mélaw amun énggélíngoo noy fantage bé Jesuse, séménugu bé de dumo bé de odoroy de judio mongot bé Jesuse témukaw damén dob lawi ne inok méuwa i sugu-sugué nuwe. <sup>4</sup>Amun ménangéy ro dob Jesuse, ménfégdaw-gédaw ro de maro, "I ni étéw médait ké tabanga mo damén. <sup>5</sup>Non mégédaw betom do judio, brab beeney ménférigowe bé lawi geyé féngadafan dini."

<sup>6</sup>Mélaw ménodor i Jesuse bero. Amun éndaén mérayuén dob lawie ni ayo ro, i kafitane ni séménugu bé de dumo no malak bé Jesuse inok méréh de bé éndaén tausén, non énda médait kun i kafitane témangaf bé Jesuse. <sup>7</sup>Fénbérehé i kafitane mano, "Toow go fo gérotor étéw, atin mélaw énda métororu malak Beem. Toow go fo barakatan, mélaw fiyon fo ké bérehé mo saén, 'Adi-adi', gétuwa kuy waléy adi-adiy sugu-sugué kuwe. <sup>8</sup>Gétuwa kuy ni non wén i mas gérotor sundalo sémugu begén. Brab wént soy do

sundalo sugué ku. Atin buluk bérehé ku, 'Angéy go diyoo', mangéy diyo. Brab buluk maku, 'Enggomén', téméngé ro. Brab buluk bérehé ku dob de sugu-sugué ku, 'Rigo gom i ni', rigoné ro."

<sup>9</sup>Amun énggélíngoo Jesusey ni, ménggaif de. Brab séménling dob de étéw furay dob Beene brab ménbérehé mano, "Bérehé ku begom, fiyon fo ké dob de judio, énda i énggito gu kéféngintoo loo bé ni étéw."

<sup>10</sup>Tidéw béno, amun ménséfule i de sénugu dob lawi i kafitane, énggito roy sugu-suguéne ni adi-adi nén.

*Ténébule Jesusey kénogo lagéye*

<sup>11</sup>Enda mérugayén tidéw béno, ménagéw i Jesuse dob ingéde féndawét Nain. Ménodor i de kuyugén brab médoowe do étéw. <sup>12</sup>Atin amun ménggumah ro dob bégaway no ingéd, ménggéalaka roy de étéw méntidéw dob no ingéd. Ténangung roy bangkaye, mangéy ro lémbéng. I bangkaye ni buntung nga lagéy i libune baléw. Wén i médoowe étéw tidéw dob no ingéd ménodor ro may lémbéng bé no kénogo lagéy. <sup>13</sup>Atin amun énggitoy Kadnane Jesus i baléwo no, ménuray i éna nuwe de. Atin ménbérehé mano, "Ina, kago kémérew." <sup>14</sup>Atin ménangéy i Jesuse dob niroo nuwe. Tidéw béno, kénuwahén atin méntétudoy i de ménuwit de. Atin ménbérehé i Jesuse mano, "Adih, tek go!" <sup>15</sup>Sonom béno, méntek i kénogo lagéye brab ménbérehé. Atin niray Jesuse dob idéng ne.

<sup>16</sup>Toow fo ménggaif i de étéw de diyo atin dénayéw roy Tuluse maro, "Ay niy toowe fo gérotor sarigoy Tuluse muret bé kébérehé ne, ménggumah dob betome. Ménlus i Tuluse mangéy dob begeye inok tabanga no begey do fénémilién."

<sup>17</sup>Atin mélaw i urete fantag bé Jesuse ménlégéb dob judea, brab dob de ségiyo-giyo ingéd géliwét de.

*I kéfénginsa Juan Bautistawe*

<sup>18</sup>Brab i de kuyug Juan nuret ro dob beeney kéluhanay ni rénigo Jesuse. <sup>19</sup>Atin sénugu Juaney ruwowe bé de kuyugén mangéy ménginsa dob Jesuse maro, "Beeme bay no bénréh Juane gégumah ongot-ongoté key, taloo no fatut ongot-ongot gey na ségiyo?"

<sup>20</sup>Amun énggumahay de étéw niy Jesuse, fénénginsaa ro maro, "Sénugu Juan Bautistawe begey mangéy ménginsa ké Beeme bay Kristowe bénréh Juane gégumah ongot-ongoté key, taloo no fatut ongot-ongot gey na ségiyo?"

<sup>21</sup>Bé béno so, féni-adi-adi Jesusey de médoó déruunan brab do rénahuko saitan, brab nuwaén soy médoowe do langafén inok gégito ro. <sup>22</sup>Atin sénumbulo Jesusey de sénugu Juan mano, "Séfule gom brab uret gom dob Juaney de énggito gom rénigo gu



brab de énggelingoo kom. I de langafén énggégito, brab de fikat énggéagéw, brab de bokongén énggégélingo, brab de fémuteén ménadi-adi, brab de ménléhu méntébu. Brab ureté key i Fiyowe Uret dob de méskinan. <sup>23</sup> Atin toow fo méror i étéw énda ruwo-ruwoy kéféngintoow ne Begén."

<sup>24</sup> Amun ménuleén i de kuyug Juan, ménbéréh i Jesuse dob de médoo étéw fantag bé Juane mano, "Ati nangéy gome ténéngténg dob gonone énda i étéw de bati? Ségétéw maak kéroon faniréy réfuruhe? Békén, non i kéunur Juane énda méfélukén loo bé kéroone. <sup>25</sup> Aw ménangéy gom diyo inok ténéngténg gom ségétéw étéw toow fo fiyoy kégal ne? Békén, non i de étéw kémégal ro fiyo brab do kawasa, énda bati ro dob de gonon énda i étéw de bati. Yamula bati ro dob de toow fo fiyo lawi kay de datu. <sup>26</sup> Ati nangéy gome ténéngténg? Ségétéw étéw sénarigoy Tuluse muret? Hoo, éndob béréhé ku begom, i Juane békén saén sénarigon muret bé kébéréh i Tuluse. <sup>27</sup> I Juane niy fantage bé ni Ménsulat Kébéréh i Tuluse amun bénréh i Tuluse Begén mano, 'Sugué kuy sugu-sugú kuwe métah Beem. Been i témafaye bé kégumah me métah Beem.' "<sup>28</sup> Atin féntaus Jesusey kébéréh ne mano, "Béréhé ku begom, énda i toow na fo gérotor bé Juane bé kéluhanay de étéw ménumah. Endob bé gaiy kéféguléw i Tuluse bé de étéwén, i kéluhanay de térifantad étéw sakuf i Tuluse, toow ro na fo gérotor bé Juane béleewe ni."

<sup>29</sup> Amun énggelingoo roy kébéréh Jesuse, i kéluhanay de étéw fiyon foy de lémfifal kémubra do buwis, énggélolo roy aguwoy Tuluse katabuwan. Beroy de bénautiso Juan. <sup>30</sup> Endob i de Fariseo brab de témoreo bé kitabe, ménika ro rémigo bé kétayah Tuluse. Atin berowey de énda bénautis Juan.

<sup>31</sup> Atin ménbéréh i Jesuse man mano, "Ati fésegiléwo kuwe bé de étéw méuyag béleewe ni? Ati ségiléwo ruwe? <sup>32</sup> Ségiléw ro bé de nga ménsar dob fadiyane brab mika ro mégérémet. Tabar i de dumo ro bero maro, 'I begeye ménségagung gey, éndob énda ménsayang gom. Brab léméninggég gey linggéng ménléhuon, éndob énda kéménrew gom.' "<sup>33</sup> Non ménangéy diniy Juan Bautistawe ménfuwasa brab énda méninémén arak. Brab bénréh gom, 'Sénaitanan.' "<sup>34</sup> Endob i Nga i Kéilawane, sani Begéne, ménangéyu dini, brab mamau atin minému. Brab ménbéréh gom, 'Ay niy ségétéwe étéw arumén mama brab miném arak, brab wén i dumo no do lémfifal kémubra buwis brab do tete étéw.' "<sup>35</sup> Endob fégétigay Tulusey métintuwe dob kéluhanay de ngaén."

*I kégdaw i teteé libun*

<sup>36</sup> Atin wén i ségétéwe Fariseo, féndawét Simon, séménéngkat bé Jesuse mangéy dob lawi ne mama. Mélaw ménodor i Jesuse ménangéy diyo brab ménsar ro mama. <sup>37</sup> Brab wén i ségétéwe tete libun dob no ingéd. Amun énggétiga noy Jesuse ménangéy mama dob no lawi, ménangéy so diyo ménuwit katiya toow fo fiyo, ménféno mamut nor balilaga. <sup>38</sup> Amun ménfégédét dob Jesuse, téménindég gédét dob de sékéyén kémérew. Atin i de énlóén léménuyut dob de sékéy Jesus. Brab térafo no bé buk ne brab narékén i de sékéyén. Brab lénulawa no bé mamute nor. <sup>39</sup> Amun énggito Simoney ni, ménbéréh dob fédéw ne mano, "Buluk Jesusey ségétéwe sarigoy Tuluse muret bé kébéréh ne, gélolo no damén ké atiy ni libun mémiraw de, ségétéw libun tete."

<sup>40</sup> Endob ménbéréh i Jesuse mano, "Simon, wén i béréhé kuwe Beem."

Séménumbul i Simone mano, "Maistéro, béréhéng begén."

<sup>41</sup> Atin bénréh Jesusey ni binuwaya mano, "Wén i ruwowe étéw énggéutong dob ségétéwe émféélét kurta. I ségétéwe de énggéutong limo ratuh, brab i ségétéwe de limo folo saén. <sup>42</sup> Amun énda i fégébayad ro de, fénsagada no bero, inok éndaén kailanga roy mayade. Na féngingsaa ku beem, ati isuwe toow na fo méimu bé étéwe ni ménféutong bero?"

<sup>43</sup> Séménumbul i Simone mano, "Karangé ku, i toowe de méimu, been i énggéutong médoow."

Atin bang Jesuse, "Katabuwan i nan sumbulém." <sup>44</sup> Tidéw béno, séménling i Jesuse dob libune ni, brab ménbéréh man dob Simone mano, "Énggito moy réngoy ni libun? Ménahuru dob lawi me, éndob énda méniray go wayég fégéurah gu bé de sékéy gu, loo bé adat tome do Judio fatut rignoné mo damén. Endob i ni libun fénréén i de sékéy gu bé de énlóén, brab térafo no bé buk ne. <sup>45</sup> I beeme, énda narékém Begén loo bé adat tome témayakuf bé de kana. Endob i ni libun, tidéw fanay kégumah gu, énda téménréno marék bé de sékéy gu. <sup>46</sup> Enda so lénulawa moy uléw guwe nor. Endob i ni libun, lénulaw noy sékéy guwe bé mamute nor. <sup>47</sup> Mélaw béréhé ku beem, giton i dakéle kéimuén non i de médoo do salaén ménfésgadén. Endob i étéwe kloh saén fénsagadan, kloh soy kéimu ne."

<sup>48</sup> Atin bénréhén bé libune ni mano, "Di, i kéluhanay de salaém fénsagadanén."

<sup>49</sup> Atin i de étéw bero ménama diyo ménsébéréh-béréh i de fédéw ro maro, "Ati keeyén i ni étéw géfésgad do sala?"

<sup>50</sup> Atin bénréh Jesuse man dob libune ni mano, "I kéféngintoow mey funay Tuluse ménukas beem. Taus go mule, atin kago émbuku."

## 8

<sup>1</sup> Brab énda ménrugayén tidéw béno, ménangéy i Jesuse dob de ségiyo-giyo ingéd ménuret bé Fiyowe Uret fantag bé kéféguléw i Tuluse bé de étéwén. Brab ménodor i de folo bra ruwo kuyugén. <sup>2</sup> Ménodor soy de libun fén-adi-adi no rénahukoy de saitan brab do déméruun. Ségétéw beroy Mariahe tidéw Magdala, dob beeney méntékédan i fitéwe timan saitan. <sup>3</sup> Ménodor soy Juanawe bawag Kusawe sénarigo Datu Herode, brab Susanawe, brab médoon na do dumo libun. I ni do libun, témabang ro miray bé de kailanga ro Jesus.

*I binuwayae fantag bé sémabuge*

<sup>4</sup> Wén i no sébaan fuweh, wén i médoowe étéw tidéw dob ségiyo-giyo ingéd ménangéy ro dob Jesuse mégélingo. Amun médoon ro ménsélimud, nuret Jesusey ni binuwaya mano, <sup>5</sup> “Wén i ségétéwe étéw ménangéy sémabug bé béne ne. Amun sabugé noy béne ne, i de dumo bé béne ne ménbégodoy dob doror i aguwone. Diyo gédaay de étéw taloo no nama i de kloh manok. <sup>6</sup> I de dumoy de béneén ménsawér dob fantade wén i do batéw de. Tidéw béno, amun méganayén témunoh, ménlaay ro non tikar i fantade de. <sup>7</sup> I de dumoy de béneén ménsawér dob fantade wén i do suwar de énda séna témunoh ro. Ménruk mélaw i de suwar séréngan bé de nohok, atin ménléhu i de nohok non lénimfung i de suwar. <sup>8</sup> Endob i de dumo bé de béne ménsawér dob fiyowe fantad, brab téménunoh ro brab ménggonok ro médoon taman mératu takéf sénga sébaan béne.” Atin féntaus Jesusey kébéreh ne mano, “Fégitung gom fantag bé ni bénréh gu begom amuk méuyot gom de ké gésobuto kom.”

<sup>9</sup> Tidéw béno, fénénginsaay de kuyugén ké ati atag i nan binuwaya. <sup>10</sup> Sénumbulo no bero mano, “Dob begome do kuyug gu, Tuluse i émfégétigane de begom fantag bé kéféguléw ne bé de étéwén. Endob i de ni éntingayén ménbunéy, brab énda émfayagén dob ségiyowe. Énggélingoo ro say de ni féngagéw dob de binuwaya, inok fiyon fo ké téngténgé ro, énda gito ro de. Brab fiyon fo ké gélingoo ro, énda gésobuto ro de.

<sup>11</sup> “Ay niy atag i ni binuwaya énggélingoo kom. I atag i ni béne, been i kébéreh i Tuluse. Atin i ségiyo-giyoéw klasi fantad ségiléw bé de ségiyo-giyoéw klasi étéw. <sup>12</sup> I de dumoy de béne ménlawu dob doror i aguwone. I atag i ni, wén i de étéw énggélingoo roy kébéreh i Tuluse, éndob énggéngumah i odoroy de saitan brab kénda noy ni kébéreh dob de fédéw ro. Been i nan i funa ruwe énda sémarig ro bé Tuluse. Brab énda mélaw gédoté roy man-tuwe umul. <sup>13</sup> I dumoy de béne ménsawér dob fantade, wén i do batéw de. I atag i ni, wén i de étéw énggélingoo roy kébéreh i

Tuluse brab tényakuf ro brab ménoror ro de. Endob énda ménbatién dob fédéw ruwe. Sémarig ro bé Tuluse singkow saén. Endob buluk kéréngénan ron, éndaén sémarig ro bé Tuluse. <sup>14</sup> I dumoy de béne ménsawér ro dob de duwaléy suwar. I atag i ni, wén i de étéw énggélingoo roy kébéreh i Tuluse, éndob sabaf bé de kébuku ro fantag bé de kéuyag ro, brab kéuyot ruwe waléy kawasa, brab de kéuyot ro méguyaya, been i noy funa ruwe énda gérigo ro bé fatute kétayay Tuluse rignoné ro. <sup>15</sup> Atin i de dumoy de béne ménsawér ro dob fiyowe fantad. I atag i ni, wén i de étéw énggélingoo roy kébéreh i Tuluse, brab toow fo nunuro ro. Féntaus roy késarig ruwe bé Tuluse atin rignoné roy kétayay Tuluse rignoné ro.”

<sup>16</sup> Atin ménbéreh man i Jesuse mano, “Enda i témumon solo inok bunéyé no dob bukag i kuréngé fénléngkéb, taloo no fédiyoé no dob fantad i katriwe. Yamula fédiyoé no dob fégonone de inok atiy mahure gito noy réndaw ne. <sup>17</sup> I kéluhanay bénunéyé, giton moso. Brab i kéluhanay dirungéne, gétigan moso. Mélaw atiy éndae gésobuto kom béni, gésobuto kom moso.

<sup>18</sup> “Komon féfiyo gom i kéfégélingo gome. Non i étéwe mégélingo brab munur, méumanan nay kégésobut ne de. Endob i étéwe énda munur, fiyon foy klohe fégitungé no gésobuto no, dotén dob beene.”

<sup>19</sup> Tidéw béno, ménangéy dob Jesusey idéng ne brab de tuwaréyén, éndob énda géfégedét ro non bé médoowe étéw géliwét de. <sup>20</sup> Brab wén i ménbérehé dob Jesuse mano, “I idéng me brab de tuwaréyém diyo ro dob liyuwe. Méuyot ro géségito Beem.”

<sup>21</sup> Endob séménbumbul i Jesuse mano, “Wén i ségiyo idéng gu brab do tuwaréy gu, non bé kéluhanay étéwe mégélingo bé de uret i Tuluse brab munur de, beroy de maak idéng gu brab do tuwaréy gu.”

*Féntéré Jesusey défuke*

<sup>22</sup> Sébaane de fuweh, ménda i Jesuse awang beroy de kuyugén atin bénréhén bero mano, “Mifar tom.” Mélaw ménangéy ro dob dogote ni. <sup>23</sup> Amun diyo ro dob kérarae, énggéfidong i Jesuse. Atin amun énggéfidong, énggumah i émbagere défuk. Atin ménahuron wayég i awange, brab toow fo ménkakaidan ro. <sup>24</sup> Tidéw béno, téningé i de kuyugén i Jesuse atin nulég ro maro, “Kadnan, gedét tomén méélééd.” Méntek i Jesuse brab nélénoy défuke atin féntanéken i de bagél. Tidéw béno, ménlingén-ngén. <sup>25</sup> Atin ménbéreh i Jesuse dob de kuyugén mano, “Hon i kéféngintoow gome de?”

Atin éngkéségiyanon ro brab mégilak ro. Brab ménsébéreh-béreh ro maro, “Ati ni étéw Jesus? Fiyon i défuke brab de bagél géfétéreño no.”

### *Dénédél Jesusey de saitan*

<sup>26</sup> Mélaw méntaus ro mifar démunggu mangéy dob fantade Geraseno, dob difar i Galileawe. <sup>27</sup> Amun téménéfad i Jesuse, bénalak i étéwe rénahukoy de saitan tidéw dob sébaane ingéd diyo. I ni étéw énda batién dob lawie, éndob ménrugayén félawas diyo bati dob de takub do lébéng. <sup>28-29</sup> Médoó gule i ni étéw gémandam fiyoy fo ké férisunén brab ikétén bé sangkaliey de sékéyén brab de kémérén. Been so ménséfantud brab uwitéy de saitan mangéy dob gonone énda i étéw de. Amun énggito noy Jesuse, ménkes toow fo métanug, brab méntélléngkéb dob téngaanga Jesuse brab ménbéréh toow fo métanug mano, “Jesus, Nga i toowe fo gérotor Tulus, fégdaw-gédawu Beem. Kago fégdawéton begén.” Bénréhén i no non féngganaya Jesusey démédele bé de saitan réménahukon de.

<sup>30</sup> Fénénginsaa Jesuse mano, “Ati dawét me?”

Atin séménumbul mano, “Laksaén i dawét guwe.” Non toow fo médooy de saitan ménahur dob beene. <sup>31</sup> Tidéw béno, ménfégédaw-gédaw i de saitan bé Jesuse bé békén damén dédéle no bero mangéy dob emfernowe.

<sup>32</sup> Enda mérayuén dob no gonon, diyo i médoowe do babuy témabtab dob méngulandige. Nongot i de saitan bé Jesuse ké fakay mahur ro dob de babuy. Atin ténungkas Jesuse bero. <sup>33</sup> Sonom béno, i de saitan ménsut ro dob étéwe brab ménahur ro dob de babuy ni. Atin i kéluhanay de babuy ni, ménraréy ro ménangéy dob fingase brab ménantéfor ro ménangéy dob dogote, atin ménléné ro.

<sup>34</sup> I de étéw témalima bé de babuy ni, amun énggito roy ni ménrigo, ménségéta ro brab nuret roy ni dob de dakél ingéd brab dob de ségiyo ingéd géliwét. <sup>35</sup> Mélaw ménangéy diyo i de étéw inok susiné roy ni ménrigo. Ménfégédét ro dob Jesuse brab énggito roy étéwe bé gétaho félawas sénaitanan, ménsar gédét dob sékéy Jesuse wénén i kégalén, brab méntintunén. Atin kéluhana ro mégilak ro de. <sup>36</sup> Nuret i kéluhanay de énggégito de ké ati kéuwa Jesuse bé étéwe ni gétaho sénaitanan. <sup>37</sup> Tidéw béno, i kéluhanay de étéw tidéw dob ingéde Geraseno, nongot roy Jesuse tékédan, non toow ro fo mégilak. Mélaw, ménda i Jesuse dob awange, atin méntékédan. <sup>38</sup> I ségétéwe ni étéw ténkédanay de saitan, nongotén bé Jesuse mano, “Modoru Beem.”

Endob bénréh Jesuse de mano, <sup>39</sup> “Ule go brab uretém i fiyowle réningoy Tulus dob beeme.” Mélaw ménule brab ménsugud-sugud dob kéluhanay gonone dob ni ingéd brab nuretén i kéluhanay réningo Jesuse dob beene.

*Nuwa Jesusey ruwowe gétéw libun*

<sup>40</sup> Amun ménséfule i Jesuse mifar, toow fo méroror i de étéw de, non ongot-ongoté ro diyo. <sup>41</sup> Brab diyo wén i ségétéwe étéw fédawétén Jairo, ségétéw sarigon dob lawie féngadafan kay de Judio. Méntélléngkéb dob adafa Jesuse bé ongoté noy mangéy i Jesuse dob lawi ne. <sup>42</sup> Non i buntunge ngaén libun folo bra ruwo gébélintuwa, gédétén méléhu. Mélaw ménagéw i Jesuse modor de.

Amun magéw i Jesuse sénribukoy de médoó étéw. <sup>43</sup> Diyo soy ségétéwe libun kéfasangan non foloén bra ruwo gébélintuwa i kéranas i adat ne. Brab méntéy i kurta ne fénggébayadén bé de doktor, éndob énda foy ségétéw géuwa de. <sup>44</sup> Tidéw béno, ménfégédét dob ségang Jesuse, atin kénuwahén i kégal ne. Sonom béno, téménrén i kéranas i adat ne. <sup>45</sup> Tidéw béno, ménénginsa i Jesuse mano, “Ati kéménuwahe Begén?”

Endob ménggidih i kéluhanane. Atin ménbéréh i Pedrowe mano, “Maistéro, toow fo médooy étéwe géliwét Beem, brab sédantélo ro Beem.”

<sup>46</sup> Endob ménbéréh man i Jesuse mano, “Wén i kéménuwah Begén, non énggéterédama kuy barakat guwe ménsut tidéw dob Begéne.” <sup>47</sup> Amun énggégitay libune ni énggégiga Jesuse, ménfégédét lémutub atin méntélléngkéb dob adafa Jesuse brab dob téngaangay médoowe étéw, brab bénréhén dob Jesuse sedek kénuwahén, brab bé béno so méntékow adi-adi. <sup>48</sup> Tidéw béno, bénréh Jesuse de mano, “Di, i kéféngintoow mey funa muwe ménadi-adi. Taus go ule, brab kagonén émbuku.”

<sup>49</sup> Amun béréhé Jesusey ni, énggégumah i sugu-sugué Jairowe. Ménbéréh mano, “Amu, déménigurén i nga me. Endaén kailanga no anggaén i Maistérowa nan.”

<sup>50</sup> Endob amun énggélíngoo Jesusey ni, bénréhén dob Jairowe ni mano, “Kago émbuku. Sarig go saén atin adi-adiy nga me.”

<sup>51</sup> Amun énggégumah i ro Jesuse dob lawi Jairowe, énda i nuwitén mahur taus saliyo bé Pedrowe, brab Juane, brab Santiagowe, brab de lukés i ngae ni. <sup>52</sup> Atin i kéluhanay de étéw ni dob lawie ni kémérew so brab ruungé roy ngae ni. Ménbéréh i Jesuse mano, “Kagom kémérew. Non i ngae ni énda ménléhuén, éndob ménfidngog saén.”

<sup>53</sup> Tidéw béno, sénbayat ro saén i Jesuse non gétiga roy ngae ni ménléhuén. <sup>54</sup> Endob génamak Jesusey kémér i ngae ni brab ténabarén mano, “Di, tek go!” <sup>55</sup> Sonom béno, i ngae ni méntébulé brab tékow méntek. Atin sénugu Jesuse bero bé iraya ro amaé no. <sup>56</sup> Toow fo ménggaif i de lukés i ngae ni. Endob bénréh Jesuse bero bé békén ureté ro dob de étéw i ni ménrigo.

## 9

*Sénugu Jesusey de folo bra ruwo kuyugén*  
<sup>1</sup> Fénsélimud Jesusey de folo bra ruwo kuyugén. Atin niraya no bero barakat inok géuwaa roy de déméruun brab géféféraréyo roy de saitan. <sup>2</sup> Brab sénugu Jesuse bero muret fantag bé kéréguléw i Tuluse bé de étéwén, brab muwa bé de déméruun. <sup>3</sup> Atin béréhén bero mano, “Kagom muwit éntingayén, fiyon fo ké tugé, taloo no réban, fiyon amaén, brab kurta, taloo no lékasa kom kégal. <sup>4</sup> Fiyon atiy lawie témayakuf begom, bati gom diyo taman tagaké kom i nan ingéd. <sup>5</sup> Buluk wén no ingéd énda tayakuféy de étéw begom, tékédan gom diyo, brab tagtag gom i de bubuk sébuwan dob de sékéy gom émfégétigan bé kukuméy Tuluse bero.”  
<sup>6</sup> Tidéw béno, ménagéw i de kuyugén ni ménangéy dob de ségiyo-giyo ingéd muret bé Fiyowe Uret, brab muwa ro do déméruun diyo.

<sup>7</sup> Bé béno, i Herode, sani méguléwe dob Galilea, énggélíngoo noy de rígonéy Jesuse. Toow fo ménggaif brab énda gésobuto no de, non wén i do étéw ménbéréh ro bé Juan Bautistawe méntébule non maro ké Juan i Jesuse. <sup>8</sup> Brab i de dumo béréhé roy Jesuse Elias méntéfégito. Brab i de dumo béréhé roy Jesusey toowe fo énggétah sénarigoy Tuluse muret méntébule. <sup>9</sup> Endob ménbéréh i Herode mano, “Fénkéling guy uléw Juane. Endob ati ni gélingoo ku fantag bé de ni?” Méuyot de ké gito noy Jesuse.

*Fénwaléy Jesuse médooy klohe amaén.*

<sup>10</sup> Amun énggéséfule i de apostol Jesus, béréh roy de rénigo ro. Tidéw béno, nuwitén beroy saén mangéy dob sébaane ingéd féndawét Betsaida. <sup>11</sup> Médooy de étéw énggégélingo fantag bé ni brab ménfuray ro bero. Méoror i Jesuse bé kégito nuwe bero, brab nuretén beroy fantage bé kéréguléw i Tuluse bé de étéwén. Fén-adi-adi né soy de déméruun bero.

<sup>12</sup> Amun sémingkufén, i de folo bra ruwo gétéw kuyug Jesuse ménangéy ro dob Beene brab ménbéréh ro maro, “Énda i batioy de étéw ni dini. Féagéwém bero inok mangéy ro dob de ingéd gédét dini. Diyo gébéléy ro amaé ro brab diyo ro so fidong.”

<sup>13</sup> Endob ménbéréh i Jesuse dob de kuyugén mano, “Iraya kom bero amaé ro.”

Endob séménumbul ro maro, “Énda i amaén dini saliyo bé limowe timan fan brab ruwo timan sédo. Hon i ayo tome de méléy amaén bé ni kédooy étéw?” <sup>14</sup> (Wén i limo ngibu do lagéy diyo.)

Atin béréh Jesuse bé de kuyugén mano, “Féésar gom i de étéw sélimo folo séngá sélumfuk.”

<sup>15</sup> Atin nodoroy de kuyugén i béréh Jesuse bero. <sup>16</sup> Tidéw béno, éndot Jesusey

limowe timan fan brab ruwowe timan sédo, atin léménégag dob lawayo brab ménfésalamat dob Tuluse. Tidéw béno, sénbaad-baadén i de fan brab de sédo, brab ni-rayén dob de kuyugén inok saaré ro dob de étéw. <sup>17</sup> I kéluhanay de étéw ménama ro médooy taman ménbésor ro. Tidéw béno, ténimu i de kuyug Jesusey de sama i de amaén brab ménféno i foloey bra ruwo timan dakél biton.

*I kéunur Pedrowe*

<sup>18</sup> Wén i no, i Jesuse ségétéwén saén démasal ménfélébu. Brab i de kuyugén ménangéy ro dob Beene. Atin fénénginsaa Jesuse bero mano, “Ati kébéréh i de médooy étéw ké ati Begéne ni?”

<sup>19</sup> Séménumbul ro maro, “Wén i de émbéréh maro, Juan Bautista go kun. I de dumo maro, Elias go kun. Brab i de dumo maro, Beemey énggétahe sénarigoy Tuluse kun méntébule.”

<sup>20</sup> Tidéw béno, ménénginsa i Jesuse man mano, “Dob begome, ati kébéréh gome ‘fantag bé Begéne?’”

I Pedrowe séménumbul mano, “Beemey Kristowe sénugu i Tuluse inok méguléw go bé de étéw.”

<sup>21</sup> Atin béréh Jesuse bero mano, “Kagom béréhén i ni dob ségiyowe.”

*I kéurey Jesuse fantag bé kéléhu ne*

<sup>22</sup> Atin féntaus Jesusey kébéréh ne mano, “I Nga i Kéilawane, sani Begéne, médooy rasayé kuwe. Brab ikaay de odoroy de Judio brab de odoroy de fadi brab de témoro bé kitabe, brab féléhué ro Begén. Endob dob gétéléwo nuwe gétérésangan, tébuleu.”

<sup>23</sup> Atin ménbéréh man i Jesuse mano, “Buluk atiy méuyote furay Begén, kailangan diguré noy kaane kétayan inok odoro noy kétayay Tuluse. Tidéw béno, kailanga no fédayday bé de kérégénéon ségiléw bé Begéne, fiyon fo ké féléhuén dob kruse. <sup>24</sup> Non atiy méuyote émféruu bé kéuyag ne, méléhu. Endob i méléhue bé kéfuray ne Begén, gédoté noy umule magufusa. <sup>25</sup> Ufama, fiyon fo ké i ségétéwe étéw gédoté noy kéluhanay éntingayéne dob duniyae ni, énda i atagéne buluk méléhu atin mangéy dob emfernowe. <sup>26</sup> Buluk atiy mémalawe muret fantag bé kéunur ne Begén, brab mémala so fantag bé de kébéréh gu, malané ku so buluk séfuleu moso réméndawu brab réméndawu i Boh guwe brab de télaki no. <sup>27</sup> Béréhé ku begom i toowe, wén i do dumo begom énda méléhu ro taman gégito bé kéréguléw i Tuluse bé de étéwén.”

*Enggiton i réndaw Jesuse.*

<sup>28</sup> Waléw gétérésangan tidéw bé kébéréh Jesuse bé de ni, nuwitén i Pedrowe, brab Juane, brab Santiagowe, atin ménangéy ro dob rotor i tuduke démasal. <sup>29</sup> I lala Jesuse

démasal, i falas ne ménfégalin, brab i kégal ne ménwaléy fute réméndaw.<sup>30</sup> Sonom béno, méntékow méntéfégitoy ruwowe gétéw lagéy ménsébéréh bé Jesuse. I ni do étéw, been i Moiseuse brab Eliase, sani do méntélataén sénarigoy Tuluse muret bé kébéréh ne.<sup>31</sup> Réméndaw soy de falas ro. Atin sébéréh-béréh ro bé Jesuse fantag bé kéléhu ne dob Jerusalem moso sabaf been i funay Tuluse séménugu de dob duniyae.<sup>32</sup> I Pedrowe brab dumo nuwe énggéfidos. Endob amun énggétékénal ro, énggito roy kéréndaw Jesuse brab de ruwo gétéw dumo no téménindég.<sup>33</sup> Amun féganayén tagak i de ruwo gétéw étéw i Jesuse, sénbérého Pedrowe mano, “Maistéro, toow fo fiyo non dob ni tom. Rémiigo gey téléw timan dung-dung. Sébaan i kaame de, sébaan i ka Moiseuse de, brab sébaan i ka Eliase de.” (Enda gétiga noy béréhé nuwe ni.)

<sup>34</sup> Amun émbéréh sénay Pedrowe, méntékow i rawéne méntégalung dob berowe. Brab ménggilak i de kuyugén ké météléb ro bé rawéne.<sup>35</sup> Atin wén i béréhe tidéw dob rawéne ni mano, “Been i niy Nga guwe fénémili gu. Féngélingo gom.”

<sup>36</sup> Amun téménrén i béréhe ni, énggito roy sébaa Jesuse saén. I de kuyugén méntané ro fantag bé ni, brab bé béno énda i ségétéw nureto ro bé de énggito ro.

<sup>37</sup> Bé sébaane de fuweh, léménudug ro tidéw dob tuduke, atin béalak i médoowe étéw i Jesuse.<sup>38</sup> Wén i ségétéwe lagéy dob kérara ruwe téménabar mano, “Maistéro, téngténgém i nga guwe. Been i buntunge nga gu lagéy. Ongoté ku dob Beeme uwaé mo damén.<sup>39</sup> Wén i no rahukoy saitane, atin tékow gékes. Atin i lowoh ne témingkog brab rémbéw i ba ne. Sénga tékélid gémedam, fédawéto no, brab mérugay na fo tékédanay saitane.<sup>40</sup> Nongot gu bé de kuyugém ké féféraryéy roy saitane, éndob énda gagané ro de.”

<sup>41</sup> Ménbéréh i Jesuse dob de ménlimud mano, “Enda sémarig gom bé Tuluse, brab toow gom do tete étéw. Lugoténun sétafik begom. Enda gétiga ku ké ati nay kéréugay i kétingkél guwe sétafik begom.” Atin bénrén Jesuse dob ni lagéy mano, “Uwitém diniy nga ma nan.”

<sup>42</sup> Amun fégédét i ngae ni dob Jesuse, rénahukoy saitane man brab méntuwar fulad-fulad. Tidéw béno téméninkog man. Atin fénféraryéy Jesusey saitane, brab i ngae ni ménadi-adi. Tidéw béno, fénséfule Jesuse man mangéy dob boh ne.<sup>43</sup> Ménggaif i kéluhanay de étéw bé barakat i Tuluse. Atin amun kéluhanay de étéw ménggaif ro bé no réniigo Jesuse, ménbéréh dob de kuyugén mano,<sup>44</sup> “Kagom lifotén i béréhé kuwe ni begom. I Nga i Kéilawane, sani Begéne, fékéfo séko bé de étéw sébanil Begén.”<sup>45</sup> Endob

bé béno gai, i de kuyugén énda énggésobuto roy béréhé nuwe. Bénunyéy bero inok énda gétiga roy atag ne. Atin mémala ro de ménginsa ké ati atag ne.

<sup>46</sup> Wén i no sébaan fuweh, ménséédél i de kuyugén ké ati isuwe bero toow gérotor.<sup>47</sup> Enggésobuto Jesuse ké atiy diyoe dob itunga ruwe. Mélaw éndotén i ségétéwe nga atin féntindégén dob tébing ne.<sup>48</sup> Atin bénrénén bero mano, “Fiyon atiy étéwe témayakuf bé ngae loo bé ni sabaf bé kéunur ne Begén, tayakufé no so Begén. Brab atiy témayakufe Begén, tayakufé no soy Tuluse ménféuwit Begén. Non atiy toowe térifantad bé begome, beeney toowe gérotor.”

<sup>49</sup> Tidéw béno, ménbéréh i Juane mano, “Maistéro, énggito gey i ségétéwe étéw démédel do saitan nusarén i dawét me féngéfararyén. Endob génlé gey non békén dumo tom.”

<sup>50</sup> Bang Jesuse, “Kagom géléén de. Non i békéne sébanil betom, dumo tom.”

### *I kéagéw Jesus mangéy Jerusalem*

<sup>51</sup> Amun gédétén i Jesuse démiyat dob lawayo, bénabaén fo ménsaréh mangéy Jerusalem.<sup>52</sup> Méntah i Jesuse séménugu bé de kuyugén mangéy dob sébaane ingéd dob sakuf i Samariawe inok tafaya ro gono no diyo.<sup>53</sup> Endob i de étéw diyo dob Samaria, énda ténayakuf ro de non gétiga ro ségétéw Judio mangéy Jerusalem.<sup>54</sup> I Santiagowe brab Juane, amun énggito roy ni, ménbéréh ro maro, “Kadnan, méuyot go de ké mongot gey aféy tidéw dob lawayo inok métuwég ro?”

<sup>55</sup> Endob séménling i Jesuse atin génléén bero.<sup>56</sup> Tidéw béno, méntaus ro mangéy dob ségiyowe gonon.

<sup>57</sup> Amun taus ro nén, i ségétéwe étéw ménsébéréh bé Jesuse mano, “Modoru Beem, fiyon fo ké ati ayo muwe de.”

<sup>58</sup> Séménumbul i Jesuse mano, “I de kufés, wén i tosong ahuro ro. Brab i de kloh manok, wén i salag ro. Endob i Nga i Kéilawane, sani Begéne, énda i gono ku témérén. Mélaw toow go fo kéréngan amuk modor go Begén.”

<sup>59</sup> Atin bénrénén dob ségiyowe étéw mano, “Furay go Begén.”

Endob séménumbul i ni étéw mano, “Kadnan, tungkasém na begén métaf mangéy lémbéng bé boh guwe.”

<sup>60</sup> Séménumbul i Jesuse mano, “Félébéngém bé de étéw énda munur ro Begén i de ménléhu ro. Endob i beeme, agéw go mangéy muret fantag bé kéféguléw i Tuluse bé de étéwén.”

<sup>61</sup> Wén man i ségiyowe étéw ménbéréh mano, “Kadnan, modoru Beem. Endob tungkasénu na mangéy mégétaw dob de lukés gu.”

<sup>62</sup> Séménambul i Jesuse mano, “Enda i ségétéw étéw démadu atin séméling. Loo so bé de kuyug gu. Buluk séméling ro, énda métoror ro ké féguléwoy Tuluse bero.”

## 10

### *Sénugu Jesusey de étéw*

<sup>1</sup> Tidéw béno, ménémili i Jesuse fitéw folo bra ruwo gétéw do lagéy. Atin sénuguén bero séruwo-ruwo métah dob de ingéd ayo no so. <sup>2</sup> Atin bénréhén bero mano, “Wén i médoos do étéw méuyot munur bé Fiyowe Uret. Ségiléw ro bé de buka kétéwén. Endob klohsaéni i begome do kémétéw. Dasal gom dob Kadnane inok émféuwit médoos na do kémétéw dob kaane ni kétéwén. <sup>3</sup> Amuk magéw gom, ingat gom. Non féuwit gu begom maak do bili-bili mangéy dob kéréra i de itu talun. <sup>4</sup> Kagom muwit réban, taloo no talufi, taloo no ségiyo sinilas. Brab kagom mérugay séuret-uret bé atiy étéwe gébalaka kom dob de aguwon. <sup>5</sup> Buluk mahur gom dob de lawi, béréh gom féfiyonéy Tulusey de étéw bati dob ni lawi. <sup>6</sup> Buluk i de étéw dob no bati fiyo, brab tayakufé ro begom do sénugu gu, féfiyonéy Tuluse bero. Endob buluk énda fiyo ro étéw, brab énda tayakufé ro begom do sénugu gu, énda so féfiyonéy Tuluse bero. <sup>7</sup> Bati gom dob no lawi témayakuf begom. Atiy amaéne brab inéméne iray ro begom, tanggaf gom. Non i begome do gémalbék kailanga kom i sukay gome. Brab kagom téfégalin tidéw dob sébaane lawi mangéy dob sébaane de. <sup>8</sup> Buluk mahur gom dob sébaane ingéd, brab ténayakuf ro begom, ama gom i éntingayéne iray ro begom. <sup>9</sup> Uwa gom i de démérurun dob no ingéd brab béréh gom dob de étéw diyo makom, ‘Endaén mérugayén taman bé gaiwe féguléwoy Tuluse begom.’ <sup>10</sup> Endob buluk mangéy gom dob sébaane ingéd brab énda tayakufé ro begom, angéy gom dob de aguwon dob no ingéd brab béréh gom makom, <sup>11</sup> ‘Fiyon foy de bubuk sébuwan dob de sékay gey, tag-tagé key so inok gétuwa kom i kukuméy Tuluse begom non nuret gey dob begomey fantage bé kéféguléw i Tuluse éndob mika gom de.’ <sup>12</sup> Atin béréhé ku begom, bé no gai, toow na fo gétimal i kékukum i Tuluse bé de étéw dob no ingéd bé kékukum ne bé de tete étéw dob ingéde Sodom.

<sup>13</sup> “Mékégédaw-gédaw gom do étéw bati dob Korasin, brab begome dob Betsaida. Buluk i de mékégaif rénigo gu dob begome ménrigo so dob de ingéd Tiro brab Sidon, ménrugayén i de étéw diyo mésar ro brab kéménégal ro do saku brab rénigono ro do awéw i de lowoh ro inok fégétuwa ro énggésénule ro bé de sala ro. <sup>14</sup> Endob toow na fo gétimal i kékukum i Tuluse begom moso bé kékukum ne bé de étéw dob Tiro brab

Sidon. <sup>15</sup> Brab i begome do étéw dob Kafernaum, méuyot gom téfégérotor taman dob lawayo. Endob ibéréh gom mangéy dob uleone emferno.”

<sup>16</sup> Tidéw béno, bénréh Jesuse dob de kuyugén mano, “Atiy mégélingoe begom, féfélingoé no so Begén. Brab atiy mikae begom, mika so Begén. Brab atiy mikae Begén, mika so bé Ménféuwite Begén.”

<sup>17</sup> Tidéw béno, i fitéwe folo bra ruwo gétéw ménagéw ro mangéy muret dob de ségiyo-giyo ingéd. Atin ménséfule ro toow fo moror brab ménbéréh ro maro, “Kadnan, fiyon foy de saitan odoroy de béréhé key buluk labité key i dawét me.”

<sup>18</sup> Atin bénréh Jesuse bero mano, “Enggito guy Satanase ménlawu tidéw dob lawayo maak kilot. <sup>19</sup> Niraya ku begom barakat inok fiyon fo ké gédaa kom i de ulé brab do sifitan, énda i kaid gom de. Brab i kéluhanay barakat Satanase sébanil betom énda i kaid tom de. <sup>20</sup> Endob kagom méoror sabaf sa bé i de saitan unuro ro begom. Yamula oror gom sabaf ménsulatén i de dawét gom dob lawayo.”

<sup>21</sup> Bé béno so, fénoror i Rémogor i Tulusey Jesuse. Déménasal mano, “Abay Kadnay lawayo brab fantade, fésalamata ku Beem non fénggétiga moy ni dob de étéw énda i féngganad ro, éndob bénunyéem dob de métilédéd brab énggéféganad. Hoo Abay, ménrigoy ni non kaam kétayan brab késuwatan.”

<sup>22</sup> Tidéw béno, ménbéréh man i Jesuse dob de étéw mano, “Sénarig i Abaye Begén i kéluhanane. Enda i gétigan bé atiy Ngae saliyo bé Abaye. Brab énda i gétigan bé atiy Abaye saliyo bé Ngae, brab fiyon atiy kétayay Ngae féfénggan ro de.”

<sup>23</sup> Tidéw béno, séménling i Jesuse dob de kuyugén ménsébéréh bero énda i ségiyo dumo ro mano, “Toow fo fénfiyoy Tuluse begom bé énggégito gom. <sup>24</sup> Béréhé ku begom, dob gétaho médoos do datu brab do sénarigon muret bé kébéréh i Tuluse ménuoyot ké gito roy énggito gome, éndob énda énggito ro de. Brab ménuoyot ro mégélingo bé énggélingoo kome, éndob énda énggélingoo ro de.”

### *I binuwayae fantag bé mégédawe étéw*

<sup>25</sup> Wén i no sébaan fuweh, i ségétéwe témoro bé kitabé ménangéy dob Jesuse. Atin ténukawa no fénénginsaan i Jesus mano, “Maistéro, ati fatute rignoné ku inok gédoté kuy toowe umul magufusa?”

<sup>26</sup> Séménambul i Jesuse mano, “Ati énggito muwe dob Ménsulate Kébéréh i Tuluse? Ati kégésobut me de?”

<sup>27</sup> Séménambul i ni lagéy mano, “Féimu go bé Kadnane Tulusém bé kéluhanay fédéw me, brab bé kéluhanay kamatu me, brab bé kéluhanay itunga muwe, brab bé kéluhanay

bagér me. Brab féimu go bé kéluhanay de dumo mo ringon so bé kéimu me bé kaame lowoh.”

<sup>28</sup> I Jesuse ménbéréh mano, “Katabuwan i nan késumbulém. Rigo moy ni inok gédoté moy tintuwe umul.”

<sup>29</sup> Endob i ni lagéy mika kémalanan. Mélaw ségiyo nén man i fénénginsa ne mano, “Endob ati dumo guwe fatut féimué ku?”

<sup>30</sup> Atin séménambul i Jesuse bé ni binuwaya mano, “Wén i no sébaan fuweh, i ségétéwe lagéy bé de Judio ménagew tidéw Jerusalem léménudug mangéy dob ingéde féndawét Jeriko. Amun diyoén dob de agéwon, ténulis i de tulisan. Lénubag ro, brab éndot roy éntingayéne kaan loo soy kégal ne. Brab ténagak ro gédétén méléhu. <sup>31</sup> Tidéw béno, ménggumah i ségétéwe fadi bé de Judio. Amun énggito noy ni lagéy, ténaraa no saén, atin méntaus magéw. <sup>32</sup> Tidéw béno, ménggumah i ségétéwe témabang dob de féngadafan, brab i beene Judio so. Amun énggito noy ni lagéy, fénggédéto no brab ténéngténngén singkow, atin méntaus so magéw. <sup>33</sup> Tidéw béno, i gétéléwe étéw ménggumah. Endob békén Judioy ni étéw. Beeney étéwe tidéw dob ségiyowe ingéd féndawét Samaria. Amun énggito noy ni lagéy ménfali, ménuray i éna nuwe de. <sup>34</sup> Fénggédéto no brab nuwaén i de falién brab bénausén. Atin fénkudaén i ni lagéy dob kuda ne brab nuwitén dob sébaane lawi kay de kana inok diyo fétausé noy kéfagifat ne de. <sup>35</sup> Dob gétunduge de fuweh, niraya no kurta i gefee bé ni lawi, brab bénréhén de mano, ‘Fagifatém i ni lagéy. Buluk kulang i ni kurta, bayada ku beam ké séfuleu.’”

Amun énggilid Jesuse nuret i ni binuwaya, fénénginsaa noy ségétéwe ni témoro bé kitabé mano,

<sup>36</sup> “Ati karang me de, ati isuwe bé de téléw ni gétéw étéw i tintuwe dumoy ni lagéy ténulis?” <sup>37</sup> Séménambul i ni maistéro mano, “I ségétéwe ménggédaw de.”

Atin i Jesuse bénréhén dob ni lagéy mano, “Rigo mo loo bé rénigoy ni étéw ménggédaw.”

<sup>38</sup> Amun diyo i Jesuse brab de kuyugén dob de aguworo, énggégumah ro dob sébaane ingéd. Diyo i ségétéwe libun fédawétén Martah. Atin ténayakufén bero dob lawi ne. <sup>39</sup> Wén i tuwaréy ne so libun fédawétén Maria. Ménsar gédét dob sékéy Jesuse brab méngélingo bé de toroé no. <sup>40</sup> Ménbuku i Martahe bé kéluhanay de galbékén témogoh, mélaw ménféngédét dob Jesuse ménbéréh mano, “Kadnan, émbuku go damén non i tuwaréy guwa nan fédayaé no begén gémalbék. Suguém inok tabanga no begén.”

<sup>41</sup> Séménambul i Jesuse mano, “Martah, toow fo ménbuku go bé médoowe galbékém. <sup>42</sup> Endob sébaan saén i fiyowe kailangan

rigonén. Fénémili Mariawey fiyowe de. Brab énda médotén dob beene.”

## 11

### *I dasal i Kadnane*

<sup>1</sup> Wén i no sébaan fuweh, amun énggilid i Jesuse démasal, i ségétéwe bé de kuyugén ménbéréh mano, “Kadnan, i Juan Bautistawe ténoroén i de kuyugén démasal. Toroén gey so démasal.”

<sup>2</sup> Séménambul i Jesuse mano, “Amuk démasal gom, dasal gom loo bé ni: ‘Abay, kéluhanay étéwe damén féngadafé ro Beem. Féguléwo mo damén i kéluhanay de étéw. <sup>3</sup> Irayan gey amaé key sénga fuweh. <sup>4</sup> Fésagada mo begey bé de sala gey loo so bé kéfézagada keye bé de énggésala begey. Atin kago fédayaén begey météngkad rémigo sala.’” <sup>5</sup> Féntaus Jesusey kébérah ne mano, “Ufama, i ségétéwe begom wén i dumo no brab ménangéy go diyo bé kérara kélungonone brab ménbéréh go mamo, ‘Adih, féngédawanu. Irayanu téléw timan fan. <sup>6</sup> Non wén i kana gu mantu séna ménggumah brab énda i féama gu de.’ <sup>7</sup> Atin sémambul i ni dumo mo mano, ‘Kago anggaén begén. Ménfintuén i de bégawa key, brab fidongén i de nga gey. Enda gééteku brab iray gu beam i nan ongoté mo.’” <sup>8</sup> Féntaus Jesusey kébérah

ne mano, “Gétiga ku amuk démayday go mongot, iraya no beam bé ongoté muwe. Békén miray sabaf bé dumo muwe, yamula sabaf bé énda mémala go mongot. <sup>9</sup> Mélaw béréhé ku begom, ongot gom dob Tuluse, atin irayén begom. Ay gom dob Tuluse amuk wén i kailanga kom, atin tabanga no begom. Dasal gom dob Tuluse atin sumbulo no begom, non buluk wén i mongot dob Tuluse bé éntingayéne, iray i Tuluse. <sup>10</sup> Buluk wén i féngédét dob Tuluse bé de kailanga no, tabangay Tuluse de. Buluk wén i démasal dob Tuluse, sumbulo no. <sup>11</sup> Ufama, ségétéw go boh, atin i nga me mongot sédo, énda iraya mo de ulé. <sup>12</sup> Taloo no mongot onok manok, énda iraya mo de sifitan. <sup>13</sup> Fiyon fo ké tete gom étéw, gétiga kom soy miraye bé éntingayéne fiyo dob de nga gom. Labi nay Tuluse toow fo fiyo, gétiga noy miraye fiyo na begom. Beeney Boh gome dob lawayo, brab irayén i Rémogor ne dob de étéw mongot de.”

<sup>14</sup> Wén i no sébaan fuweh, dénédél Jesusey saitane mow ménahur dob ségétéwe étéw. Amun i saitane ni méntékédan, énggébéréh i étéwe ni rénahuko no. Atin i de ménlimud do étéw ménggaif ro de. <sup>15</sup> Endob i de dumo bé de ménlimud ménbéréh ro maro, “Beelsebul, sani Satanase, i odoroy de saitane, i ménirayane de barakat inok tékédan.”

<sup>16</sup> Brab i de dumo bé de étéw ténukawa roy Jesuse bé kéongot ruwe de bé féténgténngén i féngélolonone de tidéw dob lawayo, inok

gétiga ro tidéw dob Tuluse. <sup>17</sup> Endob énggétiga Jesusey de itunga ro, mélaw ménbéréh mano, “Ufama, i ingéde énda séfagayun ro brab sétiboh ro, mébinasa. Taloo no i ségékurénge étéw dob sébaane lawi énda so séfagayun ro brab sékérít ro, waléy mébinasa. <sup>18</sup> Buluk i de sugu-sugué Satanase mésebaad énda géséfagayun ro, énda so gétindég i fangangatura nuwe. Bénréh guy ni non béréhé kom i démédelu saitan bé barakat Satanase. <sup>19</sup> Atin i fégedédél i de kuyug gom de, énda usaré roy barakat Satanase. Mélaw fégitoy de kuyug gom békén ka Satanase i barakat guwe. <sup>20</sup> Endob démédelu saitan bé barakat i Tuluse. Atin mélaw énggiton énggumah dob begomey gawe méguléw i Tuluse bé de étéwén.”

<sup>21</sup> Tidéw béno, fénggétiga Jesuse bero bé toow na fo barakatan bé Satanase mano, “Ufama, i Satanase ségiléw bé ségétéwe mantay bé lawi ne. Buluk i émbagère étéw bantaya noy lawi ne, brab wén i kulangé no, i de insodén énda i géfénakaw de. <sup>22</sup> Endob buluk gégumah i ségiyowe étéw toow na fo émbagér bé gefee lawi, gédoté noy kulangé nuwe sarigoy gefee de. Atin gédoté no soy kéluhanay languntamane dob lawi ne brab baade noy kéluhanay de éndotén.

<sup>23</sup> “I éndae modor Begén, sébanil Begén. Brab i mikae sétabang Begén, alangé no Begén.

<sup>24</sup> “Buluk i saitané mésut tidéw dob étéwe rénahuko no, sémgud dob tikare gonon séméléd téreno no. Endob buluk énda i gito no téreno no, émbéréh mano, “Séfuleu dob étéwe sungu gono ku ténagak gu.” <sup>25</sup> Tidéw béno, séfule brab gito noy tafaye ténidéwo no mélinis brab métintu nén. <sup>26</sup> Tidéw man béno, mésut brab muwit fitéw géféw mas na tete saitan dumo no mahur dob no étéw. Mélaw i no étéw toow na fo méfasang bé féganaye goho no.”

<sup>27</sup> Amun bénréh Jesusey ni, i ségétéwe libun tidéw dob de ménsélimud ménbéréh mano, “Toow fo méoror i libune ménggénga Beem brab réméniton Beem.”

<sup>28</sup> Endob ménbéréh i Jesuse mano, “Toow na fo méoror i de mégélingo bé kébéhéh i Tuluse brab odoro ro.”

### *I fégélolonone niray Jonase*

<sup>29</sup> Amun i de étéw minut ro médo ménsélimud géliwét bé Jesuse, ménbéréh mano, “Toow fo tete i de étéw bé ni gai. Mongot ro do mékégaif inok fégéloloné ro ké Begén i Kristowe, sani fénéмили i Tulus méguléw. Endob énda i méiray de bero saliyo bé mékégaife loo bé ménrigowe bé Jonase. <sup>30</sup> Loo bé fégélolonone nirayén dob de étéw dob Ninibé amun ménsut i Jonase méuyag tidéw dob sur i dakéle sédo, iraya ku séko fégélolonon i de étéw bé ni gai. <sup>31</sup> Bé gawe

kémukum i Tuluse, témbó i baiwe tidéw dob ingéde Séba bé de étéw méuyag béni. Non sénugudén tidéw dob tamanay duniyae mégélingo bé kégétiga Solomone. Endob béleewe ni wén i ségétéwe mas na gétigan bé Solomone ay ni, been i Begéne, éndob énda munur gom Begén. <sup>32</sup> Atin bé gaiy kékukum i Tuluse, i de énggétah étéw dob Ninibé témindég ro so témbó bé de étéw méuyag béleewe. Non ménunur ro brab énggésénule ro bé uret Jonase. Endob béleewe wén i mas na gérotor bé Jonase ay ni.

<sup>33</sup> “Énda i ségétéw témumon solo atin fédiyoé no dob énggébunéye taloo no dob fantad i kurénge fénléngkéb. Yamula fédiyoé no dob fégonone de inok atiy gégumahe étéw gito noy réndaw ne. <sup>34</sup> I moto muwe maak solo i lowoh me. Buluk fiyoy moto muwe, maak géfékaya non gégito go. Endob buluk i moto muwe ménsadil, maak délémon non énda gégito go. <sup>35</sup> Ingat gom mélaw inok i réndawe dob beeme békén waléy délémon. <sup>36</sup> Mélaw buluk tintu munur go, i lowoh me méféno bé géfékayae, brab énda i délémon de, non maak réméndaw i soloe dob beeme.”

### *Fantag bé de Fariseo*

<sup>37</sup> Amun énggilid i Jesuse émbéréh, i ségétéwe Fariseo sénéngkatén mangéy mama. Mélaw ménodor i Jesuse mangéy dob lawi ne brab ménsar diyo mama. <sup>38</sup> Amun énggito noy Jesuse énda méngguseén loo bé adat i de Judio, ménggaif i Fariseowe ni. <sup>39</sup> Bé béno so, ménbéréh i Jesuse mano, “I de begom do Fariseo, urahé kom i lowoh gome fingé fuweh saén. Endob dob de féféw gom ménféno bé teteé itungan brab do sala. Ségiléw gom bé de tabu mélinis fingé fuweh saén, éndob dungisan dob bukag ne. <sup>40</sup> Dufang gom do étéw. Bé kén ba rénigoy Tulusey de féféw gom loo soy de lowoh gom? <sup>41</sup> Mélaw iray gom do limus bé éntingayéne kagom atin waléy gom mélinis dob bukage so.

<sup>42</sup> “Éndob mékégedaw-gédaw gom do Fariseo non niraya kom i Tuluse fiyon bé géfoloe bé de faninu nohok gom, éndob dénigur gom i métintuwe brab kéimue bé Tuluse. I ni niray gom fatut rignoné kom éndob kagom digurén i sébaane de.

<sup>43</sup> “Mékégedaw-gédaw gom do Fariseo non méuyot gom bé fiyowe do saran dob lawie féngadafan. Brab méuyot gom ségifaén féngadatan dob de fadiyan. <sup>44</sup> Mékégedaw-gédaw gom non i de étéw marok waléy ro fiyo bé kéfuray ruwe begom, éndob been i funa ruwe waléy tete. I begome maak do lébéng énda i tandaén, gédaay de étéw énda gétiga ro de, funa ro géliyéw.”

<sup>45</sup> Atin i ségétéwe bero témoro bé de kuku-man ménbéréh mano, “Maistéro, bé kébéhéh me bé nan, féné mala mo so begey.”



<sup>46</sup> Séménbumbul i Jesuse mano, “I begome témoro bé kitabe, mékégedaw-gédaw gom, non sugué kom i de étéw bé médoowe. Maak féoboé kom bero do toow fo émbégat, éndob énda témabang gom de. <sup>47</sup> Mékégedaw-gédaw gom non ségiléw gom bé de katufua kom énda munur ro bé de sénarigoy Tuluse muret. Rémitigo gom fiyo do lébéngon kay de fénléhu i de katufua kom. <sup>48</sup> Mélaw fénggétiga kom i ménagayun gom bé réngoy de katufua kom non beroy do ménméléhu brab begom i do rémitigo do lébéngon. <sup>49</sup> Been i funane ménbéreh i Tuluse bé kégétiga nuwe mano, ‘Fén-uwito ku bero do muret fantag Begén, brab i de dumo de fénléhu ro brab i de dumo de fénrasy ro bero.’

<sup>50</sup> “Been i funa kome mékukum, non ménamung gom bé kéféléhue bé de kéluhanay sénarigoy Tuluse muret tidéw bé kélimbag i duniyae. <sup>51</sup> Tidéw bé kéléhu Abele taman bé kéléhu Sakariase, fénléhu dob élét i ahayane féngadafan tulakan brab mékétéfuwe sibéy. Hoo, bérehé ku begom i de étéw méuyag béni, mékukum ro sabaf bé de ni.

<sup>52</sup> “Mékégédaw-gédaw gom do témoro bé kitabe, non bénunéy gom i toowe dob de méuyot gétigan de. Brab mika gom munur bé toowe, atin anggaé kom i de méuyot munur.”

<sup>53</sup> Amun énggilid i Jesuse bé kébéreh ne, méntékédan dob no gonon, éndob i de Fariseo brab de témoro bé kitabé nangga ro bé de mékérit kériklamo ro brab médoó éntingayén fénginsae ro <sup>54</sup> tukawa ro téngkadén inok sumbulo no bero bé békéne damén katabuwan.

## 12

<sup>1</sup> Amun i ngibunéne do étéw ménsélimud géséeda ro do sékéy, féngganay Jesusey bérehé nuwe bé de kuyugén sungu mano, “Ingat gom inok énda miring gom bé kéunur i de Fariseo ubo-ubo saén. <sup>2</sup> I kéluhanane réngoy de étéw maak ténléb, mébukeh séko. Brab i kéluhanane dirungén, émfayag séko. <sup>3</sup> Atiy bérehé muwe dob kélungonone, gélingoon so dob fuwehe. Brab atiy ségurawé muwe dob gonone féntintu, been so gélingoon dob médoowe do étéw.

<sup>4</sup> “Bérehé ku begom do dumo gu, kagom mégilak bé géféléhue bé lowoh gome, éndob saliyo bé ni éndaén i gérigono no. <sup>5</sup> Bérehé ku begom i ati fatute kégilaka kom. Fégilak gom bé Tuluse non géféléhuo moy lowoh gome brab wén soy barakatén émféangéy begom dob emfernowe. Hoo, bérehé ku begom fégilak gom de.”

<sup>6</sup> Atin ménbéreh man i Jesuse mano, “Ufama, i de kloh manok toow fo mélémuy kéfébéléye bero dob fadiyane. Endob énda i sébaan de lénifot i Tuluse. <sup>7</sup> Atin i begome mas gom na balilaga bé de kloh manok. I

Tuluse énggétuwa no fiyon firoy i de buk gom dob de uléw gom. Mélaw kagom mégilak.

<sup>8</sup> “Bérehé ku begom, ati murete fantag bé kéunur ne Begén dob de étéw, ureté ku soy fantage bé kéunur ne dob adafay de télakiy Tuluse. <sup>9</sup> Endob atiy démirunge Begén dob adafay de étéw, dirungé ku so moso dob adafay de télakiy Tuluse.

<sup>10</sup> “Atiy émbérehé tete fantag bé Nga i Kéilawane, sani Begéne, émfésaganan. Endob i émbérehé tete fantag bé Rémogor i Tuluse énda émfésagada no.

<sup>11</sup> “I de sébanil Begén, buluk uwité ro begom dob de féngadafan taloo no dob de gémamak kukuman, inok métebo gom sabaf bé kéunur gome Begén, kagom mégilak taloo no émbuku ké ati késumbul gome. <sup>12</sup> Non i Rémogor i Tuluse toroé no begom ké atiy fatute bérehé kom.”

### *I binuwayae fantag bé kawasawe étéw*

<sup>13</sup> Wén i médoowe ménsélimud géliwét bé Jesuse. Ménbéreh i ségétéwe de dob Jesuse mano, “Maistéro, bérehém bé ofo guwe, irayén begén i baad guwe bé de languntaman fénléd i boh geye begey bé kéléhu ne.”

<sup>14</sup> Séménbumbul i Jesuse mano, “Enda i atura ku de maad ké ati séfiroy begom.” <sup>15</sup> Atin ménbéreh i Jesuse dob de étéw mano, “Kagom arumén! Békén bé kékawasawey funay étéwe fiyoy kéuyag ne.”

<sup>16</sup> Atin nureto Jesuse bero sébaan binuwaya fantag bé ségétéwe étéw kawasa mano, “Wén i safadén, fiyoy kéeruk i de nohok-nohokén. <sup>17</sup> I kawasawe étéw ménggitung, ‘Enda i fégono ku bé kéluhanay kéntéw guwe. Ati rigné kuwe? <sup>18</sup> Gétuwa ku, ay ni rigné kuwe. Gébaé kuy kiwot guwe, brab rémitigowu bé dakéle de, inok gétimuo kuy de kéntéw gu brab de éntingayén kagén. <sup>19</sup> Tidéw béno, mégitung, Ségétéwu bagian. Wén i kagéne bé éntingayéne fiyo kailanga ku bé firoye gébélintuwa. Témérénu. Mamau, minénu, brab méguyayau.’ <sup>20</sup> Endob i Tuluse bénrého noy ni étéw mano, ‘Dufang go! Bé ni kélungonon, méléhu go. Mélaw békénen kaam i éntingayéne nitongém.’”

<sup>21</sup> Atin féntama Jesusey ni binuwaya mano, “Ségiléw bé niy aruméne kawasa étéw énda modorén bé kétayay Tuluse.”

<sup>22</sup> Atin bénréh Jesuse dob de kuyugén mano, “Kagom émbuku fantag bé kéuyag gome, bé ati amaé kome, taloo no bé lowoh gome, bé ati kégalé kome. <sup>23</sup> Wén nay labi mélaga bé amaéne funa kom méuyag, brab wén nay labi mélaga bé kégale kay lowoh gome. <sup>24</sup> Fégitung gom i de kloh manok. Enda mohok ro taloo no kémétéw ro, brab énda i kiwot ro. Endob féamaéy Tuluse so bero. Atin mas gom na balilaga bé klohe manok. Mélaw toow na fo féamaé no begom. <sup>25</sup> Enda i étéw géfétaah bé kéuyag ne bé

kébuku ne, fiyon fo ké ségéuras saén. <sup>26</sup> Amun énda gérigono kom i ni kloh éntingayén, sedek émbuku gom bé de ségiyo? <sup>27</sup> Fégitung gom i de flores. Mérük ro fiyon fo ké énda gémalbék ro, taloo no rémigo ro do kégal ro. Endob béréhé ku begom, fiyon i Solomone toow fo kawasa datu, énda i kégalén loo bé de fiyo do falasén do flores. <sup>28</sup> Endob buluk loo bé nan i kéfékégal i Tuluse bé de kéroon bé singkowe ay nan méuyag, atin bé démoé ibérén in-ohén, békén ba fékégalé no so begom? Toow fo kloh i kéféginugut gome. <sup>29</sup> Kagomé démoyun émbuku bé amaé kome brab inémé kome. <sup>30</sup> Non i de étéw énda méngintulus ro, been i niy fégitungé ruwe taman émbuku ro. Endob i Abay gome dob lawayo gétiga noy kailanga kome. <sup>31</sup> Mélaw fédaya gom i Tuluse méguléw begom, atin iraya no begom éntingayén kailanga kom.

<sup>32</sup> “Do kuyug gu, kagom mégilak fiyon fo ké énda médoos gom, non kétayay Abay gome Tulus ké begom soy méguléw beroy Tuluse. <sup>33</sup> Fébély gom i languntama kome, brab iray gom dob de méskinan inok kawasa gom dob lawayo. Non dob lawayo, i de éntingayé kom énda i réménég de, taloo no ménakaw de, brab énda i ifés minasa de. <sup>34</sup> Non hon i gonoy tamuk me de, diyo soy itunga muwe brab fédéw me.”

#### *Fantag bé késéfule Jesuse*

<sup>35-36</sup> Atin ménuret man i Jesuse sébaan binuwaya fantag bé késéfule ne mano, “Ingat gom bé késéfule guwe loo bé de sugu-suguén ongot-ongot bé amu ruwe. Iring gom bé de ni sugu-suguén, mingat ro ongot-ongot bé amu ruwe séfule tidéw dob sébaane uyot. Maginsod ro, brab féréndawé roy solo ruwe inok géingat ro. Buluk gégumah, magad saén géungkaa roy béngawane. <sup>37</sup> Toow fo moror i de ni sugu-suguén bé kégumah i amu ruwe, non énggéingat ro ongot-ongot bé késéfule ne. Béréhé ku begom, i ni amu kémégal inok kémana brab fésaré noy de sugu-sugué no brab duwoto no bero. <sup>38</sup> Toow ro fo moror buluk énggito no bero énggéingat ongot-ongot fiyon fo ké gégumah kéréra kélungonon, taloo no ménalém kélungonon. <sup>39</sup> Atin fégétédém gom i ni, buluk i gefee bé lawié gétiga noy ati urase gégumah i ménakawe dob lawi ne, ingata no brab énda fédayaé no de ké ahuroy ménakawé lawi ne. <sup>40</sup> Brab i begome so, fatut mingat gom non i Nga i Kéilawane gégumah dob gaiwe énda karangé kom de gégumah.”

<sup>41</sup> Ménénginsa i Pedrowe mano, “Kadnan, béréhé moy ni binuwaya dob begeye saén do kuyugém, taloo no kay kéluhanane?”

<sup>42</sup> Atin i Kadnane séménumbul mano, “Atiy mégéroré brab métilédtéde sugu-suguén, been i sénarigoy amu ne méguléw bé kéluhanay galbéke brab iraya noy de

dumo no sugu-suguén bé de karo baad bé de amaén bé katabuwane gai. <sup>43</sup> Toow fo méoror i nan sugu-suguén ké gitoy amu ne gémalbék bé késéfule ne. <sup>44</sup> Béréhé ku begom, i amu i nan sugu-suguén sarigé no dob beeney kéluhanay languntama nuwe. <sup>45</sup> Endob mékégedaw-gédaw i ni sugu-suguén buluk mégitung mano, ‘Mérugay nay késéfule i amu guwe.’ Tidéw béno, féganayé no tafésén i de dumo no sugu-suguén do lagéy brab libun, atin mama brab miném taman molon. <sup>46</sup> Ati keeyén i mérigowe amuk i amu i nan tete sugu-suguén gégumah bé gaiwe békén karangé no, brab énda gétiga no de? I ni amu, amuk gito noy tete rigoné no, tortoré noy ni sugu-suguén atin fédiyoé no dob gonone emferno beroy de kéluhanay de énda munur.

<sup>47</sup> “I ni sugu-suguén gétiga no fo toow i kétayay amu ne rigonén, éndob énda rigoné no de. Mélaw i ni sugu-suguén mékukum moso toow fo gétimeal. <sup>48</sup> Endob i sugu-suguéne énda gétiga noy kétayay amu ne rigonén, atin réménigo énda fiyo no, mékukum éndob énda toowén gétimeal. I sénarigone bé médoowe, médoos ongoténe de. Atin i nirayane médoos, médoos ongoténe de.

<sup>49</sup> “Ménangéyu dini inok muwit maak aféy dob duniyae ni, brab méuyotu de damén ké mérinoén. <sup>50</sup> Kéfasanganu séko, brab tete i fédéw guwe ni taman gilid mérigoy ni. <sup>51</sup> Ati karangé kome funa ku ménangéy dini? Inok éndaén i sékérít dob ni duniya? Békén. Ménangéyu dini inok mésébaad i de étéw. <sup>52</sup> Tidéw béleewe, i de limo gétywé dob ségékurénge, mésébaad ro sabaf bé ati Begéne ni. I téléwe de énda magayun ro bé ruwowe de, taloo no i ruwowe de énda magayun ro bé téléwe de. <sup>53</sup> Mésébaad ro sabaf bé kéunur ruwe. I bohe brab de ngaén lagéy énda séfagayun ro. Loo so bé idénge brab de ngaén libun, énda séfagayun ro.”

<sup>54</sup> Ménbéréh soy Jesuse dob de médoos étéw mano, “Dob ni gonon, buluk gégito gom bé rawéne dob élédon, magad i kébéreh gome, ‘Rémana séko.’ Atin rémana ba. <sup>55</sup> Atin buluk wén i réfuruh tidéw déligdigian, béréhé kom, ‘Méduf sékoy gaiwe ni.’ Atin méduf ba. <sup>56</sup> Gétiga kom i méréhe bé atag i éntingayéne dob fantade ni brab dob lawayo. Sedek énda gétiga kom i atag i de rigonéy Tuluse bé béleewe? Non mika gom munur.

<sup>57</sup> “Atin sedek énda mégitung gom bé atiy fiyowe rigoné kom inok énda mékukum gom moso? <sup>58</sup> Buluk wén i dumo mo sébanil, atin uwité no beam dob de kémukum inok sétiyawan, buluk diyo gom séna dob de agéwon, béréh go fiyo inok séfégayun gom bé énda séna gégumahén dob adafay de kémukum. Non i de kémukum séko irayén beam dob de sundalo, brab i de sundalo

férisuné ro séko beam. <sup>59</sup> Béréhé ku begom, énda séko géésut go tidéw dob férisunone taman énda gébayada moy kéluhanay késalaa muwe.”

### 13

<sup>1</sup> Bé béno so, i médoowe do étéw bénréh ro dob Jesusey fantage bé de étéw tidéw Galilea. Fénféléhu i Datue Pilato bero bé lala ruwe témulak dob Tuluse. <sup>2</sup> Séménambul i Jesuse mano, “Amun i do no étéw tidéw Galilea fénléhu loo bé no, makom ké toow ro na fo wén i sala ro bé de dumo ro bati dob Galilea, brab been i funa ruwe ménléhu. <sup>3</sup> Béréhé ku begom, békén. Endob saliyo ké gésénule gom témagak bé tetee adat gom, méléhu gom so ségiléw bé berowe. <sup>4</sup> Atin fantag bé de folo bra waléw ménléhu dob Siloe bé kétuwongoy tambalae bero, makom ké mas na wén i sala ro bé de dumo ro bati dob Jerusalem? <sup>5</sup> Béréhé ku begom, békén. Endob saliyo ké gésénule gom témagak bé tetee adat gom, méléhu gom so ségiléw bero.”

<sup>6</sup> Atin bénréh Jesuse beroy ni binuwaya mano, “Wén i ségétéwe étéw, wén i safadén. Nohokén i sébaane kayéw méama i onok ne. Nangéyén ténéngténg ké wén i onokén, éndob énda i énggito no de. <sup>7</sup> Tidéw béno, bénréhén dob étéwe témalima bé safad ne ni mano, ‘Bé rugay i téléwe gébélintuwa dé moyunu séfule séméléd ké wén i onok i ni kayéw, éndob énda foy énggito gu de. Mélaw tuwóngém, non ransiné no saén usarén i ni fantad.’ <sup>8</sup> Endob séménambul i étéwe ni témalima de mano, ‘Fédayaén na bé rugay i ségébélintuwaé atin kaluto ku géliwét de. Brab rigono ku abuno funa no bobo. <sup>9</sup> Buluk bé sebaano bélintuwa gégumah mégonok, fiyo. Buluk énda, been nay no tuwóngén.’”

#### *Nuwa Jesusey libune*

<sup>10</sup> Wén i no gai kéféngadaf i de Judio, sani gaiwe kétéren. Dob no gai, téménoro i Jesuse dob sébaane lawi féngadafa ro. <sup>11</sup> Wén i ségétéwe libun diyo békutén non fénderuuy saitane. Been i funa nuwe ménfoloén bra waléw gébélintuwa énda géfééntangén témindég fiyon kloh. <sup>12</sup> Amun énggito Jesuse, sénbérého no métanug mano, “Adi-adi gon!” <sup>13</sup> Brab nahay Jesusey de kéméren dob libune ni, brab bé béno so énggétindég mééntang. Atin dénayéw i libune niy Tuluse.

<sup>14</sup> Endob i uléwe bé no lawi féngadafan toow fo ménkérít non fén-adi-adi Jesusey ni libun bé gaiwe kétéren. Mélaw ménbéréh i ni lagéy dob de étéw mano, “Wén i ném gétérésangan bé ségéfadiyane gémalbék tom, mélaw ay gom dini féuwa bé ni ném gétérésangan. Endob kagom mangéy dini féuwa bé gaiwe kétéren.”

<sup>15</sup> Endob ménbéréh i Jesuse mano, “Enda toow gom munur dob Tuluse, ubo-ubo say kéféngintoow gome. Buluk i safi gome taloo

noy kuda gome térumen, ukohé kom so dob nikéto kome de brab angéyé kom féinémén fiyon fo ké gai kétéren. <sup>16</sup> I libune ni ségétéw dumo tom Judio non séfu Abraham so, brab fénderuuy saitane foloén bra waléw gébélintuwa. Fatut uwaén fiyon fo ké gai kétéren.” <sup>17</sup> I de étéw diyo énda ménuyot ro bé Jesuse, ménmala ro bé kébéreh ne. Endob i de dumo de, toow ro fo méoror non bé kéluhanay de mékégaif rénigo Jesuse.

<sup>18</sup> Atin ménbéréh i Jesuse mano, “Ati ségiléwoy kéféguléw i Tuluse bé de étéwén? Ati fégingo kuwe de? <sup>19</sup> Ségiléw na bé toowe fo kloh béne, éndot i étéwe brab nohokén. Atin téménunoh brab mérük taman ménwaléy dakél kayéw. Brab salagay de kloh manok i de fongo no.”

<sup>20</sup> Tidéw béno, ménbéréh man i Jesuse mano, “Ati fégingo kuwe bé kéféguléw i Tuluse bé de étéwén? <sup>21</sup> Ségiléw bé fégefééruke fan éndot i libune brab sénlawékén bé téléwe géasad bé arinahe taman ménruk i kéluhanane brab ménwaléy médoow.”

#### *Imérate béngawan*

<sup>22</sup> Atin amun ménagaw i Jesuse mangéy Jerusalem, ménawét dob de ségiyo-giyo do ingéd brab téménoro diyo. <sup>23</sup> Atin wén i ségétéwe étéw ménénginsaán de mano, “Kadnan, kloh saén i de étéw fukaséy Tuluse?”

Séménambul i Jesuse manó, <sup>24</sup> “Rigo moy tamay gagané muwe mahur bé mératé béngawan mangéy dob lawayo, non béréhé ku beam, médoow do étéw i témélamawe mahur, éndob énda gagané ro de. <sup>25</sup> Non i gefee de témindég brab fintué noy béngawane. Atin amuk diyo gom dob liyuwe, témuktuk gom, fégedaw-gédaw émbéréh makom, ‘Kadnan, ungkaém i fintue ni inok géahur gey.’ Endob sémumbul mano, ‘Enda gélolo gu begom. Brab énda gétiga kuy tidéwo kome de.’ <sup>26</sup> Tidéw béno, émbéréh gom makom, ‘Ménama gey brab méniném gey sétifon Beem. Brab téménoro go dob de ingéd gey.’ <sup>27</sup> Atin sémumbul mano, ‘Enda gélolo gu begom. Brab énda gétiga kuy tidéwo kome de. Begom i de dé moyun rémigo tete. Férayu gom Begén.’ <sup>28</sup> Atin i begome moso kémérew gom brab kémigét i de kifé kom buluk gito gom i katufua kome Abraham brab Isake, brab Jakobe, brab i kéluhanay sénarigoy Tuluse muret diyo ron dob lawayo. Endob i begome énda géahur gom diyo. <sup>29</sup> Wén soy de médoow étéw békén Judio tidéw déligdigan, sébangan, tégenon, brab élédon, diyo ro géésar mama beroy Tuluse ké féguléwo no bero. <sup>30</sup> Atin bé béno, i de énggétah béni waléy ro moso do géfuray. Brab i de énggéfuray béni waléy ro moso gééat.”

<sup>31</sup> Bé béno so, i de dumo Fariseo bénréh ro dob Jesuse maro, “Tagakém i ni gonon brab

angéy go dob ségiyowe gonon non méuyot i Datue Herod méméléhu Beem."

<sup>32</sup> Endob séménumbul i Jesuse mano, "Agéw gom brab béréh gom bé Herode mégakar étéw, fétausé kuy kéféféreráy guwe bé de saitan brab kéuwa guwe bé de étéw béleewe ni brab démo. Atin dob gétéléwo nuwe gai, géfégilido kuy galbék guwe dini. <sup>33</sup> Endob i Begéne kailangan tausu béleewe brab démo brab dob téléwe. Non i toowe, énda i sénarigoy Tuluse muret bé de kébéhéhn féléhuén saliyo dob Jerusalem."

<sup>34</sup> Tidéw béno, ménbéréh i Jesuse fantag bé adat i de étéw dob Jerusalem mano, "Do étéw dob Jerusalem, tete i fédéw guwe fantag bé begome non fénléhu gom i de sénarigoy Tuluse muret brab nibéro kom batéw i de sénugoy dob begome taman ménléhu ro. Firoy gule i kétaya kuwe témimu begom loo bé kétimu i méritone manok télikub-kubo noy de fiyakén bé de fafakén? Endob ménika gom de. <sup>35</sup> I lawi gome métagak moso. Endaén gito mo Begén taman bé gaiwe gégumah ké béréhé mo moso, 'Féfiyonéy Tuluse damén i gégumahe tidéw dob Kadnane.' "

## 14

### *Nuwa Jesusey lagéye*

<sup>1</sup> Wén i no sébaan fuweh gai kétéren, ménangéy i Jesuse mama do lawi i ségétéwe odoroy de Fariseo. Atin i de sébanil bé Jesuse ténulik ro inok gito roy funa ruwe de témébo. <sup>2</sup> Diyo soy ségétéwe rémambuk. Atin ménfégédét dob Jesuse. <sup>3</sup> Atin fénénginsaa Jesusey de Fariseo brab de témoro bé kitabé mano, "Fakay ba dob kitab tomey muwae bé gaiwe kétéren?"

<sup>4</sup> Endob ménantés ro. Mélaw génamak Jesusey étéwe déméruun atin nuwaén brab ménadi-adi. Tidéw béno, féngagwén. <sup>5</sup> Atin fénénginsaa Jesusey de étéw ténulik mano, "Buluk wén i nga gom taloo no safi gom ménlawu dob kalute ménalém wén i wayég de bé gaiwe kétéren, békén ba fagayasé kom bégéngén mésut dob kalute fiyon fo ké gai kétéren?"

<sup>6</sup> Endob ménantés ro non énda i éntingayén késumbul ro de.

<sup>7</sup> Atin wén i de étéw sénéngkat ro mama diyo ménuyot ro mésar dob de fiyo saran kay de gérotor étéw. Amun énggito Jesusey ni, nuretén beroy ni binuwaya mano, <sup>8</sup> "Amuk wén i séméngkat begom déméngan bé sébaane uyot, kagom mésar dob de fiyo saran, non amuk wén i do étéw toow na fo gérotor sénéngkat, karoy de fiyo saran. <sup>9</sup> Tidéw béno, i séméngkate begom fégédét inok kédané no begom dob de sara kom brab fégaliné no begom mangéy dob mase na gérifantad gonon. Atin been i funa kome mémala. <sup>10</sup> Yamula, buluk sénéngkat gom,

angéy gom sar dob de gérifantad saran inok i séméngkate mangéy fégédét dob begome brab émbéréh mano, 'Do adih, énggomén, diyo gom dob de fiyo ni saran.' Ini géiray begom fiyo kéfégadat dob téngaangay de médoó étéw. <sup>11</sup> Non i kéluhanay de étéw félangka-langka waléy ro gérifantad. Brab i kéluhanay de étéw térifantad waléy ro gérotor."

<sup>12</sup> Tidéw béno, ménbéréh i Jesuse dob gefee ni karagiya mano, "Buluk rémigo go karagiya, kago séngkatén say de gélolo mo, do dumo mo, brab do samungém, brab do étéw kawasa dumo mo ségédét. Buluk rignoné moy ni, sémulu ro so séméngkat beam inok gésulio ro beam. <sup>13</sup> Yamula, amuk rémigo go karagiya, séngkatém i de méskinan, de fikát, de kimoyén, brab do langafén. <sup>14</sup> Mélaw féfiyonéy Tuluse beam fiyon fo ké énda gésulio ro beam. Sulioy Tuluse beam bé gaiwe kétébule i de métintu étéw."

### *I binuwayae fantag bé karagiyae*

<sup>15</sup> I ségétéwe bé de ménsar mama, ménbéréh mano, "Toow fo méoror i de étéw mama beroy Tuluse dob kéféguléw ne."

<sup>16</sup> Amun énggélíngoo Jesusey ni, nuretén i sébaane binuwaya mano, "Wén i ségétéwe étéw lagéy réménigo dakél karagiya brab séméngkat médoó étéw. <sup>17</sup> Amun énggégumah i gaiy ni karagiya, i ni étéw sénuguén i sugu-sugué nuwe mangéy méréh dob de étéw sénéngkat ro, 'Méntafayén i kéluhanane. Enggomén, angéy gomén dob karagiyae ni.' <sup>18</sup> Endob énda ménangéy ro diyo. Yamula béréh roy de funa ro énda géangéy diyo. I sébaane de mano, 'Bukué ku, énda géangéyu diyoan, non mantuwu séna ménléy fantad, angéy ku téngténgén.' <sup>19</sup> I géruwowe de ménbéréh mano, 'Bukué ku, énda géangéyu diyoan, non mantuwu séna ménléy folo timan safi brab magéwu angéy ku bero langunén.' <sup>20</sup> I gétéléwe de ménbéréh mano, 'Bukué ku, énda géangéyu diyoan, non mantuwu séna ménawag.' <sup>21</sup> I sugu-suguéne ni ménule brab béréhén dob lagéye gefe karagiya i kéluhanay de ni. Mélaw toow fo ménkérit i ni gefe karagiya. Tidéw béno, béréhén dob sugu-sugué nuwe mano, 'Fagayas go, angéy go dob de agéwon brab dob de kalsada, brab uwitém diniy de méskinan do étéw, do kimoyén, do langafén, brab do fikát.' <sup>22</sup> Atin ménagéw i ni sugu-suguén. Tidéw béno, ménséfulé mangéy dob gefee ni karagiya, brab béréhén de mano, 'Rénigo guy sénugu me begén, éndob énda séna féno i lawie bé étéwe.' <sup>23</sup> Atin i gefee ni karagiya béréhén dob sugu-sugué nuwe mano, 'Agéw go mangéy dob de agéwon mangéy dob de kloh ingéd brab fiyon dob de tuduk, brab uwitém i de étéw diyo mangéy dini, méuyotu de ké méféno étéw i lawi guwe

ni. <sup>24</sup> Endob i de étéw sénéngkat gu sungu, énda gétem-tem ro bé de amaén ténafay gu.' ”

<sup>25</sup> Wén i no sébaan fuweh, amun ménagéw i Jesuse, ménodor i de médo do étéw géliwét de. Atin sélingén bero mano, <sup>26</sup> “Fiyon atiy méuyote modor Begén, éndob mas nay kéimu ne bé de lukésén, brab bawag ne, brab de ngaén, brab de dumo no sétiman idéng, brab i kaane lowoh, énda médaitén waléy kuyug gu. <sup>27</sup> Atin fiyon atiy étéwe énda fédaydayén bé de kérégénéon fiyon fo ké félluén dob kruse, énda médaitén waléy kuyug gu. <sup>28</sup> Ufama, buluk wén i méuyot rémigo lawi, békén ba mésar na métah inok fégitungé no ké firoy i laga i kérigowe de, inok gétiga no ké wén i katabuwan kurtaén féféfégilidén de? <sup>29</sup> Buluk féngganayén saén i kérigo nuwe de, atin énda féféfégilidén de, waléy sébayat i de étéw gégito de. <sup>30</sup> Maro, ‘Dufang i ni étéw. Féngganayén saén i kérigo nuwe de, éndob énda féféfégilidén de.’ <sup>31</sup> Taloo no, i ségétéwe datu mangéy sétiboh bé sébanile de datu. Békén ba mésar na métah brab fégitungé no ké gagané no bé foloé ngibu sundalo no kuntra bé ruwowe folo ngibu sundaloy sébanile de? <sup>32</sup> Buluk gékarangay datue ni bé énda gégagay kaane sundalo, émféuwit sarigo no mangéy malak bé sébanile de datu amuk mérayu séna inok mékédan i kétéasik ne, éndaén i nonoménn brab éndaén géséfule i kétéasik ne. <sup>35</sup> Enda fiyo no bé fantade taloo no bé abunowe. Fatut ibérénn saén. Tuntay gom i ni énggélíngoo kom.”

## 15

### *I méttadine bili-bili*

<sup>1</sup> Wén i no sébaan fuweh, amun ténoro Jesusey de étéw, ménggégumah i de médo lémfifal kubrador brab de tete étéw mangéy mégélíngo. <sup>2</sup> Wén soy do Fariseo brab do témoro bé kitabé diyo. Atin sabaf bé kéika ruwe bé de tete étéw, ménrikلامو ro maro, “I ni lagéy méuyot témayakuf bé de tete étéw brab séréngan na bero mama.” <sup>3</sup> Mélaw nureto Jesuse bero do binuwaya mano,

<sup>4</sup> “Amuk i ségétéwe begom wén i mératu bili-bili no brab méntadin i sébaane de, ati rígoné muwe? Békén ba tagaké moy siyowe de folo bra siyow dob fétabtabane, atin angéy mo sélédén i sébaane de méntadin taman gito mo? <sup>5</sup> Tidéw béno, buluk gito mo, duwalé mo mule toow fo méoror. <sup>6</sup> Brab tabaré moy de dumo mo brab béréhé

mo dob berowe, ‘Toowu fo méoror non énggito guy méntadine bili-bili gu. Enggomén, rémigo tom karagiya.’ ” <sup>7</sup> Atin féntaus Jesusey kébéréh ne mano, “Loo so bé niy Tuluse. Toow fo méoror amuk wén i ségétéw tete étéw gésénule brab tagaké noy teteé adatén, atin rígoné noy kétayay Tuluse. Mas méoror i Tuluse bé ni ségétéw étéw ménggésénule bé kéoror ne bé de siyow folo bra siyow fiyo étéw énda kailanga roy gésénulee.”

<sup>8</sup> Ménuret man i Jesuse ségiyo binuwaya mano, “Wén i ségétéwe libun wén i folo timan balilaga félatahén. Atin méntadin i sébaane de. Ati rígoné nuwe? Témumon solo brab kodosé noy lawi ne séléde no taman gito noy ni sébaan féлата méntadin. <sup>9</sup> Tidéw béno, tabaré noy de dumo no brab béréhé no bero mano, ‘Toow fo méororu non énggito guy féлата guwe méntadin. Enggomén, rémigo tom karagiya.’ ” <sup>10</sup> Féntaus Jesusey kébéréh ne mano, “Béréhé ku begom man, i de télakiy Tuluse toow ro fo méoror amuk wén i ségétéw tete étéw gésénule brab tagaké noy teteé adatén atin rígoné noy kétayay Tuluse.”

### *I dufange nga*

<sup>11</sup> Atin nuret Jesusey gétéléwe binuwaya mano, “Wén i ségétéwe étéw lagéy wén i ngaén ruwo gétéw lagéy. <sup>12</sup> Wén i no sébaan fuweh i tuwaréye bé de ngaén ménangéy dob boh ne mano, ‘Boh, irayém begén i baad guwe bé de languntaman katom.’ Mélaw i boh ne bénaadén i kéluhanay languntama ruwe dob ruwowe gétéw ngaén. <sup>13</sup> Enda mérugayén tidéw béno, i tuwaréye bé de ngaén fénbéléyén i kéluhanay kaane baad. Atin ménagéw ménangéy dob mérayu ingéd, brab nuwítén i kurta ne. Diyo séninggulaén i kéluhanay kurta ne bé kédufang ne. <sup>14</sup> Tidéw béno, ménggumah i dakéle lénggob dob kéluhanay sugud i no dakél ingéd. Atin toow fo mélayaf i dufange ni étéw, non éndaén i kurtaén. <sup>15</sup> Mélaw ménahur dob sébaane galbék kay ségétéwe bati diyo. Sénuguén dob fantad ne émféama babuy. Non bé toowén fo mélayaf, <sup>16</sup> méningar bé amaéy de babuy. Endob énda i mirayan de kéama. <sup>17</sup> Tidéw béno, énggétiga noy kédufang ne atin ménggitung man, ‘I kéluhanay de sugu-suguéy boh guwe, gaba-gabay de amaé ro. Endob ay niwu méléhu mélayaf. <sup>18</sup> Séfuleu mangéy dob boh guwe brab béréhé ku diyo, Boh, ménsalau dob Tuluse brab dob beeme. <sup>19</sup> Endaén médaitu fédawété mo ngaém. Endob fégdaw go begén. Rigo mo begén sébaan bé de sugu-sugué mo.’ ” <sup>20</sup> “Mélaw ménule. Amun mérayu séna dob lawi ruwe, énggitoy boh ne brab mén-uray i éna nuwe de. Léménentu bénalakén i nga ne nékéfénn brab narékén. <sup>21</sup> Atin ménbéréh i nga ne mano, ‘Boh, ménsalau dob Tuluse

brab dob beeme. Endaén médaitu fédawéto mo ngaém.' <sup>22</sup> Endob i boh ne ténawagén i de sugu-sugué no brab bénréhén bero mano, 'Féeraan gom. Uwit gom i toowe fo fiyo kégal brab fékégal gom de. Fétisingo kom brab fésafatoso kom. <sup>23</sup> Atin sumbali gom i kagéne toow fo bobo nati safi. Rémingo tom dakél karagiya. <sup>24</sup> Non i nga guwe maak ménléhu, éndob béleewe ni méuyag. Maak méntadin, éndob béleewe ni énggiton.' Tidéw béno, réningo roy dakéle karagiya.

<sup>25</sup> "Endob béno so, ménggégumah i ofoe ngaén lagéy tidéw dob de galbéko no. Amun gédatén dob lawie, ménggaif bé énggélíngoo noy kantawe brab énggito noy de étéw méstayaw. <sup>26</sup> Mélaw ténabarén i ségétéwe bé de sugu-sugué ro brab ménénginsa ké ati rignoné ruwe. <sup>27</sup> Séménumbul i ni sugu-suguén mano, 'Ménséfulé i tuwaréy me. Sénugu i boh me begey séménumbali bobo nati safi, non i tuwaréy me ménséfulé énda i sugugén.' <sup>28</sup> Tidéw béno, toow fo ménkérít i ofo ne lagéy, brab énda méntausén dob lawie. Mélaw i boh ne ménsut brab ménfégdaw-gédaw inok mahur dob lawie. <sup>29</sup> Endob bénréhén dob boh ne mano, 'Géménalbéku bé froye gébélintuwa brab énda fénlis guy fénrigo muwe begén. Endob énda foy nirayém begén fiyon sébaan kambing inok rémígowu karagiya begey i de dumo gu. <sup>30</sup> Endob i ni ngaém ménraréy, brab séninggulaén i éntingayéne nirayém de bé de kédufanga no. Endob amun ménulé, sénumbalio mo bé boboe nati safi.' <sup>31</sup> Séménumbul i boh ne mano, 'Adu, bati go dini sénga tékélid brab i éntingayéne kagén, kaam so. <sup>32</sup> Endob fatut rémigo tom karagiya inok féténgténg tom i kéoror tome non i tuwaréy me maak ménléhu, éndob béleewe méuyag. Brab maak méntadin, éndob béleewe énggiton.' "

## 16

<sup>1</sup> Atin nuret Jesuse bé de kuyugén i ni binuwaya mano, "Wén i ségétéwe kawasa étéw, wén i sénarigo nuwe lémfiful. <sup>2</sup> Amun énggélíngoo amu nuwey ni, ténabarén i sénarigo nuwe ni brab ménénginsa mano, 'Ati ni énggélíngoo ku fantag beem? Fénakawa mo begén? Béréhém begén i kéluhanay kériigo muwe bé kagéne kurta. Non éndaén fakayén sarigo ku beem. Mélaw kédané ku beem dob ni galbék.' <sup>3</sup> Tidéw béno, i sénarigone ni ménggítung mano, 'Ati rignoné kuwe, ké kédané no begén dob ni galbék? Enda émbagéru gémalbék mérégén loo bé kémalute. Atin mémalawu mongot limus. <sup>4</sup> Gétiga kuy ati rignoné kuwe inok buluk mékédanun dob galbék guwe ni, tayakuféy de étéw so begén dob de lawi ro.' <sup>5</sup> Tidéw béno, ténabarén i kéluhanay de étéw énggétong dob amu nuwe ni. Atin bénréhén dob sunguwe de mano, 'Firoy i utong me bé amu guwe?'

<sup>6</sup> Séménumbul i ni étéw mano, 'Mératu dakél latah nor.' Atin ménbéréh i sénarigone ni mano, 'Ay ni sulate bé utong me. Sar go brab sulatém bé limo folo saén dakél latah nor.' <sup>7</sup> Tidéw béno, fénénginsaa noy géruwowe ni étéw énggétong mano, 'Firoy i utong me bé amu guwe?' Séménumbul mano, 'Séngibu gésaku faréy.' Atin bang i sénarigone ni, 'Ay ni sulate bé utong me. Sar go brab sulatém bé waléw ratu gésaku saén.' <sup>8</sup> Tidéw béno, amun i amu nuwe ni énggélíngoo noy kéluhanay réningoy sénarigo nuwe ni, dénayéwén mano, 'Toow fo métilédéd i ni étéw lémfiful.' " Atin féntaus Jesuse kébérehé ne mano, "I de étéw dob duniyae ni mas na furung ro maguyag bé de méngintulus. Non tafayé roy kéfaguyag ruwe dob de géfuray gai moso. Atin i de étéw méngintulus fatut so tafayé roy kéfaguyag ruwe dob de géfuray gai moso dob lawayo.

<sup>9</sup> "Mélaw béréhé ku begom, usar gom i kurta gome fégétabang bé de étéw méksinan. Atin i Boh gome dob lawayo tayakufé no begom diyo. <sup>10</sup> Buluk mésarigon go bé klohe, mésarigon go so bé médoowe. Endob buluk énda mésarigon go bé klohe, énda so mésarigon go bé médoowe. <sup>11</sup> Atin amuk énda mésarigon gom bé de funan méungangén dob duniyae, énda so mésarigon gom bé toowe fo funan méungangén dob lawayo. <sup>12</sup> Buluk énda mésarigon gom bé tamuk i dumo gome étéw béni, énda so sémarig i Tuluse begom bé tamuke dob lawayo."

<sup>13</sup> Atin ménbéréh man i Jesuse mano, "Enda i sugu-suguén fakay galbéko no séréngan i ruwowe gétéw amu. Non amuk mégédaw bé ségétéwe de, mérarék bé ségétéwe de. Taloo no odoro noy kétayag ségétéwe de, siyawé noy ségétéwe de. Mélaw énda fakay go modor bé Tuluse amuk fégitungé mo saén i kurtae."

<sup>14</sup> Diyo soy de Fariseo do toow fo méuyot bé kurtae. Amun énggélíngoo roy ni kétoro, déniyangka roy Jesuse. <sup>15</sup> Mélaw bénrého Jesuse bero mano, "I begome maak métintu do étéw, éndob ubo-ubo saén i de ula-ulané kom dob adafay de étéw. Endob i Tuluse gétiga noy fédéw gome. Ati médayéwe dob de étéw, toow fo mika i Tuluse de.

<sup>16</sup> "Wén i do tafay ménsulat kukuman ni-ray Moisehe bé gétahe tidéw dob Tuluse, brab wén soy do sénulat i de sénarigoy Tuluse muret bé kébérehé ne bé gétahe. I de sulat ni fatut nodoron taman sa bé kéngumah Juan Bautistawe. Tidéw béno, fatut uretén i Fiyowe Uret fantag bé kéféguléw i Tuluse. Brab kéluhanay de étéw fégésé roy mahure. <sup>17</sup> Endob énda fakayén ké wén i mékédan bé kukumane, fiyon klohe saén. Mas na magad mékédan i duniyae brab lawaye, éndob i kukumane énda mékéda no."

<sup>18</sup> Atin bang Jesuse man, "Fiyon atiy gémélake bé bawag ne atin mawag man

ségiyo libun, énggélamfa. Brab i lagéye bawagé noy libune génlak, énggélamfa so.”

*I kawasawe brab Lasarowe*

<sup>19</sup> Ménbéréh man i Jesuse mano, “Wén i ségétéwe kawasa étéw kéménégal toow fo fiyo kégal, brab maguyag bé toowe fo fiyo kéfaguyag sénga fuweh. <sup>20</sup> Wén soy ségétéwe étéw toow fo méskinan féndawét Lasaro. Ménféno békukang i lowoh ne. Sénga fuweh uwitén dob béngaway lawi i étéwe ni kawasa, <sup>21</sup> non ménuyot damén ké géama fiyon do kloh sama saén ménlawu tidéw dob amaéy ségétéwe ni kawasa. Atin fégdét i de itu dob beene inok dilae roy de békukangén. <sup>22</sup> Tidéw béno, i Lasarowe ni méskinan ménléhu. Atin nuwit i de télakiy Tuluse mangéy dob tébing i katufuay de Judio féndawét Abraham dob lawayo. Brab i étéwe ni kawasa ménléhu so brab lénébéng. <sup>23</sup> I ni étéw kawasa, énggéangéy dob uleone emferno mérasay. Brab amun léménéngag, énggito no dob mérayuey miski-nane Lasaro dob tébing Abrahame. <sup>24</sup> Tidéw béno, téménabar mano, ‘Bebe Abraham, fégdaw go begén. Suguém i Lasarowa nan angéy no élédén i tuko ténoro ne dob wayége brab félyuté no dob dila guwe ni inok fégefélégénéy gu. Non ay niwu dob ri-noe ni mérasay.’ <sup>25</sup> Endob séménumbul i Abrahame mano, ‘Adu, fégétédémém i kéuyag mo séna, gédoté moy éntingayéne fiyo atin i Lasarowe kéréngénan mérasay. Béleewe ay niy Lasarowe mésésaya brab ay nan go mérasay kéréngénan. <sup>26</sup> Brab saliyo na bé de ni, wén i sébaane léfak toow fo ménalém dob élét tome inok i méuyote mifar mangéy diyoan tidéw dini taloo no tidéw diyoan mangéy dini énda géifarén.’ <sup>27</sup> I kawasawe ni ménbéréh man mano, ‘Bebe, suguém i Lasarowe mangéy dob lawi i boh guwe. <sup>28</sup> Non wén i limowe gétéw do dumo gu sétiman idéng diyo. Brab ureté no émféingat bero inok énda mangéy ro dob ni gonon mérasay.’ <sup>29</sup> Atin séménumbul i Abrahame mano, ‘Diyo soy de sénulat Moises brab de sénarigoy Tuluse muret bé gétaho. Gébasana roy de ménsulat diyo inok géingat ro.’ <sup>30</sup> Endob ménbéréh i kawasawe ni mano, ‘Énda fo munur ro bé de ménsulat. Endob buluk wén i ségétéw tidéw dob de ménléhu tébule mangéy diyo, fakay munur ro, brab gésénule ro bé de sala ro.’ <sup>31</sup> Endob séménumbul i Abrahame mano, ‘Buluk énda munur ro bé de sénulat Moises brab de sénarigoy Tuluse muret, énda so munur ro fiyon fo ké wén i ségétéw tébule tidéw dob de ménléhu.’ ”

**17**

<sup>1</sup> Atin ménbéréh i Jesuse dob de kuyugén mano, “I de éntingayén funay de étéw gésala gégumah, éndob mékégedaw-gédaw i étéwe muwit de. <sup>2</sup> Toow fo gétimeal ké

mékukum, mélaw mas na fiyo ké ibérén dob dogote nikéton bé dakéle batéw i reer ne ké beeney funay ségétéwe mantu séna méngintulus gésala. <sup>3</sup> Mélaw ingat gom. Atin buluk énggésala i dumo gome, géle gom. Brab buluk gésénule, fésagada kom. <sup>4</sup> Fiyon fo ké énggésala dob beeme fitéw gule bé ségétérésange, atin séfule so fitéw gule mongot fasinsiya, fésagada mo.”

<sup>5</sup> Tidéw béno, i de kuyug Jesus ménbéréh ro maro, “Kadnan, umana moy kéféngintooow geye.”

<sup>6</sup> Atin séménumbul i Jesuse mano, “Buluk wén i kéféngintooow gom loo bé kédakél i oloy sabie, gébéhého kom dob kayéwe ni makom, ‘Térandut go, brab angéy go téohok dob dogoto’, atin unuro no begom.”

<sup>7</sup> Atin ménbéréh i Jesuse man mano, “Ufama, buluk i ségétéwe begom wén i sugu-sugué no démadu taloo no témalima bé de ayamém, buluk gégumah i ni sugu-suguén tidéw dob de galbéko no, énda béréhé mo de, ‘Enggon, ama go nén.’ <sup>8</sup> Yamula béréhé mo de, ‘Lékas go, tafayém i amaé kuwe, atin duwoto mo begén, brab ongot-ongotém ké gilidu mama. Tidéw béno, mama go so kaam.’ ” <sup>9</sup> Atin féntaus Jesusey kébéréh ne mano, “I nan ségétéw sugu-suguén, énda fatuténg ongot-ongot bé kéfésalamate bé kérigo nuwe bé fatute. <sup>10</sup> Ségiléw so bé begomey ni sugu-suguén. Buluk énggilid gomén bé galbéke sénugu i Tuluse rigoon kom, fégétédém gom i ni, begom saén i de sugu-suguén, mélaw kagom ongot-ongotén i kéfésalamate. Réni go saén i fatute rigoon kom.”

*Nuwa Jesusey foloe gétéw fémuteén*

<sup>11</sup> Amun i Jesuse ménangéy Jerusalem, ménagéw mangéy bé élét i de sakuf Samaria brab Galilea. <sup>12</sup> Amun mahur dob sébaane ingéd, énggéalakay de folo gétéw lagéy. Wén i déruu ro fémuteén. Atin non fémuteén ro, téménindég ro dob mérayue. <sup>13</sup> Brab mékes ro maro, “Jesus! Maistérol Fégdaw go Begey!”

<sup>14</sup> Amun énggito Jesuse bero, ménbéréh mano, “Agéw gom mangéy féféngténg dob de fadi inok gétiga ro ménadi-adi gom.” <sup>15</sup> Amun ménagéw ro mangéy dob de fadi, ménadi-adi ro dob aguwone. Atin amun i ségétéwe bero énggito noy ménadi-adi, ménséfule ménangéy dob Jesuse, mékes dayéw noy Tuluse. <sup>16</sup> Atin méntélléngkéb dob adafa Jesuse fésalamat. I ni lagéy békén Judio, éndob tidéw dob sakuf i ingéde féndawét Samaria. <sup>17</sup> Ménbéréh i Jesuse dob de étéw mano, “Folo gétéw i ménadi-adiwe. Hon i de siyow de? <sup>18</sup> Endob ségétéw saén i ménséfulee mangéy fésalamat bé Tuluse, sani ségétéwe tidéw dob ségiyowe ingéd.” <sup>19</sup> Atin sénbérého Jesusey ni lagéy mano, “Tindég go

brab taus go dob ayo muwe. Ménadi-adi gon non méngginugut go Begén."

### *Fantang bé kénéfuléw i Tuluse*

<sup>20</sup> I de dumo do Fariseo fénénginsa ro dob Jesuse ké kédiron i kégumah i gaiy kénéfuléw i Tuluse bé de étéwén. Sémenumbul i Jesuse mano, "I kégumah i kénéfuléw i Tuluse énda gitono. <sup>21</sup> Enda i ségétéw de gébéreh begom, 'Ay ninén, téngténgém!' Taloo no, 'Diyoonén.' Non i kénéfuléw i Tuluse diyo dob de fédéw gom."

<sup>22</sup> Tidéw béno, bénréh Jesuse dob de kuyugén mano, "Gégumah i gaiwe féngonoyé kom i gito gom i gaiy kénéfule i Nga i Kéilawane, sani Begéne. Endob énda gito gom de. <sup>23</sup> Atin bérehéy de étéw begom maro, 'Ay diyoonén.' Taloo no, 'Ay ninén.' Endob kagom munur de taloo no mangéy gom diyo inok téngténgé kom. <sup>24</sup> Non i kénéfule guwe maak kilot métékow réméndaw brab géfékaya i kéluhanay lawayo. <sup>25</sup> Endob bé sunguwe, kamarasayanu, brab i de étéw méuyag béni, ikaa ro Begén. <sup>26</sup> Loo so bé gai Noehe, i gaiy kénéfule guwe. <sup>27</sup> Bé gai Noehe, méguwaya i de étéw, mama ro, miném ro, mawag ro taman bé kéahur Noehe dob barkowe. Tidéw béno, i dunuke énggégumah atin ménléné ro kéluhanan saliyo bé Noehe beroy de samungén. <sup>28</sup> Ségiléw so bé gai Lote bé gétaho. Bé béno, i de étéw mama ro, miném ro, sébéley ro, mohok ro, brab rémigo ro do lawi. <sup>29</sup> Endob bé gai kéféled Lote bé ingéd ne Sodom, i rinoe brab do bara ménlawu maak rana tidéw dob lawayo méninasa bero kéluhanan do ménféled. <sup>30</sup> Loo so moso bé niy gai guwe séfule.

<sup>31</sup> "Bé béno gai, i de étéw diyo ro dob liyuy lawi ruwe, éndaén fatut ro mahur angéy roy de insod ro. Loo so bé niy étéw diyo dob de galbékono, énda so fatutén séfule mangéy dob lawi ne. <sup>32</sup> Fégetédém gom i bawag Lote non sémenling inok téngténgé noy de insod ro ménféled, mélaw i lowoh ne ménwaléy égas timus. <sup>33</sup> Atiy méuyote émféruu bé kéuyag ne, méléhu. Endob i méléhue bé kéfuray ne Begén, gédoté noy umule magufusa. <sup>34</sup> Béréhé ku begom, bé béno kélungonon bé kénéfule guwe, wén i ruwo gétéw séurir fidong, atin i ségétéwe de dotén, brab i ségétéwe de émféled. <sup>35</sup> Atin wén i ruwowe gétéw do libun géming, atin i ségétéwe de dotén, brab i ségétéwe de émféled. <sup>36</sup> Atin ruwo gétéw diyo dob galbéko ruwe, atin i ségétéwe de dotén, brab i ségétéwe de émféled."

<sup>37</sup> Tidéw béno, fénénginsaay de kuyugén maro, "Kadnan, hon i gonoy de ni de mérigo?"

Séménumbul i Jesuse mano, "Hon i gonoy wéne de ménléhu, diyo soy de uwak sétimu.

Loo so bé toowe tete étéw, gégumah dob berowey kékukum i Tuluse."

## 18

<sup>1</sup> Tidéw béno, nuret Jesuse bé de kuyugén i ni binuwaya inok démoyn ro démasal brab énda mékédan i inam ruwe. <sup>2</sup> Ménbérehé mano, "Wén i ségétéwe kémukum dob sébaane ingéd, énda fo mégilakén bé Tuluse taloo no énda fo fégadata noy étéwe. <sup>3</sup> Brab wén soy ségétéwe libun baléw dob no ingéd. Démoyn mangéy dob ni étéw kémukum fégedaw-gédaw bé tabanga no bé tiyawa nuwe bé fétabana no damén i sébanile de. <sup>4</sup> Bé sunguwe de, mika i kémukume témabang. Endob tidéw béno, fénggitungén mano, 'Fiyon fo ké énda mégilaku bé Tuluse brab énda fégadata kuy de étéw, <sup>5</sup> éndob taluwanu bé kénéfule-fule ne mongot tabang. Mélaw tabanga kuy baléwe ni, inok éndaén séfuleén taman kéréngéanu."

<sup>6</sup> Atin féntaus Jesusey kéréhé ne mano, "Tuntay gom i béréhéy kémukume ni fiyon fo ké békén métintu étéw. <sup>7</sup> Toow na fo tabangay Tuluse begom do fénémillén amuk démasal gom fuweh na kélungonon. Brab énda métana i kétabang ne begom. <sup>8</sup> Béréhé ku begom, magad tabangay Tuluse begom. Endob buluk gégumah i gaiwe séfuleu, kloh saén i de munur Begén."

<sup>9</sup> Atin nuret Jesuse man i sébaane binuwaya dob de étéw fégitungé roy métintu ro éndob siyawé roy de dumo étéw. <sup>10</sup> Bang Jesuse, "Wén i ruwowe gétéw étéw ménangéy dob lawi i Tuluse inok démasal ro. I ségétéwe de Fariseo brab i ségétéwe de kémubra buwis. <sup>11</sup> I Fariseowe ni téménindég atin déménasal mano, 'Fésalamata ku Beem Tulus non békén ségiléwu bé de dumo gu étéw, do ménakaw, do arumén ro, do lémamfa ro. Fésalamata ku Beem non békén ségiléwu bé diyoo étéw lémfifal kémubra buwis. <sup>12</sup> Fuwasawu ruwo gule bé ségéfadiyane, brab iray gu dob Beemey géfoloe bé kéluhanay sahudé kuwe.' <sup>13</sup> Endob i ségétéwe ni kémubra buwis téménindég dob mérayue, brab mémala énda géténgangén dob lawayo, brab éntungén i kuméng ne bé kététe i fédéw ne. Atin déménasal mano, 'Tulus, fégedaw go begén ségétéwu ménsala.' " <sup>14</sup> Atin féntaus Jesusey kéréhé ne mano, "Béréhé ku begom, i ni étéw kémubra buwis, amun ménule, fénsagaday Tuluse bé de salaén. Endob i Fariseowe ni, énda fénsagaday Tuluse de. Non i de étéw téfégerotor, fégérifantadén ro. Brab i de étéw térifantad, fégérotorén ro."

<sup>15</sup> Wén i no sébaan fuweh, wén i médoowe do étéw ménuwit bé de nga ro dob Jesuse inok féfiyoné no bero. Endob amun énggitoy de kuyugén, génlé roy de étéw ni. <sup>16</sup> Endob ténabar Jesusey de nga mangéy dob Beene, brab bénréhén dob de kuyugén mano, "Féangéy gom i de nga dob Begéne.



Brab kagom alangén bero non i de étéw sémarig loo bé késarig i de ni nga, fégüléwoy Tuluse bero. <sup>17</sup> Béréhé ku begom i toowe, buluk i késarig i ségétéwe bekén loo bé késarig i ngae, énda so fégüléwoy Tuluse de.”

*I kawasawe étéw*

<sup>18</sup> Atin i ségétéwe uléw i de Judio ménénginsa dob Jesuse mano, “Fiyo maistéro, ati rigoné kuwe inok gédoté kuy umule magufusa?”

<sup>19</sup> Séménumbul i Jesuse mano, “Sedek fédawéte mo Begén fiyo? Enda i ségiyo fiyo saliyo saén bé Tuluse. <sup>20</sup> Gétiga moy de sugu. Kago lémamfa, kago méméléhu, kago ménakaw, kago uretén i dumo muwe bé bekéne toow, fégadata moy boh me brab idéng me.”

<sup>21</sup> Séménumbul i uléwe ni mano, “I kéluhanay de ni, nodoro ku tidéw féganay klohu de séna.”

<sup>22</sup> Amun énggélíngoo Jesusey ni, bénréhén de mano, “Sébaan i kulange beem. Fébélyém i kéluhanay éntingayéne kaam atin irayém i kurtae dob de méskinan. Atin mélaw kawasa go moso dob lawayo. Tidéw béno, énggonén, odor go Begén.” <sup>23</sup> Amun énggélíngooy étéwe niy ni, toow fo tete i fédéw ne, non toow fo kawasa. <sup>24</sup> Amun énggito Jesuse ni tete i fédéw ne, bénréhén mano, “Toow fo mérégén i kéahur i de kawasa dob kéfégüléw i Tuluse. <sup>25</sup> Mas na mélémuy kéahur i dakéle ayam dob tosong i darume bé kéahur i ségétéwe étéw kawasa dob kéfégüléw i Tuluse.”

<sup>26</sup> I de énggégélíngoo bé de ni, fénénginsa ro maro, “Ati mélaw i de fakay méfukas?”

<sup>27</sup> Séménumbul i Jesuse mano, “I de bekén fakay rigonéy étéwe, fakay gérigonoy Tuluse.”

<sup>28</sup> I Pedrowe ménbéréh mano, “Ténagak gey i de lawi gey inok furay gey Beem.”

<sup>29</sup> Atin bang Jesuse, “Béréhé ku begom i toowe, i ségétéwe téménagak bé lawi ne, bawag ne, taloo no dumo no sétiman idéng, do lukésén, taloo no do ngaén inok ureté noy fantag bé kéfégüléw i Tuluse, <sup>30</sup> gégdót toow na fo médoob do de ni do gai. Brab dob de gai gégumah, gédoté noy umule magufusa.”

*Nuret Jesusey fantag bé kéléhu ne*

<sup>31</sup> Wén i no sébaan fuweh, ténabar Jesusey de folo bra ruwo gétew kuyugén séberobero saén, atin bénréhén dob berowe mano, “Fégélingo gom, mangéy tom Jerusalem. I Jerusalemey ingéde mérigoy kéluhanay ménsulate bé gétaho sénulat i de étéw sénarigoy Tuluse muret bé kébéreh ne fantag bé Begéne. <sup>32</sup> I Begéne sani Nga i Kéilawane, irayu dob de bekén Judio. Atin diyangkaé ro Begén brab fémalané ro Begén, brab duraa ro Begén, <sup>33</sup> brab badasé ro Begén, brab

féléhué ro Begén. Endob amuk méifus i téléwe géterésangan, tébuleu.”

<sup>34</sup> Endob i de kuyug Jesus, énda énggésobuto roy de ni bénréh Jesuse. I atag i de ni kébéreh ménbunéy dob berowe, brab énda gésobuto ro de.

*Nuwa Jesusey langaféne*

<sup>35</sup> Amun gégumah i Jesuse dob ingéde Jeriko, diyo i ségétéwe étéw langafén ménsar dob doror i aguwone mongot limus.

<sup>36</sup> Amun énggélíngoo noy médoowe do étéw téménara, ménénginsa ké ati ni gérigonon.

<sup>37</sup> Wén i séménumbule mano, “I Jesuse tidéw Nasaret témara.”

<sup>38</sup> Tidéw béno, téménabar métanug mano, “Jesus, séfu Datu Dabid, fégdaw go begén!”

<sup>39</sup> I de étéw métaéh bé Jesuse géléé ro maro, “Kago selekén!” Endob taus so mékes toow na fo métanug mano, “Jesus, séfu Datu Dabid, fégdaw go begén!”

<sup>40</sup> Atin téménrén i Jesuse brab nongotén i étéwe ni uwitén mangéy dob Beene. Amun énggégégédétén, fénénginsaa Jesuse mano, <sup>41</sup> “Ati kétaya muwe rigoné ku dob beeme.”

Séménumbul i langaféne ni mano, “Kadnan, méuyotuy gégito damén.”

<sup>42</sup> Atin bénréh Jesuse de mano, “Gégito gon. Adi-adi gon, non méngintoow go.”

<sup>43</sup> Sonom béno, énggégito nén i langaféne ni, atin ménfuray bé Jesuse démayéw bé Tuluse. Amun énggitoy de étéw i ni ménrigo, dénayéw ro soy Tuluse.

## 19

*Jesús brab Sakeo*

<sup>1</sup> Atin méntaus i Jesuse bé kéagéw ne, atin ménahur dob ingéde féndawét Jeriko.

<sup>2</sup> Wén i ségétéwe kawasa féndawét Sakeo diyo bati. Beeney lémfule kémbura buwis dob de dumo no Judio kay de Romano. <sup>3</sup> Amun énggélíngoo noy Jesuse témara, méuyot i Sakeowe téméngténg inok gétiga no ké ati Jesuse ni étéw. Endob énda gito no de, non bé médoowe étéw géliwét bé Jesuse brab i Sakeowe foko lagéy. <sup>4</sup> Mélaw léménentu mangéy dob métaéh, brab ménénik dob kayéwe inok gito noy Jesuse témara. <sup>5</sup> Amun gédétén i Jesuse dob kayéwe ni, léménéngag brab ménsébéréh bé Sakeowe mano, “Sakeo, fagayas go élus. Fatut mangéy do lawi me béleewe ni.”

<sup>6</sup> Atin ménagayas i Sakeowe mélus tidéw dob kayéwe ni brab méoror ténayakufén i Jesuse dob lawi ne. <sup>7</sup> Amun i de étéw énggégito bé ni, ménséuraw ro maro, “I Jesuse ni sugud-sugud mangéy dob tetee étéw.”

<sup>8</sup> Endob i Sakeowe téménindég brab ménsébéréh bé Jesuse mano, “Kadnan, iray gu dob de méskinan i ténga i éntingayéne kagéng. Brab buluk wén i léniful gu, bayada ku fot takéf bé éndot guwe dob berowe.”

<sup>9</sup> Atin ménbéréh i Jesuse dob beene mano, "Béleewe ni, i Tuluse fénukasén beem brab kéluhana kom dob ni lawi, non munur go ségiléw bé kéunur Abrahamé. <sup>10</sup> Non i Nga i Kéilawane, sani Begéne, ménangéyu dob ni duniya inok fukase kuy de étéw ménsala non maak méntadin ro."

<sup>11</sup> Amun mégélingo ro séna, féntaus Jesusey kébéreh ne bé sébaane binuwaya non gédét ron dob Jerusalem, atin non i de étéw maro ké béno so gé gumah i kéfé guléw i Tuluse. <sup>12</sup> Ménbéréh mano, "Wén i ségétéwe gérotor étéw ménangéy dob méraye ingéd inok rigonén datu diyo. Tidéw béno, bantaké noy séfule. <sup>13</sup> Amun énda séna magéwén, ténabarén i foloe gétéw bé de sugu-sugué no brab niraya no dob séngae ségétéw sébaan bélowon félahat. Brab bénréhén bero mano, 'Féinség gom i ni taman késéfule gu.' <sup>14</sup> Endob i do étéw dob no gonon mika ro de. Mélaw séménugu ro de étéw émbéréh maro, 'Mika gey bé ni étéw waléy datu gey.'

<sup>15</sup> "Endob fiyon fo ké loo bé nan, ménwaléy datu. Mélaw ménséfule brab fénsuguo noy de sénarigo no bé de bélowon félahat inok susiné no ké wén i inségén. <sup>16</sup> I sun-guwe de ménbéréh mano, 'Maistéro, i de nirayém begén félahat, énggéinség gu de na folo timan.' <sup>17</sup> Tidéw béno, bang i datue, 'Fiyó, mégérór go sugu-suguén. Non géсарigon go bé klohe, sarigo ku beem méguléw bé foloe do ingéd do sakuf gu.' <sup>18</sup> Atin i géruwowe bé de sugu-suguén ménbéréh mano, 'Maistéro, i de nirayém begén félahat, énggéinség gu de na limo timan.' <sup>19</sup> Tidéw béno, séménumbul i datue ni mano, 'Fé guléw go bé limowe do ingéd do sakuf gu.' <sup>20</sup> Tidéw béno, i gétéléwe bé de sugu-sugué no ménbéréh mano, 'Maistéro, ay niy kurtae nirayém begén. Bénunéy gu brab nitong gu ténaléy dob munsalawe. <sup>21</sup> Non mégilaku beem non métégas go étéw. Médot go bé békéne kaam. Brab kémétéw go dob békéne no-hokém.' <sup>22</sup> Séménumbul i datue ni mano, 'Tete go fo sugu-suguén. Kukumé ku beem bé de bénréhém. Gétiga mo kun médotu bé békéne kagén, brab kémétéwu bé békéne nohok gu. <sup>23</sup> Amuk kémarang go loo bé nan, sedek énda féndiyoém dob bangkuey kurta guwe inok buluk séfuleu, fakay doté ku brab wén i inségén?' <sup>24</sup> Tidéw béno, bénréh i datue ni dob de étéw dob sékula ruwe téménindég mano, 'Dot gom i kurta ne ni atin iray gom dob ségétéwe énggéinség folo timan.' <sup>25</sup> Endob séménumbul ro maro, 'Maistéro, wénén i kaan folo kurta.' <sup>26</sup> Ménbéréh man i datue mano, 'Béréhé ku begom, buluy wéne den médoo, méirayén de na uaman. Brab i étéwe de wén i kulang de, fiyon foy klohe dob beene dotén so.' <sup>27</sup> Atin féntaus i datuey ni kébéreh mano, 'Atin fantag bé de sébanil begén, mika ro de ké waléyu datu ro, uwit

gom bero dini brab féléhu gom bero dob téngaanga kuwe ni.' "

### *I kéahur Jesuse dob Jerusalem*

<sup>28</sup> Amun i Jesuse brab de kuyugén gédét ron dob dakéle ingéd Jerusalem, <sup>29</sup> énggé gumah ro dob sébaane tuduk féndawét Olibo, gédét dob de ingéd féndawét Betfage brab Betania. Ténabar Jesusey ruwowe bé de kuyugén, <sup>30</sup> brab ménsébéreh bero mano, "Etah gom mangéy dob nan ingéd. Buluk gé gumah gom diyo, gito gom i natiwe kuda diyo, énda sénay énggékuda de. Ukoh gom brab uwit gom dini. <sup>31</sup> Buluk wén i ménginsa dob begome, 'Sedek ukohé kom?' béréh gom de, 'Kailangay Kadna tome.' "

<sup>32</sup> Nodoroy de ruwo ni gétéw kuyugén i bénréh ne. Atin énggito roy natiwe ni kuda loo bé bénréh Jesuse. <sup>33</sup> Amun nukoh ron, énggito de gefe de bero brab ménénginsa ro maro, "Sedek ukohé kom i kuda geya nan?"

<sup>34</sup> Séménumbul ro maro, "Kailangay Kadna tome." <sup>35</sup> Atin nuwit roy kudae mangéy dob Jesuse. Brab namféno ro bé de kégal ro brab fénkuda roy Jesuse diyo. <sup>36</sup> Amun méntaus i Jesuse dob Jerusalem, i de étéw bénékah roy de dumo bé de kégal ro dob aguwo Jesuse fégito roy kébasana ruwe de.

<sup>37</sup> Amun énggé gumah i Jesuse dob gonone lé mudug dob tuduke Olibo, i kéluhanay de médoo kuyugén ménfé salamat ro dob Tuluse brab ménoror ro dé mayéw métanug, non bé kéluhanay de mékégaif énggito ro. <sup>38</sup> Ménkes ro maro, "Dayéwé tom i Tuluse. Féfiyonéy Tuluse damén i ni datu ménggumah tidéw dob Kadnane. Endaén damén i bukuén dob lawayo."

<sup>39</sup> I de dumo bé de Fariseo diyo do ménribuk, ménbéréh ro dob Jesuse maro, "Maistéro, féantésém i de kuyugén nan."

<sup>40</sup> Endob bang Jesuse ni, "Béréhé ku begom, buluk féntés ro, i de batéw ni mékes dayéwé ro Begén."

<sup>41</sup> Amun taus ron gédét dob Jerusalem, gékulaya Jesusey ni ingéd. Amun énggito no, kénrewo no bé kéuray i na nuwe de.

<sup>42</sup> Brab ménbéréh mano, "Méuyotu damén gétiga kom béleewe ni ké atiy kékédane bé bukuéne brab késétihohe, éndob béleewe ni énda gétiga kom de. <sup>43</sup> Gé gumah i gaiwe dob begome, géséliwétoy de sébanil begom brab langkaté ro begom inok énda gélfas gom géliwét. <sup>44</sup> Féléhué ro begom kéluhanan fiyon foy de kéluhanay de dumo gom, brab do nga gom. Atin binasané roy de lawi taman énda i sébaan batéw mésama dob rotor i sébaane de. Non énda fénggélolo gom i gaiwe bé kéangéy i Tuluse begom mémukas."

### *Dénédel Jesusey de démagang dob lawi i Tuluse*

<sup>45</sup> Amun énggé gumah i Jesuse dob Jerusalem, méntaus dob lawi i Tuluse.

Amun ménahur, dénédélén i de étéw démagang diyo. <sup>46</sup> Atin bénréhén beroy ni mano, “Wén i Ménsulate Kébéréh i Tuluse mano, ‘I lawi guwe, lawi gonon démasal.’ Endob fénnaléy gom lawi i de ménakaw.”

<sup>47</sup> Atin sénga fuweh diyo i Jesuse témoro dob Lawi i Tuluse. Endob i de uléw i de fadi, brab de témoro bé kitabe, brab i de méguléw bé de étéw, ténulama ro féléhuén. <sup>48</sup> Endob énda gérigono ro de non i de médoó étéw énda fo séféka ro de, non ménuyot ro mégélingo bé kéluhanay de béréhé no.

## 20

<sup>1</sup> Wén i no sébaan fuweh, amun diyo i Jesuse témoro dob lawi i Tuluse, brab ureté noy Fiyowe Uret, i de uléw i de fadi brab de témoro bé kitabé brab de odoroy de Judio, ménfégédét ro dob Jesuse. <sup>2</sup> Atin fénénginsaa ro maro, “Béréhém begey ké ati atura muwe rémigo bé de ni? Ati ménirayane Beem kuwagib?”

<sup>3</sup> Sénumbulo Jesuse bero mano, “Sémuliu ménginsaan begom. Béréh gom Begén, <sup>4</sup> ati séménugue bé Juane inok mautis, Tulus loo ké étéw saén?”

<sup>5</sup> Atin séédél ro maro, “Amuk béréhé tom ‘Tidéw dob Tuluso’, fénginsaa no betom ké sedek énda fénéngintoowo tom i Juane. <sup>6</sup> Endob buluk béréh tom ‘Tidéw dob étéwe’, kéluhanay de ni étéw ménlimud, ibéro ro betom batéw taman méléhu tom, non féngintoowo roy Juane sénarigoy Tuluse muret bé kébéréh ne.” <sup>7</sup> Mélaw séménumbul ro maro, “Enda gétiga key ati kétidéw ne de.”

<sup>8</sup> Mélaw bénréh Jesuse mano, “Enda so béréhé ku de begom ati ménirayane Begén kuwagib rémigo bé de ni rigoné ku.”

### *I binuwayae fantag bé de tete témalima*

<sup>9</sup> Atin nuret Jesusey ni binuwaya mano, “Wén i ségétéwe étéw wén i safadén no-hoko no. Brab féntalimaén bé de ségiyo étéw. Tidéw béno, ténagakén ménangéy dob mérayue ingéd bé ménrugaye gai. <sup>10</sup> Amun énggégumah i gaiy kékétéwe de, séménugu ségétéw bé de sugu-sugué no inok mongot bé kaane de baad bé de onokén. Endob i ni étéw lénubag i de témalima bé ni safad. Brab fénule ro énda i suwaréw nuwitén. <sup>11</sup> Tidéw béno, séménugu man bé géruwowe bé de sugu-sugué no. Endob lénubag ro so brab fénmala ro brab fénule ro énda i suwaréw nuwitén. <sup>12</sup> Tidéw béno, fénuwitén soy gétéléwe bé de sugu-sugué no. Endob féndawéto ro so taman ménfali. Brab dénédél ro. <sup>13</sup> Tidéw béno, i gefee bé ni safad ménbéréh mano, ‘Ati rigoné kuwe? Gétuwa ku. Féuwit guy tintuwe nga gu kégedawa ku. Fégadata roy nga guwe.’ <sup>14</sup> Endob amun énggitoy de témalima, ménsébéréh-béréh ro maro, ‘Been i niy nga i gefee bé ni

safad. Féléhué tom inok gékatom i ni safad.’ <sup>15</sup> Tidéw béno, dénédél ro mésut tidéw dob safade brab fénléhu ro.” Atin féntaus Jesusey kébéréh ne mano, “Ati rigonéy gefee safad dob de ni témalima bé safad ne? <sup>16</sup> Angéyé no féléhuén bero. Brab irayén man dob de ségiyo témalima de.” Amun énggélingooy de étéw i ni kébéréh Jesuse, ménbéréh ro maro, “Békén damén mérigoy nan.”

<sup>17</sup> Tidéw béno, ténéngtég Jesuse bero atin ménénginsa mano, “Amuk békén, ati atag i ni Ménsulat Kébéréh i Tuluse mano ‘I batéwe nikaay de réménigo bé lawie, been i ménwaléye toow na fo balilaga fiyo batéw?’ <sup>18</sup> Fiyon atiy mélawue dob nan batéw mébinasa. Brab buluk i batéwe ni mélawu dob de étéw, rénahé no bero maak bubuk sébuwan.”

<sup>19</sup> Atin i de témoro bé kitabé brab do uléw i de fadi, ténulama ro kénéfo i Jesuse bé béno gai, non gébéla dob berowey ni binuwaya. Endob énda fakayén non mégilak ro bé de médoó do étéw. <sup>20</sup> Mélaw ténulik ro. Atin sénarigo roy de étéw ménginsaan de inok buluk békén katabuwan i késumbul ne, wén i funa ro de témébo brab uwitéw ro dob de étéw gémamak bé de kukuman. <sup>21</sup> Tidéw béno, i de étéw ni fénginsaa ro maro, “Maistéro, gétiga key toow i kétoro me. Brab métintu go, énda i isu ramigo mo bé de étéw. Yamula toroé moy toowe fantag bé kétayay Tuluse toow. <sup>22</sup> Mélaw béréhém begey, aw fatut ba mayad gey buwis dob Sesare sani datue dob Roma taloo no énda?”

<sup>23</sup> Endob énggétiga Jesusey akar ruwe brab bénréhén bero mano, <sup>24</sup> “Irayanu félatah.” Amun niraya ro de, ménénginsa i Jesuse mano, “Ati gefee dawét brab falas gito gom dob nan?”

Séménumbul ro maro, “Ka Sesar.”

<sup>25</sup> Tidéw béno, bénréh Jesuse mano, “Iray gom dob Sesarey ka Sesare. Brab iray gom dob Tulusey kay Tuluse.”

<sup>26</sup> I de étéw ténulama ro fégakaran i Jesuse, toow ro fo ménggaif, non toow fo fiyoy késumbul ne de. Mélaw énda i funa ro témébo bé Jesuse. Komon ménantés ro.

### *Fantag bé kétébulee*

<sup>27</sup> Atin wén i do Saduseo diyo, sani de énda méngintoow bé kétéfébule i Tuluse bé de étéw moso. Mélaw ménfégédét ro dob Jesuse ménginsa maro, <sup>28</sup> “Maistéro, sénulat Moisesé betom i kukumane bé buluk i ofo i étéwe ménléhu, brab énggéféledo noy bawag ne, énda i nga ro, fatut bawagéy tuwaréy ne inok wén i séfu i ni étéw bé tuwaréy ne. <sup>29</sup> Ufama, wén i fitéw gétéw sétuwaréy falan lagéy. Brab i ofoe de ménawag. Tidéw béno, ménléhu énda i nga ro. <sup>30</sup> Tidéw béno, i gétunduge de bénawagén soy bawage fénléd i ofo ne. Atin ménléhu so énda i nga ro. <sup>31</sup> Atin i gétéléwe

de bénawagén so taman dob géfitéw ruwe. Endob ménléhu ro kéluhanan énda i nga ro.<sup>32</sup> Tidéw béno, ménléhu soy ni libun.<sup>33</sup> Mélaw bé gaiy kétébulee moso, ati isuwe bawag i ni libun bé ni fitéw gétéw sétiman idéng? Non énggébawaga ro kéluhanan bé méuyag ro de séna.”

<sup>34</sup> Séménumbul i Jesuse mano, “I de étéw béleewe, sébawag ro. <sup>35</sup> Endob i de étéw métoror tébuleén géangéy dob lawayo, éndaén sébawag ro. <sup>36</sup> Non ségiléw ro bé de télaki brab énda ménléhu ro. Beroy de nga i Tuluse non méntébuile ro. <sup>37</sup> Atin fantag bé kétébulee, fiyon i Moisesé fénggétuwa noy wén i kétébule. Non dob mérinoe kayéw, féndawétén i Kadnane ‘Tuluse fénggadafé Abrahame, Isake, brab Jakobe.’ <sup>38</sup> I atag i ni, i Tuluse fénggadafé de méuyag étéw, békén do ménléhu. Non i kéluhanay ménléhue, méuyag séna dob karang i Tuluse.”

<sup>39</sup> Atin i de dumo bé de témoro bé kitabé ménbéréh ro maro, “Fiyoy késumbul me Maistéro.” <sup>40</sup> Tidéw béno, énda ménbaraw ro de ménginsaan man.

<sup>41</sup> Atin bénéréh Jesuse dob berowe mano, “Ati kéfakay ne ké béréh i de étéw i Kristowe séfu Dabid? <sup>42</sup> Non fiyon i Dabide bénéréhén dob kaane libro féndawét ‘De Kanta’ mano, ‘I Kadnane ménbéréh dob Kadna kuwe, sar go dob kuwono kuwe, <sup>43</sup> taman témabanu bé de sébanil Beem.’ ” <sup>44</sup> Atin féntaus Jesusey kébéreh ne mano, “Amuk féndawét Dabidey Kristowe ‘Kadnan’, ati kéfakay Kristowe séfu Dabid?”

<sup>45</sup> Amun dob téngaangay de kéluhanay de étéw mégélingo, bénéréh Jesuse dob de kuyugén mano, <sup>46</sup> “Ingat gom bé de maistéroy de kukuman non méuyot ro sugud-sugud bé de toow fo fiyo kégal ro, brab méuyot ro féngadatan ségifaén dob de fadiyan, brab méuyot ro mésar dob de fiyo saran dob de lawi féngadafan brab dob de karagiya. <sup>47</sup> Endob lafisé roy de libun baléw inok afasé roy de lawi ro. Tidéw béno, démasal ro bé de métaah kédasal dob téngaangay de étéw non marok médirung i de ni tete rigoné ro. Endob i ni do étéw toow na fo gétimal ké mékukum ro moso.”

## 21

<sup>1</sup> Amun diyo i Jesuse dob lawi i Tuluse, énggito noy de kawasa étéw lémauw ro kurta dob ahurone kurta. <sup>2</sup> Atin énggito no soy ségétéwe libun baléw méskinan, méniray saén ruwo lafin furo kurta tintu énda balilagaén. <sup>3</sup> Atin bénéréh Jesuse mano, “Béréhé ku begom i toowe, i ni méskinan libun baléw maak mas na médooy niray ne bé de dumo étéw kawasa. <sup>4</sup> Non i de ni étéw kawasa, méniray ro saén kloh tidéw dob de médooy kurta ro. Endob i ni baléw éntyéén i kéluhanay kurta ne féngfaguyagén.”

## Fantag bé tamfaday duniyae

<sup>5</sup> Atin i de dumo bé de étéw diyo séuret-uret ro fantag bé lawi i Tuluse rénigo bé de batéw toow fo fiyo brab de toow fo fiyo falasén balilaga éntingayén niray i de étéw dob Tuluse. Endob ménbéréh i Jesuse mano, <sup>6</sup> “Gégumah mosoy gaiwe, i kéluhanane gito gom mébinasa. Brab fiyon i de batéw fénggérigo de émbéragar ro.”

<sup>7</sup> Atin ménénginsa ro maro, “Maistéro, kédiron mérigoy de ni? Brab ati féngélonone de bé ni gai ké gédétén gumah?”

<sup>8</sup> Atin séménumbul i Jesuse mano, “Ingat gom inok énda géfagakaran gom. Non médooy mosoy de étéw gégumah usaré roy dawét guwe, brab émbéréh ro maro, ‘Bégéney Kristowe, brab i gai guwe ay ni nén.’ Endob kagom ununor bero loo ké furay gom bero. <sup>9</sup> Atin kagom mégilak ké gélingoo kom i kébéreh i sétibohe brab gélingoo kom soy fantage bé de gira. I kéluhanay de ni mérigoy éndob békén sénay niy tamanane.”

<sup>10</sup> Bénéréh Jesuse man mano, “I de ingéd sétiboh ro bé de ségiyo ingéd. Brab i de sakuf fangangaturan sétiboh ro bé de ségiyo. <sup>11</sup> Atin wén mosoy do émbagér luba, brab lénggob, brab do médooy mékégilak kérégénéon dob de ségiyo-giyo ingéd. Brab wén mosoy téfégito féngélonon de tidéw dob lawayo. <sup>12</sup> Endob bé énda séna mérigoy de ni, kéfoén gom brab kérégénéan gom sabaf bé kúnur gome. Brab uwitén gom dob de lawi féngadafan inok kukumén gom brab férisunén gom. Brab uwitén gom dob adafay de datu inok kukumén gom sabaf begom i do kuyug gu. <sup>13</sup> Endob amuk mérigoy de ni dob begome, been i niy gaiy kéuret gome bé Fiyowe Uret dob berowe. <sup>14</sup> Fégtédém gom i ni, amuk mérigoy de ni dob begome, kagom émbuku fantag bé ati késumbul gome. <sup>15</sup> Non iraya ku begom kégétigan brab do kébéreh inok i de sébanil begom énda i fiyo késumbulo ro begom. <sup>16</sup> Fiyon i de lukés gom brab do dumo gom sétiman idéng brab de samung gom brab do dumo gom, iray ro begom dob de gémmak kukuman inok féléhué roy de dumo begom. <sup>17</sup> Atin i kéluhanay de étéw mérarék ro begom sabaf bé Bégéne. <sup>18</sup> Endob fiyon fo ké ménléhu gom, maak énda gébinasana roy fiyon sébaan buk dob de uléw gom. <sup>19</sup> Fédayday gom munur Bégén bé nan gai féfasangén gom non been i funa kome méfukas.

<sup>20</sup> Atin buluk gito gom i Jerusaleme séliwétroy de sundalo nén, émfégétigan begom bé gédétén i kébinasa nuwe. <sup>21</sup> Atin i de étéw bati dob sakuf Judeawe fatat ro méraréy dob de tuduk. Brab de étéw dob Jerusaleman fatat ro so méraréy. Brab i de étéw géliyu de, békén fatat ro mahur. <sup>22</sup> Non been i niy gaiwe kémukum i Tuluse inok métuman i Ménsulate Kébéreh i Tuluse. <sup>23</sup> Toow fo

mékégédaw-gédaw i de libun obor brab de libun brab mériton non gégumah i gaiwe toow fo mékégilak atin i Tuluse kukumé noy de ni do étéw Judio. <sup>24</sup> Atin i de dumo étéw félluén tibohén bé sundange, brab i de dumo de férisunén dob de ségiyo-giyo ingéd. Brab i de étéw békén Judio daa roy Jerusaleme inok mébinasa taman gilid i karowe gai.

<sup>25</sup> “Wén so mosoy féglolonon de dob térésange brab térésang kélunonone brab de gitoon, brab dob duniyae niy kéluhanay de ingéd kégilakan non bé késelekéy émbagére bagél dob dogote. <sup>26</sup> I de étéw mésumba ro funowén bé kégilak ruwe ongot-ongot bé ati mérigowe dob duniyae ni, atin non i de éntingayén dob lawayo mékuyung. <sup>27</sup> Tidéw béno, i Nga i Kéilawane, sani Begéne, téfégitowu tidéw dob lawayo gégumah dob rawéne toow fo barakatan brab réméndaw. <sup>28</sup> Buluk mérigoy de ni, tindég gom brab léngag gom non gédétén gumah i gaiwe méfukas gom.”

<sup>29</sup> Tidéw béno, nuret Jesuse beroy ni binuwaya mano, “Fégitung gom i de kayéw. <sup>30</sup> Dini dob betome ni, buluk gito gom i de dau ro mégalin, gétiga kom gédétén i gaiwe méduf. <sup>31</sup> Loo so bé ni amuk gito gom i de ni mériyo, gétiga kom gédétén i kégumah i kégéguléw i Tuluse.

<sup>32</sup> “Béréhé ku begom i toowe, i de étéw méuyag béni, énda méléhu ro taman mériyo de ni. <sup>33</sup> I lawaye brab duniyae méalfa ro, éndob i kébéréh guwe énda méalfaén.

<sup>34</sup> “Ingat gom. Kagom dé moyun fégitungén i kéfaguyayae brab téolon-olone, brab kagom toowén fégitungén i kéuyaga kome, non i nan gai séfuleu gégumah bé gaiwe békén karangé kom. <sup>35</sup> Non tékow gégumah i ni gai dob kéluhanay de étéw dob duniyae ni. <sup>36</sup> Ingat gom brab sénga tékélid gom dasal inok émbagé gom énda mékaid gom bé kéluhanay de ni mériyo. Atin gétindég gom dob adafa kuwe énda mémala gom.”

<sup>37</sup> Bé béno do gai, sénga fuweh mangéy i Jesuse témoro dob lawi i Tuluse, brab sénga kélunonon ménangéy dob tuduke Olibo. <sup>38</sup> Brab i kéluhanay de étéw dob no gonon, sénga toow géfuwén mangéy ro dob lawi i Tuluse inok fégléngóé roy Jesuse muret.

## 22

### *I réniyo Judase*

<sup>1</sup> Bé béno gai, i kékanduli i de Judio féndawét “Témara” gédétén. Bé no kanduli, amaé roy fane énda fénrükén. <sup>2</sup> Atin i de odoroy de fadi brab de témoro bé kitabé séméléd ro bé ati kéféléhu ruwe bé Jesuse. Endob sékémén saén, non mégilak ro bé de étéw.

<sup>3</sup> Tidéw béno, i Satanase rénahuko noy Judas Iskariote ségétéw bé de folo bra ruwo kuyug Jesuse. <sup>4</sup> Atin ménangéy i Judase dob

de uléw i de fadi brab de mégüléw bé lawi i Tuluse brab sénébéreh roy ati kékéfo ro bé Jesuse. <sup>5</sup> Toow ro de fo ménoror brab ménuyot ro de ké iraya ro kurta i Judase. <sup>6</sup> Tidéw béno, ménagayun i Judase, brab sénélédén i gaiwe ké énda i dumo Jesuse médoé étéw inok fékéfoén.

<sup>7</sup> Amun ménifus i firoye gétérésangan, ménggumah i gaiwe fatut i de Judio sémumbali nati bili-bili kay kékandulie féndawét “Témara”. <sup>8</sup> Mélaw sénugu Jesusey ruwowe bé de kuyugén ro Pedro brab Juan. Brab ménsébéreh bero mano, “Agéw gom brab tafay gom i amaé tome kay kandulie ni “Témara.”

<sup>9</sup> Ménénginsa ro dob Jesuse maro, “Hon i kétaya muwe de gono key témogoh?”

<sup>10</sup> Séménumbul i Jesuse mano, “Dob Jerusalem. Amuk gumah gomén diyo gébalaka kom i ségétéwe étéw lagéy ménuwit binangga ménféno wayég. Furay gom de mangéy dob lawie ayo no. <sup>11</sup> Tidéw béno, béréh gom dob gefee bé lawie makom, ‘Méuyot i Maistérowe ké gétiga no hon i sibéye de gono no mama beroy de kuyugén bé ni kékanduli.’ <sup>12</sup> Atin i gefee bé lawie toroé no begom i dakelé sibéy wén i de kagamitan de dob rotor i lawie. Diyo i kéluhanay gamité kome. Diyo tafay gom i kéluhanay amaé tome.”

<sup>13</sup> I Pedrowe brab Juane ménangéy ro dob no ingéd. Atin énggito roy kéluhanane loo bé kébéréh Jesuse de bero. Tidéw béno, ténafay roy de amaé ro kay kandulie “Témara”.

### *I kéama i Kadnane*

<sup>14</sup> Amun ménahur i Jesuse dob lawie, atin amun gumahén i urase, ménsar dob doror i ahayane beroy de kuyugén. <sup>15</sup> Atin ménbéreh i Jesuse mano. “Toow fo méuyotu mama séréngan begom bé ni kéama kanduli ‘Témara’ non éndaén mérugayén taman mékukumu. <sup>16</sup> Béréhé ku begom i toowe, éndaén mamau bé ni kéama bé kékandulie ‘Témara’ taman gégumah i gaiy kégéguléw i Tuluse bé de étéwén. Bé no gai, wén i mantu atag i ni kanduli.”

<sup>17</sup> Tidéw béno, éndot Jesusey tabu i arake brab ménfésalamat dob Tuluse. Atin nirayén i tabue dob de kuyugén. Atin bénérehén dob berowe mano, “Edot gom i ni brab sétukido kom i arake ni. <sup>18</sup> Béréhé ku begom, éndaén minému arak loo bé ni taman gégumah i gaiy kégéguléw i Tuluse bé de étéwén.”

<sup>19</sup> Tidéw béno, éndotén i fane, brab ménfésalamat dob Tuluse brab sénkébeng-kébengén, brab sénaarén dob de kuyugén. Atin ménbéreh mano, “Ay ni fane. Been i lowoh guwe, niray fégefukas begom. Ama gom i ni inok gétédémó kom Begén.” <sup>20</sup> Amun énggilid i kéama ruwe, éndotén i tabue brab ménbéreh mano, “I tabue ni been i niy dara

guwe rémanas, fégefukas begom, sani tandae bé mantuwe fasad i Tuluse bé de étéwén.

<sup>21</sup> “Endob téngténg gom. I émfékéfoe séko Begén dini dob Begéne ni mama. <sup>22</sup> I Nga i Kéilawane, sani Begéne, féléhuén loo bé kétayay Tuluse mérigo. Endob mékégedaw-gédaw i étéwe ni émfékéfoe, non mékukum fo toow.”

<sup>23</sup> Tidéw béno, i de kuyugén séfénginsa ro ké ati isuwe bero rémigo bé ni.

<sup>24</sup> Tidéw béno, ménséédél de kuyugén ké ati isuwe bero toow na fo gérotor. <sup>25</sup> Atin bang Jesuse dob berowe, “I de étéw datu dob ni duniya wén i atura ro dob de étéw ro, brab i de uléw tabarén ‘Dumoy de étéw.’ <sup>26</sup> Endob békén fatut loo bé ni dob begome. I toowe gérotor bé begomey fatute fénggiring bé toowe tuwaréy begom. Brab i méguléwe géring bé sugu-suguéne. <sup>27</sup> Ufama, ati isuwe mas na gérotor, i étéwe duwoton ménsar mama, taloo no i étéwe démuwoton de? Békén ba i étéwe ménsar mama? Endob i Begéne, ay niwu dob kérara gome loo bé ségétéwe sugu-suguéne.

<sup>28</sup> “Atin i begome do méntasa ménodor Begén fiyon fo ké bé de gai kérénganu. <sup>29</sup> Atin loo bé kéiray i Boh guwe Begén bé kuwagibé méguléw, iraya ku so begom kuwagib loo bé ni. <sup>30</sup> Bé gaiwe méguléwu, mama gom brab miném gom séréngan Begén. Brab géesar gom dob de saran kay de datu inok kémukum gom bé foloe brab ruwo do sakuf i de Judio.”

#### *Nuret Jesusey fantag bé Pedrowe*

<sup>31</sup> Atin ménbéréh i Jesuse dob Simon Pedrowe mano, “Simon, fégingoém. I Satanase méntungkas bé tukawa no begom kéluhanan, loo bé kéfanire bé faréye inok féganané noy fiyowe bégas bé ukofe. <sup>32</sup> Endob i Begéne, dénasala ku beam inok i kéféngintoow me méégét. Brab amuk séfule go mangéy dob Begéne, féégétém i kéféngintoow i dumo muwe.”

<sup>33</sup> Endob bang Pedrowe, “Kadnan, modoru Beem fiyon fo ké dob kalabusoono taloo no fiyon fo ké dob léhuone.”

<sup>34</sup> Séménumbul i Jesuse mano, “Pedro, énda séna ukoro i férufete béleewe, dirungé mo Begén téléw gule bé énda gélolo mo Begén.”

<sup>35</sup> Tidéw béno, fénénginsaa Jesuse bero mano, “Bé késugu guwe begom bé kagom muwit kurta taloo no amaén, brab safatos, wén bay kulang dob begome?”

Séménumbul ro maro, “Enda.”

<sup>36</sup> “Endob béleewe,” bang Jesuse, “buluy wéne kurtaén brab amaén, uwité no, brab buluy éndae sundangén, fébéléyén i géruwowe lafin kégalén inok fégébéléyén sundang. <sup>37</sup> Non béréhé ku begom i ni, métuman i Ménsulate Kébéreh i Tuluse fantag bé Begéne mano, ‘I ni étéw mékukum maak

ségétéw énda ménodorén bé kitab i gémamake kukuman.’ Hoo, i ménsulate fantag bé Begéne féganayén métuman béni.”

<sup>38</sup> Tidéw béno, i de kuyugén maro, “Kadnan, wén i ruwo timan sundang dob ni.”

Atin séménumbul i Jesuse mano, “Békén tintu sundang i bénréh guwe begom! Témérén tomén séuret-uret!”

<sup>39</sup> Tidéw béno, ménagéw i Jesuse loo bé adat ne rignon no mangéy dob tuduke Olibo. Atin ménodor i de kuyugén de. <sup>40</sup> Amun gégumah ro dob no gonon, bang Jesuse, “Dasal gom inok énda métukawan gom.”

<sup>41</sup> Tidéw béno, ménférayu bero gumaha témabar. Atin ménlingkuwéd brab déménasal, <sup>42</sup> mano, “Abay, buluk méuyot go de, kago fédayaén Begén mérasay. Endob i kaame kétayan i mérigowe damén, békén kagén kétayan.” <sup>43</sup> Tidéw béno, i télakiwe tidéw dob lawayo méntéfégito dob Beene brab fénbagérén. <sup>44</sup> Bé béno uras, toow fo ménbuku i Jesuse. Brab toow fo émbagér i kédasal ne. Atin ménénét fo toow, brab léménuyut i énéne ne dob fantade maak dara.

<sup>45</sup> Amun énggilid démasal, téménindég ménagéw ménangéy dob de kuyugén. Endob énggito no bero énggéfídong ro non lugotén ro non émbuku ro. <sup>46</sup> Mélaw nulégén bero mano, “Sedek fidong gom? Tek gom brab dasal gom inok énda métukawan gom.”

#### *I kékéfoe bé Jesuse*

<sup>47</sup> Amun émbéréh sénay Jesuse, énggégumah i médoowe étéw, brab Judasey ségétéwe bé de folo bra ruwo gétéw kuyugén i méngguléwe bero. Fénggédeto noy Jesuse inok aréké no. <sup>48</sup> Fénénginsaa Jesuse mano, “Judas, fékéfoém i Nga i Kéilawane bé arék me?”

<sup>49</sup> Amun énggitoy de kuyug Jesus i ni ménrigo, ménbéréh ro maro, “Kadnan, sétiboh gey bé de sundang gey?” <sup>50</sup> Atin i ségétéwe bé de kuyugén ténibohén i riféy gérotore fadi brab ménsilaf i kuwonone kélingoén.

<sup>51</sup> Endob bang Jesuse, “Ngaén inan!” Brab génamakén i kélingoéne ménfali, atin ménuwa.

<sup>52</sup> Atin ménbéréh i Jesuse dob de odoroy de fadi, brab de odoroy de mantay bé lawi i Tuluse, brab de odoroy de Judio mangéy de kéméfoe mano, “Sedek ménuwit gom do sundang brab do tafés, maak ségétéwu tulisan kéfoe kom? <sup>53</sup> Sénga fuweh Betom dob lawi i Tuluse, éndob énda kénéfoe gom Begén. Endob méuyot gom rignon kom i ni béni, non délémon, brab énda i gégito begom.”

#### *Dénirung Pedrowe*

<sup>54</sup> Tidéw béno, kénéfoe roy Jesuse, brab nuwit ro dob lawi i gérotore fadi. Brab i Pedrowe ménfuray bero, éndob ménférayu kloh. <sup>55</sup> Atin wén i aféye nuyag diyo dob kérara i fésayawane brab wén i de

ménsar géliwét. Ménsar so diyo i Pedrowe.  
<sup>56</sup> Enggitoy ségétéwe kénogon sugu-suguén i Pedrowe brab béréhén mano, “I étéwe ni dumo no.”

<sup>57</sup> Endob dénirung Pedrowe mano, “Di, énda gélolo guy nan étéw ménkéfo.”

<sup>58</sup> Énda ménrugayén, ségétéw man i énggégélowe bé Pedrowe mano, “Beem soy ségétéwe bero.”

Endob séménambul i Pedrowe mano, “Békén! Békén dumo no begén!”

<sup>59</sup> Amun ségéuras man tidéw béno, ségétéw man i ménbéréhe mano, “I ni étéw tintu dumo no, non ségétéw étéw so tidéw Galilea.”

<sup>60</sup> Séménambul man i Pedrowe mano, “Adih, énda gétiga kuy béréhé muwa nan.” Atin sonom béno, i férufete ménukoro bé émbéréh sénay Pedrowe. <sup>61</sup> Atin i Kadnane Jesus séménling brab ténéngténgén i Pedrowe. Bé béno so énggétédémó Pedrowey béréhé Jesusé mano, “Énda séna ukoro i férufete béleewe, dirungé mo Begén téléw gule bé énda gélolo mo Begén.” <sup>62</sup> Tidéw béno, ménsut i Pedrowe ménangéy dob fuwehe brab toow fo kéménrew.

### *I kékukume bé Jesuse*

<sup>63</sup> Atin i de étéw mantayan bé Jesuse féganayé ron tafésén brab diyangkaén. <sup>64</sup> Tidéw béno, ténléb roy de moto no bé munsalawe brab féantuk ro de ké ati téménafése de. <sup>65</sup> Brab toow ro fo fénémalay Jesuse bé tetee kébérah ro.

<sup>66</sup> Amun géfuwénén, i de odoroy de Judio, brab de odoroy de fadi, brab do témoro bé kitabe, ménsélimud ro, brab fén-uwit roy Jesuse dob téngaanga ruwe. <sup>67</sup> Atin fénénginsaa roy Jesuse maro, “Buluk Beem i Kristowe, sani fénémili i Tuluse méguléw, béréhéim begey.”

Atin séménambul i Jesuse mano, “Fiyon fo ké béréhé ku begom, énda méginugut gom de. <sup>68</sup> Atin buluk wén i fénginsae ku begom, énda sumbulo kom de. <sup>69</sup> Endob tidéw béleewe, i Nga i Kéilawane fésarén dob kuwonoy barakatane Tulus.”

<sup>70</sup> Mélaw fénénginsaa roy Jesuse maro, “Aw Nga i Tuluse Beem?”

Atin séménambul i Jesuse mano, “Toow i nan béréh gom bé Nga i Tuluse Begén.”

<sup>71</sup> Tidéw béno, ménbéréh ro maro, “Éndaén kailanga tom i témboe de dob betome. Non énggélíngoo tomén tidéw dob Beene.”

## 23

<sup>1</sup> Tidéw béno, i kéluhana ruwe ménlimud, nuwit roy Jesuse mangéy dob Pilatowe sani méguléwe tidéw Roma. <sup>2</sup> Nuret ro dob Pilatowey kéluhanay de tete rénigo Jesuse kun. Béréh ro maro, “Enggito gey i ni étéw

fanangguwité noy de étéw inok sébanil ro begom do gémamak kukuman. Énda fébayade no bero buwis dob toowe fo gérotor datu féndawét Sesar dob Roma. Béréhén so bé Beene kun i Kristowe sani ségétéwe datu.”

<sup>3</sup> Tidéw béno, fénénginsaa Pilatowey Jesusé mano, “Aw Beem i Datu i de Judio?”

Séménambul i Jesuse mano, “Beemey ménbéréhe de.”

<sup>4</sup> Atin bang Pilatowe dob de odoroy de Judio brab dob kéluhanay de étéw diyo, “Karangé ku, énda i funa no fatut mékukum.”

<sup>5</sup> Endob fétausé ro soy kétébo ruwe de maro, “I ni étéw téménoro dob kéluhanay sugud i de ingéd dob Judea fanangguwité noy de étéw sétiboh begom do gémamak kukuman. Féngganayén rénigoy ni dob Galilea, atin ménangéy dini inok rignoné so.”

<sup>6</sup> Amun énggélíngoo Pilatowey ni, ménénginsa mano, “Aw tidéw Galilea i ni étéw?” <sup>7</sup> Amun énggétiga no tidéw diyo, sénugu Pilatowey Jesuse mangéy dob Herode, sani datue dob Galilea, non diyo dob Jerusalem bé no gai. <sup>8</sup> Ménoror i Herode bé kégitu nuwe bé Jesuse. Non médooy énggélíngoo nuwe fantag bé Jesuse, brab ménrugayén i kéuyot ne de géségito. Témayan de damén ké gito noy Jesuse rémigo mékégaif. <sup>9</sup> Mélaw médooy fénénginsa ne bé Jesuse. Endob énda séménambul i Jesuse. <sup>10</sup> Diyo soy de odoroy de fadi brab de témoro bé kitabe. Atin toow ro fo ténébo i Jesuse. Endob énda soy sumbul Jesuse de. <sup>11</sup> Mélaw i Herode brab de sundalo no, déniyangka ro brab fénémalay ro. Tidéw béno, fénkégala roy Jesuse bé toowe fo fiyo métaah kégal maak datu brab fénséfule ro mangéy dob Pilatowe. <sup>12</sup> Tidéw béno, i Herode brab Pilatowe ménwaléy ro sékélayaman, fiyon fo ké sébanil ro méntaén.

<sup>13</sup> Ténawag Pilatowey de odoroy de Judio, brab de odoroy de fadi, brab de ségiyogyo étéw. <sup>14</sup> Atin béréhén bero mano, “Nuwit gom i ni étéw Jesus dob begéne, brab béréh gom fanangguwité noy de étéw gom sétiboh begey do gémamak kukuman. Endob béleewe fénénginsaa ku dob adafa kome, atin énggétiga ku énda i toow bé kéluhanay béréhé gome. <sup>15</sup> I datu Herode énggétiga no so énda i salaén loo bé de béréh gom, mélaw fénséfuleén so mangéy dini. I ni étéw énda i rénigo no tete. Békén fatut féluhuén. <sup>16</sup> Mélaw fébadas gu saén, tidéw béno fétangéy gu.”

<sup>17</sup> I ni ménrigo bé gaiy kékandulie “Témara”. Atin i adat i méguléwe tidéw Roma sénga kanduli “Témara” témangéy ségétéw ménkalabusi inok fiyoy fédéw i de Judio de. <sup>18</sup> Mélaw non énda kukumé Pilatowey Jesuse féluhuén, i de étéw ménsélimud ménkes maro, “Féluhu gom, brab tangéy gom i Barabase.” <sup>19</sup> (I Barabase ni étéw ménférisu non ménamung

sétiboh dob Jerusalem bé de gémasuk kuku-  
man. Mémméléhu so do étéw.)

<sup>20</sup> I Pilatowe ménbéréh man ségule dob de  
étéw ménsélimud bé i kétaya nuwey Jesusey  
tangyéne. <sup>21</sup> Endob ménkes i de étéw maro,  
“Féléhu gom! Kélabo gom dob kruse!”

<sup>22</sup> Endob ménbéréh i Pilatowe bé gétéléw  
ne gule mano, “Ati réniyog ni étéw? Enda i  
gétiga ku funa tom de méméléhu. Fétafés gu  
sa atin tangyéén.”

<sup>23</sup> Endob i de étéw ménkes ro man minut  
métanug i Jesuse kélabonén dob kruse.  
<sup>24</sup> Tidéw béno, sabaf bé kéékes ruwe,  
ménagayun i Pilatowe bé kéongot ruwe  
kémukum bé Jesuse. <sup>25</sup> Atin loo bé kétaya  
ruwe, téngagéén i Barabase, sani étéwe  
férisu sabaf bé beeney ségétéwe méméléhu  
brab fénsétibohén i de étéw sébanil bé de  
gémasuk kukiman. Atin i Pilatowe nirayén  
i Jesuse dob de étéw ménsélimud inok rigo-  
né roy ati kétaya ruwe rigoéné dob Jesuse.

#### *Kélabo roy Jesuse dob kruse*

<sup>26</sup> Nuwit i de étéw i Jesuse mésut dob  
Jerusalem inok kélaboné ro dob kruse.  
Atin dob de aguwon, énggéalaka roy étéwe  
féndawét Simon tidéw dob ingéde Siren.  
Béno sénay kégumah ne dob no ingéd.  
Fénodor ro inok féngésé ro démuwal bé kruse  
furray bé Jesuse.

<sup>27</sup> I médoowe étéw furay bé Jesuse. I  
de dumo bero do libun kémerew ro brab  
rémuung non bé kériyo ruwe bé Jesuse.  
<sup>28</sup> Sénling Jesuse bero mano, “Do libun  
tidéw Jerusalem, kagom kérewon Begén.  
Kérewo kom i de lowoh gom brab de nga  
gom. <sup>29</sup> Non gégumah i gaiwe mérégén brab  
émbéréh i de étéw maro, ‘Méoror i de libun  
énda mén-obor ro, énda i do nga ro, brab énda  
i féntutu ro do nga.’ <sup>30</sup> Bé no gai, émbéréh i  
de étéw dob de tuduk maro, ‘Tamfurén gey!’  
brab dob de burur, ‘Bunyéén gey!’ <sup>31</sup> Non  
buluk rigoéné de étéw i ni dob ségétéwe étéw  
énda i réniyo no tete, toow na fo mas gétimal  
dob de étéw réméniyo tete.”

<sup>32</sup> Atin ménuwit ro so ruwo gétéw férisu  
inok séréngan ro féléhuén bé Jesuse. <sup>33</sup> Amun  
ménggégumah ro dob no gonon féndawét “ku-  
lobong uléw”, kélabo ro diyo i Jesuse dob  
kruse ni. Kélabo ro soy ruwowe gétéw  
férisu dob de krus. I sébaane de fingé dob  
kuwono Jesuse, brab i sébaane de dob fingé  
biwong Jesuse. <sup>34</sup> Tidéw béno, déménasal i  
Jesuse mano, “Abay, fésagada mo bero non  
énda gétiga roy rigoéné ruwe.” Atin i de sun-  
dalo sénkungungo roy ati gégédote bé kégal  
Jesuse. <sup>35</sup> I lala i de étéw téméndéng diyo  
témanud, i de odoroy de Judio déniyangka roy  
Jesuse maro, “Ténabangén i de ségiyo étéw  
inok énda méléhu ro. Mélaw, buluk Beeney  
Kristowe tintu Mémukas fénémili i Tuluse,

sedek énda gétabanga noy lowoh ne inok énda  
méléhuén?”

<sup>36</sup> Déniyangka i de sundalo so. Atin téningé  
ro brab niraya ro bé mélémuwe arak brab  
ménbéréh ro maro, <sup>37</sup> “Buluk Beemey datu  
i de Judio, tabangém i lowoh me.”

<sup>38</sup> Brab wén i ménsulate dob rotor i uléw  
Jesuse mano, “Ay niy datu i de Judio.”

<sup>39</sup> Atin i ségétéwe bé de férisu ménbitin  
diyo bero Jesuse, diyangkaé no soy Je-  
suse mano, “Aw békén ba Beemey Kristowe  
Mémukas? Mélaw tabangém begey brab i  
kaame lowoh.”

<sup>40</sup> Endob i dumo nuwe férisu ménbéréh  
dob sunguwe de mano, “Kago émbéréh loo  
bé nan! Aw énda mégilak go bé Tuluse?  
I betome téléw gétéw ménkukum féléhuén.  
<sup>41</sup> Atin i betowe fatut féléhuén non bé de  
tete réniyo to. Endob i ni étéw énda foy tete  
réniyo no.” <sup>42</sup> Tidéw béno, ménbéréh dob  
Jesuse mano, “O Jusus, féngétédéménu amuk  
Beemén i méguléwe.”

<sup>43</sup> Séménumbul i Jesuse mano, “Béréhé ku  
beem i toowe, bélewe séko diyo go dob  
Begéne dob bélowono fantad.”

#### *I kéléhu Jesuse*

<sup>44</sup> Amun géutuhén, éndaén réméndaw i  
térésange. Déménlémon i fantade taman  
ménifus i téléwe géuras. <sup>45</sup> Tidéw béno, i  
rindunge bénitin dob mékétéfuwe sibéy  
dob lawi i Tuluse, ruwoy ménsésédaya  
nuwe. <sup>46</sup> Atin i Jesuse ménkes métanug  
mano, “Abay, sarigé kuy kamatu guwe dob  
Beeme.” Amun énggébérého noy ni, ménléhu  
i Jesuse.

<sup>47</sup> Wén i ségétéwe gérotor odoroy de sun-  
dalo énggito noy ni ménriyo, atin déniyéwén  
i Tuluse mano, “Toow fo métintuy ni étéw!”

<sup>48</sup> I de étéw ménsélimud diyo, amun énggito  
roy ni ménriyo, ménule ro mémnala brab tete  
i de fédéw ro. <sup>49</sup> Atin i kéluhanay de étéw  
énggéalaka roy Jesuse, fiyon i médoowe bé de  
libun tidéw Galilea ménodor de, téméndéng  
ro dob mérayue téméngténg brab énggito ro  
soy kéluhanay ni ménriyo.

#### *I kélébéngé bé Jesuse*

<sup>50</sup> Wén i ségétéwe lagéy féndawét Jose tidéw  
Arimatea sébaan ingéd dob Judea. Ségétéw  
fiyo étéw brab ménunur bé de kukumay de  
Judio. <sup>51</sup> Fiyon fo ké beeney ségétéwe bé  
de kéfédéway de Judio, énda ménagayu no  
bé réniyo ruwe bé Jesuse. Ongot-ongoté no  
soy gaiy kéfégluléw i Tuluse bé de étéwén.  
<sup>52</sup> Ménangéy dob Pilatowe brab nongotén i  
bangkay Jesuse. <sup>53</sup> Atin éndotén i bangkay  
Jesuse tidéw dob kruse brab bénausén bé  
fiyowe safut, brab nahuréén dob létébéngé  
ténosong dob rangih i fingase. I ni létébéngé  
énda séna ménlébéngé no. <sup>54</sup> I gaiwe béno  
témégén Biyarnes brab gédétén i gaiwe  
Sabado sani gaiwe kétéréy de Judio.



<sup>55</sup> I de libun ménodor bé Jesuse tidéw Galilea, ménfuray ro bé Josehe brab énggito roy lébéngé brab ati kéahure bé bangkay Jesuse diyo. <sup>56</sup> Tidéw béno, ménule ro brab téménafay ro féngféamut brab do mamut daun kay bangkay Jesuse. Endob bé gaiwe kétérén, téménrén ro loo bé kébérah i de kukuman nodoro ro.

## 24

### *I kétébuté Jesuse*

<sup>1</sup> Amun toow fo géfuwén bé no Duminggu, i de libun ménodor bé Jesuse tidéw Galilea, ménangéy ro dob lébéng Jesuse. Nuwit roy mamute daun ténafay ro. <sup>2</sup> Amun énggégumah ro dob lébéng ne, énggito roy batéwe fénggétéléb bé béngaway lébéngé ni ménkériring. <sup>3</sup> Tidéw béno, ménahur ro, éndob i bangkay Jesuse éndaén diyoén. <sup>4</sup> I lala ruwe témindég mégaif, méntékow méntéfégitoy ruwowe gétéw lagéy, sémélinang i de kégal ro. <sup>5</sup> Toow fo ménggilak i de ni libun, mélaw déménungul ro. Tidéw béno, ménbérah i de lagéy ni maro, “Sedek mangéy gom dob lébéngé séméléd bé ségétéwe étéw méuyag?” <sup>6</sup> Endaén dini no, non ténébule i Tuluse nén. Fénggétédém gom i de kébérahén begom diyo de séna dob Galilea mano, <sup>7</sup> I Nga i Kéilawane iray dob de tete étéw atin kélaboné ro dob kruse. Endob dob gétéléw ne gétérésang, tébule.”

<sup>8</sup> Tidéw béno, i de libun ni, énggétédém roy bénréh Jesuse. <sup>9</sup> Mélaw ménagéw ro tidéw dob lébéngé brab nuret ro dob de folo bra sébaan kuyug Jesuse brab dob kéluhanay de dumo étéw i kéluhanay énggito ruwe brab énggélíngoo ruwe. <sup>10</sup> (I ni do libun ro Maria Magdalena, Juana, brab Mariawe idéng Santiago, brab de dumo libun, nuret roy de ni dob de apostol.) <sup>11</sup> Endob i de kuyug Jesus, énda ménunur ro bé bénréh i de libun ni, non maro ké dufang saén i kébérah ruwe de. <sup>12</sup> Endob i Pedrowe ni ségétéw bé de kuyug Jesus téménindég brab léménentu mangéy dob lébéngé. Amun énggégumah diyo, sénarirén ténéngténg, atin énggito no say de safut fénggébaus bé bangkay Jesuse, ménféled. Mélaw ménule ménggaif bé no ménrigo.

### *I de kétéfégito Jesus*

<sup>13</sup> Atin bé béno gai, wén i ruwo gétéw bé de kuyugén ménangéy dob sébaane ingéd fédawétén Emaus, folo bra ruwo gékilometroy kérayu ne tidéw Jerusalem. <sup>14</sup> Amun diyo ron dob de aguwon, ménséuret-uret ro fantag bé kéluhanay de ménrigo bé Jesuse. <sup>15</sup> I lala ruwe séuret-uret magéw so, bé béno soy Jesuse ménggégumah séodor béro magéw. <sup>16</sup> Endob nalang ro féngéloloné ro ké Been i Jesuse. <sup>17</sup> Atin

féngéngsaa Jesuse bero mano, “Ati nan ureté kom bé lala goma nan magéw?”

Tidéw béno, téménrén ro magéw brab ménbuku i falas ruwe. <sup>18</sup> Ségétéw bero féndawét Kleopas ménbérahéw dob Jesuse mano, “Beem saén keyeyén i étéw bati dob Jerusalem, énda gétiga moy atiy ménrigo we diyo bé de ni gai.”

<sup>19</sup> Ménénginsa i Jesus mano, “Ati no ménrigo?”

Séménumbul i de kuyugén maro, “Fantag bé Jesuse tidéw Nasaret, ségétéw sénarigoy Tuluse muret. Barakatan i de kébérahén brab de réngo no dob téngaangay de étéw brab dob Tuluso. <sup>20</sup> I uléway de fadi gey brab de odoro key fénkéfo roy Jesuse inok kukumén brab féluhuén kélabonén dob kruse. <sup>21</sup> Wénén i inam gey bé Beene damén i mémukase betom do Judio. Atin béleewe niy gétéléwo nuwe gétérésangan tidéw bé no ménrigo. <sup>22</sup> Brab wén i de dumo gey do libun, fénggaif ro begye non ménangéy ro dob lébéngé toow fo gino géfuwén. <sup>23</sup> Endob amun sénléd roy bangkay ne, énda énggito ro de. Atin ménséfule ro, brab bénréh ro bé wén i de télaki méntéfégito émbérahéw bé Jesuse méntébuté. <sup>24</sup> Tidéw béno, i de dumo begye do kuyug Jesus ménangéy ro so dob lébéng Jesuse ni, brab énggito roy kéluhanane toow ménrigo loo bé kébérah i de libun ni, éndob énda gito roy bangkay Jesuse.”

<sup>25</sup> Tidéw béno, bénréh Jesuse bero mano, “Toow gom fo dufang, brab énda munur gom bé bénréh i sénarigoy Tuluse muret bé kébérah ne. <sup>26</sup> Békén ba kailangan mérasay i Kristowe atin tidéw béno médayéw fo toow?” <sup>27</sup> Tidéw béno, fénggétiga Jesuse dob berowe ké atiy ménsulate dob libro Moiseuse brab i sénulat i kéluhanay sénarigoy Tuluse fantag bé Beene.

<sup>28</sup> Amun gédét ro nén dob ayo ruwe ni, i Jesuse ni fénténgténgén bé maak taus magéw mangéy férayu. <sup>29</sup> Endob nongot ro bé Jesuse maro, “Odor go begye témérén non gédétén sémingkuf.” Mélaw ménodor i Jesuse bero mahur dob lawie. <sup>30</sup> Amun diyo ron ménsar dob doror i ahayane, méndot i Jesuse fan brab fénsalamata no. Tidéw béno, sénkébéng-kébéngén, atin sénarén dob berowe. <sup>31</sup> Tidéw béno, énggélolo roy Jesuse, éndob tékow ménalfa dob téngaanga ruwe. <sup>32</sup> Tidéw béno, ménsébérahéw-bérah ro maro, “Been i funa tuwe toow fo fiyoy de féféw to brab toow fo méoror to bé késébérahéw-bérah ne beto amun diyo to dob de aguwon atin bé lala ne mureton beto fantag bé Ménsulate Kébérah i Tuluse.”

<sup>33</sup> Bé béno so, téménindég ro brab ménséfule ro mangéy Jerusalem. Diyo énggito roy de folo bra sébaan ménséli mud beroy de dumo kuyugén. <sup>34</sup> Atin séuret-uret ro maro, “I Kadna tome toow méntébuté,

non méntéfégito dob Simone.”<sup>35</sup> Tidéw béno, nuret i ruwowe gétéw dumo roy ménrigowe dob de aguwon, brab ati kéglolo ruwe de bé de sékébeng-kébengén fan.

<sup>36</sup> I lala ruwe séuret-uret, méntéfégitoy Jesuse téménindég dob kërara ruwe ménsébéréh bero.

<sup>37</sup> Endob toow fo mégilak ro non maro ké ménayam i Jesuse.<sup>38</sup> Mélaw ménbéréh man i Jesuse mano, “Sedek mégilak gom? Aw mérégén i kéunur gome ké méuyagu?”<sup>39</sup> Téngténg gom i de kémér gu ni brab de sékéy gu ni. Gito gom? Toow, Begén. Gamakénu inok gétuwa kom békénu ménayam. I ménayame énda i ungéén brab énda i bukalén. Endob gito gom, wén i kagén de.”

<sup>40</sup> Tidéw béno, fénténgténg Jesusey de kémérén brab de sékéyén.<sup>41</sup> Toow ro fo ménggaif brab énda géféngintoow ro de, non toow fo fiyo damén ké toow. Mélaw i Jesuse fénénginsaa no bero mano, “Wén i féama gom Begén?”<sup>42</sup> Atin niraya ro sébaan sédo,<sup>43</sup> atin éndotén brab namaén dob adafa ruwe.

<sup>44</sup> Atin bénréhén bero mano, “Been soy ni mérigowe bénréh gu begom amun diyow dob begome séna bé énda séna méléhuu. Nuret guy métuman i kéluhanane fantag bé Begéne dob de sénulat Moises brab de sénulat i de sénarigoy Tuluse muret, brab dob de sénulatén kanta dob Ménsulate Kébéréh i Tuluse.”

<sup>45</sup> Tidéw béno, fénggétiga Jesuse dob berowe inok gésobuto roy Ménsulate Kébéréh i Tulus.<sup>46</sup> Bénréhén man bero mano, “Wén i Ménsulate Kébéréh i Tuluse bé i Kristowe mékukum, éndob dob gétéléw ne gétérésang tébule.<sup>47</sup> Atin sabaf bé atura kuwe fatut ureté kom dob kéluhanay de étéw bé kailanga ro gésénule bé de sala ro brab rigoné roy kétayay Tuluse inok fésagaday Tuluse bero. Uret gom étah dob de étéw dob Jerusalem, tidéw béno dob kéluhanay de étéw dob duniyae ni.<sup>48</sup> Fatut ureté kom non begomey de énggégito bé de ni ménrigo.<sup>49</sup> Sugué ku mangéy dob begomey ati fénasad i Abay guwe. Endob ongot-ongot gom dob Jerusalem taman gégumah i barakate dob begome.”

### *I kédijat Jesuse*

<sup>50</sup> Tidéw béno, nuwit Jesusey de kuyugén ménsut dob no ingéd taman Betania. Amun ménggumah ro diyo, ténunggulén i de kémérén brab déménasal dob Tuluse inok féfiyoné no bero.<sup>51</sup> I lala ne rémigo bé ni, déméniyat mangéy dob lawayo.<sup>52</sup> Atin fénéngadaf roy Jesuse, brab ménoror ro séfule mangéy Jerusalem.<sup>53</sup> Atin diyo ménangéy ro sénga tékélid dob lawi i Tuluse fésalamat bé Tuluse.

## I Fiyowe Uret Sénulat Juane

Been i niy Fiyowe Uret sénulat Juane fantag bé Jesu Kristowe. Sénulat Juaney dumoy de mékëaif do réngio Jesuse sani de galbék ménfégélolo bé i Beene, Nga i Tuluse. Sénulat Juaney Jesuse ménléhu gênantino noy de kéilawan. Jesusey tulake fénléhu inok i sala i de étéw mékédan. Sénulat Juane so dob ni sulat bé amuk munur i de étéw dob Jesuse, iray i Tuluse beroy umule magufusa.

I Juane, sani séménulate bé ni Fiyo Uret, ségétéw bé de kuyug Jesus amun dini sénay Jesuse dob duniyae ni. Endob békén saén kuyug Jesus i Juane, non been soy toowe fo kégédawa Jesuse dumo no séloyuk dob duniyae ni. Mélaw énggito noy de réngio Jesuse brab énggélango noy kébérah ne. Mélaw gétiga tom toow fo toow i kéluhanay de ni sénulat Juane.

### *I Kristowe ménwaléy kéilawan*

<sup>1</sup> Dob féganaye wénén i féndawéte “Kébérah i Tuluse”, sani Kristowe. Atin i Beene beroy Tuluse. Brab Beeney Tuluse. <sup>2</sup> Beroy Tuluse bé féganaye. <sup>3</sup> Atin fénlimbag i Tuluse bé Kristowey kéluhanay éntingayéne. Enda i éntingayén ménlimbag ké békén Kristowey léménimbage de. <sup>4</sup> Dob Beeney umule brab i nan umul maak Solo réméndaw dob de kéilawan. <sup>5</sup> I ni Solo réméndaw dob délémane brab énda géfandaay délémane de.

<sup>6</sup> Wén i ségétéwe étéw sénugu i Tuluse, i dawét ne Juan Bautista. <sup>7</sup> Ménangéy dini muret fantag bé nan Solo inok i kéluhanane mégélingo de brab munur bé nan Solo sani Kristowe. <sup>8</sup> Bé kén Juaney Soloe, éndob ménangéy saén dini muret fantag bé nan Solo. <sup>9</sup> Tidéw béno, i toowe Solo énggégumah dob duniyae inok réméndaw dob kéluhanay kéilawane.

<sup>10</sup> Mélaw i Kristowe dininén dob duniyae. Endob fiyon fo ké Beeney léménimbage de, énda géloloy de kéilawan de. <sup>11</sup> Ménangéy dob kaane ingéd, éndob i de kaan étéw énda tényakuf ro de. <sup>12</sup> Endob i kéluhanay téménayakufe de brab ménunure dob Beene, niraya no bero kuwagib waléy nga i Tuluse. <sup>13</sup> Ménwaléy ro nga i Tuluse bé kén sabaf bé réngigoy de étéw taloo no aturay kéilawane mumah ro, yamula sabaf bé aturay Tuluse saén.

<sup>14</sup> I Kristowe ménwaléy kéilawan, ménbati sétifon betom. Enggito gey i barakat ne tidéw dob Abayo Tulus, non been i buntunge Ngaén, toow fo mégédaw brab toow fo toow i kébérah ne.

<sup>15</sup> Ménuret i Juan Bautistawe fantag bé Kristowe. Ménbérah métanug mano, “Been

i niy bénréh guwo begom gégumah témundug begén, éndob gérotor na begén, non bé énda séna ménumahu de, ménwénén.” Been i bénréh Juane.

<sup>16</sup> Tidéw dob toowe kégédawén betom, énda téméré no miray do kéfiyonon dob betome kéluhanan. <sup>17</sup> Non i Tuluse nirayén i kukumane fén-uwitén bé Moiseese, éndob i gédawe brab toowe kétoro fén-uwitén bé Jesu Kristowe. <sup>18</sup> Enda i ségétéw énggégito bé Tuluse. Endob i Buntunge Ngaén, fénggétiga noy fantage bé Abay ne non sédumon ro. Brab i Ngae, Tulus so.

### *I uret Juan Bautistawe*

<sup>19</sup> I de odoroy de Judio dob Jerusalem, séménugu ro do fadi brab do témabang bé de fadi féndawét do Lebita mangéy ménginsa dob Juane, ké ati beene.

<sup>20</sup> I Juane, bénréhén i mékéntaye brab toowe mano, “Békén begéney Kristowe, sani fénémili i Tuluse méguléw.”

<sup>21</sup> Atin fénénginsaa ro man maro, “Ati mélaw i beeme ni? Aw méntélata Elias go?”

Séménbul man i Juane mano, “Békén.”

Atin ménénginsa ro man maro, “Aw beemey nan sarigon muret bé kébérah i Tuluse?”

Atin séménbul man i Juane mano, “Békén.”

<sup>22</sup> Atin ménbérah ro man maro, “Béréhém begey ké ati beeme ni, inok gébérohé key dob de séménugu begey. Ati gébérohé muwe fantag bé beeme?”

<sup>23</sup> I Juane séménbul niringén i kébérah Isaiase sani méntélatae sénarigoy Tuluse muret bé kébérah ne mano, “Begéney ségétéwe dob gonone énda i étéw de bati, mékes maku, ‘Fééntang gom i aguwoy Kadnane.’”

<sup>24</sup> Atin i de sénugu tidéw dob de Fariseo, ménénginsa ro man maro, <sup>25</sup> “Amuk békén go Kristo, taloo no Elias, taloo no sarigon muret, sedek mautis go?”

<sup>26</sup> Séménbul i Juane mano, “Wayég i fégebautis guwe, éndob wén i ségétéwe étéw ménggélawék begom énda gélolo gom de. <sup>27</sup> Been i gégumahe témundug begén, éndob toow na fo gérotor begén. Mélaw énda médaitu fiyon mukoh bé ikét i safatos ne.”

<sup>28</sup> Ménrigoy ni dob Betania, diyo dob sébangay wayége féndawét Jordan, gono Juane mautis.

### *I natiwe bili-biliy Tuluse*

<sup>29</sup> Dob sébaane de fuweh, énggito Juaney Jesuse mangéy dob beene, brab ménbérah dob de étéw mano, “Téngténg gom, ay ni nén i maake fégétulak nati bili-bili niray i Tuluse non féléhuén inok mékédan i de sala i de étéw dob duniyae. <sup>30</sup> Been i niy bénréh guwo maku, ‘Wén i ségétéwe étéw gégumah témundug begén, éndob gérotor na begén, non

bé énda séna ménumahu de, ménwénén.’<sup>31</sup> Bé gétahe de, énda gélolo gu de, éndob i funa kuwe ménangéy dini mautis bé wayége inok émfayag i Beene dob begome do dumo gu Judio.”

<sup>32</sup> Atin ménbéréh man i Juane mano, “Enggito guy Rémogor i Tuluse ménlus tidéw dob lawayo maak marafati méntérimféna mangéy dob Beene. <sup>33</sup> Enda damén gétiga ku de saliyyu bé Tuluse, sani séménugue begén mautis bé wayége, ménbéréh dob begéne mano, ‘I étéwe gito mo térimfénaay Rémogor guwe, Beeney mautise bé Rémogor guwe.’” <sup>34</sup> Atin féntaus Juaney kébéréh ne mano, “Enggito gu, brab gébéroho kuy Beeney Nga i Tuluse.”

### *I de sungu kuyug Jesuse*

<sup>35</sup> Dob sébaane de fuweh, diyo man i Juane beroy de ruwo gétéw kuyugén. <sup>36</sup> Amun énggito noy Jesuse témara, ménbéréh mano, “Téngténg gom, ay nan i natiwe bili-biliy Tuluse.”

<sup>37</sup> Amun énggélíngooy de ruwo gétéw kuyugén i ni bénrénén, ménfuray ro bé Jesuse. <sup>38</sup> Atin séménling i Jesuse brab énggito no bero furay dob Beene. Atin fénénginsaa no bero mano, “Ati kétaya kome?”

Tidéw béno ménbéréh ro maro, “Hon i batio muwe de, Rabi?” (I atag i Rabiwe Maistéro.)

<sup>39</sup> “Enggomén, inok gito gom,” bang Jesuse. Atin ménodor ro, brab énggito roy batio nuwe. I urase béno, témégénén. Mélaw énda ménule ro taman kélungonan.

<sup>40</sup> I ségétéwe bé de ruwo ni gétéw lagéy énggégélingo bé bénrénén Juane brab ménodor bé Jesuse, sani fédawéténe Andres dumo Simon Pedrowe sétima idéng. <sup>41</sup> I sungu-sunguwe rénigo Andrese, sénlédén i Pedrowe brab nureto no mano, “Enggito gey i Kristowe.” (I atag i Kristowe fénémili i Tuluse méguléw.) <sup>42</sup> Tidéw béno, nuwitén i Simone mangéy dob Jesuse.

Atin ténéngténg Jesuse brab bénrénén mano, “Beemey Simone, nga Jonas. Fédawété ku beam Sefas.” (I Sefase ségiléw bé dawéte Pedro, atin i atag ne batéw.)

<sup>43</sup> Dob sébaane de fuweh, bénaba Jesusey mangéye Galilea. Brab énggito noy Filipiwe, atin ménbéréh dob beene mano, “Odor go Begén.” <sup>44</sup> I Filipiwe, ségiléw bé Andrese brab Pedro, tidéw ro dob ingéde féndawét Betsaida. <sup>45</sup> Atin i Filipiwe, ménangéy dob Natanaele atin bénrénén dob beene mano, “Enggito gey i étéwe, sani étéwe sénulat Moisesey fantage bé Beene dob kukumane bé do gétahe, brab sénulat i de sénarigoy Tuluse so muret bé kébéréh ne. Beeney Jesuse, nga Jose, tidéw Nasaret.”

<sup>46</sup> Atin ménénginsa i Natanaele dob Filipiwe mano, “Aw wén wayoy éntingayén fiyo tidéw Nasaret?”

Bang Filipiwe, “Enggonén, angéyémm téngténg.”

<sup>47</sup> Amun énggito Jesusey Natanaele mangéy dob Beene, ménbéréh mano, “Ay niy métintuwe étéw Judio. Enda i tugi dob adat ne.”

<sup>48</sup> “Ati kégétiga muwe begén?” bang Natanaele.

Séménumbul i Jesuse mano, “Enggito gu beam dob fantad i kayéwe féndawét igos bé énda séna ténawag Filipiwe beam.”

<sup>49</sup> Tidéw béno, fényag Natanaele mano, “Maistéro, Beemey Nga i Tuluse brab Datu gey do Judio.”

<sup>50</sup> Ménbéréh i Jesuse mano, “Aw ménunur go saén sabaf bé bénrénén guwe beam énggito gu beam dob fantad i kayéwe igos? Gégito go na médooy éntingayén rigoné ku toow fo mékégaif na tidéw bé ni. <sup>51</sup> Béréhé ku begom i toowe, gito gom moso i lawaye émbukeh brab i de télakiy Tuluse ménik brab mélus dob Begéne, sani Nga i Kéilawane.”

## 2

### *I Jesuse dob uyote*

<sup>1</sup> Ménruwo gétérésangan tidéw béno, wén i uyot dob Kana, sébaan ingéd dob Galilea. Atin i idéng Jesuse diyo dob uyote ni. <sup>2</sup> Diyo soy Jesuse brab de kuyugén non sénéngkat ro so hero dob ni uyot. <sup>3</sup> Amun ménétéyén i arake, ménbéréh i idéng Jesuse dob Beene mano, “Endaén i arak ro.”

<sup>4</sup> Endob séménumbul i Jesuse mano, “Iday, kago suguén Begén. Enda séna énggumah i gai guwe émfégito bé barakat guwe.”

<sup>5</sup> Tidéw béno, i idéng Jesuse ménbéréh dob de sugu-suguén mano, “Rigo gom i kéluhanay béréhé nuwe begom.”

<sup>6</sup> Wén i ném timan do dakél binangga diyo, usaréy de Judio ahuron wayég féfénguse ro loo bé adat ruwe. (Labi téléw folo gélaya i kédakél i séngae binangga.) <sup>7</sup> Bénrénén Jesuse dob de sugu-suguén mano, “Féno gom wayég i de binangga.” Mélaw fénéno ro wayég i de binangga déméngér ké toow fo féno. <sup>8</sup> Tidéw béno, bénrénén bero mano, “Sakug gom de kloho, brab uwit gom dob méguléwe bé ni uyot.” Atin rénigo ro.

<sup>9</sup> Amun i méguléwe bé uyote ménggétemtem de, békénén wayég, non ménwaléyén arak. Atin énda énggétiga noy ténidéwoy ni de arak. Endob gétigay de sugu-suguén séménakug de. Tidéw béno, i méguléwe ni ténabarén i témérimawe lagéy. <sup>10</sup> Brab ménbéréh mano, “Dob de dumo do karagiya, i de étéw duwoté ro métahe i fiyowe arak, brab buluk énggéinémén témantuy kéluhanay kanawe, tidéw béno duwoté roy

mélémuwe de. Endob i beeme dénuwotém wayoy toowe balilaga arak géfuray béni!” Been i bénréh i uléwe.

<sup>11</sup> Rénigo Jesusey ni sungu mékégaif dob Kana, ingéd dob Galilea. Fénggito noy barakat ne diyo, atin i de kuyugén ménunur dob Beene.

<sup>12</sup> Amun énggilidén i uyote, i Jesuse brab idéng ne, brab de tuwaréyén, brab de kuyugén, ménagéw ro mangéy Kaper-naum. Atin ménbati ro diyo bé ménfiroye gétérésangan.

### *I Jesuse dob lawi i Tuluse*

<sup>13</sup> Gédétén i kandulie féndawét “Témara” kay de Judio, mélaw ménénagé i Jesuse mangéy Jerusalem. <sup>14</sup> Dob fésayaway lawi i Tuluse, énggito noy de étéw émfébéléy do fégétulak safi, bili-bili, marafati. Brab énggito noy de lémuluk kurta ménsar dob sékuloy de ahaya ro. <sup>15</sup> Mélaw réménigo fégétafésén taléy brab dénédélén bero tidéw dob lawi i Tuluse. Dénédélén soy de safi brab do bili-bili. Atin bénluweén i de ahayay de lémuluk kurta brab sénawarén i de félatah ro. <sup>16</sup> Atin ménbéréh dob de émfébéléy marafati mano, “Uwit gom tékédan i de ni. Kagom rignonén fadiyan i lawi i Boh guwe!” <sup>17</sup> Atin énggétédémoy de kuyugén i Ménsulate Kébéréh i Tuluse mano, “O Tulus, i kéimu guwe bé lawi me, maak aféy dob fédéw guwe.”

<sup>18</sup> Atin i de odoroy de Judio ménénginsa ro dob Jesuse maro, “Amuk wén i kuwagibém tidéw dob Tuluse bé ni rénigo mo, fégitonon gey mékégaif émféféngintoow de.”

<sup>19</sup> Sémumbulo Jesuse bero mano, “Rundas gom i lawi i Tuluse ni, atin fétindégé ku man bé téléwe gétérésangan.”

<sup>20</sup> Séménumbul i de Judio maro, “I ni lawi Tulus, mén-fot folo bra ném gébélintuwa i kéfétindége de, atin fétindégé mo man bé téléwe gétérésangan saén?”

<sup>21</sup> Endob i lawi i Tuluse béréhé Jesuse, been i lowoh ne. <sup>22</sup> Amun gilid méntébule i Jesuse, énggétédémoy de kuyugén i bénréh ne. Atin ménunur ro bé Ménsulate Kébéréh i Tuluse brab de bénréh Jesus.

<sup>23</sup> Bé kédiyo Jesuse dob Jerusalem, bé gajy kékanduli i de Judio féndawét “Témara”, médooy méngginugate bé Jesuse non énggito roy médoowe mékégaif rénigo no. <sup>24</sup> Endob énda séménarig i Jesuse bero non gétiga noy kéluhanay étéwe. <sup>25</sup> Enda kailanga no ureton fantag bé étéwe non gétiga noy fédéw i kéilawane.

## 3

### *I Jesuse brab Nikodemowe*

<sup>1</sup> Wén i ségétéwe étéw féndawét Nikodemo, ségétéw bé de Fariseo sani de tintu modor bé

adat i de Judio. Brab i Nikodemowe odoroy de Judio. <sup>2</sup> Wén i no sébaan kélungonon, ménangéy dob Jesuse atin ménbéréh mano, “Maistéro, gétiga key ségétéw go témoro tidéw dob Tuluse. Non énda i ségétéw gérigo bé de rignoné mo mékégaif ké békén tidéw dob Tulusey barakat ne.”

<sup>3</sup> Séménumbul i Jesuse mano, “Béréhé ku beam i toowe, énda i ségétéw géahur dob féguléwoy Tuluse, saliyo ké mumah na féruman.”

<sup>4</sup> Endob ménénginsa i Nikodemowe mano, “Ati kéfingé-fingé i kéumah i étéwe féruman ké lukésén? Endaén géahurén séruman dob sur i idéng ne atin mumah man!”

<sup>5</sup> Séménumbul i Jesuse mano, “Béréhé ku beam i toowe, saliyo ké i étéwe mumah bé wayége brab bé Rémogor i Tuluse, énda géahurén dob féguléwoy Tuluse. <sup>6</sup> I kéluhanay étéwe mumah dob kéilawane brab gédoté roy lowohe. Endob i de étéw mumah bé Rémogor i Tuluse, bati i Rémogor i Tuluse dob de fédéw ro. <sup>7</sup> Mélaw kago mégaif bé kébéréh guwe, ‘Fatut go mumah féruman.’ <sup>8</sup> Non ségiléw so bé réfuruhe. I réfuruhe mangéy dob kétaya nuwe ayo no. Gélingoo mo éndob énda gétiga moy hon i tidéwo nuwe de taloo no hon i ayo nuwe de. Loo so bé nan, énda gésobuto kom i kéumahe dob Rémogor i Tuluse.”

<sup>9</sup> I Nikodemowe ménénginsa mano, “Ati kérihowe bé ni?”

<sup>10</sup> Séménumbul i Jesuse mano, “I beeme ménbantug go témoro dob Israel, éndob énda gésobuto moy ni? <sup>11</sup> Béréhé ku beam i toowe, béréhé key i gétiga keye, brab ureté key i énggito geye, éndob énda i munur de begom. <sup>12</sup> Amuk énda munur go Begén bé ureté kuwe ni beam fantag bé de éntingayén dob duniyae ni, toow na fo énda munur go ké ureté kuy fantage bé de éntingayén dob lawayo. <sup>13</sup> Atin énda i ségétéw énggéangéy dob lawayo, saliyo bé Begéne, sani Nga i Kéilawane méntidéw diyo.”

<sup>14</sup> Bé gétahe de, amun diyo i de Judio dob gonone énda i étéw de bati, kéneke i de uléw bero. Mélaw réménigoy Moisesé kéninontow maak falas ulé brab féndiyoén dob kayéwe brab ténunggulén inok i kéluhanay de téméngténg de, énda méléhu ro. Ségiléw so bé niy Nga i Kéilawane fatut tunggulén dob kayéwe, <sup>15</sup> inok i kéluhanay munure dob Beene énda méléhu ro, yamula gédoté roy umule magufusa. <sup>16</sup> I Tuluse toow fo mégédaw bé kéluhanay de étéw dob duniyae, mélaw nirayén i buntunge Ngaén inok i kéluhanay munure dob Beene, énda méléhu ro, yamula gédoté roy umule magufusa. <sup>17</sup> Non békén sénugu i Tulusey Nga ne dob duniyae ni inok kukumé noy kéilawane. Yamula inok fukase noy kéilawane dob de sala ro.

<sup>18</sup> I munure dob Jesuse énda mékukumén. Endob i éndae munur dob Beene mékukum non énda munurén bé buntunge Nga i Tuluse. <sup>19</sup> Been i funay Tuluse kémukum: I Soloe, sani Kristowe, ménangéy dob duniyae, éndob i de étéw méuyot ro bé délémoné, brab mika ro bé Soloe non bé de tete rignoné ro. <sup>20</sup> I kéluhanay rémigowe tete mika ro bé Soloe brab énda fégedét ro de non mégilak ro ké giton i de tete rignoné ro dob géfékayae. <sup>21</sup> Endob i de métintu do étéw fégedét ro dob Soloe inok giton réngo roy kétayay Tuluse.

#### *I kéuret Juan Bautistawe*

<sup>22</sup> Tidéw béno, i Jesuse brab de kuyugén ménangéy ro dob ingéde Judea brab ménbati ro diyo bé ménfroye gétérésangan, brab ménautis ro diyo. <sup>23</sup> Atin i Juane ménautis so, éndob dob ingéde Enon, gédét dob ingéde Salim non médooy wayége diyo. Atin i de étéw ménangéy dob beene inok bautiso no bero. <sup>24</sup> I ni ménrigo bé énda séna ménbilanggu i Juane de.

<sup>25</sup> Bé béno, wén i ségétéwe Judio ménséédél bé de dumo kuyug Juan fantag bé kélimfiyowe dob adafay Tuluse. <sup>26</sup> Mélaw i de kuyug Juan, ménangéy ro dob Juane, brab ménbéréh ro maro, “Maistéro, énggétédemo moy dumo muwo ménta dob sébanga wayége Jordan, sani étéwe nuretém? Mautis béni atin kéluhanay étéwe mangéy dob Beene.”

<sup>27</sup> Endob séménbumul i Juane mano, “I étéwe gédoté no saén i iray i Tuluse dob beene. <sup>28</sup> Énggélíngoo kom i bénréh guwe bé békén begén i Kristowe, éndob énggétahu sénugu bé Beene. <sup>29</sup> I Kristowe ségiléw bé témérimawe lagéy brab begénéy maake sémégunung bé témérimawe lagéy. Atin i de kuyugén ségiléw ro bé témérimawe libun. I témérimawe libun kay témérimawe lagéy, békén kay sémégununge. Mélaw i sémégununge ongot-ongot brab féngélingoé no atin méoror de ké gélingoo noy béréh i témérimawe lagéy. Loo bé nan i kagéne kéoror énggumah béleewe, non médooy de étéw furay bé Jesuse. <sup>30</sup> Beeney fatute waléy gérotor, atin i begéne fatut waléy gérifantad.”

<sup>31</sup> Non i Jesuse tidéw dob lawayo, mélaw gérotor na bé kéluhanane. Endob i de kéilawan, tidéw ro dob fantade ni saén. Mélaw gébéréh ro saén fantag bé duniyae. Endob i tidéw dob lawayo, toow na fo gérotor bé kéluhanane. <sup>32</sup> Ureté noy énggito nuwe brab énggélíngoo nuwe dob lawayo. Endob kloh saén i munure de. <sup>33</sup> Endob i étéwe munur bé urret ne, émfayag bé toow i Tuluse. <sup>34</sup> Non i sénugu i Tuluse, urreté noy kébéréh i Tuluse, non iray i Tulusey Rémogor ne énda i tamana no. <sup>35</sup> Atin i Abaye Tulus mégédaw bé Nga ne brab i kéluhanay ature

sénarigén dob Beene. <sup>36</sup> I munure dob Nga i Tuluse, gédoté noy umule magufusa. Endob i éndae munur dob Beene, énda gédoté noy umule magufusa, non énda mékédan i kérit i Tuluse dob beene.

## 4

### *I libune dob Samaria*

<sup>1</sup> Énggélíngoo de Fariseoy urete bé labi na médooy gédoté Jesuse kuyugén brab toow na médooy bautisé Jesuse étéw bé Juane de. <sup>2</sup> Endob i toowe, do kuyug Jesus i mautise, békén Jesus. <sup>3</sup> Amun énggélíngoo Jesusey ni urret, méntékédan dob Judea, atin ménséfulé mangéy Galilea. <sup>4</sup> Mélaw dob kéagéw ro Jesuse, kailanga roy témarae dob sakuf i ingéde féndawét Samaria.

<sup>5</sup> Atin, énggégumah ro dob sébaane ingéd dob Samaria féndawét Sikar, gédét dob fantade niray Jakobé bé nga ne Jose bé gétaho. <sup>6</sup> Diyo, wén i kalute wén i wayég de, réngo Jakobe. Atin i Jesuse ménsar diyo dob sékuloy kalute. Non ménlugotén bé kéagéw ne brab géutuh térsang i kégumah ne diyo.

<sup>7-8</sup> Bé béno, énda diyo i de kuyug Jesus non ménangéy ro dob fadiyane méléy amaén. Atin i ségétéwe libun tidéw Samaria énggégumah mangéy wayég. Atin ménbéréh i Jesuse dob libune ni mano, “Aw fakay géiraya mo Begén wayég inémén?”

<sup>9</sup> I libune ni séménbumul mano, “I Beeme ségétéw go Judio atin i begéne tidéwu Samaria. Sedek mongot go miném dob begéne?” (Bénrénén i ni non i de Judio karangé ro mékérésik i de étéw tidéw Samaria, atin mélaw énda sélawé ro bero.)

<sup>10</sup> Séménbumulo Jesuse mano, “Amuk gétiga mo damén ké ati iray i Tuluse brab gélolo mo Begén sani mongote wayég, i beeme mongot so dob Begéne brab iraya ku beam bé wayége miray umul.”

<sup>11</sup> “Maistéro,” bang i libune ni, “énda i féngésakugém brab i kalute ni ménalém. Hon i gédoto muwe de bé wayége miray umul?” <sup>12</sup> I katufua tome Jakob i kéménalute bé ni kalut. I beene brab de ngaén dob ni so méniném loo soy de ayamén. Aw toow na gérotor go bé beene?”

<sup>13</sup> Séménbumul i Jesuse mano, “I minéme bé wayége dob ni kalut waléy so man térumén. <sup>14</sup> Endob i minéme bé wayége iray gu, éndaén térumé no. Non i wayége iray gu dob beene waléy séfut wayég dob fédew ne miray umul magufusa.”

<sup>15</sup> Atin ménbéréh man i libune ni dob Jesuse mano, “Maistéro, irayanu bé nan wayég, inok éndaén téruménu, brab éndaén kailanga kuy mangéye dini médot wayég.”

<sup>16</sup> Tidéw béno, bénréh Jesuse man dob ni libun mano, “Angéyém i bawag me brab séfulé go mangéy dini.”

17 I ni libun séménambul mano, “Enda i bawag gu.”

Atin ménbéréh i Jesuse man mano, “Toow i kébéréh me, énda i bawagém. 18 Non wénén i limo gétéw ménawag beem brab i ségétéw dumo mo sétifon béni békén tintu bawagém. Bénréhém Begén i toowe.”

19 “Maistéro,” bang i ni libun, “Enggélolo gu béni bé Beemey sarigone muret bé kébéréh i Tuluse.” 20 Mélaw ménénginsa dob Jesuse mano, “I de katufua key do tidéw Samaria ménéngadaf ro dob ni tuduk, éndob i begome do Judio, béréhé kom, Jerusalem i fatute ayoy de étéw méngadaf bé Tuluse. Mélaw ati isuwe toow fatut rignonéy de étéw?”

21 Séménambul i Jesuse mano, “Di, féngintoowonu. Gégumah mosoy gaiwe, i kéféngadafé bé Abaye Tulus, békén saén dob ni tuduk taloo no dob Jerusalem saén. 22 I begome tidéw Samaria, féngadafé kom i éndae gétiga kom, éndob i begey do Judio féngadafé key i gétiga keye, sani Tuluse. Non usaréy Tulusey de Judio mémukas bé de kéilawan. 23 Atin gégumah i nan gai brab énggumahén béleewe, i de tintu méngadaf, féngadafé roy Abaye bé de rémogor ro brab fatut munur ro bé toowe fantag bé Tuluse. Non i Abaye, been i niy kétaya nuwe kéféngadaf de. 24 I Tuluse, Rémogor, békén lowoh. Komon i méngadafé de, fatut féngadafé no dob rémogore brab dob toowe.”

25 Bang i libune ni, “Gétiga ku gégumah i fénéмили i Tuluse méguléw féndawét Kristo. Buluk gégumah, féfégetuwa no betom i kéluhanay éntingayéne.”

26 Atin ménbéréh i Jesuse mano, “Begéney Kristowe, sani émbéréhe dob beeme.”

27 Bé béno so, énggumah i de kuyug Jesus, brab ménggaif ro bé kégito ruwe de séuret-uret roy libune ni. Endob énda i ségétéw bero ménénginsa bé ati kétaya nuwe taloo no sedek séuret-uret bé libune ni.

28 Tidéw béno, i libune ni fénedén i b-nangga ne, brab ménséfule mangéy dob ingéde. Atin diyo bénréhén dob de étéw mano, 29 “Enggomén, angéy gom téngténg i étéwe bénréhén begén i kéluhanay rénigo guwe. Békén ba keeyén Been i Kristowe?”

30 Mélaw i de étéw ménsut ro dob no ingéd ménangéy dob Jesuse.

31 Amun énda séna gumah ro, ménongot i de kuyugén mano, “Maistéro, ama go na.”

32 Endob sémumbulo no bero mano, “Wén i amaé ku énda gétiga kom de.”

33 Tidéw béno ménsébéréh-béréh i de kuyugén maro, “Wén bay ménuwiton de amaén?”

34 Tidéw béno, bénréh Jesuse dob berowe mano, “I kérigo guwe bé kétayay Tuluse ménféuwit Begén, brab bé kéfégilide bé galbéke férigo no Begén, been i maake amaé

ku. 35 Wén i bénréh gom, ‘Fot na gétérésang kélungonon, atin kémétéwén.’ Endob béréhé ku begom, téngténg gom i de ni étéw mangéy dini, non maak do nohok togohén, fakayén kétéwén béleewe. Non ay ninén i gaiwe munur ro Begén. 36 I de étéw kémétéw sémahud brab timué roy de kéntéw ro. Ségiléw ro bé de émféumur bé de dumo étéw inok gédoté roy umule magufusa. Atin i de étéw muret fantag bé Tuluse, maak beroy de mohok. Mélaw i de mohok brab de kémétéw séoror ro. 37 Toow i kébéréhe mano, ‘Ségétéw i mohoke, ségiyoy kémétéwe de.’ 38 Fénuwit gu begom mangéy kémétéw bé békéne géalnbéko kom, ségiyoy géméalnbéke de atin ménangéy gom saén kémétéw bé géalnbéko ruwe.”

39 Médooy de étéw tidéw Samaria dob no ingéd ménunur bé Jesuse non bé kébéréh i libune mano, “Bénréhén begén i kéluhanay rénigo guwe.” 40 Mélaw amun ménangéy i de étéw tidéw Samaria dob Jesuse, nongot ro fébatié roy Jesuse dob berowe. Atin ménbati i Jesuse diyo ruwo gétérésangan.

41 Atin sabaf bé kéureto nuwe bero, ménuman i kédooy ménunure dob Beene. 42 Atin bénréh ro dob libune ni maro, “Munur geyén békén sabaf saén bé bénréh me begey. Béleewe énggélinooy key i kébéréh ne, mélaw gétiga key tintu Beeney mémukas bé kéilawane dob de sala ro.”

#### *Nuwa Jesusey nga i ségétéwe odoron*

43 Amun énggilid i ruwowe gétérésangan, i Jesuse ménule ménangéy Galilea. 44 Wén soy kébéréh Jesuse mano, “I sarigoy Tuluse muret bé kébéréh ne, énda fégadata no dob kaane ingéd.” 45 Endob amun énggumah dob Galilea, ténayakuf i de étéw diyo, non énggito roy kéluhanay rénigo nuwe mékégaif dob kékandulie féndawét “Témara” dob Jerusalem, non diyo ro so.

46 Tidéw béno, ménséfule i Jesuse mangéy Kana, sébaan ingéd dob Galilea, sani ingéde fénwalyén arak i wayége. Atin wén i ségétéwe gémamak kukuman wén i ngaén lagéy démeruun dob ingéde Kafernaum.

47 Amun énggélinooy noy Jesuse énggumah dob Galilea tidéw Judea, ménangéy dob Jesuse brab nongotén dob Jesuse angéyé no uwaén i nga ne gédetén méléhu. 48 Atin bénréh Jesuse dob beene mano, “I begome, taman énda gégito gom do mékégaif, énda fo munur gom Begén.”

49 Bang i ni odoron, “Maistéro, énggonén, lokut énda séna méléhuén.”

50 Atin bénréh Jesuse dob ni odoron mano, “Ule gon, adi-adinén i nga me.” I ni étéw ménunur bé kébéréh Jesuse brab ménule.

51 Amun diyo séna lowoh agéwon, béalak i de sugu-sugué no brab bénréh ro maro, “Ménadi-adinén i nga me.”

<sup>52</sup> Atin fénénginsaa no bero mano, “Ati urase bé kéadi-adi nuwe?”

Atin séménumbul ro maro, “Ménkédan i kééduf ne fuli natémégéno.” <sup>53</sup> Brab énggétédémoy boh ne been i noy urase bé kébéréh Jesuse dob beene mano, “I nga me adi-adinén.” Mélaw tidéw béno, kéluhana ro ségékuréng ménunur.

<sup>54</sup> Been i niy géruwowe mékégaif rénigo Jesuse dob Galilea bé kétidéw ne Judea.

## 5

### *I kéuwa Jesuse dob Betesda*

<sup>1</sup> Wén i no sébaan fuweh, ménangéy i Jesuse dob Jerusalem non wén i kanduli diyo kay de Judio. <sup>2</sup> Atin diyo dob Jerusalem gédét dob bégawane kay de bili-bili, wén i kérégéwe de féndawét Betesda dob Hebrewowe, sani késébéréh i de Judio. Wén i limo timan fésayawa no wén i do atéfén. <sup>3</sup> Diyo méniro i médoowe do étéw déméruun, do langafén, do fikat, brab do kimoyén. Atin ongotongoté roy késékuyo i wayége ni. <sup>4</sup> Non wén i gai gégumah i télakiy Kadnane, angéyé no sékuyoén i wayége ni. Atin i géétahe mangéy téélééd dob ni wayég ké mésékuyo, waléy adi-adi fiyon fo ké atiy déruu nuwe. <sup>5</sup> Wén i ségétéwe lagéy diyo, méntéléwén folo bra waléw gébélintuwa i kédéruu nuwe. <sup>6</sup> Amun énggito Jesusey ni lagéy méniro diyo brab énggétiga noy kérégay i kédéruu nuwe, fénénginsaa no mano, “Aw méuyot go adi-adi?”

<sup>7</sup> Séménumbul i ni lagéy déméruun mano, “Maistéro, énda i témabangan begén mangéy téélééd dob wayége ké mésékuyo. Buluk féganayu séna féggédét, wénén i gégumah gétahe begén.”

<sup>8</sup> Tidéw béno, ménbéréh i Jesuse dob beene mano, “Tindég go, furuté i ikam muwa nan, brab agéw go.” <sup>9</sup> Sonom béno, ménadi-adiy ni lagéy. Atin fénurutén i ikam ne brab ménagéw.

I no gai kéféadi-adi Jesuse bé ni lagéy Sabado, gai kétéren kay de Judio. <sup>10</sup> Mélaw i de odoroy de Judio ménbéréh ro dob ni lagéy ménadi-adi maro, “Béleewe Sabado, gai kétéren. Énda fakayén dob kitab tome ké uwité moy ikam muwa nan.”

<sup>11</sup> Endob séménumbul i lagéy ni ménadi-adi mano, “Endob bénréh i lagéy ni ménféadi-adi begén, furuté kuy ikam guwe brab magéwu.”

<sup>12</sup> Atin ménénginsa i de odoron maro, “Ati no lagéy ménbéréh de dob beeme, ké furuté moy ikam muwe brab magéw go?”

<sup>13</sup> Endob énda énggétigay ni lagéy ké ati no étéw ménféadi-adi de, non ménangéy i Jesuse dob de ménribuk do étéw.

<sup>14</sup> Énda ménrugayén tidéw béno, énggito Jesusey ni lagéy dob lawi i Tuluse. Atin

ménbéréh i Jesuse dob beene mano, “Téngtégém, ménadi-adi gon. Kagon rémigo sala inok énda toow gétimeal i kékéfasanga muwe.”

<sup>15</sup> Tidéw béno, ménagéw i ni lagéy brab bénréhén dob de odoroy de Judio bé Jesus i ménféadi-adiwe de. <sup>16</sup> Mélaw i de odoroy de Judio, féngganay roy kérérasay ruwe bé Jesuse, non ménuwa bé gai kétérene. <sup>17</sup> Endob bénréh Jesuse dob berowe mano, “I Abay guwe Tulus énda téméréno gémalbék fiyon fo ké gai kétéren, atin i Begéne fatut gémalbék so sénga tékelid.”

<sup>18</sup> Been i niy funay de odoroy de Judio ménuman i kékérit ruwe bé Jesuse, atin toow na fo sarintaé ro féluhuén. Békén saén sabaf bé kégalbék ne ké gai kétéren, éndob sabaf so bé fédawéte noy Tuluse Abayén, ula-ula réféngé noy Tuluse béno.

<sup>19</sup> Atin séménubulo Jesuse bero mano, “Béréhé ku begom i toowe, i Begéne Ngaén, brab énda i gérigono ku ké tidéw dob Begéne saén. Rigoné kuy gito guwe rigonéy Abay guwe Tulus. Udenén rigonéy Abay guwe, rigoné ku so. <sup>20</sup> Non i Abay guwe méimu Begén brab féggétiga no Begén i kéluhanay galbék ne. Atin méuman i férgo nuwe Begén toow na fo mékégaif galbék funa kom mégaif. <sup>21</sup> Non loo bé Abay guwe tébuleé noy de ménléhu brab iraya no bero umul, Begéne ni so, iraya ku umul i de étéw kétaya ku iraya ku de. <sup>22</sup> Atin békén i Abay guwey kémukume bé de étéw. Yamula niraya no Begén kuwagib kémukum bé kéluhanay étéwe, <sup>23</sup> inok basanay kéluhanay étéwe Begén loo so bé kébasana ruwe bé Abay guwe. I éndae masanan Begén, énda so basana noy Abay guwe séménugu Begén.

<sup>24</sup> “Béréhé ku begom i toowe, i mégélingoe bé kébéréh guwe brab munur bé Tuluse séménugu Begén, wén i umulén magufusa. Atin énda mékukumén moso bé de salaén. Non éndaén méléhuén non fiyon fo ké méléhu i lowoh ne, gédoté noy umule magufusa. <sup>25</sup> Béréhé ku begom i toowe, gégumah i gaiwe brab méngumahén béleewe ni, bé gélingoo de ménléhu i béréh guwe, atin i de mégélingo de, gédoté roy umule. <sup>26</sup> Non i umule tidéw dob Abaye, brab loo bé ni niraya no Begén, sani Nga ne, barakat inok wén i umul tidéw dob Begéne. <sup>27</sup> Atin i Abay guwe Tulus, niraya no so Begén kuwagib kémukum bé de kéilawan kagulan Begén i Nga i Kéilawane. <sup>28</sup> Kagom mégaif bé de ni, non gégumah i gaiwe i kéluhanay de étéw ménléhu dob de lébéng ro, gélingoo roy béréh guwe. <sup>29</sup> Atin mésut ro tidéw dob de lébéng ro, atin i de réménigo fiyo métébule inok gédoté roy umule magufusa. Endob i de réménigo tete métébule inok mékukum ro.

<sup>30</sup> “I Begéne, énda i kagén gérigonon saliyyu bé Abay guwe saén. Kémukumu loo bé



kéfemandu i Tuluse de Begén. Mélaw i kékukum guwe métintu non békén kagén kétayan éndob kétayay Abay guwe séménugu Begén.

<sup>31</sup>“Amuk ureté ku saén i fantage bé lowoh guwe, énda i géunur de. <sup>32</sup> Endob wén i ségiyowe muret fantag bé Begéne brab gétiga kuy uret ne fantag bé Begéne toow fo toow. <sup>33</sup> Séménugu gom mangéy dob Juane Mautis atin nuretén i toowe fantag bé Begéne. <sup>34</sup> Endob énda kailanga kuy kéuret i kéilawane fantag bé Begéne, éndob énggélabito ku émfégétédém begom i uret Juane fantag bé Begéne, inok munur gom Begén funa kom méfukas dob de sala gom. <sup>35</sup> I Juane maak solo, mérino brab réméndaw kagalan ténoroén begom, brab ménoror gom témayakuf bé kétoro ne begom éndob singkow saén. <sup>36</sup> Endob wén i labi na fo fiyo funa kom munur Begén bé de nuret Juan. Fégitung gom i galbéke rigoné ku, non been i galbéke niray i Abay guwe Begén. Mélaw i de galbéke gu, been i émfégétigane bé sénugu i Abaye Tulus Begén. <sup>37</sup> Atin i Abaye séménugu Begén, fégétiga non soy fantage bé Begéne. Énda énggélíngoo kom i béréh ne taloo no énggito gom i falas ne. <sup>38</sup> Atin énda fénbati gom dob de fédéw gom i kébérah ne. Gétiga kuy ni non énda munur gom Begén, sani sénugu i Abaye Tulus. <sup>39</sup> Tantu gom féganad i Ménsulate Kébérah i Tuluse, non gékaranga kom dob de ni gédoté kom i umule magufusa. Endob been i niy de ménsulat uret fantag bé Begéne. <sup>40</sup> Mélaw amuk munur gom dob Begéne, gédoté kom i umule magufusa, éndob mika gom munur Begén.

<sup>41</sup> “Énda sélédé kuy kédayéw i kéilawane. <sup>42</sup> Endob gétiga kuy de fédéw gom, énda méimu gom bé Tuluse. <sup>43</sup> Sénugu i Tuluse Begén, atin Begén i sarigo nuwe. Gido loo énda ténayakuf gom Begén. Endob buluk wén i ségétéw gégumah énda sénugu i Tuluse de, tayakufé kom. <sup>44</sup> Énda munur gom non sélédé kom i kédayéw i de dumo gom étéw éndob énda sélédé kom i kédayéwe tidéw dob sébaane tintu Tulus. <sup>45</sup> Endob kagom fégitungén de ké Begén i témboe begom dob Abay guwe Tulus. Bé kén Begén. Sénarigo kom i kitabé niray Moise, éndob been i témboe begom. <sup>46</sup> Endob amuk tintu gom munur bé kétoro Moise, munur gom so Begén, non sénulatén i fantage bé Begéne. <sup>47</sup> Endob amun énda munur gom bé sénulat Moise, énda so géunur gom dob Begéne.”

## 6

### *Fénwaléy Jesuse médooy klohe amaén*

<sup>1</sup> Tidéw béno, ménifar i Jesuse dob dogote féndawét Galilea taloo no Tiberias. <sup>2</sup> Atin toow fo médooy de étéw ménfuray de non énggito roy de mékégaif galbék rénigo no bé

kéuwa ne bé de déméruun. <sup>3</sup> Atin ménénagé i Jesuse beroy de kuyugén mangéy dob burure atin diyo ro ménsar. <sup>4</sup> Bé béno gai, éndaén mérugay i kékanduli i de Judio féndawét ro “Témara”. <sup>5</sup> Amun iling-iling i Jesuse, énggito noy médoowe étéw démangku dob mangéy dob Beene. Mélaw ménénginsa dob Filipihe mano, “Ayo tome de méléy amaén féama bé de étéw ni?” <sup>6</sup> (I funa Jesuse ménénginsa, téngkadé no saén i Filipihe. Endob gétiga Jesuse nén i rigoné nuwe.)

<sup>7</sup> Atin séménubul i Filipihe mano, “Fiyon fo ké wén i labi séngibu flak tom, kulang na fégébéléy amaéy médoowe ni étéw, fuyon fo ké sékéloh-kélohén dob séngae ségétéw.”

<sup>8</sup> Endob ménbéréh i ségiyowe kuyugén féndawét Andres (sani dumo Simon Pedrowe sétiman idéng) mano, <sup>9</sup> “Wén i ségétéw kénogo lagéy dob ni, wén i nuwitén limo timan mélému fan brab ruwo timan sédo. Endob toow fo kulang i ni féama bé médoowe ni étéw.”

<sup>10</sup> Tidéw béno, ménbéréh i Jesuse dob de kuyugén mano, “Féésar gom i de étéw.” Mélaw ménsar i de étéw diyo dob bukae gonon wén i do kéroon de. Wén i limo ngibu do lagéy saliyo na bé de libun brab do nga. <sup>11</sup> Atin éndot Jesusey fane brab ménfésalamat dob Tuluse. Tidéw béno, sénaarén dob de médoow étéw ménsar diyo. Loo so bé niy rénigo Jesuse bé de sédo de. Atin téménantu ro mama taman kétaya ro. <sup>12</sup> Amun énggéama ro nén taman ménbésor ro kéluhanan, ménbéréh i Jesuse dob de kuyugén mano, “Timu gom i kéluhanay de sama amaén inok énda mésinggulaén.” <sup>13</sup> Mélaw ténimu roy de sama amaén. Atin ménféno i foloe bra ruwo timan dakél biton bé de sama i de limo timan fan.

<sup>14</sup> Amun énggitoy de étéw i ni mékégaif galbék rénigo Jesuse, ménbéréh ro maro, “Tintu Been i niy toowe sarigoy Tuluse muret bé kébérah ne, sani suguéy Tuluse dob duniyae ni.” <sup>15</sup> Atin gétiga Jesusey fégésé ro féwaléy ro datu ro, mélaw ténagakén bero man brab ménangéy félébu dob de burur.

### *Ménagéw i Jesuse dob rotor i wayége*

<sup>16</sup> Amun témégénén, ménangéy i de kuyugén dob dogote. <sup>17</sup> Atin ménda ro awang mifar bé dogote mangéy Kafernaum, non kélungononén, atin énda séna énggumah i Jesuse dob berowe. <sup>18</sup> Bé béno uras, émbagér i réfuruhe brab dakél i bagéle dob dogote. <sup>19</sup> Amun ménggéfura ro ném gékilomitro tidéw dob dénsaane, énggito roy Jesuse magéw dob rotor i dogote mangéy dob berowe. Mélaw toow ro fo ménggilak. <sup>20</sup> Endob ménbéréh i Jesuse mano, “Begén, kagom mégilak!” <sup>21</sup> Atin ménoror ro brab

féneda ro dob awange, brab sonom béno énggégumah ro dob dénsaane ayo ro.

<sup>22</sup> Amun géfuwénén, i de étéw ménbati séna dob difar i dogote, énggétiga ro sébaan saén i awange diyo béno kélungonon. Atin énggétiga ro énda ménodor i Jesuse bé de kuyugén méda dob awange mifar dob dogote. Brab gétiga ro énda i ségiyo awang diyo. <sup>23</sup> Tidéw béno, énggumah i de awang tidéw dob ingéde Tiberias, déménunggu gédét dob gonoy de étéw ménama fan amun énggilid fénsalamatay Kadnane Jesus. <sup>24</sup> Atin amun gétuway de étéw énda diyo i Jesuse loo soy de kuyugén, ménda ro bé de awang mangéy Kafernaum inok séléde roy Jesuse.

<sup>25</sup> Atin amun énggito roy Jesuse dob difar i dogote, fénénginsaa ro maro, “Maistéro, ménfroyén i kégumah me dini?”

<sup>26</sup> Sémumbulo Jesuse bero mano, “Béréhé ku begom i toowe, békén i kégésobut gome bé de mékégaif galbék rénigo guy funa kome séméléde Begén, éndob non bé de fénama gu begom atin ménbésor gom. <sup>27</sup> Kagom séméléde bé amaéne kay de sur gom saén non waléy waréy i nan amaén. Endob séléde gom bé amaéne kay de fédéw gom funa kom méraru taman sa taman. I Nga i Kéilawane, sani Begéne, iray guy nan amaén non i Abaye Tulus fénggétiga no Been i séménugue Begén.”

<sup>28</sup> Atin ménénginsa ro dob Jesuse maro, “Ati fiyowe rigoné key inok rigoné key i kétayay Tulus?”

<sup>29</sup> Séménumbul i Jesuse mano, “Ay niy kétayay Tulus rigoné kom: Unur gom Begén non Begén i sénugu i Tulus.”

<sup>30</sup> Atin ménénginsa ro maro, “Ati mékégaife galbék féténgtégém begey inok munur gey dob Beeme? <sup>31</sup> I de katufua key bé do géta, ménama ro fan féndawét ‘mana’ dob gonone énda i nohok do témunoh diyo, ménama ro amaén féndawét ‘mana’, gido ménléhu ro so. <sup>50</sup> Endob Begéney amaéne tidéw dob lawayo. Atin i kéluhanay géamae bé ni amaén, énda méléhu ro. <sup>51</sup> Begéney amaéne miray umul ménlus tidéw dob lawayo.”

<sup>32</sup> Séménumbul i Jesuse mano, “Béréhé ku begom i toowe, békén Moises i ménféamae bero fan tidéw dob lawayo, éndob i ménféama bero been i Abay guwe Tulus. Atin i Abay guwe, irayén so begom i tintuwe amaén tidéw dob lawayo kay de fédéw gom. <sup>33</sup> Non i amaéne iray i Tulus, been i énggégumahe tidéw dob lawayo inok miray umul dob de kéilawan.”

<sup>34</sup> Ménbéréh ro dob Jesuse maro, “Maistéro, irayan gey démoyun bé nan amaén.”

<sup>35</sup> Séménumbul i Jesuse mano, “Begéney amaéne miray umul. I kéluhanay étéwe mangéy dob Begéne éndaén mélayaf ro, brab i kéluhanay munure Begén éndaén térumén ro. <sup>36</sup> Endob fiyon fo ké énggito gomén Begén, éndob énda séna munur gom Begén.

Bénréh gun i nan dob begome bé géta. <sup>37</sup> Mangéy dob Begéney kéluhanay de étéw niray i Abaye Begén. Brab énda dudulé kuy étéwe mangéy dob Begéne. <sup>38</sup> Non ménlusu tidéw dob lawayo inok rigoné kuy kétayay Tulus séménugu Begén, békén inok rigoné kuy kagéne kétayan. <sup>39</sup> Atin ay niy kétayay Tulus: énda fédayaé ku métadin i de nirayén Begén étéw, fiyon ségétéw. Yamula tébuleé ku bero kéluhanan dob tamfaday gaiwe. <sup>40</sup> Non been i niy kétayay Abay guwe: i kéluhanay gétigane Begén brab munure Begén, gédoté roy umule magufusa. Atin tébuleé ku bero dob tamfaday gaiwe.”

<sup>41</sup> Atin i de Judio amun énggélíngoo roy bénréh Jesuse, mundég-mundég ro non bénréhén bé Beeney amaéne tidéw dob lawayo. <sup>42</sup> Brab ménbéréh ro maro, “Ati Jesuse ni, aw békén ba Beeney nga Josehe saén? Sedek bénréhén ménlus kun tidéw dob lawayo, non gétiga tom i boh ne brab idéng ne?”

<sup>43</sup> Endob bénréh Jesuse mano, “Kagom mundég-mundég. <sup>44</sup> Enda i ségétéw géangéy dob Begéne, saliyyu ké féfégedétéy Abaye séménugu Begén. Atin dob tamfaday gaiwe, tébuleé kuy kéluhanay mangéye dob Begéne. <sup>45</sup> Sénulat i de sénarigoy Tulus muret bé kébéreh ne maro, ‘I de kéilawan toroéy Tulus moso.’ Mélaw i séngae mégélíngoo bé Abaye brab modor bé kétoro ne, mangéy dob Begéne. <sup>46</sup> Endob énda i ségétéw énggégito bé Abaye, saliyyu bé Begéne non tidéwu dob Tulus. Mélaw Begéne say énggégítowe bé Abaye Tulus. <sup>47</sup> Béréhé ku begom i toowe, i de méginugut dob Begéne méuyag ro taman sa taman. <sup>48</sup> Begéney maake amaén miray umul. <sup>49</sup> I de katufua kom amun diyo ro dob gonone énda i nohok do témunoh diyo, ménama ro amaén féndawét ‘mana’, gido ménléhu ro so. <sup>50</sup> Endob Begéney amaéne tidéw dob lawayo. Atin i kéluhanay géamae bé ni amaén, énda méléhu ro. <sup>51</sup> Begéney amaéne miray umul ménlus tidéw dob lawayo. Atin amuk i ségétéwe géama de, méuyag taman sa taman. I amaéne iray gu funay de kéilawan méuyag, sani lowoh guwe.”

<sup>52</sup> Atin amun énggélíngoo de Judioy ni bénréh Jesuse, ménséédél ro maro, “Ati kéfíngé-fíngé i kéiray i ni étéw bé lowoh ne inok amaé tom?”

<sup>53</sup> Mélaw ménbéréh i Jesuse mano, “Béréhé ku begom i toowe, amuk énda amaé kom i lowoh i Nga i Kéilawane sani lowoh guwe, brab énda inémé kom i dara guwe, énda gédoté kom i umule magufusa. <sup>54</sup> Endob i de mama bé lowoh guwe brab miném bé dara guwe, wén i umul ro magufusa, atin tébuleé ku bero dob tamfaday de gai. <sup>55</sup> Non i lowoh guwe been i nan i tintuwe amaén, atin i dara guwe been i nan i tintuwe

inémén. <sup>56</sup> I kéluhanay mamae bé lowoh guwe brab minéme bé dara guwe diyoy bati dob berowe atin dini ro bati dob Begéne. <sup>57</sup> Méuyag i Abaye séménugu Begén, atin i Begéne méuyagu sabaf bé Beene. Mélaw i kéluhanay mamae Begén méuyag so sabaf bé Begéne. <sup>58</sup> Begéney amaéne tidéw dob lawayo. I de katufua kom ménama ro amaén féndawét 'mana', gido ménléhu ro so. Endob i de mama bé ni amaén sani lowoh guwe méuyag ro taman sa taman."

<sup>59</sup> Bénrêh Jesusey ni bé kétoro ne dob lawie féngadafay de Judio dob ingéde Kafernaum. <sup>60</sup> Amun énggélngoooy de kuyugén i ni kétoro, ménbéréh i de kédoono ro maro, "Toow fo ménalém i ni kétoro, ati mélaw i gégéngélingoe de?"

<sup>61</sup> Endob énggétiga Jesuse dob fédéw ney funay de kuyugén mundég-mundég. Mélaw bénrêhén bero mano, "Aw toow fo mika gom bé bénrêh guwe?" <sup>62</sup> Ati béréhé kome ké gito gom Begén, sani Nga i Kéilawane, démiyat mule dob gonone tidéwo ku? <sup>63</sup> I miraye bé umule been i Rémogor i Tuluse. Endob i kéilawane, énda i barakatén miray umul. I nuret guwe begom tidéw dob Rémogor i Tuluse brab miray bé umule magufusa. <sup>64</sup> Endob gétiga kuy wén i de dumo begom énda munur ro Begén." (Bénrêh Jesusey nan non gétiga non i de énda de munur tidéw féganay brab i étéwe émfékéfo de.) <sup>65</sup> Atin sénumfata nuy kébéréh ne mano, "Been i nan i funa kuy ménbéréh bé énda i géangéy dob Begéne saliyyu ké féféngédétéy Abaye."

<sup>66</sup> Tidéw béno, médooy bé de kuyugén i téménagake de brab éndaén ménodor ro de. <sup>67</sup> Mélaw féngénginsaa Jesusey de folo bra ruwo gétéw kuyugén mano, "Aw méuyot gom so témagak Begén?"

<sup>68</sup> Séménumbul i Simon Pedrowe mano, "Kadnan ati nay odoro keye? I de kaam saén kébéréh i géiraye bé umule magufusa. <sup>69</sup> Munur gey brab gétiga key Beemey Mékétéfuwe Etéw tidéw dob Tuluse."

<sup>70</sup> Atin ménbéréh i Jesuse mano, "Aw békén ba begom i foloe bra ruwo gétéw fénémili gu? Endob saitan i ségétéwe begom!" <sup>71</sup> I ténéndu i de kébéréh Jesus, been i Judase nga Simon Iskariot. Been i émfékéfoe de fiyon fo ké been i ségétéwe bé de folo bra ruwo gétéw kuyugén.

## 7

<sup>1</sup> Tidéw béno, i Jesuse diyoy ménsugud-sugud dob Galilea. Ménika mangéy sugud-sugud dob Judea non méuyot i de odoroy de Judio de méméléhu. <sup>2</sup> Bé béno, gédétén i kékanduli i de Judio féndawét ro "Dung-dung." <sup>3</sup> Mélaw ménbéréh i de tuwaréy Jesus do lagéy dob Beene maro, "Ay go Judea inok gitoy de kuyugén i de mékégaif galbékém. <sup>4</sup> Amuk i étéwe méuyot mébangtug, énda bunéyé noy de

rigoné no. Amuk gérigono moy de mékégaif, rigoné mo dob adafay médoowe étéw." <sup>5</sup> (Loo bé niy kébéréh i de tuwaréyén non fiyon foy berowe énda séna munur ro dob Beene.)

<sup>6</sup> Séménumbul i Jesuse mano, "Énda séna gumah i fatute gai rigoné kuy galbék guwe. Endob i begome fakay rigoné kom i kagome galbék bé de udenén gai. <sup>7</sup> I de tete étéw énda mérarék ro begom, éndob mérarék ro Begén non dowoyé kuy kéluhanay tete rigoné ro. <sup>8</sup> Ay gom dob kandulie, éndob i Begéne énda séna mangéyu diyoy non békén sénay niy gaiwe fatut mangéyu diyoy." <sup>9</sup> Amun énggilid bénrêhén i ni, ménbati saén dob Galilea.

<sup>10</sup> Endob amun ménagewén i de tuwaréyén mangéy dob kandulie dob Jerusalem, ménfuray soy Jesuse, éndob énda i énggétigan de non ménagéw nékémén saén. <sup>11</sup> Sélédéy de odoroy de Judioy Jesuse dob kandulie atin féngénginsa ro maro, "Hon i gono Jesuse de?"

<sup>12</sup> Atin médooy de étéw ménlimud diyoy séméguraw séuret-uret roy fantage bé Jesuse. Embéréh i de dumo de maro, "Fiyo étéw i Jesuse." Endob bang i de dumo de, "Énda fiyo étéw i Jesuse, fégakara noy de étéw." <sup>13</sup> Endob énda i ségétéw ménfébésang muret fantag bé Jesuse non mégilak ro bé de odoroy de Judio.

<sup>14</sup> Amun gékérara ron bé kékanduli ruwe, ménangéy i Jesuse dob lawi i Tuluse brab téménoro. <sup>15</sup> Ménggaif foy de odoroy de Judio brab ménbéréh ro maro, "Sedek toow fo mon gétigan i ni étéw, énda taén ménrugay i késékuwelah ne?"

<sup>16</sup> Séménumbul i Jesuse mano, "I kagéne kétoro békén tidéw dob Begéne saén, éndob tidéw dob Tuluse séménugu Begén. <sup>17</sup> I de étéw méuyot ro rémigo bé kétayay Tuluse, gétiga ro ké i kagéne kétoro tidéw dob Tuluse taloo no tidéw saén dob Begéne. <sup>18</sup> I étéwe muret saén bé kaane kétoro, méuyot saén mébantug. Endob i étéwe méuyot rémigo bé funay séménugue de émbantug, been i nan i métintuwe étéw brab énda témugién. <sup>19</sup> Békén ba niray Moisesey kitabe? Endob énda i ségétéw begom modor de, non amuk odoro kom, énda damén télamané kom féléhuén Begén."

<sup>20</sup> Séménumbul i de étéw maro, "Sénaitanan go! Ati étéwe méuyot méméléhu Beem?"

<sup>21</sup> Ménbéréh man i Jesuse mano, "Amun rénigo guy sébaane saén mékégaif galbék, ménkéségiyanon gom de non gai kétérén béno. <sup>22</sup> Endob wén i sébaane kitab fantag bé kétulie niray Moisesé bé gétaho. (Endob i toowe, tidéw i ni kitab dob de katufua tom.) No mélawén fiyon fo ké gai kétérén, tulié kom soy de nga gom. <sup>23</sup> Amuk tulié kom i ségétéwe nga lagéy fiyon fo ké gai kétérén inok odoro kom i kitabé tidéw dob Moisesé,

sedek mékérít gom Begén sabaf bé kéféadi-adi guwe bé ségétéwe étéw ké gai kétérén?<sup>24</sup> Kagom kukumén i de énggito gom saén. Yamula fégitung gom fiyo brab kukum gom méntintu.”

<sup>25</sup> Tidéw béno, i de dumo bé de étéw tidéw Jerusalem ménbéréh ro maro, “Aw békén bay niy lagéye sélédéy de odoro tom inok féléhuén?<sup>26</sup> Téngténg gom, ay ni émbéréh dob adafa tome brab énda mon i gébéroho ro sébanil de. I de odoro key, gélo ro ron keey Beeney Kristowe sani ongot-ongoté tome.<sup>27</sup> Endob amuk gégumah kun i Kristowe, énda i gétigan de ké hon i tidéwo nuwe de. Endob gétiga tom i tidéwoy ni étéw.”

<sup>28</sup> Tidéw béno, amun diyo téménoro dob lawi i Tuluse ménfébénsag i Jesuse émbéréh mano, “Aw tintu gélolo gom ba Begén brab gétiga kom i tidéwo kuwe? Enda ménangéyu dini ké dob kagéne saén aturan. I toowe Tulus i séménugue Begén, éndob énda gélolo gom de.<sup>29</sup> Endob gélolo guy Beene, non tidéwu dob Beene brab Beeney séménugue Begén.”

<sup>30</sup> Tidéw béno, ténlama ro kénéfo i Jesuse éndob énda i ségétew énggékéfo de non énda séna énggumah i gaiwe fénéмили Tuluse.<sup>31</sup> Endob médooy de étéw dob de ménlimud ménunur de, brab ménbéréh ro maro, “Beeney Kristowe, sani fénéмили i Tuluse méguléw, non énda i ségétéw gérido bé de mékégaif galbék rénigo no ké békén i Kristowe.”

<sup>32</sup> Énggélíngooy de Fariseoy ni késébéréh-béréh i de étéw séguraw fantag bé Jesuse. Mélaw i berowe brab de odoroy de fadi, séménugu ro do mantay bé lawi i Tuluse inok kémfo bé Jesuse.<sup>33</sup> Atin ménbéréh i Jesuse dob de étéw mano, “Endaén mérugay i kébati guwe dob begome non séfulew mangéy dob Tuluse séménugu Begén.<sup>34</sup> Sélédé kom Begén éndob éndaén gito gom Begén, non énda géangéy gom dob batío kuwe.”

<sup>35</sup> Ménsébéréh-béréh i de Judio maro, “Hon keey i ayo nuwe de, ké énda gito tom de? Aw mangéy keey dob mérayue ingéd i de Griego batío de Judio so, atin toroé noy de Griego?<sup>36</sup> Ati keey i atag i béréh ne mano, ‘Sélédé kom Begén, éndob énda gito gom Begén, brab énda géangéy gom dob batío kuwe?’ ”

<sup>37</sup> Amun dob tamfaday gaiwe bé kékanduli ruwe sani toowe na fo balilaga gai, téménindég i Jesuse brab ménbéréh métanug mano, “Do étéw térumén, ay gom dob Begéne, brab miném.<sup>38</sup> Non wén i Ménsulate Kébéréh i Tuluse mano, ‘I téwé munur dob Begéne, tidéw dob fédéw ne rémégés i wayége miray bé umule magufusa.’ ”<sup>39</sup> I atag i béréh Jesuse, ay ni: i Rémogor i Tuluse mangéy dob de munur bé Jesuse atin bati dob de fédéw ro. Endob énda séna nirayén i Rémogor

i Tuluse non énda séna ménléhu i Jesuse brab tébule atin mule mangéy dob lawayo.

<sup>40</sup> Médooy de étéw énggégélingo de, ménbéréh ro maro, “Tintu Beeney sarigoy Tuluse muret bé kébérah ne, sani sarigone ongot-ongoté tom.”

<sup>41</sup> Bang i de dumo étéw, “Beeney Kristowe ongot-ongoté tom.”

Endob séménumbul i de dumo de maro, “Ati kéfíngé-fíngé ne ké i Kristowe tidéw Galilea?<sup>42</sup> Non bang i Ménsulate Kébéréh i Tuluse, i Kristowe séfu Dabid. Mélaw fatut i Kristowe mumah dob ingéde Betlehem non i Dabide bati dob Betlehem.”<sup>43</sup> Mélaw énda géséfagayun i de antaf fédéw ro fantag bé Jesuse.<sup>44</sup> Atin ménuyot i de dumo de kémfo, éndob énda i ségétéw réménigo de.

<sup>45</sup> Tidéw béno, i de guwardiya ménséfule ro mangéy dob de odoroy de fadi brab do Fariseo. Atin fénénginsaa roy de guwardiya maro, “Sedek énda kénéfo gom i Jesuse inok géuwito kom mangéy dini?”

<sup>46</sup> Séménumbul ro maro, “Enda kénéfo gey de non ménggaif gey bé kétoro ne. Non ségiyo bé kéluhanay kétoroe énggélingoo key.”

<sup>47</sup> Atin ménbéréh i de Fariseo maro, “Aw fiyon i begome, énggéfégakara no begom so?”

<sup>48</sup> Enda sénay ségétéw begey do odoro kom taloo no do Fariseo ménunur de.<sup>49</sup> I de munur dob Beene, beroy de gérifantad étéw saén, sani énda gétiga roy kitab tome. Mélaw kukuméy Tuluse bero.”

<sup>50</sup> Atin diyo soy Nikodemowe sani ségétéwe so Fariseo. Been i ménangéye dob Jesuse bé gétahe de. Brab ménbéréh mano,<sup>51</sup> “Enda fakay dob kitab tomye kémukume ké énda séna énggésusinon i rénigo nuwe, brab énggélíngoon i kébérah ne.”

<sup>52</sup> Séménumbul ro maro, “Aw tidéw go so Galilea? Basa moy Ménsulate Kébéréh i Tuluse, inok gétiga mo énda i sarigoy Tuluse tidéw Galilea.”

## 8

### *I libune ménsala*

<sup>1</sup> Tidéw béno, i kéluhana ruwe ménule. Endob i Jesuse ménangéy dob tuduke féndawét Olibo.<sup>2</sup> Dob gétunduge de fuweh, amun toow géfuwén, ménangéy man i Jesuse dob lawi i Tuluse. Amun ménangéy i kéluhanay de étéw dob Beene, ménsar i Jesuse brab ténoroeén bero.<sup>3</sup> Bé no gai, i de Fariseo brab do témoroé kitab, nuwit roy libune énggétékasan ménbuwah. Atin féntindég ro dob adafa Jesuse brab de médoon ni étéw.<sup>4</sup> Atin béréh ro dob Jesuse maro, “Maistéro, énggétékasan i ni libun ménbuwah.<sup>5</sup> Dob kitab tome niray Moisesé, fatut ibéron batéw taman méléhu i étéwe ménsala loo bé ni. Ati kébérah me fantag bé ni?”<sup>6</sup> Fénénginsa ro dob Jesusey ni inok tukawa ro saén i

Beene inok amuk békén damén katabuwan i késumbul ne, wén i funa ro témbó de.

Endob ménkudung-kudung i Jesuse brab séménulat dob fantade bé tuko ténoro ne. <sup>7</sup> Amun énda fo témérén ro ménginsa, téménindég i Jesuse brab béréhén bero mano, “Ati éndae salaén begom, been i sunguwe de mibéron batéw.” <sup>8</sup> Tidéw béno, ménkudung-kudung man i Jesuse brab féntausén i késulat ne dob fantade. <sup>9</sup> Tidéw béno, amun énggélíngoo roy béréhén Jesuse, ménule ro séségétéw-gétéw, i sunguwe ménule do lukés. Atin énda i ségétéw ménféled ké békén i Jesuse saén brab ni libun. <sup>10</sup> Atin téménindég i Jesuse brab ménénginsa mano, “Di, nayo ruwe de? Aw énda i ségétéw témbó beem?”

<sup>11</sup> Séménumbul i ni libun mano, “Enda, Maistéro.”

Atin béréhén Jesuse mano, “Enda so téboé ku beem. Ule go brab kagonén mésala féruman.”

<sup>12</sup> Atin téménoroén man i Jesuse dob de étéw mano, “Begéney maake solo réméndaw dob kéilawane. I furaye Begén éndaén magéwén dob délénone, yamula magéw dob géfékayae brab gédoté noy umule magufusa.”

<sup>13</sup> Ménbéréhén i de Fariseo maro, “Beeme soy murete fantag bé lowoh me, mélaw énda i lantékén.”

<sup>14</sup> Séménumbul i Jesuse mano, “Fiyon fo ké Begén i murete fantag bé Begéne, toow i béréhé kuwe non gétiga kuy tidéwo kuwe brab ayo kuwe. Endob i begome, énda gétiga kom i tidéwo kuwe taloo no ayo kuwe. <sup>15</sup> Kukumé kom i énggito gome saén non do kéilawan gom saén. Endob i Begéne, énda kémukumu. <sup>16</sup> Endob amuk kémukumu, métintuy kagéne kékukum non békén saén Begén i kémukume, éndob Begey i Abaye Tulus séménugu Begén. <sup>17</sup> Ménsulat dob kitab gome, amuk ségiléw i uret i ruwowe gétéw, giton toow i urete. <sup>18</sup> Ruwo gey gétéw muret fantag bé Begéne. Begén brab Abaye séménugu Begén.”

<sup>19</sup> Tidéw béno, fénénginsaa roy Jesuse maro, “Hon i gonoy Abay me de?”

Séménumbul i Jesuse mano, “Enda gétiga kom Begén taloo no Abay guwe. Amuk gétiga kom Begén, gétiga kom soy Abay guwe.” <sup>20</sup> Béréhén Jesusey ni bé kétoro ne dob lawi i Tuluse gédetéw dob fégono ruwe limus. Endob énda i ségétéw kéménéfo de non énda séna gumah i gaiwe fénémili i Tuluse.

<sup>21</sup> Ménbéréhén man i Jesuse dob berowe mano, “Tagaké kun begom, atin séléde kom Begén. Endob méléhu gom énda émfésagad i de sala gom, brab énda géangéy gom dob ayo kuwe.”

<sup>22</sup> Been i niy funay de odoroy de Judio ménséfénginsa maro, “Aw fétoyo moso? Aw been i nan i funa nuwe ménbéréhén mano, ‘Enda géangéy gom dob ayo kuwe?’ ”

<sup>23</sup> Atin ménbéréhén man i Jesuse mano, “I begome, tidéw gom fantad, éndob i Begéne tidéwu rotor. I begome, tidéw gom dob duniyae, éndob i Begéne tidéwu dob lawayo. <sup>24</sup> Komon béréhén gu begom buluk méléhu gom moso, énda émfésagadan i de sala gom. Toow, amuk énda munur gom de ké Begéney Beene béréhén gu, énda émfésagadan i de sala gom.”

<sup>25</sup> Atin ménénginsa ro maro, “Ati mélaw i Beeme ni?”

Séménumbul i Jesuse mano, “Tidéw bé féganaye de séna bé kétoro guwe, nuret gun begom ké ati Begéne. <sup>26</sup> Atin médooy sénay de béréhé ku fantag bé de rénigo gom do tete funa kom mékukum. Toow i béréhén i séménugue Begén, komon ureté ku dob de étéw i énggélíngoo kuwe saén tidéw dob Beene.”

<sup>27</sup> Endob i de étéw diyó, énda énggésobuto ro de ké ureté noy fantage bé Abaye Tulus. <sup>28</sup> Mélaw ménbéréhén i Jesuse mano, “Buluk tunggulé komén Begén, sani Nga i Kéilawane, béno na gétiga kom Begéney Beene béréhén gu. Atin gétiga kom so bé énda i rigoné ku ké tidéw saén dob Begéne, éndob béréhé ku saén i ténoro i Abaye Begén. <sup>29</sup> Brab dumo gey séménugue Begén. Enda ténagakén Begén non démooyon rigoné kuy késuwata nuwe.”

<sup>30</sup> Atin médooy de étéw énggégélingo bé de ni, ménunur ro dob Beene. <sup>31</sup> Mélaw béréhén Jesuse dob de Judio ménunur de mano, “Amuk modor gom bé ténoro guwe, begom i de tintu kuyug gu, <sup>32</sup> atin gétiga kom i toowe kétoro, atin i toowe kétoro i témgéyegé begom.”

<sup>33</sup> Séménumbulo ro maro, “I begeye ni do séfu Abraham gey brab énda ménrifén gey, atin sede mélaw ké béréhé mo fétangéy gey?”

<sup>34</sup> Séménumbul i Jesuse mano, “Béréhé ku begom i toowe, i kéluhanay étéwe rémigo tete maak riféy salae. <sup>35</sup> I riféne, fakay dédelén tidéw dob lawie. Endob i nga i gefee lawi, gébati dob nan lawi taman sa taman. <sup>36</sup> Mélaw amuk Nga i Tulusey témgéyegé begom, tintu gom békénén rifén. <sup>37</sup> Gétiga ku do onok Abraham gom. Endob méuyot gom méméléhu Begén, non énda tayakufé kom i kétoro guwe. <sup>38</sup> Béréhé kuy ati fénggitoy Abay guwe Begén, éndob rigoné kom mon i énggélíngoo kome dob kagome abay.”

<sup>39</sup> Séménumbul ro maro, “Abraham i kageye katufuan.”

Atin béréhén Jesuse bero mano, “Amuk do tintu onok Abraham gom damén, rigoné kom soy loo bé rénigo Abrahame. <sup>40</sup> Béréhén gu begom i toowe énggélíngoo ku tidéw dob Tuluse, éndob méuyot gom Begén méméléhu.

Endob békén loo bé nan i rénigo Abrahame.  
<sup>41</sup> Rigoné kom i ségiléwe bé rénigoy abay gome.”

Endob ménkérit i de Judio maro, “Békén gey nga dob liyuwe, Tulus saén i Abay geye.”

<sup>42</sup> Atin béréh Jesuse bero mano, “Amuk toow fo Abay gom i Tuluse, méimu gom damén Begén, non tidéwu dob Tuluse. Enda ménangéyu dini dob kagéne aturan, éndob Tulusey séménugue Begén. <sup>43</sup> Sedek énda gésobuto kom i béréhé kuwe ni? Non mika gom keeyén munur bé toroé kuwe. <sup>44</sup> Satanas i abay gome atin rigoné kom i kétayay Satanase. Méméléhu étéw tidéw féganay brab tugién non énda i toow dob beene. Atin amuk témugi, rigoné no say adat ne non beeney bebe i kéluhanay tugiéne. <sup>45</sup> Endob toow i kagéne kébéréh, mélaw énda unuro kom Begén. <sup>46</sup> Ati géféténgténge de begom ké wén i sala gu? Enda. Atin amuk toow i béréhé kuwe, sedek énda munur gom Begén? <sup>47</sup> I tidéwe dob Tuluse fégingoé noy kébéréh i Tuluse. Endob békén gom tidéw dob Tuluse, mélaw énda fégingoé kom i kébéréh i Tuluse.”

<sup>48</sup> Tidéw béno, fénénginsaay de Judio maro, “Aw békén ba toow i béréh geye ségétéw go tidéw Samaria brab sénaitanan go?”

<sup>49</sup> Séménumbul i Jesuse mano, “Békénu sénaitanan. I toowe, basana kuy Abay guwe éndob énda basana kom Begén. <sup>50</sup> Enda fébantug-bantugu, éndob i Tuluse kétaya no ké basananu, atin Been i gétigane bé ati fatute. <sup>51</sup> Béréhé ku begom i toowe, i de modor bé kétoro guwe, énda méléhu ro.”

<sup>52</sup> Atin ménbéréh i de Judio maro, “Béleewe ni gétiga keyén sénaitanan go. I Abrahame ménléhu, brab do sénarigoy Tuluse muret bé kébéréh ne, ménléhu ro so. Endob béréhém i modore bé kétoro me énda méléhuén. <sup>53</sup> Aw toow go na fo gérotor bé Abrahame katufua key? Ménléhu i Abrahame brab de sénarigoy Tuluse so. Ati káfégitung me bé Beeme?”

<sup>54</sup> Séménumbul i Jesuse mano, “Amuk bantugé kuy lowoh guwe so, énda i lanték i bantuga kuwe. Endob i Abay guwe Tulus, Been i mirayane Begén bantugan. Béréhé kom féngadafé kom i Tuluse. <sup>55</sup> Endob énda gélolo gom de. Endob i Begéne, gélolo gu. Amuk béréhé ku énda gélolo gu de, waléyu témugi ségiléw bé begome. Endob i toowe, gélolo guy Beene, brab modoru bé kébéréh ne. <sup>56</sup> I katufua kome Abraham moror de bé kégitu nuwe bé kégumah guwe. Enggito no, komon moror béni.”

<sup>57</sup> Sabaf bé ni, ménbéréh i de Judio maro, “Enda séna ménlimo go folo gébélintuwa, éndob béréhém bé énggito mon i Abrahame?”

<sup>58</sup> Séménumbul i Jesuse mano, “Béréhé ku begom i toowe, énda séna ménumah i Abrahame de, i Begéne ménwénén.”

<sup>59</sup> Sonom béno, ménémurut ro batéw inok ibéré ro dob Jesuse damén taman méléhu, éndob ménrékunéy i Jesuse brab méntékédan dob lawi i Tuluse.

## 9

### *Nuwa Jesusey langaféne*

<sup>1</sup> Atin amun ménagéw i Jesuse, énggito noy ségétéwe lagéy langafén tidéw fanay kéumahén. <sup>2</sup> Atin i de kuyog Jesuse ménénginsa ro maro, “Maistéro, ati funa nuwe ménumah langafén? Non bé sala ne loo ké sala i de lukésén?”

<sup>3</sup> Atin séménumbul i Jesuse mano, “Békén sabaf bé sala ne taloo no sala i de lukésén. Endob i funa nuwe langafén inok giton i barakat i Tuluse mérigo dob beene. <sup>4</sup> Fatut rigoné tom i fégalbék i Tuluse séménugu Begén, lokut fuweh séna. Gégumah i kélungonone, bé béno éndaén i ségétéw fégalbék. <sup>5</sup> Amun diniwu dob duniyae, maak géfékaya non Begén i Soloe réméndaw dob kéilawane.”

<sup>6</sup> Amun énggilid i Jesuse émbéréh, déménura dob fantade brab fénlémbuwékén i sébuwane bé dura ne. Tidéw béno, dénuletén dob de motoy ni lagéy langafén. <sup>7</sup> Atin ménbéréh i Jesuse mano, “Ay go dob kérigéwe féndawét Siloam, brab furauf go diyo.” (I atag i Siloame “sénugu.”) Mélaw ménagéw i langaféne ni brab rénigo noy férigowe de. Atin amun ménséfule, énggégitonén.

<sup>8</sup> Tidéw béno, i de dumo ro ségédét lawi brab de étéw énggégito de mongot limus, ménséfénginsa ro maro, “Aw békén ba beeney étéwe démenoyun mésar mongot limus?”

<sup>9</sup> Atin séménumbul i de dumo de maro, “Been bay nan.” Endob bang i de dumo de, “Békén been i nan, ségiléw ro sa keey falas.” Tidéw béno, i ni lagéy ménbéréh mano, “Begén bay no étéw langafén bé gétaho.”

<sup>10</sup> Atin ménénginsa ro maro, “Sedek énggégito gon béleewe?”

<sup>11</sup> Atin séménumbul i ni lagéy mano, “I lagéye féndawét Jesus, fénlémbuwékén i sébuwane atin dénuletén dob de moto gu. Atin sénugidén begén mangéy mérauf dob Siloam. Tidéw béno, ménagéwu brab ménuraufu, atin sonom béno énggégitowun.”

<sup>12</sup> Atin ménénginsa ro maro, “Hon i gonoy nan de lagéy béleewe ni?”

Endob séménumbul mano, “Enda gétiga ku de.”

<sup>13</sup> Tidéw béno, nuwit roy ni lagéy éndaén langaféno mangéy dob de Fariseo.

<sup>14</sup> Gai kétérén i kéfélémbuwékén Jesuse bé sébuwane brab kéuwa ne bé motoy ni lagéy. <sup>15</sup> Fénénginsaay de Fariseo ké ati kéfingé-fingé i kégégito nuwe. Atin séménumbul i ni lagéy mano, “I Jesuse, fénlémbuwékén i sébuwane

brab dénuletén dob de moto gu. Tidéw béno ménuarau, atin sonom béno énggégitowu.”

<sup>16</sup> Tidéw béno, i de dumo do Fariseo ménbéréh ro maro, “I Jesuse békén tidéw dob Tuluse non énda modorén bé ménbéréhe dob kitabé bé énda fakay i gémalbéke ké gai kétéréh.” Endob i de dumo de ménbéréh ro maro, “Amuk i Jesuse ségétéw ménsala, énda fo gérgo no bé mékégaifé.” Mélaw énda géséodor i de antaf fédéw ro.

<sup>17</sup> Mélaw ménénginsa man i de Fariseo dob lagéye ni maro, “Ati karang me bé Jesuse ni étéw, non énggégéadi-adino no kun i de moto mo?”

Atin séménumbul i ni lagéy mano, “Beeney sarigoy Tuluse muret bé kébéreh ne.”

<sup>18</sup> Endob i de odoroy de Judio énda fo munur ro de ké langafén i ni lagéy tidéw bé do géta, mélaw féntawag roy de lukésén.

<sup>19</sup> Atin fénénginsa ro bero maro, “Aw nga gom i ni? Aw langafén ba tidéw fanay kéumahén? Sedek énggégitonén béleewe ni?”

<sup>20</sup> Séménumbul i de lukésén maro, “Gétiga key beeney nga geye brab langafén tidéw fanay kéumahén.” <sup>21</sup> Endob énda énggégétiga key de ké ati kéfingé-fingé i kégégito nuwe béleewe, taloo no ati ménuawe de. Endob fénginsa kom i beene, non métuwanén san brab been i sémumbulone begom.”

<sup>22</sup> Ménbéréh i boh ne brab idéng ne loo bé ni non mégilak ro bé de odoroy de Judio. Non sénfagayunoy de odoron éndaén féahurén dob de lawi féngadafan i étéwe ké béréhé noy Jesusey Kristowe tidéw dob Tuluse. <sup>23</sup> Been i niy funay boh i ni lagéy brab idéng ne séménumbul maro, “Métuwanén i nga geye, been i fénginsa kome.”

<sup>24</sup> Mélaw i de Fariseo féntawag ron man i lagéye ni éndaén langaféno brab ménbéréh ro maro, “Béréhém i toowe dob adafay Tuluse. Gétiga key i Jesuse ni ségétéw ménsala.”

<sup>25</sup> Mélaw séménumbul mano, “Enda gétiga ku de ké i Jesuse wén i salaén loo ké énda. Ni saén i kagéne gétigan, bé gétahe langafénu éndob béleewe énggégitowun.”

<sup>26</sup> Fénénginsa ron man maro, “Ati réngino nuwe dob beeme? Ati kéfingé-fingé i kéféadi-adi nuwe bé de moto mo?”

<sup>27</sup> Séménumbul mano, “Bénreh gun begom, éndob énda fo féngélingoé kom de. Sede méuyot gom de man mégélingo ségule? Aw méuyot gom de ké waléy gom do kuyugén so?”

<sup>28</sup> Tidéw béno, fénéngiras ro, brab béréh ro maro, “Beem say kuyugén. Endob i begeye kuyug Moises gey. <sup>29</sup> Gétiga key ménsébéréh i Tuluse bé Moises bé do géta. Endob i ni étéw, énda gétiga key de ké hon i kétidéw ne de.”

<sup>30</sup> Séménumbul i ni lagéy mano, “Toow fo mékégaif i nan. Enda gétiga kom wayoy tidéwo nuwe de, éndob féni-adi-adi noy de

moto gu. <sup>31</sup> Gétiga tom i Tuluse, énda féngélingoé noy de ménsala. Endob féngélingoé noy de étéw méngintulus, rémigo bé kétaya nuwe. <sup>32</sup> Tidéw fénganay kélimbag bé duniyae ni énda sénay ségétéw géféadi-adi ségétéw langafén tidéw fanay kéumahén inok waléy gégito. <sup>33</sup> Mélaw i Jesuse, amuk békén tidéw dob Tuluse, énda gérgono no de.”

<sup>34</sup> Tidéw béno, ménkérít ro brab séménumbul ro maro, “I beeme féngéngga go toow fo ménsala, sedek beeme nay témoroe begey?” Tidéw béno éndaén, fénratur ro de dob lawie féngadafan.

<sup>35</sup> Amun énggélingoo Jesusey kénrigo ruwe bé ni lagéy, ménangéy dob beene. Amun énggito no, ménsébéréh i Jesuse de mano, “Aw munur go bé Nga i Kéilawane?”

<sup>36</sup> Séménumbul i ni lagéy mano, “Maistéro, béréhém begén ké ati no étéw inok géunuru de.”

<sup>37</sup> Séménumbul i Jesuse mano, “Enggito mon, non Been i Begéne sébéreh beem.”

<sup>38</sup> Tidéw béno, ménbéréh i ni lagéy mano, “Kadnan, munuru Beem.” Atin féngadafén i Jesuse.

<sup>39</sup> Atin ménbéréh i Jesuse mano, “Kékukum i funa kuwe ménangéy dob duniyae ni. I Begéne maak solo i de maak langafén inok waléy ro gégito amuk munur ro Begén. Atin i de gégito, sani de gétigan étéw, waléy ro maak langafén amuk énda munur ro Begén.”

<sup>40</sup> Wén i de Fariseo énggégélingo bé kébéreh Jesuse, atin ménénginsa ro maro, “Sede? Aw do langafén gey so?”

<sup>41</sup> Séménumbul i Jesuse mano, “Amuk maak do langafén gom, énda damén i sala gom, éndob béleewe ni makom ké do gégito gomén, non makom ké toow gomén gétigan. Been i nan i funa nuwe i de sala gom énda mékédano.”

## 10

### *Ibinuwayae fantag bé témalimae bé de bili-bili*

<sup>1</sup> I Jesuse, ménuret sébaan binuwaya mano, “Béréhé ku begom i toowe, i étéwe mahur dob rugéy de bili-bili énda mangéyén bé bégawane atin mangéy man bé de ségiyo agéwon, i nan étéw ménakaw brab tulisan.

<sup>2</sup> Endob i étéwe mahur mangéy bé bégaway rugéy de bili-bili, beeney témalimae bé de bili-bili. <sup>3</sup> I mantaye dob fintue unkaé noy bégaway rugéne inok géahur i témalimae bé de bili-bili. Brab i de bili-bili gélolo roy béréh ne. Brab tawagé noy de kaan do bili-bili bé de dawét ro. Tidéw béno, fanangguwit no bero mésut tidéw dob rugéne mangéy dob de fétabtan. <sup>4</sup> Atin amuk mésut ro, méta bero brab i de bili-bili furay ro de non gélolo roy béréh ne. <sup>5</sup> Enda furay ro bé ségiyowe étéw, yamula féraréyo ro non énda gélolo roy béréh

ne.” <sup>6</sup> Bénreh Jesuse beroy ni binuwaya éndob énda fo énggésobuto ro de.

<sup>7</sup> Mélaw i Jesuse ménbéréh man mano, “Béréhé ku begom i toowe, Begéney maake béngawan ahuroy de bili-bili. <sup>8</sup> I de énggétéh Begén do tugién témoro, beroy maake do ménakaw brab do tulisan. Endob i de kagén do étéw, beroy maake bili-bili, énda fo fénggélíngo ro bero. <sup>9</sup> Begéney béngawane. I kéluhanay mahure dob Begéne, méfukas ro dob de sala ro. Ségiléw ro bé de bili-bili, mahur ro brab mésut ro atin géagéw ro dob fiyowe tabtabén non talimaé ku bero. <sup>10</sup> I tulisane, sani tugiéne témoro mangéy sa dini inok ménakaw brab méméléhu brab méminasa. Endob i funa kuwe ménangéy dini inok iray gu dob de kéilawan i umule énda i kulang de taman sa taman.

<sup>11</sup> “Begéney fiyowe témalima bé de bili-bili, non iray guy férénawa guwe inok méfukas i de kuyug gu. <sup>12</sup> I ségétéwe étéw témalima bé de bili-bili sukayan saén, békén been i gefee de, méraréy ké gégito itu-talun. Tidéw béno, i itu-talune rambaé noy de bili-bili brab béragaré no bero. <sup>13</sup> I ni étéw sukayan saén tagaké noy de bili-bili non békén kaan brab énda fo méimuén bero. <sup>14</sup> Endob Begéney maake fiyo témalima bé de bili-bili. Gélolo guy de kuyug gu, brab i de kuyug gu gélolo ro Begén, <sup>15</sup> ségiléw bé kégélolo guwe bé Abay guwe Tulus brab kégélolo nuwe Begén. Atin i Begéne iray guy férénawa guwe inok méfukas i de kuyug gu dob de sala ro. <sup>16</sup> Wén i de ségiyo do bili-bili gu békén tidéw dob ni rugén. Fatut fanangguwité ku so bero brab féngélingoé roy béréh guwe. Mélaw i de kéluhanay de étéw gu, waléy sébaan i rugé ruwe brab ségétéw i témalimae de.

<sup>17</sup> “I funay Abay guwe méimu Begén, non énda gulaané kuy férénawa guwe. Endob amuk méléhuu, méuyagu man. <sup>18</sup> Atin énda i géafas bé férénawa guwe tidéw dob Begéne, éndob kétaya ku fo iray gu. Wén i kuwagib gu de miray brab wén soy kuwagib gu de médot man ségule. Been i niy sénugu i Abay guwe Begén rignoné ku.”

<sup>19</sup> Amun énggélíngooy de Judio man i kébéréh Jesuse, énda man énggéséodor i de antaf fédéw ro. <sup>20</sup> Médooy de étéw, ménbéréh ro maro, “Bunég i ni étéw brab rénahuko saitan. Kagom féngélingoén de.”

<sup>21</sup> Endob i de dumo de ménbéréh ro maro, “Enda gébéréh loo bé nan i étéwe rénahuko saitan. Atin énda gaganéy ségétéwe sénaitanan i émféadi-adiwe bé de motoy langaféne inok waléy gégito.”

<sup>22</sup> Tidéw béno, énggumah i gaiwe kandulioy de Judioy kéfégtédém ruwe bé kéfélinise bé lawi i Tuluse. Bé béno, gai mélégénéy. <sup>23</sup> Atin i Jesuse diyo dob lawi i Tuluse séagéw-agéw dob agéwone wén i atéfén, féndawét bé dawét

i méntélatae datu Solomon. <sup>24</sup> Atin i de Judio ménsélimud ro dob Jesuse brab ménénginsa ro maro, “Taman kédiron nay kéféongot-ongot me begey? Amuk Beemey Kristowe, san i fénéмили i Tuluse méguléw, béréhé m begey i mékértaye.”

<sup>25</sup> Séménumbul i Jesuse mano, “Bénreh gun begom éndob énda munur gom de. I de mékégaif galbék fénrigoy Abay guwe Tulus Begén, been i da nan i émfégtigane begom fantag bé Begéne. <sup>26</sup> Endob énda munur gom de non békén gom do bili-bili gu. <sup>27</sup> I kagéne do bili-bili féngélingoé roy kébéréh guwe brab gélolo gu bero, atin furay ro Begén. <sup>28</sup> Iraya ku bero umul magufusa, brab énda méléhu ro. Atin énda i géafas bero tidéw dob Begéne. <sup>29</sup> I Abay guwe Tulus toow na fo gérotor bé kéluhanane. Been i méniraye bero dob Begéne. Atin énda i géafas bé de bili-bili gu tidéw dob Tuluse. <sup>30</sup> I Begéne brab Abay guwe Tulus, sébaan gey saén.”

<sup>31</sup> Tidéw béno, i de Judio ménurut ro batéw man inok ibéro ro batéw i Jesuse féléhué ro damén. <sup>32</sup> Endob ménbéréh i Jesuse mano, “Médoonén i fiyowe galbék fénrigoy Abay guwe Tulus Begén dob téngaanga kome. Ati isuwe bé de ni funa kom Begén méméléhu?”

<sup>33</sup> Séménumbul i de Judio maro, “Békén bé de fiyo galbék i funa keye Beem méméléhu, éndob sabaf mékémurka dob Tulusoy nan béréhé mo. I Beeme ségétéw go saén kéilawan, sedek béréhé mo Tulus go?”

<sup>34</sup> Tidéw béno, séménumbul i Jesuse mano, “Endob wén i Ménsulate Kébéréh i Tuluse dob Kitab gome mano, ‘Do tulus gom.’”

<sup>35</sup> Féntaus Jesusey kébéréh ne mano, “Enggétiga tom, i Ménsulate Kébéréh i Tuluse toow fo toow taman sa taman. Mélaw ténawag i Tuluse do tulus i de katufua tom niraya no bé kébéréh ne. <sup>36</sup> Atin Begéney fénéмили i Abaye brab sénuguén mangéy dini dob duniyae. Mélaw sedek béréhé kom mékémurka i bénreh guwe bé Begéney Nga i Tuluse. <sup>37</sup> Amuk énda rignoné kuy fégalbék i Abay guwe Begén, kagom munur Begén. <sup>38</sup> Endob amuk rignoné ku, fatut unur gom bé de génalbék gu, fiyon fo ké énda munur gom bé kébéréh guwe, inok gétiga kom brab gésobuto kom i Abaye dini dob Begéne, atin i Begéne diyoy dob Abaye.”

<sup>39</sup> Amun énggélíngoo roy ni kébéréh Jesuse, ténulama ro man i kéméfoe de, éndob énggéséliyab brab mésut.

<sup>40</sup> Atin ménséfule i Jesuse mifar dob wayége Jordan dob gono Juane mautis bé gétahe de. Atin diyo ménbati. <sup>41</sup> Atin médooy étéwe ménangéy dob Beene. Atin ménsébéréh-béréh ro maro, “Fiyon fo ké i Juane énda i do rénigo no mékégaif, éndob toow i kéluhanay bénreh ne fantag bé Jesuse ni.” <sup>42</sup> Atin diyo médooy ménunure bé Jesuse.



## 11

*Ténèbule Jesusey Lasarowe*

<sup>1</sup> Wén i ségétéwe lagéy déméruun, i dawét ne Lasaro, diyo bati dob Betania. I Mariahe brab Martahe do tuwaréyén libun bati ro so dob no ingéd. <sup>2</sup> Been i niy Mariahe léménuka bé fégéféamute dob de sékéy i Kadnane Jesus brab kénayasén bé buk ne. Atin i Lasarowe lagéyén déméruun. <sup>3</sup> Mélaw i de libuno ménféuwit ro kébéréh mangéy dob Jesuse maro, “Kadnan, i toowe fo kégedawa mo dumo mo séloyuk, déméruun.”

<sup>4</sup> Amun énggélíngoo Jesusey ni, ménbéréh mano, “Énda méléhu i Lasarowe bé nan déruun. Ménrigoy ni inok médayéw i Tuluse, atin tidéw so dob ni médayéw soy Begéne sani Nga i Tuluse.”

<sup>5</sup> Toow fo méimu i Jesuse bé de ni sétuwaréy ro Martah, Maria, brab Lasaro. <sup>6</sup> Endob fiyon fo ké énggélíngoo Jesuse déméruun i Lasarowe, énda na ménagéwén tidéw dob gono nuwe bati taman énda féntibusén nay ruwowe gétérésangan. <sup>7</sup> Tidéw béno, ménbéréh dob de kuyugén mano, “Séfulé tom mangéy Judea.”

<sup>8</sup> Endob bang i de kuyugén, “Maistéro, békén ba énda séna ménrugay i kétulamay de Judio diyo Beem méméléhu? Mélaw énda fatutén séfulé gon man mangéy diyo.”

<sup>9</sup> Séménumbul i Jesuse mano, “Aw békén ba folo bra ruwo géuras i ségéfuwehe? Atin énda gébangkud i étéwe magéw ké fuweh non gito noy géfékayae dob duniyae. <sup>10</sup> Endob i étéwe magéw ké kélunonon gébangkud non délémon.” <sup>11</sup> Nuret Jesusey binuwayae ni inok fégétiga no bé de kuyugén bé énda gésug-sugén diyo dob Judea non énda séna fénggilidén i galbék ne. Amun énggilid Jesuse bénréh i ni, rénéfaa no mano, “I Lasarowe dumo tom séloyuk, fidong. Mangéyu diyo inok ulégé ku.”

<sup>12</sup> Atin i de kuyugén ménbéréh ro maro, “Amuk fidong, waléy adi-adi.”

<sup>13</sup> Endob i atag i bénréh Jesuse, ménléhu i Lasarowe, éndob énda énggésobutoy de kuyugén de. Marok tintu fidong. <sup>14</sup> Mélaw bénréh Jesuse fénkéntayén dob berowe mano, “Ménléhuén i Lasarowe. <sup>15</sup> Endob sabaf bé begome, mororu non énda diyoy. Non wén i rigoné kuwe funa kom munur Begén. Enggomén, magéw tomén.”

<sup>16</sup> Atin ménbéréh i Tomase (féndawét so “Séfing”) dob de dumo no kuyugén mano, “Modor tom de inok méléhu tom so séréngan bé Jesuse.”

<sup>17</sup> Amun énggégumah ro diyo, énggélíngoo Jesuse bé ménfotén gétérésangan i kélébéng ruwe bé Lasarowe. <sup>18</sup> I ingéde Betania, gédét saén dob Jerusalem, téléw gékilomitroy kérayu ne. <sup>19</sup> Atin médooy de Judio ménangéy

diyo inok féfiyoné roy de fédéw ro Martah brab Maria bé kéléhu i lagéy ruwe.

<sup>20</sup> Amun énggélíngoo Martahe gédét gumah i Jesuse, ménagéw béalakén, éndob i Mariahe ménféled dob lawie. <sup>21</sup> Atin ménbéréh i Martahe dob Jesuse mano, “Kadnan, amuk dini go, énda damén ménléhu i lagéy guwe. <sup>22</sup> Endob gétiga ku fiyon fo ké béleewe ni, iray i Tuluse Beem i ati ongoté muwe de.”

<sup>23</sup> Atin ménbéréh i Jesuse mano, “Tébule i lagéy me.”

<sup>24</sup> Atin bang Martahe, “Gétiga ku tébule moso beroy kéluhanay de étéw dob tamfaday de gai.”

<sup>25</sup> Séménumbul i Jesuse mano, “Begéney témbulee brab miraye umul. I étéwe munur Begén, fiyon fo ké méléhu, méuyag so. <sup>26</sup> Atin i méuyage étéw munur Begén, éndaén ménléhuén. Munur go bé ni?”

<sup>27</sup> Atin séménumbul i Martahe mano, “Hoo Kadnan, munuru Beemey Kristowe, sani nongot-nongot geye Nga i Tuluse ménangéy dob duniyae ni.”

<sup>28</sup> Amun énggilid Martahe bénréh i ni, ménséfulé mangéy dob Mariahe dumo no brab ménséguraw mano, “Enggumah i Maistérowe brab féntawagén beem.” <sup>29</sup> Amun énggélíngoo Mariahey ni, ménagayas témindég brab ménagéw béalakén i Jesuse. <sup>30</sup> (I Jesuse énda séna énggumahén dob ingéde, diyo séna dob gonoy béalaka Martahe de.) <sup>31</sup> Atin i de Judio diyo ro dob lawie émféfiyo bé fédéw Mariahe, amun énggito roy Mariahe ménagayas témindég brab ménagéw, ménfuray ro de. Marok mangéy kémérew dob lébéngé.

<sup>32</sup> Amun énggumah i Mariahe dob gono Jesuse, ménténgkéb dob adafa nuwe brab ménbéréh mano, “Kadnan, amuk dini go, énda damén ménléhu i lagéy guwe.”

<sup>33</sup> Amun énggito Jesusey Mariahe kémérew brab de Judio ménodor de kémérew ro so, ménuray i na Jesuse brab toow fo méntete i fédéw ne. <sup>34</sup> Atin ménénginsa i Jesuse mano, “Hon i gonoy lénébéngé kome de?”

Séménumbul ro maro, “Kadnan, mangéy tom diyo.”

<sup>35</sup> Tidéw béno, kéménrew i Jesuse. <sup>36</sup> Mélaw ménsébéréh-béréh i de étéw maro, “Téngténg gom, toow fo mégédaw i Jesuse bé Lasarowe.”

<sup>37</sup> Endob bang i de dumo de, “Énggéféadi-adino noy de motoy langaféne. Sedek énda énggéféadi-adino noy Lasarowe inok énda damén ménléhuén?”

<sup>38</sup> Atin amun énggégumah i Jesuse dob lébéngé, toow fo méntete i fédéw ne. I ni lébéng takub, atin ténléb roy bégawa nuwe bé dakéle batéw. <sup>39</sup> Tidéw béno, ménbéréh i Jesuse mano, “Kéda kom i batéwa nan.”

Endob i Martahe, libuy ni ménléhu mémbéréh mano, "Endob mahuéni i bangkay ne béleewe ni, non ménfotén gétérésangan i kélébéng de."

<sup>40</sup> Atin mémbéréh man i Jesuse mano, "Bénréh gun dob beeme, amuk munur go, gito moy barakat i Tuluse." <sup>41</sup> Mélaw kéndá roy batéwe dob béngaway lébéng. Atin i Jesuse léménéngag brab mémbéréh mano, "Abay, toow fo fésalamatá dob Beeme non fénggélíngóém Begén. <sup>42</sup> Atin gétiga ku fégélíngóé mo Begén sénga tékélid. Endob dasala kuy ni béleewe non bé de étéw géliwét Begén inok munur ro Beem i séméngue Begén." <sup>43</sup> Amun énggilid bénréhén i ni, mémbéréh toow fo métanug mano, "Lasaro, sut go!" <sup>44</sup> Tidéw béno, méntébulé i Lasarowe brab ménsut. Atin méntébulé i de kémérén brab de sékéyén bé de safut fénggébaus bé lowoh ne, brab méntébulé i rangih ne bé munsalawe. Atin mémbéréh i Jesuse mano, "Kéda kom i de fénggébaus de nan inok éndaén méfukétén."

<sup>45</sup> Médooy de Judio ménangéy témukaw bé ro Mariahe, amun énggito roy rénigo Jesuse, ménunur ro dob Beene. <sup>46</sup> Endob i de dumo bero, ménangéy ro dob de Fariseo brab nuret roy rénigo Jesuse. <sup>47</sup> Mélaw i de odoroy de fadi brab de Fariseo, ménsélimud ro beroy de kéfédéway de Judio. Atin mémbéréh ro maro, "Ati rigoné tome? Non i Jesuse ni rémigo médooy do mékégaif. <sup>48</sup> Amuk fédayaé tom i ni rigoné no, kéluhanay étéwe munur dob Beene. Tidéw béno, waléy datu i de Judio atin mékérit i datu tome tidéw Roma. Tidéw béno, mangéy diniy de sundaloy de Romano inok binasané roy lawi i Tuluse gono tom méngadaf, loo soy ingéd tome."

<sup>49</sup> Endob mémbéréh i Kayafase, sani gérotore fadi bé no bélintuwa mano, "Enda i lanték gom. <sup>50</sup> Aw énda ba gétiga kom de, labi na fiyo ké ségétéw saén i méléhue gémantinon bé kéluhanay Judiowe, inok énda mébinasay ingéd tome?" <sup>51</sup> Bénréhén i ni békén tidéw dob kaane saén kéfégitung. Non beeney toowe gérotore fadi bé no bélintuwa, mélaw sénarigoy Tuluse émbéréh bé i Jesuse méléhu inok méuyag i de étéw Judio. <sup>52</sup> Atin békén say de Judio, non i funa Jesuse méléhu inok i kéluhanay de nga i Tuluse, sani de munur dob Beene, fiyon atiy gonone tidéwo ro, waléy ro sébaan.

<sup>53</sup> Mélaw tidéw bé no gai, i de odoroy de Judio fégitungé roy ati kéféléhu ruwe bé Jesuse. <sup>54</sup> Mélaw éndaén féira-iray Jesuse dob Judea ké magéw. Yamula ménangéy Efraim gédét dob gonone énda i étéw de bati. Atin diyo mémbati beroy de kuyugén.

<sup>55</sup> Amun gédétén i kékanduli i de Judio féndawét "Témara", médooy de étéw tidéw dob de ségiyo-giyo gonon ménangéy Jerusalem. Diyo ro rénigoy adate féndawét

"Félinis" inok géamung ro bé kandulie ni. <sup>56</sup> Atin séléde roy Jesuse non énda énggito ro de diyo. Atin ménséfénginsa ro dob lawi i Tuluse maro, "Ati karang gome de, mangéy keey diniy Jesuse bé ni kékanduli, loo ké énda?" <sup>57</sup> Non i de odoroy de fadi brab de Fariseo, bénréh ro dob de étéw buluk wén i ségétéw gégito bé gono Jesuse, béréhé no dob berowe inok gékéfoo ro.

## 12

<sup>1</sup> Ném séden kélungonon taman bé gaiy kékanduli ruwe féndawét "Témara", i Jesuse ménangéy Betania, sani ingéd Lasarowe, i lagéye ténébuleén. <sup>2</sup> Diyo ténafay roy kandulie fégébase bé Jesuse. Bé no témégén, i lala Martahe démuwot, ménsar i ro Jesuse bero Lasaro. <sup>3</sup> Atin i Mariahe éndotén i dakéle katiya ménféno fégéféamut féndawét nardo, toow fo balilaga, atin lénukaén dob de sékéy Jesus. Tidéw béno, kénayasén bé buk ney de sékéy Jesus. Atin ménlégéb i duwaléy lawie bé téréhung i ni fégéféamut. <sup>4</sup> Endob i ségétéwe bé de kuyugén féndawét Judas Iskariot, sani ménfékéfoe de, mémbéréh mano, <sup>5</sup> "Sedek séninggula saén i nan fégéféamut? Non amuk fénbéléy damén i nan nor, wén i médooy kurta gédotén de brab iray damén dob de méskinan." <sup>6</sup> Endob békén toow i kéuray i na nuwe bé de méskinan. Enggébérého noy no non i beene ségétéw ménakaw. Beeney témimue bé kurta ruwe, brab sénga tékélid médot de.

<sup>7</sup> Endob séménumbul i Jesuse mano, "Kago élinén i Mariahe. Atin fatut itongé noy sama ne inok wén i fégéféamut bé gaiwe kélébéng bé bangkay guwe. <sup>8</sup> I de méskinan bati dob begome sénga tékélid. Endob i Begéne, éndaén mérugayu bati diniy dob begome."

<sup>9</sup> Médooy de étéw énggélíngoo ro diyo i Jesuse dob Betania. Mélaw ménangéy ro diyo. Békén say Jesusey funa ruwe mangéy diyo, non ménangéy ro diyo inok gito ro soy Lasarowe, sani lagéye ténébuleén. <sup>10</sup> Mélaw i de odoroy de fadi bénantak fédéw roy féléhué ro soy Lasarowe. <sup>11</sup> Non Lasarowey funay médooye Judio téménrénanay ro bé kétoro i de odoroy ro atin méngganay ro munur bé Jesuse.

<sup>12</sup> Bé gétunduge de fuweh, médooy de étéw do ménangéy dob Jerusalem inok mamung bé ni kanduli féndawét Témara, énggélíngoo roy Jesuse mangéy Jerusalem. <sup>13</sup> Mélaw méndot ro do dau bongo brab ménsut ro dob ingéde inok balaké roy Jesuse. Mémbéréh ro métanug maro, "Dayéwé tom i Tuluse! Féfiyonéy Tuluse damén i ni gégumah tidéw dob Kadnane! Beeney datu tome do Judi!"

<sup>14</sup> Atin éndot Jesusey natiy kudae brab kénudaa no. Mélaw méntuman i Ménsulate

Kébéréh i Tuluse mano, <sup>15</sup> “I begome do étéw dob Jerusalem, kagom mégilak. Non gégumah i datu gome kémuda dob natiwe.” <sup>16</sup> Enda fo énggésobutoy de kuyug Jesus i de ni bé no gai. Endob amun déménayat i Jesuse, énggétédemo ro brab énggésobuto roy Ménsulate Kébéréh i Tuluse, brab been i niy rénigo ruwe dob Jesuse funan méntuman i Ménsulate Kébéréh i Tuluse.

<sup>17</sup> Bé béni, i de médo do étéw énggégito bé kétawag ne brab kétébule ne bé Lasarowe, nuret ro dob de dumo roy fantage bé rénigo Jesuse. <sup>18</sup> Been i niy funay médoowe étéw ménalak bé Jesuse dob de agéwon non énggélíngoo roy rénigo nuwe ni mékégaif. <sup>19</sup> Mélaw ménsébéréh-béréh i de Fariseo maro, “Endaén i fiyo rígoné tom, énténg gom kéluhanay étéwe modor ro de.”

<sup>20</sup> Atin diyo soy do étéw tidéw dob ingéde Gris. Ménangéy ro so Jerusalem inok géféngadafa ro bé no kékanduli. <sup>21</sup> Ménangéy ro dob Filipihe (sani tidéwe Betsaida, sébaan ingéd dob sakuf i Galileawe), brab ménbéréh ro maro, “Maistéro, méuyot gey géségito bé Jesuse.”

<sup>22</sup> Tidéw béno, béréh Filipihe bé Andrese, brab ruwo ro ménangéy dob Jesuse brab béréh ro dob Beeney kéuyotoy de étéw. <sup>23</sup> Atin ménbéréh i Jesuse mano, “Enggumahén i gaiwe toow fo médayéw i Nga i Kéilawane, sani Begéne. <sup>24</sup> Béréhé ku begom i toowe, amuk i bénee énda mélébéngén dob fantade, énda mégonokén. Endob amuk ménlébéng, mégonok médo. Ségiléw bé Begéne, non amuk méléhuu, médooy gégedote bé mantuwe umul. <sup>25</sup> I aruméne étéw sani toowe fo gémulaan bé férénawa nuwe, méléhu. Endob i étéwe énda gulaané noy férénawa nuwe dob ni duniya, gédoté noy mantuwe umul magufusa. <sup>26</sup> Atiy méuyote gémalbékon Begén fatut modor Begén, inok fiyon fo ké ati ayo kuwe, diyo soy sugu-sugué kuwe. Atin fébantug i Abay guwey étéwe gémalbékon Begén.

<sup>27</sup> “Toow fo tete i fédéw guwe béleewe ni. Ati fatute béréhé ku? Enda mon gébérého ku de ké maku, ‘Abay, kago fédayaén méri go séko dob Begéne.’ Non been i niy funa kuwe ménangéy dini inok géagéwo kuy ni kérésay.” <sup>28</sup> Tidéw béno, déménasal i Jesuse mano, “Abay, fégitoy moy barakat me.”

Tidéw béno, wén i émbéréhe tidéw dob lawayo mano, “Fénggito gun i barakat guwe atin fégitoy gu man ségule.”

<sup>29</sup> Atin amun énggélíngoo de ménsélimud do étéw diyo i ni, i de dumo de marok léte, atin i de dumo de marok télakiy no ménsébéréh bé Jesuse.

<sup>30</sup> Endob béréhé Jesuse mano, “I funay Tuluse ménbéréh békén inok gélingoo ku, yamula inok gélingoo kom so. <sup>31</sup> Béleewe y gaiwe féganayéy Tulusey kékukum ne bé de

tete étéw. Atin féfékédanén i datu i ni duniya, sani Satanase. <sup>32</sup> Atin i Begéne, amuk métunggulu, féfégedété kuy kéluhanay étéwe dob Begéne.” <sup>33</sup> (Béréhé Jesusey ni inok féfégitoy no beroy féféléhu ne, tunggulén dob kruse.)

<sup>34</sup> Atin ménbéréh i de étéw ménlimud maro, “Ménbéréh dob Ménsulate Kébéréh i Tuluse i Kristowe kun méuyag taman sa taman. Mélaw sedek béréhémi Nga i Kéilawane fatut tunggulén? Ati ni Nga Kéilawan?”

<sup>35</sup> Mélaw béréhé Jesuse bero mano, “I Begéne maak solo. Atin éndaén mérugay i kébati guwe dob begome. Féntuntay gom béleewe non diniwu séna inok gétiga kom i fiyowe agéwon. Endob amuk délémone, éndaén gito gom i agéwone. <sup>36</sup> Mélaw amun diniwu séna, unur gom Begén inok waléy gom so do solo miring Begén.”

Amun énggilid i Jesuse ménbéréh, méntékédan brab éndaén méntéfégitoy no bé de étéw. <sup>37</sup> Fiyon fo ké énggito roy de médo rénigo Jesuse do mékégaif, énda so munur ro de. <sup>38</sup> Dob ni méntuman i Ménsulate Kébéréh i Tuluse, sénulat Isaiase sani méntélatea sénarigoy Tuluse muret mano, “Kadnan, énda i munur bé uret geye, atin énda i énggétigan bé fénggitonon muwe bé barakat me.”

<sup>39-40</sup> Atin sénulat Isaiase so mano, “I Tuluse, féwaléyén bero langafén brab féntégasén i de fédéw ro, inok énda gégitoy ro brab inok énda gésobut ro brab énda gésénule ro brab munur dob Tuluse inok tabanga ro bero.” Atin been i funa ruwe énda géunur ro.

<sup>41</sup> Béréhé Isaiasey ni non bé gétahe de énggito noy kébarakata Jesuse brab béréhén i fantage bé Beene.

<sup>42</sup> Fiyon fo ké loo bé ni, médooy de odoroy de Judio ménunur bé Jesuse. Endob énda fényag ro de non mégilak ro bé de Fariseo féfékédané ro dob lawie féngadafan inok éndaén géféngadaf ro diyo. <sup>43</sup> Enda fényag roy kéunur ruwe bé Jesuse non toow na fo méuyot ro bé kédáyéw i kéilawane bé kédáyéw i Tuluse.

<sup>44</sup> Tidéw béno, méntanug i kébéréh Jesuse mano, “I étéwe munur dob Begéne, énda saén munurén dob Begéne, éndob munur so bé Tuluse séménuéy Begén. <sup>45</sup> Atin i étéwe énggégito Begén, énggito no soy séménuéy Begén. <sup>46</sup> Begéney maake solo. Ménangéy dini dob duniya inok réméndawu dob de étéw. Mélaw i de munur dob Begéne, éndaén bati ro dob délémone. <sup>47</sup> Atin i étéwe énggélíngoo bé kétoro guwe éndob énda munurén de, békén Begén i kémukume de, non énda ménangéy dini inok kukumé kuy de kéilawan, yamula fukasé ku bero dob de sala ro. <sup>48</sup> I étéwe mika Begén brab énda munurén bé kagéne kétoro, mékukum dob tamfaday de gai. Atin i kémukume de,

been i kétoro guwe. <sup>49</sup> Non i kagéne kétoro békén tidéw dob Begéne, éndob tidéw dob Abay guwe Tulus séménugu Begén. Been i ménfébérehe Begén. <sup>50</sup> Atin gétiga ku, i sugu ne miray bé umule magufusa. Mélaw béréhé ku begom i sénugu i Abay guwe."

### 13

#### *Nurah Jesusey de sékéy i de kuyugén*

<sup>1</sup> Bé béno, ségékélungonon séden atin kémanduli i de Judio féndawét "Témara". Atin énggétiga Jesuse, gédétén i gaiwe tagaké noy duniyae ni atin séfule mangéy dob Abay ne. Toow fo ménimu bé de kuyugén dob duniyae ni, atin fénténgtégén i kédakél i kégédaw ne bero.

<sup>2</sup> Ménama i Jesuse beroy de kuyugén. Atin i Satanase, bé gétahe de fénémanduo noy Judas Iskariote sani nga Simon Iskariote inok fékéfoén i Jesuse. <sup>3</sup> Atin i Jesuse énggétiga noy Abay ne sénarigén dob Beeney kéluhanane. Atin énggétiga noy Beene tidéw dob Tuluse atin séfule mangéy dob Tuluse. <sup>4</sup> Mélaw amun ménsar ro séna dob sékuloy ahayane, téméndég i Jesuse brab kéndá noy kégal ne brab níkétn i tuwaliyawe dob owok ne. <sup>5</sup> Tidéw béno, rénigono no wayég i félangganahe atin nurahén i de sékéy i de kuyugén, brab ténrafo no bé tuwaliyawe níkétn dob owok ne. <sup>6</sup> Amun féggédét i Jesuse dob Simon Pedrowe, ménbéréh i Pedrowe mano, "Kadnan, aw Beem i murahe bé de sékéy gu?"

<sup>7</sup> Séménumbul i Jesuse mano, "Enda gésobuto kom i atag i ni rignoné ku béleewe ni, éndob gésobuto kom so moso."

<sup>8</sup> "Kago", bang Pedro. "Enda fo méuyotu de ké Beem i murahe bé de sékéy gu."

Endob séménumbul i Jesuse mano, "Amuk énda géuraha ku begom, békén gom do toow kuyug gu."

<sup>9</sup> Mélaw bang Pedrowe, "Kadnan, békén say de sékéy gu, éndob urahém soy de kémér gu brab uléw guwe de so."

<sup>10</sup> Endob ménbéréh i Jesuse mano, "I étéwe énggilidén méndiyoh, kailangan urahé no say de sékéyén, non limfyonén i lowoh ne. Atin limfiyo gomén saliyo bé ségétéwe énda limfiyo no." <sup>11</sup> Bénréh Jesusey ni non gétiga no wén i ségétéwe bero émfékéfo de. Been i niy funa nuwe ménbéréh mano, "Enda kéluhana kom limfiyo."

<sup>12</sup> Atin amun énggilidén nurah Jesusey de sékéy i de kuyugén, kéménégal brab ménsar man dob amaane. Tidéw béno, ménénginsa mano, "Aw énggésobuto kom i rénigo guwe dob begome? <sup>13</sup> Fédawété kom Begén 'Maistéro' brab 'Kadnan', atin toow fo fatut i nan non Begéney Kadnane. <sup>14</sup> Mélaw i Begéne, sani Kadna kome brab Maistéro gom, amun nurah guy de sékéy gom, fatut

gom so séurah sékéy. <sup>15</sup> Ténoro gu begom i fatute adat. Rénigo guy ni inok iringé kom so. <sup>16</sup> Béréhé ku begom i toowe, énda nay rifén ké toow na fo gérotor bé gefee de, brab énda nay sugu-suguén ké toow na fo gérotor bé amu ne. <sup>17</sup> Amuk énggésobuto kom i de ni, toow gom na fo moror ké rignoné kom.

<sup>18</sup> "Enda béréhé kuy ni dob begome kéluhanan, non gétiga kuy de fédéw gom do fénémili gu. Mélaw gétiga ku wén i ségétéw begom émfékéfo Begén. Mérigoy ni inok métuman i Ménsulate Kébéreh i Tuluse mano, 'I étéwe dumo gu mama waléy sébanil Begén.' " <sup>19</sup> Féntaus Jesusey kébéreh ne mano, "Béréhé ku begom béleewe ni, bé énda séna ménrigo no inok amuk gégumah i gaiwe métuman i ni, géunur gom Begéney Kristowe tidéw dob Tuluse. <sup>20</sup> Béréhé ku begom i toowe, i étéwe témayakuf bé sugué kuwe, témayakuf so Begén. Atin i témayakufe Begén, tényakufén soy Tuluse séménugu Begén."

<sup>21</sup> Amun énggilid Jesuse bénréh i ni, toow fo ménlidu i na nuwe atin ménbéréh man mano, "Béréhé ku begom i toowe, wén sékoy ségétéwe begom émfékéfo Begén."

<sup>22</sup> Tidéw béno, i de kuyugén ménggéséténgténg ro, non énda gétiga roy ati isuwe bé berowey bénréh Jesuse. <sup>23</sup> Atin ménsar dob sékulo Jesusey kuyug ne toow fo kégédawa no. <sup>24</sup> Atin kénébit Simon Pedrowey ni kuyug brab ménbéréh mano, "Fénginsaém ké ati isuwe de."

<sup>25</sup> Mélaw ménféggédét i ni kuyug dob Jesuse brab ménénginsa mano, "Kadnan, ati isuwe begey i émfékéfoe Beem?"

<sup>26</sup> Séménumbul i Jesuse mano, "I étéwe iraya ku bé fane néréng gu, been i nan." Tidéw béno, amun énggérémo noy fane, nirayén dob Judase nga Simon Iskariote.

<sup>27</sup> Amun énggédot Judasey fane, ménahur i Satanase dob Beene. Atin ménbéréh i Jesuse mano, "Fagayas gon, rigo mo nén i rignoné muwe." <sup>28</sup> Endob énda i ségétéw bé de kuyugén ménsar dob amaane, énggésobut bé funa Jesuse ménbéréh bé nan. <sup>29</sup> Non i Judase beeney témimue bé de kurta ro, brab marok sénugu Jesuse mangéy méléy bé de kailanga ro bé no kékanduli. Atin i de dumo bero marok sénuguén mangéy miray kurta dob de méskinan.

<sup>30</sup> Amun énggédot Judasey fane ni, ménsut atin ménagéw. Bé béno, kélungonon.

#### *I mantuwe sugu*

<sup>31</sup> Amun ménagéw i Judase, ménbéréh i Jesuse mano, "Béleewe gitonén i barakat guwe sani Nga i Kéilawane. Atin bé Begéne, giton soy barakat i Tuluse. <sup>32</sup> Brab amuk bé Begéne, énggitonén i barakat i Tuluse, tidéw béno fégitoy Tulusey barakat guwe. Atin rignoné noy ni magad. <sup>33</sup> Do nga gu,

éndaén mérugay i kébati guwe dob begome, brab séléde kom séko Begén. Endob béréhé ku begom béleewe niy béréh guwe dob de odoroy de Judio, 'Énda géodor gom mangéy dob ayo kuwe.'<sup>34</sup> Atin ay niy mantuwe sugu iray gu begom: Ségédaw gom. Ségiléw bé kégédaw guwe begom, ségédaw gom.<sup>35</sup> Amuk ségédaw gom, gétigay kéluhanay de étéw mélaw begom i de kuyug gu."

<sup>36</sup> Tidéw béno, ménénginsa i Simon Pedrowe mano, "Kadnan, ayo muwe de?"

Séménumbul i Jesuse mano, "Béleewe ni, énda géodor gom Begén mangéy dob ayo kuwe. Endob gétundug gom so moso may diyo."

<sup>37</sup> Atin bang Pedrowe, "Kadnan, sedek énda géodoru Beem béleewe ni? Ulan den ké méléhuu sabaf bé Beeme."

<sup>38</sup> Endob ménbéréh man i Jesuse mano, "Aw toow ulan den ké méléhu go sabaf bé Begéne? Béréhé ku beem i toowe, énda séna ukoro i férufete, dirungé mo Begén téléw gule bé énda gélolo mo Begén."

## 14

### *Jesusey agéwone mangéy dob lawayo*

<sup>1</sup> Bang Jesuse, "Kagom émbuku taloo no tete i de fédéw gom. Unur gom bé Tuluse, brab unur gom so Begén. <sup>2</sup> Wén i médo do gonon dob lawi i Abay guwe. Atin magéwu angéy ku tafayén i de gono kom. Énda béréhé ku begom i ni amuk békén toow. <sup>3</sup> Tidéw béno, amuk énggilidén méntafay i de gono kom, séfuleu mangéy dini brab uwité ku begom mangéy dob batio kuwe inok sétifon tom. <sup>4</sup> Atin gétiga kom i agéwone mangéy dob ayo kuwe."

<sup>5</sup> Endob ménbéréh i Tomase mano, "Kadnan, énda gétiga key i ayo muwe de. Ati mélaw i kégétiga keye bé agéwone mangéy diyo?"

<sup>6</sup> Séménumbul i Jesuse mano, "Begéney agéwone, Begéney toowe, brab Begéney umule. Énda i géangéy dob Abaye saliyo bé Begéne. <sup>7</sup> Amuk toow fo gétiga kom Begén, gétiga kom soy Abay guwe Tulus. Atin tidéw béleewe ni, énggétiga komén brab énggito gomén."

<sup>8</sup> Atin bang Filipihe. "Kadnan, fégitto mo begey i Abaye Tulus. Been saén i nan i kailanga keye."

<sup>9</sup> Séménumbul i Jesuse mano, "Ménrugayén i kébati guwe dob begome. Endob taman so béleewe énda so wayo gélolo mo Begén Filipi? I énggétitowe Begén, énggito no soy Abaye. Sedé mélaw ké émbéréh go, 'Fégitto mo begey i Abaye?' <sup>10</sup> Aw énda fo munur go Begén diyoyu dob Abaye, atin i Abaye dini dob Begéne? I de béréhé ku begom békén tidéw dob Begéne. Tidéw dob Abaye dini dob Begéne gémalbék. <sup>11</sup> Unur gom bé

kébéréh guwe, i Begéne diyoyu dob Abaye, atin i Abaye dini dob Begéne. Taloo no unur gom sabaf bé de mékégaif énggito gom rénigo gu. <sup>12</sup> Béréhé ku begom i toowe, i munure Begén gérigono noy de galbék rignoné ku. Atin gérido na toow fo dakél mékégaif bé de kagén galbék, non mangéy do Abay guwe. <sup>13</sup> Atin rignoné kuy kéluhanay ongoté kome dob dawét guwe, inok fégitto guy kéfiyoy Abay guwe Tulus. <sup>14</sup> Udenén éntingayén ongoté kom dob dawét guwe, rignoné ku."

### *Fantag bé Rémogor i Tuluse*

<sup>15</sup> Féntaus Jesusey kébéréh ne mano, "Amuk méimu gom Begén, odoro kom i de sugué ku. <sup>16-17</sup> Atin ongoté ku dob Abaye, brab sému gu ségiyo témabang sani Rémogor i Tuluse témoro bé toowe. Atin bati dob begome taman sa taman. I de étéw dob duniyae sébanil bé Tuluse énda tayakufé ro de non énda gito ro de brab énda gétiga ro de. Endob i begome, gétiga kom non bati dob begome brab énda tékeda no dob begome.

<sup>18</sup> "Atin i Begéne, énda tagaké ku begom félébu, non séfuleo ku begom. <sup>19</sup> Éndaén mérugayén, i de sébanil bé Tuluse éndaén gito ro Begén. Atin non méuyagu man taman sa taman, méuyag gom so taman sa taman. <sup>20</sup> Amuk gégumah i nan gai tébuleu, gétiga kom i Begéne diyoyu dob Abay guwe, atin i begome dini dob Begéne, loo bé kédiyo guwe dob begome.

<sup>21</sup> "I témayakufe bé de sugu gu brab rignoné no, beeney méimue Begén. Atin i Abay guwe féimué noy étéwe méimu Begén. Atin i Begéne féimué ku so brab féfégétiga ku dob beeney fantage bé Begéne."

<sup>22</sup> Tidéw béno, ménbéréh i Judase (békén Judas Iskariot) mano, "Kadnan, sedek féfégétiga mo begey i fantage bé Beeme, éndob énda fayagé mo de dob de étéw sébanil bé Tuluse?"

<sup>23</sup> Séménumbul i Jesuse mano, "I méimue Begén, odoro noy kétoro guwe. Atin i Abay guwe méimu de so brab i Abay guwe brab Begéne mangéy gey bati dob beene. <sup>24</sup> I étéwe énda méimuén Begén, énda so odoro noy kétoro guwe. I de ni kébéréh gélingoo kom békén kagén, éndob tidéw dob Abaye séménugu Begén.

<sup>25</sup> "Bénréh gu dob begomey de ni lokut diniwu séna dob begome. <sup>26</sup> I témabange sani Rémogor i Tuluse, féuwit i Abaye inok fétausé noy galbék guwe. Atin toroé no begom i kéluhanane brab féfégétédémén begom i kéluhanay béréh guwe begom.

<sup>27</sup> "Féledé kuy kagéne kétanék dob begome, inok fiyoy de fédéw gom. I kétanéke iray gu begom békén loo bé kétanéke dob duniyae ni. Mélaw kagom émbuku taloo no mégilak gom. <sup>28</sup> Énggélíngoo kom i béréh guwe bé

tagaké ku begom éndob séfuleo ku so begom. Amu damén ké toow gom méimu Begén, moror gom bé kéangéy guwe dob Abaye non i Abaye toow na fo gérotor Begén. <sup>29</sup> Bénréh gu begom i ni lokut énda séna ménrigo no, inok amuk métuman, munur gom de. <sup>30</sup> Enda férugayé kuy kébérah guwe dob begome non gégumah sékoy odoroy duniyae ni sani féndawéte Satanas. Endob énda i barakatén gélawan Begén. <sup>31</sup> Endob rigoné kuy kéluhanay sénugu i Abaye inok gétigay de étéw i kéimu guwe bé Abaye. Enggomén, magéw tomén tékédan tom dini.”

## 15

### *I binuwayae fantag bé kayéwe*

<sup>1</sup> Ménbérah man i Jesuse mano, “I Begéne maak sébaan idéng kayéw atin i Abay guwe Tulus Beeney gefee bé kayéwe. <sup>2</sup> Amuk wén i do fongoy kayéwe énda mégonokén, kéléngé no. Atin limfioné noy de fongo mégonok inok méuman i kéfégonok ruwe. <sup>3</sup> I begome maak do fongo gu brab ménlimfiyo gomén, non ménunur gomén bé de kétoro gu. <sup>4</sup> Kagom tékédan dob Begéne atin énda tékédanu dob begome. Enda i fongo géfégonok amuk énda ménsumfatén dob idéng i kayéwe. Ségiléw bé begome non amuk sésuway gom Begén, énda gérigo gom bé fiyowe.

<sup>5</sup> “Non i Begéne maak idéng kayéw atin i begome maak do fongo. I étéwe énda tékédan no dob Begéne, brab énda so tékédanu dob beene, géfégonok médo do fiyo rigonén. Endob énda i fiyo gérigono kom ké tékédan gom dob Begéne. <sup>6</sup> Atin i endae ménsumfat dob Begéne ibérén loo bé fongowe. Tidéw béno, waléy mégangu. Atin i kéluhanay de fongo do mégangu, timuén inok ibérén dob aféye brab métuwég. <sup>7</sup> Endob i begome, amuk énda tékédan gom dob Begéne atin amuk modor gom bé kétoro guwe, udenén kétaya kom ongoté kom, atin gédoté kom. <sup>8</sup> Atin amuk énggégonok gom médo do fiyo rigonén, dayéwéy de étéw i Abay guwe. Atin gétiga ro mélaw do kuyug gu begom. <sup>9</sup> Féimué ku begom ségiléw bé kéimu i Abay guwe Begén. Fétaus gom i kétayakuf gome bé gédaw guwe begom. <sup>10</sup> Amuk odoró kom i de sugu gu, gétaus gom bé kétayakuf gome bé gédaw guwe begom, ségiléw bé kéodoro ku bé de sugu i Abay guwe atin taus i kétayakuf guwe bé gédaw ne Begén.

<sup>11</sup> “Bénréh gu begom i ni inok méoror gom ségiléw bé Begéne inok toow tom fo séoror. <sup>12</sup> Ay niy sugu guwe begom: ségédaw gom loo bé kégé daw guwe begom. <sup>13</sup> Amuk toow fo mégédaw i ségétéwe étéw bé dumo nuwe, irayén i férénawa nuwe inok tabanga no. Been i niy toowe fo daké kégé daw. <sup>14</sup> Begom i do dumo gu, amuk

rigoné kom i sugué kuwe begom. <sup>15</sup> Endaén fédawété ku begom do sugu-suguén, non i ségétéwe sugu-suguén, énda gétiga noy rigonéy amu ne. Yamula fédawété ku begom do dumo gu, non bénréh gu begom i kéluhanay énggélngoo kuwe tidéw dob Abay guwe Tulus. <sup>16</sup> Békén begom i ménémilie Begén, yamula fénémili gu begom. Ténabar gu begom inok géfégonok gom do fiyo galbék énda mékédano. Atin mélaw i Abaye Tulus, irayén begom i kéluhanay ongoté kome dob dawét guwe. <sup>17</sup> Ay ni mélaw i sugu guwe begom: ségédaw gom.

<sup>18</sup> “I de étéw sébanil bé Tuluse dob duniyae ni, amuk mérarék ro begom, fégétédém gom i ni, géétahu na kénraréko ro. <sup>19</sup> Amuk maming gom sébanil bé Tuluse, méimu i de tete étéw begom. Endob fénémili gu begom inok sésuway gom bé de tete étéw dob duniyae ni. Mélaw mérarék ro begom. <sup>20</sup> Fégétédém gom i bénréh guwe begom, ‘Enda i sugu-suguén ké gérotor na bé amu ne.’ Mélaw amuk férasayé ro Begén, férasayé ro so begom. Endob amuk wén i do étéw odoró roy kagéne kétoro, odoró ro soy kagome de. <sup>21</sup> Endob i funa ruwe begom émférasay non do kuyug gu begom. Non énda gétiga roy Tuluse, sani séménugue Begén. <sup>22</sup> Amuk énda ménangéyu dini mureton bero, énda i sala ro. Endob béleewe ni énda géséliyah ro non énggélngoo roy toowe, éndob miika ro de. <sup>23</sup> Atin i de étéw mérarék Begén, békén mérarék ro saén Begén non mérarék ro so bé Abay guwe. <sup>24</sup> Enggito roy mékégaife galbék réngio gu, énda gérigonoy sésiyowe de. Amuk énda énggito ro de, énda i sala ro. Endob énggito roy de ni, gido loo mérarék ro Begén brab Abay guwe Tulus. <sup>25</sup> Endob fatut mérigoy ni inok métuman i Ménsulate Kébérah i Tuluse mano, ‘Fiyon fo ké énda i funa ro, mérarék ro so Begén.’”

<sup>26</sup> Fétaus Jesusey kébérah ne mano, “Gégumah sékoy témabange tidéw dob Abaye Tulus. Sugué ku mangéy dob begome. I dawét ne Rémogor i Tuluse, atin toroé noy toowe. Amuk gumahén dini, fégétiga no bé de étéw i fantage bé Begéne. <sup>27</sup> Atin begome soy fatute muret fantag bé Begéne, non énggéséodor gom Begén tidéw féganay bé kétoro guwe.”

## 16

<sup>1</sup> Fétaus Jesusey kébérah ne mano, “Bénréh gu begom i kéluhanay de ni inok énda mékédan i késarig gome dob Begéne. <sup>2</sup> Non éndaén moso tungkasé ro begom mahur dob de lawi féngadafan. Atin gégumah moso i gaiwe, i de étéw méméléhu begom, marok rigoné roy kétayay Tuluse. <sup>3</sup> Rigoné roy de ni non énda séna gélolo ro Begén taloo no Abay guwe. <sup>4</sup> Endob bénréh gu begom i de ni, inok

amuk gégumah moso i nan gai kékérasay ro begom, gétédémomo kom i béréh gun begom.

“Enda béréh gu de begom bé de gétah, non diniwu séna séodor begom. <sup>5</sup> Endob béleewe ni, muleu mangéy dob Tuluse séménugu Begén. Gido loo, énda i ségétéw begom ménginsa ké hon i ayo kuwe de. <sup>6</sup> Atin béleewe, toow fo tete i de fédéw gom non béréh guy de ni. <sup>7</sup> Gido loo, béréhé ku begom i toowe, toow na fo fiyo dob begome ké magéwu, non buluk énda magéwu énda mangéy i témabange dob begome. Endob amuk magéwu, sugué ku mangéy dob begome. <sup>8</sup> Atin buluk gégumah, féfégétiga no bé de étéw i de sala ro. Féfégétiga no soy fantage bé fiyowe brab fantag bé kékukum i Tuluse. <sup>9</sup> Féfégétiga no bero ménsala ro sabaf énda méginugut ro Begén. <sup>10</sup> Féfégétiga no beroy fantage bé fiyowe non muleu mangéy dob Abaye Tulus, atin éndaén gito gom Begén. <sup>11</sup> Atin féfégétiga no soy fantage bé kékukum i Tuluse, non i Satanase, sani odoroy kéluhanay teteé dob duniyae ni, ménkukumén.

<sup>12</sup> “Médoon nay kéuyoto kuwe ureté ku begom, éndob énda séna gésobuto kom de béleewe ni, brab waléy gom émbuku ké béréhé ku. <sup>13</sup> Endob i Rémogor i Tuluse, sani témoroé bé toowe, amuk gégumah, féfégétiga no begom i kéluhanay toowe. Enda béréhé noy de kaan saén kékégitung, yamula toroé noy kéluhanay énggélungoo nuwe tidéw dob Abaye, atin béréhé no begom i fantage bé kéluhanay mérigowe moso. <sup>14</sup> Dayéwé no Begén, non féfégésobutén begom i kéluhanay de kagén kétoro brab de rénigo gu. <sup>15</sup> I kéluhanay kay Abaye, kagén so. Been i niy funa kuwe ménbéréhé bé i Rémogor i Tuluse, féfégésobutén begom i kéluhanay kétoro guwe.

<sup>16</sup> “Endaén mérugayén tidéw béleewe ni, éndaén gito gom Begén. Enda man mérugayén tidéw béno, gito gom man Begén.”

<sup>17</sup> Atin i de dumo bé de kuyugén ménsébéréh-béréh ro maro, “Ati atag i béréhé ne mano, ‘Endaén mérugayén tidéw béleewe, éndaén gito gom Begén, brab énda man mérugayén tidéw béno, gito gom man Begén?’ Brab béréhén so mano, ‘Non muleun mangéy dob Abaye.’ <sup>18</sup> Atin ati keey i atag i ni, ‘Endaén mérugayén?’ Enda gésobuto tom i no béréhén.”

<sup>19</sup> Atin énggétiga Jesuse méuyot ro ménginsa, mélaw béréhén bero mano, “Aw séfénginsa gom bé ati atag i béréhé guwe begom maku, ‘Endaén mérugayén éndaén gito gom Begén, brab énda man mérugayén tidéw béno gito gom man Begén?’ <sup>20</sup> Béréhé ku begom i toowe, i de tete étéw dob duniyae ni, toow ro fo moror bé mérigowe dob Begéne, éndob i begome, kémérew gom non toow fo tete i de fédéw gom. Endob énda

man mérugayén waléy gom toow na fo moror. <sup>21</sup> Ufama, i libune kéararan, démwét non énggumahén i gaiy kékérasaya nuwe. Endob buluk ménkéumahanén, ménlifotén bé kékédawéta nuwe, sabaf bé kéoror ne bé ngae ménumaha dob duniyae ni. <sup>22</sup> Ségiléw bé nan soy begome. Béleewe ni, tete i de fédéw gom. Endob amuk gégumahén sékoy gaiwe géségito tom man, waléy gom toow fo moror. Atin énda i gékédan bé kéoror gome.

<sup>23</sup> “Amuk gégumahén sékoy nan gai, éndaén ongoto kom Begén. Béréhé ku begom i toowe, i Abaye Tulus, irayén begom i kéluhanay ongoté kome dob dawét guwe. <sup>24</sup> Taman so béni, énda séna ménongot gom dob dawét guwe. Ongot gom atin gédoté kom, inok toow gom fo moror.

<sup>25</sup> “Béréhé gu begom i de ni féngagéw dob binuwayae. Endob gégumah sékoy gaiwe éndaén binuwayaa ku begom, yamula fékéntayé kuy kéuret guwe fantag bé Abaye.

<sup>26</sup> Buluk gégumah i nan gai, begom i de mongot dob dawét guwe dob Beene inok iraya no begom. Békén Begén i mongote. <sup>27</sup> Non i Abaye toow fo mégédaw begom. Féimué no begom non ménimu gom Begén brab ménunur gom Begén tidéwu dob Beene. <sup>28</sup> Tidéwu dob Abaye Tulus, brab ménangéyu dob duniyae. Brab béleewe tékédanu dob duniyae ni, atin muleu mangéy dob Abaye.”

<sup>29</sup> Tidéw béno, ménbéréhé i de kuyugén maro, “Béleewe mékéntaya i kébéréhé me, éndaén émbéréhé go binuwaya. <sup>30</sup> Béleewe ni gétiga key gétiga moy kéluhanane, non fiyon fo ké énda séna ménginsa gey, gétiga mon i de fénginsaé key. Mélaw munur gey Beem, tidéw go dob Tuluse.”

<sup>31</sup> Atin bang Jesuse, “Aw méginugut gomén Begén? <sup>32</sup> Endob gégumah i gaiwe brab énggumahén, ké émbéragar gom, mule gom mangéy dob de lawi gom. Atin tagaké kom Begén ségétéw gu saén. Endob fiyon fo ké loo bé nan, wén i dumo gu, non i Abay guwe Tulus i dumo guwe. <sup>33</sup> Béréhé kuy de ni begom, inok fiyoy de fédéw gom sabaf bé késarig gome dob Begéne. Féféngénoy de tete étéw begom, éndob fébaraw gom non ténabananén Begén i Satanase, sani odoroy duniyae ni.”

## 17

<sup>1</sup> Amun énggilid Jesuse béréhé i de ni, léménéngag saréw dob lawayo brab ménbéréhé mano, “Abay, énggumahén i gaiwe. Fégitoy moy kéfiyo guwe funa ku fatut médayéw inok fégitoy gu soy kéfiyo muwe funa mo fatut médayéw. <sup>2</sup> Non sénarigém Begén i kuwagibé méguléw bé kéluhanay de kéilawan, inok iray guy umule magufusa dob kéluhanay de étéw nirayém Begén. <sup>3</sup> Atin ay niy kékédote bé umule magufusa: kailangan gétiga roy Beeme brab Begéne, non Beem

saén i tintuwe Tulus brab Begén i sénugu me Jesu Kristo. <sup>4</sup> Fénggito guy kéfiyo muwe dob duniyae, funa mo fatut médayéw atin énggilid gun i galbéke sénuguém Begén rigoné ku. <sup>5</sup> Abay, béleewe ni ay niwu dob adafa muwe, féséfuleém dob Begéney bantuge loo bé bantug tuwe tidéw féganay bé énda séna ménlimbag i duniyae de.

<sup>6</sup> “Féfégétiga kuy fantage bé Beeme dob de étéw dob ni duniya nirayém Begén. Beem i gefee bero, atin nirayém bero dob Begéne, atin ménunur ro bé kébérehé me. <sup>7</sup> Béleewe énggétiga ro tidéw dob Beemey kéluhanane béréhé ku brab rigoné ku. <sup>8</sup> Non fénsamfay gu dob berowey de kébérehém nirayém Begén, atin méngginugut ro de. Enggétiga ro toowu tidéw dob Beeme, brab ménunur ro sénuguém Begén.

<sup>9</sup> “Dasala ku bero dob Beeme. Enda dasala kuy de tete étéw dob duniyae ni, éndob ongoté ku dob Beeme féfiyoné moy de étéw nirayém Begén non kaam so do étéw. <sup>10</sup> I kéluhanay kagéne kaam so, brab i kéluhanay kaame kagéne so. Atin dob berowey énggiton i kéfiyo guwe funa ku fatut médayéw. <sup>11</sup> Atin muleu séko mangéy dob Beeme, brab éndaén batiu dob duniyae ni. Endob taus i karowe kébati dob duniyae ni. Fiyo Abay, diyaga mo bero bé barakat i dawét me, sani dawét me nirayém Begén, inok waléy ro sébaan, ségiléw bé betowe sébaan. <sup>12</sup> Amun diniwu dob berowey, déniyaga gu bero bé barakat i dawét me nirayém Begén. Déniyaga gu bero inok énda i ségétéw métaadin bero saliyo bé ségétéwe kailangan mékukum inok métuman i Ménsulate Kébérehém. <sup>13</sup> Atin béleewe séfuleu mangéy dob Beeme. Béréhé kuy de ni lokut diniwu séna inok i de gégélingo de toow ro fo moror séréngan bé Begéne. <sup>14</sup> Fénsamfay gu dob berowey de kaam kétoro. Atin i de tete étéw dob duniyae, mérarék ro bero non éndaén mamung ro dob de tete étéw ségiléw bé Begéne énda mamungu de. <sup>15</sup> Enda ongoté ku de dob Beeme ké kédané mo bero dob duniyae, éndob ongoté ku dob Beeme diyagané mo bero tidéw dob Satanase. <sup>16</sup> Enda mamung ro sébanil Beem ségiléw bé Begéne énda mamungu de. <sup>17</sup> I de ni kato étéw, usaréme i toowe féwaléyém bero do malinis dob adafa muwe. Atin i kaame kébérehé, been i toowe. <sup>18</sup> Sénugu gu bero muret dob de étéw ségiléw bé késugu me Begén mangéy dob duniyae. <sup>19</sup> Atin sabaf bé berowey, iray gu Beem i féféw guwe, inok i berowey so iray roy de féféw ro dob Beeme.

<sup>20</sup> “Békén saén i berowey dasala kuwe dob Beeme, éndob dasala ku soy de étéw munur ro dob Begéne non bé kéuret i de ni kuyug gu. <sup>21</sup> Démasalu dob Beeme Abay inok waléy ro sébaan ségiléw bé Betowe. Atin

ségiléw bé kédini muwe dob Begéne brab kédiyo guwe dob Beeme, dini ro so damén dob Betowe. Waléy ro damén sébaan inok i de étéw dob duniyae munur ro bé sénuguém Begén. <sup>22</sup> Niray gu beroy barakate nirayém Begén inok i de féféw ro waléy sébaan loo bé Betowe. <sup>23</sup> Non i Begéne diyoyu dob berowey, atin i Beeme dini go dob Begéne. Mélaw waléy ro damén tintu sébaan inok i de étéw dob duniyae gétiga ro Beem i séménugu Begén brab féimuém bero loo bé kéféimu me Begén.

<sup>24</sup> “Abay, i de étéw nirayém Begén, méuyoytu de ké i ayo kuwe begey so inok gito roy bantug guwe, sani bantuge nirayém Begén non fénimuém Begén fiyon fo ké énda séna ménlimbag i duniyae de. <sup>25</sup> Métintu Abay gu, i de étéw sébanil Beem, énda gétiga ro Beem. Endob i Begéne énggétiga ku Beem. Atin i de ni kuyug, gétiga ro sénuguém Begén. <sup>26</sup> Fénggétiga ku beroy fantage bé Beeme, brab fétausé ku so inok i kégedaw me bero waléy ségiléw bé kégedaw me Begén, atin gédiyoyu dob berowey.” Been i niy dasal Jesuse.

## 18

### *Kénéfo i Jesuse*

<sup>1</sup> Amun énggilid i Jesuse démasal, ménagéw beroy de kuyugén ménifar ro bé wayége féndawét Kidron. Wén i do nohok kayéw diyoyu atin diyoyu ro téménrén. <sup>2</sup> Atin i Judase sani émfékéfoe de énggétiga noy ni gonon non diyoyu démoyun sélimud i Jesuse bé de kuyugén. <sup>3</sup> Mélaw i Judase ménangéy diyoyu, fénanangguwitén i médoowe sundalo brab de mantay bé lawi i Tuluse sénugu i de odoroy de fadi brab do Fariseo. Ménuwit ro do solo brab do téla-ta brab do kulangén. <sup>4</sup> I Jesuse énggétiga non i kéluhanane mériyo séko dob Beene. Mélaw fénggédéto mo bero brab ménbérehé man, “Ati séléde kome?”

<sup>5</sup> Séménumbul ro maro, “Sélede key i Jesuse tidéw Nasaret.”

Atin bang Jesuse, “Begén i no.”

Diyoyu soy Judase brab been i émfékéfoe bé Jesuse. <sup>6</sup> Amun bénréh Jesuse Been i no sélede ro, énggétésunud i de sundalo brab kéluhana ro méntuwar. <sup>7</sup> Tidéw béno, ménénginsa man i Jesuse mano, “Ati sélede kome?”

Atin séménumbul ro maro, “Jesus tidéw Nasaret.”

<sup>8</sup> Atin bang Jesuse, “Bénréh gun begom, Begén i Jesuse. Mélaw amuk Begén i sélede kome féagéw gom i de dumo gu ni.” <sup>9</sup> Bénréhén i ni inok métuman i kébérehé ne mano, “Abay, énda i énggétadino ku fiyon ségétéw bé de étéw nirayém Begén.”

<sup>10</sup> Tidéw béno, i Simon Pedrowe rénau noy sundange tidéw dob ruma ne. Atin ténibohén i ségétéwe rifén kay gérotore fadi



brab sénilafén i kélingo ne fingé kuwonon. I dawét i ni rifén Malkus. <sup>11</sup> Tidéw béno, bénréh Jesuse dob Pedrowe mano, “Rumaém i sundang ma nan. Non i kékérasaya kuwe niray i Tuluse Begén, békén ba kailangan téférasayun mon?”

### *Ménkukum i Jesuse*

<sup>12</sup> Tidéw béno, i de sundalo beroy odoro ruwe, brab de mantay bé lawi i Tuluse, kénéfo roy Jesuse brab nikét ro. <sup>13</sup> Atin nuwit ro sungu dob Anase, térimay gérotore fadi bé no bélintuwa féndawét Kayafas. <sup>14</sup> Atin i Kayafase féngginau noy de odoroy de Judio bé gétahe de mano, “Toow na fo fiyo ké ségétéw saén i méléhue inok énda méléhu i kéluhanay de Judio.”

<sup>15</sup> Atin i Pedrowe brab ségétéwe dumo no kuyug ménfuray ro bé Jesuse. I ni ségétéw kuyug, énggéoloy gérotore fadi, mélaw énggéodor so bé Jesuse mahur mangéy dob fésayaway lawi i gérotore fadi. <sup>16</sup> Endob i Pedrowe méntéféled dob liyuy bégaway fésayawane. Tidéw béno, i dumo nuwe kuyug sani énggéoloy gérotore fadi ménsut brab ménsébéreh bé kénogone mantay dob bégawane, brab fénahurén i Pedrowe dob fésayawane. <sup>17</sup> I kénogone ni ménénginsa dob Pedrowe mano, “Aw békén ba beam i ségétéwe bé de kuyug i lagéye kénéfo?”

Séménumbul i Pedrowe mano, “Békén begén.”

<sup>18</sup> Mélégénéy fo bé béno gai. Mélaw i de sugu-suguén brab de guwardiya ménuyag ro aféy atin téménindég diyo méntélagang ro. Atin diyo soy Pedrowe téménindég télalang.

<sup>19</sup> Atin i gérotore fadi fénénginsa noy Jesuse fantag bé de kuyugén brab bé de kétoroén. <sup>20</sup> Séménumbul i Jesuse mano, “Énda ménbunéy i de kétoro gu. Yamula toroé kuy kéluhanay de étéw non démayunu témoro dob de lawi féngadafan brab dob lawi i Tuluse dob téngaangay de étéw, non diyo ménlimud i de Judio. Énda foy bénréh gu ké sénkém saén. <sup>21</sup> Mélaw sedek fénginsaa mo Begén? Fénginsaa moy de étéw énggéélingo Begén non gétiga roy de kétoro gu.”

<sup>22</sup> Amun bénréh Jesusey ni, i ségétéwe bé de guwardiya ténamfilingén i Jesuse brab ménbérehéh mano, “Aw been i nan i késumbulo muwe bé gérotore fadi?”

<sup>23</sup> Séménumbul i Jesuse mano, “Amuk tete i bénréh guwe, bérehém ati tete de. Endob amuk toow i bénréh guwe, sedek tamfilingé mo Begén?”

<sup>24</sup> Tidéw béno, i Jesuse tafay so nikét fénuwit Anase mangéy dob toowe gérotor fadi féndawét Kayafas.

<sup>25</sup> Amun i Pedrowe diyo séna dob aféye télalang, fénénginsaay de étéw diyo maro, “Aw békén ba beam soy ségétéwe bé de kuyugén?”

Endob dénirung Pedrowe mano, “Békén begén.”

<sup>26</sup> Diyo i ségétéwe rifén kay toowe gérotor fadi sani samung i étéwe sénilaf Pedrowey kélingo ne. Ménénginsa mano, “Aw békén ba beam i énggito guwe dumo no bé kékéfo ruwe de dob safade?”

<sup>27</sup> Atin dénirung Pedrowe man mano, “Békén begén.” Sonom so béno, ménukoro i férufete.

<sup>28</sup> Tidéw béno, nuwit roy Jesuse tidéw dob lawi Kayafase mangéy dob lawi i méguléwe bero tidéw Roma. Toow fo géfuwén bé no uras. Atin i de odoroy de Judio énda ménahur ro dob lawi i méguléwe inok odoro roy adat ruwe fantag bé kékanduli ruwe. Non amuk mahur ro dob lawi i de étéw békén Judio, énda géamung ro bé kandulie féndawét ro “Témara” non marok mékérésik dob adafay Tulusey de lawi i de étéw békén Judio. <sup>29</sup> Mélaw i méguléwe féndawét Pilato ménsut tidéw dob lawi ne mangéy dob berowe brab ménénginsa mano, “Ati funa kome témébo bé ni étéw?”

<sup>30</sup> Séménumbul ro maro, “Amuk énda i rénigo no tete, énda uwité key de mangéy dob beeme.”

<sup>31</sup> Atin bang Pilatowe, “Uwit gom mangéy dob kagome kukuman, brab begom i kémukum de ké ati ménbérehéhe dob kitab gome.”

Endob séménumbul i de Judio maro, “Endob dob kitab gome do Romano, énda i kuwagib gey kémukum méléhu bé ségétéwe étéw.” <sup>32</sup> Ménrigoy ni inok métuman i kébérehéh Jesuse fantag bé kaane féglélu, sani dob kruse. Non i adat i de Romano, féléhué roy de étéw dob de krus.

<sup>33</sup> Atin i Pilatowe ménahur dob lawi ne brab ténawagén i Jesuse, atin ménénginsa mano, “Aw Beam i datu i de Judio?”

<sup>34</sup> Séménumbul i Jesuse mano, “Aw kaam sa kéfégitung i nan loo ké énggélingoo mo tidéw dob de ségiyo bénréh roy nan fantag bé Begéne?”

<sup>35</sup> Atin bang Pilatowe, “Békénu ségétéw Judio! Endob do falan do dumo mo Judio brab de odoroy de fadi gom i ménuwite Beam dini. Ati tete rénigo mo?”

<sup>36</sup> Séménumbul i Jesuse mano, “I sakuf i fégléwé kuwe békén dob duniyae ni. Amuk duniyae niy sakuf i fégléwé kuwe, i de kuyug gu métah ro sétiboh inok énda gékéfooy de Judio Begén. I sakuf i kagéne fégléwéon békén dini.”

<sup>37</sup> Mélaw i Pilatowe ménénginsa mano, “Amuk loo bé nan, aw ségétéw go datu?”

Séménumbul i Jesuse mano, “Toow i kébérehéh me, Begén i datue. Atin i funa kuwe ménumah brab ménangéy dob duniyae ni

inok féféngsobot guy toowe. Atin i de étéw modor bé toowe, féfélingoé ro Begén.”

<sup>38</sup> Atin bang Pilatowe, “Ati keeyén i toowe?”

Amun énggébérého Pilatowey ni, ménsut man ménangéy dob de Judio brab bénréhén mano, “Enda i gétiga ku sala i ni étéw. <sup>39</sup> Endob i adat gome, sénga kanduli gom féndawét “Témara, témangéyu ségétéw férisu, sani ati fémilié kome. Aw méuyot gom de ké tangéyé kuy ni étéw datu gom do Judio?”

<sup>40</sup> Séménumbul ro mékes maro, “Békén Been i tangéyéne. Méuyot gey de ké tangéyé moy Barabase saén.” (I Barabase ni, beeney ségétéwe ménakaw.)

## 19

<sup>1</sup> Tidéw béno, i Pilatowe fénbadasén i Jesuse. <sup>2</sup> Atin i de sundalo méndot ro do suwaran kéléng brab léniku ro, atin fénsayaf ro bé Jesuse. Tidéw béno, fénkéngal roy Jesuse furo kégal toow fo métaah, maak datu. <sup>3</sup> Atin déniyangka ro maro, “Méraru damén i datu i de Judio.” Atin ténamfling ro médoos gule.

<sup>4</sup> Tidéw béno, ménangéy man i Pilatowe dob de étéw ménribuk brab bénréhén mano, “Uwité ku mangéy dob téngaanga kome inok féféngsobot ku begom énda i salaén.” <sup>5</sup> Atin ménsut i Jesuse séménayaf do léniku suwar brab kéménégal furo. Tidéw béno, ménbéréh i Pilatowe mano, “Téngténg gom, ay niy étéwe.”

<sup>6</sup> Amun énggityot de odoroy de fadi brab de guwardiya, ménkes ro maro, “Féféhuén, kélabonén dob kruse!”

Tidéw béno, ménbéréh i Pilatowe mano, “Uwit gom brab begom i kémélabo de. Endob i begéne, karangé ku énda i salaén.”

<sup>7</sup> Atin bang i de ménlimud, “Dob kitab geyé fatut féféhuén non béréhé no Beene kun i Nga i Tuluse.”

<sup>8</sup> Amun énggélíngoo Pilatowey de ni, ménuman i kégilak ne. <sup>9</sup> Mélaw ménséfule man mahur dob lawie brab fénénginsaa noy Jesuse mano, “Hon i tidéwo muwe de?” Endob énda séménumbul i Jesuse. <sup>10</sup> Mélaw bang Pilatowe, “Sedek énda sémumbul go? Aw énda gétiga mo de ké wén i kuwagib gu témangéy Beem, loo so méméléhu Beem dob kruse?”

<sup>11</sup> Atin séménumbul i Jesuse mano, “Gagané mo rigonén i nan dob Begéne sabaf saén nirayay Tuluse beem kuwagib. Been i funa nuwe i étéwe ménuwit Begén dini toow na fo dakél i sala ne.”

<sup>12</sup> Amun énggélíngoo Pilatowey ni, ménuyot damén témangéy bé Jesuse. Endob ménékes i de Judio maro, “Amuk fétangéyém i nan étéw, sébanil go wayo bé gérotore datu Sesar dob Roma. Non i ségétéwe étéw émbéréh been kun i datue, beeney sébanile bé Sesare.”

<sup>13</sup> Amun énggélíngoo Pilatowey kébéréh ruwe, fénsutén man i Jesuse. Tidéw béno, ménsar dob saray de kémukum dob gonone féndawét Gabata dob késébéréhe Hebreo (i atag ne i suduwe batéw.) <sup>14</sup> Gédétén géutuh bé no térésang atin i géntuduge fuweh, kémanduli i de Judio féndawét “Témara”. Tidéw béno, ménbéréh i Pilatowe dob de Judio mano, “Ay ni datu gome.”

<sup>15</sup> Atin ménékes man i de étéw maro, “Féféhuén, kélabonén dob kruse!”

Atin ménénginsa i Pilatowe mano, “Aw méuyot gom de ké kélaboné kuy datu gome dob kruse?”

Tidéw béno, séménumbul i de odoroy de fadi maro, “Enda i ségiyo datu gey saliyo bé Sesare dob Roma.”

<sup>16</sup> Tidéw béno, naté Pilatowe dob berowey Jesuse inok kélaboné ro dob kruse. Atin nangéy roy Jesuse.

### *Kénlaboy Jesuse dob kruse*

<sup>17</sup> Mélaw nuwit roy Jesuse ménsut dob no ingéd brab ménangéy ro dob gonone féndawét Golgota dob késébéréh i Hebreu (i atag ne “gonoy kulobong uléwe”). Atin bé kéagéw ruwe fénduwal ro bé Jesusey krus ne. <sup>18</sup> Amun énggégumah ron diyo, i de sundalo, kénlabo roy Jesuse dob kruse. Atin kénlabo ro soy de ruwo gétéw lagéy dob de krus. I ségétéwe de fingé dob kuwono Jesuse, brab i ségétéwe de fingé dob biwong Jesuse. Atin diyo i Jesuse ténunggul dob kérara ruwe. <sup>19</sup> Atin wén i sénulat Pilatowe, féndiyo ro dob krus Jesuse mano, “I Jesuse tidéw Nasaret, datu i de Judio.”

<sup>20</sup> Médooy de Judio énggébasa bé no non i ni gonon kénlaboy Jesuse dob kruse énda mérayuén dob Jerusalem. Atin sénulatén dob téléwe timan késébéréh, Hebreo, Latin, brab Griego. <sup>21</sup> Endob i de odoroy de fadi i de Judio ménbéréh ro dob Pilatowe maro, “Kago sulatén de ‘Datu i de Judio’. Yamula sulatém loo bé ni, ‘I ni étéw ménbéréh mano, Begén i datu i de Judio.’”

<sup>22</sup> Endob séménumbul i Pilatowe mano, “I sénulat guwe, énda fakayén fégalinén.”

<sup>23</sup> I de sundalo, amun énggilid ron kénlaboy Jesuse dob kruse, éndot roy de kégalén, sénbaad ro fot gétéw. Atin éndot ro soy lambung ne. Atin non nawél énda i kumbanga no, <sup>24</sup> i de sundalo ménbéréh ro maro, “Katom riyasén de. Yamula sékung-kungo tom, atin i témabane gékaan.” Ménrigoy ni inok métuman i Ménsulate Kébéréh i Tuluse mano, “Sénbaad roy de kégal gu brab sékung-kungo roy lambung guwe.” Atin been i nan i réngigoy de sundalo.

<sup>25</sup> Gédét dob krus Jesuse, diyo téménindég i idéng ne, brab tuwaréy idéng ne libun, brab bawag Kleopase féndawét Maria, brab

ségétéwe so Maria tidéw Magdala. <sup>26</sup> Amun énggito Jesusey idéng ne brab ségétéwe na kuyugén toow fo kégedawa no, ménbéréh dob idéng ne mano, “Iday, béleewe ni beene y nga me.”

<sup>27</sup> Atin ménbéréh so dob kuyug ne mano, “Béleewe ni beene y idéng me.” Mélaw méntidéw bé no, i kuyug Jesuse ni nuwitén i idéng Jesuse mule brab fénbatién dob lawi ne.

### *Ménléhu i Jesuse*

<sup>28</sup> Tidéw béno, amun énggétiga Jesuse ménggilidén i kéluhanane, ménbéréh mano, “Téruménu,” inok métuman i Ménsulate Kébéréh i Tuluse fantag bé Jesuse.

<sup>29</sup> Wén i katiyae diyo ménféno bé mélémuwe arak. Mélaw néréw roy maake gafas atin ténunggul ro dob métaahe kayéw brab féndiyo ro dob ba Jesuse. <sup>30</sup> Atin amun énggéséfo no, ménbéréh mano, “Enggilidén.” Tidéw béno, méntédungul atin ménléhuén.

<sup>31</sup> Tidéw béno, i de odoroy de Judio nongot ro dob Pilatowe ké fétéfoén i sékéy i de étéw dob de krus inok magad méléhu. Non i de Judio méuyot ro ké mékédan i lowoh i de étéw dob de krus bé no so gai, non bé gétunduge de térésang Sabado sani gaiwe témérén ro. Brab been i térésange bé kékanduli ruwe. Mélaw toow fo mékétéfu. <sup>32</sup> Mélaw i de sundalo ténéfo roy sékéy i de ruwo gétéw lagéy dumo Jesuse énggéséréngan kénlabo dob de krus. <sup>33</sup> Endob amun ménfégédét ro dob Jesuse, énggito ro ménléhuén. Mélaw éndaén ténéfo roy de sékéyén. <sup>34</sup> Endob i ségétéwe bé de sundalo dénilekén i tébing Jesuse atin réménanas i darae brab wayég. <sup>35</sup> Begéney étéwe énggégito bé ni ménrigo. Gétiga ku toow, brab ureté ku toow fo toow inok munur gom de. <sup>36</sup> Ménrigoy de ni inok métuman i Ménsulate Kébéréh i Tuluse mano, “Fiyon sébaan bé de bukalén, énda i météfo de.” <sup>37</sup> Brab wén soy Ménsulate Kébéréh i Tuluse mano, “Téngténgéy de étéw i dénilek ruwe.”

### *I kélébénge bé Jesuse*

<sup>38</sup> Tidéw béno, wén i ségétéwe lagéy féndawét Jose tidéw Arimatea, ménangéy dob Pilatowe brab nongotén i bangkay Jesuse. I Josehe ni ségétéw so kuyug Jesuse éndob énda ménfayagén non mégilak bé de odoroy de Judio. Tidéw béno, ténungkas Pilatowe bangkay Jesuse, mélaw nangéy Josehe. <sup>39</sup> Atin i Nikodemowe sani lagéy téménukaw bé Jesuse bé kélungonone, ménodor bé Josehe brab ménuwit fot folo gékilo fégeféamut. (I ni fégeféamut mira ménsélawék bé aloewe.) <sup>40</sup> Atin i de ni lagéy bénaus roy bangkay Jesuse bé futee safut atin sénlawék roy fégeféamute ni. Non been i niy adati de Judio ké lémbéng ro.

<sup>41</sup> Gédét dob gono Jesuse ménléhu, wén i do nohok kayéw diyo. Atin dob ni gonon wén i mantuwe réningo lébéng takub énda séna ménlébéngo no. <sup>42</sup> Non bé gétunduge de térésang Sabado sani gaiwe témérén ro, féngagay ro lénébéng i Jesuse dob lébéngé ni, non gédét.

## 20

### *Méntébule i Jesuse*

<sup>1</sup> Amun toow fo géfuwén bé Dumingguae de, kémélungon séna, ménagéw i libune féndawét Maria Magdalena mangéy dob lébéngé. Atin énggito no ménkédan i batéwe dob bégaway lébéngé. <sup>2</sup> Mélaw léménentu mangéy dob Pedrowe brab ségétéwe ni bé de kuyug Jesus toow fo kégedawa no. Brab béréhén mano, “Kénda roy bangkay i Kadnane dob lébéngé brab énda gétiga key i fénggono ruwe de.”

<sup>3</sup> Tidéw béno, i Pedrowe beroy ségétéwe ni kuyug Jesuse, ménagéw ro mangéy dob lébéngé. <sup>4</sup> Léménentu ro atin énggétah énggumah dob lébéngéy dumo Pedrowe kuyugén non toow na fo méraan. <sup>5</sup> Atin ménkudung-kudung sémarir, éndob énda ménahurén. Énggito no saén i de safut. <sup>6</sup> Tidéw béno, énggégumah i Pedrowe, atin ménahur i beene dob lébéngé brab énggito noy de safut ménumbuk. <sup>7</sup> Énggito no soy safute fénggébaus bé uléw Jesuse. Énda ménlawékén dob de dumo safut, éndob méndilin dob ségiyowe gonon. <sup>8</sup> Tidéw béno, ménahur soy ségétéwe ni kuyug dumo Pedrowe, sani énggétahe énggumah dob lébéngé. Atin amun énggito no, ménunur. <sup>9</sup> Bé ni gai énda séna gésoboto roy Ménsulate Kébéréh i Tuluse fantag bé Jesuse tébule. <sup>10</sup> Tidéw béno, ménule i de ruwo ni gétéw kuyug.

<sup>11</sup> Endob i Mariahe kémérew dob liyug lébéngé. Bé lala ne kémérew, ménkudung-kudung sémarir dob bukap i lébéngé. <sup>12</sup> Atin énggito noy ruwowe gétéw télaki kéménégal fute, ménsar ro dob féniroone bé bangkay Jesuse. I ségétéwe de ménsar fingé dob uléw ne atin i ségétéwe de fingé dob sékéy ne. <sup>13</sup> Atin ménbéréh ro maro, “Di, ati funa muwe kémérew?”

Atin séménumbul mano, “Nuwit roy Kadna kuwe atin énda gétiga kuy fénggono ruwe de.”

<sup>14</sup> Tidéw béno, séménling brab énggito noy Jesuse téménindég diyo, éndob énda énggélolo no de ké Beene y Jesuse. <sup>15</sup> Atin bang Jesuse, “Di, ati funa muwe kémérew? Ati selédé muwe?”

Dob fédéw Mariahe manok beene y magifate bé de nohok diyo. Mélaw ménbéréh mano, “Amuk Beeme y ménuwite

bé bangkay i Kadna kuwe, béréhém begén i fénggono muwe de inok angéyé ku.”

<sup>16</sup> Tidéw béno, bang Jesuse, “Maria.”

Atin méntékélid ténéngtégén i Jesuse brab ménbéréh dob késébéreh i de Judio mano, “Raboni!” (I atag ne Maistéro.)

<sup>17</sup> Amun énggélolo Mariahe Beeney Jesuse, ménbéréh i Jesuse mano, “Kago gamakén Begén, non énda séna énggéuleu mangéy dob Abay guwe Tulus. Endob ay go dob de tuwaréy gu brab béréhém bero, mangéy dob Abay guwe sani Tulus guwe. Been soy Abay gome brab Tulus gom.”

<sup>18</sup> Mélaw ménagéw i Maria Magdalenahe nangéyén bénréh dob de kuyug bé énggito noy Kadnane brab ati de bénréhén de.

<sup>19</sup> Amun kélungononén bé no Duminggu, i de kuyug Jesus ménsélimud ro dob lawie atin kénandado roy de fintu non mégilak ro bé odoroy de Judio. Atin tékow énggito roy Jesuse téménindég dob kérara ruwe. Atin ménbéréh mano, “Fiyoy de fédéw gom damén.” <sup>20</sup> Tidéw béno, fénténgtégén beroy de fali dob de kémérén brab tébing ne. Atin i de kuyugén toow ro fo ménoron non énggito ro. <sup>21</sup> Tidéw béno, ménbéréh man i Jesuse mano, “Fiyoy de fédéw gom damén. Sugué ku begom loo bé késugu i Abay guwe Begén.” <sup>22</sup> Tidéw béno, niyufén bero brab ménbéréh mano, “Tanggaf gom i Rémogor i Tuluse.” <sup>23</sup> Amuk fésagada kom i ségétéwe bé de salaén, émfésagadan. Buluk énda fésagada kom de, énda émfésagadan no.”

### *Énggito Tomase*

<sup>24</sup> I ségétéwe bé de folo bra ruwo kuyug Jesuse féndawét Tomas (féndawét so “Séféng”) énda diyoén bé no gai méntéfégitoy Jesuse. <sup>25</sup> Mélaw i de dumo no kuyug nuret ro dob beene maro, “Énggito gey i Kadnane”.

Endob ménbéréh i Tomase mano, “Enda fo munuru de taman énda gito guy fali i de kélabo dob de kémérén brab taman énda géahuro kuy de dau kémér gu dob de fali dob de kémérén brab dob tébing ne.”

<sup>26</sup> Ménifus i ségéfadiyane tidéw béno, ménsélimud man i de kuyug Jesus brab diyo soy Tomase. Fiyon fo ké i de fintu ménkandado, tékow méntéfégitoy Jesuse téménindég dob kérara ruwe. Atin i Jesuse ménbéréh mano, “Fiyoy de fédéw gom damén.” <sup>27</sup> Tidéw béno, ménbéréh i Jesuse dob Tomase mano, “Téngtégém i de ni. Fédiyoém i de dau kémérém dob de kémér gu, brab féahurém i kémér me dob tébing guwe ni. Kagonén magalang-galang. Unur go Begén.”

<sup>28</sup> Tidéw béno, ménbéréh i Tomase mano, “Beemey Kadna kuwe brab Tulus gu.”

<sup>29</sup> Atin bang Jesuse, “Aw munur go Begén non énggito mo Begén? Toow fo méror i de

munur Begén fiyon fo ké énda séna énggito ro Begén.”

<sup>30</sup> Médoos na do mékégaif rénigo Jesuse énggitoy de kuyugén éndob énda ménsulatén dob ni libro. <sup>31</sup> Ménsulat i de ni inok munur gom bé Jesusey Kristowe, sani Nga i Tuluse. Atin sabaf bé kéunur gome bé Jesuse gédoté kom i umule magufusa.

## 21

<sup>1</sup> Tidéw béno, méntéfégito man i Jesuse dob de kuyugén dob dogote féndawét Tiberias. Loo bé niy énggégéwo nuwe. <sup>2</sup> Diyo i Simon Pedrowe bero ro Tomas (féndawét so Séféng) brab Natanael tidéw Kana dob sakuf i Galileawe, brab ruwowe gétéw nga Sebedeo féndawét Juan brab Santiago, brab ruwowe gétéw kuyug Jesuse dumo ro. <sup>3</sup> Atin i Pedrowe ménbéréh dob berowe mano, “Mangéy tugés.”

Atin séménumbul ro maro, “Modor gey beam.” Mélaw ménagéw ro ménangéy ro méda dob awange. Endob énda i sébaan énggédot ro sédo bé no ménségékélungonon. <sup>4</sup> Amun sémbang i téréngé, diyo i Jesuse téménindég dob dénsaane. Endob i de kuyugén énda gétiga ro de ké Beeney Jesuse. <sup>5</sup> Tidéw béno, ménbéréh i Jesuse mano, “Do adih, wén i énggédot gom sédo loo ké énda?”

Séménumbul ro maro, “Enda.”

<sup>6</sup> Atin ménbéréh man i Jesuse mano, “Lawu gom i fukét gome fingé dob kuwonoy awange atin gégédot gom de sédo.” Mélaw lénawu roy fukét ruwe loo bé kébéreh Jesuse de. Tidéw béno, énggégédot ro toow fo médoos sédo. Atin énda génaga roy mégéngé bé fukéte dob awange non toow fo émbéngat i de médoos sédo.

<sup>7</sup> Atin i ségétéwe ni bé de kuyug toow fo ménggédaw i Jesuse de, ménbéréh dob Pedrowe mano, “Beeney Kadnane!” Amun énggélungoo Pedrowe, “Beeney Kadnane”, kéménégal (non kenda noy kégal ne) brab ménagayas ménantéfor dob wayége atin léméngangoy mangéy dob dénsaane. <sup>8</sup> I de dumo do kuyugén ménfuray ro dob dénsaane ménda awang, gényud roy fukéte ménféno sédo. Enda mérayuén tidéw dob dénsaane, wén keey i siyow folo gémitroy kérayu ne. <sup>9</sup> Amun déméninggu ron, énggito roy mégébarawe aféy wén i féntanang de sédo. Wén soy fan de. <sup>10</sup> Atin bang Jesuse, “Uwit gom diniy dumoy de sédo énggédot gom.”

<sup>11</sup> Mélaw i Pedrowe ménénik dob awange inok gédoté noy fukéte. Tidéw béno, gényudén mangéy dob dénsaaney fukéte ménféno do dakél sédo. Fiyon fo ké ménféno bé dakéle sédo, mératuh bra limo folo bra téléw, énda ménkusi i fukét ruwe. <sup>12</sup> Atin bang Jesuse bero, “Énggomén, mama tom.” Enda i ségétéw bé de kuyugén émbaraw

ménénginsa ké ati Beene ni, non énggétiga ron Beeney Jesuse Kadnan. <sup>13</sup>Mélaw i Jesuse ménfégedét dob fane brab méndot de brab bénaadén dob berowe, loo soy de sédo.

<sup>14</sup> Been i niy gétéléwe gule méntéfégitoy Jesuse dob de kuyugén tidéw bé kétébule ne.

*I Jesuse brab Pedrowe*

<sup>15</sup> Amun énggilid ron mama, ménénginsa i Jesuse dob Simon Pedrowe mano, “Simon, nga Jonas, aw toow na fo méimu go Begén bé kéimu i kéluhanay de ni Begén?”

Séménumbul i Pedrowe mano, “Hoo Kadnan, gétiga moy kéimu guwe Beem.”

Atin bang Jesuse, “Fagifatém i de bili-bili gu.” <sup>16</sup> Tidéw béno, ménénginsa man i Jesuse mano, “Simon, nga Jonas, aw toow fo méimu go Begén?”

Séménumbul man i Pedrowe mano, “Hoo Kadnan, gétiga moy kéimu guwe Beem.”

Atin bang Jesuse, “Fagifatém i de bili-bili gu.” <sup>17</sup> Atin ménénginsa i Jesuse bé gétéléw ne gule mano, “Simon, nga Jonas, aw méimu go Begén?” Méntete i fédéw Pedrowe non fénénginsaa Jesuse gétéléw gule mano, “Aw méimu go Begén?”

Mélaw séménumbul i Pedrowe mano, “Kadnan, gétiga moy kéluhanane, gétiga moy kéimu guwe Beem.”

Atin bang Jesuse, “Fagifatém i de bili-bili gu. <sup>18</sup> Béréhé ku beem i toowe, amun ménguwéd go séna, géikéto moy sintoro muwe, atin mangéy go dob kétaya muwe ayo mo. Endob buluk lukés gon, ségérin go kémawa, atin ségiyoy marake beem atin uwité no beem mangéy dob kéikaa muwe ayo mo.” <sup>19</sup> (Bénréh Jesusey ni dob Pedrowe nuretén i atiy féglélu ne funay Tuluse émbantug.) Tidéw béno, bang Jesuse bé Pedrowe, “Furay go Begén.”

<sup>20</sup> Atin séménling i Pedrowe, atin énggito noy toowe ni fo kégedawa Jesuse kuyugén, sani kuyuge ménfégedét dob Jesuse bé kéama ruwe dob kékandulie brab ménénginsa mano, “Kadnan, ati émfékéfoe Beem?” <sup>21</sup> I Pedrowe, amun énggito noy ni ségétéw kuyug, ménénginsa dob Jesuse mano, “Ati mosoy géagéwoy ni étéw?”

<sup>22</sup> Séménumbul i Jesuse mano, “Amuk méuyotu de ké méuyag taman bé késéfule guwe dob duniyae ni, ati mélaw i kaame de? Furay go Begén.”

<sup>23</sup> Sabaf mélaw bé ni, ménlégeb dob de kuyug Jesuse i urete bé i ni kuyug énda kun méléhuén. Endob békén bénréh Jesuse ké énda méléhuén. I bénréh Jesuse saén mano, “Amuk méuyotu de ké méuyag taman bé késéfule guwe, ati mélaw i kaame de?”

<sup>24</sup> Begéney nan kuyug Jesuse bénrého no! Enggito guy kéluhanay de ni ménrigo brab sénulat gu dob ni. Atin gétiga key i kéluhanay de ni ménsulat toow fo toow.

<sup>25</sup> Médoow nay de éntingayén rénigo Jesuse tidéw bé de ni. Endob amuk sulatén kéluhanan, kloh sa keeyén i duniyae fégonon bé kéluhanay librowe ménsulat.

## I de Rénigoy de Apostol

I ni sulat, been i niy fétausoy Fiyowe Uret sénulat Lukase. I Lukase, been i ségétéwe doktor. Atin sénulatén i ni dob ségétéwe gérotor étéw féndawét Teofilo.

Been i niy sulate fantag bé de rénigoy de kuyug Jesus amun déméniyatén i Jesuse. Féndawét Jesuse bero “do apostol” non sénuguén bero inok muret ro. (I atag i “apostole” sénugu.) Sénulat Lukasey fantage bé de rénigoy de apostol brab de kébéreh ro. I galbék i de apostol, been i kéurete bé Fiyowe Uret fantag bé Jesuse inok géunur i de étéw dob Beene.

I Rémogor i Tuluse, Been i téménabangane bé de apostol inok gérigono roy de mékégaif brab inok émaraw ro muret fantag bé Jesuse.

### <sup>1</sup> Teofilo,

Dob sunguwe libro gu, sénulat gu dob beemey fantage bé kéluhanay de rénigo Jesus brab de ténoroeén tidéw dob gaiwe féngganayén i kégalbék ne, <sup>2</sup> taman dob gaiwe féndiyat i Tulusey Jesuse mangéy dob lawayo. Amun énda séna déméniyatén de, fénémanduo no bé barakat i Rémogor i Tulusey de fénémilién do kuyugén féndawét do Apostol (i atag i ni do sénugu). <sup>3</sup> Méntéfégitoy Jesuse dob berowe médoos gule tidéw bé kéléhu ne taman fot folo gétérsangan inok toow fo gétiga ro méntébule. Dob de ni do gai méntéfégito dob berowe, ténoroeén i fantage bé kéféguléw i Tuluse. <sup>4</sup> Atin amun ménsélimud i Jesuse beroy de kuyugén bénréhén bero mano, “Kagom séna tékédan dob Jerusalem. Endob ongot-ongot gom i fénasad i Abay guwe begom, sani bénréh guwe nén begom. <sup>5</sup> I Juane ménautis bé wayége éndob éndaén mérugayén bautison gom bé Rémogor i Tuluse.”

<sup>6</sup> Wén i no ségiyo gai ménsélimud i Jesuse beroy de apostol. Atin fénénginsaa ro maro, “Kadnan, aw béleewe ni bay gaiwe fésféuleé moy kuwagibe émfétingéw bé ingéd tome Israel?”

<sup>7</sup> Séménumbul i Jesuse mano, “Békénéén fatut gétiga kom i de gai non i Abay guwe saén i wéne aturano bé de gai. <sup>8</sup> Endob amuk gégumah i Rémogor i Tuluse dob begome, waléy gom barakatan. Atin mélaw begomey murete fantag bé Begéne dob de étéw dob Jerusalem, brab dob kéluhanay de ingéd dob Judea brab Samaria, brab dob kéluhanay de ingéd dob duniyae ni.”

### *I kédiyat Jesuse*

<sup>9</sup> Amun énggilid Jesuse bénréh i ni, féndiyat i Tulusey Jesuse mangéy dob lawayo atin ténéngténg ro taman méntélibéw bé de

rawén. <sup>10</sup> Amun déméniyatén i Jesuse, i lala ruwe séna léméngag dob lawayo, tékow méntéfégitoy ruwowe gétéw lagéy kéménégal ro fute téménindég diyo dob sékulo ruwe.

<sup>11</sup> Brab ménbéréh ro maro, “Do étéw tidéw Galilea, sedek léméngag gom saréw dob lawayo? I Tuluse féndiyatén i Jesuse mangéy dob lawayo, atin séfule so moso loo bé kégitto gome de déméniyat.”

<sup>12</sup> Tidéw béno, i de apostol ménséfulé ro mangéy Jerusalem tidéw dob tuduke féndawét Olibo, ségékilometroy kérayu ne.

<sup>13</sup> Amun énggéngumah ron dob ayo ruwe ni ingéd, méntaus ro dob sibéye dob rotor i lawie gono ro bati. I de ni ro Pedro, Juan, Santiago, Andres, Filipi, Tomas, Bartolome, Mateo, Santiago nga Alfeo, Simon sani ségétéwe toow fo gulaané noy ingéd ne, brab Judas nga Santiago. <sup>14</sup> Sénga tékélid sélimud ro inok démasal ro beroy de libun brab Mariahe idéng Jesuse, loo soy de tuwaréy Jesus do lagéy.

<sup>15</sup> Amun ménifus i firoye gétérsangan, ménsélimud i de munur bé Jesuse, wén i mératuh bra ruwo folo gétéw. Atin téménindég dob téngaanga ruwey Pedrowe brab ménbéréh mano, <sup>16</sup> “Do dumo gu, énda fakayén ké énda métuman i Ménsulate Kébéréh i Tuluse, fénbéréh i Rémogor i Tuluse bé Datu Dabidey fantage bé Judase, sani ménuwite bé de kéménéfo bé Jesuse. <sup>17</sup> I Judase, ségétéw betom, brab fénémili ménamung bé galbék tome.” Been i bénréh Pedrowe.

<sup>18</sup> Atin i kurtae énggédotén bé ni tete rénigo no bé Jesuse fénggébéléyén fantad, atin diyo ménlawu brab ménléhu non ménbétus i sur ne atin méntandég i de téneekén. <sup>19</sup> Atin énggélíngoooy kéluhanay de étéw dob Jerusalem i ni ménrigo, mélaw féndawét roy ni fantad “Akeldama”, dob karowe késébéréh. (I atag ne “Démara fantad”.)

<sup>20</sup> Féntaus Pedrowey kébéreh ne mano, “Sénulat dob de Kanta tidéw dob Ménsulate Kébéréh i Tuluse mano, ‘I lawi ne taus i kétagake de damén atin énda i bati diyo fiyon ségétéw.’ Brab ménsulat so mano, ‘Wén damén i émfétaus bé galbék ne.’

<sup>21-22</sup> “Mélaw,” bang Pedrowe, “fatut mémili tom ségétéw mantu dumo tom muret fantag bé kétébule Jesuse. Fatut beeney étéwe dumo tom ménséodor-odor bé kédinny Kadna tome séna, tidéw bé kéuret Juane bé kébautis ne taman bé kédiyat Jesuse mangéy dob lawayo.”

<sup>23</sup> Mélaw ménémili ro ruwo gétéw lagéy, ro Matias bero Jose Barsabas (féndawét so Justo). <sup>24</sup> Tidéw béno déménasal ro maro, “Kadnan, gétiga moy féféw i kéluhanay étéwe. Mélaw féfégétiga mo begéy ké ati isuwe fénémiliém bé de ruwo ni gétéw, <sup>25</sup> inok

waléy apostol brab mamung émfétaus bé galbéke ténagak Judase amun ménuléén mangéy dob gonone fatut ayono.”<sup>26</sup> Tidéw béno, sénbunuto ro atin ménfémili i Matiase. Mélaw i Matiase ménwaléy apostol beroy de folo bra sébaan, brab ménamung bero.

## 2

### *I kégumah i Rémogor i Tuluse*

<sup>1</sup> Amun énggumahén i gaiy kékanduli ruwe féndawét Pentekostes, i kéluhanay de méginugut bé Jesuse, ménsélimud ro dob sébaane gonon. <sup>2</sup> Atin tékow wén i énggélíngoo ro tidéw dob lawayo toow fo métanug maak émbagé réfuruh. Atin ménlégeb dob lawie gonon ro ménsar. <sup>3</sup> Tidéw béno, énggito roy de maak dila rino aféy ménlégeb brab méntéगतat dob bumbunoy séngae ségétéw bero. <sup>4</sup> Atin fénémanduoy Rémogor i Tuluse bero. Atin ménsébéréh-béréh ro do séségiyo-giyo do késébéréh non fénbéréh i Rémogor i Tuluse bero.

<sup>5</sup> Dob Jerusalem, wén i do Judio do méngintulus ménbati diyo. Tidéw ro dob de séségiyo-giyo ingéd dob duniyae. <sup>6</sup> Amun énggélíngoo roy ni démégúés, médooy de étéw ménangéy diyo brab ménsélimud ro. Brab ménkéségiyanon ro non amun ménsébéréh i de étéw méginugut bé Jesuse, i séngae étéw énggélíngoo noy kaane késébéréh. <sup>7</sup> Non toow fo ménkéségiyanon ro, ménséfénginsa ro maro, “Aw ati ni? Aw békén ba kéluhanay de ni do étéw tidéw ro Galilea?” <sup>8</sup> Sedek gélingoo tom bero sébéréh bé kéluhanay de késébéréh dob de ingéd ténidéw tom? <sup>9</sup> Tidéw tom dob Partia, dob Media, dob Elam, dob Mesopotamia, dob Judea, dob Kapadosia, dob Ponto, dob Asia. <sup>10</sup> Dob Frigia, dob Pamfilia, dob Egipto, dob de ingéd sakuf i ingéde Libia gedét dob Siren, brab dob Roma, <sup>11</sup> do Judio brab do békén do Judio éndob ménwaléy do munur bé kétoro i de Judio. Tidéw tom dob Kreta, brab dob Arabia. Atin i séngae ségétéw betom énggélíngoo no bero sébéréh-béréh dob kaane késébéréh fantag bé toowe fo mékégaif rénigoy Tuluse.” <sup>12</sup> Atin toow fo ménggaif ro brab énda énggésobuto roy ni ménrigo. Mélaw ménséfénginsa ro maro, “Ati atag i ni ménrigo?”

<sup>13</sup> Endob i de dumo do étéw déniyangka roy de kuyug Jesus brab ménbéréh ro maro, “Molon i de ni do étéw.”

### *I kéuret Pedrowe*

<sup>14</sup> Tidéw béno, téménindég i Pedrowe beroy de folo bra sébaan do dumo no apostol brab ménbéréh métanug dob de ménsélimud étéw mano, “Do dumo gu do Judio brab kéluhanay de étéw bati dob Jerusalem, toow gom féngélingo i béréhé kuwe ni inok gésoboto kom. <sup>15</sup> I de ni do étéw énda molon ro loo bé kéfégitug gome de, non gérraraan lémwot

sénya térésange ni. <sup>16</sup> Endob méntuman béleewe niy béréh i méntélatéa sénarigoy Tuluse muret bé kébéréh ne féndawét Joel mano, <sup>17</sup> ‘Ay niy rigoné kuwe dob de tamfaday de gai, bang i Tuluse. Iray gu témantuy Rémogor guwe dob kéluhanay étéwe. Brab i de nga gom do lagéy brab libun, béréhé roy de kébéréh gu. Atin i de kénogo lagéy gom gito roy toowe tidéw dob Tuluse, brab i de lukés gom so gito roy toowe tidéw dob Tuluse amuk téméginéf ro. <sup>18</sup> Atin fiyon foy de sugu-sugué ku, do lagéy brab do libun, ureté roy kébéréh guwe non tantuno ku bero irayan bé Rémogor guwe. <sup>19</sup> Atin rémigowu do mékégaif dob lawayo brab dob fantade. Giton i darae, aféye, brab mégéfole bél. <sup>20</sup> Atin i térésange waléy délémón, brab i térésang kélungonone waléy furo maak dara. Been i niy mérigowe ké énda séna gégumah i émbantuge gaiy Kadnane kémukum. <sup>21</sup> Atin i kéluhanay mongote tabang dob Kadnane, méfukas ro dob de sala ro.’”

<sup>22</sup> Atin féntaus Pedrowey kébéréh ne mano, “Do dumo gu do Judio, féngélingo gom i ni! I Jesuse tidéw Nasaret, Beeney fénuwit i Tuluse. Atin i de mékégaif do galbék fénrigoy Tuluse de, been i féngétuwana kome bé i Jesuse, Beeney tidéwe dob Tuluse. Atin énggétuwa komén i ni non i kéluhanay de ni, ménrigo dob kérara gome. <sup>23</sup> Énggétigay Tulusey ati mérigowe non bénantak i Tuluse fékéfoén i Jesuse brab nirayén begom atin fénléhu gom fénkélabo bé de tete étéw dob kruse. <sup>24</sup> Endob i Tuluse ténébuléén i Jesuse brab ténungkasén tidéw dob kédwat i kéléhue non énda fo fakayén gétaus méléhu i Jesuse.

<sup>25</sup> “Loo bé béréh Dabide bé do géthang fantag bé Jesuse mano, ‘Démoyun gito guy Kadnane dob sékulo kuwe, Beeney dumo guwe dob kuwono kuwe, mélaw énda mégilaku. <sup>26</sup> Sabaf bé ni, toow fo fiyoy fédwé guwe brab béréhé kuy kéror guwe. Énda émbukuu bé lowoh guwe non wén i inam gu. <sup>27</sup> Non énda tagaké mo Begén dob gonoy de ménléhu. Brab énda fédayaé moy lowoh i fiyowe sugu-sugué mo ké mérénah. <sup>28</sup> Ténoroém begén i agéwone dob kéuyage. Atin sabaf bé Beem i dumo guwe, férororénu.’”

<sup>29</sup> Féntaus Pedrowey kébéréh ne mano, “Do dumo gu, toow fo béréhé ku begom i fantage bé katufua tome Dabid. I beene ménléhu brab lénébéng, atin taman béleewe ni ay ni soy lébéng ne. <sup>30</sup> Beeney ségétéwe sénarigoy Tuluse muret bé kébéréh ne. Atin énggétiga noy fénasad i Tuluse dob beene bé i ségétéwe bé de séfúén waléy datu loo bé beene. <sup>31</sup> Énggétiga Dabide ké ati rigonéy Tuluse, komon énggébérého noy fantage bé kétébule Kristowe mano, ‘Énda méntagakén dob gonoy de ménléhu brab énda mérénah i lowoh ne.’ <sup>32</sup> I Jesuse ni féntébule i Tuluse, brab kéluhana key énggégito bé ni. <sup>33</sup> Atin i

Abay ne Tulus, féndiyatén i Jesuse mangéy dob kuwono nuwe, sani toowe fo basanan gonon. Atin i Jesuse, éndotén dob Beeney Rémogor i Tuluse loo bé fénasad ne. Mélaw i gito gome brab gélingoo kome bé béniy barakat i Rémogor i Tuluse nirayén begey. <sup>34</sup> I bénréh Dabide, békén fantag bé lowoh ne non énda déméniyat i Dabide mangéy dob lawayo, éndob been i ménbéréh mano, 'Bénréh i Kadnane dob Kadna kuwe mano, sar go fingé dob kuwono kuwe, <sup>35</sup> taman tabana kuy de sébanil Beem.' <sup>36</sup> Mélaw, i de kéluhana tom do Judio, fatut gétuwa tom i Jesuse ni, sani kénlabo gome dob kruse, féndawét i Tulusey Kristowe Kadnan." Been i niy bénréh Pedrowe.

<sup>37</sup> I de étéw, amun énggelingoo roy ni, ménbuku i de fédéw ro. Atin ménénginsa ro dob Pedrowe brab dob de dumo no apostol maro, "Do dumo gey, ati fatute rigoné key?"

<sup>38</sup> Atin séménumbul i Pedrowe mano, "I séngae ségétéw begom fatut gesénule bé de salaén brab fébautis inok fégito noy kéunur ne bé Jesu Kristowe, inok i de salaén émfésagadan. Tidéw béno, i Tuluse irayén i Rémogor ne dob begome. <sup>39</sup> Non i ni fasad i Tuluse, katom brab kay de nga tom, brab kay kéluhanay de étéw dob de mérayu, non kay kéluhanay fénémili i Kadna tome Tulus munur dob Beene."

<sup>40</sup> Atin médooy nay bénréh Pedrowe bero fantag bé toowe brab fénfagayu no bero mano, "Sésuway gom bé de tete étéw inok énda mékukum gom so." <sup>41</sup> Atin médooy étéw ménunur bé kébéreh Pedrowe brab ménfébautis ro, brab labi ro téléw ngibu ménuman dob de kuyug Jesus bé béno. <sup>42</sup> Atin sénga tékélid féngélingoé roy kétoro i de apostol, atin ménséodor-odor ro maak do sétuwaréy ro. Brab séréngan ro mama brab démasal.

<sup>43</sup> Atin i de apostol, fénrigoy Tuluse bero do médooy mékégaif galbék, mélaw toow fo ménggaif i kéluhanay de étéw. <sup>44</sup> Atin i kéluhanay de munur bé Jesuse, démooy ro sélimud atin i kéluhanay de languntama ro séntukid-tukid ro. <sup>45</sup> Atin fénbéléy roy de fantad ro brab de tamuk ro inok sétukid-tukid ro loo bé atiy de kailanga ro. <sup>46</sup> Sénga fuweh sélimud ro dob lawi i Tuluse, brab séréngan ro mama dob de lawi ro. Brab lala ruwe mama, toow ro fo moror brab térifantad. <sup>47</sup> Sénga tékélid dayéwé roy Tuluse brab mégédaw i de étéw bero. Atin sénga fuweh umanay Kadnane bero bé de mantu ménfukas étéw.

### 3

*I kéuwaé bé fikate*

<sup>1</sup> Wén i no sébaan fuweh, géraaran lé mudug i térésange de, sani uras i kédasal i de Judio, i ro Pedrowe brab Juane ménangéy ro dob lawi i Tuluse. <sup>2</sup> Dob béngaway lawi i Tuluse féndawét "Fiyowé Fintu", wén i ségétéwé lagéy fikate tidéw fanay kéumahén. Sénga fuweh uwitéy de dumo no mangéy dob ni béngawan inok mongot limus dob de étéw mahur diyo. <sup>3</sup> Amun énggito noy ro Pedrowe brab Juane mahur, ménongot limus dob berowe. <sup>4</sup> Tidéw béno, ténéngténg ro Pedrowe brab Juane ni lagéy fikate brab ménbéréh i Pedrowe mano, "Enténgéng gey." <sup>5</sup> Mélaw ténéngténgéng bero, manok iraya ro kurta. <sup>6</sup> Endob i Pedrowe ni ménbéréh mano, "Enda i kurta gu taloo no bélowon, éndob iray gu beem i wéne dob begéne. Sabaf bé barakat i dawét Jesu Kristowe tidéw Nasaret, béréhé ku beem, agéw go!" <sup>7</sup> Atin génamak Pedrowey kuwonone kémerén brab féntindégén. Sonom béno, tékow ménbagér i de sékéyén. <sup>8</sup> Atin ménféngéngkew ténindég brab ménggéagéw. Atin ménahur dob lawi i Tuluse bero ro Pedrowe brab Juane, magéw brab sayaw-sayaw brab dayéwé noy Tuluse. <sup>9</sup> Atin énggitooy kéluhanay de étéw i ni lagéy magéw brab dayéwé noy Tuluse. <sup>10</sup> Atin amun énggélolo ron beeney fikate démooy mésar mongot limus dob "Fiyowé Fintu", toow ro fo ménggaif bé ni ménrigo dob beene.

<sup>11</sup> Atin i lala ne gémenamak dob ro Pedrowe brab dob Juane dob kuridore féndawét "Kuridor Solomone" ménfégédét lé méntu mangéy dob berowey kéluhanay de étéw non ménggaif ro bé ni ménrigo. <sup>12</sup> Amun énggito Pedrowey de étéw ni, ménbéréh dob berowe mano, "Do dumo gu do Judio, sedek ménggaif gom bé ni? Sedek téngténgé kom begey loo bé nan? Aw makom ké ménggéagéw i ni lagéy sabaf bé barakat geyé taloo no sabaf bé fiyowé kéféngintulus gey?" <sup>13</sup> Endob Been i Tuluse féngadafé Abrahame, Isak, brab Jakob, brab de katufua tom, i ménirayane toow fo gérotor barakat dob Jesuse, sénguén. Endob niray gom dob de gémamak kukuman, brab ménika gom de dob adafa Pilatowe inok kukumé no, fiyon fo ké ménuyot de témgangéy. <sup>14</sup> I Jesuse ni méntu brab énda i salaén, éndob ménika gom de brab énda féntangéy gom de. Yamula féntangéy gom uman i ségétéwé étéw ménméléhu. <sup>15</sup> Atin fénléhu gom i Jesuse sani miraye bé umule magufusa. Endob ténébule i Tuluse brab énggito gey i ni. <sup>16</sup> Barakat i dawét Jesusey énggéféadi-adiwe bé ni lagéy fikate géloko gom. Ménrigooy ni sabaf bé kéunur geyé bé Jesuse. Been i funa nuwe énggéagéw dob téngaanga kome.

<sup>17</sup> "Atin béleewe do dumo gu, gétiga ku énda énggétiga kom i rénigo gome brab de odoro tom bé kéféléhu gome bé Jesuse.



<sup>18</sup> Endob bé ni réningo gom, ténunay Tulusey bénréh i de sénarigo no muret bé kébéréh ne bé gétaho, bé i Kristowe fatut férasayén. <sup>19</sup> Mélaw tagak gom i de tete adat gom brab unur gom bé Tuluse inok fésagada no begom bé de sala gom. <sup>20</sup> Atin mélaw wén i do gai féfiyonéy Tulusey de fédéw gom. Atin féuwitén i Jesuse mangéy dob begome. Been i Kristowe, sani fénémili ne méguléw begom. <sup>21</sup> Atin béleewe, i Jesuse bati séna dob lawayo taman bé kégumah i gaiwe féantunéy Tulusey kéluhanane. Been i niy bénréh i de sénarigoy Tuluse muret bé kébéréh ne bé gétaho. <sup>22</sup> Non i Moisesé ménbéréh bé gétaho dob de Judio mano, 'I Tuluse sému gu moso ségétéw sarigo no loo bé begéne. Been i ségétéwe bé de séfu tom. Unuro kom i kéluhanay béréhé nuwe begom. <sup>23</sup> Atin i kéluhanay étéwe énda munur ro de, fégananéy Tuluse bero tidéw dob de étéwén, brab bisanané no bero.' Been i niy kébéréh Moisesé. <sup>24</sup> Bénréh i de dumo so sénarigoy Tulusey fantage bé de méri go bé de ni do gai, tidéw dob Samuele brab dob kéluhanay de énggétundug dob beene. <sup>25</sup> Atin i de fasad i Tuluse bénréh i de sénarigo no bé do géta h, kagom so. Atin kagom soy fasad i Tuluse dob de katufua kom. Non bénréhén dob Abraham mano, 'Féfiyoné kuy kéluhanay étéwe dob duniyae féngagéw dob de séfúém.' <sup>26</sup> Komon amun fén-uwit i Tulusey Kristowe, sénuguén sungu mangéy dob betome do Judio inok féfiyoné no betom bé kéfésénule ne betom bé de tete rigo né tom." Been i niy kébéréh Pedrowe.

#### 4

##### *I Pedrowe brab Juane dob adafay de kéfédéwan*

<sup>1</sup> Amun émbéréh sénay ro Pedrowe brab Juane dob de étéw, énggégumah i de fadi, brab kafitay de mantay bé lawi i Tuluse, brab de Saduseo sani de étéw énda munur ro bé kétébulee. <sup>2</sup> Atin ménkérít ro non téménoro ro Pedrowe brab Juane dob de étéw bé i Jesuse méntébu le. Mélaw fénggító ro wén i kétébule. <sup>3</sup> Mélaw kénéfo ro bero, atin non sémingkufén bé béno, fénrisu ro bero taman bé démo e de. <sup>4</sup> Endob médooy ménunure bé de étéw énggégélingo bé kébéréh Pedrowe, atin i de munur énggégumah limo ngibuy kédooy de lagéy de sali yu na bé de libun de. <sup>5</sup> Amun bé démo e de, ménsélimud dob Jerusalem i de odoroy de Judio brab de lukés bero brab de témoro kukuman. <sup>6</sup> Bero soy gérotore fadi féndawét Anas, brab Kaifas, brab Juan, brab Alejandro brab kéluhanay samung i ni gérotor fadi. <sup>7</sup> Atin féntindég roy de ruwo ni gétéw apostol dob adafa ruwe brab fénénginsaa ro bero maro, "Ati gefee bé barakate brab ati gefee bé dawéte fénggéri go gom bé ni?"

<sup>8</sup> Tidéw béno, fénémanduoy Rémogor i Tulusey Pedrowe atin mélaw séménumbul mano, "Do odoro key brab do lukés gey. <sup>9</sup> Amuk fénginsaa kom begey fantag bé fiyowe réningo gey dob ni lagéy fikar brab ati kéféadi-adi geye de, <sup>10</sup> féngétiga ku dob kéluhana kome brab dob kéluhanay de Judio. I funay ni lagéy téménindég dob adafa kome ménadi-adi, non bé barakat i dawét Jesu Kristowe tidéw Nasaret. Been i fénléhu gome dob kruse éndob ténébu le i Tuluse. <sup>11</sup> Wén i ménsulate fantag bé Jesuse dob Ménsulate Kébéréh i Tuluse mano, 'I batéwe níkaa gom do rémigo lawi, been i ménwaléye toow fo mélaga batéw.' I Jesuse, Been i nan batéw níkaa kom. <sup>12</sup> Been saén i Mémukase," bang Pedrowe, "non énda i ségiyo dob duniyae ni géfukas bé étéwe."

<sup>13</sup> Toow fo ménggaif i de odoroy de Judio bé kébaraw ro Pedrowe brab Juane muret. Ménlabi na foy kégaif ruwe non énggétuwa roy énda i féngganad ro Pedrowe brab Juane. Atin mélaw énggélolo ro soy beroy de dumo Jesus. <sup>14</sup> Endob énda i gébéro ro, non énggító roy lagéy ni fikar ménadi-adi téménindég dob sékulo Pedrowe brab Juane. <sup>15</sup> Mélaw fénsut ro bero tidéw dob sénlimudo ruwe sibéy. Tidéw béno ménsébéréh-béréh ro maro, <sup>16</sup> "Ati kéri go tome bé de ni étéw? Non kéluhanay de étéw ni dob Jerusaleme ni, énggétiga roy mékégaife ni réningo ro. Mélaw énda gédirungo tom de. <sup>17</sup> Endob géléé tom saén bero bé éndaén béréhé roy fantage bé Jesuse inok énda métarakén."

<sup>18</sup> Mélaw ténawag ro man bero mahur brab bénrého ro bero bé békénén béréhé roy fantage bé Jesuse taloo no témoro ro labité roy dawét ne. <sup>19</sup> Endob i Pedrowe brab Juane séménumbul ro maro, "Fégitung gom ké ati isuwe méntintu dob adafay Tuluse, odoro key i kagome sugu loo ké odoro key i sugu i Tuluse. <sup>20</sup> Non énda fakayén témérén gey muret fantag bé énggító geye brab bé énggélingoo keye." <sup>21</sup> Endob i de odoron toow na fo féningkél roy kégélé ruwe bero bé békénén ureté roy fantage bé Jesuse. Tidéw béno, ténangéy ro bero. Enda gédusana ro bero non bé kédooy de étéw démayéw bé Tuluse sabaf bé mékégaife réningo ro. <sup>22</sup> Non i lagéy ni féni-adi-adi ro fotén folo gébélintuwa i idad ne, brab fikatéw tidéw fanay kéumahén.

<sup>23</sup> Amun méntangéyén i ro Pedrowe brab Juane, ménule ro mangéy dob de dumo ro munur bé Jesu Kristowe. Atin nuret roy kébéréh i odoroy de fadi brab de odoroy de Judio. <sup>24</sup> Amun énggélingoo roy ni, ménséréngan ro démasal dob Tuluso maro, "Kadnan, Beemey léménimbage bé lawaye brab fantade brab dogote brab kéluhanay éntingayéne. <sup>25</sup> Fénbéréh i Rémogor me bé

katufua keye Dabid sugu-sugué mo mano, 'Sedek ménkérít i de étéw békén Judio? Brab sedek bantakéy de étéw i éndae gérigono ro dob Tuluse?' <sup>26</sup> I de datu téménafay ro brab de méguléw dob duniyae ni ménsélimud ro inok sébanil ro bé Kadnane brab Kristowe fénuwitén.' Been i niy sénulat Dabide."

<sup>27</sup> Atin féntaus roy kédasal ruwe maro, "Méntuman i Ménsulate Kébéréhém non ménsélimud i ro Herode brab Ponsio Pilatowe dob ni ingéd beroy de étéw békén Judio brab de dumo gey Judio. Ménsélimud ro sébanil bé Jesuse sani fiyowe sugu-sugué mo fénmiléw méguléw. <sup>28</sup> Ménsélimud ro rémigo bé kéluhanay éntingayéne fatut mériigo dob kaame kétayan brab dob barakat me mériigo. <sup>29</sup> Atin bé béni Kadnan, fégitungém i de tete kébéreho ro begey brab tabanga mo begey do sugu-sugué mo inok émbaraw gey muret bé kébére me. <sup>30</sup> Brab fénuwitém i barakat me émféadi-adi brab émfériigo begey bé de mékégaif dob dawét i fiyowe sugu-sugué mo Jesus."

<sup>31</sup> Amun énggilid ron démasal, ménkuyung i lawie sénlimudo ro brab féndanduoy Rémogor i Tuluse bero. Tidéw béno, ménbaraw ron muret bé kébére i Tuluse.

#### *Séntukid-tukid roy de languntama ro*

<sup>32</sup> Atin i kéluhanay de munur bé Kristowe, ségiléw i de fédéw ro brab itunga ro. Atin énda i isu bero gefe bé de languntama ro, éndob falan karo kéluhanan non séntukid-tukid ro. <sup>33</sup> Atin wén i barakat i de apostol féntaus roy kéuret ruwe fantag bé kétébule i Kadnane Jesus. Brab i Tuluse toow fo mégédaw bero. <sup>34</sup> Atin énda i ségétéw bero wén i kulang bé kéfaguyag ne non fébéléy roy de fantad ro taloo no do lawi ro atin i kurtae gédoté ro, <sup>35</sup> iray ro dob de apostol. Atin saaré roy kurtae dob katabuwané kailan-gay kéluhanane.

<sup>36</sup> Atin wén i ségétéwe bero féndawét Jose. Beeney ségétéwe tidéw Siprus brab séfu i Lebitawe. Féndawét i de apostol so "Bernabe". (I atag i ni "Ségétéw émféfiyo fédéw".) <sup>37</sup> Fénbéléyéni i fantad ne atin nirayén dob de apostol i kurtae de.

## 5

### *Ananias brab Safira*

<sup>1</sup> Wén i ségétéwe lagéy féndawét Ananias, beroy bawag ne féndawét Safira, fénbéléy roy dumoy fantad ruwe. <sup>2</sup> Endob nitongén i dumoy kurtae brab ménagayun soy bawag ne de. Atin nirayén i sama i kurtae dob de apostol. Endob bénréhén bé nirayén i kéluhanane. <sup>3</sup> Mélaw bénréh Pedrowe dob beene mano, "Ananias, sedek féndayaém i Satanase mémanduon beem? Non téménugi go dob Rémogor i Tuluse, non nitongém i dumoy kurtae énggédotém bé fénbéléy me

fantad. <sup>4</sup> Amun énda séna fénbéléyéni i fantad me, beem i gefee de. Atin amun fénbéléy mon, kaam soy kurtae de. Endob sedek bénantakém rénigoy ni? Békén téménugi go dob étéwe, yamula dob Tuluse téménugi gol!" <sup>5</sup> Amun énggélíngoo Ananiasey ni, méntuwar brab ménléhu. Atin i kéluhanay de énggégélingo fantag bé ni, toow ro fo ménggilak. <sup>6</sup> Atin ménahur i de kénogo lagéy brab éndot roy bangkay ne brab bénaus ro atin nangéy ro lénébéng.

<sup>7</sup> Amun ménifus i téléwe géuras, énggumah i bawag ne, éndob énda séna énggégétiiga noy ati ménrigowe. <sup>8</sup> Tidéw béno, fénénginsaa Pedrowe mano, "Béréhém begén, aw been say niy kurtae énggédot i fantad gome?"

Atin séménumbul mano, "Hoo, been say nan."

<sup>9</sup> Mélaw bénréh Pedrowe de mano, "Sedek ténéngkad gom i Rémogor i Tuluse? I bawag me mantu séna ménléhu atin i de ménangéy de lémbéng, ay nan ron dob liyuwan, brab i beeme témundug so." <sup>10</sup> Sonom béno, méntuwar so brab ménléhu dob adafa Pedrowe. Amun ménahur i de kénogo lagéy, énggito ro ménléhuén. Mélaw nangéy ro so lénébéng dob doror i bawag ne. <sup>11</sup> Atin toow fo méngkégilakan i kéluhanay de munur bé Kristowe, loo soy de kéluhanay de ségiyo étéw énggégélingo bé ni.

#### *Médooy de mékégaif*

<sup>12</sup> Atin i de apostol, médooy de mékégaif rénigo ro énggitoy de étéw. Brab i kéluhanay de munur bé Kristowe ménsélimud ro diyo dob "Kuridor Solomone" dob lawi i Tuluse. <sup>13</sup> Enda i ségétéw ménamung bé de énda munur bé Kristowe, fiyon fo ké fiyoy kébére i de étéw fantag bé de munur. <sup>14</sup> Endob minut médooy de étéw do lagéy brab do libun munur bé Kadnane. <sup>15</sup> Atin ménbantug i de mékégaif rénigoy de apostol. Mélaw nuwit i de étéw dob de aguwon i de déméruun. Féniro ro bero dob de katri brab dob de bénekah ikam inok buluk témara i Pedrowe, gébéla i anlung ne dob berowe. <sup>16</sup> Atin énggumah soy médoowe étéw tidéw dob de kloh ingéd géliwét dob Jerusalem. Brab nuwit roy de déméruun bero brab de étéw rénahukoy de saitan. Atin kéluhana ro ménadi-adi.

#### *I kérasay i de apostol*

<sup>17</sup> Tidéw béno, i gérotore fadi brab de dumo no sani de Saduseo, méndaléw ro bé de apostol. Mélaw ménséfagayun ro bé rígoné ruwe. <sup>18</sup> Atin kénéfo roy de apostol brab féniro ro bero. <sup>19</sup> Endob bé béno kélungonon, nungka i télakiy Kadnaney de béngaway férisunone. Tidéw béno nuwitén bero mésut brab bénréhén mano, <sup>20</sup> "Taus gom dob lawi i Tuluse brab uret gom dob de étéw i fantage bé ni mantu umul." <sup>21</sup> Tidéw

béno, nodoroy de apostol i bénréh i télakiwe ni. Mélaw amun géfuwénén, ménahur ro dob lawi i Tuluse brab téménoro ro.

Atin i gérotore fadi brab de dumo no, ténawag roy de odoroy de Judio inok sélimud i de kéfédeWAY de Judio. Tidéw béno, séménugu ro mangéy dob férisunone inok uwité roy de apostol mangéy dob adafa ruwe. <sup>22</sup> Endob amun énggumah i de sénugu dob férisunone, énda énggito roy de apostol. Mélaw ménséfule ro mangéy dob de kéfédeWAN do ménlimud brab nuret ro maro, <sup>23</sup> “Amun énggégumah gey dob férisunone, énggito gey i de béngawan do ménkando brab diyo soy de guwardiya mantay dob liyuwe. Endob amun nungka gey, énda i énggito gey étéw dob rahure.” <sup>24</sup> Mélaw i de odoroy de fadi brab kafitane odoroy de guwardiya bé lawi i Tuluse, amun énggélíngoo roy ni, toow ro fo ménggaif. Atin fégitungé roy ati énggéríngoy de apostol. <sup>25</sup> Tidéw béno, wén i énggégumaha ménlok dob berowe mano, “I de lagéy do férisu gom, diyo ro témoro bé de étéw dob lawi i Tuluse.” <sup>26</sup> Mélaw ménangéy i kafitane dob lawi i Tuluse beroy de guwardiya no. Atin kénéfo roy de apostol brab nuwit ro séfule. Endob énda féndawéto ro bero non mégilak ro bé de étéw diyo ké íbéro ro bero batéw inok féléhué ro bero.

<sup>27</sup> Nuwit roy de apostol mangéy dob adafay de ménlimud do odoron. Atin i gérotore fadi ménbéréh dob bero mano, <sup>28</sup> “Génlé geyén begom bé kagoméN témoro fantag bé Jesuse, éndob énda nodoro kom de. Téngténg gom, ménlégébén dob Jerusaleme niy kétoro gome, atin bénréh gom, begey i ménméléhue bé Jesuse.”

<sup>29</sup> Endob séménumbul i Pedrowe brab de dumo no do apostol maro, “Fatut odoro key i Tuluse, békén étéw. <sup>30</sup> Amun énggilid gomén fénléhu i Jesuse bé kékélabo gome de dob kruse, i Tulus i de katufua tom i ménfétébulee de. <sup>31</sup> Atin féndiyat i Tuluse mangéy dob kuwono nuwe inok Been i Méguléwe brab Mémukase. Mélaw Been i émfésagade bé de sala tom do Judio amuk gésénule tom. <sup>32</sup> Géureto key i de ni non énggito gey, loo soy Rémogor i Tuluse muret, saní Rémogore iray i Tuluse dob de étéw munur dob Beene.”

<sup>33</sup> Atin i de odoron ni ménlimud, amun énggélíngoo roy ni, toow ro fo ménkérit brab ménuoyt ro ké féléhuén i de apostol ni. <sup>34</sup> Endob i ségétéwe bé de Fariseo féndawét Gamaliel téménindég dob kérara ruwe ménlimud. Beeney témoroé bé kitabe brab toow fo fégadatay de étéw. Atin fénfésutén i de apostol. <sup>35</sup> Tidéw béno ménbéréh mano, “Do dumo gu do Judio, ingata kom ké ati kérigo gome bé de ni do étéw. <sup>36</sup> Bé do gétaH wén i ségétéwe

étéw féndawét Teudas, ménbéréh been kun i toowe ménbantug gérotor étéw. Atin fot ratuh gétéw i ménwaléye kuyugén. Endob wén i ménméléhu de atin i de kuyugén ménbéragar ro brab énda i énggéríngoy ro. <sup>37</sup> Tidéw béno, dob de gaiy késinuse bé émfélistay kéluhanay de étéw, énggumah man i ségétéwe étéw féndawét Judas tidéw Galilea. Atin médooy soy ménwaléye kuyugén. Endob amun fénléhu soy Judase, ménbéragar soy de kuyugén. <sup>38</sup> Ségiléw so keeyén bé kéléhu Jesuse. Mélaw béréhé ku begom, katom kémukum brab fédayaé tomén i de ni do étéw. Non amuk aturay kéilawane saén, énda soy gérigono ro brab énda i rugaya ro. <sup>39</sup> Endob amuk aturay Tuluse, énda gégéléo tom bero, non waléy tom saén sébanil bé Tuluse.”

Atin i de ménlimud do kéfédeWAN, ménagayun ro bé bénréh Gamaliele ni. <sup>40</sup> Tidéw béno, fénahur ron man i de apostol brab féntafés ro bero. Atin génlé ron man bero bé békénén muret ro fantag bé Jesuse. Tidéw béno, ténangéy ro bero. <sup>41</sup> I de apostol amun ménsut ron tidéw dob de ménlimud do odoron, toow ro fo ménoror non kénarang i Tuluse médait ro kéfasangan brab kémalaman sabaf bé kéunur ruwe bé Jesu Kristowe. <sup>42</sup> Atin sénga fuweh ménangéy ro dob lawi i Tuluse brab dob de lawi i de étéw. Atin diyo ro témoro bé Fiyowe Uret fantag bé Jesu Kristowe.

## 6

### *I de fitéw gétéw do témabang*

<sup>1</sup> Bé do no do gai, amun minútén médooy de munur bé Kristowe, wén i de tete kégébaa no bé de munur do Judio do sébéréh Griego dob de munur do Judio do sébéréh Hebreo. Ménbéréh i de Judio do sébéréh Griego bé émfédaya kun i de baléw bero, énda méirayan ro bé de kailanga ro sénga fuweh. <sup>2</sup> Mélaw i de folo bra ruwo gétéw do apostol ténimu roy kéluhanay de munur bé Kristowe brab bénréh ro dob berowe maro, “Enda fiyo no ké begey i sémaare bé de kailanga kom sénga fuweh, non fatut gey démooyun muret bé kébéréh i Tuluse, brab énda fatut diguré key i galbék geye. <sup>3</sup> Mélaw do dumo gey, fémilí gom fitéw gétéw lagéy, do métilédéd brab fémanduoy Rémogor i Tuluse. Atin iray gey beroy aturane bé de ni, <sup>4</sup> inok i begeye do apostol fakay gey démasal brab muret fantag bé Tuluse sénga tékélid.”

<sup>5</sup> Atin ménagayun i kéluhana ruwe bé bénréh i de apostol ni. Mélaw fénémili roy Estebane, ségétéw méégét i kéunur ne brab fémanduoy Rémogor i Tuluse. Fénémili ro soy ro Filipihe, Prokoro, Nikanor, Timon, Parmenas, brab Nikolas tidéw Antiokia ségétéw békén Judio, éndob ménrugayén i kéunur ne bé kukumay de Judio. <sup>6</sup> Atin nuwit ro bero

mangéy dob de apostol. Tidéw béno, ténégéy de apostol i de bumbuna ro bé kédasala ruwe bero inok tabangay Tuluse bero bé manuwe ni aturan.

<sup>7</sup> Atin mélaw ménlégébén i urete fantag bé Tuluse. Atin minút médooy munure bé Kristowe dob Jerusalem. Atin médoonén i de fadi méganay so munur.

### *I kékéfoe bé Estebane*

<sup>8</sup> Atin i Estebane toow fo fénfiyoy Tuluse inok wén i barakatén rémigo do mékégaif dob téngangay de étéw. <sup>9</sup> Endob wén i de étéw ménsébanil bé Estebane. Beroy de étéw dob simbaane féndawét “Méntangéy étéw”. I de dumo bero do Judio tidéw Siren, brab tidéw Alejandria, I de ni do étéw beroy de dumoy de Judio tidéw. Silika brab Asia, méngganay ro séédél bé Estebane. <sup>10</sup> Endob toow fo fénggétigay Rémogor i Tulusey Estebane émbéréh. Mélaw énda i ségétéw gésumbul bero. <sup>11</sup> Mélaw niraya ro kurta i de étéw inok béréhé roy éndae toow fantag bé Estebane maro, “Enggélíngoo key i ni étéw ménbéréh tete fantag bé Moisesse brab Tuluse.” <sup>12</sup> Mélaw fénkérit roy de étéw brab de odoroy de Judio brab de témoro kitab. Atin kénéfo roy Estebane brab nuwit ro dob adafay de ménlimud do kéfédéwan. <sup>13</sup> Tidéw béno, nuwit roy de étéw émbéréh bé éndae toow fantag bé Estebane maro, “I Estebane ni démoyon émbéréh tete fantag bé mékéféfuwe lawi i Tuluse brab de kukuman sénulat Moisesse. <sup>14</sup> Enggélíngoo key bénréhén bé i Jesuse tidéw Nasaret, gébaé no kun i lawi i Tuluse brab fégaliné noy adate énggéféganada tom tidéw dob Moisesse.” <sup>15</sup> Tidéw béno, ténéngténg i kéluhanay de odoron i Estebane. Atin énggito roy rangih ne maak falas télaki.

## 3

### *I kéuret Estebane*

<sup>1</sup> Mélaw i gérotore fadi fénénginsaa noy Estebane mano, “Aw toow i de ni?”

<sup>2</sup> Atin séménumbul i Estebane mano, “Do dumo gu brab do lukés gu, fégélingo gom i béréhé kuwe ni. I toowe fo ménbantug barakatan Tulus méntéfégito dob katufua tome Abraham amun bati de séna dob Mesopotamia, bé énda séna ménagéwén de mangéy Haran. <sup>3</sup> Atin bénréhén de mano, “Tagakém i de samungém brab ingéd me atin agéw go mangéy dob gonone toroé ku beam.” <sup>4</sup> Mélaw ténagakén i ingéd ne Kaldeo brab ménagéw mangéy Haran, atin diyo ménbati. Atin amun ménléhu i boh Abraham, féngagéw i Tuluse man mangéy dob ni ingéd gono kom bati béleewe ni. <sup>5</sup> Bé do no do gai, énda nirayay Tulusey Abraham fantad fiyon kloh. Endob fénasad i Tuluse dob Abraham bé irayén dey ni fantad brab dob

de séfuén témundug de, fiyon fo ké énda sénay nga Abraham de. <sup>6</sup> Ay niy bénréh i Tuluse bé Abrahamé mano, ‘I de séfuém bati ro dob ségiyowe ingéd toow fo mérayu atin waléy ro do rifén diyo. Atin mérasay ro taman fot ratuh gébélintuwa. <sup>7</sup> Endob kukumé kuy de étéw rémifén bero. Atin i de séfuém tékédan ro dob nan ingéd atin féngadafé ro Begén dob ni gonon.’ Been i niy bénréh i Tuluse.” <sup>8</sup> Atin féntaus Estebaney kébéreh ne mano, “Tidéw béno, sénugu i Tuluse dob Abrahaméy ni adat sani kétulie inok wén i tanda bé ni fasad. Mélaw ténuli Abrahaméy nga ne Isak amun ménwaléwén gétérésangan ménumah. Atin i Isake ténulién soy nga ne Jakob. Atin i Jakobe ténulién soy de folo bra ruwo gétéw ngaén. Atin beroy de katufua tom do Judio.

<sup>9</sup> “Endob i de nga Jakob méndaléw ro bé tuwaréy ruwe féndawét Jose. Mélaw fénbéléy ro atin ménwaléy rifén dob ingéde Egipto. Endob Tulus i dumo nuwe. <sup>10</sup> Atin ténabangay Tuluse inok énda i sug-sugén fiyon fo ké médooy kérégénéne. Atin amun diyo i Josehe dob adafay datue dob Egipto, fénfiyoy Tuluse brab niraya no kégetuwan. Mélaw ménuyot i datue de. Tidéw béno fénwaléy i datuey Josehe odoron dob no ingéd brab beene soy odorone dob lawi i datue ni. <sup>11</sup> Tidéw béno, énggumab i dakéle lénggob dob ingéde Egipto brab dob Kanaan. Atin toow ro fo ménrasay. Atin i de katufua tom énda i amaé ro. <sup>12</sup> Mélaw amun énggélíngoo Jakobe wén i faréy dob Egipto, sénguguén i de ngaén, sani de katufua tom mangéy diyo bé gésungu nuwe. <sup>13</sup> Dob géruwo nuwe gule ménangéy ro diyo, méntéfégéloloy Josehe dob de dumo no sétaman boh. Atin énggétuway datuey fantage bé de samung Jose. <sup>14</sup> Mélaw fénsamfay Josehey kébéreh ne bé féangyéyén i boh ne Jakob brab kéluhanay de samungén. Atin fitéw ro folo bra limo kéluhanan. <sup>15</sup> Tidéw béno, ménagéw i ro Jakobe mangéy Egipto. Atin diyo ménléhu loo soy de ségiyo katufua tom. <sup>16</sup> Atin nuwit i de bangkay ro mangéy Sekem, atin lébéngéng ro dob lébéngone bénléy Abrahamé dob de étéw Hamor.”

<sup>17</sup> Atin féntaus Estebaney kébéreh ne mano, “Amun gédétén i gaiwe métuman i fasad i Tuluse dob Abrahamé, toowén fo médooy de Judio dob Egipto. <sup>18</sup> Atin bé béno, ségiyonén i datue dob Egipto, atin énda énggétiga noy fantage bé Josehe. <sup>19</sup> Enda fo fiyoy ni datu. Fénggakara noy de katufua tom. Atin fénrasyén fo bero toow. Non fénégésén i de katufua tom bé ibéré roy de nga ro inok méléhu. <sup>20</sup> Atin bé no do gai, ménumah i Moisesse, toow fo fiyo nga. Rénitoy idéng ne sungu dob lawi ruwe taman téléw gétérésang kélungonon. <sup>21</sup> Amun féniyu roy ngaé dob lawie, éndot i libune nga

i datue dob Egipto. Atin fénagifatén maak kaan so nga. <sup>22</sup> Mélaw méntoro i Moisesse bé kéluhanay kégetuwane dob Egipto. Atin ménwaléy énggétigan étéw dob de kébérehén brab manob de rignoné no.

<sup>23</sup> “Amun fotén folo gébélintuwa i Moisesse, ménuoyot témukaw bé de dumo no do Judio. <sup>24</sup> Atin amun énggumah dob de dumo no, énggito noy kéduway ségétéwe tidéw Egipto bé dumo nuwe Judio. Mélaw ténabangén i dumo nuwe ni Judio brab séménuli fénléhuén i étéwe tidéw Egipto. <sup>25</sup> Brab mano ké i de dumo no do Judio énggésobuto roy been i usaréy Tuluse témabang bero inok métagéy ro. Endob énda énggésobuto ro de. <sup>26</sup> Bé gétunduge de fuweh, énggito noy ruwowe gétéw Judio sétiboh. Atin génléén bero mano, ‘Kagom sétiboh! Ségiléw gom falan Judio.’ <sup>27</sup> Endob i ségétéwe de férasayé noy dumo nuwe ni, dénrién i Moisesse brab ménbéréh mano, ‘Békén beem i odoro keye taloo no kéfédéwa key. <sup>28</sup> Aw méuyot go méméléhu begén loo bé kéféléhu me bé ségétéwe tidéw Egipto natémégéno?’ <sup>29</sup> Amun énggélíngoo Moisessey ni, ménraréy tidéw Egipto brab ménangéy bati dob ingéde féndawét Madian. Atin diyo énggébawag brab wén i ngaén ruwo gétéw lagéy.”

<sup>30</sup> Atin féntaus Estebaney kébérehé ne mano, “Amun ménifus i fote folo gébélintuwa, méntéfégito dob Moisessey télakiwe dob mérinoe kayéw dob gonone énda i étéw de bati, gédét dob tuduke féndawét Sinai. <sup>31</sup> Toow fo ménggaif i Moisesse bé ni énggito no. Atin amun ménfégdédét inok gito no fo toow, énggélíngoo noy béréh i Kadnane mano, <sup>32</sup> ‘Begéney Tuluse fénéngadaf i de katufua kom, ro Abraham, Isak, brab Jakob.’ Atin i Moisesse léménukub bé kégilak ne brab éndaén géténgténgo no de. <sup>33</sup> Atin ménbéréh man i Kadnane mano, ‘Kéda moy sinilas me non i gono muwe témindég mékétéféu fantad. <sup>34</sup> Enggito guy kéférasaye bé de étéw gu dob Egipto. Brab énggélíngoo kuy de dogés ro. Mélaw ménlusu inok fétagéy gu bero. Atin béleewe, sugué ku beem magéw mangéy Egipto.’ ”

<sup>35</sup> Atin féntaus Estebaney kébérehé ne mano, “Nikaay de dumo no Judioy Moisesse bé kébérehé ruwe maro, ‘Békén beem i odoro key taloo no kéfédéwa key!’ Endob beeney sénugu i Tuluse méguléw bero brab émfétangéye bero. Atin i télakiwe méntéfégito dob beene dob mérinoe kayéw i téménabangane de. <sup>36</sup> Atin fénanangguwitén i de étéw mésut tidéw Egipto. Rénigo noy de mékégaif dob Egipto brab dob dogote féndawét ‘Furo Dogot’ brab dob gonone énda i bati diyo amun ménagéw ro diyo bé fote folo gébélintuwa. <sup>37</sup> Atin i Moisessey ménbéréh dob de Judio mano, ‘Emféuwit i Tuluse mangéy dob begome ségétéw sarigo

no muret bé kébérehé ne ségiléw bé kéféuwit ne begén. Been soy ségétéwe bé de séfu Israele.’ ”

<sup>38</sup> Atin féntaus Estebaney kébérehé ne mano, “Moisessey dumoy de Judio ménsélimud dob gonone énda i ségétéw étéw bati diyo, bero soy de katufua tom brab télakiwe ménsébéréh de dob tuduke Sinai. Brab beeney énggégédote bé kébérehé i Tuluse inok irayén so dob betome. I kébérehé i Tuluse ni énda mékéda no taman sa taman.

<sup>39</sup> “Endob i de katufua tom énda ménodor ro bé de sugu Moises. Yamula ménika ro de brab ménuoyot ro séfule mangéy Egipto. <sup>40</sup> Mélaw béréhé ro dob Arone sani ofo Moisesse maro, ‘Rigo go do kéninontow inok wén i féngadafé key, brab inok wén i manangguwit betom. Non énda gétiga key ké ati énggérigono Moisesse sani ménanangguwite betom tidéw Egipto.’ ”

<sup>41</sup> Atin féntaus Estebaney kébérehé ne mano, “Bé no do gai réménigo ro kéninontow maak falas nati safi. Atin téménulak ro dob adafa nuwe brab kénandulio ro inok fégito roy kéoror ruwe bé ni rénigo ro. <sup>42</sup> Endob sabaf bé ni, ténagak i Tuluse bero brab féndayaén bero méngadaf bé de gitoon dob lawayo loo bé sénulat i sénarigoy Tuluse féndawét Amos mano, ‘Do étéw Judio, békén Begén i ténulaka kome dob gonone énda i ségétéw de bati bé lala i kédiyo gome bé ménfote folo gébélintuwa. Yamula ségiyoy fénéngadaf gome. <sup>43</sup> Non nuwit gom i batioy sébaane tulus féndawét Molok brab sébaane kéninontow maak gitoon tulus féndawét Renfan. Do kéninontow i fénéngadaf gome, mélaw féangéy ku begom fingé na diyo bé ingéde Babilonia.’ ”

<sup>44</sup> Atin féntaus Estebaney kébérehé ne mano, “I de katufua tom wénéni i ginise lawi sani tandae énda tagakéy Tuluse bero. Nuwit ro amun ménagéw ro dob gonone énda i étéw de bati. Rénigo roy ni loo bé béréhé i Tuluse bé Moisesse, ségiléw bé fénggitoy Tuluse de. <sup>45</sup> Amun ménifus i firoye gébélintuwa, i de katufua tom énggédot roy ni tidéw dob de lukés ro. Atin i de katufua tom nuwit ro dob de ingéd ténaba ro bé gaiy kédédél i Tuluse bé de étéw mésut dob do no gonon inok wén i batioy de Judio. Atin i odoro ruwey lagéye féndawét Josue. Atin fénbati roy lawi i Tuluse diyo taman bé gai Datu Dabide. <sup>46</sup> Toow fo ménswat i Tuluse bé Dabide. Atin nongotén dob Tuluse inok tungkasé no rémigo bé lawi i Tuluse, sani Tuluse fénéngadaf Jakobe. <sup>47</sup> Endob i nga Datu Dabide féndawét Solomon i réménigowe bé nan lawi.

<sup>48</sup> “Endob béréhé ku begom, i toowe fo gérotor Tulus énda batién dob de lawi rénigoy kéilawane. Non béréhé i ségétéwe sénarigoy

Tuluse féndawét Isias mano, <sup>49</sup> ‘Bang i Tuluse, laway i sara kuwe, atin i duniyaey ténaa kuwe bé de sékéy gu. Enda i lawi gérigono kom inok batio ku taloo no téréno ka. <sup>50</sup> Békén ba Begén i réménagowe bé kéluhanay étingayéne?’ ”

<sup>51</sup> Atin féntaus Estebaney kébéreh ne mano, “Toow fo métégas i de uléw gom! Enda séna fo ménfégalin i de fédéw gom loo bé kétayay Tuluse. Brab toow gom fo do énda mégélingo bé kébéreh i Tuluse. Ségiléw gom so bé de katufua kom non atuh kom i Rémogor i Tuluse sénga tékélid. <sup>52</sup> I de katufua kom fénrasy roy kéluhanay de sénarigoy Tuluse muret bé kébéreh ne bé do géta. Fénléhu roy de sénugu i Tuluse muret fantag bé Kristowe sani méntintuwe fo Sugu-suguéy Tuluse. Atin i begome, kénéfo gom brab fénléhu gom i Kristowe. <sup>53</sup> Enggétangafa kom i de kukuman fénray i Tuluse bé de télaki, éndob énda nodoro kom de.” Been i niy bénréh Estebane.

### *I kéfélehue bé Estebane*

<sup>54</sup> Amun énggélingoy de odoron i kébéreh Estebane, toow ro fo ménkérit. Kémigét i de kifé ro bé kékérit ruwe. <sup>55</sup> Endob i Estebane toow fo fénémanduoy Rémogor i Tuluse, brab léménégag dob lawayo, atin énggito noy kéréndaw i Tuluse brab énggito noy Jesusé témindég dob kuwonoy Tuluse. <sup>56</sup> Atin ménbéreh i Estebane mano, “Téngténg gom! Enggito guy lawayo ménungka, brab i Nga i Kéilawane témindég fingé dob kuwonoy Tuluse.”

<sup>57</sup> Toow fo ménkérit i de odoron ni, mélaw néféng roy de kélingo ro brab ménékes ro. Atin sénréngana roy magayase de gémamak. <sup>58</sup> Atin séngguyud ro mésut dob ingéde ni brab nibéro ro batéw. Atin i de de témébo de, kéndra roy de géruwo lafin bé de kégal ro, atin fénléd ro dob kénogo lagéye féndawét Saulo. <sup>59</sup> Atin i lala ruwe mibéron batéw bé Estebane, déménasal dob Kadnane mano, “O Kadnan Jesus, tanggafém i rémogor guwe!” <sup>60</sup> Atin ménlingkuwéd brab ménbéreh métanug mano, “Kadnan, fésgadém i ni sala ro.” Sonom béno, ménléhu.

## 8

### *I kérasay i de munur*

<sup>1-2</sup> Atin i Saulowe ménagayun bé kéfélehue bé Estebane. Atin i Estebane, lénébéng i de étéw munur bé Kristowe brab toow fo rénuung ro. Atin méntidéwén bé no térésang i kékérasayay de munur bé Kristowe. Brab kéluhana ro, saliyo bé de apostol, ménbéragar ro tidéw Jerusalem mangéy Judia brab Samaria.

<sup>3</sup> Atin i Saulowe ténulama no binasanén i kéféngintulus i de munur bé Kristowe, ahuro noy séngae lawi brab kéfoé no séguyudén i

de étéw munur bé Kristowe. Brab uwité no bero dob férisunone, do lagéy brab do libun.

### *I kélégeb i Fiyowe Uret dob Samaria*

<sup>4</sup> Atin amun ménbéragar i de étéw munur bé Kristowe dob de ségiyo ingéd, nuret roy fantage bé Jesusé. <sup>5</sup> Atin i Filipiwe ménangéy dob sébaane ingéd diyo dob Samaria, atin diyo nuretén i Jesusé Been i Kristowe sani fénémili i Tuluse méguléw. <sup>6</sup> I de étéw, amun énggélingoo roy kébéreh ne brab énggito roy kéluhanay de mékégaif rénigo no, toow fo fénggélino roy kébéreh Filipihe. <sup>7</sup> Fénféraréyén i de saitan réménahuk dob de médoe étéw, atin ménékes ro bé lala ruwe tékédan. Brab féni-adi-adi noy médoowe do fikat brab do kimoyén. <sup>8</sup> Mélaw toow fo ménoror i de étéw dob no ingéd.

<sup>9</sup> Wén i ségétéwe lagéy dob no ingéd féndawét Simon, ségétéw béliyan. Bé de énggétah do gai, fénggaifén i médoowe do étéw dob Samaria bé de tete kéfagakarén. Ménfébantug-bantug bé beene kun i gérotore étéw. <sup>10</sup> Atin i kéluhanay de étéw dob no ingéd do méskinan brab do kawasa, fénggélino ro. Bénréh ro maro “I ni étéw féndawét Ménbantug Barakatan, sani barakat i Tuluse.” <sup>11</sup> Ménrugay i kéfégaif ne bero bé de tete kéfagakarén. Mélaw toow ro fo fénggélino. <sup>12</sup> Endob amun énggélingoy de étéw i Fiyowe Uret nuret Filipiwe fantag bé kéféguléw i Tuluse brab Jesu Kristowe, ménunur ro brab ménfébautis ro, do lagéy brab do libun. <sup>13</sup> Atin fiyon i Simone ménunur so bé Kristowe. Brab amun ménbautisén, démoyun ménodor bé Filipiwe. Atin toow fo ménggaif i Simone bé de énggito no rénigo Filipiwe.

<sup>14</sup> Amun énggélingoy de apostol dob Jerusalem i kétayakuf i de étéw dob Samaria bé kébéreh i Tuluse, fénuwit roy ro Pedrowe brab Juane mangéy diyo. <sup>15</sup> Amun énggégumah ro diyo, dénasala roy de étéw munur bé Kristowe inok tayakufé roy Rémogor i Tuluse. <sup>16</sup> Non i Rémogor i Tuluse, énda séna énggumahén dob berowe fiyon ségétéw. Ménbautison ro saén inok fégitoy roy kéunur ruwe bé Kadnane Jesus. <sup>17</sup> Tidéw béno, ténégé Pedrowe brab Juaney de bumbuna ro. Atin ténanggaf roy Rémogor i Tuluse.

<sup>18</sup> Atin énggito béliyane ni Simon i kétanggaf ruwe bé Rémogor i Tuluse bé kétégéy de apostol bero. Mélaw bénréhén dob Pedrowe brab Juane bé iraya no bero kurta. <sup>19</sup> Brab bénréhén mano, “Irayanu so bé ni barakat inok amuk wén i tégéné ku, gétagangaf so bé Rémogor i Tuluse.”

<sup>20</sup> Endob séménumbul i Pedrowe mano, “Mékukum go damén begom i kurta me, non mamó ké gébéloy mo bé kurtaey niray i Tuluse. <sup>21</sup> Enda fakay go mamung bé galbék

geye non énda séna métintuy fédéw me dob adafay Tuluse. <sup>22</sup> Fatut go gésénule bé ni tete kéfégitungém brab dasal go dob Kadnane inok fésagada no beam bé ni salaém. <sup>23</sup> Non énggito guy toow fo mésina go brab bénilangu i salae toom."

<sup>24</sup> Tidéw béno, séménumbul i Simone mano, "Dasala kom begén dob Kadnane inok énda i métuman damén bé de bénréh gom dob begéne."

<sup>25</sup> Atin i ro Pedrowe brab Juane, amun énggilid ron muret bé gétiga ruwe fantag bé Kristowe, brab bénréh roy kébéreh i Kadnane, ménséfule ro mangéy Jerusalem. Bé késéfule ruwe, ménawé ro dob médoowe do ingéd dob Samaria brab nuret roy Fiyowe Uret diyo.

### *I Filipihe brab odorone*

<sup>26</sup> Atin i Filipihe, sénugu i télakiy Kadnane mano, "Tafay go brab angéy go déligdigan dob agéwone tidéw Jerusalem mangéy Gasa." (I ni agéwon éndaén i étéw de magéwon.) <sup>27</sup> Mélaw ménangéy diyo i Filipihe. Tidéw béno, énggéalaka noy ségétéwe lagéy kafun sarigoy baiwe dob ingéde Etiopia. Beeney ségétéwe gérotor étéw mitong bé kurtae dob no ingéd. I ni étéw séfule bé béno bé kéagéw ne ménangéy méngadaf dob Jerusalem. <sup>28</sup> Diyo dob kalesah ne brab basané noy librowe sénulat i méntélatae sénarigoy Tuluse féndawét Isaias. <sup>29</sup> Atin bénréh i Rémogor i Tuluse dob Filipihe mano, "Ay go fégedét diyo brab odor go bé nan kalesah." <sup>30</sup> Mélaw i Filipihe ménségéta mangéy fégedét brab énggélíngoo noy kébasu nuwe bé librowe sénulat Isaiase. Atin fénénginsaa Filipihe mano, "Aw gésobuto moy nan basané mo?"

<sup>31</sup> Séménumbul i ni sarigon mano, "Ati kégésobut guwe de ké énda i témoro de begén?" Tidéw béno, féndaén i Filipihe dob kalesah ne atin ménséfingé ro ménsar. <sup>32</sup> Ay niy ménsulate dob libro Isaiase, bénasa no, "Beeney maake bili-bili fénléhu. Beeney maake nati bili-bili mantés ké kéléngén i buk ne, non énda fo mémbéréhén fiyon sétaga. <sup>33</sup> Toow fo ménfémala brab énda méntintuy kékukume de. Atin énda i gébéreh fantag bé de séfuén non ménléhuén brab éndaén dini ro dob duniyae ni."

<sup>34</sup> Atin ménénginsa i ni sarigon dob Filipihe mano, "Ati ni étéw ménsulat dob ni? Aw bénréh i sarigoy Tulusey fantage bé kaane lowoh taloo no ségiyo étéw?" <sup>35</sup> Tidéw béno, fénggétiga Filipihe dob beeney atag ni bénasa no brab nuretén i Fiyowe Uret fantag bé Jesuse. <sup>36</sup> Atin amun diyo ro séna lowoh aguwon, énggumah ro dob gonone wén i wayég de. Atin mémbéréh i ni odoron mano, "Ay wén i wayég dob ni. Aw fakayu mébautis?"

<sup>37</sup> Séménumbul i Filipihe mano, "Fakay bautisé ku beam amuk tintu gon munur bé Kristowe dob fédéw me."

Atin séménumbul i ni sarigon mano, "Munuru bé Jesu Kristowe, bé Beeney Nga i Tuluse."

<sup>38</sup> Atin i ni sarigon féntéré noy kalesah ne brab ménlus bero Filipihe ménangéy dob wayége atin bénautis Filipihe. <sup>39</sup> Amun géménaun ron tidéw dob wayége ni, nuwit i Rémogor i Kadnaney Filipihe. Endaén énggitoy sarigone niy Filipihe, éndob méntaus magéw toow fo moror. <sup>40</sup> Atin i Filipihe méntécow énggégumah dob sébaane ingéd féndawét Asdod. Atin tidéw diyo ménuret bé Fiyowe Uret fantag bé Jesuse dob kéluhanay de ingéd énggétaraa no bé kéagéw ne mangéy dob ingéde féndawét Sesaria.

## 9

### *I kéwaléy Saulowe munur*

<sup>1</sup> Atin i Saulowe bé do no do gai, féntausén soy kérigo nuwe bé de kuyug i Kadnane. Non mémbéréh féléhu no kun bero. Atin ménangéy dob gérotore fadi, <sup>2</sup> brab ménongot sulat dob beene mangéy dob de odoroy de Judio dob de lawi féngadafa ro dob ingéde Damasko inok kéfoé noy kéluhanay étéwe gito no diyo do modor dob Agéwo Jesuse brab uwité no bero mangéy Jerusalem, do lagéy brab do libun.

<sup>3</sup> Atin ménagéw i Saulowe mangéy Damasko. Amun gédétén dob no ingéd, méntécow wén i réndaw tidéw dob lawayo géliwét de. <sup>4</sup> Atin ménggétélingkéb i Saulowe dob fantade brab énggélíngoo noy émbéréhe mano, "Saulo! Sedek férasayé mo Begén?"

<sup>5</sup> Ménénginsa i Saulowe mano, "Ati Beeme, Kadnan?"

Atin séménumbul mano, "Begéney Jesuse férasayé mo. <sup>6</sup> Tindég go brab taus go mangéy Damasko, atin diyo wén i étéwe béréhé no beam i fatute rignon mo."

<sup>7</sup> Atin i de étéw dumo Saulowe magéw, téménrén ro. Ménantés ro non énggélíngoo roy émbéréhe ni éndob énda gito ro de. <sup>8</sup> Atin i Saulowe téménindég brab bénékahén i de moto no, éndob énda gégito no. Mélaw narak i de dumo no taman Damasko. <sup>9</sup> Atin méntéléw gétérésangan énda gégito no, brab énda ménamaén taloo no méniném.

<sup>10</sup> Atin diyo dob Damasko wén i ségétéwe kuyug Jesuse féndawét Ananias. Atin wén i fénggitoy Tuluse dob beene non ténawag i Kadnane mano, "Ananias!"

Séménumbul mano, "Ay niwu so Kadnan." <sup>11</sup> Atin mémbéréh i Kadnane mano, "Angéy go dob agéwone féndawét 'Mééntang' brab taus go dob lawi Judase brab fénginsae m diyo i lagéye féndawét Saulo tidéw Tarsus. Démasal sénay ni étéw béni. <sup>12</sup> Brab wén i

fénggitoy Kadnane, brab dob ni énggito noy ségétéwe lagéy féndawét Ananias énggumah dob beene brab ténégé no inok gégito man.”

<sup>13</sup> Séménumbul i Ananiasé mano, “Kadnan, énggélíngoo kuy uret i médoowe étéw fantag bé ni lagéy, brab kéluhanay tetee rénigo no dob de kuyugém dob Jerusalem. <sup>14</sup> Atin ménangéy dini dob Damaskowe ni non wén i kuwagibe tidéw dob de odoroy de fadi inok kéfoé noy kéluhanay munure Beem brab de lémbabit bé dawét me ké démasal ro.”

<sup>15</sup> Endob ménbéréh i Kadnane mano, “Angéy go diyo non fénéмили guy ni étéw inok waléy sugu-sugéu ku muret fantag bé Begéne dob de étéw békén Judio brab dob de datu brab dob de Judio so. <sup>16</sup> Brab féngétiga ka dob beene bé waléy so toow fo mérasay sabaf bé kéunur ne Begén.”

<sup>17</sup> Mélaw ménagéw i Ananiasé mangéy diyo. Amun énggégumah dob lawie ménahur so brab ténégé noy Saulowe ni. Atin bénréhén de mano, “Saulo, dumo gu, sénugu i Kadnane begén mangéy dob beeme. Beeney Jesuse sani méntéfégítowe dob beeme dob aguwoone bé kéangéy me dini. Sénuguén begén inok waléy go man gégito brab fémanduoy Rémogor i Tuluse beam.” <sup>18</sup> Sonom béno, i de maak éner ménlawu tidéw dob de moto Saulo brab énggégito. Atin ménagayas témindég brab ménfébautis. <sup>19</sup> Amun énggilid mama, ménséfule i kébagér ne. Atin ménbati i Saulowe dob de kuyug Jesus dob Damasko bé ménfiroye gétérésangan.

#### *I kéuret Saulowe dob Damasko*

<sup>20</sup> Atin i Saulowe ménagayas ménahur dob de lawi féngadafay de Judio brab nuretén i fantage bé Jesuse. Bénréhén mano, “I Jesuse ni, Beeney Nga i Tuluse.”

<sup>21</sup> Atin i kéluhanay de énggégélingo de toow ro fo ménggaif brab ménséfénginsa ro maro, “Aw békén ba beeney étéwe tidéw Jerusalem méméléhu bé de munur bé Jesuse? Aw békén ba ménangéy dini inok kéfoé noy de kuyug Jesus, inok uwité no mangéy dob odoroy de fadi dob Jerusalem?”

<sup>22</sup> Endob ménwaléy toow fo émbagér muret i Saulowe brab fénggétiga no dob de Judio dob Damasko i Jesuse, Been i Kristowe, sani méguléwe tidéw dob Tuluse ongot-ongoté ro. Atin énda i énggésambul bero.

<sup>23</sup> Amun ménifus i firoye gétérésangan, i de Judio ménsélimud ro atin ménséfagayun ro bé féléhué roy Saulowe. <sup>24</sup> Fuweh na kélungonon i kébantaya ruwe de dob de bégaway ni ingéd inok féléhué ro. Endob wén i ménlolok dob Saulowe fantag bé ni rigoné ro. <sup>25</sup> Mélaw wén i no kélungonon, i de kuyugén nuwit roy Saulowe dob gérotore diding fénggédiding bé ni ingéd. Atin nahur

ro dob dakéle biton brab ténuntu ro mangéy fingé bala dob faliluwangay didingé ni.

<sup>26</sup> Atin ménule i Saulowe mangéy Jerusalem brab téménlama magiyamongan bé de kuyug Jesus. Endob mégilak ro de brab énda munur ro de ké ménwaléyén kuyug Jesuse. <sup>27</sup> Tidéw béno, i Bernabewe nuwitén i Saulowe mangéy dob de apostol. Atin i Bernabewe nuretén dob berowey kétéfégítoy Kadnane brab késébéréh ne dob Saulowe dob aguwoone. Atin bénréh Bernabewe soy kébaraw Saulowe muret fantag bé Jesuse dob Damasko. <sup>28</sup> Mélaw i Saulowe ménbati dob berowe dob Jerusalem. Brab séménugud muret fantag bé Kadnane dob kéluhanay de gonon dob Jerusalem. <sup>29</sup> Atin ménsébéréh brab ménséédél bé de Judio do sébéréh Griego. Mélaw ténlama ro féléhuén i Saulowe. <sup>30</sup> Amun énggétigay de dumo no munur bé Jesuse, dénura ro mangéy Sesaria brab fénule ro mangéy Tarsus.

<sup>31</sup> Atin bé do no gai, énda ménrasay i de munur bé Kristowe dob Judea brab dob Galilea brab dob Samaria. Ménwaléy ro do méégét munur brab méninut ro méédo non ténabangay Rémogor i Tuluse bero, non toow fo féngadafé roy Kadnane.

#### *I rénigo Pedrowe*

<sup>32</sup> Atin i Pedrowe, démayun ménagéw mangéy dob de méédo do ingéd. Amun nangeyén ténukaw i de dumo no munur bé Kristowe dob Lida, <sup>33</sup> diyo énggéalaka noy ségétéwe lagéy féndawét Eneas. I Enease ni kimoyén brab ménwaléwén gébélintuwa i éndae kégétékén. <sup>34</sup> Atin ménbéréh i Pedrowe dob beene mano, “Eneas, uwaé Jesu Kristowe beam. Tek go brab dili moy iroo muwa nan!” Sonom béno énggéték i Enease ni. <sup>35</sup> Énggitoy kéluhanay de étéw dob Lida brab dob Saron i ni lagéy ménadi-adi. Mélaw ménunur ro bé Kadnane.

<sup>36</sup> Atin diyo dob Jopa, wén i ségétéwe libun munur so bé Kristowe féndawét Tabita. (Taloo no Dorkas dob késébéréhe Griego. Atin i atag ne “séladéng”.) Sénga tékélid rémigo fiyo dob de méskinan, brab tabanga no bero. <sup>37</sup> Bé do no gai, ménwaléy démérurun brab ménléhu. Mélaw i de dumo no, nurah roy bangkay ne brab féndiyo ro dob sibéye dob rotor i lawie. <sup>38</sup> Enda mérayu i ingéde Jopa dob ingéde Lida. Mélaw i de kuyug Jesus dob Jopa, amun énggélíngoo ro diyo i Pedrowe dob Lida, séménugu ro ruwo gétéw lagéy mangéy diyo inok béréhé ro dob Pedrowe bé magayas mangéy dob berowe. <sup>39</sup> Mélaw ménodor i Pedrowe bero. Amun énggumah ron, nuwit roy Pedrowe mangéy dob sibéye dob rotor i lawie. Atin i kéluhanay de libun do baléw ménfégédét ro dob Pedrowe, kémérew ro brab fénggito roy



de kégál rénigo Dorkase bé kéuyag ne séna. <sup>40</sup> Tidéw béno, fénsut Pedrowe bero dob sibéye atin ménlingkuwéd démasal. Tidéw béno, sénaréwén i bangkaye brab ménbéréh mano, “Tabita, tek go!” Tidéw béno, bénékahén i de moto no brab amun énggito noy Pedrowe, méntek. <sup>41</sup> Atin i Pedrowe, génamakén i de kémérén brab féntindégén. Tidéw béno, ténawagén i kéluhanay de munur bé Kristowe brab de libun do baléw, atin fénggito no beroy Dorkase ménuyag. <sup>42</sup> Atin i urete fantag bé ni ménlégéb dob ingéde Jopa. Mélaw ménwaléy médooy ménunure bé Kadnane. <sup>43</sup> Atin ménrugay i Pedrowe dob Jopa. Ménbati dob lawi i ségétéwe lagéy gémalbék léminis do kulit safi féndawét Simon.

## 10

### *I Pedrowe brab Korneliowe*

<sup>1</sup> Dob Sesaria, wén i ségétéwe lagéy féndawét Kornelio. Beeney kafitay de sundalo tidéw Roma sani de sundalo féndawét ro “Do tidéw Italiana”. <sup>2</sup> I ni kafitan toow fo méngintulus, loo soy kéluhanay de dumo no dob kaane kuréngon. Dé moyun miray tabang dob de Judio do méskinan. Brab sénga tékélid démasal dob Tuluse. <sup>3</sup> Wén i no sébaan fuweh, géraaran lé mudug i térésange de, wén i fénggitoy Tuluse dob beene. Tintu fo énggito noy télakiy Tuluse ménahur dob lawi ne. Atin ténawag i télakiwe ni mano, “Kornelio!”

<sup>4</sup> Atin ténéngténégén i télakiwe ni brab toow fo ménggilak. Atin séménumbul mano, “Ati no?”

Atin ménbéréh i télakiwe ni mano, “Mésuwat i Tuluse bé kégedaw me bé de fiyo rénigo mo brab kédasal me. Atin énggétédémó no beam. <sup>5</sup> Béleewe ni, sugu go do étéw mangéy Jopa inok angéy roy ségétéwe lagéy féndawét Simon Pedro. <sup>6</sup> Diyo bati dob lawi i lagéye gémalbék léminis do kulit safi féndawét so Simon. I ni lawi gédét dob dogote.” <sup>7</sup> Tidéw béno, méntékédan i télakiwe ni. Atin i Korneliowe ténawagén i ruwowe gétéw bé de sugu-sugué no, brab ségétéwe bé de sundalo no toow fo méngintulus. Beene soy ségétéwe bé de sarigo no. <sup>8</sup> Atin bénéréhén beroy ni ménrigo. Tidéw béno, sénuguén bero mangéy dob ingéde Jopa.

<sup>9</sup> Dob gétunduge de fuweh, amun gédét ron dob Jopa, i Pedrowe ménénik dob datare até i lawie batío no brab déménasal. Géutuhén bé béno. <sup>10</sup> Atin toowén fo mélayaf brab ménuyot fo mama. Endob i lala i de étéw dob nan lawi témafay séna bé amae ruwe, wén i fénggitoy Tuluse dob Pedrowe ni. <sup>11</sup> Enggito noy lawaye ménungka brab wén i maake dakél safut térimféna mangéy fantad ténutun fot i sugud ne. <sup>12</sup> Diyo ménfuyut i kéluhanay

séségiyo-giyowe do binatang do magéw brab do rémagaf dob fantade brab do kloho manok. <sup>13</sup> Brab énggélíngoo noy émbéréhe mano, “Pedro, étek go! Sumbaliém brab amaém.”

<sup>14</sup> Endob séménumbul i Pedrowe mano, “Aba, énda fo gérigono ku de, Kadnan. Non tidéw féganay, énda séna ménamau bé de amaén liyén dob adat geye do Judio.”

<sup>15</sup> Atin énggélíngoo no man i émbéréhe ni mano, “Kago béréhén liyén taloo no tete i béréh i Tuluse fiyo.” <sup>16</sup> Téléw gule ménrigoy ni. Tidéw béno, i ni méntutun ménbatun séfule mangéy dob lawayo.

<sup>17</sup> I lala Pedrowe mégitung bé atiy atag i ni énggito no, énggumah i de sénugu Kornelio. Non amun fénénginsa roy hon i lawie gono Pedrowe bati, ménangéy ro diyo. Brab diyo ro dob liyuy béngawane. <sup>18</sup> Atin ténawag ro brab fénénginsa ro ké diyo bati i lagéye féndawét Simon Pedro.

<sup>19</sup> Atin i Pedrowe tafay so fégitungé noy atiy atag i ni énggito no. Tidéw béno, i Rémogor i Tuluse ménbéréh dob Pedrowe mano, “Pedro, wén i téléw gétéw lagéy séméled beam. <sup>20</sup> Tek go brab lus go, brab kago magalang-galang modor bero non Begén i séménugu bero.” <sup>21</sup> Mélaw ménlus i Pedrowe brab béréhén bero mano, “Begén i nan séléde kom. Ati funa kome séméled begén?”

<sup>22</sup> Séménumbul ro maro, “Sénugu kafitan Korneliowe begey mangéy dini. I ni étéw toow fo métintu brab méngintulus, atin i kéluhanay de Judio fégadato ro. Ménbéréh i télakiwe dob beene bé féangéy no beam dob lawi ne inok fégélíngóé noy ati béréhé muwe.” <sup>23</sup> Atin i Pedrowe ténayakufén bero dob lawie ni batío no, brab ménbati ro diyo ségékélungonon.

Atin bé démoe de ménodor bero brab wén soy do dumo bé de munur bé Kristowe dob Jopa ménodor de. <sup>24</sup> Dob gétunduge de fuweh, énggumah ro dob Sesaria. Diyo nongot-nongot Korneliowe bero. Atin ténawagén i kéluhanay de samungén brab do dumo no séloyuk. Mélaw diyo ro so. <sup>25</sup> Amun énggumahén i Pedrowe, béalak Korneliowe brab ménlingkuwéd dob adafa Pedrowe inok féngadafé no. <sup>26</sup> Endob féntindég Pedrowe brab ménbéréh mano, “Tindég go, non i begéne kéilawanu so loo bé beema nan.”

<sup>27</sup> Atin féntaus Pedrowey késébéréh-béréh ruwe bé lala ruwe mahur dob lawie ni, atin énggito noy médoowe étéw ménlimud. <sup>28</sup> Tidéw béno ménbéréh i Pedrowe mano, “Gétiga komén i adat geye do Judio. Enda fakayén dob kitab geye ké sé mugud gey mangéy dob de lawi gom do békén Judio taloo no sélawék gey begom. Endob fénggétigay Tuluse begén bé mantuwe ni séna, bé fiyon fo ké ati no étéw, éndaén fégitungé ku de mékérésik. <sup>29</sup> Mélaw amun

fén-angéy gom begén dini, éndaén ménsédélu de. Mélaw fénginsaa ku begom, ati funa kome ménfétawag begén?"

<sup>30</sup> Séménumbul i Korneliowe mano, "Amun naméntéléwo, loo so béni géraaraan lémodug i térésange do, déménasalu dob lawi guwe ni. Méntékow méntéfégitoy lagéye toow fo sémélinang i kégal ne téménindég dob téngaanga kuwe. <sup>31</sup> Atin ménbéréh mano, 'Kornelio, énggélinooy Tulusey kédasal me brab énggétédémoo noy kégedaw me brab de fiyo rénigo mo. <sup>32</sup> Mélaw sugu go étéw mangéy Jopa témawag bé lagéye féndawét Simon Pedro. Diyo bati dob lawi i lagéye gémalbék léminis do kulit safi féndawét Simon gédét dob dogote.' <sup>33</sup> Mélaw ménagayasu séménugu mangéy témawag beem. Atin mégédaw go non ménangéy go dini. Atin ay ni gey ménlimud dob adafay Tuluse inok mégélingo bé fébéreh i Kadnane beem."

### *I kébéreh Pedrowe*

<sup>34</sup> Atin ménbéréh i Pedrowe mano, "Béleewe ni énggétiga ku, i Tuluse énda i isu ramigo no bé de étéw. <sup>35</sup> Non tayakuféy Tulusey étéwe mégadatan de brab rigoné noy fatute kétayay Tuluse, fiyon fo ké ati katufua nuwe taloo no ké ati tidéwo nuwe de. <sup>36</sup> Gétiga kom i kéiray i Tuluse bé kébéreh ne dob de Judio. Dob berowe fényagén i Fiyowe Uret fantag bé kéféfiyowe fédéw sabaf bé Jesu Kristowe. Endob Beeney Kadnay kéluhanane. <sup>37</sup> Gétiga kom ké ati ménrigowe dob kéluhanay de ingéd dob Israel, méngganay dob Galilea amun i Juane nuretén i fantage bé kébautis ne. <sup>38</sup> Brab énggétiga kom i fantage bé Jesuse tidéw Nasaret. I Tuluse nirayén témantu dob Beeney Rémogor ne brab barakat ne. Séménugud dob kéluhanay de ingéd, rémigo bé fiyowe brab fén-adi-adi noy de étéw fényagén Satanase. Énggérigono noy de ni non dob Beeney Tuluse. <sup>39</sup> Brab begey i énggégitowe bé de ni rénigo no dob de ingéd i de Judio brab dob Jerusalem. Endob i de étéw fénléhu roy Jesuse dob kruse. <sup>40</sup> Endob ténébule i Tuluse dob gétéléw ne gétérésang brab fénggito noy Jesuse ményuyag. <sup>41</sup> Enda méntéfégito no dob kéluhanay étéwe éndob dob begeye saén méntéfégito do fénmili i Tuluse. Ménséréngan begey mama brab miném amun méntébuléén. <sup>42</sup> Atin sénuguén begey mangéy muret bé Fiyowe Uret dob kéluhanay étéwe brab muret bé Beeney fénmili i Tuluse kémukum bé de ményuyag brab bé de ménléhu. <sup>43</sup> Atin i kéluhanay de énggétah do sénarigoy Tuluse muret bé kébéreh ne, nuret roy fantage bé Jesuse. Atin bénréh ro bé i kéluhanay munure dob Beene, fénsagaday Tulusey de sala ro sabaf bé barakat i dawét ne." Been i niy bénréh Pedrowe.

### *I kégumah i Rémogor i Tuluse dob de békén Judio*

<sup>44</sup> Amun émbéréh sénay Pedrowe, i Rémogor i Tuluse méntérimféna mangéy dob kéluhanay de mégélingo bé uret ne. <sup>45</sup> Atin i de kuyog Jesus do dumo Pedrowe ménodor de tidéw Jopa do Judio ro. Atin toow ro fo ménggaif bé kéiray i Tuluse so témantu bé Rémogor ne dob de étéw békén Judio. <sup>46</sup> Énggétiga ro niray i Tulusey Rémogor ne dob de békén Judio non énggélinooy roy késebéréh ruwe bé de ségiyo késebéréh énda gétiga ro de brab dényaw roy Tuluse. Mélaw bénréh Pedrowe bero mano, <sup>47</sup> "I de ni do étéw ténanggaf roy Rémogor i Tuluse, ségiléw so bé betome. Mélaw énda fakayén ké énda bautisén ro bé wayége." <sup>48</sup> Mélaw bénréhén bero fatut fébautis ro inok féféngéng roy kéunur ruwe bé Jesu Kristowe. Tidéw béno, fénbati ro nay Pedrowe dob berowe bé ménfiroye gétérésangan.

## 11

### *I Pedrowe dob Jerusalem*

<sup>1</sup> Atin i de apostol brab de dumo ro munur bé Kristowe dob Judea, énggélinooy roy fantage bé de étéw békén do Judio ménwaléy ro munur bé kébéreh i Tuluse. <sup>2</sup> Mélaw amun ménénagé i Pedrowe mangéy Jerusalem, i de munur bé Kristowe do Judio, dénowoy roy Pedrowe, <sup>3</sup> maro, "Séménugud go mangéy dob lawi i de békén Judio, sani de énda méntuli. Atin ménséréngan go na bero mama." <sup>4</sup> Mélaw nuret Pedrowe beroy kéluhanay ménrigowe tidéw féngayan.

<sup>5</sup> Ménbéréh i Pedrowe mano, "Amun diyoo dob Jopa, déménasalu atin wén i fénggitooy Tuluse begén. Énggito gu tidéw dob lawayoy maake dakél safut ténutun fot i sugud ne. Atin ménténa dob téngaanga kuwe. <sup>6</sup> Tidéw béno, ténéngéng gu fo toow atin énggito gu diyoo ménfuyut i séségiyo-giyowe do ayam brab do mérayar binatang do magéw brab do rémagaf dob fantade, brab do kloh manok. <sup>7</sup> Tidéw béno énggélinooy kuy émbéréhe mano, 'Pedro, tindég go, sumbaliém brab amaém.' <sup>8</sup> Endob séménumbulo maku, 'Aba, énda fo gérigono ku de, Kadnan. Non énda séna énggémau bé kéluhanay amaéne ménbéréh liyén dob adat geye do Judio.' <sup>9</sup> Endob énggélinooy ku man ségule i ni émbéréh tidéw dob lawayoo mano, 'Kagonén béréhén liyén taloo no tete i bénréh i Tuluse fiyo.' <sup>10</sup> Téléw gule ménrigoy ni. Tidéw béno, ménbatun séfule mangéy dob lawayoy ni maak safut ménféno do binatang. <sup>11</sup> Bé béno so, énggumah dob lawie gono ku bati i téléwe gétéw lagéy sénugu tidéw dob ingéde Sesaria mangéy témawag begén. <sup>12</sup> Atin i Rémogor i Tuluse bénréhén begén bé magéwu brab békénu

magalang-galang modor bero. Tidéw béno, ménodor so begén i de ném ni gétéw do munur do dumo gu tidéw Jopa mangéy Sesaria. Amun énggumah geyén dob lawi Korneliowe, ménahur gey. <sup>13</sup> Atin bénréhén bege i fantage bé télakiwe énggito no dob lawi ne. Atin bénréh i télakiwe de kun mano, 'Sugu go étéw mangéy témawag bé lagéye féndawét Simon Pedro dob Jopa. <sup>14</sup> Ureté no beem i funa muwe méfukas dob de salaém begom i de samungém.' Been i niy bénréh i télakiwe de kun."

<sup>15</sup> Atin féntaus Pedrowey kébérehé ne mano, "Amun méngganayu séna émbéréh dob de étéw ni dob Jopa, i Rémogor i Tuluse ménlus mangéy dob berowe ségiléw bé kéangéy ne dob betome do Judio bé féganayo. <sup>16</sup> Tidéw béno énggétédémó kuy bénréh i Kadnane mano, 'I Juane mautis bé wayége éndob bautison gom bé Rémogor i Tuluse.' "

<sup>17</sup> Atin féntaus Pedrowey kébérehé ne mano, "Enggitonén i kéiray i Tuluse bé Rémogor ne dob de ni étéw békén Judio ségiléw bé kéiray ne de dob betome amun ménunur tom bé Kadnane Jesu Kristo. Mélaw énda i kuwagib gu mélén bé Tuluse miray bé Rémogor ne dob berowe."

<sup>18</sup> Amun énggélíngoo roy ni kébérehé Pedrowe, téménrén ron bé kédowoy ruwe de. Atin dénayéw roy Tuluse maro, "Mégédaw so wayoy Tuluse bé de étéw békén Judio non amuk gésénule ro, gédoté ro soy umule magufusa."

### *I de munur dob Antiokia*

<sup>19</sup> I de munur bé Kristowe ménbéragar ro non bé kéférasaye bero tidéwén bé kéféléhue bé Estebane. Mélaw énggégumah ro dob de mérayu ingéd. I de dumo de dob Fenisia atin i de dumo de dob Sipri brab dob Antiokia. Atin nuret roy Fiyowe Uret dob de Judio saén. <sup>20</sup> Endob wén i de dumo de tidéw Sipri brab do tidéw Sirin, amun énggégumah ro dob Antiokia nuret ro so dob de békén Judioy Fiyowe Uret fantag bé Kadnane Jesu. <sup>21</sup> Atin i barakat i Kadnane ténabangén bero funay médoowe do étéw énggésénule brab ménunur bé Kadnane.

<sup>22</sup> Atin i urete fantag bé de ni énggumah dob de munur bé Kristowe dob Jerusalem. Mélaw fénuwit roy Bernabewe mangéy Antiokia. <sup>23</sup> Amun énggumah diyo, énggito noy kégédaw i Tuluse bero. Toow fo ménoror i Bernabewe brab bénréhén bero kéluhanan bé fédayday ro bé kéunur ruwe dob kéluhanan de féféw ro brab modor ro bé de sugu i Kadnane. <sup>24</sup> Toow fo fiyo étéw i Bernabewe ni. Fénémanduoy Rémogor i Tuluse brab méégét i kéunur ne. Mélaw sabaf bé kétoro ne, médooy de énggésénule brab ménunur ro bé Kadnane.

<sup>25</sup> Tidéw béno, ménangéy Tarsus i Bernabewe inok séléde noy Saulowe. <sup>26</sup> Amun énggito no, nuwitén mangéy Antiokia. Atin ménségébélintuwa diyo ro beroy de munur bé Kristowe brab téménoro ro dob de médooy étéw. Atin diyo dob Antiokia, ménféganay i kétawage bé de munur bé Kristowe "Kristiyano".

<sup>27</sup> Bé do no do gai, wén i de sénarigoy Tuluse muret bé kébérehé ne énggumah dob Antiokia tidéw Jerusalem. <sup>28</sup> Téménindég i ségétéwe bero féndawét Agabo brab fénbéréh i Rémogor i Tuluse bé wén moso i gégumah dakél lénggob dob kéluhanan de ingéd dob duniyae ni. (Atin énggégumah i ni bé gaiy kéféguléw Klaudiowe dob Roma.) <sup>29</sup> Atin i de kuyug, ménséfagayan ro bé émféuwit ro tabang bé atiy tamay gagané ruwe mangéy dob de dumo ro do kuyug bati dob Judea. <sup>30</sup> Atin been i niy rénigo ruwe, brab fénuwit ro bé ro Saulowe brab Bernabewey karowe tabang do kurta mangéy dob de odoroy de munur diyo dob Judea.

## 12

### *I kérasay i de munur*

<sup>1</sup> Bé do no do gai, féngganay i datue féndawét Herod i kéférasay ne bé de dumo bé de munur bé Kristowe. <sup>2</sup> I Santiagowe dumo Juane sétiman idéng, fénféléhu Herode bé sundange. <sup>3</sup> Atin amun énggito no toow fo ménsuwat i de Judio bé ni rénigo no, fénkéfoén i Pedrowe. (Ménrigoy ni bé gaiy kékanduli i de Judio féndawét "Témara", sani kandulie mama ro fan énda i fégéférük de.) <sup>4</sup> Amun énggékéfoo roy Pedrowe, fénrisu ro brab fénbantaya ro bé fote lumfuk do sundalo. Wén i fot gétéw dob séngae de sétumfuk. Atin bénantak Herode kukumén i Pedrowe dob téngaangay de étéw amuk glid i kékanduli ruwe. <sup>5</sup> Mélaw ménbati i Pedrowe dob férisunone. Atin i de dumo no munur bé Kristowe téménantu ro fémasal dob Tuluse inok tabanga noy Pedrowe.

### *I kétangéy Pedrowe tidéw dob férisunone*

<sup>6</sup> Amun ségékélungonon séden i télaa Herode kémukum bé Pedrowe, bé no kélungonon ménfidong i Pedrowe dob kérrara i ruwowe gétéw sundalo mantayan de. Brab níké roy Pedrowe bé ruwowe timan sangkali. Atin wén soy do sundalo mantay dob béngaway férisunone ni. <sup>7</sup> Atin tékow méntéfégitoy télakiy Kadnane brab ménggéfékaya i sibéy ne dob férisunone. Atin i télakiwe ni kénuyungén i Pedrowe dob wara nuwe inok ulégé no brab ménbérehé mano, "Fagayas go tek!" Sonom béno ménukoh i de sangkali dob de kémérén. <sup>8</sup> "Sintoro go brab sinilas go", bang i télakiwe ni. Atin nodoro Pedrowey bénréh i télakiwe ni. Ménbérehé man i télakiwe ni mano, "Kégalém i

gérutowe lafin kégalém brab odor go begén.”<sup>9</sup> Atin ménodor i Pedrowe bé télakiwe ni brab ménsut. Endob énda gétiga no de ké toow i ni réningoy télakiwe ni, look fénggitoy Tuluse de dob tégínéfe saén.<sup>10</sup> Ténarara roy sunguwe brab géruwowe gonoy de sundalo ni do mantay. Tidéw béno, énggumah ro dob béngaway férisunone ni futow i fintu ne. Atin ménungka so fiyon fo ké énda i ménungka de. Atin amun énggésut ron, méntaus ro magéw brab amun énggéliyuno ron i sébaane aguwon, tékow ménalfa i télakiwe ni.

<sup>11</sup> Tidéw béno énggétiga Pedrowe nén i ni ménrigo, mélaw énggébérého no mano, “Béleewe énggétiga kun toow wayoy ni ménrigo! Sénugu i Kadnaney télaki nuwe témangéy begén inok énda gérigono Herode brab de Judioy kétaya ruwe rignoné ro dob begéne.”

<sup>12</sup> Amun énggétiga noy ni, méntaus mangéy dob lawi Mariahe idéng Juan Markose. Diyo ménlimud i médoowe étéw démasal.<sup>13</sup> Amun énggumah i Pedrowe, téménuktuk dob liyuy fintue dob fésayawane. Atin ménféngédét i ségétéwe sugu-suguén kénogon féndawét Roda inok angéy no susiné.<sup>14</sup> Amun énggélolo noy béréh Pedrowe, toow fo ménoror. Endob énda nungkaén i fintue. Yamula sabaf bé kéoror ne ménségéta séfule mangéy dob de étéw brab bénréhén bero i Pedrowe diyo dob liyuwe.<sup>15</sup> Endob ménbéréh ro maro, “Bunég go!” Endob énda téméré no émbéréh bé i Pedrowe diyo dob liyuwe. Mélaw bénréh ro maro, “Télaki Pedro keey i no.”

<sup>16</sup> Tafay so témuktuk i Pedrowe ni. Tidéw béno nungka roy fintue ni brab amun énggito roy Pedrowe, toow ro fo ménggaif.<sup>17</sup> Endob séniyasa Pedrowe bero bé féantés ro, brab nuretén beroy kéféésut i Kadnane de tidéw dob férisunone. Atin ménbéréh mano, “Uret gom i ni dob Santiagowe brab dob de dumo tom munur bé Kristowe.” Tidéw béno, ménagéw i Pedrowe mangéy dob ségiyowe gonon.

<sup>18</sup> Amun géfuwénén, i de sundalo mantayan bé Pedrowe, toow ro fo ménggaif brab ménggilak. Enda énggétiga ro de ké ati énggérigono Pedrowe.<sup>19</sup> Atin fénséléd Herodey Pedrowe. Atin amun énda énggito ro de, fénénginsaa Herodey de mantay bé férisunone, atin fénféléhuén bero. Tidéw béno, léménudug i Herode mangéy Sesaria tidéw Judea brab diyo ménrugay bati.

### *I kéluhu Herode*

<sup>20</sup> Bé béno gai, ménkérit i Herode bé de étéw tidéw Tiro brab de étéw tidéw Sidon. Mélaw ménséfagayun ro mangéy ro dob beene. Bé énda séna ménangéy ro dob Herode, ménsébéréh ro bé sarigo nuwe dob lawi ne féndawét Blasto bé odoro no bero

mangéy dob Herode inok ongoté ro de ké kédané noy kékérit ne bero. Non énda i ségiyo édoto ro bé amaé ruwe ké békén dob ingéde sakuf Herode.

<sup>21</sup> Amun énggumahén i télaa ruwe mangéy diyo, i Herode kéménégal kégal datu brab ménsar dob saray datue. Tidéw béno nureto no bero.<sup>22</sup> Atin ménkes i de étéw démayéw bé Herod maro, “Tulus i ni émbéréh, békén kéilawan.”<sup>23</sup> Sonom béno, kénukum i télakiy Kadnaney Herode non tényakufén i kéféngadaf ruwe de, brab énda féféngadafé no bero bé Tuluse. Mélaw ménsofotén i lowoh ne atin ménléhu.

<sup>24</sup> Atin bé do no gai, i urete fantag bé Tuluse ménlégéb dob de ingéd atin minut so médooy munure bé Kristowe.

<sup>25</sup> Atin i ro Bernabewe brab Saulowe amun énggilid ron i galbék ruwe, ménséfule ro tidéw Jerusalem mangéy Antiokia, brab nuwit roy Juan Markose.

## 13

### *I késugue bé Saulowe brab Bernabewe*

<sup>1</sup> Diyo dob Antiokia, wén i de sénarigoy Tuluse muret bé kébéréh ne brab do témoro. I de ni, ro Bernabe, Saulo, Simeon (féndawét so mitam lagéy), Lusio (tidéw Sirin), brab Manaen (sani dumo Herode ménggéséeruk).<sup>2</sup> Wén i no sébaan fuweh, amun ménéngadaf ro dob Tuluse brab ménfuwasa ro, i Rémogor i Tuluse ménbéréh mano, “Iray gom Begén i ro Bernabewe brab Saulowe inok rignoné roy galbéke fénémili gu iray gu bero.”<sup>3</sup> Mélaw ménfuwasa ro brab déménasal ro brab ténéngé roy ro Bernabewe brab Saulowe. Tidéw béno sénugu ro bero.

### *Dob Siprus*

<sup>4</sup> Atin i Bernabewe brab Saulowe do sénugu i Rémogor i Tuluse, ménagéw ro mangéy Selusia, atin tidéw Selusia ménda ro barko mangéy dob bungéde féndawét Siprus. Ménodor soy Juan Markose.<sup>5</sup> Amun téménéfad ro dob ingéde Salamis, nuret roy kébéréh i Tuluse dob de lawi féngadafay de Judio. Atin téménabang soy Juan Markose.

<sup>6</sup> Atin amun énggéfara ronén i ni bungéd mangéy dob ingéde Pafos, diyo énggéalaka roy béliyane ségétéw Judio féndawét Bar-Jesus. (I dawét ne Elimas dob késébéréhe Griego.) Bénréhén been kun i sénarigoy Tuluse muret bé kébéréh ne.<sup>7</sup> Brab i ni béliyan, been i dumoy ségétéwe gubernador dob no bungéd féndawét Sergio Paulo, toow fo métilédttéd. Atin i ni gubernador féntawagén i ro Bernabewe brab Saulowe non méuyot mégélango bé kébéréh i Tuluse.<sup>8</sup> Endob i béliyane ni Elimas, toow fo ménsébanil bero. Atin ténulama no balengén i fédéw i ni gubernador inok énda munurén.<sup>9</sup> Tidéw béno, i Saulowe (féndawét so Pablo) toow

fo fénémanduoy Rémogor i Tuluse. Atin fénandangén fo toow i ni béliyan. <sup>10</sup> Brab ménbéréh i Pablowe mano, “I beema nan, nga Satanas go! Tintu sébanil go bé kéluhanay fiyowe. Ménféno go bé tugie brab akar. Atin télamané mo féwaléyén tugi i toowe tidéw dob Kadnane. <sup>11</sup> Bé béni so, kukuméy Tuluse beem bé waléy go langafén brab mérugay énda gégito go.”

Sonom béno, i Elimase ménlangafén brab séménléd étéw marak de. <sup>12</sup> Atin i gubernadore ni ménunur bé Kristowe amun énggito noy ni ménrigo. Toow fo ménggaif bé kétoroe fantag bé Kadnane.

### *Dob Antiokia sakuf i ingéde Pisidia*

<sup>13</sup> Atin i Pablowe brab de dumo no ménda ro man barko dob Pafos, brab énggégumah ro dob gonone féndawét Perga sakuf i ingéde féndawét Pamfilia. Endob i Juan Markose ménsésuway bero atin ménséfule mangéy Jerusalem. <sup>14</sup> Atin tidéw Perga, méntaus ro mangéy Antiokia sakuf i ingéde Pisidia. Atin bé gaiwe kétérén, ménahur ro dob lawie féngadafay de Judio brab ménsar ro. <sup>15</sup> Amun énggilid i kébasawe bé de kitab sénulat Moïse brab de sénulat i de sénarigoy Tuluse, i de odoron dob lawie féngadafan fénbéréh roy ro Pablowe brab Bernabewe maro, “Do dumo gey, amuk wén i kéuyoto kom bérehé kom dob de étéw ni émféfiyo bé de fédéw ro, kagom séko méangga, bérehé gom so bero.”

<sup>16</sup> Mélaw téménindég i Pablowe brab séniniyasa no bero bé de kémérén inok mantés ro. Tidéw béno, ménbéréh mano, “Do dumo gu do Judio, brab begome do étéw békén Judio do méngintulus, toow gom fégélingo. <sup>17</sup> I Tuluse féngadafé tom do Judio, i ménémilie bé de katufua tom. Atin fénwaléyén bero médoó amun ménbati ro dob mérayue ingéd Egipto. Endob fénésut i Tuluse so bero tidéw Egipto bé barakat ne. <sup>18</sup> Atin téningkéloy Tuluse bero bé ménfote folo gébélintuwa dob gonone énda i étéw de bati. <sup>19</sup> Amun énggilid ténaba noy de fitéw timan ingéd dob Kanaan, nirayén i fantade ni dob de Judio. <sup>20</sup> I kérugay i kéluhanay de ni fot ratuh bra limo folo gébélintuwa.

“Atin amun énggilid i ni, nirayay Tuluse bero do kéfédéwan inok wén i méguléw bero taman dob gai Samuele, ségétéw sénarigoy Tuluse muret bé kébéréh ne. <sup>21</sup> Tidéw béno, i de Judio ménongot ro dob Tuluse datu ro. Atin fénéмили i Tulusey ségétéwe lagéy féndawét Saulo nga Kis tidéw dob katufua Benjamene. Atin ménwaléy datu roy Saulowe bé ménfote folo gébélintuwa. <sup>22</sup> Amun kénday Tulusey Saulowe, Dabid i fénwaléy ne datu ro. Bénrehé i Tuluse mano, ‘Enggito guy Dabide, nga Jessewe, kénsuwata ku. Rigoné noy kétaya kuwe.’ ”

<sup>23</sup> Atin féntaus Pablowey kébéréh ne mano, “Jesusey ségétéwe bé de séfu Datu Dabid. Brab Beeney fénwaléy i Tuluse Mémukas bé de étéw Judio loo bé fénasad ne. <sup>24</sup> Amun énda séna féngganay Jesusey galbék ne, i Juan Bautistawe, nuretén dob kéluhanay de étéw do Judio bé fatut ro gésénule bé de sala ro brab fébautis ro. <sup>25</sup> Atin amun gédétén gilid i galbék Juane, bénrehé dob de étéw mano, ‘Békén katabuwan i kékarang gome begén. Non békénu Kristo sani ongot-ongoté kome. Endob gégumah gétundug begén. Atin gérotor na begén brab fiyon foy ikét i safatos ne, énda médaitu de mukoh.’ ”

<sup>26</sup> Atin féntaus Pablowey kébéréh ne mano, “Do dumo gu do séfu Abraham, brab de begom do békén Judio do méngintulus so, be-tom i fénuwitoy Tuluse bé ni Fiyo Uret fantag bé Mémukase. <sup>27</sup> I de étéw dob Jerusalem brab de odoro ro énda énggétiga ro de ké Jesusey Mémukase. Brab énda énggésobuto roy ménsulate kébéréh i de sénarigoy Tuluse muret bé kébéréh ne fiyon fo ké bénasa ro sénga fadiyan bé de gai kétérén. Endob fiyon fo ké loo bé ni, ténuma ro soy ménsulate bé kékukum ro bé Jesuse. <sup>28</sup> Atin fiyon fo ké énda i funa ro kémukum bé Jesuse, nongot ro so dob Pilatowe féléhuén i Jesuse. <sup>29</sup> Amun énggétumana ron i kéluhanay Ménsulate Kébéréh i Tuluse fantag bé Jesuse, kéndá roy bangkay ne dob kruse brab lénébéng ro dob takube. <sup>30</sup> Endob ténébule i Tulusey Jesuse. <sup>31</sup> Atin dob ménfiroye gétérésangan, médoó gule méntéfégitoy Jesuse dob de étéw ménodor de amun ménagéw mangéy Jerusalem tidéw Galilea bé gétahe. Atin béleewe ni, beroy ménurete dob de Judio. <sup>32-33</sup> Brab ay ni gey inok ureté key dob begomey ni Fiyo Uret, sani Urete fantag bé fasad i Tuluse dob de katufua tom rignoné no. Atin i fasade ni, méntuman so dob betome do séfu ro non ténébuleén i Jesuse. Ay niy ménsulate dob géruwowe Kanta dob Ménsulate Kébéréh i Tuluse mano, ‘Beemey Nga guwe, béleewe ménwaléyu Bohém.’ ”

<sup>34</sup> Atin féntaus Pablowey kébéréh ne mano, “Ay niy bénrehé i Tuluse fantag bé kétébule ne bé Jesuse inok énda mérénah i lowoh ne mano, ‘Tintu iray gu begom i kéluhanay kéfiyonone loo bé fénasad guwe dob Dabide.’ <sup>35</sup> Atin bénrehé so dob Tuluse mano, ‘Enda fédayaé moy lowoh i fiyowe sugu-sugué mo mérénah.’ ”

<sup>36</sup> Atin féntaus Pablowe man i kébéréh ne mano, “I ni sulat békén fantag bé Dabide, non amun énggilid rénigo Dabidey kénsuwatay Tuluse, ménléhu brab lénébéng dob sékuloy de katufua no atin ménrénah i lowoh ne. <sup>37</sup> Endob ténébule i Tulusey Jesuse, énda ménrénah i lowoh ne. <sup>38</sup> Mélaw do dumo gu, fatut gétiga kom i sabaf bé Jesuse saén i géureto keye begom, wén

i kénéfésagadén bé de sala gom. <sup>39</sup> Atin i kéluhanay de méginugut dob Beene émfésagad i de sala ro. Enda émfésagad gom sabaf bé kéodoro kome bé de kitab sénulat Moisesse. <sup>40</sup> Mélaw, ingat gom inok énda mériigo dob begome bénréh i de sénarigoy Tuluse maro, <sup>41</sup> ‘Téngténg gom, begom i de démiyangka bé Tuluse. Mégaif gom bé rigoné kuwe bé béni brab méléhu gom non énda méngginugut gom de, fiyon fo ké wén i téménoro de begom.’ ” Been i niy bénréh Pablowe.

<sup>42</sup> Tidéw béno, ménsutén i Pablowe brab Bernabewe tidéw dob lawie ni féngadafan. Atin bé lala ruwe mésut, rénafit i de étéw man bero séfule bé gékunduge gai kétérén inok ureto ro man bero ségule fantag bé de ni. <sup>43</sup> Amun ménsutén i kéluhanane, médooy de Judio brab do békén Judio do ménggéodor bé kéféngintulus i de Judio, ménodor ro bé ro Pablowe brab Bernabewe. Atin i de ni apostol, nureto ro bero bé fétausé roy kétayakuf ruwe bé kégedaw i Tuluse bero.

<sup>44</sup> Amun dob gékunduge man gai kétérén, gédét kéluhanay de étéw dob no ingéd ménangéy ro dob lawie féngadafan inok mégélingo ro man bé kébéreh i Kadnane. <sup>45</sup> Atin toow fo méndaléw i de Judio amun énggito roy de médooy de étéw. Mélaw ménbéreh ro sébanil bé de béréhé Pablo, brab fénéngiras ro. <sup>46</sup> Endob toow na fo ménfébaraw émbéréh i ro Pablowe brab Bernabewe maro, “Fatut ureté key i kébéreh i Tuluse dob begome do Judio sungu. Endob amun ménika gom de, fénggito gom énda médaat gom gégedot bé umule magufusa. Mélaw tagaké key begom brab mangéy gey muret dob de békén Judio. <sup>47</sup> Non been i niy sugue niray i Kadnane begey mano, ‘Féuwit gu begom maak do solo dob de étéw békén Judio, inok i kéluhanay étéwe dob duniyae ni gélingoo roy kéuret gome brab méfukas ro.’ ”

<sup>48</sup> I de étéw békén Judio, amun énggélingoo roy ni kéuret Pablowe brab Bernabewe, toow ro fo ménoror brab dénayéw roy kébéreh i Kadnane. Atin i de étéw fénémili i Tuluse gégedot bé umule magufusa, ménunur ro bé Kristowe.

<sup>49</sup> Atin i kébéreh i Kadnane ménlalag dob kéluhanay de gonon dob no ingéd. <sup>50</sup> Endob i de Judio rénimbur roy de odoron do lagéy dob no ingéd brab de gérotor libun do békén Judio do méngintulus. Atin féngganaya roy kéférasay ruwe bé ro Pablowe brab Bernabewe brab fénféararéy ro bero dob no ingéd. <sup>51</sup> Mélaw i de apostol ni, téngtag roy de bubuk sébuwan dob de sékéy ro inok féféngétiga ro bé de étéw bé kukuméy Tuluse bero. Atin méntaus ro mangéy Ikonium. <sup>52</sup> Atin i de munur dob Antiokia dob sakuf i ingéde Pisidia, toow ro fo ménoror brab fénémanduoy Rémogor i Tuluse bero.

## 14

### *Dob Ikonium*

<sup>1</sup> Atin loo so bé ménrigowe dob Antiokia, i ménrigowe dob Ikonium. I Pablowe bero Bernabewe ménahur ro so dob lawie féngadafay de Judio. Atin toow fo fiyoy kétoro ruwe, mélaw médooy de Judio brab do békén Judio ménunur bé Kristowe. <sup>2</sup> Endob wén i de Judio do énda méginugut ro brab rénimbur roy de étéw békén do Judio inok waléy ro mékérít bé de munur. <sup>3</sup> Endob i ro Pablowe brab Bernabewe, ménrugay ro na ménbati diyo. Brab ménfébaraw ro muret fantag bé Kadnane. Atin nirayay Kadnane bero barakat inok gériigo ro do mékégaif. Mélaw énggétigay de étéw ni, toow i kéuret ruwe fantag bé kégedaw i Tuluse. <sup>4</sup> Endob énda géféfagayun i de étéw dob no ingéd. I de dumo bé de étéw ménagayun ro dob de Judio. Atin i de dumo bero ménagayun ro dob de apostol.

<sup>5</sup> Tidéw béno, i dumo bé de Judio brab de dumo bé de étéw do békén Judio, beroy de odoro ro, bénantak ro bé dusané ro brab ibéro ro batéw i de apostol inok méléhu ro. <sup>6</sup> Endob amun énggélingoo de apostol i ni bantak ro, ménraréy ro mangéy Litra brab Derbe, brab dob de ségiyo gonon dob sakuf i ingéde Lisonia. <sup>7</sup> Atin diyo nuret roy Fiyowe Uret.

### *Dob Litra*

<sup>8</sup> Atin diyo dob Litra, wén i ségétéwe lagéy fikat non ménsadil i de sékéyén brab énda géagawén tidéw fanay kéumahén. <sup>9</sup> Ménsar brab fénggélingoén i kétoro Pablowe ni. Atin énggito Pablowe kéunur ne funa no fakay waléy adi-adi. Mélaw téngténg Pablowe fo toow. <sup>10</sup> Atin féntanugén i kébéreh ne mano, “Fééntang go tindég.” Sonom béno, ménagayas tésongkow témindég i ni lagéy brab ménadi-adi, brab ménagaw-agéw. <sup>11</sup> Amun énggitoy de étéw i réniigo Pablowe ni, ménkes ro dob karowe késébéreh dob no ingéd Lisonia maro, “Ménlus i de tulus méntéfuwaléy ro do kéilawan mangéy dob betome!” <sup>12</sup> Mélaw féndawét ro Seus i Bernabewe brab féndawét ro Hermes i Pablowe non beeney murete. Non Seus brab Hermes i ruwowe bé de tulus kun féngadaféy de étéw ni. <sup>13</sup> Atin i lawie féngadafa ro bé tulus ruwe féndawét Seus, diyo dob liyuy béngaway ingéd ruwe. Atin amun énggélingooy béliya ruwey ni réniigo Pablowe brab Bernabewe, nuwito no do safi brab do flores inok témulak beroy de étéw dob adafay de apostol.

<sup>14</sup> Amun énggétiga ro Bernabewe brab Pablowe ni réniigo ro, sénkusi roy de kégal ro inok féngito roy kéika ruwe bé ni rigoné ro. Brab léménentu ro mangéy dob kérara i de étéw ni ménribuk brab ménkes ro maro, <sup>15</sup> “Kagom rigonén i nan! Do kéilawan gey

so loo bé begoma nan. Ménangéy gey dini inok ureté key i Fiyowe Uret fantag bé Jesuse inok ikaa komén i de ni do adat énda i do lantékén. Méuyot gey de ké fengadafé kom i tintuwe Tulus sani réménagowe bé lawaye, fantad, dogot, brab kéluhanay éntingayéne. <sup>16</sup> Bé de énggétah do gai, féndaya i Tuluse rigonéy de étéw i kéluhanay karowe kétayan. <sup>17</sup> Endob tidéw féganay, sénga tékélid fénggétiga noy fantage bé Beene dob de kégédaw rénigo no. Iraya no begom rana tidéw dob lawayo inok mérük i de nohok gom ké gai ro. Iraya no begom amaé kom atin féfiyoné noy de fédéw gom.” <sup>18</sup> Endob fiyon fo ké loo bé nan i kébéréh ne, ménkéregénan i Pablowe brab Bernabewe gemélé bero bé kétulaka ruwe bero.

<sup>19</sup> Endob wén i do Judio énggégumah do no ingéd do tidéw Antiokia sakuf i ingéde Pisidia brab do tidéw Ikonium. Atin béaleng roy fédéw i de étéw ni inok sébanil ro bé Pablowe. Mélaw nibéro ro batéw i Pablowe ni inok méléhu ro damén. Tidéw béno, génuyud ro mésut i Pablowe tidéw dob ni ingéd, atin ténagak ro non marok ménliéhuén. <sup>20</sup> Endob amun énggégumah i de dumo no munur bé Kristowe atin sénliwéto ro, téménindég i Pablowe brab ménahur man dob no ingéd. Atin bé démoe de ménagéw i ro Pablowe brab Bernabewe mangéy Derbe.

### *I késéfulé ruwe mangéy Antiokia*

<sup>21</sup> Amun énggumah ro dob Derbe, nuret Pablowe brab Bernabewey Fiyowe Uret atin médooy ménunure bé Kristowe. Tidéw béno, ménéfule ro mangéy Litra brab Ikonium brab Antiokia dob sakuf i ingéde Pisidia. <sup>22</sup> Brab fénbagér roy fédéw i de munur diyo brab bérhého ro bero bé fétausé roy kéodor ruwe brab késarig ruwe bé Jesuse. Brab ménbéreh ro maro, “Kamarasayan tom na médoó gule sungu atin géahur tom dob kékéguléw i Tuluse.” <sup>23</sup> Atin dob séngae do ménlimud do munur, i de apostol, ménémili ro do étéw inok waléy ro odoroy de munur. Atin démasal ro brab fuwasa ro atin sarigé ro bero dob Kadnane, sani unuro ruwe.

<sup>24</sup> Atin ménagéw ro témara bé ingéde Pisidia atin énggumah ro dob Pamfilia. <sup>25</sup> Nuret roy Fiyowe Uret dob ingéde Perga. Tidéw béno léménudug ro mangéy Atalia. <sup>26</sup> Tidéw Atalia, ménda ro barko séfule mangéy Antiokia, dob sakuf i ingéde Siria sani ingéde gonoy de dumo ro munur séménarig bero dob Tuluse inok tabanga no bero bé galbék ruwe mantu séna fénggilid ro.

<sup>27</sup> Amun énggumah ro dob Antiokia, lénimud roy de munur bé Kristowe atin nuret roy kéluhanay de rénigoy Tuluse bé kéagéw ruwe brab fantag bé kébéngaw i Tuluse bé agéwone inok i de étéw békén do Judio géunur ro bé Kristowe. <sup>28</sup> Atin

ménrugay ro ménbati diyo beroy de dumo ro munur bé Kristowe.

## 15

### *I késélimude dob Jerusalem*

<sup>1</sup> Bé béno, wén i de étéw ménangéy Antiokia tidéw Judea brab ténoro roy de munur bé Kristowe maro, “Taman énda fétuli gom loo bé ménbérehé dob kitabe sénulat Moisesé, énda méfukas gom dob de sala gom.”

<sup>2</sup> Endob i Pablowe brab Bernabewe ménika ro bé kétoro ruwe ni brab toow ro fo ménkérit brab ménése dél ro bé de ni do étéw. Atin ménésefagayun ro kéluhanan bé i ro Pablowe brab Bernabewe brab de dumo do munur dob Antiokia, mangéy ro dob de apostol brab dob de odoroy de munur dob Jerusalem inok fénginsaé roy fantage bé ni.

<sup>3</sup> Atin i de étéw do munur dob Antiokia sénugu ro bero mangéy Jerusalem. Atin bé kéagéw ruwe, énggétara ro dob de ingéd féndawét Fenisia brab Samaria. Atin diyo nuret roy fantage bé de étéw do békén Judio ménwaléy do munur. Mélaw i de munur dob do no ingéd toow ro fo ménoror amun énggélingoo roy de ni. <sup>4</sup> Amun énggégumah ro dob Jerusalem, i de munur brab de apostol brab do odoron, ténayakuf ro bero. Atin i Pablowe brab Bernabewe nuret roy kéluhanay rénigoy Tuluse dob berowe. <sup>5</sup> Endob i de dumo bé de Fariseo do ménwaléy munur bé Kristowe, téménindég ro brab ménbéreh ro maro, “Fatut tulién i de étéw do békén Judio do ménwaléy munur bé Kristowe brab fatut suguéw ro bé odoro roy kéluhanay de kukuman sénulat Moisesé.”

<sup>6</sup> Atin ménése limud i de apostol brab do odoron inok sétiyawané roy fantage bé ni. <sup>7</sup> Amun ménrugay ron ménése béréh-béréh, téménindég i Pedrowe brab ménbérehéh mano, “Do dumo gu, énggétiga kom i ni: Bé i kéluhana tome dini, fénéмили i Tuluse begén bé do géta h inok ureté kuy Fiyowe Uret dob de békén Judio inok munur ro so. <sup>8</sup> I Tuluse gétiga noy fédéw i kéluhanay étéwe. Atin fénténgténén i kétayakuf ne bé de békén Judio bé kéiray ne bé Rémogor ne dob berowe ségiléw so bé kéiray ne de dob betome. <sup>9</sup> Enda fénsébida no betom bé berowe non lénimisén soy de fédéw ro non ménunur ro bé Kristowe. <sup>10</sup> Aw méuyot gom rémigo bé kéikaay Tuluse funa no kémukum begom? Aw féodoro kom beroy de sugu tidéw dob kitab Moisesé fiyon foy de katufua tom brab betome énda énggéodoro tom de? <sup>11</sup> Békén i nan! Munur tom bé méfukas tom sabaf bé kégédaw i Kadnane Jesus, betom ségiléw so bé berowe.”

<sup>12</sup> Tidéw béno, ménantés ro kéluhanan amun énggélingoo roy béréh ro Bernabewe brab Pablowe fantag bé de mékégaif fénrigoy Tuluse bero amun diyo ro dob de étéw

békén Judio. <sup>13</sup> Amun énggilid ron émbéréh, mémbéréh i Santiagowe mano, “Do dumo gu, féngélingo gom! <sup>14</sup> I Simon Pedrowe, mantu séna nuretén dob betomey sunguwe kégedaw i Tuluse dob de békén Judio amun fénmilién i de dumo bero ménwaléy so do kaan étéw munur bé Beene. <sup>15</sup> Ségiléw so bé niy bénréh i de méntélata do sénarigoy Tuluse muret bé kébéreh ne. Non sénulat ro mano, <sup>16</sup> ‘Ménbéreh i Kadnane mano, séfuleu moso dob de séfu Datu Dabid. Brab fétingégé ku man bero non ségiléw ro bé sébaane lawi ménrundas. <sup>17</sup> Rigoné kuy ni inok i kéluhanay de étéw munur ro dob Begéne, loo soy de étéw békén Judio do fénmili gu waléy kagén do étéw. <sup>18</sup> Been i niy bénréh i Kadnane, sani ménféngétigane bé de ni tidéw féganay.’”

<sup>19</sup> Atin féntaus Santiagowey kébéreh ne mano, “I kagéne de karang, énda damén férégéno tom i de étéw békén Judio énggésénule ron brab munur ro bé Tuluse. <sup>20</sup> Yamula, sulata tom bero, bé békén ro sa mama bé amaéne ménwaléyén mékérésik dob adafay Tuluse non ténulak dob de kéninontow, brab békén ro bigaén, brab békén amaé roy de binatang énda ménsumbalién, brab békén ro mama dara. <sup>21</sup> Fatut rigoné roy ni inok énda mékérít i de Judio non ménrugayén i de kitab sénulat Moisee, ménbasanén dob kéluhanay de lawi féngadafay de Judio sénga gai kétéren, atin ménuretén dob kéluhanay de ingéd.”

### *I sulate mangéy dob de munur do békén Judio*

<sup>22</sup> Tidéw béno, i de apostol brab de odoron brab kéluhanay de munur bé Kristowe, ménséfagayun ro ménémili bé de dumo bero. Atin fénuwit ro bero mangéy Antiokia ménodor ro bé Pablowe brab Bernabewe. Brab fénmili roy Judase (féndawét so Barsabas) brab Silase sani de ruwo gétéw toow fo basanay de munur. <sup>23</sup> Atin fénuwit ro beroy sulate ni émbéréh mano, “I de begey do apostol brab do odoron, sani de dumo gom munur bé Kristowe dob Jerusalem, ségifaé key begom do dumo gey munur bé Kristowe do békén Judio bati dob Antiokia, dob Siria, brab dob Silisia. <sup>24</sup> Enggélíngoo key wén i do dumo gey ménangéy dob begome brab fénbuku roy de fédéw gom bé de kébéreh ro. Endob énda sénugu gey bero rémigo bé de ni. <sup>25</sup> Mélaw ménséfagayun gey ménémili do lagéy inok sugué key bero mangéy dob begome. Modor ro bé Pablowe brab Bernabewe sani de kégedawa key do dumo tom. <sup>26</sup> Beroy de étéw niray roy férénawa ruwe dob galbék i Kadna tome Jesu Kristo. <sup>27</sup> Mélaw sugué key i ro Judase brab Silase inok ureté ro dob begomey ségiléwe bé ni sénulat gey. <sup>28</sup> I Rémogor i Tuluse fénggésobutén begey brab

ménagayun gey bé éndaén férégénon gom saliyyu bé de ni do sugu: <sup>29</sup> Kagom mama bé étingayéne ténulak dob de kéninontow, brab kagom mama dara, brab kagom mama bé de binatang énda ménsumbalién, brab kagom bigaén. Fiyo ké odoro kom i de ni. Been say niy bérehé keye begom. Salamat.”

<sup>30</sup> Tidéw béno, ménagéw i de sénugu ro ni mangéy Antiokia. Amun énggégumah ro diyo, ténawag roy kéluhanay de munur bé Kristowe brab niray roy ni sulat. <sup>31</sup> I de étéw diyo amun énggébasana roy ni sulat, toow ro fo ménoror bé de ni kébéreh funay de fédéw ro ménfiyo. <sup>32</sup> Atin i ro Judase brab Silase (beroy de sénarigoy Tuluse muret bé kébéreh ne), ménrugay i kéureto ruwe bé de étéw inok waléy fiyoy de fédéw ro brab inok waléy méégét i kéunur ruwe bé Kristowe. <sup>33</sup> Atin ménbati ro diyo bé ménfiroye géfadiyan. Tidéw béno, fénséfule i de dumo ro munur bero mangéy Jerusalem dob de étéw séménugu bero. Atin ménbéreh ro mano, “Fiyo damén i kéagéw gome.” <sup>34</sup> Endob i Silase ménbati dob Antiokia.

<sup>35</sup> I Pablowe brab Bernabewe ménbati ro dob Antiokia bé ménfiroye gétérésang kélungonon. I berowe brab de médoos do dumo ro munur bé Kristowe, nuret ro brab ténoro roy kébéreh i Kadnane dob de étéw.

### *I késésuway Pablowe brab Bernabewe*

<sup>36</sup> Enda ménrugayén tidéw béno, i Pablowe bénréhén dob Bernabewe mano, “Séfule to mangéy dob de ingéd nureto to bé kébéreh i Kadnane inok angéyé to tukawén i de dumo tom munur bé Kristowe brab inok gétiga to ké ati falas ruwe diyo.” <sup>37</sup> Atin i Bernabewe méuyot de ké uwitén i Juane Markose. <sup>38</sup> Endob i Pablowe ménika muwit bé Juan Markose non ténagakén bero dob Pamfilia brab énda ménfédaydayén modor bero dob galbék i Tuluse. <sup>39</sup> Mélaw i Pablowe brab Bernabewe toow ro fo énggésédél fantag bé Juan Markose. Tidéw béno ménsésuway ro. Nuwit Bernabewey Juan Markose ménda bé barkowe mangéy Siprus. <sup>40</sup> Atin i Pablowe fénmilién i Silase modor de. Atin i de dumo ro do munur déménasal ro dob Kadnane inok Been i mananguwit bero bé kéagéw ruwe brab mégédaw bero. <sup>41</sup> Atin ménagéw ro mangéy Siria brab Silisia, brab fénbagér roy kéunur i de dumo ro munur bé Kristowe dob de ni do ingéd.

## 16

### *Ménodor i Timoteowe*

<sup>1</sup> Atin i Pablowe ménangéy dob de ingéd féndawét Derbe brab Listra. Diyo wén i ségétéwe lagéy munur bé Kristowe féndawét Timoteo. I idéng ne ségétéw libun Judio, munur bé Kristowe. Endob i boh ne békén Judio, i beene ségétéw lagéy Griego. <sup>2</sup> Atin i



kéluhanay de munur bé Kristowe dob Listra brab Ikonium bénréh roy fiyowe fantag bé Timoteowe. <sup>3</sup> Atin i Pablowe ni ménuyot muwit bé Timoteowe ni modor bero. Mélaw ténúlién loo bé adat i de Judio. Rénigo noy ni inok énda siyawéy de Judio de, non i kéluhanay de Judio dob de ingéd ayo ro, gétiga roy bekén Judioy boh ne. <sup>4</sup> Atin ménagéw ro man. Amun ménawét ro dob de ingéd, nuret ro dob de munur bé Kristowey de sugu sénfagayunoy de apostol brab do odoron bé késélimud ruwe dob Jerusalem. Atin bénréh ro bero bé odoro roy de ni do sugu. <sup>5</sup> Mélaw i de ménlimud do munur bé Kristowe ménwaléy émbagér i kéféginugut ruwe brab méninut ro médoó sénga fuweh.

### *Dob Troas*

<sup>6</sup> Ménagéw ro témara bé de sakuf i de gonon féndawét Frigia brab Galasia, non i Rémogor i Tuluse énda ténungkasén bero muret dob Asia. <sup>7</sup> Amun énggumah ro dob gonone féndawét Misia, téménlama ro mangéy Bitinia. Endob i Rémogor Jesuse énda ténungkasén bero mangéy diyo. <sup>8</sup> Mélaw léméndug ro mangéy dob ingéde Troas dob fédoror i dogote, témara bé gonone Misia. <sup>9</sup> Amun bé kélungonone de wén i énggétéginéfo Pablowe, non wén i fénggitoy Tuluse de. Atin énggito noy ségétéwe lagéy tidéw Masedonia téménindég brab nongotén dob Pablowe man, “Ay go dini dob Masedoniawe ni brab tabangén gey.” <sup>10</sup> Amun énggilid i ni téginéf, ménagékés gey mangéy Masedonia, non gétiga key ténawag i Tuluse begey dob Masedonia inok toroé key diyo i Fiyowe Uret.

### *Dob Filipos*

<sup>11</sup> Dob Troas, ménda gey barko fééntang mangéy dob bungéde Samotrasia. Atin bé gétunduge de fuweh, méntaus gey mangéy Neapolis. <sup>12</sup> Atin tidéw man Neapolis, ménagéw gey dob ingéde féndawét Filipos. Been i niy mélagae dakél ingéd dob sakuf i Masedoniawe. Brab médooy de étéw tidéw Roma bati diyo. Atin ménbati gey diyo bé ménfiroye gétérésangan. <sup>13</sup> Bé gaiy kétéréne, ménsut gey tidéw dob ingéde ni brab ménangéy gey dob fédoror i dakéle wayég, non makey ké diyo i gonoy de Judio démasal. Amun énggumah gey diyo, ménsar gey brab ménsébéréh-béréh gey i de libun ménlimud diyo. <sup>14</sup> I ségétéwe bé de ni do libun, i dawét ne Lidia, tidéw dob ingéde féndawét Tiatura. I galbék ne émfébéley bé de balilaga furo safut. Tintu fo méngintulus i ni libun. Atin féntayakuf i Kadnaney fédéw ne atin ménunur bé de kétoro Pablo. <sup>15</sup> Mélaw ménfébautis i ni libun brab de dumo no sétifon. Tidéw béno bénréhén begey man, “Amuk gékaranga kom tintuwu fo munur bé

Kadnane, ay gom dob lawi guwe atin diyo gom bati.” Mélaw féndorén begey.

### *I Pablowe dob férisunone*

<sup>16</sup> Wén i no sébaan fuweh, bé lala geye magéw mangéy dob gonone démasal, wén i ségétéwe rifén kénogon énggéalaka no begey. Rénahukoy saitane, komon gébéreho noy ati mérigowe moso dob de gégumah do gai. Atin dakél i gédotéy de gefe de kurta bé ni galbékén béréhé noy ati mérigowe moso dob de étéw. <sup>17</sup> Atin ménfuray begey ro Pablowe brab ménkes man, “I de ni do étéw, beroy sugu-suguéy toowe fo gérotor Tulus. Ureté ro dob begomey atiy géfukase begom.” <sup>18</sup> Beeniy rénigo nuwe bé ménfiroye gétérésangan taman ménrarék i Pablowe. Mélaw sénaréwén ténéngténgén i ni kénogon brab ménbéréh dob saitane man, “Dob barakat Jesu Kristowe, sugué ku beam tékédan dob ni kénogon!” Sonom béno, méntékédan i saitane dob beene. <sup>19</sup> Endob i de gefe bé ni rifén, amun énggito ro éndaén gégédot ro de kurta, ménkérit ro fo toow. Atin kénéfo roy ro Pablowe brab Silase, atin génuyud ro bero mangéy dob de gémamak kukuman dob fadiyane. <sup>20</sup> Atin nuwit ro bero mangéy dob adafay de odoron tidéw Roma, brab bénréh ro maro, “I de ni do étéw, do Judio. Rimburé roy katome ni ingéd. <sup>21</sup> Toroé roy adate sébanil bé de kukuma tom. Do Romano tom, brab énda fakayén odoro tom i nan adat toroé ro.” <sup>22</sup> Atin médooy de étéw ménamung lémubag bé ro Pablowe brab Silase.

Atin i de odoron fénkéda roy de kégal ro Pablo brab Silas brab fénbadas ro bero. <sup>23</sup> Amun énggilid ro bénadas fo toow i ro Pablowe brab Silase, fénrisu ro bero, atin bénréh ro dob mantaye bé férisunone bé toow fo bantaya no bero. <sup>24</sup> Mélaw fénahurén bero dob sibéye dob kérara i férisunone brab fénatungén i de sékéy ro dob toowe fo émbégat do dakél kayéw inok énda gégéw ro.

<sup>25</sup> Amun kérara kélungononén, i ro Pablowe brab Silase déménasal ro brab kéménanta ro dob Tuluse. Atin fénggélino i de dumo ro férisu. <sup>26</sup> Atin méntékow léménuba toow fo émbagér, atin i férisunone ni ménkuyung fo toow. Brab sonom so béno, ménungka i kéluhanay de fintu. Atin ménukoh i de sangkali fénggéikét bé de sékéy i de férisu. <sup>27</sup> Atin ménuléy i mantaye bé de férisu. Amun énggito no ménungka i kéluhanay de fintu, manok énggésut i kéluhanay de férisu. Mélaw nawitén i sundang ne dob ruma ne brab fétoyóén damén, non gétiga no féléhuéy de odoron amuk énggésut i de férisu. <sup>28</sup> Amun gédétén damén fétoyó, ténawag Pablowe mékes man, “Kago fétoyó, ay ni gey so kéluhanan!”

<sup>29</sup> Atin i mantaye ni bé de férisu, téménawag ménongot solo brab ménségéta mahur dob férisunone ni. Toow fo léménukub bé kégilak ne, brab méntélingkéb dob adafay de séký ro Pablo brab Silas. <sup>30</sup> Tidéw béno, nuwitén bero mésut brab féninginsaa no bero mano, “Ati fatute rigné ku inok méfukasu dob de sala gu?”

<sup>31</sup> Atin séménambul ro maro, “Unur go bé Kadnane Jesus atin méfukas go. Beeme brab de samungém so.” <sup>32</sup> Atin nuret roy kébéreh i Kadnane dob beene brab dob kéluhanay de dumo no sétifon. <sup>33</sup> Atin bé béno so kélungonon, i mantaye ni nurahén i de fali ro. Atin tidéw béno, ménagayas ménfébautis beroy de samungén. <sup>34</sup> Atin fénlowotén i ro Pablowe brab Silase dob lawi ne brab fénaaén bero. Atin i ni ségékuréng toow fo ménoror non ménunur ron bé Tuluse.

<sup>35</sup> Atin bé géfuwéne de, i de odoron bé no ingéd, sénégu roy de sarigon mangéy dob férisunone inok tangéy ro bero. <sup>36</sup> Mélaw i mantaye bé férisunone béréhén dob Pablowe mano, “I de méguléw séménugu ro bé féésutén go brab Silase. Mélaw ésut gomén brab kagomén émbuku.”

<sup>37</sup> Endob ménbéréh i Pablowe dob de sarigon mano, “Enda i funa ro begey kémukum. Gido loo bénadas ro begey dob féngaangay médoowe étéw, brab férisu ro begey fiyon fo ké énda méntiyawan gey. Brab i begeye do Romano so! Atin béleewe bunéy ro saén i kéféésut ruwe begey! Enda fakayén! Béréh gom dob de méguléw tidéw Roma, beroy mangéye dini émféésut begey.”

<sup>38</sup> Atin i de sarigon ménséfule ro dob de méguléw tidéw Roma brab nuret roy kébéreh Pablowe. Atin amun énggélíngoo ro Romano so wayoy ro Pablowe brab Silase, toow ro fo ménggilak. <sup>39</sup> Mélaw ménagéw ro mangéy dob férisunone brab nongot ro dob Pablowe brab Silase bé fésgadéw ro bero. Tidéw béno, nuwit ro bero mésut tidéw dob férisunone brab nongot ro dob berowe bé tékédan ronén dob ni ingéd. <sup>40</sup> Atin i ro Pablowe brab Silase, amun ménsut ronén dob férisunone, méntaus ro mangéy dob lawi Lidiahe. Atin diyo énggito roy de dumo ro munur bé Kristowe. Brab béréh ro beroy fiyowe inok fiyowe de fédéw ro. Tidéw béno méntékédan ro.

## 17

### *Dob Tesalonika*

<sup>1</sup> Atin amun méntaus magéw i ro Pablowe brab Silase, énggétara ro dob de ingéd féndawét Amfipolis brab Apolonia, atin énggégumah ro dob ingéde féndawét Tesalonika. Atin diyo wén i lawie féngadafan kay de Judio. <sup>2</sup> Atin i Pablowe loo bé adat ne ménahur dob lawie ni féngadafan. Méntélew gé-Sabadoy no, sani gaiy kétéré

ruwe, i Pablowe ménsébéréh-béréh bé de étéw atin i kébéreh ne tidéw dob Ménsulate Kébéreh i Tuluse. <sup>3</sup> Fénggétiga no bero tidéw dob ni ménsulat bé mérasay i Kristowe brab tébule. Ménbéréh i Pablowe mano, “Béréhé ku begom i toowe fantag bé Jesuse. Beeney Kristowe, sani fénémili i Tuluse méguléw.” <sup>4</sup> Atin wén i de ménunur bero brab nodoro roy ro Pablowe brab Silase. Loo soy médoowe do Griego méngintulus brab do gérotor do libun.

<sup>5</sup> Endob i de Judio méndaléw ro, mélaw lénimud roy de tete étéw do énda i galbék ro tidéw dob de aguwon atin rénimbur roy ingéde ni. Atin dénunsuk roy lawi i ségétéwe lagéy féndawét Jason inok séléde roy ro Pablowe brab Silase, brab inok uwité ro bero dob adafay de médoowe étéw. <sup>6</sup> Endob amun énda énggito ro bero, nuwit roy Jassone brab de dumo no munur bé Kristowe mangéy dob de méguléw bé ni ingéd. Atin ménkes ro maro, “Wén i de étéw réménimbur bé kéluhanay de ingéd. Atin béleewe ni, ay ni ro énggégumah dob katome ni ingéd. <sup>7</sup> Atin i Jassone ni, fénbatién bero dob lawi ne. I kéluhana ruwe réménigo ro bé kékéne fatut dob kitabe tidéw dob Datu tome dob Roma. Non béréh roy wén i ségiyo datu, sani féndawéte Jesus.” <sup>8</sup> Amun énggélíngoo roy ni kébéreh, ménrimbur i de médoo do étéw ménlimud brab de méguléw bé ni ingéd. <sup>9</sup> Tidéw béno, i de méguléw fénégés roy Jassone brab de dumo no mayad loo bé adat ruwe inok métangéy ro. Tidéw béno fénsut ro bero.

### *Dob Berea*

<sup>10</sup> Amun kélungononén, i de dumo ro munur bé Kristowe, fénuwit roy Pablowe brab Silase mangéy dob ingéde féndawét Berea. Amun énggégumah ro diyo, ménangéy ro dob lawie féngadafay de Judio. <sup>11</sup> Atin i de étéw dob Berea, toow na fo fiyoy adat ruwe bé de étéw dob Tesalonika. Toow ro fo méuyot mégélingo bé kétoro Pablowe. Atin féganadé roy Ménsulate Kébéreh i Tuluse sénga fuweh inok susiné ro ké toow i kétoro Pablowe. <sup>12</sup> Atin médoo ro ménwaléy munur bé Kristowe. Loo soy de Griego, do lagéy brab do libun do gérotor dob no ingéd. <sup>13</sup> Endob i de Judio dob Tesalonika, amun énggélíngoo roy Pablowe muret bé kébéreh i Tuluse dob Berea, ménangéy ro diyo brab rénimbur roy de médoo étéw diyo. <sup>14</sup> Mélaw i de munur bé Kristowe féngagayas ro fénuwit i Pablowe mangéy dob fédoror i dogote, éndob ménbati i Silase brab Timoteowe dob Berea. <sup>15</sup> I de déménuran bé Pablowe ménodor ro de taman Atenas. Tidéw béno ménséfule ro mangéy Berea. Atin nuwit roy kébéreh Pablowe dob ro Silase brab Timoteowe bé furay ro de magad.

*Dob Atenas*

<sup>16</sup> I lala Pablowe ongot-ongot bero dob Atenas, toow fo ménbuku non médooy foy de kéninontow dob no ingéd. <sup>17</sup> Mélaw i Pablowe ménsébéréh bé de Judio brab de békén do Judio do méngintulus dob lawie féngadafan. Brab sénga fuweh ménsébéréh-béréh so dob fadiyane bé de étéw témara. <sup>18</sup> Ménsébéréh soy Pablowe bé de maistéro témoro bé kénéngitang i de Griego diyo féndawét Epikureo brab Estoiko. Atin ménbéréh i de dumo bero maro, “Ati béréhéy nan félangka-langka étéw énda i gétiga-tiga no?”

Atin bang i de dumo de, “Béréhé no keyén i de tulus dob de ségiyo ingéd.” Bénréh roy ni non nuret Pablowey fantage bé Jesuse brab kétébulee. <sup>19</sup> Mélaw nuwit roy Pablowe mangéy dob adafay de ménlimud do odoron, sani féndawét ruwe Areopayo brab ménbéréh ro maro, “Méuyot gey gétigan fantag bé ni mantu kétoro béréhé mo. <sup>20</sup> Enda gésobuto key i de dumo bé de kébéréhém non toow fo ségiyo bé kageye kénéngitung. Brab méuyot gey de ké gétiga key i atag i de ni.” <sup>21</sup> (Loo bé niy kébéréh ruwe non i kéluhanay de étéw dob Atenas brab de étéw tidéw dob de ségiyo ingéd bati diyo, méuyot ro mégélingo brab séuret-uret bé de mantu uret sénga tékélid.)

<sup>22</sup> Mélaw téménindég i Pablowe dob téngaangay kéluhanay de odoron diyo ménlimud. Atin ménbéréh mano, “Do étéw dob Atenase ni, énggito gu toow gom fo mégéror méngadaf. <sup>23</sup> Non amun ménsugud-sugudu dob kagome ni ingéd brab ténéngténg guy de gono kom méngadaf, énggito guy sébaane gono kom méngadaf témulak. Wén i sénulate de mano, ‘Dob ni, féngadafén i tuluse énda gélolono.’ I nan féngadafé kom fiyon fo ké énda gélolo gom de, Been i ni ureté ku begom. <sup>24</sup> I Tuluse léménimbag bé duniyae ni brab kéluhanay éntingayéne. Been i Kadnaya lawaye brab duniyae. Atin énda batién dob de lawi rénigoy kéilawane. <sup>25</sup> Atin énda i éntingayén kailanga no géiray i étéwe de tidéw dob de génalbéko no. Non Beeney méniraye bé kéuyage brab férénawaye dob kéluhanay de étéw brab Been soy miraye bé kéluhanay éntingayéne kailanga tom. <sup>26</sup> Tidéw dob ségétéwe étéw, rénigo noy kéluhanay de séségiyo-giyo do étéw brab bénragarén betom dob duniyae ni. Atin Been i ménémilie bé de gai tom brab de gono tom bati. <sup>27</sup> Rénigo noy ni inok i de étéw séléde roy Tuluse brab dob késéléde ruwe de, gito ro so keeyén. Endob i toowe, énda mérayu i Tuluse dob betome do étéw. <sup>28</sup> ‘Non tidéw dob Beeney kéuyage tome brab férénawa tome brab kégéagéw tome.’ Loo so bé niy bénréh i de dumo gom do muret binuwaya maro, ‘Betome soy de ngaén.’”

<sup>29</sup> Atin féntaus Pablowey kébéréh ne mano, “Non betom i do nga i Tuluse, katom karangén de ké i falas i Tuluse loo bé falas i de kéninontow do bélowon taloo no do filak taloo no do batéw rénigoy kéilawane. <sup>30</sup> Féndaya i Tulusey éndae kégéloloy de étéw de bé do gétah, brab énda kénukumén bero. Endob béleewe ni sénuguén i kéluhanay de étéw dob kéluhanay de ingéd bé fatut ro gésénule bé de tete rigoné ro brab fatut tagaké ro. <sup>31</sup> Non fénémili i Tuluse nén i gaiwe ké kukumé non i kéluhanay de étéw dob duniyae ni bé toowe fo méntintu. Atin i fékukumé nuwe Been i fénémili ne. Atin fénggélolo noy ni dob kéluhanay de étéw bé kétébulee ne de tidéw bé kéléhu ne.”

<sup>32</sup> I de dumo bé de étéw diyo, amun énggélingoo roy kébéréh Pablowe fantag bé kétébulee, déniyangka roy Pablowe. Endob i de dumo de ménbéréh ro maro, “Méuyot gey man mégélingo beem muret féruman fantag bé de ni.” <sup>33</sup> Mélaw méntékédan i Pablowe tidéw dob de ménlimud ni do étéw. <sup>34</sup> Atin i de dumo bé de étéw ni ménwaléy ro munur bé Jesuse brab nodoro roy Pablowe. Ségétéw beroy lagéye féndawét Dionisio, ségétéw kénéfédeyan diyo. Brab ségétéw so libun féndawét Damares brab wén soy do ségiyo do étéw do ménunur.

**18***Dob Korinto*

<sup>1</sup> Amun énggild i ni, méntékédan i Pablowe dob Atenas brab ménangéy dob ingéde féndawét Korinto. <sup>2</sup> Diyo énggéalaka noy ségétéwe Judio féndawét Akila tidéw Ponto. Mantu séna énggumah tidéw Italia beroy bawag ne féndawét Prisila, non i datue féndawét Klaudio, féntékéda noy kéluhanay de Judio diyo dob Roma. Atin nangéy Pablowe bero lénangu. <sup>3</sup> Atin ménbati diyo non ségiléw i galbék ruwe Akilawe rémigo tulda. Brab ténabanga no bero gémalbék. <sup>4</sup> Sénga gai kétéren, ménangéy i Pablowe dob lawie féngadafay de Judio, atin ménsébéréh bé de étéw diyo inok i de Judio brab de békén Judio waléy ro géunur bé Kristowe.

<sup>5</sup> Amun énggumah i ro Silase brab Timoteowe tidéw Masedonia, éndaén gémenalbék i Pablowe saliyo bé kéuret ne fantag bé Jesuse. Nuretén dob de Judioy Jesusey Kristowe, sani fénémili i Tuluse méguléw. <sup>6</sup> Amun ménwaléy ro sébanil bé Pablowe brab bénrého ro do tete, ténagtag Pablowey de bubuk sébuwan dob kégal ne, brab ménbéréh mano, “Békénén kagén aturan ké énda méfukas gom. Yamula do begom soy séndito kom de. Tidéw béleewe ni mangéyun muret dob de békén Judio.” <sup>7</sup> Mélaw méntékédan diyo brab ménangéy bati dob lawi i ségétéwe lagéy békén Judio

méngintulus féndawét Titio Justo. Ménsédoror i lawi ne dob lawie féngadafay de Judio. <sup>8</sup> Atin i lagéye féndawét Krispo, beeney méguléwe bé lawie féngadafan. I ni lagéy tintu fo ménunur bé Kadnane, loo soy kéluhanay de samungén. Atin wén i de médo do ségiyo étéw dob Korinto énggélíngoo roy Fiyowe Uret, brab ménunur ro brab ménfébautis ro.

<sup>9</sup> Wén i no sébaan kélungonon, i Pablowe wén i énggétéginéfo no brab i Kadnane ménsébéréh de mano, “Kago mégilak! Fétausém i kéuret me. Fiyon fo ké ati mérigowe, kago térénon i galbék me. <sup>10</sup> Non dé moyunu modor beam. Enda gésug-sug go non médooy de kagén étéw dob ni ingéd.” <sup>11</sup> Mélaw ménbati diyo bé rugay i ségébélintuwaé bra ném gétérésang kélungonon témoro bé kébéreh i Tuluse.

<sup>12</sup> Amun ménwaléy gubernador i lagéye féndawét Galion dob Akaya, ménsélimud i de Judio brab kénéfo roy Pablowe brab nuwit ro dob adafay gubernadore ni inok kukumé no. <sup>13</sup> Atin bénréh ro maro, “I ni lagéy, féféngintulusé noy de étéw bé békéne fatut dob kitab geye.”

<sup>14</sup> Amun émbéréhén damén i Pablowe, ménbéreh i gubernador Galione dob de Judio mano, “Amuk tete i rénigo nuwe taloo no énda nodoro noy kukumay de Romano, fakay gétingkéló ku begom do Judio brab begén i kémukum de. <sup>15</sup> Endob i de ni funa kom de sébanil, been say fantage bé de dawét brab de kébéreh dob kagome kitab. Mélaw begom séden i kémukum de, non békén begén i kémukum de.” <sup>16</sup> Brab féntékéda no bero dob gonone ni kémukum. <sup>17</sup> Tidéw béno, kénéfo roy lagéye méguléw bé lawie féngadafay de Judio féndawét Sostenes brab léubag ro dob téngaangay gonone kémukum. Endob féndaya Galione saén, brab énda méntete i fédéw ne de.

#### *I késéfulé ro Pablowe mangéy Antiokia*

<sup>18</sup> Amun ménggilid i ni, ménbati nay Pablowe dob Korinto bé ménfiroye gétérésangan. Tidéw béno, ménggétaw dob de dumo no munur bé Kristowe. Amun énggumah dob Senkrea, ménfétebungow non méntumanén i fasade rénigo no. Tidéw béno, ménda barko bero ro Prisila brab Akila mangéy Siria. <sup>19</sup> Amun énggumah ro dob Efeso, téngak Pablowe ro Akilawe brab Prisilawe atin ménangéy dob lawie féngadafay de Judio. Atin diyo ménsébéréh bé de Judio. <sup>20</sup> Atin nongot ro dob beene ké férugay na bati dob berowe. Endob énda ménagayu no. <sup>21</sup> Yamula amun mégétawén, bénréhén bero mano, “Amuk kétayay Tuluse, séfuleu so mangéy dini.” Tidéw béno, ménda barko brab méntékédan dob Efeso.

<sup>22</sup> Amun déménunggu dob Sesaria ménangéy i Pablowe Jerusalem inok angéy no ségifaén i de munur bé Kristowe diyo. Tidéw béno, méntaus mangéy Antiokia. <sup>23</sup> Atin ménbati saén diyo bé ménfiroye géfadiyan. Tidéw béno ménagewén man. Atin ménawét man dob de gonon dob sakuf i de ingéd féndawét Galasia brab Frigia brab féngéjén i kéunur i kéluhanay de kuyug Jesus diyo.

#### *Fantag bé Apolose*

<sup>24</sup> Atin wén i ségétéwe Judio féndawét Apolos tidéw Alejandria, énggumah dob Efeso. Toow fo fiyo muret brab tintu fo gétiga noy Ménsulate Kébéreh i Tuluse. <sup>25</sup> Méntoro fo bé fantage bé Agéwoy Kadnane. Atin toow fo émbagér i kéuret ne brab kétoro ne fantag bé Jesuse. Katabuwan fo brab toow i kétoro ne, éndob i gétiga nuwe saén i kébautis Juane. <sup>26</sup> Atin méngganay fébaraw émbéréh dob lawie féngadafay de Judio diyo, atin énggélíngoo ro Akilawe brab Prisilawe. Mélaw nuwit ro mangéy dob lawi ruwe brab nuret ro dob beeney kéluhanay éndae séna gétiga no fantag bé Agéwoy Tuluse. <sup>27</sup> Tidéw béno, ményuyot i Apolose mangéy Akaya. Mélaw i de dumo no munur bé Kristowe dob Efeso, téngabanga ro atin séménulat ro dob de dumo ro munur bé Kristowe dob Akaya inok tayakufé ro ké gégumah diyo. Atin amun énggégumah i Apolose diyo, toow fo dakél i kétabang ne bé de étéw do ménwaléy munur bé Kristowe sabaf bé kégedaw i Tuluse. <sup>28</sup> Non tabanan i de Judio de ké séédél ro dob téngaangay de médo étéw. Non tidéw dob Ménsulate Kébéreh i Tuluse fénggéloló noy Jesuse, Beeney Kristowe.

## 19

#### *I Pablowe dob Efeso*

<sup>1</sup> Amun diyo i Apolose dob Korinto, i Pablowe ménawét dob de ingéd fingé dagé taman énggumah dob Efeso. Atin diyo énggito noy de dumoy de kuyug Jesus. <sup>2</sup> Brab fénénginsaa no bero mano, “Amun munur gomén, aw énggumahén i Rémogor i Tuluse dob begome?”

Séménumbul ro maro, “Enda gétiga key de ké wén i Rémogor i Tuluse.”

<sup>3</sup> Atin ménénginsa man i Pablowe mano, “Ati funa kome ménfébautis?”

Séménumbul ro maro, “Ménfébautis gey bé Juane inok fégito gey i kéunur gey bé kétoro ne.”

<sup>4</sup> Atin ménbéreh man Pablowe mano, “I kébautis Juane, been i nan i féngélonone bé kégésénule i de étéw bé de sala ro. Atin bénréh Juane dob de Judio bé fatut ro munur bé étéwe gégumah gétundug de, sani Jesuse.”

<sup>5</sup> Amun énggélíngoo roy ni, ménfébaütis ro inok fégitó roy kéunur ruwe bé Kadnane Jesus. <sup>6</sup> Atin ténégé Pablówe bero atin énggumah i Rémogor i Tuluse dob berowe. Atin énggésébéréh ro bé de ségiyo késébéréh énda gétiga ro de brab nuret roy kébéréh i Tuluse. <sup>7</sup> Gédét ro folo bra ruwo gétéw diyo.

<sup>8</sup> Bé rugay i méntéléwe gétérésang kélungonon diyo, i Pablówe démojunén mahur dob lawie féngadafay de Judio brab ménsébéréh bé de Judio diyo. Atin toow fo émaraw muret émféunur bero bé kéféguléw i Tuluse. <sup>9</sup> Endob i de dumo bero toow fo métégas i de uléw ro, mélaw mika ro munur. Atin ménbéréh ro na tete fantag bé Agéwoy Kadnane dob téngaangay kéluhanay de étéw ménlimud. Mélaw méntékédan i Pablówe diyo brab nuwitén i kéluhanay de kuyug Jesus. Atin féntausén i kétoro ne bero dob sékuwelahane ka Tiranowe sénga fuweh. <sup>10</sup> Atin téménoro diyo bé ménruwowe gébélintuwa. Mélaw i kéluhanay de étéw bati dob Asia, do Judio brab do békén Judio, énggélíngoo roy kébéréh i Kadnane.

### *I de nga Eskeba*

<sup>11</sup> Atin fénrigoy Tuluse do médoó mékégaif i Pablówe. <sup>12</sup> Fiyon i de munsala brab do tuwaliya nusar Pablówe, uwitén dob de démérúun atin waléy ro adi-adi brab i de saitan réménahuk dob de étéw, ménraréy ro. <sup>13</sup> Atin wén i do Judio démojun magéw brab do démedél saitan réménahuk dob de étéw. Atin ténulama ro nusar i dawét i Kadnane Jesus fégedédél ro saitan. Ménbéréh ro dob de saitan maro, “Dob dawét Jesuse sani ureté Pablówe, sugué key beem méraréy.” <sup>14</sup> I de dumo bé de ni do lagéy réménigo bé de ni, been i de fitéw gétéw nga i ségétéwe gérotor fadi i de Judio féndawét Eskeba.

<sup>15</sup> Endob dénawaay saitané bero mano, “Gélolo guy Jesuse brab Pablówe, éndob ati begoma nan?”

<sup>16</sup> Tidéw béno, sénayaway lagéye bero rénahukoy saitané brab énda énggégaga ro bé ni lagéy. Atin lénubagén bero. Mélaw ménraréy ro tidéw dob lawi ne ménfali brab ménlékas ro. <sup>17</sup> Atin i kéluhanay de étéw bati dob Efeso, do Judio brab do békén Judio énggélíngoo roy fantage bé ni. Mélaw toow ro fo ménggilak. Atin ménumanan i kébantug i dawét i Kadnane Jesus. <sup>18</sup> Atin médoó soy de munur bé Kristowe méngangéy dob téngaangay de étéw atin ménémayag bé de tete rignoné ro. <sup>19</sup> Atin i de dumo bero do béliyan nuwít roy de nusar ro do libro béliyan. Atin ténambak ro bero brab ténuwég ro dob téngaangay de étéw. Atin bénilang ro ké froy i laga i de ni do libro, énggégumah limo folo ngibu dob karowe kurta. <sup>20</sup> Atin loo bé niy kélalag i kébéréh i Kadnane dob

de étéw diyo, brab minur médooy de étéw munur de.

### *I kérémbure dob Efeso*

<sup>21</sup> Amun énggilid i de ni, ménuoyt magéw i Pablówe mawét dob de gonon sakuf i de ingéd féndawét Masedonia brab Gresia mangéy Jerusalem. Brab ménbéréh i Pablówe mano, “Amuk gégumahu dob Jerusalem, fatutu so mangéy Roma.” <sup>22</sup> Endob fénetah Pablówey de ruwo gétéw témabangan de ro Timoteo brab Erasto mangéy Masedonia. Atin i beene ménbati na dob Asia.

<sup>23</sup> Bé do no do gai, toow fo mégukét i de étéw dob Efeso sabaf bé Agéwoy Kadnane. <sup>24</sup> Diyo wén i ségétéwe lagéy fanday féndawét Demetrio, méndot médoó do étéwén rémigo do kéninontow do filak. Atin i de ni kéninontow rémigo ro loo bé lawie féngadafan bé libune tulus ro féndawét Diana, atin fébély ro brab gégedot ro de médoó kurta. <sup>25</sup> Tidéw béno, i ni fanday féndawét Demetrio ténawagén i kéluhanay de étéwén rémigo do kéninontow beroy de dumo ro na gésegiléw galbék brab bénréhén dob berowe mano, “Gétiga kom i funa tome kawasa non bé ni galbék tom do rémigo kéninontow. <sup>26</sup> Endob énggito gomén brab énggélíngoo komén i rignoné Pablówe ni. Bénréhén dob de étéw, i de tulus do rémigo tom békén kun tintu tulus. Atin médooy de étéw énggéféunurén. Bé kén saén dob ingéd tome ni Efeso, éndob loo soy kéluhanay de ingéd dob Asia. <sup>27</sup> Mélaw mébinasa keeyén i katome ni galbék sabaf bé nan kétoro, non émbéréh tete i de étéw fantag bé katome ni galbék. Brab saliyu na bé nan, tagakéy de étéw moso i lawie féngadafa tom bé libune tulus Diana. Atin been i nan i funay ménbantuge tulus Diana mékédan. Beeney féngadaféy kéluhanay de étéw dob ingéde Asia brab dob duniyae ni, éndob éndaén mosoén fégadara ro de.”

<sup>28</sup> I de ménlimud do étéw, amun énggélíngoo roy ni, toow fo ménkérit ro brab mékés ro maro, “Toow fo ménbantug i Dianahé sani tulus tome do tidéw Efeso.” <sup>29</sup> Tidéw béno, rénimbur roy ingéde. Atin kenéfo roy ruwowe gétéw lagéy tidéw Masedonia ménodor bé Pablówe féndawét Gayo brab Aristarko. Atin féngagay ro nuwít mangéy dob dakéle lawi dob adafay de ménlimud do étéw. <sup>30</sup> Atin i Pablówe méuyot damén mangéy so dob adafay de ménlimud ni do étéw. Endob i de dumo no munur énda féngagéw ro de. <sup>31</sup> Atin i de dumo bé de méguléw dob Asia sani de dumo Pabló, ménféuwit ro kébéréh nongot ro so bé békén mangéy i Pablówe dob adafay de étéw ni ménlimud. <sup>32</sup> Atin toow fo ménrimbur i kéluhanay de étéw ni ménlimud atin kéluhana ro mékes séségiyo-giyoy beréhé ruwe, non

i kédoono ruwe énda gétiga roy funa ruwe ménsélimud. <sup>33</sup> I de dumo bero marok Alejandrowey funa ruwe ménsélimud non féntindég i de Judio dob adafay de étév. Atin i Alejandrowe séniniyasa noy de étév bé békén ro selekén inok émbéréh bé mamfil so dob berowe. <sup>34</sup> Endob amun énggétiga ro Judio soy beene, ménkes ro séréngan bé ménruwowe géuras maro, “Toow fo mémbantug i Dianahe, sani tulus tome do tidév Efeso.”

<sup>35</sup> Tidév béno, i ségétéwe bé de méguléw bé ni ingéd, féntanéken i de étév brab ménbéréh mano, “Do dumo gu dob Efesowe ni, i kéluhanay de étév énggétiga ro dob Efesowe niy gonoy lawie féngadafan bé mémbantuge tulus Diana brab mékétéfuwe batév ménlawu tidév do lawayo. <sup>36</sup> Enda i gédirung de. Mélaw kagoméni mékérít taloo no rémigo gom tete bé éndae métayéw funa no. <sup>37</sup> Nuwit gom diniy de étév ni fiyon fo ké énda mon ménénakaw ro dob de lawi féngadafan taloo no ménbéréh ro tete fantag bé tulus tome Diana. <sup>38</sup> Mélaw i Demetriowe beroy de dumo no fanday, amuk wén i téboé ro, fatut ro mangéy dob de kékumuk bé fatute gai. Atin fakay témo ro diyo. <sup>39</sup> Endob amuk wén nay ségiyo kétaya kom, fakay fétiyawa kom bé kéluhanay de étév sélimud begey do odoró kom. <sup>40</sup> Non fakay betom i météboe bé ni késérimbur ménrigo béleewe ni. Brab énda géséliyah tom de non énda foy funa tom mérimbur.” <sup>41</sup> Amun énggilid bénréhén i ni, fénuleén i kéluhanay de étév.

## 20

### *Dob Masedonia brab Akaya*

<sup>1</sup> Amun éndaén sérimbur ro, féntawag Pablowey kéluhanay de munur bé Kristowe inok sélimud ro. Atin fénbagéréni i de fédéw ro bé kébéreh ne. Tidév béno, ménggétawén dob berowe brab ménagév mangéy Masedonia. <sup>2</sup> Nangeyéni ténukaw i de ingéd diyo brab féniyoy noy fédéw i de munur bé de kétoroén. Atin méntaus magéw taman énggumah dob Akaya. <sup>3</sup> Atin mémbati diyo téléw gétérésang kélungonon. Amun magéwén damén mangéy Siria, énggélíngoo noy benantak i de Judio diyo féléhué ro. Mélaw ménséfule i Pablowe témara bé Masedoniawe. <sup>4</sup> Atin wén i de lagéy de ménodor ro Sopater nga Piro tidév Berea, ro Aristarko brab Segundo tidév Tesalonika, Gayo tidév Derbe, brab Timoteo, brab Tikiko brab Trofimo do tidév Asia. <sup>5</sup> I de ni do lagéy méntah ro mangéy Troas atin nongot-nongot ro begey diyo. <sup>6</sup> Amun énggilid i kékandulione bé kéamae bé fane énda i fénggéféeruk de, ménda gey barko tidév Filipos mangéy Troas. Ménlimo gétérésangan tidév bé no, énggumah gey dob

Troas atin diyo énggumaha key i de dumo gey. Atin ségéfadiyan gey mémbati diyo.

### *Dob Troas*

<sup>7</sup> Bé sunglewe fuweh bé no fadiyan, ménsélimud gey mama bé fane émfégétédém bé kéléhu Jesuse. Atin i Pablowe ménuret toow fo mérugay énggumah kérara kélungonon, non magéw so bé démoé de. <sup>8</sup> Atin médooy de solo dob sibéye dob rotor i lawie gono key ménsélimud. <sup>9</sup> I nan sibéy, been i toowe fo gérotor dob lawie ni téléw géandana i kégérotor ne. Wén i kénogo lagéy diyo féndawét Eutiko, ménsar dob faliluwangay gérotore ni sibéy. Endob énggéfídong i ni kénogo lagéy, non toow fo métaah i uret Pablowe. Tidév béno, ménlawu mangéy fantad tidév dob gono nuwe ni ménsar brab ménléhu. Atin amun nangéy ro fénurut, énggito ro ménléhuén. <sup>10</sup> Endob ménlus soy Pablowe brab féngagyasén nangéy nékéf. Brab ménbéréh mano, “Kagom émbuku, méuyag so!” <sup>11</sup> Tidév béno, ménénik man i Pablowe brab sénkébeng-kébéngén i fane atin ménama. Atin féntausén i kéureto nuwe bero taman sémbangén i térésange. Tidév béno, ménagév i Pablowe. <sup>12</sup> Atin nuwit i de étév mule i kénogo lagéye ni méuyag. Atin ménfiyoy de fédéw ro non ménuuyag so.

### *Dob Mileto*

<sup>13</sup> Tidév béno, ménsésuway gey bé Pablowe dob Troas, atin ménda gey barko mangéy Asos. Diyo nongot-nongot gey i Pablowe loo bé késugu ne begey, non ményuyot mémantad tidév Troas mangéy Asos. <sup>14</sup> Amun énggéségito gey dob Asos, ménda soy Pablowe dob barkowe, atin kéluhana key méntaus mangéy Mitalin. <sup>15</sup> Tidév béno, ménangéy gey Kios bé démoé de. Atin bé gétunduge de fuweh énggumah gey dob Samos. Dob gétunduge de man fuweh énggumah gey dob Mileto. <sup>16</sup> Atin i Pablowe ményuyot de ké témara gey saén dob Efeso inok énda méanggaén dob Asia non toow fo magayyas. Méuyot de ké gégumah dob Jerusalem bé gaiy Pentekostese, amuk fakay.

### *Ménggétaw i Pablowe*

<sup>17</sup> Mélaw tidév Mileto, i Pablowe ménféuwit kébéreh mangéy Efeso brab féntawagén i de odoroy de munur bé Kristowe diyo inok balaké ro. <sup>18</sup> Amun énggumah ronén, ménbéréh i Pablowe mano, “Énggétiga kom i kébati guwe dob begome tidév fanay kégumah gu dob sakuf i ingéde Asia. <sup>19</sup> Atin gétiga kom rénigo guy galbék i Kadnane bé béno. Atin énda tefégérotoru, yamula kéménrewu sabaf bé kégédaw guwe begom. Atin téméningkélú bé kéluhanay de mérégén énggégagéwo ku bé de tete rénigoy de

Judio dob begéne. <sup>20</sup> Enda i sébaan dénigur gu bé funa kome fiyo dob de kétoro gu begom dob adafay médoowe étéw taloo no dob de lawi gom. <sup>21</sup> Méégét i kébéréh guwe dob de Judio loo so dob de bekén Judio bé fatut ro gésénule bé de sala ro atin munur ro bé Kadnane Jesus brab rigoné roy kétayay Tuluse. <sup>22</sup> Atin béleewe ni fénemanduoy Rémogor i Tuluse begén bé mangéyu Jerusalem. Atin énda gétuwa ku de ké ati mérigowe dob begéne diyo. <sup>23</sup> Been say niy gétuwa kuwe, dob séngae ingéd nawéto ku, i Rémogor i Tuluse féningatén begén bé méférisuwu brab mérégén i géagéwo kuwe. <sup>24</sup> Endob énda gulaané kuy umul guwe brab ulan den ké méléhuu, amuk géfégilid gu saén i galbéke niray i Kadnane Jesus begén, sani kéurete bé Fiyowe Uret fantag bé kégedaw i Tuluse.

<sup>25</sup> “Ménangeyu dob begome kéluhanan muret fantag bé kéféguléw i Tuluse bé de étéwén. Atin gétuwa ku béni, éndaén géségito tom man ségule. <sup>26</sup> Mélaw béréhé ku begom béleewe ni, amuk wén i ségétéw begom énda munuré bé Jesuse, bekénén atura ku. <sup>27</sup> Non nuret gun begom i kéluhanay kétayay Tuluse. <sup>28</sup> Ingat gom brab diyaga gom i de lowoh gom loo soy de munur sénarig i Rémogor i Tuluse begom inok énda mékédan i de kéunur gom. Begom i maake témalima bé de bili-bili. Atin i de munur bé Jesuse beroy de maak do bili-bili. Atin i Tulusey gefee bé de bili-bili sabaf bé kéléhu i Nga ne. <sup>29</sup> Gétuwa ku, amuk tékédanun dini, wén i do gégumah do tugién témoro. Atin féteteé roy de fédéw i de munur. <sup>30</sup> Atin wén mosoy do étéw tidéw so dob begome ménlimud, émbéréh bé de tugi inok géuwito roy de munur dob bekéne katabuwan agéwon. <sup>31</sup> Mélaw ingat gom, brab kagom lifotén i de ténoro gu begom kéluhanan, fuweh na kélungonon bé méntéléwe gébélintuwa. Atin toow fo kénrewu kuy kétoro guwe begom sabaf bé kégedaw guwe begom.

<sup>32</sup> “Atin béleewe ni, sarigé ku begom dob Tuluse non tabanga no begom. Atin i kéuret guwe fantag bé kégedaw ne tabanga no so begom. Beeney émfébagére bé de kéunur gom, brab Been say mirayé bé de kéfiyonon loo bé rigoné nuwe dob kéluhanay de étéwén. <sup>33</sup> Enda méningaru bé éntingayéne kagom, fiyon filak, taloo no bélowon taloo no kégál. <sup>34</sup> Gétiga kom i kégálbék guwe inok gédoté kuy kéluhanay kailanga keye begey i de dumo gu. <sup>35</sup> Fénggito gu begom i kéluhanay de rénigo gu bé fatut mégéror tom inok gétabanga tom i de étéw mérasay. Brabkatom lifotén i kébéréh i Kadnane Jesus mano, ‘Toow na fo moror i étéwe miray bé étéwe médot.’”

<sup>36</sup> Amun énggilid i Pablowe émbéréh, ménlingkuwéd ro kéluhanan brab déménasal

ro. <sup>37</sup> Kéménrew ro kéluhanan brab nékéf roy Pablowe atin narék ro. Tidéw béno ménggétawén. <sup>38</sup> Ménlabi foy kététe i fédéw ruwe bé bénréh Pablowe bé éndaén kun gito ro de féruman. Tidéw béno, dénura ro mangéy dob barkowe édaa no.

## 21

### *I kéagéw geyé mangéy Jerusalem*

<sup>1</sup> Amun énggéfégétaw geyén dob berowe, ménda gey brab méntaus gey mifar fééntang saréw dob bungéde Kos. Amun bé démoé de énggumah gey dob bungéde Rodas. Tidéw béno méntaus gey mangéy Patara. <sup>2</sup> Diyo énggito gey i sébaane barko mangéy Fenisia, mélaw ménda gey diyo. <sup>3</sup> Ménagéw gey taman énggékulaya key i bungéde Siprus, atin téménara gey saén mangéy de fingé déligdigan atin méntaus gey mangéy Siria. Atin déménunggu gey dob ingéde Tiro non féntéfad roy de médo do uwit diyo. <sup>4</sup> Atin diyo énggito gey i de munur bé Kristowe, mélaw ménbati gey diyo ségéfadiyan. Atin non fénemanduoy Rémogor i Tuluse bero, féngginau roy Pablowe bé bekén taus mangéy Jerusalem. <sup>5</sup> Endob amun énggumahén i gaiwe magéw gey, méntékédan gey dob no inged. Atin i kéluhana ruwe dénura ro begey mangéy dob barkowe, bero soy de bawag ro brab de nga ro. Atin amun énggumah gey dob dénsaane, ménlingkuwéd gey kéluhanan brab déménasal gey. <sup>6</sup> Amun énggilid gey démasal, ménggétaw gey. Tidéw béno, ménda geyén man dob barkowe ni, atin ménule ro so kéluhanan.

<sup>7</sup> Atin tidéw Tiro méntaus gey magéw taman énggumah gey dob ingéde féndawét Tolemaida. Diyo énggito gey i de dumo gey munur bé Kristowe. Atin téménrén gey diyo ménségétérésangan. <sup>8</sup> Dob gétunduge de fuweh, méntaus gey mangéy Sesaria. Amun énggumah gey diyo, ménbati gey dob lawi i ségétéwe lagéy muret bé Fiyowe Uret fantag bé Jesuse féndawét Filipi. Beeney ségétéwe bé de fitéw gétéw ménrugayén fénémili dob Jerusalem waléy témabang. <sup>9</sup> Atin wén i do fot gétéw do ngaén falan kénogon do muret so bé kébéréh i Tuluse. <sup>10</sup> Ménfiroy gétérésang tidéw bé kégumah geyé diyo, énggumah i ségétéwe lagéy tidéw Judea féndawét Agabo. Beeney sénarigoy Tuluse muret bé kébéréh ne. <sup>11</sup> Tidéw béno, ménfégédét dob begeye brab éndotén i sintoro Pablowe brab níketén i de kaan sékéy brab de kémérén brab ménbéréh mano, “Ay niy bénréh i Rémogor i Tuluse mano, ‘I gefee bé ni sintoro ikétéy de Judio dob Jerusalem loo bé ni brab atéé ro dob de étéw bekén Judio.’”

<sup>12</sup> Amun énggélíngoo key i ni, i begeye brab de dumo gey munur diyo ménfégédaw-gédaw gey bé Pablowe bé bekén damén taus mangéy Jerusalem. <sup>13</sup> Endob i Pablowe

séménambul mano, “Sedek kémérew gom? Kagom fébukéuén begén! Fakayun féikét dob Jerusalem brab fakayun méléhu sabaf bé Kadnane Jesus.”

<sup>14</sup> Atin énda fo génaga gey i géméléé bé Pablowe. Mélaw téménrén gey géméléé de brab ménbéréh gey makey, “Mérigo damén i kétayay Kadnane.”

<sup>15</sup> Amun énggilid i firoye gétérésangan, téménifés gey atin méntaus gey mangéy Jerusalem. <sup>16</sup> Atin wén i do ménodor begey do munur bé Kristowe do tidéw Sesaria brab nuwit ro begey mangéy dob lawi i lagéye fébatio ro begey. Been i ségétéwe lagéy tidéw Siprus féndawét Mason. Beeney ségétéwe bé de toow fo énggétah do munur bé Kristowe.

#### *Ténukaw Pablowey Santiagowe*

<sup>17</sup> Atin amun énggumah gey dob Jerusalem, i de dumo gey do munur bé Kristowe ménoror ro témayakuf begey. <sup>18</sup> Atin bé gétunduge de fuweh, i begeye Pablowe nangéy gey ténukaw i Santiagowe, sani odoroy de munur dob Jerusalem. Atin diyo soy kéluhanay de odoroy de munur bé Kristowe. <sup>19</sup> Amun gilid sénggifa Pablowe bero, nuretén i kéluhanay fénrigoy Tuluse de dob de békén Judio. <sup>20</sup> Amun énggélíngoo roy ni, dénayéw roy Tuluse. Atin bénréh ro dob Pablowe maro, “Gétiga mo adih, firoy ngibuy Judiowe ménunur bé Kristowe, atin toow fo nodoro roy de kukuman tidéw dob Moisesé. <sup>21</sup> Énggélíngoo roy fantage bé kétoro me kun dob kéluhanay de Judio bati dob de ségiyo ingéd beroy de békén Judio bé békéné odoroy de kukuma Moises. Brab bénréhém kun éndaén tulién i de nga ro taloo no odoron i adat i de Judio. <sup>22</sup> Ati mélaw i fatute rigné tom? Non gélingoo ro sékoy fantage bé kégumah me dini. <sup>23</sup> Mélaw rigo moy ni béréhé key beam. Wén i do fot gétéw lagéy dini, réménigo ro fasad dob Tuluse loo bé adat tome do Judio. <sup>24</sup> Mélaw odor go bero brab amung go bé adat i kéfélinise dob adafay Tuluse. Atin sukaya mo bero bé ni kéfélinis. Tidéw béno, fétébungow ro loo bé adat tome do Judio. Mélaw fégito mo dob kéluhanay étéwe bé odoroy moy kukuma Moisesé, inok gétiga ro kéluhanan bé békén toow i urete fantag bé beeme. <sup>25</sup> Endob fantag man bé de étéw do békén Judio do ménwaléy munur bé Kristowe, sénulata key bero bé békén ro mama bé éntingayéne ténulak dob de kéninontow, taloo no mama dara, taloo no mama bé éntingayéne énda ménsumbalién, taloo no ké bigaén ro.” Been i niy bénréh ro Santiagowe dob Pablowe.

<sup>26</sup> Mélaw dob gétunduge de fuweh, nuwit Pablowey de fot ni gétéw do lagéy brab ménfélinis ro dob adafay Tuluse loo bé adat ruwe do Judio. Tidéw béno ménahur dob

lawi i Tuluse, atin fénggétiga no dob de fadi i gayi kéfégilid i kéfélinise brab kéiray ruwe tulak bé de ni fot gétéw lagéy.

#### *I kékéfoe bé Pablowe*

<sup>27</sup> Amun gédétén gilid i fitéwe gétérésangan, wén i de Judio tidéw Asia énggito roy Pablowe dob lawi i Tuluse. Atin rénimbur roy de étéw ni ménlimud atin kénéfo roy Pablowe. <sup>28</sup> Ménkes ro maro, “Do dumo gey do Judio, tabangan gey! Been i niy étéwe démayun magéw mangéy témoro dob kéluhanay de étéw dob séngae ingéd bé békén odoroy roy kukumane tidéw dob Moisesé. Brab sébanil betom do Judio brab lawi i Tuluse. Atin saliyo na bé ni, ménuwit do békén Judio mahur dob lawi i Tuluse ni. Mélaw fénalwéyén mékérésik i mékétéfuwe ni gonon.” <sup>29</sup> (Loo bé niy kébéreh ruwe non énggito roy ségétéwe lagéy békén Judio féndawét Trofimo tidéw Efeso ménséodor bé Pablowe mangéy Jerusalem. Atin marok nuwit Pablowe mahur dob lawi i Tuluse ni.)

<sup>30</sup> Ménrimbur i de étéw dob Jerusalem. Atin maak dunuk i étéwe gégumah tidéw dob kéluhanay de gonon diyo. Kénéfo roy Pablowe brab génujud ro mésut tidéw dob lawi i Tuluse. Tidéw béno, féntu roy bégawane. <sup>31</sup> Amun télamané ro damén féléhuén, wén i ménangéye mélolok dob odoroy de sundalo tidéw Roma, bé mérimbur i kéluhanay étéwe dob Jerusalem. <sup>32</sup> Sonom so béno, i odoroy de sundalo ni, nuwitén i de sundalo no ségéta mangéy dob gonoy de étéw ni. Atin amun énggitoy de étéw ni énggumah i de sundalo beroy odoroy ruwe, ténréno roy kéluhag ruwe bé Pablowe. <sup>33</sup> Tidéw béno, i odoroy de sundalo ni, ménfégédét dob Pablowe brab kénéfoén. Atin fénikétén bé de sundalo no bé ruwowe timan sangkali. Tidéw béno fénénginsaa no bero mano, “Ati ni étéw? Ati rénigo nuwe?” <sup>34</sup> Atin ménkes i de étéw ni séségiyo-giyoy késumbul ruwe. Atin i odoroy de sundalo ni énda énggésobuto noy ni ménrigo non toow ro fo selekén. Mélaw fénuwitén i Pablowe bé de sundalo no mangéy dob kutae. <sup>35</sup> Amun énggumah ron dob géday kutae, nénat i de sundaloy Pablowe non bé kékérit i de étéw ni. <sup>36</sup> Ménfuray i de étéw ni mékes maro, “Féléhu gom!”

#### *I kéuret Pablowe*

<sup>37</sup> Amun gédét ron féahurén dob kuta i de sundalo ni, ménbéréh i Pablowe dob odoroy de sundalo ni mano, “Aw fakay gésébéréhu beam?”

Atin séménambul i odoroy de sundalo ni mano, “Aw gétigan go wayo sébéréh Griego?” <sup>38</sup> Makuk beemey étéwe tidéw Egipto méngganay bé késétibohe bé de gémamak kukuman. Atin ménanangguwit fot ngibu



do méméléhu do étéwén brab ménangéy ro bati dob gonone énda i do étéw de bati.”

<sup>39</sup> Séménumbul i Pablowe mano, “I begéne, ségétéwu Judio tidéw Tarsus dob Silisia, sani mémbantuge ingéd. Aw fakay so dob beeme ké gébérehu dob de étéw ni?”

<sup>40</sup> Atin ténungkas i odoroy de sundalo ni. Mélaw téménindég i Pablowe dob gédane brab séninyasa noy de étéw bé fétanék ro. Amun méntané ronén, ménbéréh i Pablowe dob Hebreowe, sani késébéréh i de Judio.

## 22

<sup>1</sup> Bang Pablowe, “Do dumo gu brab do lukés gu, fégélingo gom i béréhé kuwe ni bé kéamfilo kuwe bé lowoh guwe.” <sup>2</sup> Amun énggélíngoo ro ménsébéréh dob karowe késébéréh, toow na fo méntántes ro. Atin féntaus Pablowe kébéréh ne mano, <sup>3</sup> “I begéne, ségétéwu Judio ménumah dob Tarsus dob Silisia. Endob dob Jerusaleme ni ménruku. Atin méngganadu dob toowe fo mémbantug témoro féndawét Gamaliel. Atin toow fo ténoroén begén bé de adat tom do Judio loo bé kukumay de katufua tom. Atin toow fo ménuoytu modor bé kétayay Tuluse ségiléw so bé begome ni béleewe. <sup>4</sup> Fénrasay gu brab fénléhu guy de étéw munur bé Jesuse. Atin kénéfo guy de lagéy brab do libun brab fénrisu gu bero. <sup>5</sup> I gérotore fadi brab kéluhanay de kéfédéwan, gébéreh ro toow i ni béréhé ku begom. Niraya ro begén sulat mangéy dob de dumo tom Judio dob Damasko. Atin ménangéyu diyo inok kéfoé kuy de munur bé Kristowe diyo, atin uwité ku damén dob Jerusaleme ni ikétén bé sangkalie inok kukumén ro.

<sup>6</sup> “Endob amun géutuh térasang, diyou dob agéwone gédét dob Damasko. Atin méntékow wén i réndaw tidéw dob lawayo mangéy dob begéne. <sup>7</sup> Sonom béno, ménggétéléngkébu dob fantade, atin énggélíngoo kuy émbéhehe mano, ‘Saulo! Sedek férasayé mo Begén?’ <sup>8</sup> Tidéw béno ménénginsau maku, ‘Ati beeme Kadnan?’ Atin séménumbul mano, ‘Begéney Jesuse tidéw Nasaret, sani férasayé muwe.’ <sup>9</sup> Atin i de dumo gu ménodor begén, énggito roy ni réndaw endob énda énggélíngoo roy béréhe ni ménsébéréh begén. <sup>10</sup> Atin fénénginsaa ku maku, ‘Kadnan, ati fatute rignoné ku?’ Atin séménumbul i Kadnane mano, ‘Tindég go brab taus go mangéy Damasko. Atin diyo wén i étéwe béréhé no dob beemey kéluhanay kétayay Tuluse rignoné mo.’ <sup>11</sup> Bé béno so, ménwaléyu langafén non bé réndawe ni énggito gu. Atin narak i de dumo gu begén taman énggumah gey dob Damasko.”

<sup>12</sup> Atin féntaus Pablowe kébéréh ne mano, “Atin diyo wén i ségétéwe lagéy féndawét Ananias. Toow fo méngintulus brab toow fo nodoro noy de kitab tom. Atin tintu

fo fénggadata noy kéluhanay de Judio bati diyo. <sup>13</sup> Atin ménangéy dob begéne brab ménbéréh mano, ‘Saulo, dumo gu, gégito gonén!’ Sonom béno, énggégítowu man atin ténéngtég gu. <sup>14</sup> Atin ménbéréh man mano, ‘I Tuluse, fénéngadafi de katufua tom, fénémilién beem inok gétingan i kétaya nuwe, brab inok giton i métintuwe sugu-sugué no féndawét Jesus, brab inok gélingoon i kébéréh ne. <sup>15</sup> Non waléy go muret dob kéluhanay de étéw fantag bé Kristowe émbéréh bé énggito muwe brab énggélíngoo muwe. <sup>16</sup> Atin béleewe, kagonén téangga-angga. Tindég go brab fébutatis gon, brab dasal go dob Kadnane. Atin i de salaém mékédan.”

<sup>17</sup> Atin féntaus Pablowe kébéréh ne mano, “Tidéw béno ménséfuleu mangéy Jerusaleme. Atin amun déménasalu dob lawi i Tuluse, wén i fénggítowu Tuluse begén. <sup>18</sup> Enggito guy Kadnane brab ménbéréh dob begéne mano, ‘Fagayas go, tagakém i Jerusaleme ni, non i de étéw dini énda tayakufé roy kéuret me fantag bé Begéne.’ <sup>19</sup> Atin séménumbulu maku, ‘Kadnan, gétiga roy démoyune kéagéw gu mangéy kémo brab lémbubag bé de munur Beem dob de lawi féngadafa ro. <sup>20</sup> Atin amun féléhué roy Estebane sani ségétéwe muret fantag bé Beeme, diyou de so ménagayun de. Begén i ménantay bé de kégal i de ménméléhu de.’ <sup>21</sup> Endob ménbéréh i Kadnane dob begéne mano, ‘Agéw go. Sugué ku beem mangéy mérayu dob de békén Judio.’ ”

<sup>22</sup> Atin amun béréh Pablowe ni fantag bé de étéw békén Judio, éndaén mégélíngoo i de étéw de. Atin ménkes ro toow fo métanug maro, “Félehu gom, énda médait méuyag i ni étéw.” <sup>23</sup> Atin ménkes ro, brab sénawér roy de bubuk sébuwan mangéy rotor bé kékérit ruwe brab kenda roy de dumo bé de kégal ro brab nafir ro dob rotor. <sup>24</sup> Mélaw i odoroy de sundalo ni, fénuwitén i Pablowe mahur dob kutae ni, brab sénuwén i de sundalo no bé badasé ro inok gébéreho noy ati rénigo nuwe, sani funay de Judio ni mékes brab mékérít. <sup>25</sup> Endob amun nikét roy Pablowe inok badasé ron damén, ménbéréh i Pablowe dob ségétéwe kafitan mano, “Aw fakay badasén i ségétéwe Romano fiyon fo ké énda séna ménkukumén ménsala?”

<sup>26</sup> Atin amun énggélíngoo kafitaney ni béréh Pablowe, ménangéy dob odoroy de sundalo brab ménbéréh mano, “Ati rignoné muwe? I ni étéw ségétéw wayo Romano.”

<sup>27</sup> Mélaw i odoroy de sundalo ménangéy dob Pablowe brab ménénginsa mano, “Aw Romano go wayo?”

Séménumbul i Pablowe mano, “Hoo.”

<sup>28</sup> Atin ménbéréh i odoroy de sundalo ni mano, “I begéne, Romanowu so. Brab dakél i énggébayada kuwe inok waléyu Romano.”

Atin ménbéréh man i Pablowe mano, “Endob i begéne, ménumahu ségétéw Romano.”

<sup>29</sup> Sonom béno, i de sundalo ni madasén damén bé Pablowe énggésunud ro. Atin i odoroy de sundalo ni toow fo ménggilak non fénikétén bé de sangkali i ségétéwe so Romano.

*Dob adafay de kéfédeawan*

<sup>30</sup> Atin i odoroy de sundalo ni ménuyot de ké gétiga noy funay de Judio ni témo bé Pablowe ni. Mélaw bé gétunduge de fuweh, fénkéda noy de sangkali fénggékét ro bé Pablowe. Atin sénuguén i de odoroy de fadi brab kéluhanay de kéfédeaway de Judio sélimud. Tidéw béno, nuwitén i Pablowe brab féntindégén dob adafa ruwe ménlimud.

**23**

<sup>1</sup> Atin ténéngténg Pablowe de ménlimud ni brab ménbéréh mano, “Do dumo gu Judio, toow fo fiyoy fédeéw guwe dob adafay Tuluse fantag bé de rénigo gu taman so béleewe ni.”

<sup>2</sup> Tidéw béno, i gérotore fadi féndawét Ananias, sénuguén i de étéw téménindég gédét dob Pablowe bé tamfilingé roy ba ne. <sup>3</sup> Atin ménbéréh i Pablowe mano, “I beema nan ubo-ubo go méngintulus! Tamfilingéy Tuluse so moso beem. Kukumé mo begén dob kitabe éndob rénigo moy éndae fakay dob kitabe bé kéfétamfiling me begén.”

<sup>4</sup> Tidéw béno, ménbéréh i de étéw gédét dob Pablowe maro, “Sedek émbéréh gu tete loo bé nan dob gérotore fadi i Tuluse?”

<sup>5</sup> Séménumbul i Pablowe mano, “Do dumo gu, énda gétuwa ku de ké beeney gérotore fadi. Amuk énggétiga ku, énda damén fémalané ku de. Non bénéréh i Ménsulate Kébéréh i Tuluse mano, ‘Kago émbéréh tete fantag bé odoro kome.’”

<sup>6</sup> Atin amun énggito Pablowe de dumo do lukés Saduseo brab de dumo do Fariseo, féntanugén i kébéréh ne dob de ménlimud do odoron mano, “Do dumo gu, i begéne, ségétéwu Fariseo brab i de lukés gu do Fariseo so. Mékukumu béni sabaf bé kéunur guwe bé kétébule i de ménléhu.”

<sup>7</sup> Amun énggilid bénéréh Pablowe ni, méngganay so sédéel i de Fariseo brab de Saduseo, atin ménsébaad ro. <sup>8</sup> (Non i de Saduseo énda munur ro bé kétébulee, taloo no munur ro bé wén i do télaki taloo no do rémogor. Endob i de Fariseo munur ro bé kéluhanay de ni.) <sup>9</sup> Atin minut métanug i kéékes ruwe. Atin i de dumo bé de témoro kitab do Fariseo, téménindég ro brab émbagér i kébéréh ruwe maro, “Enda i funa key kémukum bé ni lagéy. Wén keey i rémogor taloo no télaki tintu ménsébéréh de.”

<sup>10</sup> Atin minut toow fo méduf i késéédél ruwe ni. Atin i odoroy de sundalo ni, mégilak de ké mébinasay Pablowe ni. Mélaw sénuguén i de sundalo no mangéy dob kéréra

i de ménlimud étéw brab nuwit roy Pablowe séfule mangéy dob kutae.

<sup>11</sup> Dob gétunduge de kélungonon, téménindég i Kadnane dob sékulo Pablowe brab ménbéréh mano, “Fébaraw go. Nuretém i fantage bé Begéne dob Jerusaleme ni. Atin fatut mangéy go so muret dob Roma.”

*I bantak i de Judio*

<sup>12</sup> Atin bé géfuwéne de, wén i de dumo Judio ménsélimud ro inok géséfagayun ro bé ati rigoné ruwe. Atin ménséfasad ro bé énda mama ro taloo no miném taman énda géféléhuo roy Pablowe ni. <sup>13</sup> Labi fot folo gétéw i réménigowe bé ni. <sup>14</sup> Tidéw béno, ménangéy ro dob de odoroy de fadi brab dob de odoroy de Judio brab ménbéréh ro maro, “Séménafa gey bé énda mama gey taman énda géféléhuo key i Pablowe. <sup>15</sup> Mélaw ay niy rigoné tome. I begome brab de kéfédeawan, féuwit gom kébéréh mongot dob odoroy de sundalo tidéw Roma bé uwité noy Pablowe mangéy dob begome. Atin ubo-ubo toow fo méuyot gom ménginsaan bé Pablowe. Endob i begeye bonoé key dob de agéwon.”

<sup>16</sup> Endob i lagéye nga i libu Pablowe énggélungoo noy ni bantak ro. Mélaw ménangéy dob kutae brab fénlolokén i ni dob Pablowe. <sup>17</sup> Tidéw béno i Pablowe, ténawagén i ségétéwe bé de sundalo brab ménbéréh mano, “Uwitém i ni kénogo lagéy mangey dob odoro kome. Non wén i béréhé no de.” <sup>18</sup> Atin nuwit i sundalowe ni kénogo lagéy mangey dob odoro nuwe brab ménbéréh dob odoro nuwe mano, “Féntawag i férisuwe Pablo begén brab féndura no begén i ni kénogo lagéy non wén kun i béréhé no beem.”

<sup>19</sup> Tidéw béno, narak i odoroy de sundaloy ni kénogo lagéy brab ménférayu ro inok ruwo ro saén. Tidéw béno, féfénginsaa no mano, “Ati no béréhé mo begén?”

<sup>20</sup> Atin séménumbul mano, “I de odoroy de Judio ménséfagayun ro bé ongoté ro dob beemey féuwitém démo i Pablowe mangéy dob de ménlimud do kéfédeawan. Ubo-ubo saén fénginsaa roy Pablowe inok méuman i gétiga ruwe fantag bé beene. <sup>21</sup> Endob kago magayun bé nan. Non wén i labi fot folo gétéw do lagéy rékunéy dob de agéwon inok bonoé ro. Séménafa ro bé énda ku mama ro taloo no miném ro taman énda géféléhuo roy Pablowe ni. Ténafaya ron béleewe ni brab ongot-ongoté ro séden i kaame kéfagayun.”

<sup>22</sup> Atin séménumbul i odoroy de sundalo ni mano, “Kago uretén i ni bénréhé begén dob de ségiyo.” Tidéw béno, fénuleén i ni kénogo lagéy.

*Sénugu i Pablowe mangéy dob Felikse*

<sup>23</sup> Tidéw béno, i odoroy de sundalo ni, téménawag ruwo gétéw kafitan brab bénréhén bero mano, “Tafay gom ruwo

ratuh sundalo, brab fitéw folo do kuda brab do sundalo kémudaan bero, brab ruwo ratuh do sundalo muwit dilék inok magéw ro mangéy Sesaria alas siyow séko bé ni kélungonon. <sup>24</sup> Atin tafay gom soy kudae kudaa Pablowe brab uwit gom mangéy dob Governadore Feliks. Ingata kom fo toow inok énda gésug-sugén.” <sup>25</sup> Tidéw béno, séménulat i odoroy de sundalo ni mano, <sup>26</sup> “Ay niy sulate tidéw dob Klaudio Lisiase mangéy dob Gobernador Felikse. Fiyo téréasang. <sup>27</sup> I ni lagéy kénéfo i de Judio brab féluhé ron damén. Endob amun énggétiga ku ségétéw so Romano, fénanangguwit guy de sundalo gu brab nangéy gey ténabang. <sup>28</sup> Atin tidéw béno, ménuyotu de ké gétiga kuy funa ruwe de témo. Mélaw nuwit gu mangéy dob de ménsélimud do témiyawan. <sup>29</sup> Atin bé béno, énggétiga ku énda i tete rénigo no, funa ro de méméluhu taloo no férisunén. Fantag saén bé de kitab roy funa ruwe de témo. <sup>30</sup> Amun énggétiga kuy bénantak i de Judio bé féluhé ro, féngayag gu fénuwit mangéy dob beeme. Atin bénréh gu dob de témo de bé mangéy dob beeme mélolok bé kéluhanay funa ruwe de témo.”

<sup>31</sup> Amun fénggilid i odoroy de sundaloy sulat ne, nodoroy de sundaloy sugu ne. Mélaw nuwit roy Pablowe mangéy Antipatris bé no kélungonon. <sup>32</sup> Bé gétunduge de fuweh ménséfule i de ménagéw saén do sundalo mangéy Jerusalem. Endob i de sundalo do kémuda, beroy déménurane bé Pablowe taus mangéy Sesaria. <sup>33</sup> Amun énggumah ro dob Sesaria, fékira-ira roy Pablowe dob gubernadore brab niray ro soy sulate. <sup>34</sup> Atin bénasay gubernadorey sulate ni. Tidéw béno, fénénginsaa noy Pablowe ké ati ingéde tidéwo no. Atin séménumbul i Pablowe mano, “Tidéwu Silisia.”

<sup>35</sup> Atin ménberéh i gubernadore mano, “Fégélingoé ku beam dob gaiwe gégumah i de témo beam.” Tidéw béno, fénbantaya noy Pablowe dob lawie fénrigo télata Datu Herode.

## 24

### *I kétebo i de Judio bé Pablowe*

<sup>1</sup> Ménilmo gétérésangan tidéw béno, i gérotore fadi féndawét Ananias ménangéy Sesaria beroy de dumo no odoroy de Judio brab ségétéwe gétigan bé kitab i de Romano féndawét Tertulo. Ménangéy ro dob adafa Felikse, sani gubernadore, inok téboé roy Pablowe. <sup>2</sup> Atin i Felikse, amun féntawagén i Pablowe, fénbéréhén i Tertulowe. Mélaw féngganaya noy témbobe bé Pablowe mano, “Gobernador Feliks, toow fo féngadata key beam. Atin fiyoy kéféguléw me non i gaiy kaame kéféguléw énda sénay ménsétiboh de. Atin médooy de rénigo mo fiyo inok minut waléy fiyoy ingéd tome ni. <sup>3</sup> Atin

sabaf bé ni, toow fo moror gey de brab fésalamat gey kéluhanan dob beeme sénga tékélid. <sup>4</sup> Endob inok énda kélébuwan go méangga, éndaén férugayé kuy kébéréh guwe. Mélaw féngédawan gey brab féngélingoén gey fiyon magad saén. <sup>5</sup> Enggétiga key i Pablowe ni toow fo samuk non rénimburén i de Judio dob kéluhanay de ingéd dob duniyae ni. Atin beeney odorone bé ségéklaasiwe kéféngintulus féndawét Nasareno. <sup>6</sup> Atin ténlama no fénwaléy mékéresik i mékétéfuwe lawi i Tuluse, bé rénigo nuwe liyén. Mélaw kénéfo gey brab kukumé key damén dob kageye kitab. <sup>7</sup> Endob i odoroy de sundalo féndawét Lisias nangeyéw nafas dob begeye bé lala geye de ménfélubag. <sup>8</sup> Tidéw béno, bénréhén begey bé angéyé key kun téboén i ni étéw dob beeme. Atin amuk fénginsaa moy ni lagéy, gétiga moy kéluhanay funa keye de témo.” <sup>9</sup> Tidéw béno, i de Judio ménamung ro so témo brab bénréh roy toow i de bénréh Tertulo ni.

### *I kéamfilo Pablowe bé lowoh ne*

<sup>10</sup> Tidéw béno, i gubernadore fénbéréhén i Pablowe. Atin ménberéh i Pablowe mano, “Gétiga ku toow gon fo ménrugay kémukum dob ni ingéd brab gétigan gor odoroy key do Judio. Mélaw toowu fo moror émbéréh bé kéamfilo kuwe bé kagéne lowoh dob adafa muwe. <sup>11</sup> Ménfolo bra ruwo gétérésang saén i kéngumah guwe dob Jerusaleme ni inok méngintulus. Fakay go ménginsa dob de ségiyo étéw inok toow fo gétiga moy ni. <sup>12</sup> Atin i de Judio, énda énggito ro begén ménséédél bé de étéw dob lawi i Tuluse taloo no rénimbur guy de étéw dob de lawi féngadafan taloo no dob ségiyowe ingéd dob Jerusaleme. <sup>13</sup> Atin énda i féféngito ro émféféngintooow bé kétébo ruwe begén. <sup>14</sup> Endob fayagéw ku beam i kéféngadaf guwe bé Tuluse féngadaf i de katufua key bé kéodor guwe dob Agéwo Kristowe. Been i niy bénréh i de étéw ni békén toow kéféngintulus. Endob munuru so bé kéluhanay de kitab sénulat Moises brab kéluhanay sénulat i de méntélata do sénarigoy Tuluse muret bé kébéréh ne. <sup>15</sup> Ségiléw so bé de ni étéw témo begén, munuru so bé kétéféleu i Tuluse bé de ménléhu, do fiyo étéw loo soy de tete étéw. <sup>16</sup> Atin mélaw démooyu toow fo témélama rémigo fiyo dob adafay Tuluse brab dob adafay de étéw inok énda i sala gu.

<sup>17</sup> “Amun dob ménfiroye gébélintuwa énda ménbatu dob Jerusaleme, ménséfuleu mangéy diyo inok uwité kuy kurta i de dumo gu Judio brab inok témulaku. <sup>18</sup> Atin been i niy rénigo guwe bé kégitu ruwe begén dob lawi i Tuluse, amun gilidu ménfélinis dob adafay Tuluse loo bé adat geye. Enda toow médooy étéwe dumo gu diyo brab énda i rénimbur gu diyo. <sup>19</sup> Endob wén i de Judio

énggumah diyo do tidéw Asia. Bero damén i mangéy dob beeme témbó begén amuk wén i funa ro begén témbo. <sup>20</sup> Taloo no fébérehém i de étéw ni ménangéy dini ké ati salae énggito ro dob begéne bé kédini guwe dob adafay de ménlimud do Judio do sétiawan, <sup>21</sup> saliyo bé sébaane bénreh gu métanug amun diyoyu dob adafa ruwe maku, 'Kukumé kom begén non munuru bé kétébule i de ménléhu.'

<sup>22</sup> Atin i Gobernador Felikse, toow fo gétiga noy fantage bé Agéwo Jesuse, mélaw téménreh kémukum. Atin ménbéréh mano, 'Féglidé kuy kékukum guwe amuk gégumah i Lisiasé sani odoroy de sundalo tidéw Jerusalem.' <sup>23</sup> Atin sénuguén i kafitane bé bantaya noy Pablowe, éndob niraya no so kuwagib i Pablowe rémigo bé kétaya nuwe. Brab ténungkasén soy de dumo Pablo magifat de.

<sup>24</sup> Amun énggilid i firoye gétérésangan, ménséfule mangéy diyo i Felikse brab bawag ne Drusila ségétéw libun Judio. Atin féntawag roy Pablowe brab fénggélino roy kéuret ne fantag bé kéunur ne bé Jesu Kristowe. <sup>25</sup> Endob amun féntaus Pablowey kéuret ne fantag bé mééntange kéfaguyag brab kédigure bé de tete kétayan brab gaiwe gégumah i kékukum i Tuluse, ménwaléy ménggilak i Felikse. Mélaw ménbéréh mano, 'Fakay gon séfule brab féntawagu man beem ké wén i gai gu.' <sup>26</sup> Atin i dob fédéw Felikse ni, mano ké iraya Pablowe kurta. Mélaw féntawagén médoos gule inok séuret-uret de.

<sup>27</sup> Amun énggilid i ruwowe gébélintuwa, békénéh Feliks i gobernadore. Endob i Felikse ménuoyot de ké mésuwat i de Judio de, mélaw féndayaén i Pablowe dob férisunone. Atin i ménwaléye gobernador i lagéye féndawét Porsio Festo.

## 25

### *I Pablowe brab Festowe*

<sup>1</sup> Amun énggilid i téléwe gétérésangan tidéw bé kégumah Festowe dob sakuf i Judea, ménagéw tidéw Sesaria atin ménangéy Jerusalem. <sup>2</sup> Atin i de odoroy de fadi brab de odoroy de Judio ménangéy ro dob beene brab nuret ro diyo i funa ruwe téméno bé Pablowe. <sup>3</sup> Atin ménfégdaw-gédaw ro dob Festowe ni bé féuwitén i Pablowe mangéy Jerusalem, non bénantak ro féléhuén dob de agéwon. <sup>4</sup> Séménubul i Festowe mano, 'I Pablowe ménférisu dob Sesaria, atin séfuleu so magad mangéy diyo. <sup>5</sup> Mélaw i de odoro kom fatut ro modor begén mangéy Sesaria brab tébo gom i nan étéw ké wén i tete rénigo no.'

<sup>6</sup> Atin i Festowe ménbati na dob berowe bé ménlabiwe ségéfadiyan. Tidéw béno ménséfule mangéy Sesaria. Atin bé gétunduge de fuweh, ménangéy mésar dob gono nuwe

kémukum brab séménugu bé uwitén i Pablowe mangéy dob adafa nuwe. <sup>7</sup> Amun énggégumah i Pablowe, i de Judio tidéw Jerusalem téménindég ro géliwét de, brab bénreh roy kéluhanay gétimale fo kétébo ro de. Endob énda i toow géfégitro ro bé kétébo ruwe de. <sup>8</sup> Endob i Pablowe bénrehén i kéamfilo nuwe bé lowoh ne mano, 'Enda i rénigo gu tete dob kitab geye do Judio, taloo no réménigowu tete sébanil bé lawi i Tuluse, taloo no dob toowe fo gérotor datu dob Roma.'

<sup>9</sup> Endob i Festowe méuyot de ké mésuwat i de Judio de, mélaw fénénginsaa noy Pablowe mano, 'Aw méuyot go mangéy Jerusalem inok diyo kukumé ku beem ké toow i de kétébo ro beem?'

<sup>10</sup> Séménubul i Pablowe mano, 'Ay niy gono muwe kémukum, non wén i kuwagibém tidéw dob toowe fo gérotor datu dob Roma. Atin ay niwu dob adafa muwe brab beem i fatute kémukum begén. Enda i rénigo gu tete dob de Judio brab fiyon i beeme gétiga moy ni. <sup>11</sup> Amuk wén i rénigo gu tete dob kitabe atin fatutu féléhuén, énda méuyotu méraréy. Endob amuk énda toow i kéluhanay kétébo i de Judio begén, éndaén fatutu iray dob berowe. Ongoté ku dob beeme bé mangéyu dob adafay toowe fo gérotor datu dob Roma inok been i kémukume begén. Non ségétéwu so Romano, brab wén i kuwagib gu mékukum dob adafay datue dob Roma.'

<sup>12</sup> Tidéw béno, ménsébéréh i Festowe dob de dumo no témabang. Amun énggilid, ménbéréh dob Pablowe mano, 'Amun nongotém i mangéye dob adafay datue dob Roma, mélaw uwitén go mangéy diyo.'

### *I Pablowe brab Agripawe*

<sup>13</sup> Amun ménnggéléfas i firoye gétérésang, énggumah i datue féndawét Agripa brab bawag ne féndawét Berenis dob Sesaria. Nangéy ro ténukaw i Festowe diyo. <sup>14</sup> Amun ménfiroy ron gétérésang énggumah diyo, nuret Festowe dob Agripahey fantage bé Pablowe mano, 'Wén i ménférisuwe lagéy dini bé Feliks sénay méguléwe de. <sup>15</sup> Amun ménangéyu Jerusalem, i de odoroy de fadi brab de odoroy de Judio, téméno ro dob begéne atin nongot roy féléhuén. <sup>16</sup> Endob bénreh gu dob berowe bé békén adat tom Romanoy matée bé ségétéwe étéw méntébo ké énda séna énggéséténgaang roy de témbó de taloo no énda séna méniraya no gai mamfilon bé kaane lowoh. <sup>17</sup> Atin amun ménangéy ro dini, féntagay gu so bé démoé de féntawag dob gono kuwe kémukum i ni lagéy. <sup>18</sup> Amun énggéséténgaang ron, téménindég i de téméno de brab ménbéréh ro. Endob énda wayoy tete rénigo no funa ro de témbó. <sup>19</sup> Endob i funa ruwe saén séédél i fantage bé kéféngintulus ruwe brab fantag

bé ségétéwe lagéy féndawát Jesus. Ménléhuén i ni étéw éndob i Pablowe bénréhén méuyag kun. <sup>20</sup> Bé béno, énda gétiga kuy fiyowe kétiyawa ku bé ni, mélaw fénénginsaa kuy Pablowe ké méuyot mangéy Jerusalem atin diyo kukumén. <sup>21</sup> Endob i Pablowe nongotén bé bantayan brab mangéy dob adafay datu tome dob Roma inok been i témiyawane de. Mélaw fénséfule gu man dob férisunone taman énda séna géféuwito ku de mangéy dob datue dob Roma.”

<sup>22</sup> Atin ménbéréh i Agripahe dob Festowe mano, “I begéne so, Méuyotu ké gélingoo kuy nan lagéy.”

Atin séménbul i Festowe mano, “Fégléngóém fo démo.”

<sup>23</sup> Amun bé démoé de, énggumah i ro Agripahe brab Berenise, beroy de odoroy de sundalo brab do gérotor étéw dob no ingéd. Atin toow fo fégadatan ro ménahur dob gonone kémukum. Atin i Festowe séménugu bé uwitén i Pablowe mangéy dob dakélé ni sibéy. <sup>24</sup> Brab ménbéréh i Festowe mano, “Datu Agripa brab do kéluhana kom dini, ay niy lagéy ténébo i kéluhanay de Judio dob begéne, dini brab dob Jerusalem. Brab mékes ro énda kun médaiteén méuyag. <sup>25</sup> Endob énda mon i énggito gu de funan de méméléhu. Atin amun nongotén i mangéy dob toowe fo gérotor datu tom dob Roma, ményotu de ké féuwit mangéy diyo. <sup>26</sup> Endob énda i gétiga ku sulaté ku mangéy dob datu tome fantag bé ni étéw. Mélaw Datu Agripa, fén-angéy gu dob adafa muwe beroy kéluhanay ni étéw inok amuk gilid énggésusino komén, wén i gésulata ku mangéy dob datue dob Roma. <sup>27</sup> Non gétiga ku bé bekén fatut féuwit i ségétéwe férisu mangéy dob datue dob Roma ké énda i féodorén de kétébo de.”

## 26

<sup>1</sup> Atin ménbéréh i Agripahe dob Pablowe mano, “Tungkasé ku beem émbéréh bé kéamfilo muwe bé lowoh me.”

Atin béntér Pablowe de kémérén bé kébéréh ne mano, <sup>2</sup> “Datu Agripa, toowu fo moror béleewe non gébérého ku beem i kéamfilo kuwe bé lowoh guwe fantag bé kéluhanay de kétébo i de Judio begén. <sup>3</sup> Non toow fo gétiga moy kéluhanay de adat tom do Judio brab de funa tom séédél. Mélaw ongoté ku dob beeme, kago mératér mégélingo begén.

<sup>4</sup> “Gétigay kéluhanay de Judioy kagéne adat tidéw fanay kéklóh gu dob kagéne ingéd loo so dob Jerusalem. <sup>5</sup> Ménrugayén énggétiga ro begén, brab géfayaga ro toow i ni ké kétaya ro, ségétéwu toow fo méngintulus mamung dob de Fariseo modor fo toow bé de kitab tom. <sup>6</sup> Atin béleewe ni kukumén non bé inam guwe, sani késarig guwe bé fénasad i Tuluse

bé de katufua key. <sup>7</sup> Been soy ni fasade ongot-ongotéy kéluhana tome do Judio, do sénaar dob foloe bra ruwo gétribo, non wén soy inam ro de. Mélaw méngintulus ro fuweh na kélungonon. Atin sabaf bé ni inam gu o Datu, ténébo i de Judio begén. <sup>8</sup> Endob sedek toow fo mérégén i kéunur gome bé kétéfébule i Tuluse bé de ménléhu?”

<sup>9</sup> Atin féntaus Pablowe kébéréh ne mano, “Atin fiyon i begéne, bé gétahe makuk fatut rigoné kuy kéluhanay sébanile bé de étéw munur bé Jesuse tidéw Nasaret. <sup>10</sup> Atin bé gétaho, been i niy rénigo guwe dob Jerusalem. Atin méndotu kuwagib tidéw dob odoroy de fadi atin médooy fénrisu guwe bé de munur bé Tuluse. Brab amun kukumén ronén bé féléhuén ro, ménagayunu de so. <sup>11</sup> Atin médoó gule ménangéy dob de lawi féngadafan inok férasayé ku bero. Atin ténulama gu bero fénéngés démirung bé kéunur ruwe bé Jesuse. Atin bé kékérit guwe bero ménangéy dob de ségiyo ingéd inok férasayé ku bero diyo.

<sup>12</sup> “Been i nan i funa kuwe ménangéy Damasko, non tidéw dob de odoroy de fadi, wén i kuwagib gu kémfo bé de munur bé Jesuse diyo. <sup>13</sup> Atin, Datu, amun diyou dob de agéwon mangéy Damasko bé géutuhe téréasang, énggito guy réndawe toow na fo géfékaya tidéw bé téréasang, tidéw dob lawayo mangéy dob begéne brab dob de dumo gu. <sup>14</sup> Atin kéluhana key énggétéléngkéb dob fantade. Atin énggélíngoo kuy émbéréhe ménsébéréh begén dob késébéréh tome Judio mano, ‘Saulo! Sedek férasayé mo Begén? Beem soy kérégénane bé nan rigoné mo non maak ayam go séménifa sabaf bé kédédél i gefee beem.’ <sup>15</sup> Tidéw béno ménénginsau maku, ‘Ati Beeme, Kadnan?’ Atin séménbul mano, ‘Begéney Jesuse sani férasayé muwe. <sup>16</sup> Tindég go! Méntéfégitowu dob beeme inok beemey fémilii kuwe waléy sugu-sugué ku. Uretém dob de étéw i kégito muwe Begén béleewe ni brab de féténgténg gu beem moso. <sup>17</sup> Tabanga ku beem inok énda gébinasany de Judio brab de bekén Judio beem. Atin sugué ku beem mangéy muret dob de étéw do bekén Judio. <sup>18</sup> Féféngésobuté beroy fantage bé Begéne inok gésénule ro tidéw dob délémoné agéwon brab gito roy géfékayae tidéw dob Tuluse. Atin inok éndaén munur ro dob barakat Satanase, yamula munur ro bé barakat i Tuluse. Atin inok sabaf bé kéunur ruwe Begén i de sala ro émfasagadan, atin waléy ro so do étéw i Tuluse sabaf bé kéunur ruwe dob Beene.”

<sup>19</sup> Atin féntaus Pablowe kébéréh ne mano, “Mélaw Datu Agripa, nodoro kuy no énggito gu tidéw dob lawayo. <sup>20</sup> Mélaw ménuretu sungu dob Damasko, tidéw béno dob Jerusalem. Tidéw béno dob kéluhanay

de ingéd i de Judio, tidéw béno dob ingéd i de bekén Judio. Nureto ku bero bé fatut ro gésénule bé de sala ro brab munur ro bé Tuluse. Atin féfégito roy kégésénule ruwe bé de fiyo rigoñé ro. <sup>21</sup> Been i niy funay de Judio kéménéfo begén dob lawi i Tuluse brab féléhué ron damén begén. <sup>22</sup> Endob taman so béleewe ni, ténabangay Tuluse so begén. Mélaw béleewe ni téménindégu dini muret dob kéluhanay de étéw do gérotor brab do gérifantad. Atin i kéuret guwe ségiléw bé kébéreh Moisesé brab de étéw sénarigoy Tuluse muret bé kébéreh ne mérigo. <sup>23</sup> Bénréh roy fantage bé Kristowe, bé fatut kun férasayén brab féléhuén. Atin Beeney sunguwe tébule inok fukasé noy de Judio brab de bekén Judio.”

<sup>24</sup> Amun émbéréh sénay Pablowe bé kéamfilo nuwe bé lowoh ne, ménkes i Festowe mano, “Pablo, bunég go! I dakéle kégétiga moy funa muwanan ménwaléy bunég.”

<sup>25</sup> Endob séménumbul i Pablowe mano, “Gobernador Festo, bekénu bunég. I ni kébéreh gu métintu brab toow. <sup>26</sup> Datu Agripa, gétiga moy kéluhanay de ni. Mélaw énda mégilaku de émbéréh dob beeme. Non gétiga ku, énda méndirungén dob beeme non ménrigoy de ni dob gonone gétigay kéluhanay de étéw. Ménlalag mélaw i kéurete de. <sup>27</sup> Datu Agripa, aw munur go bé kébéreh i de étéw sénarigoy Tuluse muret bé kébéreh ne? Gétiga ku munur go de.”

<sup>28</sup> Tidéw béno ménbéréh i Agripahe dob Pablowe mano, “Dob ni foko kéuretém, aw gékaranga mo géfuwaléyo mo begén munur bé Kristowe?”

<sup>29</sup> Séménumbul i Pablowe mano, “Fiyon fo ké foko taloo no métaah, dasalé ku dob Tuluso bé i beeme brab kéluhanay de étéw ni mégélingo begén, waléy gom munur bé Kristowe ségiléw bé begéne éndob bekén méférisu loo bé begéne.”

<sup>30</sup> Tidéw béno téménindég i datue, brab gubernador brab libune féndawét Berenis brab kéluhanay de étéw diyo atin ménagéw ro. <sup>31</sup> Amun ménagéw ron, ménsébéréh-béréh ro maro, “I ni étéw, énda i tete rénigo no funan de mémélehu taloo no férisunén.”

<sup>32</sup> Atin ménbéréh i Agripahe dob Festowe mano, “Amuk énda saén nongotén i mangéye dob datue dob Roma, fakayén damén tangeyén.”

## 27

### *I kéagéw Pablowe mangéy Roma*

<sup>1</sup> Amun sénfagayuno ron i émféuwite begey dob barkowe mangéy Roma dob sakuf i dakéle ingéd Italiya, naté roy ro Pablowe beroy de ségiyo do férisu dob odoroy de sundalo tidéw Roma féndawét Julio. I de ni do

sundalo, féndawét ro “Do sundaloy Datue”. <sup>2</sup> Ménda gey dob barkowe tidéw Adramitio, non tafayén mangéy dob de ingéd dob sakuf i Asiawe. Ménodor begey i Aristarkowe ségétéw Masedonian tidéw Tesalonika. <sup>3</sup> Amun bé démoé de déménunggu gey dob Sidon. Atin i Juliowe, sani odoroy de sundalo, toow fo mégédaw bé Pablowe brab ténungkasén mangéy lémangu bé de dumo no inok fagifaté ro. <sup>4</sup> Atin méntaus gey magéw tidéw diyo. Atin rénumfak i réfuruhey barko geye, mélaw ménéngindoror gey bé bungéde féndawét Siprus fingé tégénon inok mékélung gey bé réfuruhe. <sup>5</sup> Tidéw béno, nifar gey i dogote mangéy bé doror i de ingéd féndawét Silisia brab Pamfilia taman énggégumah gey dob Mira, sébaan ingéd dob sakuf i Lisiawe. <sup>6</sup> Atin diyo énggitoy kafitaney sébaane barko tidéw Alejandria mangéy Italia, mélaw féndaén begey dob ni barko.

<sup>7</sup> Atin méntana i kéagéw geye bé ménfiroye gétérésangan brab ménrégén i kéagéw geye taman téménara gey dob ingéde féndawét Kinido. Atin éndaén méntaus gey mangéy fingé diyo non rumfakéy réfuruhey barko geye. Mélaw ménifar gey mangéy fingé bé déligdigang bungéde Kreta inok mékélung gey bé réfuruhe. Atin téménara gey ménindoror bé gonone Salmon. <sup>8</sup> Atin ménéngindoror gey brab ménrégén foy kéguamah geye dob ingéde féndawét “Fiyo Dungguon” gédét dob ingéde Lisia.

<sup>9</sup> Atin ménrugay gey na diyo bati taman éndaén mékégilak i magéwe dob dogote bé do no do gai non gai mélégénéy. Mélaw féngginau Pablowe bero mano, <sup>10</sup> “Enggito gu toow fo mékégilak i kéagéwe tidéw dini. Médooy de mébinasa bé de uwit dob barkowe brab barkowe so. Brab wén soy do dumo betom méléhu.” <sup>11</sup> Endob i odoroy de sundalo énda ménagayu no bé bénréh Pablowe, yamula nodoro noy kébéreh i kafitane bé barkowe brab gefee de. <sup>12</sup> Atin énda kun fiyo téronon i dungguone ni ké gai mélégénéy. Mélaw ménuyot i kédoono ruwe ké magéw ro inok géguamah ro dob Fenisia dob bungéde Kreta. Been i niy dungguone fingé dob élédoy déligdigane brab élédoy tégénone. Mélaw fiyoy téméréne diyo taman golid i gaiwe mélégénéy.

### *I défuke*

<sup>13</sup> Atin bé béno so, méniyuf i réfuruhe énda émbagéren tidéw déligdigang. Mélaw i de étéw dob barkowe maro ké fakayén i tause magéw mangéy Fenisia, loo bé bénantak ruwe. Brab bénatu ron i fériwatué atin ménagéw ro ménéngindoror bé dénsaane dob Kreta. <sup>14</sup> Endob énda ménrugayén tidéw béno, i toowe fo émbagér réfuruh féndawét “Tégénoy Sébangane” énggumah tidéw fantad. <sup>15</sup> Atin

énggébéla i ni réfuruhe dob barko geye. Atin énda fakay gey gétaus magéw rémumfak bé réfuruhe ni. Mélaw féndaya gey séden i kéuwit i réfuruhe begey. <sup>16</sup> Atin amun énggétara gey dob sébaane kloh bungéd féndawét Kauda fingé sébangan, ménalang i réfuruhe diyo. Atin i klohe awang bénégéng i barkowe, éndot ro tidéw dob dogote éndob toow fo mérégén. <sup>17</sup> Atin amun ténaléy ron i awange ni, nikét roy géliwéte bé barkowe ni bé de dakél taléy inok énda mérundasén. Mégilak ro ké mélébéng i barkowe dob fantad i dogote non éndaén ménalémén gédét dob Libia. Mélaw kéndra roy layage brab méntéanur séden i barkowe modor bé kéfanir i réfuruhe de. <sup>18</sup> Atin énda so téménrén i émbagére ni défuk. Mélaw dob gétunduge de fuweh féngganaya roy lémauwé bé de uwit dob barkowe ni. <sup>19</sup> Atin bé gétunduge de man fuweh nibér roy de dumoy de usarén dob barkowe. <sup>20</sup> Ménfiroy gétérésangan, i éndaé kéjito gey bé térésange taloo no do gitoon atin démayday soy défuke ni. Tidéw béno, éndaén foy inam gey ké méuyag gey na.

<sup>21</sup> Amun ménrugayén i éndaé kégéama i de étéw ni, téménindég i Pablowe dob téngaanga ruwe brab ménbéréh mano, “Do dumo gu, amuk fénggélino gom saén begén, énda damén méntékédan tom dob Kreta, brab énda damén i do ménsingula brab do ménbinasa. <sup>22</sup> Endob béleewe ni ay niy béréhé kuwe begom, kagom mégilak non énda i ségétéw méléhu betom. Endob i barkowe ni mébinasa. <sup>23</sup> Non bé nakélungonono méntéfégito dob begéney télakiy Tuluse, sani Tuluse féngadafé ku brab gefee bé lowoh guwe. <sup>24</sup> Ménbéréh i télakiwe ni dob begéne mano, ‘Kago mégilak Pablo! Non fatut go témindég dob adafay datue dob Roma. Atin sabaf bé kégédaw i Tuluse beam, tabangé no soy kéluhanay de dumo mo ni dob kéagég gome inok énda méléhu ro.’ <sup>25</sup> Mélaw, bang Pablowe, “kagom mégilak non sémarigu dob Tuluse bé métuman i kéluhanay de bénréhén begén. <sup>26</sup> Endob méfanir tom mangéy dob sébaane bungéd.”

<sup>27</sup> Ménfoloén bra fot gékélungonon i kéfanir i réfuruhe bé barko geye dob dogote Medeteranean. Tidéw béno amun kéraa kélungononén, i de étéw gémalbék dob barkowe marok gédét geyén dob fantade. <sup>28</sup> Mélaw lénawu roy taléye wén i fériwaton de, inok témbuné roy kénalém ne. Atin énggétiga ro fot folo gémitroy kénalém ne. Atin énda ménrugayén tidéw béno, lénawu ron man i taléye ni atin téléw folo gémitro séden i kénalém ne. <sup>29</sup> Atin non bé kégilak ruwe ké mésanggat i barkowe dob de dakél batéw, mélaw lénawu roy fote fériwaton tidéw dob igor i barkowe brab déménasal ro inok fuwehén damén. <sup>30</sup> Atin i de étéw gémalbék dob barkowe ni sénfagayuno roy méraréye

damén. Mélaw ténuntu roy klohe awang dob dogote. Ubo-ubo lawuwé roy de fériwaton dob uléw i barkowe ni. <sup>31</sup> Endob ménbéréh i Pablowe dob odoroy de sundalo brab dob de sundalo no mano, “Amuk tékédan i de étéw ni gémalbék dob barkowe ni, énda méuyag gom.” <sup>32</sup> Mélaw kénléng i de sundaloy de taléy fénggékét bé awange ni brab féndaya ro mélawu inok méanur sésuway bé barkowe.

<sup>33</sup> Amun mangéyén fuweh, nongot Pablowe mama ro kéluhanan brab ménbéréh mano, “Ménfoloén bra fot gétérésangan i kéongot-ongot gome atin énda i nama gom. <sup>34</sup> Mélaw ama gom! Toow fo kailanga kom i mamae inok méuyag gom. Béréhé ku begom i ni, énda i sébaan betom wén i sug-sugén.” <sup>35</sup> Amun énggilid bénréhén i ni, méndot i Pablowe bé fane brab ménfésalamat dob Tuluse dob téngaanga ruwe. Tidéw béno bénaadén brab ménama ro. <sup>36</sup> Atin éndaén ménbuku ro atin ménama ro kéluhanan. <sup>37</sup> Ruwo gey ratuh bra fitéw folo bra ném kéluhanan. <sup>38</sup> Amun ménbésor ronén, nibér roy de faréy dob dogote inok waléy féngkag i barkowe.

#### *Ménbinasay barkowe*

<sup>39</sup> Amun géfuwénén, wén i énggito geye fantad éndob i de étéw gémalbék dob barkowe, énda gélolo ro de ké ati no gonon. Endob énggito roy linéke brab dob dénsaane de wén i do médoo de farék. Atin ménséfagayun ro amuk fakay diyo ro démunggu. <sup>40</sup> Mélaw kénléng roy de fériwaton brab féndaya ro ménlawu dob ménaléme de. Atin nukoh ro soy ikét i de suwil. Tidéw béno, ténunggul roy layage inok faniréy réfuruhe mangéy dob dénsaane. Mélaw ménagéw gey. <sup>41</sup> Endob i barkowe ni ménsanggat dob fanser i dogote brab téménrén diyo. Ménlébéng i lulung i barkowe ni atin ménrundas i ulina nuwe non énggébéla diyo i émbagére do bagél.

<sup>42</sup> Sénfagayunoy de sundaloy méméléhue bé de férisu inok énda i gélonguy brab géféreréy bero. <sup>43</sup> Endob i odoroy de sundalo mika de ké féléhuén i Pablowe. Mélaw génléén i de sundalo no bé éndaén féléhuén i de férisu. Atin sénuguén i de gértigan lémonguy bé téfélaway ron dob dogote sungu brab lémonguy mangéy dob dénsaane. <sup>44</sup> Atin i de dumo bero énda gértigan ro lémonguy, sénuguén bero médot bé de fafan brab do réfa i barkowe inok rémantaw ro. Atin i kéluhana keye énggégumah dob dénsaane, énda i énggégumag-sug begey.

## 28

#### *Dob Malta*

<sup>1</sup> Amun énggégumah geyén dob dénsaane énda ménkaid gey, wén i ménbéréhe dob beg-eye bé Malta wayoy dawét i no bungéd.

<sup>2</sup> Toow fo mégédaw i de étéw dob no ingéd begey. Non amun réménana brab toow fo mélégénéy, ménuyag ro aféy brab ténuganul ro begey. <sup>3</sup> Atin i Pablowe ménurut do kayéw féngésenuk. Atin amun féndiyoén i de kayéw dob aféye, ménsut i ulée tidéw dob de kayéw ni non kéédufan bé aféye brab kénekeén i kémér Pablowe brab ménbiti-bitin diyo. <sup>4</sup> I de étéw bati dob no ingéd amun énggito roy ulée ni ménbiti-bitin dob kémér Pablowe, ménsébéréh-béréh ro maro, “Ménméléhu étéw keeyén i ni lagéy, non fiyon fo ké énda ménléhuén dob dogote, bagién soy méléhue.” <sup>5</sup> Endob kénuyung Pablowe kémér ne atin ménlawu i ulée ni dob aféye brab énda i kaidén. <sup>6</sup> Nongot-nongot i de étéw ké lémbag i kémér Pablowe loo ké tékow métuwar brab méléhu. Endob amun ménrugayén i kéongot-ongot ruwe de atin énda i énggérigono no de, ménfégalin i de itunga ro brab ménbéréh ro maro, “Ségétéw tulus i nan.”

<sup>7</sup> Enda mérayuén tidéw diyo i fantade kay lagéye féndawét Publio. Beeney méguléwe bé no bungéd. Atin ténayakufén begey dob lawi ne bé méntéléwe gétérésangan brab toow fo ménggédaw begey. <sup>8</sup> Atin i boh Publiowe déméruun méniro dob kamawe non toow fo démfug brab mégudu. Atin i Pablowe ménahur dob sibéy ne. Tidéw béno, ténégé no brab déménasal atin modor so béno, ménadi-adi so. <sup>9</sup> Sabaf bé ni ménrigo, i kéluhanay de déméruun do étéw dob no ingéd ménangéy ro dob Pablowe. Atin kéluhana ro ménadi-adi. <sup>10</sup> Atin niraya ro begey médo do éntingayén. Brab amun ménda geyén dob barkowe, niraya ro begey bé kéluhanay éntingayéne kailanga key bé kéagéw geye.

<sup>11</sup> Diyo wén i sébaane barko tidéw Alejandria féndawét “Do Séfing Tulus”, non téménrén diyo bé gaiwe mélégénéy. Mélaw amun énggéléfas i téléwe gétérésang kélungonon, ménda gey. <sup>12</sup> Atin déménunggu gey dob ingéde féndawét Sirakusa brab téménrén gey diyo téléw gétérésangan. <sup>13</sup> Atin tidéw diyo, méntaus gey mangéy Regio. Atin bé démoé de déménufar i réfuruhe tidéw déligdigan brab énggumah gey dob Peteoli bé ménruwowe gétérésangan. <sup>14</sup> Atin diyo énggito gey i de dumo gey munur bé Kristowe brab fénbati ro begey diyo ségefadiyan. Tidéw béno, méntaus gey magéw mangéy Roma. <sup>15</sup> I de dumo gey munur bé Kristowe bati dob Roma, énggélungoo roy lalag i kéngumah geye. Mélaw ménagéw i de dumo bero mangéy dob ingéde féndawét “Foro de Apio” brab de dumo de ménangéy “Tres Tabernas” inok balaké ro begey. Amun énggito Pablowe bero, ménfésalamat dob Tuluso brab ménbagér i fédéw ne.

### *Dob Roma*

<sup>16</sup> Amun énggégumah gey dob Roma, ténungkas roy Pablowe bati dob sébaane lawi beroy ségétéwe sundalo mantayan de.

<sup>17</sup> Amun énggéléfas i téléwe gétérésangan, féntawag Pablowe odoroy de Judio inok sélimud ro. Amun ménsélimud ron, bénréh Pablowe bero mano, “Do dumo gu, fiyon fo ké énda i rénigo gu sébanil bé de dumo tom do Judio taloo no bé adate tidéw dob de katufua tom, fénrus ro begén dob Jerusalem atin naté ro begén dob de Romano. <sup>18</sup> Atin i de méguléw tidéw Roma fénénginsaa ro begén brab tangéyé ron damén begén non gétiga ro énda i rénigo gu tete funa ku méléhu. <sup>19</sup> Amun énda ménagayun i de Judio de, nongot guy mangéye dob datue dob Roma, fiyon fo ké énda i féngétebo gu bé de dumo gu Judio. <sup>20</sup> Been i niy funa kuwe ménongot géségito begom brab sébéréh begom. I funa kuwe ménikét bé de sangkali ni non bé kéunur guwe bé Kristowe, sani inam i kéluhanay de Judio.”

<sup>21</sup> Atin séménumbul ro maro, “Enda sénay énggédot gey sulat tidéw Judea fantag bé beeme. Atin i de dumo tom do Judio ménangéy dini tidéw diyo énda mon i nuret ro tete fantag bé beeme. <sup>22</sup> Endob méuyot gey mégélingo ké ati kaame de kéfégitung non gétiga key dob kéluhanay de gonon, wén i do étéw émbéréh ro tete fantag bé kaame kéféngintulus.”

<sup>23</sup> Mélaw ménséfagayun ro mémili térésang sélimud bé Pablowe. Atin toow fo médooy ménangéye dob lawie gonon Pablowe bati bé no térésang. Atin tidéw fanay géfuwén énggumah kélungonon i kétoro Pablowe bero fantag bé kéféguléw i Tuluse bé de étéwén. Atin ténulama no bero fénu-unur bé Jesuse bé kélabit ne bero bé de sénulat Moises brab de étéw sénarigoy Tuluse muret bé kébéreh ne. <sup>24</sup> Atin i de dumo bero énggémunur bé kébéreh ne, éndob i de dumo bero énda fo munur ro de. <sup>25</sup> Mélaw amun méntékédan ro, ménsébaad ro bé kébéreh Pablowe mano, “Toow i fénbéréh i Rémogor i Tuluse bé Isaiase ségétéw sénarigoy Tuluse muret bé kébéreh ne dob de katufua kom, <sup>26</sup> mano, ‘Agéw go mangéy dob de ni do étéw brab béréhéh bero, Mégélingo gom éndob énda gésobuto kom de, brab téméngténg gom éndob énda gito gom de. <sup>27</sup> Non métégas i de uléw i de étéw. Ménéfing i de kélingo ro, brab méntéléféféng i de moto ro. Amuk énda loo no bé nan, gégitoy de moto ro, brab gégélungo i de kélingo ro, brab gésobut i de itunga ro, brab balengé roy de fédéw ro mangéy dob Begéne inok féadi-adiné ku bero.’”

<sup>28</sup> Féntaus Pablowe kébéreh ne mano, “Mélaw fatut gétiga kom i uret i Tuluse fantag bé kékukas ne ménuretén dob de békén Judio. Atin i berowe fégélungo ro fo



toow.” <sup>29</sup> Amun énggilid bénréh Pablowey ni, ménule i de Judio séédél ro fo toow.

<sup>30</sup> Atin bé rugay i ménruwowe gébélintuwa, ménbati i Pablowe dob lawie gono no mafin. Atin tényakufén i kéluhanay de étéw mangéy de témukaw. <sup>31</sup> Atin nuretén i kénéguléw i Tuluse, atin ménbaraw ténoroén i fantage bé Kadnane Jesu Kristo brab énda i géménlé de.

## I Sulat Pablowe dob de Munur bé Kristowe dob Roma

Been i niy sébaane bé de sénulat Pablo fégetoro bé de munur bé Jesu Kristowe. Bé gétahe, toow fo mérarék i Pablowe bé de munur bé Jesuse, atin ménuyot méméléhu bero. Endob tidéw béno, méntéfégitoy Jesuse dob Pablowe tidéw dob lawayo. Tidéw béno, bénalengén i fédéw Pablowe brab ménwaléy munur bé Jesuse. Tidéw man béno, ménwaléy i Pablowe bantugan muret fantag bé Jesuse. Sémenugud mangéy dob de médoos do ingéd inok féunuré noy de étéw dob Jesu Kristowe. Atin médooy de ménunur sabaf bé kéuret Pablowe ni.

Amun sénulat Pablowe ni sulat dob de munur do bati dob Roma, énda séna énggéangyéy de diyo. Endob ménuyot foy Pablowe mangéy diyo. Mélaw sénulatén i ni fégeségifaén bero. Sénulatén soy ni inok toroé no bero fantag bé Jesu Kristowe. Ténoro Pablowe so bé i kéluhanay de étéw, wén i do sala ro. Atin i bayad i salae, been i kéléhue. Endob i Tuluse, sénuguén i Nga ne Jesu Kristo dob duniyae ni inok féluhuén. Ménléhu i Jesuse génantino noy de kéilawan. Mélaw fésadagéy Tulusey de sala i de étéw amuk munur ro bé Jesuse. Atin i de munur bé Jesuse, féwaléyéy Tuluse bero méntintu dob adafa nuwe. Been i niy kétoroe dob ni sulat Pablowe ni.

<sup>1</sup> Begéney Pablowe sulata ku begom do munur bé Jesuse dob ingéde Roma. Begéney ségétéwe sugu-sugué Jesu Kristowe. Fénéмили i Tuluse begén waléy apostol inok ureté kuy Fiyowe Uret fantag bé Jesuse.

<sup>2</sup> I ni Fiyu Uret, fénasad i Tuluse bé do gétahe bé kéfésulat ne bé de sénarigo no muret bé kébéreh ne dob Mékétéfuwe Libro. <sup>3</sup> Atin i ni uret, been i niy fantage bé Nga i Tuluse, sani Kadna tome Jesu Kristo. Ségétéw so kéilawan non ménumah tidéw dob katufua nuwe Datu Dabide. <sup>4</sup> Atin i Jesuse ni, Mékétéfu so Tulus non fénggito noy Been i Nga i Tuluse bé kétébule ne bé barakat ne. <sup>5</sup> Atin sabaf bé sénugu Kristowe begén, niray i Tuluse begén i fiyowe galbék gu non féwaléy i Tuluse begén ségétéw apostol inok émbantug i Kristowe. Atin mélaw démoyunu magéw muret témoro dob de étéw dob kéluhanay de ingéd inok munur ro so bé Jesuse. <sup>6</sup> Atin fiyon i begome do munur bé Kristowe dob Roma, fénéмили i Tuluse so begom waléy do kuyug Jesuse.

<sup>7</sup> Mélaw sulata kuy kéluhana kome dob Roma do kénimuoy Tuluse brab fénéмилиén waléy kuyugén.

I Abay tome Tulus brab Kadnane Jesu Kristo mégédaw ro damén begom brab iray ro damén begom i métanéke fédéw.

### Fésalamat i Pablowe bé Tuluse

<sup>8</sup> Ay niy sunguwe bérehé ku begom: Fésalamatu bé Tuluse dob Jesu Kristowe sabaf bé begome. Non énggélingooy kéluhanay étéwey fantage bé kéunur gome. <sup>9</sup> Sabaf bé Tuluse, mégéroru gémalbék muret bé Fiyowe Uret fantag bé Nga ne Jesu Kristo. Atin énggétigay Tulusey kédasala kuwe begom sénga tékélid. <sup>10</sup> Atin démoyunu mongot bé kédasala kuwe bé féfakayéy Tulusey kéagéw guwe mangéy témukaw begom amuk kétaya no, non ménrugayén i kétaya kuwe témukaw begom. <sup>11</sup> Non toow fo méuyotu géségito begom inok gétoroo ku begom i ténoro i Rémogor i Tuluse begén funa kom waléy méégét i kéunur gome. <sup>12</sup> Mélaw séféfiyo tom fédéw bé kéunur tome bé Kristowe.

<sup>13</sup> Do dumo gu, méuyotu ké gétiga kom i ni, médoonén gule bénantak guy mangéye témukaw begom éndob wén foy manggae begén. Méuyotu damén mangéy diyaan inok géféunuro kuy de étéw békén Judio dob begome dob Roma bé Jesuse, loo bé rénigo guwe dob de békén Judio dob de ségiyo ingéd. <sup>14</sup> Non maak wén i dakél utong gu dob kéluhanay de étéw. Atin i bayad guwe de, been i kéuret guwe fantag bé Jesuse. Fatut ureté ku dob de métilédéd brab dob de léngléngén, dob de énggéféganad brab dob de énda énggéféganad. <sup>15</sup> Mélaw toowu fo méuyot muret bé Fiyowe Uret dob begome so do bati dob Roma.

### I Fiyowe Uret

<sup>16</sup> Enda fo mémalawu muret bé ni Fiyu Uret non fiyon fo ké ati munure de, i sunguwe do Judio brab tidéw béno do békén Judio, been so fukaséy Tuluse inok énda mékukumén. <sup>17</sup> Non ménfayag dob Fiyowe ni Uret bé féwaléyéy Tuluse méntintuy de étéw munur bé Kristowe sabaf saén bé kéunur ruwe. Non wén i Ménsulate Kébéreh i Tuluse mano, "I étéwe ménwaléy méntintu sabaf bé kéunur ne bé Tuluse, méuyag taman sa taman."

### Ménsala i Kéilawane

<sup>18</sup> Atin i Tuluse dob lawayo, fénggito noy kékerit ne bé de tete adat i de étéw brab de sala ro. Non sabaf bé de tete rignon ro, alangé roy toowe kétoro. <sup>19</sup> Kukuméy Tuluse bero non magad damén gésobuto roy fantage bé Tuluse. Non fénkéntayéy Tuluse nén i kékégétiga nuwe de dob berowe. <sup>20</sup> Mélaw énda i funay ségétéwe étéw gébérehé mano, "Enda gétiga ku de ké wén i Tulus." Non tidéw bé kélimbag i Tuluse bé duniyae ni, énggétuwanén i magufusae barakat i Tuluse bé ati lénimbag ne fiyon fo ké énda giton

## 2

i Tuluse. Atin sabaf so bé atiy lénimbag ne, fatut gétigay kéluhanay étéwe bé tintu Tulus i Tuluse. <sup>21</sup> I de ni do étéw énda munur ro bé Tuluse, gétiga roy fantage bé Tuluse éndob énda fégadata ro de loo damén bé fatute. Enda so fésalamata ro de. Yamula i kénéfégitung ruwe ménwaléy énda i lantékén brab maak délémon. Non éndaén gésobuto roy toowe tidéw dob Tuluse. <sup>22</sup> Atin fiyon fo ké béréhé ro do métilédtdé ro, éndob ménwaléy ro do dufang. <sup>23</sup> Non énda féngadafé roy barakatane Tulus magufusa, yamula féngadafé roy de kéninontow rénigo ro loo bé falas i kéilawane énda magufusaén, brab do kloh manok, brab do binatang, brab do ulé.

<sup>24</sup> Atin non toow fo dufang i de ni do étéw, téngak i Tuluse bero brab féndayaén bero rémigo do tete kétaya ro. Atin mélaw toow fo tete brab mékémalay de kérigo ro bé de lowoh ro. <sup>25</sup> Atin énda munur ro bé toowe fantag bé Tuluse. Yamula munur ro bé de tugi. Féngadafé roy de lénimbag i Tuluse, énda féngadafé roy Beene léménimbag bé de ni. Médayéw damén i Tuluse taman sa taman. Amen.

<sup>26</sup> Atin sabaf bé kétagak ruwe bé Tuluse, téngak i Tuluse bero brab féndayaén bero rémigo bé de tete do mékémala kétaya ro. Fiyon i de libun bero, ménwaléy ro maak lagéy. Mika ro sétayan bé de lagéy loo damén bé fatute. Yamula sétayan ro falan bero do libun. <sup>27</sup> Atin i de lagéy rigoné roy tetee loo so bé ni. Ménwaléy ro maak libun. Mika ro sétayan bé de libun loo damén bé fatute. Yamula sétayan ro falan bero do lagéy. Rigoné roy toowe fo tete funa ro fatut mémala. Atin mékukum ro loo bé fatute sabaf bé de tete rigoné ro bé de lowoh ro.

<sup>28</sup> Sabaf bé kéika ruwe munur bé Tuluse, téngak i Tuluse bero brab féndayaén bero bé de tete kénéfégitung ro. Mélaw rigoné roy de tintu fo tete énda damén fatutén rigonén. <sup>29</sup> Atin falan tete i démoyune fénggitung ro. Ménwaléy ro do tete étéw, do arumén, do rémigo tete, do toow fo médaléw, do méméléhu, do méuyot sétiboh, do tugién, do dusa, brab do géméno. <sup>30</sup> Atin démoyun émbéréh ro tete fantag bé de dumo ro brab mérarék ro bé Tuluse. Enda fégadata roy dumo ruwe brab toow ro fo félangkalangka. Toow ro fo furung mégitung bé de tete rigonén. Atin énda odoro roy sugu i de lukés ro. <sup>31</sup> Atin furah ro brab énda tumané roy de fasad ro. Atin énda mégédaw ro taloo no méuray i na ruwe bé dumo ruwe. <sup>32</sup> Enggétiga roy kéréhé i Tuluse bé fatut méléhu i étéwe rémigo bé de ni do késalaan. Endob fiyon fo ké loo bé ni, fétausé ro soy de tete rigoné ro, atin méuyot ro de uman ké mamung soy de dumo étéw bé de ni do rigoné ro.

*I kékukum i Tuluse*

<sup>1</sup> Mélaw gétiga tom fatut kukumén i de tete étéw. Endob énda i ségétéw begom gékukum bé de ni do étéw non fatut gom so mékukum. Non rémigo gom so tete ségiléw bé berowe. Mélaw amuk dowoyé kom bero, dénowoy gom soy de lowoh gom. <sup>2</sup> Atin gétiga tom mééntang i kékukum i Tuluse bé de étéw rémigo tete loo bé de ni. <sup>3</sup> Fiyon fo ké dowoyé kom i de ni do tete étéw, éndob fiyon i begome rémigo gom so tete ségiléw bé berowe. Mélaw kagom fégitungén de ké géséliyah gom bé kékukum i Tuluse. <sup>4</sup> Makom keeyén ké éndaén kailanga kom odoron i kétayay Tuluse non toow fo mégédaw i Tuluse brab tingkélé roy kékérit ne. Endob gétiga kom damén i funay Tuluse mégédaw brab témingkél inok gésénule gom bé de sala gom. <sup>5</sup> Endob toow fo métégas i de atura kom funa kom mika gésénule. Mélaw méumanan i kékéritoy Tuluse begom. Atin toow na fo gétimeal i kékukum i Tuluse begom bé gaiwe féfégito noy méntang kékukumén. <sup>6</sup> Non iray i Tulusey fatute irayén dob séngae étéw sabaf bé de rénigo no. <sup>7</sup> Wén i do étéw rigoné roy fiyowe sénga tékélid non méuyot ro de ké dayéwéy Tuluse bero brab fégadata no bero brab iraya no bero bé umule magufusa. Mélaw tintu fo iray i Tuluse beroy umule magufusa. <sup>8</sup> Endob wén soy do étéw toow fo do méitung. Mika ro rémigo fiyo, yamula rémigo ro tete. Mélaw toow fo émbéngat i kékukum i Tuluse bero, non tintu fo mékérit bé de rigoné ro. <sup>9</sup> Toow fo kérasayan brab kérégénan i kéluhanay de étéw rémigo tete, dob de Judio sungu, tidéw béno dob de étéw békén Judio. <sup>10</sup> Endob i de étéw rémigo bé fiyowe, dayéwéy Tuluse bero brab iraya no bero bantuanon brab kédané noy kékuku ruwe. Sungu-sungu dob de Judio, tidéw béno dob de étéw békén do Judio. <sup>11</sup> Non i kékukum i Tuluse toow fo mééntang, atin énda i ramigo no.

<sup>12</sup> I de étéw békén do Judio, énda gétiga roy de sugu i kitabe tidéw dob Moisesé. Mélaw amuk gésala ro, kukuméy Tuluse bero, éndob énda usaré noy kitabe fégékukumén bero. Endob i de Judio, gétiga roy de sugu i kitabe tidéw dob Moisesé. Mélaw amuk gésala ro, kukuméy Tuluse bero bé kitabe. Atin i bayad i sala i de étéw kéléhu. <sup>13</sup> Non i Tuluse énda féwaléy no méntintuy étéwe mégélingo saén bé kitabe. Yamula béréhéy Tuluse méntintuy de étéw modor bé kitabe. <sup>14</sup> I de étéw békén do Judio, énda gétiga roy kitabe tidéw dob Moisesé. Endob fiyon fo ké énda gétiga roy kitabe, wén i no géodoro ro soy atiy ménsugue dob kitabe. Non gétiga ro dob de fédéw roy atiy fatute rigonén. Mélaw maak wén soy kitab dob de fédéw ro. <sup>15</sup> Bé

de fiyo rigné ro, fégitó ro gétiga ro dob de fédéw roy fatute dob kitabe. Atin gétiga ro so dob de itunga roy fatute brab tetee. Non amuk rigné roy fiyowe, moror ro. Endob amuk rigné roy tetee, tete soy fédéw ruwe de. <sup>16</sup> Mélaw loo bé niy kékukum Jesu Kristowe bé de ménbunéy do kékégitung i de kéilawan bé gaiwe fékukuméy Tuluse loo bé ménbéréhe dob Fiyowe Uret ureté ku.

### *Fantag bé de Judio*

<sup>17</sup> Atin fantag bé begome do Judio. Méuyot gom de fo ké fédawét gom i de lowoh gom do “Judio”. Atin sémarig gom bé kéodoro kome bé kitabe brab félangka-langka gom non begom i fénémili i Tuluse. <sup>18</sup> Gétiga kom i kétayay Tuluse rigné kom atin gétiga kom i fatute non ténoro i kitabe begom. <sup>19</sup> Makom ké begom i manangguwite bé de étéw maak langafén non énda gétiga roy fantage bé Tuluse. Brab makom ké begom i do maak solo émfégitó bero bé agéwone mangéy dob Tuluse. <sup>20</sup> Atin makom ké begom i do témoro bé de dufang, brab do maistéro dob de étéw mantu séna méngganad fantag bé Tuluse. Loo bé niy kékégitung gome non niray i Tuluse begom i kitabe, atin diyo giton i tintuwe kékégitung brab toowe. <sup>21</sup> Démoyun gom témoro dob de ségiyo, éndob fatut toroé kom i kagome lowoh. Témoro gom makom, “Kagom ménakaw”, éndob ménakaw gom so. <sup>22</sup> Béréhé kom makom, “Kagom lémamfa”. Endob lémamfa gom so. Brab bénréh gom mika gom bé de kéninontow, éndob mahur gom dob de lawi féngadafan inok ménakaw do kéninontow. <sup>23</sup> Félangka-langka gom non niray i Tulusey kitabe dob begome. Endob fémalané kom i Tuluse bé éndae kéodoro kom bé kitabe. <sup>24</sup> Wén i Ménsulate Kébéréh i Tuluse mano, “Ménbéréh i de békén Judio tete fantag bé Tuluse non bé de tete rénigo gom do Judio.”

<sup>25</sup> Atin i begome do Judio, makom ké toow fo méлага i kétulie begom. Atin toow, wén i lagaén amuk odoró kom i kitabe. Endob amuk énda odoró kom i kitabe, énda i laga i kétulie begom. <sup>26</sup> Ufama, i étéwe békén Judio, fiyon fo ké énda méntulién, amuk odoró noy kitabe, maak méntuli so dob adafay Tuluse. <sup>27</sup> Mélaw i de étéw békén Judio do énda méntulién, amuk modor ro bé kitabe, fégitó ro bé fatut mékukum gom. Non énda odoró kom i kitabe fiyon fo ké dob begome sénulat i kitabe ni, brab do méntuli gom. <sup>28</sup> Non i étéwe métandaan saén i lowoh ne bé kétulie de éndob énda séna méntintuy fédéw ne, békén tintu Judio. Non i funane fétili békén saén dob lowohe. <sup>29</sup> Yamula i tintuwe Judio, been i étéwe méntintuy fédéw ne. Non maak méntuli i fédéw ne non fénwaléy i Rémogor i Tuluse méntintuy fédéw ne. Békén i kitabey ménféwaléy de méntintu. Atin i

étéwe ménwaléy méntintu non bé galbék i Rémogor i Tuluse, médayéw i Tuluse de, fiyon fo ké énda médayéw i de étéw de.

### 3

<sup>1</sup> Amuk toow i ni, aw wén i laga i étéwe ké Judio loo ké énda? Aw wén i laga i kékétilie loo ké énda? <sup>2</sup> Toow fo dakél i laga ne. Non wén i do dakél kékéfiyonon niray i Tuluse dob betome do Judio. I sunguwe de, sénarig i Tuluse dob betome Ménsulate Kébéréhén. <sup>3</sup> Fiyon fo ké i de dumo tom do Judio énda munur ro bé Kébéréh i Tuluse, been so tumanéy Tulusey fasad ne. <sup>4</sup> Non fiyon fo ké i kéluhanay de kéilawan do tugién, énda tugién i Tuluse. Non wén i ménsulate kébéréh Dabide fantag bé Tuluse mano, “Falan fo toow brab méntintuy kébéréh me. Atin amuk wén i témoro Beem, Been so témaban i Tuluse.”

<sup>5</sup> Endob amuk wén i dufang émbéréh mano, “Amuk rémigo tom tete, fiyo so, non gétigay de étéw i kékéfiyo Tuluse amuk gito roy kététe tome. Non mas gésoboto roy fiyowe rignéy Tuluse bé de rigné tom. Mélaw énda fatutén kukuméy Tuluse betom.” Endob toow fo dufang i étéwe gébéréh loo bé ni. <sup>6</sup> Békén toow i nan dufang kébéréh, non amuk énda méntintuy Tuluse, énda gékukumo noy kéilawane.

<sup>7</sup> Atin amuk wén soy dufang étéw émbéréh mano, “Fiyo so ké tugién tom inok giton i éndae kétugiéy Tuluse. Mélaw gédayéwoy de étéw i Tuluse non toow na fo fiyooy Tuluse bé betome. Mélaw énda fatut tom mékukum bé de sala tom.” Endob toow fo dufang i ni kébéréh. <sup>8</sup> Non ségiléw bé niy dufange kébéréh mano, “Rémigo tom tete inok méumanan i fiyowe.” Toow fo dufang i nan kékégitung. Endob wén i do étéw téménifu begén bé bénréh gu kun i nan kédufangan. Endob énda i énggébérého ku loo bé nan. Fatut mékukum i de étéw ménbéréh tugién fantag bé begéne loo bé nan. Atin mékukum ro mon.

### *Enda i méntintu étéw*

<sup>9</sup> I betome do Judio, katom fégitungén de ké toow na fo fiyooy katome gohon bé de étéw békén do Judio. Non fénggito gun begom i funa tome ségiléw. Enda i sébidana tom do Judio brab de békén Judio non kéluhana tom énggésala. <sup>10</sup> Non wén i Ménsulate Kébéréh i Tuluse mano, “Enda i méntintu dob adafay Tuluse, fiyon ségétéw. <sup>11</sup> Enda i gésobut bé Tuluse, brab énda i séméled bé agéwone mangéy dob Tuluse. <sup>12</sup> Non i kéluhanay étéwe ténagak roy Tuluse. I kéluhanane réménigo tete. Enda i réménigo fiyo, fiyon ségétéw. <sup>13</sup> I de ba ro maak do lébéng énda méntamfuren. Non toow fo tete i de kégébaa ro. Atin toow ro fo émbagéw témugi. I de kébéréh ro maak bisa ulé. <sup>14</sup> Démoyun ron mémula brab

mékétete fédéw i de kébéreh ro. <sup>15</sup> Toow ro fo magad méméléhu. <sup>16</sup> Atin i kéluhanay géayo ruwe mébinasa brab kéfasangan. <sup>17</sup> Sétiboh saén i gétiga ruwe. <sup>18</sup> Atin énda fo féghadata roy Tuluse.” Been i niy Ménsulate Kébéreh i Tuluse.

<sup>19</sup> Atin énggétiga tom i ni: I kitabe tidéw dob Moiseese kay de Judio, sani de téménlama modor bé ni kitab. Sénulatén inok énda i funay étéwe gébéreh bé énda i salaén. Atin mélaw i kéluhanay kéilawane fakay kukuméy Tuluse. <sup>20</sup> Non i kéilawane réménigo bé éndae fakay dob kitabe. Mélaw énda i étéw ménwaléy métintu dob adafay Tuluse sabaf bé kéodoro nuwe bé kitabe. I funane wén i kitab inok féghito noy sala i étéwe.

#### *I kéfétintuy Tuluse*

<sup>21</sup> Endob béleewe ni, fénggityoy Tulusey kéfétintu nuwe bé étéwe. Békén sabaf bé kéodoroy étéwe bé kitabe. Nuret i Ménsulate Kébéreh i Tulusey fantage bé de ni. <sup>22</sup> I Tuluse, féwaléy no métintuy étéwe sabaf bé kéunur ne bé Jesu Kristowe. Rignoné noy ni dob kéluhanay de munur bé Kristowe non énda i ramigoy Tuluse. <sup>23</sup> I kéluhanay étéwe énggésala brab toow fo kulang i kéluhanane dob fatute kétayay Tuluse. <sup>24</sup> Gido loo, sabaf bé kéghédaw i Tuluse saén, féwaléyén betom métintu non bé kéunur tome bé Jesu Kristowe sani kémédane bé de sala tom. <sup>25</sup> Sabaf bé de sala tom, kukuméy Tuluse damén betom bé kéléhue. Endob i Tuluse fénféléhuén i Jesu Kristowe inok gantino no betom bé de sala tom, brab inok mékédan i kékukum i Tuluse betom. Mélaw fésgadéy Tuluse betom bé de sala tom sabaf bé kéunur tome bé Jesuse, sani tulake niray i Tuluse. Réngigoy Tulusey ni inok féghito noy kééntang i kékukum ne. Bé do gétahe, énda kéunukumén i de étéw ménsala non toow fo témingkél i Tuluse. <sup>26</sup> Gido loo, fatut kukuméy Tulusey de sala. Been i niy funa nuwe kéunukumén i Jesuse. Réngigo noy ni inok féghito noy kééntang i kékukum ne. Atin mélaw béleewe ni, féwaléyén métintuy de étéw munur bé Jesuse.

<sup>27</sup> Mélaw énda i funa tom félangka-langka. Non énda ménwaléy tom métintu sabaf bé kéodoro tome bé kitabe. Yamula ménwaléy tom métintu sabaf bé kéunur tome bé Jesu Kristowe. <sup>28</sup> Been i niy funa kuwe ménbéreh bé funay étéwe waléy métintu, békén sabaf bé kéodorone bé kitabe, yamula sabaf saén bé kéunure bé Jesuse. <sup>29</sup> Non i Tuluse békén saén i de Judioy géféngadafe de, éndob fiyon foy de békén Judio géféngadafa ro soy Tuluse. <sup>30</sup> Non sébaan saén i Tuluse. Atin ségiléw i kéfétintu nuwe bé de Judio brab de békén Judio, sabaf saén bé kéunur ruwe bé Jesuse. <sup>31</sup> Endob kagom féghitungén de ké ikkaa tomén

i kitabe. Békén! Non amuk munur tom bé Jesuse, géodoro tom mélaw i kitabe.

## 4

### *Fantag bé Abrahame*

<sup>1</sup> Ufama, i Abrahame, sani katufua keye do Judio. <sup>2</sup> Amuk ménwaléy métintu non bé kéodoro nuwe bé de sugui Tuluse, wén i funa no félangka-langka. Endob gétiga tom ménsala soy Abrahame, atin mélaw énda i funa no félangka-langka. <sup>3</sup> Non wén i Ménsulate Kébéreh i Tuluse mano, “Ménunur i Abrahame bé Tuluse. Atin mélaw kénarang i Tuluse métintu sabaf bé kéunur ne.” <sup>4</sup> Ufama, amuk wén i séghétéw étéw géménalbék, gédoté noy sahud ne. Atin médait sémahud. Békén saén niray de non sahudén bé génalbéko nuwe. <sup>5</sup> Endob békén loo bé nan i kéfétintuy Tuluse betom do munur do Beene. Non féwaléy no betom métintu sabaf saén bé kéghédaw ne. Enda médait tom médot bé ni non énda génalbéko tom de. Ménsala tom, gido loo kénarang i Tuluse betom métintu non bé kéunur tome bé Jesuse. <sup>6</sup> Been i niy atag i kébéreh Dabide bé méoror kun i étéwe ménwaléyén métintu dob adafay Tuluse békén sabaf bé galbék ne. <sup>7</sup> Bénreh Dabide mano, “Méoror i de étéw fénsagaday Tulusey de sala ro brab ménkédan i de tete réngiro ro. <sup>8</sup> Toow fo méoror i étéwe lénifot i Kadnaney de salaén.” <sup>9</sup> Atin i ni kéfiyonon, békén saén niray dob de Judio, sani de méntuli. Yamula niray so dob de békén Judio, sani de énda méntuli. Non wén i ni Ménsulat Kébéreh i Tuluse lénabit gu bé gétahe mano, “Ménunur i Abrahame bé Tuluse, atin mélaw kénarang i Tuluse métintu sabaf bé kéunur ne.” <sup>10</sup> Ati gaiwe de féwaléy i Tuluse métintuy Abrahame? Féntintuy Tulusey Abrahame bé énda séna méntulién de. <sup>11</sup> Tidéw béno, ménfétuli i Abrahame. Atin i funa nuwe ménfétuli inok wén i tanda féghito no bé kéfétintuy Tuluse de sabaf bé kéunur ne fiyon fo bé énda séna méntulién de. Mélaw i Abrahame ménwaléy maak katufuay de munur bé Tuluse, sani de ménwaléy métintu dob adafa nuwe, fiyon fo ké énda séna méntuli ro. <sup>12</sup> Beene soy katufuay de Judio do munur, éndob békén saén sabaf bé kéfétuli ruwe. Yamula sabaf so bé ségiléw i kéunur ruwe bé Abrahame fiyon fo ké énda séna méntulién de.

### *I Kéunure*

<sup>13</sup> I Tuluse fénsada noy Abrahame brab de séfuén bé irayén i duniyae dob berowe. Endob i funay Tuluse réménigo bé ni fasad békén sabaf bé kéodoro Abrahame bé kitabe. Yamula non ménunur bé Tuluse funa no so ménwaléy métintu. <sup>14</sup> Non amuk i fénsad i Tuluse irayén dob de étéw modor bé kitabe, énda i atag i kéunur i étéwe brab énda i laga

i fasad i Tuluse. <sup>15</sup> Endob énda waléy tom métintu bé kéodor tome bé kitabe, non been i kitabey funay Tuluse mékérít betom. Non énda géodoro tom de. Endob amuk énda i kitab, énda géfélisho tom de.

<sup>16</sup> Rénigoy Tulusey fasad ne sabaf bé kéunur Abrahame de, inok giton i fasad i Tuluse sabaf saén bé kégedaw ne, békén sabaf bé galbék i étéwe. Atin i fasade ni kay kéluhanay de séfu Abraham. Non kay de Judio modor bé kitabe brab kay de étéw so békén Judio munur loo bé Abrahame. Non i Abrahame, beeney maake katufuay kéluhanay de munur, do Judio brab de békén Judio. <sup>17</sup> Non wén i Ménsulate Kébéréh i Tuluse dob Abrahame mano, “Féwaléyé ku beam katufuay de étéw dob de médoó ingéd.” Mélaw dob adafay Tuluse, i Abrahame ménwaléy katufuay de munur bé Tuluse non ségiléw i kéunur ruwe bé beene. I Tuluse unuro tom, toow fo barakatan brab fakay tébuleé noy de ménléhu brab gélimbaga noy de éntingayén énda séna ménlimbagén. <sup>18</sup> I Abrahame ménunur bé Tuluse fiyon fo ké éndaén i inamén géféngénga. Mélaw ménwaléy katufuay de étéw dob de médoó ingéd. Non wén i Ménsulate Kébéréh i Tuluse mano, “I de séfuém waléy ro médoó loo bé kédooy de gitoon dob lawayo.” <sup>19</sup> Bé béno gai toowén fo lukés i Abrahame, gédét mératuh gébélintuwa i idad ne, brab gétiga no éndaén fakayén géféngénga. Atin gétiga no soy bawag ne Sarah éndaén fakayén géféngénga non toowén fo lukés so. Endob fiyon fo ké loo bé niy kélubay i lowoh ne, émbagér i kéunur Abrahame bé Tuluse. <sup>20</sup> Brab énda ruwo-ruwoy fédéw ne fantag bé fasad i Tuluse de, yamula fénégétén i kéunur ne brab dényawén i Tuluse. <sup>21</sup> Non tintu fo séménarig dob Tuluse bé rigoné noy atiy fénasad ne dob beene. <sup>22</sup> Atin mélaw kénarang i Tuluse métintu sabaf bé kéunur ne. <sup>23</sup> Atin bang i ni Ménsulat Kébéréh i Tuluse mano, “Kénarang i Tuluse métintu” békén saén fantag bé Abrahame. <sup>24</sup> Yamula sénulatén so dob betome do munur bé Tuluse, sani téménébulee bé Jesuse Kadna tom, inok karangéy Tuluse so betom métintu sabaf bé kéunur tome. <sup>25</sup> Non i Jesuse sénugu i Tuluse inok féléhuén gémantinon betom sabaf bé de sala tom. Tidéw béno, méntébulé, inok waléy tom métintu dob adafay Tuluse.

## 5

### *I kéfétintuy Tuluse*

<sup>1</sup> Mélaw i Tuluse fénwaléyén betom métintu dob adafa nuwe sabaf bé kéunur tome bé Kadna tome Jesu Kristo. Atin sabaf bé ni rénigo Jesuse, éndaén mékérít i Tuluse betom. <sup>2</sup> Atin non bé kéunur tome bé Jesuse, fénfakayén i kégedote bé kégedaw i Tuluse béleewe. Mélaw toow tom fo moror

non gétiga tom réméndaw tom moso loo bé Tuluse. <sup>3</sup> Atin békén saén i niy funa tome moror. Moror tom so bé de mérégén géagéwo tom non sabaf bé de kérégénon, waléy tom géfédayday munur. <sup>4</sup> Atin amuk géfédayday tom munur, mésuwat i Tuluse betom. Atin amuk mésuwat i Tuluse betom, waléy émbagér i inam tome. <sup>5</sup> Atin i inam tome métuman, non fénggitoy Tulusey kégedaw ne betom bé kéiray ne bé Rémogor ne mangéy dob de fédéw tom.

<sup>6</sup> Amun maak do férisu tom séna bé de sala tom brab énda gétabanga tom i lowoh tome, i Tuluse ténabangén betom dob fénémili ne gai. Non ménléhuén i Nga ne Jesu inok fukasé no betom do tete étéw. <sup>7</sup> Toow fo mérégén i ségétéwe étéw ménléhu inok tabangé noy métintuwe étéw. Gido loo, wén so keey i ségétéw étéw ménléhu inok tabangé noy métintuwe étéw. <sup>8</sup> Endob i Tuluse, fénggito noy kégedaw ne betom, non fiyon fo ké ménsala tom de séna, ménléhu i Kristowe génantino no betom. <sup>9</sup> Atin béleewe ni, ménwaléy tom métintu dob adafay Tuluse sabaf bé kéléhu Kristowe. Mélaw toow na fo gétiga tom bé méfukas tom tidéw dob kékukum i Tuluse sabaf bé Kristowe. <sup>10</sup> Bé gétahe de, sébanil i Tuluse betom, éndob sabaf bé kéléhu i Nga ne, ténayakufén man betom. Mélaw non béleewe ni do dumoy Tuluse nén betom, tintu gétiga tom méfukas tom sabaf bé kétébule i Nga ne. <sup>11</sup> Atin békén saén bé ni! Méror tom fo toow non bé kégedaw i Tuluse fénggito no féngagéw dob Kadna tome Jesu Kristo. Been i niy funay Tuluse ménkédan i kérít ne betom brab ténayakufén betom.

### *I Adame brab Kristowe*

<sup>12</sup> I funa nuwe wén i do tete dob duniyae ni, non ménsala i sunguwe étéw féndawét Adam. Atin kéléhu i bayad i salae. Tidéw béno, léménégéb i tete mangéy dob kéluhanay étéwe. Mélaw i kéluhanay kéilawane ménléhu non i kéluhanane ménsala. <sup>13</sup> Fiyon fo ké énda séna niray Moisesey kitabe de, wénén i do sala dob duniyae ni. Endob amun énda sénay kitab de, énda so ménbilang i de sala de. <sup>14</sup> Gido loo, ménléhu i kéluhanay étéwe tidéw dob Adame taman dob Moisesey, fiyon foy de étéw énda ménsala ro loo bé kéfélis Adame bé sugu i Tuluse.

I Adame maak anlung Kristowe non wén i gédotéy kéilawane tidéw dob berowe. <sup>15</sup> Endob békén ro ségiléw non i iray i Tuluse békén ségiléw bé sala Adame. Médooy étéwe ménléhu sabaf bé sala Adame. Endob toow na fo dakél i kégedaw i Tuluse irayén bé kéfénsagad ne bé médoowe étéw sabaf bé kégedaw Jesu Kristowe. <sup>16</sup> Atin loo so bé ni, békén ségiléw i kégedaw i Tuluse bé sala Adame. Non mékukum i kéilawane sabaf

bé sébaane saén sala Adame. Endob amun médooy de étéw réménigo médooy do sala, ménwaléy métintuy kéilawane dob adafay Tuluse sabaf saén bé kégedaw ne. <sup>17</sup> Sabaf bé sala Adame, méléhu i kéluhanay kéilawane. Endob toow na fo mékégaif i rénigo Jesuse non sabaf bé kégedaw Jesu Kristowe, gédotén i kéfésagad i Tuluse brab kéfétintu nuwe. Atin i de étéw do waléy métintu sabaf bé kégedaw i Tuluse, beroy Tuluse méguléw.

<sup>18</sup> Mélaw amuk sabaf bé sébaane sala Adame, mékukum i kéluhanane de, ségiléw so bé sébaane fiyo rénigo Jesu Kristowe. Non sabaf bé rénigo Jesuse, méfikas i kéluhanane inok énda mékukum ro brab gédoté roy umule magufusa. <sup>19</sup> Non i médoowe ménwaléy ménsala sabaf bé Adame énda modorén bé sugu i Tuluse, éndob médooy ménwaléy métintu dob adafay Tuluse sabaf bé kéodor Jesuse bé sugu i Tuluse.

<sup>20</sup> I funay Tuluse nirayén i kitabe inok méuman i kégitone bé salae. Endob amun minut médooy kégitone bé salae, toow na fo méuman i kégedaw i Tuluse bé kéilawane. <sup>21</sup> Mélaw fiyon fo ké dakél i bagér i salae non méléhu i de étéw, toow na fo barakatan i kégedaw i Tuluse non féwaléy no betom métintu. Mélaw méuyag tom taman sa taman sabaf bé Kadna tome Jesu Kristo.

## 6

### *Maak ménléhu i tafaye adat*

<sup>1</sup> Ati mélaw i fégitungé tome? Wén key i dufang gébéreh bé fatut fétausé tom kun i késala tome inok méuman i kéfésagad i Tuluse brab kégedaw ne betom. Endob békén fo katabuwan i nan. <sup>2</sup> Enda fakayén ké taus tom mésala non i sunguwe adat tom maak ménléhuén brab ménwaléy tomén métintu. <sup>3</sup> Aw énda gétiga kom de kéluhanan bé amun bénautis tom, fénggito tom ménwaléy tom do dumo Jesu Kristowe, maak ménamung tom so bé kéléhu ne? Non Been i géménantinon betom. <sup>4</sup> Mélaw amun bénautis tom maak ménamung tom so bé kéléhu ne brab kélébénge de. Atin sabaf bé barakat i Tuluse, méntébule i Kristowe. Ménrigoy ni inok wén soy katom bé mantuwe umul brab adat.

<sup>5</sup> Non amuk ménamung tom bé kéléhu Kristowe, tintu fo géamung tom so bé kétébule ne. <sup>6</sup> Atin gétuwa tom i ni, i tafaye umul tom brab adat tome maak ménléhuén énggéodor bé Kristowe dob kruse, inok i tafaye adat ménsala mékédané. Mélaw békénén riféy salae betom, non éndaén géfégésó no betom rémigo tete. <sup>7</sup> Non i étéwe ménléhuén, éndaén gésalaén. <sup>8</sup> Atin non maak ménléhu tomén séréngan bé Kristowe, munur tom bé méuyag tom so betom ro Kristowe. <sup>9</sup> Non gétiga tom éndaén méléhu ségule i Kristowe non méntébuleén. Mélaw éndaén gétabanay

léhuone de. <sup>10</sup> Ménléhu saén ségule inok gantino noy kéléhu i kéilawane non bé de sala tom. Atin méntébule, brab i umul ney funay Tuluse mésuwat. <sup>11</sup> Mélaw loo so bé ni, fatut tédém kom bé éndaén kailanga kom i rémigowe sala, non maak ménléhu gom séréngan bé Jesuse. Atin tédém gom i mantuwe umul gom brab adat gome sabaf bé kéwaléy gome do dumo Jesu Kristowe brab i umul gomey funay Tuluse mésuwat.

<sup>12</sup> Mélaw, do dumo gu, kagom fédayaén i de tete kétaya kom émfésala bé de lowoh gom dob duniyae ni. Kagom magayun bé de tete. <sup>13</sup> Atin kagom fédayaén i réfa i de lowoh gom mésala usaré kom fégérigo gom tete. Yamula iray gom i lowoh gome dob Tuluse inok usaré no bé fiyowe rigonén. Non been i fatute rigoné kom do ménfikasén tidéw dob kéléhue brab wénén i mantu umul gom brab adat. <sup>14</sup> Mélaw kagomén fédayaén i salae méguléwon begom, non éndaén sémarig gom bé kéodoro kome bé kitabe. Yamula sémarig gom bé kégedaw i Tuluse.

### *I kérigowe bé fiyowe*

<sup>15</sup> Wén key i dufang gébéreh bé fatut fétausé tom kun soy késala tome non éndaén sémarig tom bé kéodor tome bé kitabe, atin sémarig tom saén bé kégedaw i Tuluse. Endob békén i nan. <sup>16</sup> Gétiga kom, amuk mamfun gom, waléy gom do rifén. Mélaw amuk modor gom bé amu gome sala, méléhu gom. Endob amuk modor gom bé amu gome Tulus, waléy gom métintu. <sup>17</sup> Fésalamatu bé Tuluse non fiyon fo ké riféy salae begom bé do géta, ménwaléy gom so méégét munur bé toowe kétoro fantag bé Jesuse énggélíngoo kom. <sup>18</sup> Atin amun méntangéy gomén tidéw dob salae, ménwaléy gom do métintu sugu-suguéy Tuluse. <sup>19</sup> I fana kuwe ménbéreh bé ni ufama fantag bé riféne brab amue, inok magad i kégesobut gome bé kétoro guwe. Bé do géta, maak do rifén gom bé de tete kétaya kom. Mélaw namfuno kom i de tete do mékéresik rigoné kom brab ménumanan i de sala gom. Endob béleewe ni téféwaléy gom rifén dob métintuwe inok gérigono kom i fiyowe kétayay Tuluse.

<sup>20</sup> Bé do géta, amun riféy salae séna begom, énda gétiga kom i fantage bé fiyowe brab métintuwe. <sup>21</sup> Bé do no gai, énda gédoté kom i barase sabaf bé de tete rénigo gom. Kéléhu saén i gédoté kome de sabaf bé de ni sala. Atin béleewe ni mémala gom fantag bé de rénigo gom bé do géta. <sup>22</sup> Endob béleewe ni méntangéy gomén dob salae brab ménwaléy gom do sugu-suguéy Tuluse. Atin i gédoté kome baras i fiyowe umul taman sa taman brab fiyowe adat funa kom gérigó bé kétayay Tuluse. <sup>23</sup> Non i étéwe mésala, gédote noy bayad i salae, sani kéléhue. Endob i

étéwe munur bé Kadna tome Jesu Kristo, iray i Tulusey umule magufusa dob beene.

## 7

### *Fantag bé kitabe*

<sup>1</sup> Do dumo gu, gésobuto kom damén i ni non énggétiga kom i fantage bé kitabe. I kitabe wén i atura no bé étéwe taman méuyag séna. <sup>2</sup> Ufama, i libune wén i bawagén. Ménbéréh dob kitabe bé énda fakayén sétayan bé ségiyowe saliyo bé bawag ne taman méuyag ro séna. Endob amuk ménléhuén i bawag ne, fakayén mawag ségiyo. <sup>3</sup> Mélaw amuk sétayan bé ségiyowe lagéy ké méuyag sénay bawag ne, énggélamfa brab énda nodoro noy kitabe. Endob amuk ménléhuén i bawag ne, fakayén mawag ségiyo brab énda ménsalaén. <sup>4</sup> Mélaw do dumo gu, ségiléw so bé betome, non amun ménléhuén i Kristowe génantino no betom, maak ménléhu tom so. Mélaw éndaén kailanga no odoroto i kitabe niray Moisesé. Atin béleewe méuyag tom man séréngan bé Jesuse sabaf bé kétébule ne. Non i betome maak lowoh Kristowe brab Been i uléw tome. Mélaw gérigono tom i atiy kétéyay Tuluse. <sup>5</sup> Bé do gétaéh, ménodor tom séna bé de tete kétéyaya tom. Atin non wén i de médo do énda fakayén dob kitabe, toow fo ményot tom de rémigo. Atin non rénigo tom, ménkukum tom bé bayad i salae, sani kéléhue. <sup>6</sup> Endob béleewe, munur tomén bé Jesuse, mélaw fénukasén betom dob kitabe. Atin mélaw éndaén kailanga tom i modore bé kitabe inok waléy tom métintu, non amun ménléhu i Jesuse, maak ménléhu tom so funa tom ménfukas. Atin béleewe ni, wén i mantuwe agéwon fatut odoroto. Been i Rémogor i Tuluse, sani témabangane betom. Mélaw éndaén kailanga tom i modore bé tafaye agéwon inok waléy tom métintu, sani kitabe tidéw dob Moisesé.

<sup>7</sup> Ati mélaw i gébéroho tome fantag bé kitabe? Aw been i kitabey funa tome gésala? Békén! Yamula, i kitabe, fénggito no begén i de sala gu. Ufama, amuk énda énggétiga kuy kitabe mano, “Kago mingar,” énda gétiga kuy fantage bé kéingare. <sup>8</sup> Mélaw amun énggétiga ku tete i mingare, ménumanan i kéuyot guwe mingar sabaf bé kitabe. Non amuk énda i kitab, énda i bagér i salae. <sup>9</sup> Amun énda séna gétiga kuy fantage bé kitabe, énda méuyotu rémigo sala. Endob amun énggétiga kun i kitabe, toow fo ményotu rémigo sala, <sup>10</sup> atin ménwaléy médaít méléhu. I funay Tuluse méniray bé kitabe, inok i de munur de méuyag ro taman sa taman. Endob ménsébéluwe non been uman i funa kuwe mékukum méléhu non énda géodoro ku de. <sup>11</sup> Fénggakaray salae

begén bé kitabe, atin kénukum i salae begén méléhu bé kitabe.

<sup>12</sup> Endob i kitabe, tidéw dob Tuluse, brab métintu brab fiyo brab mékétéfu. <sup>13</sup> Wén keye i dufang gébéreh bé i fiyowe kitab i funa tome mékukum méléhu. Endob békén toow i ni. Yamula, de sala tom i funa tome mékukum méléhu non énda géodoro tom i fiyowe kitab émfégito bé de sala. Mélaw sabaf bé kitabe, giton toow fo tete i de sala tom.

<sup>14</sup> Gétiga tom fiyoy kitabe non tidéw dob Rémogor i Tuluse. Endob riféy salae begén non kéilawanu saén. <sup>15</sup> Enda gésobuto kuy rigoné kuwe. Non i kétéyaya kuwe rigonén, énda gérigono ku de. Yamula gérigono ku uman i kéikaa kuwe rigoné ku. <sup>16</sup> Atin amuk rigoné kuy éndae fakay dob kitabe, fiyon fo ké mikau de rémigo, giton i kéfagayu kuwe bé métintuy kitabe. <sup>17</sup> Mélaw, békén begén i rémigowe bé de ni do sala. Yamula rigonéy teteé dob lowoh guwe. <sup>18</sup> Gétiga ku énda i fiyo dob tafaye adat gu. Non fiyon fo ké méuyotu fo rémigo bé fiyowe, éndob énda gérigono ku de. <sup>19</sup> Non énda gérigono kuy fiyowe kétéyaya ku rigoné ku. Yamula gérigono kuy teteé kéikaa ku. <sup>20</sup> Atin amuk rigoné kuy békéne kétéyaya ku, békén begén i rémigowe de. Yamula rigonéy teteé dob lowoh guwe.

<sup>21</sup> Ay niy mérigowe dob begéne. Amuk méuyotu rémigo fiyo, élénéy teteé dob lowoh guwe. <sup>22</sup> Endob i fiyowe dob fédéw guwe toow fo méuyot modor bé kétéyay Tuluse. <sup>23</sup> Endob i teteé dob lowoh guwe sébanil bé fiyowe dob fédéw guwe. Atin fégésé no begén rémigo bé békéne kétéyay Tuluse. Mélaw maak ménférisuwoy dob salae. <sup>24</sup> Toowu fo mékégedaw-gédaw. Ati gétabange begén inok énda rifénu dob kagéne ni lowoh toow fo tete funa ku mékukum méléhu? <sup>25</sup> I Tuluse, Been saén i gétabange begén. Mélaw toow fo fésalamata kuy Tuluse! Non téngagéyén begén sabaf bé réngoy Kadna tome Jesu Kristo.

Mélaw i fédéw guwe modor bé kétéyay Tuluse, fiyon fo ké i lowoh guwe géodor bé teteé.

## 8

### *I mantuwe adat*

<sup>1</sup> I betome do ménwaléy dumo Jesu Kristowe, énda kukuméy Tuluse betom. <sup>2</sup> Non sabaf bé kéwaléy tome dumo Jesu Kristowe, i Rémogor i Tuluse fénukasén betom brab nirayén betom i umule magufusa. Atin mélaw éndaén i mémégés betom mékala funa tom méléhu. <sup>3</sup> I kitabe énda gétabanga no betom, non énda géodoro tom de. Endob i Tuluse, Been i témabangane betom. Sénuguén i Nga ne Jesus inok waléy kéilawan éndob énda i salaén. Tidéw béno, ménléhu i Jesuse génantino no betom inok mékédan i de sala



tom. Mélaw éndaén kailanga tom i modore bé de tete kétaya tom. <sup>4</sup> I funay Tuluse réménigo bé ni inok géodoro tom i fatute dob kitabe. Fakay i ni amuk fémanduoy Rémogor i Tuluse betom, brab éndaén fémanduoy tetee kétayay de lowoh tom betom. <sup>5</sup> Non i de étéw fémanduoy tetee kétayay de lowoh ro, fégitungé ro saén i fantage bé tetee kétayay de lowoh ro. Endob i de étéw fémanduoy Rémogor i Tuluse, fégitungé roy fiyowe loo bé kétayay Rémogor i Tuluse. <sup>6</sup> I étéw fémanduoy tetee kétayay lowoh ne, méléhu. Endob i étéw fémanduoy Rémogor i Tuluse, méuyag taman sa taman, atin éndaén mékérít i Tuluse de. <sup>7</sup> Non i de étéw fémanduoy de tete kétayay de lowoh ro, sébanil bé Tuluse. Non énda modor ro bé kitab i Tuluse non énda gagané ro de. <sup>8</sup> I de étéw fémanduoy tetee kétayay de lowoh ro, énda géfésuwata roy Tuluse.

<sup>9</sup> Endob i begome, éndaén fémanduoy tetee kétayay de lowoh gom begom. Yamula fémanduoy Rémogor i Tuluse begom, amuk bati i Rémogor i Tuluse dob begome. Atin i éndae batioy Rémogor Kristowe, békén so kuyug Kristowe. <sup>10</sup> Endob amuk bati i Kristowe dob de fédéw gom, fiyon fo ké méléhu i de lowoh gom sabaf bé de sala gom, méuyag gom taman sa taman non métintu gom dob adafay Tuluse. <sup>11</sup> I Tuluse, Been i téménébulee bé Kristowe. Atin amuk bati i Rémogor i Tuluse dob de fédéw gom, tébuleé no so begom bé Rémogor ne bati dob begome.

<sup>12</sup> Mélaw do dumo gu, kailanga tom i modore, éndob békén i tetee kétayay de lowoh tom i fatute odoro tom. <sup>13</sup> Non amuk odoro kom i fémandu i tetee kétayay de lowoh gom, méléhu gom. Endob amuk odoro kom i fémandu i Rémogor i Tuluse, tagaké kom i tetee tafay adat brab méuyag gom taman sa taman. <sup>14</sup> Non i de fémanduoy Rémogor i Tuluse, beroy de nga i Tuluse. <sup>15</sup> Non i Rémogor i Tuluse nirayén dob betome, békén féwaléyén betom do rifén mégilak bé Tuluse. Yamula féwaléyén betom do nga i Tuluse. Atin sabaf bé Rémogor i Tuluse, gétawaga tom i Tuluse “Boh tom.” <sup>16</sup> Atin i Rémogor i Tuluse, Been i émfégésobute betom bé do nga Tulus tom. <sup>17</sup> Atin amun do ngaén betom, gédoté tom moso i de kéfiyonon fénasadén betom. Atin gédoté tom soy de éntingayén gédoté Kristowe. Non amuk mérasay tom ségiléw bé kérasay Kristowe, gédoté tom i toowe fo fiyó séréngan bé Beene.

### *I gaiwe moso*

<sup>18</sup> Atin dob karang guwe de, ulanden bé de kérasay tom dob duniyae ni béleewe. Non toow na fo dakél i bantugane gédoté tom moso. <sup>19</sup> Non i kéluhanay de éntingayén

lénimbag i Tuluse, toow fo ongot-ongoté roy gaiwe fégitoy Tulusey de ngaén. <sup>20</sup> Non i de éntingayén lénimbagén, éndaén ménfiyo ro, békén dob karowe kétayan éndob dob kétayay Tuluse non Been i kéménukume de. Endob wén soy inam de, <sup>21</sup> non i kéluhanay lénimbag ne, fégaliné no so inok éndaén mérénah ro, brab éndaén riféy kéléhue bero, non féwaléyé Tuluse bero mantu loo bé kéféwaléy ne bé de ngaén mantu. <sup>22</sup> Non gétiga tom taman béleewe ni, i kéluhanay de lénimbagén démorong ro loo bé kédorong i kéumahane libun. Non ongot-ongoté roy kéfuwaléye bero mantu. <sup>23</sup> Atin békén saén i berowe. Non i betome, énggédot tomén i Rémogor i Tuluse, sani tandae bé wén nay iray i Tuluse betom. Mélaw démorong tom so dob de fédéw tom bé kéngot-ongoté tome bé kéfuwaléy i Tuluse betom do ngaén brab kéfégalé nuwe bé de lowoh tom. <sup>24</sup> Ménfukas tom sabaf bé inam tome bé Tuluse émféantu betom inok méuyag tom taman sa taman. Endob amuk gito tomén, békénén inam. Non wén i inam tom amuk énda séna gito tom i no ongot-ongoté tom. <sup>25</sup> Endob amuk wén i inam tom atin énda séna gito tom i no inam tom, témíngkél tom ongot-ongot.

<sup>26</sup> Loo so bé nan i kétabangay Rémogor i Tuluse betom amuk énda tintu méégét i kéunur tome. Non énda gétiga tom i atiy fatute dasala tom. Endob fédasaléy Rémogor i Tuluse betom dob de fédéw tom usaré noy de éntingayén énda gébéhého tom de. <sup>27</sup> Atin i Tuluse, sani gétiga noy de fédéw tom, gésobuto noy kédasal i Rémogor ne non démasal mongot témabang betom do munur loo bé kétayay Tuluse.

<sup>28</sup> Atin gétiga tom i ni. I de betom fénimu i Tuluse, sani de étéw fénémilién sabaf bé kétaya nuwe, fiyon atiy mérigowe dob betome, rignonéy Tulusey nan bé kéfiyono tome. <sup>29</sup> Non bé do gétah, énggétigay Tuluse nén atiy isuwe do waléy ngaén. Atin fénémilién bero inok rénigo no bero waléy loo bé Nga ne Jesus, inok i Beene waléy ofo tom. <sup>30</sup> Atin i de betom do fénémili, fénunurén betom, atin féntintu no betom, maak énda i sala tom. Atin féamungé no so betom bé kégérotor Kristowe.

### *I kégedaw i Tuluse*

<sup>31</sup> Amuk fégitungé tom i fantage bé ni, gétiga tom i ni: I Tulusey dumo tome. Mélaw énda i gétaban betom. <sup>32</sup> I Tuluse énda ménikaén miray bé buntunge Ngaén Jesus. Yamula ténulakén fénggéganti no betom kéluhanan. Amuk loo bé nan i kégedaw ne, irayén so betom i kéluhanay kailanga tome. <sup>33</sup> Enda i gétébo betom do fénémili i Tuluse. Non Tulusey ménféwaléye betom métintu dob adafa nuwe. <sup>34</sup> Enda i gékukum betom. Non i Jesu Kristowe, Been i ménléhu

brab méntébule brab déménayat mangéy dob kuwonoy Tuluse inok ongoté no fésagadan tom. <sup>35</sup> Enda i gékédan bé kégedaw Kristowe betom. Fiyon fo ké kéréngan tom, taloo no wén i émférasay betom, taloo no mélayaf tom, taloo no méskinan tom, taloo no kakaidan tom, taloo no méléhu tom, énda gékédana roy kégedaw Kristowe betom. <sup>36</sup> Non wén i Ménsulate Kébéréh i Tuluse mano, “Kakaidan tom féluhuén sénga tékélid sabaf betom i do kuyugén. Maak do bili-bili tom gédét do sumbalién.” <sup>37</sup> Mélaw fiyon fo ké kakaidan tom, témaban tom so sabaf bé Jesuse sani mégédawe betom. <sup>38</sup> Non gétiga ku énda i gékédan bé kégedaw i Tuluse betom, fiyon fo ké méléhu tom taloo no méuyag tom. Fiyon i de télaki taloo no do saitan, énda gékédana roy kégedaw Jesuse betom. Enda i éntingayén dob ni béleewe taloo no mangéy séna dini, gégaga de. I de barakat ro énda gégaga ro. <sup>39</sup> Enda i éntingayén dob rotoro, taloo no dob ménaléme, gégaga de. Enda i sébaan lénimbag gékédan bé kégedaw i Tuluse betom fénagewén dob Kadna tome Jesu Kristo.

## 9

### *Fantag bé de Judio*

<sup>1</sup> Wén i béréhé ku begom. Atin i ni béréhé ku, toow fo toow. Munuru bé Kristowe, mélaw énda témugi. I Rémogor i Tuluse bati dob fédéw guwe brab mémanduon begén. Mélaw gétiga ku, toow i ni béréhé ku begom. <sup>2</sup> Toow fo tete i fédéw guwe béleewe ni brab démawét i fédéw guwe non bé de étéw gu, do dumo gu Judio, non énda munur ro bé Kristowe. <sup>3</sup> Amuk gagané ku saén, méuyotu damén mékukum gémantinon bero, brab waléyu désuway bé Kristowe, inok i de dumo gu do Judio waléy ro munur bé Kristowe. <sup>4</sup> Beroy de ténayakuf i Tuluse bé do gétaf maak do ngaén. Fénggito no beroy barakat ne, brab fénasada no bero féfioné no bero. Brab nirayén beroy kitabe, brab fatute adat bé kéféngadafe, brab do fasad. <sup>5</sup> Fénémili i Tulusey de katufua ro. Brab i Kristowe, ségétéw bero amun ménwaléy kélawan, non ménumah ségétéw Judio. Mélaw i Tuluse, sani méguléwe bé kéluhanane, médayéw dam taman sa taman! Amen!

<sup>6</sup> Enda bénréh gu de ké énda tumanéy Tulusey fasad ne dob de Judio. Non békén kéluhanay de Judio do tintu méngintulus loo bé fatute damén. <sup>7</sup> Békén kéluhanay de Judio, sani de séfu Abraham, do tintu méngintulus. Non bénréh i Tuluse dob Abraham bé do gétaf mano, “Do séfu i nga me Isak saén i de tintu séfuém.” <sup>8</sup> Ay niy atag i ni, békén kéluhanay de séfu Abraham do nga i Tuluse. Non i Isake ménumah sabaf bé kéunur Abraham bé fasad i Tuluse. Atin ségiléw

so béleewe ni. Non i de étéw do séfu Isake tidéw dob fasad i Tuluse dob Abraham, i ménwaléye do nga i Tuluse. <sup>9</sup> Non fénasad i Tuluse bé Abraham mano, “Bé fatute gai, séfuleu. Atin bé béno, géféngéngé i bawag me Sarah ségétéw nga lagéy.”

<sup>10</sup> Atin békén saén i ni. Non i nga ruwe féndawét Isak wén i ruwo gétéw ngaén bé bawag ne Rebekah. Beroy de séfing féndawét Jakob brab Esaw. <sup>11-12</sup> Atin amun obor sénay Rebekahe de, bénréh i Tuluse de mano, “I ofoe de waléy sugu-suguéy tuwaréye de.” Mélaw bénréh i Tulusey fantage bé ati mérigowe dob de ni do nga, fiyon fo ké énda séna ménumah ro, brab fiyon fo ké énda séna réménigo ro fiyo taloo no tete. Réningoy Tulusey ni inok gétiga tom i kéréfemili i Tuluse bé békén sabaf bé fiyowe rigonéy de étéw taloo no bé tete, yamula sabaf bé kétayaf Tuluse saén. <sup>13</sup> Non wén i Ménsulate Kébéréh i Tuluse mano, “Toow na fo fénimu guy Jakobe bé Esawe.”

<sup>14</sup> Amuk loo bé ni, aw gébéhého tom ba énda mééntang i rigonéy Tuluse? Békén! <sup>15</sup> Non ménbéréh i Tuluse dob Moisesé bé do gétaf mano, “I étéwe kétaya ku kéurayay na guwe, méuray i na guwe de. Atin mégédawu bé étéwe kétaya ku kégedawa ku.” <sup>16</sup> Mélaw i funay Tuluse féfionéy noy étéwe békén sabaf bé réningoy étéwe loo ké kétayaf étéwe. Yamula i funa nuwe saén émféfiyo bé étéwe non bé kégedaw ne de. <sup>17</sup> Non wén i ni Ménsulat Kébéréh i Tuluse dob datue dob Egipto mano, “I funa kuwe beam ménfwaléy datu inok fégito guy barakat guwe sébanil beem, atin émbantugu mélaw dob kéluhanay sugud i duniyae ni.” <sup>18</sup> Mélaw gétiga tom mégédaw i Tuluse bé de étéw kétaya no kégedawa no. Brab féféngasé noy uléw i de étéw kétaya no féféngasé no.

<sup>19</sup> Atin amuk sumbulo kom begén bé bénréh guwe makom, “Sedek kukuméy Tulusey de étéw ké énda munur ro sabaf bé kéféféngasé i Tuluse bé de uléw ro? Enda i géatuh bé Tuluse.” <sup>20</sup> Endob énda i kuwagib gom sémumbul démowoy bé Tuluse loo bé nan. Ufama, i binanggae énda gérikklamo no dob réménigowe de mano, “Sedek réningo mo begén loo bé ni?” Ségiléw so bé étéwe, énda fatut riklamo no dob Tuluse. <sup>21</sup> Non i rémigowe bé ruwowe timan binangga, fiyon fo ké sébaan saén i féféngigowe de, sani métégase fantad, wén i kuwagibén réningo bé sébaane de toow na fo fiyo brab balilaga.

<sup>22</sup> Ségiléw so bé réningoy Tuluse. Méuyot i Tuluse émfégito bé kékérit ne brab émfégétigan bé barakat ne. Atin toow fo téningkélén i kékérit ne bé de étéw fatut mékukum. <sup>23</sup> Atin méuyot so émfégito bé toowe kéfiyo no, énggiton dob dakéle kégedawén betom do méntafayén féwaléy no fiyo loo bé Beene. <sup>24</sup> Non betom i de

fénémili i Tuluse, békén saén tidéw dob de Judio, yamula fiyon foy tidéwe dob de békén Judio so. <sup>25</sup> Non wén i Kébéréh i Tuluse fénsulatén bé Hoseawe mano, “I de étéw békén kagén, féwaléy ku bero do kagén étéw. Atin i de étéw énda séna mégédawu bero, mégédawunén bero. <sup>26</sup> Atin dob ingéde bénrého ku bé békén ro do kagén étéw, diyo fédawétén ro do nga i méuyage Tulus.” <sup>27</sup> Atin ménbéréh soy Isaiase bé do gétaf fantag bé de Judio mano, “Fiyon fo ké médooy de Judio loo bé kédooy de farék dob de dénsaan énda kéluhana ro méfukas dob de sala ro, éndob kloh saén. <sup>28</sup> Non i Kadnane fagayasé no kukumén i kéluhanay kéilawane.” <sup>29</sup> Atin ménbéréh soy Isaiase bé do gétaf mano, “I barakatane Kadnan Tulus, amuk énda méuray i na nuwe betom do Judio, métyé tom mékukum kéluhanan loo bé kékukum ne bé de étéw dob Sodom brab dob Gomora.”

<sup>30</sup> Ay niy atag i ni bénréh gu. I de békén Judio, fiyon fo ké énda téménlama ro waléy métintu, wén i do ménwaléy métintu bero dob adafay Tuluse sabaf bé kéunur ruwe. <sup>31</sup> Endob i de Judio, énda waléy ro métintu fiyon fo ké télamané roy waléy métintu bé kéodoro ruwe bé kitabe. <sup>32</sup> Sede? Non énda séménarig ro bé Jesu Kristowe. Yamula séménarig ro bé de rigoné ro. Mélaw maak énggébangkud ro dob dakéle batéw. <sup>33</sup> Non wén i Ménsulate Kébéréh i Tuluse mano, “Fédiyoe kuy batéwe dob Sion, sani ingéde i de Judio. Atin i de étéw énda méginugut ro de, maak gébangkud ro brab mélawu ro. Endob i de étéw munur ro de, féfiyoné ku bero.”

## 10

<sup>1</sup> Do dumo gu, ay niy kétaya kuwe brab kédasal guwe dob Tuluse: Méuyotu de fo ké méfukas i de dumo gu Judio dob de sala ro. <sup>2</sup> Gétiga kuy témantu ro méngintulus, éndob békén katabuwan i kéféngintulus ruwe non békén toow i kétoroe unuro ro. <sup>3</sup> Enda nodoro roy aguwone fantag bé kékétintuy Tuluse bé étéwe. Yamula téménlama ro rémigo karo agéwon waléy métintu, sani kéodoro ruwe bé kitabe. Atin mélaw énda ménodor ro bé agéwoy Tuluse. <sup>4</sup> Wén i mantuwe agéwon mangéy dob Tuluse. Been i kéunure bé Jesu Kristowe. Mélaw i de munur bé Kristowe waléy ro métintu. Atin éndaén kailanga roy modore bé kitabe inok waléy ro métintu.

<sup>5</sup> Sénulat Moisesey fantage bé kéwaléy métintu sabaf bé kéodorone bé kitabe mano, “Amuk wén i étéw tintu fo modor bé kitabe énda félisé no de, gédoté noy umule magufusa.” <sup>6</sup> Endob ay niy Ménsulate Kébéréh i Tuluse fantag bé kéwaléy métintu sabaf bé kéunure mano, “Kagom fégitungén de ké kailanga kom séléden i Kristowe dob lawayo inok féangéy kom fantad mangéy

dob betome. <sup>7</sup> Atin kagom fégitungén de ké kailanga kom i mangéy dob gonoy de ménléhu inok angéy kom tébuleén i Kristowe.” <sup>8</sup> Non ay niy Ménsulate Kébéréh i Tuluse mano, “Toow fo gédet i kébéréh i Tuluse dob begome. Diyo dob de ba gom brab dob de fédéw gom.” Atin been i niy Fiyowe Uret fantag bé kéunure bé Kristowe ureté key. <sup>9</sup> Non amuk fayagé kom i Jesuse Kadnan bé de ba gom, brab amuk toow fo méginugut gom dob de fédéw gom bé ténébule i Tulusey Jesuse, méfukas gom dob de sala gom. <sup>10</sup> Non i kéunure dob de fédéw i funane waléy métintu dob adafay Tuluse. Brab bé kéfayage de bé baey funane méfukas dob de sala. <sup>11</sup> Non wén i Ménsulate Kébéréh i Tuluse mano, “I kéluhanay munure de gédoté ro saén i fiyowe.” <sup>12</sup> Non dob adafay Tuluse énda i sébidanay de Judio brab de békén Judio. Enda i ramigoy Tuluse. Non i Kristowe, Been i Kadnay kéluhanay de munur dob Beene, brab tabangé noy kéluhanay de témawag mongot dob Beene. <sup>13</sup> Non wén i Ménsulate Kébéréh i Tuluse mano, “I kéluhanay de témawag bé Kadnane mongot tabang, méfukas ro.”

<sup>14</sup> Endob énda gétagaway de étéw de amuk énda séna munur ro de. Atin énda géunur ro amuk énda séna énggélíngoo roy fantage bé Jesuse. Atin énda gélingoo ro de amuk énda i muret fantag bé Jesuse dob berowe. <sup>15</sup> Atin énda i géuret de amuk énda i séménugu bé murete. Wén i Ménsulate Kébéréh i Tuluse fantag bé ni mano, “Toow fo fiyoy kégumah i de étéw magéw mangéy muret bé Fiyowe Uret.” <sup>16</sup> Endob békén kéluhanay de mégélingo munur bé Fiyowe Uret. Non wén i sénulat Isaiase dob Ménsulate Kébéréh i Tuluse mano, “Kadnan, kloh i de munur bé uret geye.” <sup>17</sup> Mélaw géunur i étéwe amuk gélingoo noy toowe uret fantag bé Kristowe.

<sup>18</sup> Wén key i émbéréh mano, “I funay de étéw énda munur non énda séna énggélíngoo ro de.” Endob békén toow i nan non i kéluhana ruwe énggégélingo ron. Non wén i Ménsulate Kébéréh i Tuluse mano, “I urete énggélíngoon dob kéluhanay sugud i duniyae, atin i kébéréhe ménlégéb dob kéluhanane.” <sup>19</sup> Atin amuk wén i émbéréh mano, “Endob i de Judio énda énggésobuto ro de key,” énda toow i nan. Non sénulat Moisesé dob Ménsulate Kébéréh i Tuluse mano, “Fédaléw ku begom do Judio non fukasé kuy de békén Judio. Atin fékérité ku begom non mégédawu bé de étéw énda énggétiga ro Begén bé do gétaf.” <sup>20</sup> Atin ménkéntay i késulat Isaiase de so mano, “I de étéw énda sénléd ro Begén, énggétiga roy fantage bé Begéne non fénfégétiga ku bero.” <sup>21</sup> Endob bénréhen i fantage bé de Judio mano, “Toow fo météngas i de uléw ro brab énda modor ro bé kétaya

kuwe. Non fiyon fo ké dé moyon tawagé ku bero, éndob mika ro mégélingo.”

## 11

### *Fantag bé de Judio moso*

<sup>1</sup> Gido loo, kagom fégitungén de ké ténagak i Tuluse nén i de Judio. Fiyon i begéne, ségétéwu so Judio tidéw dob katufua keye Abraham brab ségétéwu so séfu Benjamen, ségétéw so Judio. <sup>2</sup> I Tuluse énda ténagakén i de kaan do étéw fénémiélién bé do getah. Gétiga kom damén i sénulat Eliase fantag bé sala i de Judio. Déménasal i Eliase dob Tuluse mano, <sup>3</sup> “Kadnan, fénléhu i de Judioy de sénarigo mo muret bé kébérah me. Atin généba roy de ahayan do tulakan gonoy de étéw méngadaf Beem. Atin begén séden i ménsamae méngadaf Beem, brab méuyot ro so méméléhu begén.” <sup>4</sup> Endob i Tuluse séménumbul mano, “Wén i fitéw ngibu do dumo mo do Judio féniyu gu inok énda mamung ro méngadaf bé kéninontowe Baal.” <sup>5</sup> Ségiléw so bé béleewe ni, non wén soy kloh fénémiéli i Tuluse bé de Judio sabaf bé kégédaw ne bero. <sup>6</sup> Fémiélié noy de étéwén békén sabaf bé de réningo ro, yamula sabaf saén bé kégédaw ne bero. Non amuk fémiélié noy de étéw sabaf bé galbék ruwe, békén sabaf saén bé kégédaw ne bero.

<sup>7</sup> Amuk loo bé nan, i de Judio énda gito roy séléde ruwe, sani kétintuwe. Non kloh saén bé de Judioy ménwaléye de métintu, sani de fénémiéli i Tuluse. Atin i de dumo de ménwaléy métégas i de uléw ro. <sup>8</sup> Non wén i Ménsulate Kébérah i Tuluse mano, “I Tuluse fénwaléyén bero énda géfégitung brab énda gégito brab énda gégélango inok énda gésobut ro taman béleewe ni.” <sup>9</sup> Atin bénréh Dabide so dob Ménsulate Kébérah i Tuluse mano, “Géfégitung ro damén bé énda i sala ro non bé de médo do kéfiyonon niray i Tuluse bero. Mélaw mékukum ro damén. <sup>10</sup> Waléy ro damén do langafén, inok énda gégito ro. Brab waléy ro damén do sungkungan taman sa taman sabaf bé de émbéगत kérégenon oboé ro.”

<sup>11</sup> Mélaw i de dumo gu do Judio maak énggébanguk ro sabaf énda ménunur ro bé Kristowe. Endob kagom fégitungén de ké ménlawu ro brab énda géfétindégoy Tuluse bero. Non i kéika ruwe bé Kristowe, ménwaléy kéfiyonoy de békén Judio. Non i urete fantag bé Kristowe ménlégéb dob de békén Judio funa ro ménfukas dob de sala ro. Ménrigoy ni inok i de Judio waléy ro médaléw. <sup>12</sup> I kégésala i de Judioy funay kéluhanay étéwe féniyoy Tuluse. Non sabaf bé kéika i de Judio de, ménwaléy do munur i de békén Judio. Mélaw méumanan i kéfiyonone iray i Tuluse bé gaiwe gésénule i de Judio brab munur ro bé Kristowe.

### *Ufama bé Kayéwe*

<sup>13</sup> Atin fantag man bé begome do békén Judio, wén i béréhé ku begom. I begéne ségétéwu apostol sénugu mangéy dob begome do békén Judio. Atin i funa kuwe magayas gémalbék, <sup>14</sup> inok i de dumo gu do Judio waléy ro damén médaléw bé kéfukase begom funay de dumo bero waléy so moso munur bé Kristowe inok méfukas ro so. <sup>15</sup> Non amun ménika i Tuluse bé de Judio, énggésénule i de békén Judio atin ménwaléy ro do dumoy Tuluse. Atin mélaw méumanan i kéfiyonone iray i Tuluse amuk séfule i de Judio waléy dumoy Tuluse, non maak do ménléhu do méntébutule.

<sup>16</sup> Atin non i Abrahame munur bé Tuluse, wén so mosoy do séfuién waléy munur bé Tuluse. Non amuk fiyoy darir i kayéwe, fiyo soy de fongo no. <sup>17</sup> I de Judio ségiléw ro bé kayéwe mégonok. Atin Tulusey gefee de. Atin kénléngén i dumoy de fongo. Atin i begome, sénumfat i Tuluse begom diyo atin fénwaléyén begom do mantu fongoy kayéw i Tuluse. Mélaw gégédot gom so do kéfiyonon tidéw dob Tuluse ségiléw bé de Judio. <sup>18</sup> Endob kagom fégitungén de ké toow gom fo gérotor na bé de Judio. Non ségiléw gom so do falan fongo. Atin fatut gétiga kom i ni, i darire uyagé noy fongowe, békén i fongowey muyage bé darire.

<sup>19</sup> Atin amuk émbérah gom makom, “I Tuluse kéndá noy de dumoy de Judio inok tanggafé no betom do békén Judio.” <sup>20</sup> Toow i nan. Endob i funa ruwe ménkédan non énda munur ro. Atin i funa kome ménsumfat non munur gom. Mélaw ingat gom, brab kagom félangka-langka. <sup>21</sup> Non amuk kénléng i Tulusey de sungu do fongo sani de Judio, kéléngé no so begom do mantu fongo amuk témérah gom so munur. <sup>22</sup> Mélaw énggiton i kégédaw i Tuluse brab kékukum ne. Kukumé noy de étéw énda munur ro. Endob toow fo mégédaw begom amuk fédayday gom témayakuf bé kégédaw ne. Endob amuk énda fédayday gom, kédané no begom loo bé de sungu do fongo. <sup>23</sup> Atin i de Judio, amuk éndaén fédayday ro mika bé Tuluse brab amuk munur ro bé Jesuse, tayakuféy Tuluse man bero brab sumfaté no bero dob sunguwe gonon dob kayéw ne non fakay rigoénéy Tulusey ni. <sup>24</sup> Non amuk i de fongo tidéw dob ségiyowe kayéw, sani begome do békén Judio, fakay sumfaté no dob kayéw ne, toow na fo magad i késumfat ne ségule bé de fongo tidéw dob nan kayéw, sani de Judio.

### *I kégédaw i Tuluse*

<sup>25</sup> Do dumo gu, méuyotu de fo ké gétiga kom i toowe tidéw dob Tuluse fiyon fo ké énda gésobutoy de étéw de bé gétahe. I funa kuwe de émfégitigan begom inok énda fédayéw-dayéw gom non makom ké toow

gom na fo gérotor bé de Judio. I kétégas i uléw i de Judio, énda démaydayén. Non wén so moso i gai gésénule ro. Been i gaiwe moso ké munur i kéluhanay de békén Judio fénéмили i Tuluse. <sup>26</sup> Tidéw béno, i kéluhanay de Judio méfukas ro so. Non wén i Ménsulate Kébéréh i Tuluse mano, “Wén i mémukase gégumah tidéw dob de Judio inok féwaléyé no métintuy de Judio. <sup>27</sup> Atin kédané kuy de sala ro loo bé fénasad guwe bero.” <sup>28</sup> I de dumo bé de Judio ménwaléy ro sébanil bé Tuluse non énda munur ro bé Fiyowe Uret. Ménrigoy ni inok méfukas gom do békén Judio. Gido loo, mégédaw i Tuluse bé de Judio non beroy de fénéмилиén, atin non bé fasad i Tuluse dob katufuay de Judio. <sup>29</sup> Non i Tuluse énda méfégalin i kéfégitung ne bé atiy fémilie nuwe brab iraya nuwe kéfyonon. <sup>30</sup> Atin fantag man bé begome do békén Judio, bé do gétah énda modor gom bé de sugu i Tuluse. Endob béleewe énggédot gom i kégédaw i Tuluse non fénlis i de Judio. <sup>31</sup> Atin loo soy berowe, non fiyon fo ké énda modor ro bé de sugu i Tuluse béleewe ni, fakay i Tuluse méuray i na nuwe bero brab fésadagé no bero moso loo bé rénigo nuwe dob begome sabaf bé kégédaw ne. <sup>32</sup> Non i Tuluse, maak fénférisu noy kéluhanay de étéw sabaf bé de sala ro brab fénggito no médait ro mékukum. I funa nuwe réménigo bé ni inok mégédaw bé kéluhanane bé kéfésagad ne.

<sup>33</sup> Toow fo mégédaw i Tuluse! Toow fo gétigan i Tuluse brab métilédtdé! Enda i gésobut bé kégétiga nuwe taloo no rigoné nuwe. <sup>34</sup> Non wén i Ménsulate Kébéréh i Tuluse mano, “Enda i étéw gésobut bé kégétigay Tuluse taloo no kéfégitung ne. Atin énda i géféginau bé Tuluse.” <sup>35</sup> Atin wén soy Ménsulate Kébéréh i Tuluse mano, “Enda i géfééllét dob Tuluse inok wén i utongén.” <sup>36</sup> Non i Tulusey léménimbage bé kéluhanay de éntingayén, brab Beeney muyage brab méguléwe bé kéluhanane. Atin i kéluhanay de éntingayén kaan inok médayéw. Médayéw damén i Tuluse taman sa taman. Amen.

## 12

### *I galbéke kay Tuluse*

<sup>1</sup> Mélaw do dumo gu, sabaf bé dakéle géday i Tuluse betom, ongoté ku dob begome ké fédaya gom i Tuluse méguléwon begom. Been i maake tulak gom énda méléhuén. Fatut tintu fo fiyoy rigoné kome inok mésuwat i Tuluse de. Been i fatute kéféngintulus gom. <sup>2</sup> Atin kagom miring bé adat i de tete dob duniyae ni. Yamula fédaya gom i Tuluse fégaliné no begom bé kéféwaléy ne mantu bé de kéfégitung gom. Tidéw béno, gétiga kom i kétayay Tuluse sani fiyowe brab métintuwe brab mékésuwate.

<sup>3</sup> Atin non niray i Tuluse begén i aturane, béréhé ku begom i ni: Kagom fégitungén de ké toow gom na fo gérotor bé de dumo gom. Yamula térifantad gom brab i séngae ségétéw begom fatut kémarang bé lowoh ne loo bé kéunure niray i Tuluse dob beene. <sup>4</sup> Ufama, fégitung gom i lowoh i étéwe. Wén i médoo do réfaén. Atin i de réfa lowoh békén ségiléw i de rigoné ro. <sup>5</sup> Atin ségiléw so bé niy betome do munur bé Kristowe. Non fiyon fo ké médoo tom, ménwaléy tom maak do réfa i lowoh Kristowe. Atin maak sésumfat tom kéluhanan. <sup>6</sup> Toow fo mégédaw i Tuluse. Non tidéw dob Beene wén i do séségiyo-giyo kéfurungo tom. Mélaw fatut rigonéy séngae ségétéw i kéfurungone niray i Tuluse de. Amuk i ségétéwe betom furung muret bé kébéréh i Tuluse, fatut muret loo bé kéunure niray i Tuluse de. <sup>7</sup> Amuk furung go témabang, tabang go. Amuk furung go témoro, toro go. <sup>8</sup> Amuk furung go émféfiyo fédéw, rigo mo. Amuk furung go miray, iray go témantu. Amuk furung go méguléw, fégérór go féguléw. Amuk furung go mégédaw, féororém i na muwe mégédaw.

<sup>9</sup> Atin békén ubo-ubo saén i kégédaw gome bé de dumo gom. Atin fatut ikaa kom i tete. Atin lékafit gom dob fiyowe. <sup>10</sup> I betome, do sédumon tom sabaf bé Kristowe, mélaw fatut tom ségédaw. Atin fatut méraan i na tome séfégadad. <sup>11</sup> Kagom faukén, yamula fatut fégérór gom rémigo bé kétayay Kadnane sabaf bé fiyowe fédéw gom. <sup>12</sup> Fatut moror tom non wén i inam tom dob Tuluse. Atin fatut témingkél tom bé de mérégén. Atin fatut démoyun tom démasal. <sup>13</sup> Atin fatut sétukidé tom i éntingayéne katom dob de dumo tom munur bé Kristowe amuk méskinan ro. Brab fatut tayakufé tom i de étéw dob de lawi tom fiyon fo ké énda gélolo tom de séna.

<sup>14</sup> Kagom ongotén i kékukum i Tuluse bé de étéw émférasay begom. Yamula fatut dasal gom dob Tuluse inok féfioné no bero. <sup>15</sup> Fatut mamung tom moror bé de étéw moror brab mamung tom kémérew dob de étéw kémérew. <sup>16</sup> Fatut waléy sébaan i fédéw tome do munur bé Jesuse. Atin kagom félangka-langka, yamula fatut tom séloyuk bé de étéw térifantad. Atin kagom fégitungén de ké do toow gom fo métilédtdé.

<sup>17</sup> Amuk wén i réménigo tete dob begome, kagom sémulu. Yamula fatut rigo gom saén i fiyowe inok énda i gédowoy begom. <sup>18</sup> Rigo gom i fiyowe taman gagané kom inok énda i ségiyo étéw mékérít begom. <sup>19</sup> Atin do dumo gu, fégétédém gom i ni, kagom sémulu bé tete. Yamula fédaya gom i Tuluse sémulu bé kérít ne. Non wén i Ménsulate Kébéréh i Tuluse mano, “Begén i sémulu. Begén i kékukum, bang i Kadnane.” <sup>20</sup> Atin

fatut odoru tom i ni Ménsulat Kébéréh i Tuluse mano, “Amuk mélayaf i sébanile beem, féamaém. Atin amuk térumén, féinémém. Non amuk rigoné moy ni, waléy de mémala.”<sup>21</sup> Kagom fédayaén i teteé sémuğu begom rémigo tete. Yamula rigo gom fiyo inok tabanan i teteé.

### 13

#### *Fantang bé de gémamak kukuman*

<sup>1</sup> Fatut i kéluhanay étéwe modor bé sugu i de gémamak kukuman. Non i kéluhanay méguléwé, nirayay Tuluse bero aturan. Atin i ménféindége bé gubernowe, Tulus.<sup>2</sup> Mélaw i sébanile bé gubernowe, sébanil bé féntindég i Tuluse, atin mélaw mékukum i no étéw.<sup>3</sup> Non i de rémigo fiyo énda kailanga ro mégilak bé de gémamak kukuman. Yamula i de rémigo tete kailanga ro mégilak ro bero. Amuk méuyot gom ké énda i funa kom mégilak bé de méguléwé, rigo gom saén i fiyowe. Atin dayéwé ro so begom.<sup>4</sup> Non i de méguléwé, berowey sugu-suguéy Tuluse inok fiyoy goho kome. Endob amuk rémigo gom tete, fatut mégilak gom bero non wén i kuwagib ro kémukum. Berowey suguéy Tuluse kémukum bé de rémigo tete.<sup>5</sup> Mélaw fatut tom modor bé sugu i de gémamak kukuman. Békén saén sabaf bé kékukum ruwe éndob sabaf so bé gétiga tom i fatute.

<sup>6</sup> Been i ni soy funa tome mayad buwis. Non i de méguléwé, berowey de sugu suguéy Tuluse amuk rigoné roy fatute rigoné ro.<sup>7</sup> Mélaw fatut bayada tom bé katabuwaney kéluhanay buwis tome. Atin fatut féğadata tom i de gémamak kukuman.

<sup>8</sup> Kagom mutong. I maake utong gom saén i kéğédaw i dumo gome, atin bayada kom bé gedawe sénga tékélid. Non i tintuwe mégédaw bé dumo nuwe tumané noy kitabe.<sup>9</sup> Non wén i ménsulate dob kitabe mano, “Kagom lémamfa. Kagom méméléhu. Kagom ménakaw. Kagom mingar.” Atin i de ni sugu brab de dumo de, fakay odoru tom amuk modor tom bé ni sugu mano, “Féğédaw go bé dumo muwe, ségiléw bé kéğédaw me bé kaame lowoh.”<sup>10</sup> I étéwe mégédaw bé dumo nuwe, énda rigoné noy teteé dob beene. Mélaw i kéğédawe, been i niy kétumane bé kéluhanay de kitab.

<sup>11</sup> Atin fatut séğédaw tom non gétiga tom i ni gai. Endaén mérugayén tidéw béleewe, séfule i Kristowe. Béleewe toow na fo gédét i nan gai bé amun méngganay gomén munur bé Kristowe. Mélaw fatut mingat tom de brab kagom iringén i ségétéwe fidong.<sup>12</sup> Non béleewe ni maak kélungonon éndob gédétén fuweh, sani késéfule Kristowe. Mélaw fatut kédané tom i de teteé adat tom tidéw dob délémone. Atin fatut tom rémigo fiyo non been i niy maake kulangé tom

niray Kristowe betom do étéw bati dob géfékayae.<sup>13</sup> Fatut rigoné tom i fiyowe loo bé fatute rigonén dob géfékayae. Mélaw kagom téolo-olon, taloo no mamung bé de tete karagiya, kagom sétayan bé ségiyowe saliyyu bé bawag gome, kagom sékérít, brab kagom médaléw.<sup>14</sup> Yamula ongot gom dob Kadnane Jesu Kristo tabanga no begom rémigo bé fatute. Atin kagom odoron i de tete kétayay de lowoh gom loo bé tafaye adat gom.

### 14

#### *Fantang bé amaéne*

<sup>1</sup> Amuk wén i dumo gom munur bé Kristowe, éndob énda séna méégét i kéunur ne, tayakuf gom. Atin kagom séédél de ké ati kaane karang.<sup>2</sup> I étéwe méégét i kéunur ne, gékaranga noy fakay amaé noy kéluhanay de amaén. Endob i étéwe énda séna méégét i kéunur ne, karangé noy fénéngalaf saén i fakaye amaé no.<sup>3</sup> I étéwe mama bé kéluhanay amaéne, békén fatut siyawé noy dumo nuwe ké mama saén fénéngalaf. Atin i étéwe mama saén fénéngalaf, békén fatut dowoyé noy dumo nuwe ké mama bé kéluhanane. Non ségiléw ro tényakuf i Tuluse bero.<sup>4</sup> Enda fatutén ké kukumé tom i dumo tome. Non ségiléw tom do sugu-suguéy Tuluse. Mélaw Tulus saén i fatute kémukum betom bé ati fiyowe brab teteé. Atin i dumo gome munur bé Jesuse rigoné noy fiyowe non i Kadnaney témbanga ne de.

<sup>5</sup> Loo so bé de gai. Wén i do étéw kémarang bé wén kun i toow na fo mékétéfu gai. Endob wén soy do ségiyo étéw kémarang bé i kéluhanay de gai fantay-fantay ro dob adafay Tuluse. Fatut féğitugéy séngae ségétéw i kétayay Tuluse. Tidéw béno fatut rigoné noy ati karangé nuwe kétayay Tuluse.<sup>6</sup> Amuk wén i étéw karangé no wén i gai toow na fo mékétéfu, rigoné no inok basana noy Kadnane. Amuk wén i étéw mama bé kéluhanay amaéne, rigoné no inok basana noy Kadnane. Gétiga tom i ni non fésalamata no dob Tuluse sabaf bé amaé no. Atin amuk wén i étéw énda mamaén bé kéluhanay de amaén, rigoné no inok basana noy Kadnane brab fésalamata no so dob Tuluse.<sup>7</sup> Non i betome do munur bé Jesuse, i funa tome méuyag brab méléhu békén inok rigoné tom saén i kétaya tome.<sup>8</sup> Yamula amuk méuyag tom séna, rigoné tom i funay Kadnane médayéw. Brab amuk méléhu tom, méléhu tom inok médayéw i Kadnane de. Mélaw amuk méuyag tom taloo no méléhu tom, kay Kadnane betom.<sup>9</sup> I funa Kristowe féndayaén i kéfélehue de atin méntébuile, inok Been i Kadnane féğuléwo noy de méuyag brab de ménléhu.<sup>10</sup> Mélaw kagomén dowoyén i de dumo gom munur

bé Jesuse. Brab kagoméni siyawén i de dumo gom munur. Non kéluhana tom so moso témindég dob adafay Tuluse bé gaiy kékukum ne. Mélaw Tulus saén i kémukume. <sup>11</sup> Non wén i Ménsulate Kébéréh i Tuluse mano, “Loo bé kétoowi kéuyag guwe, i kétoowi kéluhanay étéwe lémingkuwéd dob adafa kuwe. Atin i kéluhanay étéwe fayagé ro Begén i Tuluse.” Been i béréh i Kadnane. <sup>12</sup> Mélaw fétindégéy Tulusey séngae étéw dob adafa nuwe inok béréhé roy kéluhanay de rénigo ro.

<sup>13</sup> Mélaw kagoméni kukumén i de dumo gom. Yamula fatut mingat tom inok i de dumo tom énda gésala ro sabaf bé de rénigo tom. <sup>14</sup> Sabaf sétiman i fédéw guwe bé Kadnane Jesus, toow fo gétiga ku ténungkas i Tuluse betom mama bé kéluhanay amaéne. Endob amuk wén i étéw karangé no liyén dob adafay Tulusey sébaane amaén, békén de fatut mama. <sup>15</sup> Endob amuk gito no begom mama, atin waléy tete i fédéw ne de, énda mégédaw gom de. Mélaw kagom amaén i amaéne funay dumo gome gésala. Non i Jesuse ménléhu inok mékédan i de salaén. <sup>16</sup> Atin amuk wén i fiyo rénigo gom éndob kénarang i de étéw sala, kagom rigonén de mon, inok énda gébéréh ro tete fantag bé begome. <sup>17</sup> Non dob kéféguléw i Tuluse bé de étéwén, énda méлага i de amaén taloo no do inémén. Endob i toowe fo méлага i kétintuwe brab kéfiyoy fédéwe, brab kéorore sabaf bé kéfémandu i Rémogor i Tuluse. <sup>18</sup> Amuk modor tom bé Kristowe loo bé ni, mésuwat i Tuluse betom. Atin mésuwat soy de ségiyo étéw betom.

<sup>19</sup> Mélaw fatut dé moyun télamané tom rigonén i funa tome fiyoy de fédéw tom brab funa tome waléy méégét i kéunur tome. <sup>20</sup> Kagom binasanén i rigonéy Tuluse sabaf bé amaéne saén. Ténungkas i Tuluse betom mama bé kéluhanay amaéne. Endob kagom mama bé éntingayéne funay dumo gome gésala. <sup>21</sup> Ay niy fatute. Kagom mama karne, taloo no miném arak taloo no rémigo éntingayén funay dumo gome gésala. <sup>22</sup> Odooro kom i de kékarang gom fantag bé de amaén. Endob kagom séédél bé de dumo gom fantag bé de ni non Tulus i méguléwe begom. Méoror i étéwe fiyoy fédéw ne non rigoné noy gékaranga nuwe fiyo. <sup>23</sup> Endob i étéwe amaé noy gékaranga nuwe tete, kukuméy Tuluse non gétiga no gésala ké rigoné no. Non amuk rigoné tom i gékaranga tome tete, gésala tom de.

## 15

<sup>1</sup> Atin i betome méégétén i kéunur tome, fatut tingélo tom i de énda séna méégét munur, brab fatut tabanga tom bero. Enda fatut rigoné tom i de katom kétayan saén. <sup>2</sup> Yamula fatut rigoné tom soy mékésuwate dob de dumo tom inok waléy méégét i

kéunur ruwe. <sup>3</sup> Non fiyon i Jesu Kristowe énda rénigo noy kaane kétayan. Non wén i Ménsulate Kébéréh i Tuluse mano, “I de tete béréh ro dob Tuluse, béréh ro so dob Begéne.” Sénulatén i ni inok giton rénigo Jesusey kétayay Tuluse fiyon fo ké fénrasay ro. <sup>4</sup> Non i kéluhanay Ménsulate Kébéréh i Tuluse, ménsulat inok métoro tom, brab inok wén i inam tom sabaf bé kéwaléy tome témingkél brab sabaf bé kéfiyoy de fédéw tom ké masa tom bé Ménsulate ni Kébéréh i Tuluse. <sup>5</sup> I Tuluse fétingkélé no betom brab féfiyoné noy de fédéw tom. Mélaw fésétimané no damén i de fédéw tom miring bé Jesu Kristowe, <sup>6</sup> inok séréngan tom démayéw bé Tuluse Abay Kadna tom Jesu Kristo.

<sup>7</sup> Mélaw sétayakuf gom maak do sétuwaréy ségiléw bé kétayakuf Kristowe betom, inok médayéw i Tuluse de. <sup>8</sup> Béréhé ku begom, i Kristowe ménwaléy maak sugu-suguéy de Judio inok fégitom no tintu fo tumanéy Tulusey fasad ne fénasadén dob katufuay de Judio bé do géta. <sup>9</sup> Atin rénigo noy ni inok i de békén Judio dayéw ro soy Tuluse sabaf bé kégedaw ne. Non wén i Ménsulate Kébéréh i Tuluse mano, “Toow fo dayéw ku Beem Tulus, brab dayéwé de békén Judio so Beem. Dayéwé key Beem bé de kanta gey.” <sup>10</sup> Atin wén soy ni Ménsulat Kébéréh i Tuluse mano, “I de begom do békén Judio, oror gom séréngan bé de Judio do fénémili étéw.” <sup>11</sup> Atin wén soy ni Ménsulat Kébéréh i Tuluse mano, “I de begom do békén Judio, dayéw gom i Kadnane. Atin i kéluhanay étéwe fatut dayéwé roy Tuluse.” <sup>12</sup> Atin sénulat Isaiase soy ni mano, “Gégumah i ségétéwe étéw séfu Jessehe. Atin Beenyé waléy méguléw bé de békén Judio. Atin sémarig ro dob Beene.”

<sup>13</sup> Atin i Tuluse, sani miraye kéfiyonon ongot-ongoté tom, féororé no damén begom, brab féfiyoné no damén i de fédéw gom sabaf bé kéunur gome de, inok minut méégét i inam gome dob Tuluse sabaf bé barakat i Rémogor ne.

<sup>14</sup> Atin fantag bé begome do dumo gu, gétiga ku fiyoy de adat gom brab médooy de gétiga kom brab gétigan gom sétoro. <sup>15</sup> Gido loo, ménbarawu témoro begom dob ni sulat inok énda gélifoto kom de. Ménbarawu non niray i Tuluse begén i aturane, <sup>16</sup> inok muretu dob begome do békén Judio. Non sénugu Jesu Kristowe begén rémigo bé ni. Gémalbéku maak fadi non ureté kuy Fiyowe Uret i Tuluse inok i begome do békén Judio waléy gom maak ténulak dob Tuluse. Atin tayakuféy Tuluse begom non féntintuy Rémogor i Tuluse begom. <sup>17</sup> Atin non bé kétayang Jesu Kristowe begén, énda mémalawu émbéréh fantag bé kéluhanay rigoné kuwe bé galbék i Tuluse. <sup>18</sup> Endob i gébéreho kuwe saén i fantage bé fénrigo Kristowe begén bé kéusar ne begén. Non

wén i de begom do békén Judio ménodor bé sugu i Tuluse sabaf bé kétoro guwe brab rénigo guwe. <sup>19</sup> Non i barakat i Rémogor i Tuluse fénrigo no begén i médoowe do mékégaif. Mélaw amun ménagéwu tidéw dob ingéde Jerusalem taman dob ingéde Iliriko, tintu fo nuret guy Fiyowe Uret fantag bé Jesu Kristowe. <sup>20</sup> Toow fo méuyotu muret bé Fiyowe Uret dob de ingéd énda séna énggégélingo i de étéw fantag bé Kristowe. Non mikau muret saén dob de étéw énggégélingo ron fantag bé Jesuse tidéw dob de ségiyo étéw. <sup>21</sup> Non wén i Ménsulate Kébéreh i Tuluse mano, "I de étéw énda séna énggégélingoo roy fantage bé Beene, gétiga ro moso. Atin i de étéw énda séna ménureton ro, gésobuto ro moso."

<sup>22</sup> Been i niy funa kuwe médoonén gule ménangga mangéy dob begome. Non ménggéruru magéw mangéy dob de séségiyogiyo ingéd. <sup>23</sup> Endob béleewe ni, énggilidén i rignoné kuwe dob de ni gonon. Atin ménrugayén i kéuyot guwe mangéy dob begome. <sup>24</sup> Mélaw méuyotu mangéy dob begome. Non magéwu mangéy Spaniya, atin fiyo ké mawétu dob begome singkow bé kéagéw guwe mangéy diyo. Atin amuk gilidén i fiyowe kétukaw gu begom, fiyo ké tabanga kom damén begén bé kéagéw guwe mangéy Spaniya. <sup>25</sup> Endob béleewe ni mangéyu Jerusalem inok uwité kuy tabange kay de munur bé Jesuse bati diyo. <sup>26</sup> Non wén i niray i de munur bé Kristowe dob Masedonia brab Akaya kay de méskinan do munur bé Kristowe diyo dob Jerusalem. Niray ro non been i kétaya ruwe. <sup>27</sup> Toow ro fo moror témabang non maak wén i utong ro bé de munur dob Jerusalem. Non i de Judio ténukido ro bero bé kéunur ruwe bé kéangéy guwe dob de békén Judio. Mélaw i de békén Judio, fatut témabang ro miray kurta dob de méskinan do Judio dob Jerusalem. <sup>28</sup> Atin amuk fégilidé kuy ni galbék atin géiraya kun beroy kéluhanay ni kurta, tausu nén mangéy Spaniya brab mawétu dob begome. <sup>29</sup> Atin gétiga ku amuk mangéyu dob begome, féfiyoné Kristowe betom sabaf bé kéagéw guwe.

<sup>30</sup> Atin do dumo gu, non bé kéunur tome bé Kadna tome Jesu Kristo brab non bé késégédaw tome tidéw dob Rémogor i Tuluse, ongoté ku begom dasal gom témantu inok tabangay Tuluse begén. Amuk rignoné kom i ni, géamung gom bé galbék guwe. <sup>31</sup> Dasala kom begén inok i de énda munur dob Judea énda fésug-sugé ro begén. Brab dasal gom inok moror i de munur dob ingéde Jerusalem sabaf bé uwité kuwe bero. <sup>32</sup> Amuk mérigoy ni brab amuk kétayay Tuluse, gétausu mangéy dob begome, brab toowu fo moror. Mélaw géséféfiyo tom do fédéw bé kétukaw guwe begom. <sup>33</sup> I Tuluse,

sani funa tome fiyoy fédéw tome, fémanduo no damén begom kéluhanan. Amen.

## 16

### *I késégifa Pablowe*

<sup>1</sup> Wén i ségétéwe libun féndawét Febe mangéy dob begome. Beeney dumo tome so munur bé Jesuse brab fiyoy adat ne. Atin béleewe témabang gémalbek dob de munur dob ingéde Senkrea. <sup>2</sup> Tayakuf gom damén sabaf bé Kadnane loo bé fatute rignoné tom do munur bé Jesuse. Atin tabang gom bé atiy kailanga nuwe, non médooy ténabang ne, atin ténabangén so begén.

<sup>3</sup> Atin féfégérarém gom begén i Prisilahe brab Akilahe. Non beroy de dumo gu géménalbék bé galbék Jesu Kristowe. <sup>4</sup> Niray roy férenawa ruwe bé kétabanga ruwe begén, gedét ro féléhuén. Mélaw fésalamata ku bero loo soy de étéw békén Judio do munur bé Kristowe. <sup>5</sup> Atin féfégérarém gom so begén i de munur sélimud dob lawi ro Prisilahe brab Akilahe. Brab féfégérarém gom so begén i Epenetowe, sani kégedawa kuwe dumo gu. Beeney sunguwe étéw ménunur bé Kristowe dob Asia. <sup>6</sup> Atin féfégérarém gom so begén i Mariahe, sani mégéroro gémalbékon begom. <sup>7</sup> Atin féfégérarém gom so begén i Andronikowe brab Juniase, sani de dumo gu Judio. Bé gétahe, beroy de dumo gu do férisu. I de apostol toow fo basana ro bero, brab ménunur ro bé Jesuse bé énda séna munuru de.

<sup>8</sup> Atin féfégérarém gom so begén i Ampliatowe, sani kégedawa kuwe dumo tom munur bé Kadnane. <sup>9</sup> Atin féfégérarém gom so begén i Urbanowe, sani dumo tome gémalbék bé galbék Jesu Kristowe. Brab féfégérarém gom so begén i Estakiwe, sani kégedawa kuwe dumo gu. <sup>10</sup> Atin féfégérarém gom so begén i Apolose, sani ménfégitowe bé kéimu ne bé Kristowe. Atin féfégérarém gom so begén i de étéw dob kuréngo Aristobuluse. <sup>11</sup> Atin féfégérarém gom so begén i Herodione, sani dumo guwe Judio. Atin féfégérarém gom so begén i de étéw dob kuréngo Narsisuse munur bé Kadnane.

<sup>12</sup> Atin féfégérarém gom so begén i Trifae-nawe brab Trifosowe, sani de gémalbék bé galbék i Kadnane. Atin féfégérarém gom so begén i Peruse, sani kégedawa kuwe dumo gu, sani mégéroro gémalbék bé galbék i Kadnane. <sup>13</sup> Atin féfégérarém gom so begén i Rufuse, sani ménbantuge gémalbék kay Kadnane. Atin féfégérarém gom so begén i idéng ne, sani maake idéng gu so sabaf bé kégedaw ne begén. <sup>14</sup> Atin féfégérarém gom so begén i Asinkrituse, Flegon, Hermes, Patrobas, Hermas, brab de dumo ro munur. <sup>15</sup> Atin féfégérarém gom so begén i Filolose, Julia, brab Nereuse, brab libu nuwe



brab Olimpase brab kéluhanay de dumo ro munur.

<sup>16</sup> Atin fégitó gom i kégédaw gome amuk sémégifa gom. I kéluhanay de munur fésamfayé roy késégifa ruwe begom.

<sup>17</sup> Atin do dumo gu, ongoté ku dob begome bé ingat gom bé de émféséédél brab témoro bé ségiyowe kétoro bé féngganad gome. Férayu gom de inok énda kédané roy kéunur gome. <sup>18</sup> Non i de ni do étéw, énda rigoné roy kétayay Kadnane Jesu Kristo. Yamula rigoné roy karowe kétayan. Atin tugio roy de énda séna féngganadén bé de furung kébéréh ureté ro. <sup>19</sup> I kéluhana keye, énggélíngoo key i fantage bé kéodoro kome bé Fiyowe Uret funa ku moror. Méuyotu fo ké gétiga kom i kéluhanay fiyowe. Endob énda damén gétiga kom i tete. <sup>20</sup> Atin i Tuluse, sani émféfiyowe bé fédéw tome, tabanga no begom inok tabana kom sékoy Satanase.

Atin mégédaw fo damén i Kadnane Jesus begom.

<sup>21</sup> I Timoteowe, sani dumo guwe gémalbék, ségifaé no begom. Atin i Lusiowe brab Jasone brab Sosipatare do dumo gu Judio, ségifaé ro so begom.

<sup>22</sup> Atin i begéne, Tersio sani fénsulat Pablówe bé ni, ségifaé ku so begom sabaf bé Kadnane.

<sup>23</sup> Atin i Gayowe, sani gefee bé lawie batío key brab sélimudo keye do munur, ségifaé no so begom. Atin i Erastowe, sani mitonge bé kurtae dob ni ingéd, brab Kartuse dumo tom, ségifaé ro so begom.

<sup>24</sup> Atin mégédaw fo damén i Kadna tome Jesu Kristo begom kéluhanan. Amen.

<sup>25</sup> Dayéwé tom i Tuluse. Géféégéto noy de kéunur tom bé Jesuse. Gérígono noy ni sabaf bé Fiyowe Uret fantag bé Jesu Kristowe ureté ku. Been i niy Fiyowe Uret énda gésobutoy de étéw de non ménbunéy ménrugayén. <sup>26</sup> Endob béleewe, i Fiyowe Uret fantag bé Jesuse giton dob de sénulat i de sénarígoy Tuluse muret bé kébéréh ne. Atin non sénugu i magufusae Tulus, fégétiga key bé de étéw dob kéluhanay de ingéd, inok i kéluhanay de étéw damén mégínugut ro de.

<sup>27</sup> Atin médayéw damén i sébaane Tulus. Enda i ségiyo saliyo bé Beene. Gétiga noy kéluhanane. Médayéw damén sabaf bé Jesu Kristowe taman sa taman. Amen.

*Pablo*

## I Sunguwe Sulat Pablowe dob de Munur bé Kristowe dob Korinto

Been i niy sébaane bé de sénulat Pablo, sani ménbantuge muret fantag bé Jesu Kristowe. Tafafé séménugud i Pablowe dob ingéde Korinto. Atin i de dumo bé de étéw diyo ménwaléy ro munur bé Jesu Kristowe sabaf bé kéuret Pablowe.

Endob amun méntékédan i Pablowe diyo, wén i de dumo bé de munur diyo réningo roy tetee. Atin i de dumo de, wén i de ménénginsa fantag bé ati fatute rignoné ro sabaf bé kéunur ruwe. Médooy de fénginsaé ro non mantu ro séna munur bé Kristowe.

Mélaw séménulat i Pablowe inok sumbulo non bero bé de fénginsaé ro. Nugar Pablowe soy de dumo bero do ménsala.

<sup>1</sup> Begéney Pablowe, fénémili i Tuluse ménwaléy apostol Jesu Kristowe sabaf bé kétayay Tuluse. I Sostenese dumo tom munur bé Jesuse brab begéne, sulata key begom <sup>2</sup> do munur bé Tuluse bati dob Korinto. Fénémili i Tuluse begom inok waléy mélinis dob adafa nuwe sabaf bé Jesu Kristowe. Ménwaléy gom do étéw i Tuluse beroy kéluhanay de étéw dob kéluhanay de ingéd munur bé Jesu Kristowe, sani Kadna ruwe brab Kadna tome so.

<sup>3</sup> I Abay tome Tuluse brab Kadna tome Jesu Kristo toow fo mégédaw damén begom brab iray ro damén i métanéke do fédéw.

### *I kéfyonone sabaf bé Kristowe*

<sup>4</sup> Toow fo démoynu fésalamat bé Tuluse non bé kégedaw ne begom féngagéw dob Jesu Kristowe. <sup>5</sup> Non toow fo fénfiyoy Tuluse begom bé kéwaléy gome do dumo Jesu Kristowe. Mélaw tintu fo énggésobuto kom i toowe kétoro brab gétigan gom so témoro de. <sup>6</sup> Ménwaléy toow fo méégát i kéunur gome bé téno ro geye begom fantag bé Kristowe. <sup>7</sup> Mélaw i Tuluse nirayén begom i kéluhanay kéfurunge kailanga kom tidéw dob Rémogor ne, bé lala gome ongot-ongot bé késéfule i Kadna tome Jesu Kristo. <sup>8</sup> Beeney émféégéte bé kéunur gome taman dob tamfaday duniyae, inok énda i sala gom dob gaiy késéfule ne. <sup>9</sup> Toow fo géсарig tom bé Tuluse, sani ménémilie betom inok waléy tom do dumoy Nga ne Jesu Kristo, sani Kadna tome.

### *Ménsébaad ro*

<sup>10</sup> Do dumo gu, sabaf bé kéféguléw i Kadna tome Jesus betom ongoté ku begom kagom sébaad-baad. Yamula séfagayun gom inok waléy ségiléw i de fédéw gom brab de kéfégitung gom. <sup>11</sup> Non do dumo gu, béréh i de étéw do dumo Kloewe démoynu gom kun séédél. <sup>12</sup> Wén kun i do dumo

begom émbéréh maro, “Kuyug Pablo gey i begeye.” Atin i de dumo de kun émbéréh maro, “Kuyug Apolos gey i begeye.” Brab i de dumo begom émbéréh ro maro, “Kuyug Pedro gey i begeye.” Atin i de dumo do émbéréh maro, “Kuyug Kristo gey i begeye.” <sup>13</sup> Toow fo tete i nan. Maak sénufak-ufak gom i Kristowe. Békén begén i ménléhue dob kruse inok méfukas gom bé de sala gom. Brab énda ménbautis gom inok waléy gom do kagén kuyug.

<sup>14</sup> Fésalamatu dob Tuluse non békén begén i ménautise begom saliyo bé Krispowe brab Gayowe. <sup>15</sup> Mélaw énda i gébéreh de ké ménbautis gom dob dawét guwe. <sup>16</sup> (Bénautis guy Estabanase brab kéluhana ro ségélawi. Endob éndaén i ségiyo énggétédemo ku bénautis gu.) <sup>17</sup> I funa Kristowe begén séménugu békén ké mautisu. Yamula sénuguén begén muret bé Fiyowe Uret. Atin énda fénfurungén begén muret loo bé de étéw dob duniyae ni, inok i de étéw mégélingo, énda munur ro saén sabaf bé kéfurung guwe émbéréh. Yamula munur ro sabaf bé barakat i Tuluse. Mélaw énda émbunéy i barakat Kristowe mémukas bé de étéw sabaf bé kéléhu ne dob kruse.

### *I kégétigay Tuluse*

<sup>18</sup> I de étéw mékukum ro, marok énda i laga i kéurete fantag bé kéléhu Jesuse dob kruse. Endob i betome do ménfukasén dob de sala tom, gétiga tom toow i Fiyowe Uret brab fégito noy barakat i Tuluse. <sup>19</sup> Wén i Ménsulate Kébéréh i Tuluse fantag bé ni mano, “Binasané kuy kégétigay de méngganad. Atin fégito gu énda i laga i kéfégitung i de étéw marok do métilédéd ro.” <sup>20</sup> Mélaw gétiga tom énda i laga i kégétigay de énggéféganad taloo no de métilédéd taloo no de furung émbéréh dob ni duniya. Non fénggitoy Tuluse énda i lanték i kégétigay kéilawane.

<sup>21</sup> Toow fo gétigan i Tuluse. Bénantakén bé énda gésobutoy de étéw de sabaf bé de kégétiga ro saén. Yamula ménsuwat i Tuluse mémukas saén bé de étéw munur bé Fiyowe Uret ureté key, fiyon fo ké béréh i de étéw énda i laga i Fiyowe Uret. <sup>22</sup> I de Judio méuyot ro gégito do mékégaif inok géunur ro de. Atin i de étéw tidéw Akaya méuyot ro mégélingo bé de gétigan muret inok géunur ro de. <sup>23</sup> Endob ureté tom i fantage bé Kristowe ménléhu dob kruse. Endob i de Judio mika ro de. Atin i de étéw békén Judio fégitungé ro énda i lagaén. <sup>24</sup> Endob i de étéw do fénémili i Tuluse munur ro, do Judio brab do békén Judio, gétiga roy barakat i Tuluse brab kégétiga nuwe fénggito no dob kéléhu Jesu Kristowe. <sup>25</sup> Non i kégétigay Tuluse toow na fo gérotor bé kégétigay de étéw, fiyon fo ké fégitungé ro énda i lagaén. Atin i barakat i

Tuluse toow na fo émbagér tidéw bé kébagér i de étéw, fiyon fo ké wén i do étéw fégitungé ro énda i bagér i Tuluse.

<sup>26</sup> Do dumo gu, fégetédém gom i ni. Amun fénwaléy i Tuluse begom do munur, énda sénay médoó begom do gétigan, brab énda sénay médoó begom do odoron, taloo no do gérotor étéw. <sup>27</sup> Endob i Tuluse fénémiélién i de étéw lénglengén ro dob adafay kéilawane inok kémalanan i de étéw marok toow ro fo gétigan. Atin fénémiélién i de étéw do gérifantad dob adafay kéilawane inok kémalanan i de étéw do tétégérotor. <sup>28</sup> I Tuluse fénémiélién i de étéw diyangkaén brab ikaan brab énda i laga ro kun dob duniyae ni inok fégitoo no énda i laga i de éntingayén karangéy de étéw toow fo mélaga. <sup>29</sup> Mélaw énda i étéw géfélangka-langka dob Tuluse. <sup>30</sup> Gido loo, fénwaléyey Tuluse betom dumo Jesuse. Atin i kéluhanay de kégétiga tom tidéw dob Tuluse fén-angyéén bé Kristowe. Atin sabaf so bé Kristowe, ménwaléy tom do métintu brab malinis dob adafay Tuluse brab méfukas tom bé de sala tom. <sup>31</sup> Mélaw toow i Ménsulate Kébéréh i Tuluse mano, “Amuk wén i méuyot fébantug-bantug, fatut fébantug-bantug saén bé atiy réningoy Kadnane.”

## 2

### *I Fiyowe Uret*

<sup>1</sup> Atin do dumo gu, amun énggégumahu dob begome, nuret guy Fiyowe Uret i Tuluse. Endob énda ménfurungu émbéréh taloo no muret loo bé ségétéwe wén i kégétiga no. <sup>2</sup> Non ménuyotu saén muret dob begome fantag bé Jesu Kristowe brab fantag bé kéléhu ne dob kruse. <sup>3</sup> Mélaw amun énggumahu dob begome, toowu fo ménggilak brab léménukub, non gétiga ku énda furungu muret. <sup>4</sup> Atin amun nureto ku begom, énda ménusaru bé furunge kébéréh taloo no kégétigan. Yamula i Rémogor i Tuluse diyo dob begéney ménféunure begom bé barakat ne, <sup>5</sup> inok i kéunur gome békén sabaf bé kégétigay étéwe. Yamula munur gom saén sabaf bé barakat i Tuluse.

### *I kégétigay Tuluse*

<sup>6</sup> Endob i toowe, toroé kuy tintuwe ménalém kégétigan dob de étéw méégét i kéunur ruwe. Endob i ni kégétigan békén tidéw dob kéilawane taloo no tidéw dob de méguléw dob duniyae bé ni do gai. Non mékédan i kéfégüléw ruwe. <sup>7</sup> Yamula toroé kuy ménaléme kégétigay Tuluse, sani ménbunéye non énda fénggitoy Tuluse de bé do géta. Non amun énda séna lénimbag i Tulusey duniyae ni, énggétiga non i atiy rigoé nuwe bé fukasé no betom inok méuyag tom taman sa taman dob lawayo. <sup>8</sup> Enda i ségétéw méguléw dob duniyae

ni énggésobuto noy ni ménalém kégétigan. Non amuk énggésobuto ro, énda damén fénléhu roy barakatane Kadnan dob kruse.

<sup>9</sup> Non wén i Ménsulate Kébéréh i Tuluse mano, “Enda i ségétéw énggégito taloo no énggégélingo taloo no énggégégitungé bé de fiyo do languntaman ténafay i Tuluse kay de étéw méimu de.” <sup>10</sup> Atin i de ménbunéy bé do géta, fénggésobut i Rémogor i Tuluse dob betome. Non gétigay Rémogor i Tulusey kéluhanane, fiyon i de ménalém kéfégitung i Tuluse. <sup>11</sup> Enda i gétigan bé atiy dob kéfégitung i ségétéwe étéw saliyo bé beene so. Ségiléw so bé Tuluse. I Rémogor i Tuluse saén i gétigane bé atiy dob kéfégitung i Tuluse. <sup>12</sup> Atin énggédot tom i Rémogor i Tuluse bati dob de fédew tom. Békén rémogor tidéw dob duniyae ni, éndob Rémogor i Tuluse. Fégétiga no betom i kéluhanay niray i Tuluse betom.

<sup>13</sup> Mélaw toroé tom i ténoro i Rémogor i Tuluse betom, békén tidéw saén dob kégétigay étéwe. Toroé tom i toowe tidéw dob Rémogor i Tuluse dob de étéw bati i Rémogor i Tuluse diyo dob de fédew ro. <sup>14</sup> Endob i étéwe énda diyo i Rémogor i Tuluse dob fédew ne, énda géta yakufo noy de éntingayén tidéw dob Rémogor i Tuluse non énda gésobuto no de. Atin karangé noy énda i lagaén non i Rémogor i Tuluse saén i émfégésobute de. <sup>15</sup> I étéwe batoy Rémogor i Tulusey fédew ne, gésobuto noy kéluhanane. Endob i étéwe énda diyo i Rémogor i Tuluse dob beene, énda gésobuto noy kéfégitung i de étéw diyo i Rémogor i Tuluse dob berowe. <sup>16</sup> Non wén i Ménsulate Kébéréh i Tuluse mano, “Enda i gétigan bé atiy dob itungay Tuluse brab, énda i gétoro bé Tuluse.” Endob i betome do munur, fénggito Kristowe betom i kéfégitung ne.

## 3

### *Do sugu-suguéy Tuluse*

<sup>1</sup> Do dumo gu, amun diyou séna dob begome, énda énggébérého ku begom i ségiléwe bé kébéréh guwe dob de étéw fénémanduoy Rémogor i Tuluse. Non kailanga kuy émbéréhe dob begome maak do nga munur bé Kristowe. Non odoro kom sénay de tete kétaya kom. <sup>2</sup> Mélaw énda gétoroo ku begom bé de ménalém kégétigan, non ségiléw gom bé ngae énda géamaa noy métégase amaén, éndob ratah saén. Fiyon béleewe ni, énda gésobuto kom i ménaléme kétoro gu. <sup>3</sup> Non odoro kom sénay de tete kétaya kom. Wén sénay do médaléw brab do séédél begom. Mélaw giton dob begomey kéodoro kome bé de tete kétaya kom, ségiléw bé de énda munur bé Jesuse. <sup>4</sup> Non amuk wén i émbéréh begom maro, “Begey i kuyug Pablowe”, brab émbéréh i de ségiyo maro, “I begey do kuyug Apolos gey”, fégitoo gom i késégiléw gome bé de énda séna munur.

<sup>5</sup> Fégitung gom i fantage bé de ni. I begéne, sani Pablowe, ati begéne? Atin ati Apolose? Ségiléw gey falan do sugu-suguéy Kadnane saén. Fénuret i Tuluse begey inok munur gom. Rigoné key saén i galbéke sénugu i Tuluse séngae ségétéw begey rigoné key. <sup>6</sup> Maak do gémalbék gey dob fantade. I begéne ségiléwu bé mohoke. Atin i Apolose ségiléw bé mitisone de wayég. Endob Tulusey émfééruke bé de nohok. <sup>7</sup> Mélaw békén i mohoke taloo no mitisone de wayég i fatute de médayéw. Endob Tulus saén i fatute de médayéw non Been i émfééruke de. <sup>8</sup> I mohoke brab mitisone de wayég, énda i isu bero toow na fo gérotor. Atin irayay Tuluse bero baras loo bé kédakél i de galbék réningo ro. <sup>9</sup> Non i begeye Apolosey de sugu-suguéy Tuluse brab sétabang gey gémalbék. Atin i begome maak do nohok i Tuluse.

Atin ségiléw gom bé sébaane lawi réningoy Tuluse. <sup>10</sup> Atin i Tuluse fénnwaléyén begén ségétéw furung rémigo lawi. Mélaw begén i ménfédiyoe bé batéwe gonoy de liléy ménbunsud. Atin ségiyo man i émfétause bé kérigowe bé ni lawi. I atag i ni, wén i ségiyo témoro begom béleewe ni. Atin i émfétause bé galbéke fatut ingata noy rigoné nuwe. <sup>11</sup> Atin sébaan saén i batéw i lawi i Tuluse. Been i Jesu Kristowe fénnwaléy i Tuluse maak batéw non Been saén i unuro tome. <sup>12</sup> Atin i de rémigo bé lawi i Tuluse, médooy de fégérigo ro de. Atin i de séségiyo-giyo fégérigo bé lawie ségiléw bé de séségiyo-giyo kétoro. Amuk fiyoy kétoroé maak do bélowon brab do filak brab do balilaga do batéw. Enda métuwég i de ni do éntingayén. Endob amuk énda fiyoy kétoroé, ségiléw bé de kayéw brab do kéroon. I de ni do éntingayén magad do métuwég. <sup>13</sup> Bé gaiwe moso séfule i Kadnane mangéy kémukum, giton i galbék i kéluhanay de étéw. Atin téngkadé noy de galbék ro bé aféye. Amuk fiyo, énda métuwégén. Endob amuk tete, métuwég. <sup>14</sup> Atin amuk énda métuwég i galbék i ségétéwe étéw, gédoté noy baras ne tidéw dob Tuluse. <sup>15</sup> Endob amuk météy métuwég i galbék i ségétéwe étéw, énda gédoté noy baras ne fiyon fo ké ménfukas inok énda mékukumén. Ségiléw bé étéwe énggéféraréy tidéw dob métuwége lawi éndob énda i énggéuwito no.

<sup>16</sup> Gétiga kom damén i begome maak lawi i Tuluse non diyo i Rémogor ne bati dob de fédéw gom. <sup>17</sup> Atin amuk wén i minasa bé lawi i Tuluse, binasanéy Tuluse soy nan étéw, non i lawi i Tuluse mékétéfú. Atin begom i nan lawi.

<sup>18</sup> Kagom tugion i lowoh gome. Non amuk wén i ségétéw begom manok toow fo gétigan dob adafay de dumo no dob duniyae ni, fatut waléy énda i gétiga no dob adafay de étéw, inok waléy toow fo gétigan dob adafay Tuluse. <sup>19</sup> Non i kégétigane dob duniyae ni

énda i lagaén dob adafay Tuluse. Non wén i Ménsulate Kébéréh i Tuluse mano, "Usaréy Tulusey de akar i de énggétigan do étéw féglélangkébén bero." <sup>20</sup> Atin wén i Ménsulate Kébéréh i Tuluse mano, "I Kadnane gétiga noy kégéfitung i de gétigan do étéw énda i lagaén." <sup>21</sup> Mélaw kagom féglélangka-langka i kéfuray gome bé de étéw. Non i begeye do sugu-suguéy kom, békén gey funa kom félangka-langka. <sup>22</sup> Atin i begéne brab Apolose brab Pedrowe, niray i Tuluse begey dob begome inok tabanga key begom. Fiyon i duniyae ni, brab de éntingayén gégumah moso, brab de éntingayén béleewe ni, brab fiyon i de umul brab kéléhu, niray i Tuluse inok féfiyoné no begom. <sup>23</sup> Atin i begome ka Kristowe, brab i Kristowe kay Tuluse.

## 4

### *Do apostol*

<sup>1</sup> Atin fantag bé begeye do témoro, fatut karangé kom begey do sugu-suguéy Kristowe. Non sénarig i Tuluse dob begeyey de ménalém kébéréhén. <sup>2</sup> Atin i sarigone fatut odoro noy de sugu i amu ne. <sup>3</sup> Endob énda émbukuu fantag bé ati kégéfitung gome begén taloo no i kégéfitung i de ségiyo étéw begén. Fiyon i begéne, énda kukumé kuy kagéne lowoh. <sup>4</sup> Enda tete i fédéw guwe fantag bé de réningo gu. Gido loo, énda séna gito no ké fiyo taloo no ké tete i de réningo gu, non Kadnaney kémukume begén. <sup>5</sup> Mélaw kagom sékukum béleewe ni. Yamula ongot-ongot gom i késéfule i Kadnane. Non fégitu no bé béno i kéluhanay réningoy de étéw do énda séna gito no béleewe ni. Atin fégitu no soy ati dob fédéw i kéluhanay étéwe. Bé béno gai, i Tuluse dayéw noy séngae ségétéw look énda, sabaf sa bé de réningo ro.

<sup>6</sup> Do dumo gu, énggélabito kuy dawét guwe brab Apolose. Endob i begeye do ufama saén inok gétiga kom bé fatut odoro kom saén i fénsulat i Tuluse. Mélaw kagom karangén de ké toow na gérotor i ségétéwe témoro bé dumo nuwe témoro. <sup>7</sup> Fégitungé kom keey do toow gom na fo gérotor bé de ségiyo. Endob dufang i nan kégéfitung. Non i kéluhanay de éntingayén do kagom, Tulus i méniraye de dob begome. Mélaw kagom félangka-langka, non énda foy éntingayén do kagom saliyo bé de gédoté kom tidéw dob Tuluse.

<sup>8</sup> Fégitungé kom keeyén bé éndaén kailanga kom i tabange tidéw dob Tuluse. Fégitungé kom keeyén bé énggédot gom i kéluhanay de kéfiyonon tidéw dob Tuluse. Fégitungé kom keeyén bé béleewe ni méguléw gom séréngan bé Kristowe fiyon fo ké i begeye do apostol énda séna méguléw gey. Endob i toowe, énda séna méguléw gom. Endob méuyotu damén ké béleewe

ni méguléw gom inok méguléw gey so béni séréngan begom. <sup>9</sup> Non dob karang guwe de, réngiy Tuluse begey do apostol do toow fo gérifantad. Ségiléw gey bé de férisu gédétén féléhuén dob téngaangy kéluhanay de étéw brab de télaki. <sup>10</sup> I kékarang i de ségiyo étéw begey, do dufang non munur gey bé Kristowe. Endob i begome, makom ké do toow gomén gétigan sabaf bé Kristowe. Atin i begeye toow gey fo kun mélubay. Endob i begome, makom ké émbagér gomén. Atin énda fégadatat de étéw begey fiyon fo ké fégadata ro begom. <sup>11</sup> Atin taman so béleewe ni i begeye mélayaf gey brab térumén gey, brab kulang i de kégal gey. Brab férasayén gey lubagén brab énda i lawi gey. <sup>12</sup> Mégéror gey gémalbék inok gédoté key i de kailanga key. Atin amuk ingonéy de étéw begey, dasala key bero inok féfiyonéy Tuluse bero. Amuk férasayén gey, fédayaé key saén. <sup>13</sup> Amuk wén i émbéréh tete fantag bé begeye, sumbulo key bé fiyowe kébéreh saén. Maak do ruhuk gey saén. Taman béleewe ni siyawéy de étéw begey dob duniyae.

<sup>14</sup> Do dumo gu, békén sénulat guy ni ké fémalané ku begom. Yamula inok toroé ku begom maak do gulaané ku nga gu. <sup>15</sup> Non fiyon fo ké médooy témoroé begom fantag bé Kristowe, ségétéw saén i maake abay gom, sani begéne. Non ménwaléy gom munur bé Kristowe amun nuret guy Fiyowe Uret dob begome. <sup>16</sup> Mélaw ongoté ku begom iring gom begén. <sup>17</sup> Been i funa kuwe sémugu bé Timoteowe mangéy dob begome. Been i toowe fo kégedawa ku maak nga gu sabaf bé Kadnane, brab modor bé de suguéy ku de. Amuk gégumah dob begome, féfégétédémén begom i de kétoro gu fantag bé de adat tom sabaf bé Kristowe, ségiléw bé ténoro guwe dob de munur dob kéluhanay de ingéd.

<sup>18</sup> Wén i do dumo begom do ménwaléy félangka-langka non marok éndaén séfuleu mangéy diyaan. <sup>19</sup> Endob séfuleu so mangéy diyaan amuk kétayay Tuluse. Atin bé béno, susiné kuy kédooy énggérigonoy de félangka-langka, békén i de kébéreh ro saén. <sup>20</sup> Non i kéféguléw i Tuluse betom békén dob kébéreh saén, éndob dob barakat ne. <sup>21</sup> Ati isuwe kétaya kom? Amuk énda témérén gom bé de tete rignoné gom, séfuleu moso férasayé ku begom. Endob amuk tagaké kom i de tete adat gom, séfuleu mégédaw begom.

## 5

### *Wén i ségétéw bero ménsala*

<sup>1</sup> Wén i énggélíngoo kuwe bé wén kun i ségétéwe begom réménigo toow fo tete. Lénamfaén kun i bawag i boh ne. Fiyon i de énda méngintulus, énda gérigonoy roy loowe bé

ni. <sup>2</sup> Gido loo, toow gom fo wayo félangka-langka. Endob fatut gom damén mémala brab émbuku. Atin fatut énda tungkasé kom méngintulus sélimud begom i ni étéw réménigo bé ni. <sup>3</sup> I begéne, fiyon fo ké mérayuu dob begome maak diyoo so dob begome non doyunu ku so begom fégitungén. Atin sabaf bé atura kuwe, kénukum gun i ni étéw ménsala, loo bé rignoné kuwe damén ké diyoo dob begome. <sup>4</sup> Amuk sélimud gom, maak diyoo so non diyo soy fédéw guwe. Mélaw dob atura kuwe tidéw dob Kadnane Jesu Kristo, <sup>5</sup> suguéy ku begom miray bé ni étéw dob Satanase inok binasané noylowoh ne. Tidéw béno, gésénule damén, atin mélaw énda mékukum i rémogor ne bé gaiy kékukum i Kadnane Jesus.

<sup>6</sup> Kagom damén félangka-langka. Gétiga kom i kébérehé mano, “Géféerukoy klohe saén féféféeruk i kéluhanay fane.” <sup>7</sup> Atin i étéwe ni ménsala, ségiléw bé féféféeruke bé fane. Fatut kédané kom tidéw dob begome inok énda waléy gom tete kéluhanan. Yamula waléy gom damén tintu fyoo. Atin gétiga ku méntintu gomén béni sabaf bé kéunur gome bé Kristowe. Non i Kristowe ségiléw bé natiwe bili-bili fénléhu ténulak bé gaiy kandulie féndawé “Témara”. Non fénléhuén i Jesuse ténulak gémantinon betom inok méfukas tom bé de sala tom. <sup>8</sup> Mélaw rignoné tom i mantuwe kanduli sani kéamae émfégétédém bé kétulake bé Jesuse. Atin fatut amaé tom saén i fane énda i fénggéféeruk de. I atag i ni, fatut kéda kom i de tafay tete adat gom atin fatut toow fo fiyoy de adat gom brab béréh gom saén i toowe.

<sup>9</sup> Amun sénulata ku begom bé gétahe, bénréh gu begom bé kagoméni séloyuk bé de étéw mékérésik i de adat ro. <sup>10</sup> Endob i kébéreh guwe ni, fantag bé de békén munur bé Jesuse, sani de bigaén, de arumén, brab de lémfiful, brab de méngadaf bé de kéninontow. Non amuk dini gom dob duniyae ni, kailanga kom séloyuk bero sénga tékélid. <sup>11</sup> Endob i bénréh guwe, been i fantage bé de étéw émbéréh do munur bé Jesuse éndob do toow fo bigaén, do arumén, look méngadaf ro do kéninontow, look émbéréh do tete tugi fantag bé de étéw, do molon, do lémfiful. Kagom séloyuk bé de ni do étéw émbéréh do munur ro kun bé Jesuse éndob taus ro ménsala loo bé de ni. Fiyon mama, kagom séréngan bero.

<sup>12-13</sup> I de étéw énda munur ro bé Jesuse, énda i atura tom kékukum bero, non Tulus saén i kékukume bero. Endob i de dumo gom ménbéreh munur ro bé Jesuse, fatut kukum gom bero amuk ménsala ro loo bé ni. Non wén i Ménsulate Kébéreh i Tuluse mano, “Kéda kom i tete étéw dob begome.”

## 6

*Fantag bé késébanil-banile*

<sup>1</sup> Amuk wén i méuyot témbo begom bé dumo gome munur bé Jesuse, kagom téboén de dob adafay de gémamak kukuman do bekén munur. Yamula, fatut téboé kom dob adafay de dumo gom munur. <sup>2</sup> Enda keey gétiga kom de, do betom munur i kémukume moso bé kéluhanay de étéw dob duniyae ni. Atin amuk betom i kémukume bé duniyae ni, gékukumo tom i kéluhanay de kloh éntingayén béleewe ni. <sup>3</sup> Enda keey gétiga kom de, betom i kémukume moso bé de télaki dob lawayo. Mélaw toow fo fakay tom sétiyawan béleewe ni dob fantade. <sup>4</sup> Mélaw amuk wén i témbo begom bé dumo gome munur, énda fatutén téboén dob adafay de gémamak kukuman non énda munur ro bé Jesu Kristowe. <sup>5</sup> Fémalala-mala gom! Aw énda foy ségétéw gétigan begom témiyawan bé de ménsébanil dob begome munur bé Jesuse? <sup>6</sup> Endob réménigo gom wayo énda fiyo non sétébo gom dob adafay de étéw gémamak kukuman, énda munur ro bé Jesuse.

<sup>7</sup> Atin sabaf bé de késétébo gom, giton fo toow i kékulang i késarig gome bé Tuluse. Toow na fo fiyo ké fédaya gom ké wén i déménufang begom taloo no ké wén i léméniful begom. <sup>8</sup> Endob i toowe, begom i de ménsala brab do léméniful bé de dumo gom munur. <sup>9</sup> Gétiga kom damén i de étéw énda métintu ro, énda féguléwoy Tuluse bero. Fétuntay gom. I de bigaén, brab de méngadaf bé de kéninontow, brab do lémamfa, brab do bakla, énda géahur ro dob kéféguléw i Tuluse. <sup>10</sup> Atin loo soy de ménakaw, brab de arumén, brab do molon, brab do émbéréh do tete tugi fantag bé de étéw, brab do lémiful, énda so géahur ro dob kéféguléw i Tuluse. <sup>11</sup> Bé do gétah, wén i do dumo begom loo bé nan. Endob béleewe ni ménlinis gomén tidéw dob de sala gom, atin do ménwaléy gomén do étéw i Tuluse. Fénwaléyén begom do métintu bé barakat i Kadnane Jesu Kristo brab Rémogor i Tuluse.

*I fiyowe adat*

<sup>12</sup> I betome do munur, fakay gérigono tom i kéluhanay éntingayéne amuk énda teteén. Gido loo, bekén kéluhanay éntingayéne fiyo. Fiyo fo ké fakay rignoné kuy kéluhanane, éndob bekén fo fatut waléyu maak riféy de rignoné ku. <sup>13</sup> Ufama, i sure, kay amaéne. Atin i amaéne kay sure. Toow i nan. Endob wén moso i gai kédanéy Tulusey sure brab amaéne.

Atin i lowohe bekén fégesébiga. Yamula rénigoy Kadnaney lowoh i de étéw inok rignoné roy galbék i Kadnane. Atin sabaf bé Kadnane, waléy mantuy de lowoh tom

moso. <sup>14</sup> Non Tulusey ménfétébulee bé Kadnane Jesus, atin fétébulee no so mélaw betom bé barakat ne.

<sup>15</sup> I de begom do munur, gétiga kom damén i de lowoh gom maak réfa i lowoh Kristowe so. Mélaw énda fatutén sumfata tom bé sundale. Toow fo tete i ni. <sup>16</sup> Gétiga kom damén i ni. I étéwe sumfaté noy lowoh ne dob sundale, waléy ro sétiman lowoh. Non wén i Ménsulate Kébéréh i Tuluse fantag bé sébawage mano, "I de ruwo gétéw waléy ro sétiman lowoh." <sup>17</sup> Endob i étéwe sumfaté noy féféw ne dob Kadnane waléy ro sétiman féféw.

<sup>18</sup> Mélaw kagom témayan bé ségiyowe saliyo bé de bawag gom. I de dumo do sala énda sébanilén bé lowohe loo bé ni. Endob i étéwe bigaén, ménsala sébanil bé lowoh ne. <sup>19</sup> Gétiga kom damén i lowoh gome maak lawi i Tuluse non i Rémogor i Tuluse nirayén begom, bati dob de féféw gom. Mélaw i lowoh gome bekén kagom. <sup>20</sup> Yamula Tulus i gefee bé de lowoh gom non bénléyén begom, atin i Nga ney fénggébayad ne de amun ménléhu dob kruse mémukas betom. Mélaw usar gom i de lowoh gom bé funay Tuluse médayéw.

## 7

*Fantag bé késébwage*

<sup>1</sup> Atin fantag man bé de fénénginsa gom begén dob de sulat gom, ay niy késumbulo kuwe de. Fiyo ké énda mawag i lagéye. <sup>2</sup> Endob sabaf médooy de étéw do bigaén, fiyo ké i séngae lagéy fatut mawag ségétéw libun, brab i séngae libun fatut mawag ségétéw lagéy. <sup>3</sup> Atin fantag man bé de sébwag, fatut ro séfidong. I lagéye énda fatutén émbéréh "Kago" dob bawag ne. Loo soy libune énda fatutén émbéréh "Kago" dob bawag ne. <sup>4</sup> Non i libune bekén been i gefee bé lowoh ne, non kay bawag ne. Atin i lagéye bekén so been i gefee bé lowoh ne, non kay bawag ne. <sup>5</sup> Mélaw kagom élénén i bawag gome ké rignoné noy kailanga nuwe. Endob amuk i de sébwag énda séfidong ro bé firoye kélungonon inok démasal ro, fakay. Endob amuk gilid i no, fatut fétausé roy késéfidong ruwe inok énda kudiyunéy Sattanase bero sabaf bé kétayay lowoh ruwe.

<sup>6</sup> Enda sugué ku begom bé de ni béréh gu. Yamula féginau gu saén begom bé fiyo ké énda sébwag gom. <sup>7</sup> Non méuyotu de damén ké iringé kom begén énda i bawag gu. Endob énda ségiléw tom kéluhanan. Non irayay Tulusey séngae ségétéw kaan kéfurungon loo bé étéwe énda mawagén. Atin i de ségiyo étéw, irayay Tuluse bero ségiyo kéfurungon.

<sup>8</sup> Ay niy béréhé kuwe dob de énda séna bawagén brab dob de baléw: Toow na fo fiyo ké énda mawag gom, ségiléw bé begéne.

<sup>9</sup> Endob amuk énda gétingkélo kom i kétayay de lowoh gom, toow na fo fiyo ké mawag gom. Non toow na fo fiyoy mawage bé kéréngan gom sabaf bé kétayay lowohe.

<sup>10</sup> Atin fantag man bé begome wénén i do bawag gom, ay niy béréhé kuwe dob begome. Been i niy sugu i Kadnane, békén saén kagé. Ilibune békén fo fatut ké ségélak bé bawag ne. <sup>11</sup> Endob amuk wén i libun génlak i bawag ne, énda fo fakayén ké mawag man ségiyo. Endob fakay séfule dob bawag ne. Atin i lagéye békén fo fatut ké gélaké noy bawag ne.

<sup>12</sup> Atin fantag man bé begome do sébawag, ay niy kagéne saén féginau dob begome. (Non énda sénugu i Kadnane ni.) Amuk wén i lagéy dumo tom munur bé Jesuse éndob i bawag ne énda munurén, atin i bawag ne ni mika ségélak, énda fatutén ké gélaké no. <sup>13</sup> Atin amuk wén i libun dumo tom munur bé Jesuse, éndob i bawag ne énda munurén, atin i bawag ne mika ségélak, énda fatutén gélaké no. <sup>14</sup> Non i bawage énda séna munurén, waléy malinis dob adafay Tuluse sabaf bé bawag ne munur bé Jesuse. Amuk békén loo bé ni, i de nga ro énda malinis ro dob adafay Tuluse maak do nga i de békén méngintulus. Endob i toowe fo, malinis ro dob adafay Tuluse. <sup>15</sup> Endob i bawage énda munurén, amuk gélaké noy bawag ne, fédaya gom gélaké no. Fakay i ni, non kétayay Tuluse ké métané i kébati tome. <sup>16</sup> Fatut fédayaé no ké gélakéy bawag ne, non fiyon fo ké énda ségélakén, énda so gétiga no de ké sabaf bé beene waléy géunur i bawag ne loo ké énda.

<sup>17</sup> Atin fiyon fo ké atiy gohoy séngae ségétéw betom bé gaiwe fén-unur i Tuluse betom fatut fétausé tomén. Non niray i Kadnane nan gohon. Been i sugué kuwe dob de munur dob kéluhanay de ingéd. <sup>18</sup> Amuk i ségétéwe begom méntulién bé énda séna ménwaléyén de munur bé Jesuse, éndaén fatutén ké kédané noy kétuli ne béleewe. Atin amuk i ségétéwe begom énda séna méntulién amun ménwaléyén munur, éndaén fatutén féntuli béleewe. <sup>19</sup> Non ulanden ké méntuli gom loo ké énda. I toowe fo méлага i kéodoro kome bé de sugu i Tuluse. <sup>20</sup> Mélaw fiyon fo ké atiy gohoy séngae ségétéw betom bé gaiwe fén-unur i Tuluse betom, fatut fédayday tomén loo bé nan. <sup>21</sup> Amuk ségétéw go rifén bé gaiwe ménwaléy gon munur, kago émbuku de. Endob amuk fakay tangéyén go, rigo mo. <sup>22</sup> Non amuk ségétéw go rifén bé gaiwe ménunur go, féwaléyéy Kadnane beam békénén rifén dob adafa nuwe. Atin loo so bé ni, amuk békén go ségétéw rifén bé gaiwe ménunur go, waléy go rifé Kristowe. <sup>23</sup> I Tuluse bényéyén betom amun nirayén i buntunge Ngaén fénléhu geménantinon betom. Mélaw békén tom fatut

waléy riféy kéilawane saén. Yamula riféy Tuluse betom. <sup>24</sup> Do dumo gu, fiyon fo ké atiy goho tome bé gaiwe fén-unur i Tuluse betom, fatut fétausé tom, non Tulus i dumo tome.

<sup>25</sup> Atin fantag man bé de étéw énda sénay bawag ro, énda i gébérého ku sugu tidéw dob Kadnane. Endob ay niy karang guwe de, brab ségétéwu gésarigo kom non bé kégedaw i Kadnane begén. <sup>26</sup> I karang guwe de, fiyo ké énda mawag gom non méréngén i de gai béleewe ni. <sup>27</sup> I étéwe énda i bawagén, békén fatut séléde no. Atin i étéwe wén i bawagén, békén fatut gélaké no. <sup>28</sup> Endob amuk wén i étéw méuyot mawag, fakay. Békén sala i mawage. Endob géagéw gom méréngén. Been i niy funa kuwe énggébéréh bé kagom fatut mawag béleewe ni, non mikau de ké kéréngan gom loo bé de kéréngéngay de sébawag.

<sup>29</sup> Non béréhé ku begom do dumo gu, éndaén mérugay i gai tome. Mélaw tidéw béleewe ni, i étéwé wén i bawagén, fatut mégéror rémigo bé galbék i Kadnane maak énda i bawagén. <sup>30</sup> Ségiléw so bé de tete fédéwén, brab de fiyo fédéwén, brab de wén do languntama ro brab do énda i languntama ro. Ulanden non fatut ro mégéror rémigo bé galbék i Kadnane. <sup>31</sup> Atin amuk musar tom bé de éntingayén dob duniyae ni, békén fatut toowé tom gulaanén. Non éndaén mérugay i duniyae ni.

<sup>32</sup> Méuyotu de fo ké énda émbuku gom. I lagéye énda i bawagén toow na fo mégéror rémigo bé galbék i Kadnane non énda i mangga de. Mélaw i fégitungé nuwe saén i funay Kadnane mésuwat. <sup>33</sup> Endob i lagéye bawagan, fégitungé noy de éntingayén dob duniyae ni inok fésuwaté noy bawag ne. <sup>34</sup> Sabaf bé ni, mésébaad i kéfégitungé ne. Ségiléw so bé libune énda i bawagén, fégitungé no saén i fantage bé Kadnane inok toow fo mégéror rémigo bé galbék i Kadnane. Endob i libune wén i bawagén, fégitungé noy de éntingayén dob duniyae ni non méuyot de ké fésuwaté noy bawag ne.

<sup>35</sup> Békén bényéy guy ni ké énda fébawagé ku begom. Békén! Bényéy guy ni inok tabanga ku begom rémigo bé fatute brab inok mégéror gom rémigo bé galbék i Kadnane, atin énda i mangga begom bé ni.

<sup>36</sup> Fantag man bé de ménséfasad sébawag moso, amuk méuyot ro de ké éndaén fétausé roy késebawag ruwe inok énda i angga ro rémigo bé galbék i Tuluse, fiyo. Endob amuk méuyot ro fo séfidong, fatut ro sébawag loo bé kétaya ruwe. Enda mékala ro amuk sébawag ro. <sup>37</sup> Endob i lagéye, amuk énda i mémégés de éndob toow fo kétaya no ké éndaén fétausé no bawagén i libune fénasada no bawagé no, fiyo so. <sup>38</sup> Mélaw, fiyo ké bawagé noy

kénogone fénasada no. Endob toow na fo fiyo ké énda bawagé no de.

<sup>39</sup> I libune wén i bawagén, énda fakayén ké mawag ségiyo taman méuyag sénay bawag ne. Endob amuk ménléhu i bawag ne, fakay man mawag bé kétaya nuwe, éndob fatut ségétéw so munur bé Kadnane Jesus. <sup>40</sup> Endob toow na fo méoror ké éndaén mawagén ségule. Beeniy kéfégitung guwe de. Atin gékaranga ku, fénggésobut i Rémogor i Tuluse begén i ni.

## 8

### *Fantag bé amaéne*

<sup>1</sup> Atin fantag man bé fénénginsa gome ké fakay tom mama bé amaéne ténulak dob adafay kéninontow, ay niy késumbul guwe de. Gétiga tom kéluhanan énda i barakat i de kéninontow. Gétiga tom énda i lanték ro. Endob i de étéw marok do gétigan ro, waléy ro félangka-langka. Endob békén tom fatut félangka-langka, yamula fatut mégédaw tom inok féfiyoné tom i fédéw i de dumo tom. <sup>2</sup> I étéwe manok toow fo gétigan, énda séna gétiga noy ati fatute gétiga no. <sup>3</sup> Endob i étéwe toow fo féimué noy Tuluse, géloloy Tuluse non ménwaléy étéw i Tuluse.

<sup>4</sup> Na, fantag man bé amaéne ténulak dob adafay kéninontowe, gétiga kom i kéninontowe énda méuyagén taloo no Tulus. Non sébaan saén i Tuluse, atin éndaén i ségiyo de. <sup>5</sup> Bénréh i de dumo do étéw wén kun i médoo do tulus brab kadnan dob lawayo brab dob fantade. Atin toow, wén i médoo féngadaféy de étéw. <sup>6</sup> Endob gétiga tom, sébaan saén i Tuluse, sani Abaye ménfélimbag bé kéluhanane. Been i odoró tome brab féngadafé tom sénga tékélid. Atin sébaan saén i Kadnane sani Jesu Kristowe léménimbag bé kéluhanay éntingayéne brab Beeney funa tome méuyag.

<sup>7</sup> Endob békén kéluhanay étéwe gétiga roy ni. Wén i de dumo étéw marok do tulus i de kéninontow non beeniy karowe kéunur bé do gétaéh bé énda séna ménunur ro de bé Jesuse. Mélaw amuk mama ro bé amaéne ténulak dob adafay kéninontowe, marok énggérigo ro bé salae funa ro tete fédéw. <sup>8</sup> Endob gétiga tom, békén amaén i funay Tuluse betom méuswat. Non amuk mama tom de, loo so ké énda mama tom de, ulanden dob Tuluse.

<sup>9</sup> Gido loo, ingat gom inok i de rigoné kom, békén funay dumo gome énda séna méégét i kéunur ne, waléy gésala. <sup>10</sup> I begome wén i gétiga kom, amuk mama gom dob lawie féngadafan bé kéninontowe, atin amuk énggitoy ségétéwe énda séna gétiga noy fantage bé de ni kétoro, waléy so méuyot de mama, fiyon fo ké dob fédéw ne sala i mamae bé amaéne ténulak dob adafay kéninontowe. <sup>11</sup> Mélaw i ni étéw énda séna méégét i kéunur ne, énggésug-sug, non réniyo

noy gékaranga nuwe mészala de. Enda fiyoy nan, non beene soy funa Kristowe ménléhu inok mékédan i sala ne. Mélaw i kégétiga muwe wayoy funay dumo muwe waléy gésala. <sup>12</sup> Mélaw amuk rigoné moy ni, beem i mészalae sébanil bé Kristowe non mészala go sébanil bé dumo muwe bé kэфésala me bé dumo muwe énda méégét i kéunur ne. <sup>13</sup> Mélaw amuk sabaf saén bé karnehey funay dumo muwe gésala, kagon mama de inok énda mészala i dumo muwe de.

## 9

### *Fantag bé sahud i de apostol*

<sup>1</sup> Enda i ségiyo étéw géatur begén non ségétéwu apostol brab non méntéfégitoy Kadna tome Jesus dob begéne. Atin i begome, ménunur gom bé Jesuse sabaf bé kétoro guwe begom. <sup>2</sup> Mélaw fiyon fo ké i de ségiyo do étéw énda fégéloloné ro begén ségétéw apostol, fatut fégéloloné kom begén non i kéunur gomey fégélolonone bé i begéne ségétéwu apostol. Non begén i murete fantag bé Kadnane dob begome do étéw dob Korinto.

<sup>3</sup> Atin amuk wén i démowoy begén, ay niy késumbulo kuwe de: <sup>4</sup> Aw békén ba fatutu irayan kéama gu bé kégalbék guwe témoro fantag bé Kristowe? <sup>5</sup> Aw énda bay kuwagib gu miring bé réniyo de dumo gu do apostol brab de tuwaréy Jesus brab Pedrowe? Non kéluhana ro wén i do bawag ro munur so bé Jesuse. Atin amuk magéw ro, uwité roy de bawag ro. Mélaw wén soy kuwagib gu rémigo damén bé nan. <sup>6</sup> I Bernabewe brab begéne, énda fatut gey gémalbék saliyo bé kétoro geye saén. Fatut irayan gey amaén bé kétoro geye saén. Sedek énda mérigoy ni loo bé mérigowe dob de ségiyo témoro? <sup>7</sup> Ufama, énda i ségétéw sundalo been soy mayadan bé kaane lowoh bé kégalbék né sémundalo. Ségiléw so bé mohoke, wén i kuwagibén mama bé de kéntéwén. Loo soy témalimae bé de bili-bili, fatut gédoté noy de dumo gatas i de bili-bili talimae no.

<sup>8</sup> I ni bénréh gu békén saén tidéw dob kéilawane, non been soy niy ménbéréhe dob kukumay Tuluse. <sup>9</sup> Ménbéréh dob kitabe sénulat Moisesé mano, "I ayame sad-sadé noy faréye inok mérek, békén fatut ikétén i ba ne." Atin i Tuluse békén saén bénréhén i ni fantag bé ayame. <sup>10</sup> Non bénréhén so fantag bé begeye do muret bé Fiyowe Uret. I démaduwe brab kémétéwe wén i inam ro gégedot bé kéntéw ruwe. <sup>11</sup> Atin ségiléw so bé begeye. Nohok gey i kébéréh i Tuluse dob begome inok méuyag gom taman sa taman. Mélaw fatut irayan gey amaé key inok méuyag gey dob duniyae ni. <sup>12</sup> Non amuk i de ségiyo témoro begom wén i kuwagib ro médot tidéw dob begome, toow na fo dakél i kuwagib geye de.



Gido loo, énda séna ménongot gey tidéw dob begome. Yamula féndaya gey kéluhanay mérégéne inok énda saén méangga i kéuret geye bé Fiyowe Uret fantag bé Kristowe. <sup>13</sup> Gétiga kom damén i de étéw gémalbék dob lawi i Tuluse, mama ro so bé dumoy ténulak ruwe. <sup>14</sup> Ségiléw soy ni bé begeye. Non sénugu i Kadnane bé fatut médot i de témoro bé kéfaguyag ruwe tidéw dob de témoro ro.

<sup>15</sup> Endob fiyon fo ké wén i kuwagib gu médot bé kéfaguyag guwe tidéw dob de témoro gu, énda séna ménongotu dob berowe. Atin békén sémulatu béni inok mongotu dob begome. Mikau fo mongot dob begome. Toowu na fo méuyot ké méléhuu mélayaf kisak mékédan i funa kuwe félangka-langka, sani kégalbék guwe fiyon fo ké énda médotu sahud. <sup>16</sup> Endob énda i kuwagib gu félangka-langka sabaf bé kéuret guwe bé Fiyowe Uret. Non sénugu i Kadnane begén muret fantag bé Kristowe. Atin mélaw amuk énda rigoné ku de, toowu fo mékégedaw-gédaw non mékukumu fo toow. <sup>17</sup> Amuk muretu sabaf bé kétaya kuwe saén, gédoté kuy sahud guwe de. Endob sénugu i Tuluse begén, mélaw fatut rigoné ku sabaf sénarigén i ni galbék dob begéne. <sup>18</sup> Ati mélaw i sahud guwe de? Ay ni: Been i dakéle kéoror gu bé kéuret guwe bé Fiyowe Uret fiyon fo ké énda mongotu bé kéfaguyag guwe loo damén bé kuwagib guwe de.

<sup>19</sup> Atin fiyon fo ké békénu ségétéw rifén, waléyu maak riféy kéluhanay étéwe inok tabangé ku bero waléy do munur bé Jesuse. <sup>20</sup> Mélaw amuk diyowu dob de Judio, iringé kuy adat i de Judio inok munur ro. Fiyon fo ké énda kailanga no modoru bé kitabe tidéw dob Moisesse, modoru de amuk diyowu dob de modoron de inok munur ro bé Jesuse. <sup>21</sup> Atin amuk diyowu dob de békén Judio, iringé ku soy adat ruwe inok munur ro so bé Jesuse. Endob fiyon fo ké éndaén modoru bé kitab Moisesse, modoru bé kitab Kristowe. <sup>22</sup> Atin amuk diyowu dob de étéw énda séna gétiga roy fatute amaé tom bé kéluhanay de amaén, énda amaé kuy amaéne karangé ro énda fiyo no. Rigoné kuy ni inok tabanga ku bero munur bé Jesuse. Mélaw rigoné kuy adat i de udenén étéw dumo gu inok i de dumo bero waléy géunur bé Jesuse.

<sup>23</sup> Rigoné kuy kéluhanay de ni inok munur ro bé Fiyowe Uret fantag bé Jesuse, inok gédoté ku soy de kéfionon iray i Tuluse sabaf bé kélégéb i Fiyowe Uretén. <sup>24</sup> Gétiga kom damén i ni. Amuk sékuya i de étéw, kéluhana ro léméntu, éndob ségétéw saén i témabane brab gégédote bé barase. Mélaw fégéror gom loo bé sékuyae inok barasay Tuluse begom moso. <sup>25</sup> I étéwe sékuya toow fo fégéror bé rigoné nuwe inok waléy émbagér i lowoh ne. Rigoné noy ni inok témaban, atin gédoté

noy barase de énda fo métingklén. Endob i betome mégéror gémalbék bé galbék i Kadnane, gédoté tom soy katome baras énda mébinasa no taman sa taman. <sup>26</sup> Beeniy funa kuwe magayas féntang léméntu mangéy dob fégilidoy sékuyaane. Atin ségiléwu bé ségétéwe sémuntuk, toow fo tiliké no inok toow fo guraté no. <sup>27</sup> Atin i lowoh guwe ni, amuk wén i tete kétaya no, dusané ku inok énda modoru bé nan tete kétaya ku. Rigoné kuy ni inok i begéne téménoro bé médoowe, énda waléy mékédan i kagéne baras.

## 10

<sup>1</sup> Do dumo gu, méuyotu de ké gétiga kom i énggéagewoy de katufua tom amun ménodor ro bé Moisesse. Déniyagay Tuluse bero kéluhanan. Non ténléb i rawéne bero bé kéagéw ruwe brab énggéifara roy dogote féndawét Furo Dogot. <sup>2</sup> Mélaw maak bénautison ro bé rawéne brab dogote inok waléy ro do kuyug Moises. <sup>3</sup> Atin ménama ro kéluhanan bé amaéne tidéw dob Tuluse. <sup>4</sup> Atin méniném ro kéluhanan bé wayége tidéw dob Tuluse, non féniném i Tuluse bero bé wayége tidéw dob sébaane batéw ménodor bero. I ni batéw been i Kristowe. <sup>5</sup> Gido loo, énda ménsuwat i Tuluse bé kédoono ruwe. Mélaw médooy ménléhue bero diyowu dob gonone énda i étéw de hati.

<sup>6</sup> I funa nuwe ménrigoy de ni inok wén i do ufama témoro betom, inok gétiga tom énda fatut féngonoyé tom i de tete éntingayén loo bé berowe. <sup>7</sup> Enda fatut tom méngadaf bé de kéninontow loo bé rénigoy de dumo bero. Non wén i Ménsulate Kéberéh i Tuluse mano, “Ménsar ro dob adafa nuwe mama brab miném. Tidéw béno, téméningéng ro mésayaw dob adafa nuwe.” <sup>8</sup> Atin énda fatut tom bigaén loo bé rénigoy de dumo bero, non kénukum i Tuluse bero bé kéléhu i ruwowe folo bra téléw ngibu bé ségétérésangane. <sup>9</sup> Atin békén fatut tukawa tom i Kadnane bé de rigoné tom do tete loo bé rénigoy de dumo bero, funay de ulé kéméneke bero atin ménléhu ro. <sup>10</sup> Atin énda fatut tom riklamo loo bé rénigo ruwe funay Tuluse sénuguén i télakiwe méméléhu bero.

<sup>11</sup> I funay de ni do ménrigo inok wén i do ufama témoro brab émféingat bé kéluhanay étéwe, non éndaén mérugay i tamfaday gaiwe tidéw béleewe ni.

<sup>12</sup> Mélaw, i étéwe manok toow fo méégét i kéunur ne, fatut mingat inok énda mésalaén.

<sup>13</sup> I de kétukawa no bé séngae ségétéw étéw békén saén ménantu, non i kéluhanay kéilawane méntukawané loo bé begome. Atin toow tom fo gésarig bé Tuluse non énda fédayaé no betom métukawan bé kétukawe gélamfas na betom. Non bé gaiwe métukawan tom, tintu fébagér no betom inok wén i

kétingkél tom, inok énda damén gérigo tom sala.

<sup>14</sup> Mélaw do gulaané ku do dumo gu, kagom méngadaf bé de kéninontow. <sup>15</sup> Gétiga kom i fatute, mélaw fégitung gom i de bénréh gon inok gétiga kom ké toow look énda. <sup>16</sup> Amuk mamung tom bé “komiuniyune” fégétédémé tom i kéléhu Kristowe, mama tom fan brab miném tom arak fénsalamata key dob Tuluse. I inémé tome, been i dara Kristowe sétukidé tom. Atin i amaé tome, been i lowoh Kristowe sétukidé tom. <sup>17</sup> Sébaan i fane. Mélaw i kéluhana tome waléy sébaan so non mama tom bé sébaane fan.

<sup>18</sup> Fégitung gom i fantage bé de étéw Judio. I kéluhanay de mama bé ténulake, séréngan ro do méngadaf bé Tuluse. <sup>19</sup> Ay niy atag i ni kétoro gu begom. I kéninontowe, réngoy étéwe saén. Atin mélaw énda i atag i amaéne ténulak dob adafay de kéninontow. <sup>20</sup> Gido loo, békén saén do kéninontow i de féngadafé ro, ké ténulak ro do saitan so. Békén Tulus i féngadafé ruwe. Mélaw mikau de ké mamung gom bé kéféngadafé bé de saitan. <sup>21</sup> I betome do munur bé Kristowe, amuk mama tom bé komiuniyone, fégétédémé tom i Kadnane Jesus brab Beeney féngadafé tome. Mélaw énda fakay tom mama so bé de amaén ténulak dob adafay de saitan non maak mamung tom méngadaf bé de saitan. <sup>22</sup> Békén fatut fédaléwé tom i Kadnane. Non toow fo barakatan brab gékukumo no betom, atin énda géséliyah tom de.

<sup>23</sup> Fiyon fo ké fakay rigoné tom i kéluhanane békén fiyoy kéluhanay de rigonén. Atin fiyon fo ké fakay rigoné tom i kéluhanane, békén fégétabang bé de dumo tom i kéluhanay de rigonén. <sup>24</sup> Békén fatut tabanga tom saén i de katom lowoh. Fatut tabanga tom soy de dumo tom.

<sup>25</sup> Fakay amaé tom i de udenén karne fébélyéy dob fadiyane, brab békén fatut fénginsaé tom ké ténulak dob adafay de kéninontow, inok énda waléy tete i de fédéw tom amuk amaé tom. <sup>26</sup> Non ténungkas i Tuluse betom mama bé kéluhanay amaéne dob Ménsulate Kébéréhén mano, “Tulusey gefee bé duniyae brab kéluhanay éntingayéne.”

<sup>27</sup> Amuk wén i ségétéw étéw énda munurén bé Kristowe atin séngkaté no begom mama, brab amuk magéw gom mangéy diyo, fatut amaé kom i kéluhanay féama ne begom. Endob kagom fénginsaén de ké ténulak i amaéne ni dob kéninontowe, inok énda waléy tete i de fédéw gom ké mama gom de. <sup>28-29</sup> Endob amuk wén i émbéréh de begom mano, “I ni amaén ténulak dob adafay kéninontowe”, kagom amaén de, inok i ménbérehe dob begome énda waléy tete i fédéw ne.

Endob amuk ménginsa gom makom, “Amuk fakay amaé kuy atiy kétaya kuwe, sedek énda géamaa ku de sabaf saén bé

ségétéwe étéw énda gétiga no de ké ténungkas i Tuluse betom mama bé kéluhanane? <sup>30</sup> Sedek wén i démowoy begén bé amaéne fénsalamata ku dob Tuluse?”

<sup>31</sup> Ay ni késumbul guwe de: Amuk wén i rigoné kom look amaé kom look inémé kom, rigo gom i kéluhanane inok médayéw i Tuluse de. <sup>32</sup> Mélaw kagom rigonén i funay dumo gome tete i fédéw ne, fiyon Judio, taloo no békén Judio, loo soy de munur bé Kristowe. <sup>33</sup> Iring gom i rigoné kuwe. Kétaya ku ké démoyun fésuwaté kuy kéluhanay étéwe. Enda rigoné kuy kéfiyonoy kagéne saén lowoh, yamula rigoné ku soy funay kéluhanay de étéw fiyo inok munur ro so bé Jesuse brab méfukas ro bé de sala ro.

## 11

<sup>1</sup> Mélaw iring gom begén loo bé kéiring guwe bé Kristowe.

### *Fantang bé de libun*

<sup>2</sup> Do dumo gu, dayéwé ku begom, non démoyun fégétédémé kom begén brab odoro kom i de kétoro gu begom. <sup>3</sup> Atin méuyotu de ké gésobuto kom i ni. I lagéye uléw i bawag ne. Atin i Kristowey uléw i lagéye. Atin Tulus i uléw Kristowe. <sup>4</sup> Mélaw i lagéye amuk ureté noy kébéreh i Tuluse taloo no démasal, fatut énda météléb i uléw ne inok fégitu noy Kristowe uléwén. <sup>5</sup> Endob i libune amuk ureté noy kébéreh i Tuluse taloo no démasal, fatut télébé noy uléw ne inok énda émfémalay bawag ne. Non amuk énda, ségiléw bé libune ménérih i uléw ne. <sup>6</sup> Atin amuk énda télébé noy uléw ne, fatut fékéléngén i buk ne. Endob toow fo mékémala ké ménkéléng i buk i libune taloo no ménérih i uléw ne, mélaw fatut télébé noy uléw ne. <sup>7</sup> Endob i lagéye énda fatut télébé noy uléw ne ké démasal taloo no ké muret bé kébéreh i Tuluse. Non beeney maake anlung i Tuluse non niray i Tuluse dey aturay duniyae ni. Békén libuney funay bawag ne médayéw. <sup>8</sup> Non i sunguwe lagéy békén tidéw dob libune. Yamula libuney tidéw dob lagéye. <sup>9</sup> Atin i lagéye békén lénimbag inok kay libune. Yamula lénimbag i libune inok kay lagéye. <sup>10</sup> Mélaw fatut télébéy libuney uléw ne inok fiyon i de télaki gétiga roy lagéy i uléw ne. <sup>11</sup> I betome do munur bé Kadnane, i lagéye brab libune fatut sétabang. Non i libune kailanga noy kétabang i lagéye. Atin i lagéye kailanga noy kétabang i libune. <sup>12</sup> Non loo bé gétaho, i sunguwe libun tidéw dob sunguwe lagéy, béleewe i lagéye mumah tidéw dob libune. Atin i kéluhanane tidéw dob Tuluse, non Been i lémimbage bé kéluhanane.

<sup>13</sup> Begom séden i mégitunge de. Aw fakay ba démasal i ségétéwe libun dob simbaane amuk énda télébé noy uléw ne? Gétiga tom énda fakayén. <sup>14</sup> Atin gétiga tomén dob de fédéw tom bé énda fo fiyo no ké métaah i

buk i lagéye. Toow fo mékémala. <sup>15</sup> Endob toow fo fiyo ké métaah i buk i libune funa no médayéw. Non niray dey buk ne inok météléb i uléw ne. <sup>16</sup> Amuk wén i mika bé ni kétoro, ay niy késumbang guwe de. Enda i ségiyo adat ténoro gey saliyo bé ni bé kéféngadafe. Atin ménagayun soy kéluhanay de munur bé Tuluse dob kéluhanay de ingéd.

### *I kéama i Kadnane*

<sup>17</sup> Ay niy ségiyowe na béréhé ku begom. Enda dayéwé ku begom sabaf bé késélimud gome méngadaf. Non énda fiyoy rigoné kome, rigoné kom i tete. <sup>18</sup> Non énggélíngoo ku, buluk sélimud gom kun, ménsébaad-baad gom. Atin gétiga ku wén i kétoow i ni. <sup>19</sup> Gido loo, kailanga kom i mésébaade inok toow fo giton i isuwe tintu fo sémarig bé Tuluse. <sup>20</sup> Amuk sélimud gom mama bé amaéy Kadnane sani komiyuniyune, énda fiyoy nan rigoné kom. Mélaw békén gom tintu mama bé amaéy Kadnane. <sup>21</sup> Non amuk mama gom, i de dumo begom toow fo arumén. Mélaw i de dumo de mule ro mélayaf. Atin saliyo na bé nan, waléy i de dumo begom molon ké sélimud gom. <sup>22</sup> Sedek énda mama gom brab miném dob de kagom lawi? Non bé kéarumé kome, fémalané kom i de méskinan begom. Mélaw i de ségiyo étéw émbéroh ro tete fantag bé begome do munur bé Jesuse. Ati mélaw i fiyowe béréhé ku? Enda fo dayéwé ku begom loo damén bé kétaya kome de. Yamula béréhé ku begom, toow fo tete i rigoné kome.

<sup>23</sup> Non i ténoro guwe begom fantag bé komiyuniyune ségiléw so bé kétoro i Kadnane de begén. Bé kélungonone fénkéfo Judasey Kadnane Jesus, éndot Jesuse fane. <sup>24</sup> Atin amun gilid ménfésalamat dob Tuluse, sénbaad-baadén. Atin ménbéréh mano, “Ay niy lowoh guwe, niray inok méfukas gom. Ama gom i ni fégétédémé kom Begén.” <sup>25</sup> Loo so bé no, amun énggilid ro mama fétémegegén, éndotén i tabue. Brab ménbéréh mano, “I ni tabu, beeniy mantuwe fasad i Tuluse rénigo bé dara guwe. Amuk miném gom de, rigo gom fégétédémé kom Begén.”

<sup>26</sup> Non taman so bé késéfule i Kadnane, sénga mama gom bé fane ni brab miném dob tabue ni, fégito gom i késarig gome bé kéléhu ne fégéfukas begom. <sup>27</sup> Mélaw amuk wén i étéw mama bé éfay Kadnane brab miném dob tabu ne, éndob énda méégét i kéfégitung ne fantag bé atag i komuniyone ni, ménsala sébanil bé Kadnane. Non énda basana noy lowoh ne brab dara ne. <sup>28</sup> Mélaw fatut susinéy séngae étéw i kaane lowoh ké fiyo taloo no tete i kéféngadaf ne. Amuk gékaranga no fiyo, fakay mama bé fane brab miném dob tabu i Kadnane. <sup>29</sup> Endob amuk wén i étéw mama de brab miném de, atin énda rénigo no de inok fégétédémé noy kéléhu i

Kadnane, kukuméy Tuluse de sabaf bé nan rénigo no. <sup>30</sup> Beeniy funa kome médooy de mélubay begom brab do déméruun, atin wén soy do ménléhu begom. <sup>31</sup> Endob amuk susiné tom na sunguy de katom lowoh bé kéféngadaf tome bé Kadnane, énda kukuméy Tuluse betom. <sup>32</sup> Endob bé kéfifit i Tuluse betom béleewe ni, toroé no betom inok énda kukumé no betom moso loo bé gétimale kékukumén bé de étéw énda munur ro bé Jesuse.

<sup>33</sup> Mélaw do dumo gu, amuk sélimud gom mama bé komiyuniyone, kagom magayas. Yamula séongot-ongot gom. <sup>34</sup> Atin amuk wén i mélayaf, fatut mama na métah dob lawi ne. Atin tidéw béno, mangéy sélimud. Mélaw énda kukuméy Tuluse begom ké sélimud gom. Atin fantag man bé de ségiyo kéfénginau gu begom, béréhé ku fo ké séfuleu mangéy diyaan.

## 12

### *I iray i Rémogor i Tuluse*

<sup>1</sup> I kéuyoto kuwe béréhé ku begom i fantage bé de iray i Rémogor i Tuluse. Do dumo gu, méuyotu de fo ké gésobuto kom i de ni. <sup>2</sup> Bé gétahe, amun énda séna munur gom bé Jesuse, wén i ménféféngadaf begom bé de kéninontow. Atin sabaf bé ni, énggésala gom, féféngadaf gom i de kéninontow, sani de énda méuyag. <sup>3</sup> Mélaw méuyotu de ké gétiga kom i ni. I étéwe fémanduoy Rémogor i Tuluse, énda géfémulaa noy Jesuse. Brab énda soy étéw gébéreh mano, “Jesusey Kadna kuwe,” saliyo bé féfémanduoy Rémogor i Tuluse.

<sup>4</sup> Médoó gékélasiy de kéfurungon iray i Rémogor i Tuluse, éndob sébaan saén i tidéwo ruwe sani Rémogor i Tuluse. <sup>5</sup> Médoó gékélasiy kégalbéke, éndob sébaan saén i Kadnane galbékon. <sup>6</sup> Médoó gékélasiy de rigoné tom, éndob sébaan saén i Tuluse émférido de dob betome kéluhanan. <sup>7</sup> I Rémogor i Tuluse niraya noy séngae ségétéw betom bé sébaane kéfurungon inok fégétabang tom bé kéluhanay de dumo tom munur. <sup>8</sup> Non i Rémogor i Tuluse, irayén dob de dumo étéw i kéfurunge émbéreh bé toowe kégétigan. Atin dob ségiyowe man étéw, irayén i kéfurunge émfégsobut bé ménaléme kétoro. <sup>9</sup> Atin dob de ségiyo, irayén i émbagére kéunur. Atin dob de ségiyo, irayén i kégétigane muwa. Endob sébaan saén i Rémogor i Tuluse miray de. <sup>10</sup> Atin dob de ségiyo, irayén i barakate inok gérido ro do mékégaif. Atin dob de ségiyo, irayén i kéfurunge muret bé kébéréh i Tuluse. Atin irayén dob de ségiyo kéfurunge mégélolo bé barakate ké atiy tidéwo nuwe de, inok gétiga ro ké tidéw dob Tuluse loo ké tidéw dob Satanase. Atin irayén dob de ségiyo kéfurunge sébéreh bé de séségiyo-giyo késébéreh énda séna gétiga ro de. Atin irayén

dob de ségiyoy kéfurunge émfégésobut bé de ni do késébéréh. <sup>11</sup> Atin fiyon fo ké médoogékélasiy de kéfurungon irayén, sébaan saén i Rémogor i Tuluse miray de. Atin irayén saén dob séngae ségétéw kétaya no iraya no de.

### Maak lowoh

<sup>12</sup> I Kristowe ségiléw bé sébaane lowoh. Atin betomey maake réfa i lowoh Kristowe. Wén i do séségiyo-giyo kéfurungo tom ségiléw bé rignonéy de réfa i lowohe. Endob sébaan saén i lowohe. <sup>13</sup> I begome kéluhanan, do Judio taloo no do békén Judio, do rifén taloo no do békén rifén, sébaan saén i Rémogor i Tuluse ménautison betom. Mélaw ménwaléy tom maak sébaan lowoh fémanduoy Rémogor i Tuluse.

<sup>14</sup> Sébaan saén i lowoh i ségétéwe étéw éndob médooy de réfaén. <sup>15</sup> Ufama, amuk émbéréh i sékéye mano, “Békénu réfa i lowohe non békénu kémér,” békén toow i nan. Non i sékéye, fiyon fo ké énda gégamakén loo bé kémére, réfa i lowohe soy beene. <sup>16</sup> Atin amuk émbéréh i kélingoe mano, “Békénu réfa i lowohe non békénu moto,” békén toow i nan. Non i kélingoe, fiyon fo ké énda gégito no loo bé motowe, réfa i lowohe soy beene. <sup>17</sup> Ufama, amuk i sébaane lowoh falan saén moto, énda gégélíngóén. Atin amuk falan saén kélingo, énda gétéréhungén. <sup>18</sup> Endob énda lénimbag i Tulusey étéwe loo bé nan. Non rénigo noy de séségiyo-giyo réfa i lowoh i étéwe loo bé kétayay Tuluse de. <sup>19</sup> Mélaw amuk ségéréfa saén i lowohe, énda médawétén lowoh. <sup>20</sup> Endob i toowe, médoog tom do réfa i lowoh Kristowe.

<sup>21</sup> Mélaw i motowe énda gébéréhén dob kémére mano, “Enda kailanga ku beem.” Atin i uléwe énda gébéréhén dob sékéye mano, “Enda kailanga ku beem.” <sup>22</sup> I toowe, i de réfa i lowohe fégitungé tom do énda fo toowén balilaga, beroy de toow fo do kailangan. <sup>23</sup> Atin i de réfa i lowohe fégitungé tom do toow fo gérifantad, toowé tom fo talimaén. Atin i de dumo réfaén énda toowén fiyo, toowé tom féfiyonén bé kégale. <sup>24</sup> Enda kailanga no rignonén dob de dumoy réfa i lowohe do fiyo falas. Non rénigoy Tulusey de lowoh tom inok tali-maé tom i de réfaén karangé tom énda balilaga ro. <sup>25</sup> Mélaw békén fatut sésinay de réfa i lowohe non rénigoy Tuluse bero inok sétabang ro. <sup>26</sup> Atin amuk kédawétan i ségéréfae bé lowohe, kédawétan ro so kéluhanan. Atin amuk médayéw i ségéréfae de, méoror ro kéluhanan.

<sup>27</sup> Mélaw betomey lowoh Kristowe, brab kéluhana tom do réfa i lowoh ne. <sup>28</sup> I betome do munur maak sébaan saén i lowoh tome. Atin niray i Tuluse dob séngae ségétéw betom i kaane galbék. Fénémili i Tulusey

de étéw gémalbék loo bé ni. I sunguwe de, rénigo noy dumoy de étéw do apostol. I géruwowe de, rénigo noy de dumo de muret bé kébéréh ne. I gétéléwe de, rénigo noy de dumo de témoro. I de dumo de rénigo no bero gétigan rémigo bé de mékégaif. I de dumo de rénigo no bero gétigan muwa bé de déméruun. I de dumo de rénigo no bero témabang bé de dumo ro. I de dumo de rénigo no bero do fiyo odoron. Atin rénigo noy de dumo de furung sébéréh bé séségiyo-giyo kébéréh énda gétiga ro de. <sup>29</sup> Enda fakayén ké kéluhana tom do apostol, taloo no do muret bé kébéréh i Tuluse, taloo no do témoro, taloo no do rémigo bé de mékégaif. <sup>30</sup> Enda fakayén ké kéluhana tom muwa bé de déméruun, taloo no gésébéréh bé de séségiyo-giyo kébéréh énda gétigano, taloo no émfégésobut bé de ni do késébéréh. <sup>31</sup> Mélaw fatut ongoté kom dob Tulusey de kéfurungon toow fo balilaga.

Endob wén na foy toow de balilaga sani kégedawe.

## 13

### I kégedawe

<sup>1</sup> Fiyon fo ké gésébéréhu bé de séségiyo-giyo kébéréh i de étéw brab de télaki, éndob amuk énda mégédawu, énda i laga i kéfurung guwe non ségiléwu saén bé selekéne agung taloo no loo bé selekéne banting. <sup>2</sup> Atin fiyon fo ké furungo témoro bé kébéréh i Tuluse, brab gésobuto kuy de ménalém kébéréh tidéw dob Tuluse, brab fiyon fo ké toowu fo gétigan, brab toow fo émbagér i kéunur guwe inok géféaguwo kuy de tuduk, éndob amuk énda mégédawu, énda foy lanték gu. <sup>3</sup> Atin fiyon fo ké iray guy kéluhanay de languntama ku inok tabanga kuy de méskinan, brab iray guy lowoh guwe fétuwég gu bé de étéw, éndob amuk énda mégédawu, énda i baras gédoté ku.

<sup>4</sup> I étéwe mégédaw toow fo tingkéló noy de dumo no. I étéwe mégédaw rignoné noy fiyowe dob de dumo no. I étéwe mégédaw énda médaléwén bé de dumo no. I étéwe mégédaw énda félangka-langkaén taloo no fébantug-bantug. <sup>5</sup> I étéwe mégédaw énda lémigis-ligisén. I étéwe mégédaw énda arumé no. I étéwe mégédaw énda magadén mékérít. I étéwe mégédaw magad fésagad noy de dumo no. <sup>6</sup> I étéwe mégédaw énda méororén bé tete. Yamula méoror bé fiyowe brab métintuwe. <sup>7</sup> Atin i étéwe mégédaw tingkéló noy kékérasaya nuwe ké tete i de rignonéy de dumo no dob beene. Fédayaé no sa bero. I étéwe mégédaw, énda mékédan i késarig ne taloo noy inam ne bé fiyoy de rignonéy de dumo no étéw.

<sup>8</sup> I de kéfurung émbéréh bé kébéréh i Tuluse, mékédan moso. I de kéfurung sébéréh

bé de séségiyo-giyo késébéréh énda gétiga no, mékédan so moso. I kégétigane, mékédan so moso. Endob i kégédawe énda mékédan no. <sup>9</sup> Non kulang sénay kéfuring tome émbéréh bé kébéréh i Tuluse brab de kégétiga tom. <sup>10</sup> Endob amuk gumah i gaiwe iray i Tuluse betom i tintuwe fiyo, mékédan i de éntingayén do kulang.

<sup>11</sup> Bé kéénga guwe séna émbéréhu loo bé ngae, brab i kégéitung guwe, nga so. Endob amun ménwaléyun métuwa, ménkédané i de adat gu loo bé ngae. <sup>12</sup> Ségiléw so bé betome. Béleewe ni, i kégétiga tome brab kégésobut tome bé Tuluse, kloh saén. Ségiléw bé anlungé téngténgé tom dob rébure féngalungon. Endob amuk gégumah moso i gaiwe gito tomén foy Jesu Kristowe, gésobuto tomén i kéluhanane, ségiléw bé kégégésobut i Tuluse de betom, békénéen maak anlung.

<sup>13</sup> Mélaw téléw i éntingayéne énda mékédan no: kéunur, inam, brab kégédaw. Endob i toowe de fo importante, been i kégédawe.

## 14

### *Iray i Rémogor i Tuluse*

<sup>1</sup> Mélaw fatut tom toow fo méuyot bé kégédawe bé de dumo tom. Atin fatut so méuyot tom bé de dumo do kéfuringon tidéw dob Tuluse. Labi-labi na foy murete bé kébéréh i Tuluse. <sup>2</sup> I étéwe sébéréh bé késébéréhe énda gétiga no, dob Tuluse saén sébéréh, békén dob étéw. Non énda gésobuto ro de. Béréhé no saén i de ménbunéy non fébéréh i Rémogor i Tuluse de. <sup>3</sup> Endob i étéwe muret bé kébéréh i Tuluse, ureté no dob de étéw inok tabanga no bero émféégét bé de kéunur ro brab féginauné no bero, brab émféfiyo bé de fédéw ro. <sup>4</sup> I étéwe sébéréh bé késébéréhe énda gétiga no, tabanga no saén i kaane lowoh. Endob i murete bé kébéréh i Tuluse, tabanga noy kéluhanay de munur mégélingo.

<sup>5</sup> Méuyotu de damén ké gésébéréh gom kéluhanan bé de késébéréh énda gétiga kom de, éndob toowu de na fo méuyot ké ureté kom i kébéréh i Tuluse. Toow na fo gérotor i étéwe ureté noy kébéréh i Tuluse bé étéwe sébéréh bé késébéréhe énda gétiga no, saliyo ké béréhé noy atag i béréh ne inok géféfiyono noy fédéw i de dumo no munur. <sup>6</sup> Mélaw do dumo gu, amuk gégumahu diyaan atin sébéréhu bé késébéréhe énda gétiga tom de, énda gétabanga ku begom. Toow na fiyo ké ureté ku begom i fénggitoy Tuluse begén, taloo no béréhé ku begom i de gétiga ku, taloo no ureté ku begom i kébéréh i Tuluse, taloo no toroé ku begom. Non amuk rignoné kuy de ni, tabanga ku begom.

<sup>7</sup> Ufama, fégitung gom i de baat. I faléndage taloo no fégérung, amuk i ségétéwe étéw énda gétiga noy kéiyuf ne bé faléndage taloo no

énda gétiga noy kékébit ne bé fégérung, ati fanu-fanuy kégétigay de mégélingo de ké atiy linggégé nuwe. <sup>8</sup> Atin amuk wén i sundalo iyufé noy témburiwe inok mangéy sétiboh i de dumo no, éndob énda fékéntayé noy kéiyuf ne bé témburiwe, ati fanu-fanuy kégésobut ruwe de ké fatut ro magayas mangéy sétiboh. <sup>9</sup> Ségiléw so bé begome, amuk sébéréh gom bé késébéréhe énda gétiga kom de, énda mon i gésobut de. Mélaw énda i atagén brab énda i lagaén. <sup>10</sup> Médooy de séségiyo-giyo do késébéréh dob duniyae ni, éndob wén i atag i séngae késébéréh. <sup>11</sup> Endob amuk énda gésobuto kuy késébéréh i dumo guwe séuret-uret, énda fo gésésobutan gey. <sup>12</sup> Atin i begome, toow fo méuyot gom de ké gégédot gom bé de kéfuring tidéw dob Rémogor i Tuluse. Endob fatut télama gom usar i de kéfuring émfébagér bé kéunur i de dumo gom.

<sup>13</sup> Mélaw i étéwe furung sébéréh bé késébéréhe énda gétiga no, fatut démasal dob Tuluse mongot kégétigan émféégésobut bé atag i késébéréh ne dob de dumo no. <sup>14</sup> Non amuk fédasaléy Rémogor i Tuluse begén dob késébéréhe énda gétiga ku de, moror i rémogor guwe fiyon fo ké énda gésobutoy itunga kuwe de ké atiy atag ne. <sup>15</sup> Ati mélaw i fiyowe rignoné ku? Fatut fédayaé kuy Rémogor i Tuluse émfédasal begén dob rémogor guwe. Endob usaré ku soy itunga kuwe ké démasalu. Fatut fédayaé kuy Rémogor i Tuluse émfékanta begén dob rémogor guwe, éndob fatutu so kémanta dob itunga kuwe. <sup>16</sup> Amuk i ségétéwe étéw dayéwé noy Tuluse bé rémogor ne saén, i de étéw énda gétiga roy fantage bé ni kéfuring, énda fo gésobuto ro de. Mélaw énda géséfagayun ro maro, “Amen” non énda gésobuto ro de. <sup>17</sup> Fiyon fo ké fiyoy kékésalamat ne dob Tuluse, énda géfébagéro noy kéunur i de dumo no.

<sup>18</sup> Fésalamatu dob Tuluse, non toow na fo gésébéréhu bé késébéréhe énda gésobuto ku de bé begome kéluhanan. <sup>19</sup> Endob amuk sélimudu bé de dumo gu munur bé Kristowe inok méngintulus, toow na fo méuyotu sébéréh bé késébéréhe gésobutoy kéluhanane fiyon sétaga saén bé médoowe kébéréh énda gésobuto ro de. Mélaw gétoroo kuy de étéw.

<sup>20</sup> Do dumo gu, kagom miring bé kégéitung i de nga. Endob iring gom i kégéitung i de nga fantag bé tetee non énda gétiga roy tetee. Saliyo na bé nan, iring gom i kégéitung i étéwe gétigan. <sup>21</sup> Wén i Ménsulate Kébéréh i Tuluse mano, “Sugué ku mangéy dob de Judioy de étéw ségiyoy de késébéréh ro tidéw dob ségiyowe ingéd. Endob fiyon fo ké mérigoy ni, énda so fégélingoé ro Begén, bang i Kadnane.” <sup>22</sup> Mélaw i kéfuringe sébéréh bé késébéréhe énda gétiga no, niray i Tuluse inok i de énda munur gélolo ro tidéw dob Tuluse. Endob i kéfuringe muret

bé kébéréh i Tuluse, niray i Tuluse inok émfébagér i kéunur i de munur.

<sup>23</sup> Mélaw amuk sélimud gom do munur, atin sébéréh gom bé késébéréhe énda gétiga kom de, atin gégumah i étéwe énda munurén taloo no énda gétiga noy fantage bé ni kéfurung niray i Tuluse, manok bunég gom. <sup>24-25</sup> Endob amuk kéluhana kom muret bé kébéréh i Tuluse, atin i étéwe énda séna munurén bé Jesuse ménangéy témukaw begom, gésobuto noy késébéréh gome. Mélaw waléy gétiga noy de salaén, atin gésénule. Mélaw lémingkuwéd méngadaf bé Tuluse brab émbéréh mano, “Tulus i tintuwe mémanduon begom.”

<sup>26</sup> Mélaw do dumo gu, amuk sélimud gom méngadaf, fiyo ké wén i kémanta, brab wén soy témoro, brab wén soy muret bé atiy fénggitoy Tuluse de. Atin fatut wén soy émbéréh dob séségiyo-giyowe késébéréh énda gétiga no, brab fatut wén soy émfégsobut bé ni késébéréh. Rigo gom i kéluhanay de ni émfébagér bé kéunur i de dumo gom. <sup>27</sup> Atin amuk wén i gétigan sébéréh bé késébéréhe énda gétiga no, fatut ruwo loo ké téléw saén i rémigowe de. Atin fatut sétélés-télés ro émbéréh. Atin fatut wén soy émfégsobut bé kébéréh ruwe. <sup>28</sup> Endob amuk énda i émfégsobut de, fatut mantés ro kéluhanan atin sébéréh ro séden bé Tuluse dob de fédéw ro. <sup>29</sup> Atin fakay émbéréh i ruwowe taloo no téléw gétéw étéw muret bé kébéréh i Tuluse. Brab i kéluhanay étéwe fatut fégléngóé ro fo toow inok gétiga ro ké katabuwan i kétoro ruwe taloo no békén. <sup>30</sup> Atin amuk wén i ségétéw bé de ménsar mégélingo, wén i fénggitoy Tuluse de, fatut témérén i émbéréhe inok gébéréh i ni étéw. <sup>31</sup> Fakay kéluhana kom muret bé kébéréh i Tuluse, éndob sétélés-télés gom muret, inok métoro brab émféfiyoy fédéw i kéluhanane. <sup>32</sup> I kéluhanay de étéw nirayay Tuluse kégétigan muret bé kébéréh ne, fatut séongot-ongot brab sétélés-télés ro muret. <sup>33</sup> Non mika i Tuluse ké mégukét i késélimud gome, yamula méuyot bé mélosoe.

Atin wén soy ni sugu gu begom, sani ségiléwe bé rigonéy de munur dob kéluhanay de ingéd. <sup>34</sup> I de libun fatut féantés ro ké gai sélimud ro méngadaf, non énda fatutén ké émbéréh ro. Non dob kitab i de Judio, i libune fatut saén mégélingo brab séodor-odor saén. Enda fakay ro méguléw. <sup>35</sup> Atin amuk méuyot ro méganad, fatut ménginsa ro dob de bawag ro dob de lawi ro, non mékémala ké émbéréh i de libun ké sélimud gom dob simbaane.

<sup>36</sup> Kagom fégitungén de ké tidéw saén dob begomey kébéréh i Tuluse, taloo no makom ké begom saén i nirayan de. Toow fo békén i nan. <sup>37</sup> Amuk wén i ségétéw begom manok niray i Tulusey kébéréh ne, look wén i kéfurungé tidéw dob Rémogor i Tuluse, fatut

magayun bé do sugu i Tulusey de ni kétoro sulaté ku dob begome. <sup>38</sup> Atin amuk wén i étéw énda modorén bé ni sulat, kagom fégléngóén de.

<sup>39</sup> Mélaw do dumo gu, fatut méuyot gom muret bé kébéréh i Tuluse. Endob kagom fétérenén i étéwe émbéréh dob késébéréhe énda gésobuto no de. <sup>40</sup> Endob fatut féfiyo gom i de adat gom brab fétanéé gom ké sélimud gom méngintulus.

## 15

### *Fantag bé kétébule Kristowe*

<sup>1</sup> Atin béleewe, do dumo gu, féfégétédém gu begom i Fiyowe Uret nuret gun begom bé do getah. Bé béno tintu ménunur gom bé ni Fiyow Uret fantag bé Jesu Kristowe taman so béleewe ni. <sup>2</sup> Non i Fiyowe Uret nuret gu dob begome, been i mémukase begom tidéw dob de sala gom. Non énda kukuméy Tuluse begom amuk démayday gom munur. Non amuk énda fédayday gom, békén gom tintu munur.

<sup>3</sup> Atin i Fiyowe ni Uret, ténoro gu begom i ténoro begén. Toow fo gérotor i ni kétoro. I Kristowe ménléhu génantino no betom inok énda mékukum tom sabaf bé de sala tom. Been soy kéuret i Ménsulate Kébéréh i Tuluse. <sup>4</sup> Atin lénébéng i Kristowe brab méntébule dob gétéléw ne gétérésang loo bé kéuret i Ménsulate Kébéréh i Tuluse. <sup>5</sup> Tidéw béno, méntéfégito dob Pedrowe. Tidéw béno, méntéfégito dob kéluhanay de folo bra ruwo kuyugén. <sup>6</sup> Tidéw béno, méntéfégito dob labiwe limo ratuh do dumo tom munur amun ménlimud ro. I kédoono ruwe méuyag ro séna béleewe ni, éndob i de dumo bero ménléhu ron. <sup>7</sup> Tidéw béno, méntéfégito dob Santiagowe. Tidéw béno dob kéluhanay de apostol.

<sup>8</sup> Atin amun gilid méntéfégito dob berowe, méntéfégito so dob begéne énggéfuray. Atin ménunuru maak ségétéwu nga ménfégés i kéumah ne. Non fiyon fo ké mikau de munur, fénuur i Tuluse so begén. <sup>9</sup> Atin begéne foy toowe gérifantad bé kéluhanay de apostol, non amun énda séna munuru de, toow fo fénrasy guy kéluhanay de munur bé Jesuse. Mélaw énda médaitu fédawétén apostol. <sup>10</sup> Endob sabaf saén bé kégedaw i Tuluse, fénwaléyén begén apostol. Atin non bé kégedaw ne, wén i fiyowe ménrigo. Non toow na mégéror i kagéne galbék bé de dumo do apostol. Endob békén begén i gémbéke. Yamula tabangay Tuluse de begén. <sup>11</sup> Atin ulanden ké énggélíngoo kom i Fiyowe Uret tidéw dob begéne look tidéw dob de dumo gu apostol. Non ségiléw i de kétoro gey. Atin been i nan i nunuro kome.

### *Fantag bé kétébule i de munur*

<sup>12</sup> Atin ay niy ténoro guwe begom: Méntébule i Jesu Kristowe. Mélaw sedek i de dumo begom émbéréh bé énda kun fakayén tébule i de ménléhu moso? <sup>13</sup> Non amuk énda fakay tébule i de ménléhu, fiyon i Kristowe énda séna méntébuleén. <sup>14</sup> Atin amuk énda méntébule i Kristowe, énda foy lanték i kétoro geye brab énda i funa tom munur. <sup>15</sup> Atin békén saén i ni, non amuk loo bé nan i begeye, do tugién gey sébanil bé Tuluse. Non begey i ménbéréhe bé féntébule i Tulusey Kristowe. Mélaw tugién gey amuk énda tébule i de ménléhu, loo soy Kristowe. <sup>16</sup> Non amuk énda tébule i de ménléhu, énda so tébule i Kristowe. <sup>17</sup> Atin amuk énda méntébule i Kristowe, énda i lanték i kéunur gome. Mélaw énda séna mékédan i de sala gom brab mékukum gom. <sup>18</sup> Atin amuk énda i kétébule, i de ménléhu do munur bé Kristowe, énda man méuyag ro, yamula mékukum ro so. <sup>19</sup> Atin amuk i inam tome bé Kristowe taman saén dob kéléhu tome, toow tom fo mékégedaw-gédaw bé kéluhanay étéwe.

<sup>20</sup> Endob i toowe, méntébule i Kristowe. Mélaw gétiga tom tébule soy kéluhanay de ménléhu. Non Beeney sunguwe saén méntébule. <sup>21</sup> I funay kéluhanay étéwe méléhu non ménsala i sunguwe étéw, sani Adame. Atin i funay kéluhanay étéwe tébule, non bé réniyog ségétéwe sani Jesuse. <sup>22</sup> I kéluhanay kéilawane méléhu non énggédot tom i kéléhue tidéw dob katufua tome Adam. Atin ségiléw so bé ni, i kéluhanay munure bé Kristowe tébule, non énggédot roy umule énda i tamana no tidéw dob Beene. <sup>23</sup> I sunguwe méntébule inok méuyag taman sa taman, Been i Jesu Kristowe. Tidéw béno, do betom kuyugén i gétunduge tébule dob gaiwe séfule moso. <sup>24</sup> Tidéw béno dob tamfaday de gai, i Kristowe tabana noy kéluhanay de méguléw do sébanil dob Tuluse. Binasané noy atura ruwe brab barakat ruwe. Atin irayén i kéléfuguléw dob Tuluse Abayén. <sup>25</sup> Non i Kristowe kailanga noy méguléw taman tabanay Tulusey kéluhanay de sébanil de. <sup>26</sup> Atin i toowe fo géfuray tabana Jesuse sébanil dey kéléhue. <sup>27-28</sup> Non wén i Ménsulate Kébéréh i Tuluse mano, "I Tuluse rignon noy Kristowe méguléw bé kéluhanane." Mélaw féguléwo Kristowey kéluhanane saliyo saén bé Tuluse, non Been i ménféguléwe bé Kristowe. Atin amuk Kristoy méguléwe bé kéluhanane, tidéw béno féféguléwén bé Abay ne Tuluse i Beene. Mélaw Kristowey méguléwe bé kéluhanane, brab Tulusey méguléwe bé Kristowe brab kéluhanane so.

<sup>29</sup> Amuk énda i kétébule i de ménléhu, ati funay de étéw fébautis gémani bé de ménléhu? <sup>30</sup> Atin amuk énda i kétébule, sedek fédayday gey rémigo bé galbék i Tuluse béni

ké kakaidan gey sénga tékélid? <sup>31</sup> Do dumo gu, i de sébanil bé Tuluse, sénga fuweh i kéuyot ruwe méméléhu begén. Atin gétigay Tuluse toow i ni loo bé kétoow i kéror guwe sabaf bé kéunur gome bé Kadna tome Jesu Kristo. <sup>32</sup> Toowu fo kérégénan dob ni ingéd, Efeso. Non i de sébanil begén maak do mérayar binatang méuyot ro begén méméléhu. Mélaw amuk énda i kétébule, énda i funa ku gémalbék. Amuk énda i kétébule, modoru bé kébéréhe mano, "Mama tom, brab miném tom brab méguwaya tom béleewe ni, non démo méléhu tom."

<sup>33</sup> Ingat gom inok énda munur gom bé éndae toow. Non amuk séloyuk gom bé de étéw do tete i de adat ro, waléy gom de géiring. <sup>34</sup> Féfiyom i de adat gom, brab tagak gom i de tete rignon kom. Fatut mémala gom non wén i do dumo gom énda gétiga roy toowe kétoro fantag bé Tuluse.

<sup>35</sup> Endob amuk wén i ménginsa mano, "Ati kéfingé-fingé i kétébule i Tuluse bé de ménléhu? Brab ati falas i lowoh ruwe?" <sup>36</sup> Ay niy késumbul guwe de. Toow fo dufang i da nan kéfénginsa. Non i bénee lébéngén dob fantade ké ohokén. Tidéw béno, méuyag. <sup>37</sup> Amuk mohok gom, énda ohoké kom i dakéle idéng kayéw, yamula ohoké kom i bénee saén. <sup>38</sup> Tulusey méniraye bé lowoh i bénee loo bé kétaya nuwe de. Atin i séngae klase béne wén i kaan mantu lowoh ké mérúkén.

<sup>39</sup> I kéluhanay de lénimbag do mérénawa, séségiyo-giyoy de lowoh ro. I kéilawane ségiyoy lowoh ne. I de binatang ségiyo soy de karo lowoh. I de kloh manok brab do sédo ségiyo soy de lowoh ro.

<sup>40</sup> Wén i do séségiyo-giyoy do lowoh dob lawayo brab dob fantade. Atin i kéluhanay de lénimbag i Tuluse, falan fiyoy de falas ro. Endob énda ségiléw i kéfiyoy de lowoh dob lawayo brab de lowoh dob fantade. <sup>41</sup> Ufama, fiyoy falas i de solo dob lawayo éndob békén ségiléw. I térésang ségiyoy falas ne, i térésang kélungonone ségiyo soy kaane falas, i de gitoon ségiyo so. Fiyon i de gitoon énda kéluhana ro ségiléw i de falas ro.

<sup>42</sup> Ségiléw so bé niy kétébule i de ménléhu. Non amuk ménlébéngén i ménléhue, mébinasay lowoh ne. Endob amuk méntébuleén, éndaén mébinasay lowoh ne non mantu nén brab méuyag taman sa taman. <sup>43</sup> Amuk ménlébéngén i bangkaye, teteén i falas ne brab éndaén i bagérén. Endob amuk méntébuleén, toowén fo fiyoy falas ne brab émbagéren. <sup>44</sup> I bangkaye lénébéng, tidéw dob fantade ni. Endob féwaléyey Tuluse mantuy lowoh ne inok médait ro méuyag beroy Tuluse taman sa taman. Mélaw amuk wén i lowoh médait dob duniyae ni, wén soy lowoh médait dob lawayo. <sup>45</sup> Non wén i Ménsulate Kébéréh i

Tuluse mano, "I sunguwe étéw, sani Adame, nirayay Tuluse férénawa inok méuyag dob duniyae ni." Endob i Kristowe, sani féndawéte "Géruwowe Adam", Been i mirayae bé umule magufusa inok méuyag tom taman sa taman dob lawayo. <sup>46</sup> Békén i umule dob lawayoy énggéétahe, non énggéétahe i umule dob duniyae ni. <sup>47</sup> I Adame, sani sunguwe étéw, ménlimbag bé fantad i duniyae ni. Endob i Kristowe, sani maake géruwo Adam, tidéw dob lawayo. <sup>48</sup> I kéluhanay kéilawane, ségiléw i lowoh ruwe bé Adame tidéw dob fantade. Endob i kéluhanay waléye kuyug Kristowe, ségiléw moso i lowoh ruwe bé Kristowe dob lawayo. <sup>49</sup> Amuk kéluhana tom ségiléw bé Adame tidéw dob duniyae, gégumah so moso i gaiwe waléy tom so ségiléw falas bé Kristowe tidéw dob lawayo.

<sup>50</sup> Do dumo gu, ay niy atag i béréhé kuwe begom. I de lowoh tom ni méléhu non énda géahuréén dob lawayo. I loowe bé ni lowoh, énda gédoté noy umule magufusa.

<sup>51</sup> Féngélingo gom i ni ménbunéy fénggétigay Tuluse begén. Enda kéluhana tom méléhu, éndob méfégalin i de lowoh tom bé de mantu lowoh. <sup>52</sup> Toow fo magad i kéfégalin nuwe, loo bé ségulee kémérék-mérék i motowe, ké émbéréh i toowe géfuray témburi. Atin modor so ké fébéhé i Tulusey ni témburi, i kéluhanay de ménléhu tébule ro. Atin i de lowoh ro émfégalin inok éndaén méléhu ro, non méluwas tom kéluhanan. <sup>53</sup> Non i tafaye lowoh fatut méluwas inok éndaén méléhuén. Fatut émfégalin i mébinasawe lowoh inok éndaén mébinasa no. <sup>54</sup> Atin amuk ménfégalinonén i tafaye lowoh bé mantuwe lowoh éndaén méléhuén, bé béno métumanén i Ménsulate Kébéhé i Tuluse mano, "Endaén i méléhu non kénday Tuluse nén non ténaba nonén." <sup>55</sup> Mélaw éndaén mégilak tom méléhu non éndaén i kéléhu. Atin éndaén i funan émbuku bé kéléhue non méntabanén. <sup>56</sup> I funa nuwe wén i kéléhu non ménsala tom. Atin i funa nuwe ménsala tom non énggéféliso tom i kukumay Tuluse. <sup>57</sup> Endob fésalamat tom bé Tuluse non bé rénigo nuwe. Non éndaén mégilak tom bé kéléhue non fénukasén betom sabaf bé rénigoy Kadna tome Jesu Kristo.

<sup>58</sup> Mélaw, do dumo gu do kégédawa ku, fébagér gom i késarig gome bé Kadnane inok énda mékédano. Fégérór gom dob galbék i Kadnane. Non gétiga tom énda mésinggula i galbék tome, amuk rignoné tom kay Kadnane.

## 16

*I tabange kay de munur dob Jerusalem*

<sup>1</sup> Atin wén i ségiyowe sugu gu begom. Fatut timu gom kurta fégétabang gom bé de dumo gom munur bé Jesuse dob Judea. Sénuhu gu soy ni dob de munur dob ingéde

Galasia. <sup>2</sup> Sénga Duminggu, fatut témafay i séngae ségétéw begom bé atiy iray ne dob Tuluse. Fatut iray gom dob Tulusey baade gédoté kom. Itong gom inok amuk gégumahu diyaan, éndaén kailanga kom i témimue. <sup>3</sup> Atin amuk gégumahu diyaan, sugué kuy de étéw fénémili gom mangéy dob Jerusalem inok uwité roy de iray gom. Atin émféuwitu so do sulat émfégétigan bé de étéw dob Jerusalem fantag bé kétabang gome. <sup>4</sup> Atin amuk kailanga ku soy magéwe mangéy dob Jerusalem, féodoré ku bero.

### *I bantak Pablowe*

<sup>5</sup> Mangéyu diyaan ké gilidu nén téménara dob ingéde Masedonia. Non métahu mangéy diyo. <sup>6</sup> Atin amuk gumahu dob begome, batiu na keey diyaan firoy gétérésang kélungonon look taman gilid i basa barate. Atin amuk tausu magéw, fiyo ké tabanga kom begén bé kéagéw guwe dob atiy ayo kuwe. <sup>7</sup> Non énda méuyotu mawét diyaan ké magadu de saén. Yamula méuyotu de damén ké batiu na diyaan bé firoye gétérésang kélungonon, amuk fakay dob Kadnane.

<sup>8</sup> Endob batiu na dob Efesowe ni taman gilid i kandulie féndawét Pentekostes. <sup>9</sup> Non dini médooy de méuyot mégélingo bé Fiyowe Uret toroé ku. Endob médooy soy sébanile de begén.

<sup>10</sup> Atin i Timoteowe, amuk gégumah diyaan, fégedaw gom de brab tayakuf gom. Non gémalbék so kay Kadnane, ségiléw bé begéne. <sup>11</sup> Atin énda fatutén ké siyawé kom. Yamula fégadata kom atin amuk taus i kéagéw ne séfule mangéy dob begéne, fatut tabanga kom. Non ongot-ongoté ku beroy de dumo no munur.

<sup>12</sup> Atin fantag man bé dumo tome Apolos, féngginau gu fo bé angéyé no begom tukawén diyaan beroy de dumo no munur. Endob mika séna mangéy diyaan béleewe. Yamula mangéy fo kun diyaan ségiyo gai.

<sup>13</sup> Fatut mingat gom, brab fédayday gom i kéunur gome bé Jesuse. Kagom mémala fantag bé kéunur gome. Yamula fébaraw gom brab fébagér gom. <sup>14</sup> Atin fiyon atiy rignoné kome, fégedaw gom.

<sup>15</sup> Gétiga kom i fantage bé Stefanase brab de dumo no ségélawi. Beroy de sungu ménunur bé Kristowe dob Akaya. Toow ro fo mégérór témabang bé de dumo ro munur. <sup>16</sup> Mélaw, méuyotu ké fédaya gom i kéfégüléw i de étéw loo bé beene brab kéluhanay étéwe mamung bé karowe galbék.

<sup>17</sup> Toow fo mororu bé kégumah ro Stefanase, brab Fortunatowe brab Akaikowe dini. Non ténabang ro begén bé kégundoy guwe begom. <sup>18</sup> Féniyo roy fédéw guwe loo bé kéféfiyo ruwe bé de kagom so fédéw. Mélaw fatut fégadata kom i de étéw loo bé nan.



<sup>19</sup> I de munur dob kéluhanay de ingéd dob Asia ségifaé ro begom kéluhanan. I ro Ak-ilawe brab Prisilawe, toow ro fo ségifaén so begom sabaf bé Kadnane. Loo soy de munur sélimud dob lawi ruwe, ségifaé ro so begom. <sup>20</sup> Atin i kéluhanay de dumo tom munur dini, ségifaé ro so begom.

Fatut fégito gom i kégédaw gome amuk ségifaén gom.

<sup>21</sup> Taman saén dob niy béréhé kuwe begom. I begéne, Pablo, sulaté kuy ni géfuray kébéreh bé kagéne kémér. Ségifaé ku so begom.

<sup>22</sup> Amuk wén i do énda émféimu bé Kadnane, kukuméy Tuluse damén bero. Séfuleén damén i Kadnane. (Maranata.)

<sup>23</sup> Atin fétauséy Kadnane Jesus damén i kégédaw ne begom.

<sup>24</sup> Toowu fo méimu begom sabaf bé kéunur tome bé Jesu Kristowe.

*Pablo*

## I GÉRUWOWE SULAT PABLOWE DOB DE MUNUR BÉ KRISTOWE DOB KORINTO

Ay niy sébaane bé de sénulat Pablo, sani ménbantuge muret fantag bé Jesu Kristowe. I ni sulat, been i niy géruwowe sulat sénulat Pablowe dob de munur do bati dob ingéde Korinto. Dob sunguwe sulat Pablowe, ténoeroén i de étéw bé ati fatute rigoné ro. Atin dob ni géruwo sulatén, bénréh Pablowey kéoror ne sabaf bé kéodor ruwe bé ni kétoro.

Diyo dob Korinto, wén i do étéw ménbéréh bé békén kun tintu apostol i Pablowe. Mélaw dob ni so sulat, bénréh Pablowey funa nuwe toow fo tintu apostol, non toow fo mégoror lémégeb bé Fiyowe Uret fantag bé Jesu Kristowe. Mégoror gémalbék, fiyon fo ké toow fo mérasay sabaf bé kéuret ne ni.

<sup>1</sup> Begéney Pablowe, ségétéw apostol sénugu Jesu Kristowe non been i galbéke kétayay Tuluse rigoné ku. I begeye Timoteowe, ségétéw so dumo gu munur bé Jesuse, sulata key begom do munur dob ingéde Korinto brab dob kéluhanay de ingédob Akaya.

<sup>2</sup> I Tuluse Abay tom brab Kadnane Jesu Kristo mégédaw damén begom brab iray ro damén begom i métanéke fédéw.

### *Fésalamat dob Tuluse*

<sup>3</sup> Fatut tom fésalamat bé Tuluse sani Abay i Kadna tome Jesu Kristo. Toow fo mégédaw i Abaye Tulus, atin Been i tidéwoy kéluhanay tabange. <sup>4</sup> Tabanga no betom dob kéluhanay de kérégéné tom inok gétabanga tom soy de dumo tom amuk kérégénéan ro fiyon ati klasi nuwe. Iraya tom so bero tabang loo bé tabange niray i Tuluse betom. <sup>5</sup> Non amuk toow fo mérasay tom loo bé Kristowe sabaf bé kéunur tome de, gédoté tom soy tintuwe kétabang tidéw dob beene. <sup>6</sup> I funa keye téférasay inok gédoté kom i tabange brab inok méfukas gom bé de sala gom. Atin amuk métabangan gey, métabangan gom so brab gédoté kom i bagére inok gérédayday gom témingkél bé de kérégénéan ségiléw bé begeye. <sup>7</sup> Atin i késarig geye begom, méégét non gétiga key amuk mérasay gom ségiléw bé begeye sabaf bé kéunur gome bé Kristowe, tabangay Tuluse so begom ségiléw bé kétabang ne begey.

<sup>8</sup> Do dumo gey, méuyot gey de ké gétiga kom i fantage bé kérasay geye dob ingéde Asia. I de étéw diyo, toow fo fénrasay ro begey, atin mélaw makey ké éndaén méuyag gey. <sup>9</sup> Makey ké méléhu geyén bé béno. Endob ménrigoy ni inok énda sémarig gey bé kageye lowoh, yamula fatut sarigo key

saén i Tuluse sani témébulee bé de ménléhu. <sup>10</sup> Ténabangén begey dob de makakaid inok énda méléhu gey sabaf bé de makakaid. Atin gétiga key tabangé no begey sénga tékélid. Sémarig gey bé énda téréno noy kétabang ne begey. <sup>11</sup> Atin fatut tabanga kom begey bé de kédasal gom, inok médooy étéwe fésalamat dob Tuluse non bé tabange nirayén begey sabaf bé kédasal i de médooy étéw.

<sup>12</sup> Do dumo gey, wén i funa key fédayéw-dayéw, brab gétiga key toow fo toow i ni. Fiyoy de rénigo gey dob begome brab dob kéluhanay de étéw, non modor gey bé kétayay Tuluse. Atin tabangay Tuluse begey inok béréhé key i fiyowe brab toowe, békén dob kageye kégétigan éndob sabaf saén bé kégedaw i Tuluse. <sup>13-14</sup> Sulata key begom bé gébasana kome brab gésobuto kom. Méuyotu de damén ké gésobuto komén fo toow i de énda séna énggésobuto kom toow béleewe ni inok bé gaiwe séfule i Kadnane Jesus, moror gom sabaf bé begeye atin i begeye moror gey so sabaf bé begome.

<sup>15-16</sup> Atin non gétiga ku fo toow gésobuto kom i ni, bénantak guy mangéye sémuğub dob begome sungu bé do gétaḥ bé kéangéy guwe dob ingéde Masedonia. Atin bénantak gu soy mawéte man ké séfuleu inok gétabanga ku begom ruwo gule, brab gétabanga kom so begén bé kéagéw guwe mangéy Judea. <sup>17</sup> Endob énda énggérigono kuy ni. Mélaw makom keeyén ké méfégalin i itunga kuwe sénga tékélid. Brab makom keeyén ké ségiléw i kéfégarigon guwe bé de étéw dob duniyae ni énda sarigon ro non magad fo fégaliné roy de itunga ro. Békén loo bé nan. <sup>18</sup> Béréhé ku begom i toowe, ségiléw bé kétoow i Tuluse, tintu fo bénantak guy rigoné kuy fénasad guwe begom. <sup>19</sup> Non témélamawu miring bé Jesu Kristowe Nga i Tuluse, sani ureté keye begom ro Silase brab Timoteowe. Non i Jesuse énda magad fégaliné noy itunga nuwe. Yamula tumané noy kéluhanay de béréhé no. <sup>20</sup> Non i Jesusey téménumane bé kéluhanay fénasad i Tuluse. Been i niy funa tome émbéréh “Amen” (i atag ne “toow”) fantag bé kébéreh i Tuluse inok médayéw i Tuluse. <sup>21</sup> I Tuluse, Beeney émféégéte bé kéunur tome bé Kristowe inok tintu tom do dumo no. Atin Tulus soy ménémilie betom. <sup>22</sup> Brab ténandaa no begey inok gélolon Beeney gefee begey. Atin nirayén betom i Rémogor ne bati dob de fédéw tom inok fégétiga no betom i irayén i kéluhanay fénasad ne.

<sup>23</sup> Amuk énda toow i béréhé kuwe begom, kukuméy Tuluse damén begén. Gétiga roy funa kuwe énda ménangéy diyaan dob Korinto inok énda gédowoyo ku begom. <sup>24</sup> Enda méuyot gey sémuğu begom ké ati fatute unuro kom. Non gétiga key méégétén i kéunur gome bé Kristowe. Yamula sétabang tom gémalbék inok toow gom na fo moror.

## 2

<sup>1</sup> Atin do dumo gu, toow fo fénggitung gu bé énda mangéyu diyaan amuk féteteé ku saén i de fédéw gom ségiléw bé gétaho. <sup>2</sup> Non amuk féteteé kuy de fédéw gom, ati émféfiyowe bé kagéne fédéw? Enda, non énda géféfiyono kom i fédéw guwe amuk fétete gu de fédéw gom. <sup>3</sup> Beeniy funa kuwe séménulat dob begome bé do gétah. Ménikau mangéy dob begome, non i begome fatut damén féororé kom begén. Endob amuk ménangéyu diyaan bé béno, fétete gom saén i fédéw guwe. Gétiga ku fo toow, amuk mororu, moror gom so. <sup>4</sup> Amun sénulata ku begom, toow fo tete i fédéw guwe brab émbukuu brab énggékérewu. I funa kuwe sémulat békén ké féteteé kuy de fédéw gom. Yamula inok févétiga ku begom i toowe kéimu gu begom kéluhanan.

### *Kéfésad bé sévétéwe ménsala*

<sup>5</sup> I étéwa nan ménsala diyaan, énda féteteén i fédéw guwe, yamula féteteén i de fédéw gom, taloo no de fédéw i de dumo saén begom. Non énda méuyotu de ké fékélébuwanén i kédusawe de bé ni kébéreh gu. <sup>6</sup> Katabuwanén i kékukum i kédoono kome de. <sup>7</sup> Atin béleewe ni, fatut fésad gomén brab féfiyo gom i fédéw ne, non amuk énda, mékédan keeyén i késarig ne bé Tuluse sabaf bé kélébuwan i kététe i fédéw ne. <sup>8</sup> Mélaw, ongoté ku begom bé févétiga kom dey toow i kéimu gome de. <sup>9</sup> I funa kuwe séménulat dob begome bé gétaho inok téngkadé ku begom brab inok vétiga ku ké modor gom bé kéluhanay de sugué ku begom. <sup>10</sup> Atin amuk fésadé kom i sévétéwe étéw, fésadé ku so. Atin amuk wén i ménsala, fésadaga ku inok moror gom. Gétiga Kristowe tintu fo fésadé ku. <sup>11</sup> Atin i funa kuwe rémigo bé ni, inok énda lifulé Satanase betom. Non vétiga tomén i tete bantakén.

<sup>12</sup> Amun énggumahu dob ingéde Troas inok muretu bé Fiyowe Uret fantag bé Kristowe, énggito gu ténafay i Kadnaney agéwo kuwe bé galbék guwe diyo. <sup>13</sup> Gido loo, toow fo ménbukuu non énda énggito gu diyo i dumo tome munur Tito. Mélaw ménggétawu dob de étéw diyo, atin méntausu magéw mangéy dob ingéde Masedonia.

<sup>14</sup> Endob toowu fo fésalamat bé Tuluse. Non sabaf bé kéunur tome bé Kristowe, féténgténgén betom dob kéluhanay de étéw inok vétiga noy barakat ne. Mélaw sabaf bé betome, wén i de étéw dob kéluhanay de gonon vétiga roy fantage bé Kristowe. <sup>15</sup> Maak do dukah tom ténuwég Kristowe brab ténulakén dob adafay Tuluse. Atin i amut ne mélégeb dob de étéw do ménfukas brab dob de étéw so énda méfukas ro. <sup>16</sup> Dob

de étéw énda munur bé Kristowe, maak ahu ménléhu i kétoro tome fantag bé Fiyowe Uret, non mékukum ro sabaf bé nan kétoro. Endob dob de étéw munur dob Kristowe, maak mamut i kétoro tome non févétiga no bero bé iray i Tuluse beroy umule magufusa. Toow fo Fiyoy Urete ni. Mélaw énda i étéw tintu médait lémgégb de. <sup>17</sup> Endob i begeye, énda ségiléw gey bé de ségiyo do témoro. Non i berowe, ureté roy kébéreh i Tuluse inok gédoté roy kurtae. Endob sabaf Tulus i séménugue begey, vétiga no ureté key i toowe, non begey i do sugu-sugué Kristowe.

## 3

### *I mantuwe aguwon*

<sup>1</sup> Ati févétitung gome de, aw félangkangka geyén man fantag bé de ni? Enda. Enda ségiléw gey bé de ségiyo témoro kailanga ro nay sulate tidéw dob de ségiyo étéw émfégitto bé kuwagib ruwe témoro inok tayakufé kom bero. Atin kailanga ro soy sulate tidéw dob begome amuk mangéy ro témoro dob de ségiyo. <sup>2</sup> Endob i begeye, énda kailanga key i de sulat loo bé nan. Non i kéunur gomey maake sulat ménsulat dob de fédéw gey inok vétigay kéluhanay de étéw i fantage bé de kétoro gey. <sup>3</sup> Atin vétiga roy begom i de maak do sulat tidéw dob Kristowe, fénsamfayén dob begeye. Atin i fénggésulate de békén tinta, yamula Rémogor i méuyage Tulus i fénggésulate de. Atin i sultané de békén do batéw loo bé kitabe niray Moisesé, yamula i de fédéw gey i sultané de.

<sup>4</sup> I funa keye gébéreh loo bé ni non sémarig gey bé Tuluse, sabaf bé Kristowe. <sup>5</sup> Enda gébérehé key de ké kagey kévétigan i funa keye gériyo bé ni galbék. Non Tuluse saén i funa keye de gériyo. <sup>6</sup> Tulus i ménirayane begey kévétigan inok gétoroo key i mantuwe agéwon. Atin i mantuwe ni agéwon, békén nirayén begey i kitabe, yamula nirayén begey i Rémogor i Tuluse. Non amuk sémarig tom bé kéodoro tome bé kitabe niray Moisesé, méléhu tom. Endob amuk sémarig tom bé Rémogor i Tuluse, irayén i mantuwe umul magufusa dob betome.

<sup>7</sup> Bé do gétah, amun sénulat i Tulusey kitabe dob de batéw, fénggito noy barakat ne. Amun énggito Moisesey kéréndaw i Tuluse, réménéndaw soy kaane falas, funay de Judio énda géténgténg de, fiyon fo ké ménlumén i kéréndaw ne. Mélaw amuk loo bé nan i barakat i kégumah i kitabe muwit kéléhu, <sup>8</sup> toow na fo fiyoy rignoné Rémogor i Tuluse. <sup>9</sup> Amuk barakatan i galbéke kémukum bé de étéw, labi na fo dakél i barakat i galbéke émfétintu bé de étéw. <sup>10</sup> Mélaw i kitabe toow fo barakatan bé gétaho, éndob éndaén i barakaten béleewe

ni. Non béleewe ni, wén na foy toow barakatan tidéw bé beene. <sup>11</sup> Non amuk barakatan i kitabe wén i tamana no, labi na fo barakatan i mantuwe agéwon énda i tamana no.

<sup>12</sup> Atin sabaf bé ni késarig tom bé énda mékédan i ni, toow tom fo émaraw muret. <sup>13</sup> Enda ségiléw tom bé Moisesé ténlébéni i falas ne inok énda gitoy de Judioy kéélum i kéréndaw ne taman mékédan. <sup>14</sup> Endob toow fo métégas i de uléw i de Judio. Mélaw taman so béleewe ni méntéléb so tafay i de kégésobut ro. Météléb i de kégésobut ro amuk gébasana roy kitabe sani tafaye agéwon. Endob amuk wén i ségétéw bero waléy dumo Kristowe sabaf bé kéunur ne de, mékédanéni i kétéléb i itunga nuwe brab toow fo gésobuto no. <sup>15</sup> Taman so béleewe ni amuk basanéni roy kitabe tidéw bati i Rémogor i Tuluse dob beene, ménfukas dob kitabe, non éndaén kailanga no modor de inok ménfukas bé de salaén. <sup>18</sup> Mélaw i kéluhana tome do munur bé Kristowe, giton i anlung i kéréndaw i Kadnane dob falas tome, non énda méntéléb i de kéfégitung tom. Non giton i mantuwe adat tom miring bé Kristowe. Non i Rémogor i Tulusey mégaline betom loo bé kéfiyoy Kadnane. Mélaw minut fiyo miring bé Kadna tome Jesu Kristo.

#### 4

<sup>1</sup> I Tuluse mégédaw begey, atin mélaw fénémilién begey inok rigo né tom i ni galbék. Mélaw énda mékédan i kéoror geye bé galbék geye. <sup>2</sup> Dénigur gey i de tete brab de ménbunéy do rigo né toow fo do mékémala. Enda témuig gey brab énda fégaliné key i kébéréh i Tuluse. Yamula béréhé key i tintuwe fo toow inok i kéluhanay étéwe gétiga ro do méntintu gey, brab inok gétigay Tuluse so. <sup>3</sup> Non amuk ménbunéy i Fiyowe Uret ureté key, ménbunéy saén dob de étéw énda ménfukas ro dob de sala ro. <sup>4</sup> Enda munur ro non ténlébéni Satanasey kéfégitung ruwe. Been i féngadaféy de étéw dob duniyae ni. Télébé noy de kéfégitung ro inok énda gito roy kégéfékaya i Fiyowe Uret fantag bé kégérotor Kristowe, sani tintuwe anlung i Tuluse. <sup>5</sup> Non énda muret gey inok waléy gey émbantug. Yamula ureté key i Jesu Kristowe, Been i Kadnane, inok Been i waléy émbantug. Atin ureté key bé begeyey témabangane begom inok médayéw i Jesuse. <sup>6</sup> Amun lénimbag i Tulusey kéluhanay éntingayéne, ménbéréh mano, “Mékédan damén i délé mone brab waléy wén damén i gétékaya.” Been soy émfégéfékayae bé

de itunga tom inok gésobuto tom i kéfiyoy Tuluse fénténgténgén dob Jesu Kristowe.

<sup>7</sup> Endob i de betom, maak do binangga tom saén nahuron drantung inok giton i barakate dob de lowoh tom békén katom, yamula kay Tuluse. <sup>8</sup> Dé moyun gey mérasay éndob énda méntabanan gey. Wén i do no, énda gésobuto key de, éndob énda mékédan i kéunur geye de. <sup>9</sup> Médooy de sébanil begey, éndob énda tagakéy Tuluse begey. Wén i no fédayéto ro begey, éndob énda tagakéy Tuluse begey. Wén i no fédayéto ro begey, éndob énda mébinasa gey. <sup>10</sup> Ségiléw gey bé Jesuse non sénga tékélid médooy de méréaré begey, brab méuyot ro méméléhu begey. Mélaw giton i kéuyag Jesuse béleewe ni non Been i témabangane begey. <sup>11</sup> Amuk méuyag gey séna, dé moyun gey gédét damén méléhu sabaf bé kéuret geye fantag bé Jesuse. Mérigoy ni inok giton i Jesuse méuyag non tabanga no begey dé moyun. <sup>12</sup> I funa keye dé moyun kakaidan non bé kéuret geye fantag bé Jesuse. Endob ulandenén, non been i niy funa kome gégedot bé umule magufusa.

<sup>13</sup> Wén i Ménsulate Kébéréh i Tuluse mano, “Ménunuru de, mélaw béréhé ku.” Ségiléw so bé begeye, non munur gey de, mélaw béréhé key. <sup>14</sup> Non gétiga key i Tuluse sani téménébulee bé Kadnane Jesus, tébulee no so begey brab begome brab féangyéy no betom dob adafa nuwe dob lawayo. <sup>15</sup> Atin i funa keye téférasay inok gédoté kom i de kéfiyonon. Atin bé lala ne minut médooy gégedote bé kégédaw i Tuluse, waléy so médooy de fésalamat dob Tuluse inok toow fo médayéw.

<sup>16</sup> Been i niy funa keye énda mékédan i kéoror geye gémalbék. Non fiyon fo ké dé moyun gey waléy lukés brab minut mélubay i lowoh geye, fébagéréy Tulusey kéunur geye sénga fuweh. <sup>17</sup> Atin i de kérasay gey béleewe do kloh saén brab mékédan so moso. Atin sabaf bé de kéfédaw gey bé de ni kérégénéon, toow na fo médayéw gey dob lawayo diyo moso, brab énda téméréno Mélaw toow na fo dakél i ni moso bé de kérégénéon béleewe. <sup>18</sup> Non i de gulaané key békén i de éntingayén giton dob duniyae ni. Yamula toow gey fo méuyot bé de éntingayén do énda gito no. Non i de éntingayén giton dob duniyae ni, do méalfa ro moso. Endob i de énda séna giton, sani de éntingayén iray i Tuluse, énda mékédan ro.

#### 5

<sup>1</sup> Non gétiga key i ni. I de lowoh tom dob duniyae ni maak do lawi saén bation bé firoye gébélintuwa taman mékédanéni, san ké méléhu tomén. Endob i Tuluse rénigo no soy de lawi tom dob lawayo. Been i de mantu do lowoh tom méuyag taman sa

taman. <sup>2</sup> Atin non bé de kérégénéon béleewe, toow fo méuyot tom de ké gédoté tomén magayas i de mantu lowoh tom do lawayo. <sup>3</sup> Amuk gédoté tomén i mantuwe lowoh tom, éndaén mékédano. <sup>4</sup> Endob amuk bati tom séna dob de lowoh tom do duniyae ni, gédogés tom bé de kérégénéon. Gido loo, énda fo méuyot tom témagak bé tafaye lowoh tom. Yamula méuyot tom saén kémégal bé mantuwe lowoh inok i tafaye lowoh méumbayan bé mantuwe de éndaén méléhuén. <sup>5</sup> Tulus i téménafaye bé de ni inok mériigo dob betome moso. Brab nirayén betom i Rémogor ne maak tising tandaén bé kétuma nuwe bé kéluhanay de ni moso.

<sup>6</sup> Mélaw toow fo méégét i kéunur tome sénga tékélid. Gétiga tom amuk bati tom séna dob de tafay lowoh tom do duniyae ni, énda gébati tom sétifon bé Kadnane diyo dob lawayo. <sup>7</sup> Non dob de rigoéné tom béleewe ni, énda furay tom bé atiy gito tome, yamula furay tom bé atiy unuro tome. <sup>8</sup> Tintu fo émbagér i kéunur tome brab méuyot tom témagak bé de tafay lowoh tom inok mule tom bati sétifon bé Kadnane. <sup>9</sup> Gido loo, i toowe fo kétaya tom rigoéné tom i késuwata nuwe fiyon udenén gono tom, dini taloo no diyo dob lawayo. <sup>10</sup> Non i kéluhana tome kailangan fo mékukum dob adafa Kristowe. Atin i séngae ségétéw étéw gédoté noy ati fatute barasén look kékukume de sabaf bé de réniigo no, fiyo loo soy tetee dob duniyae ni.

### *Do dumoy Tuluse*

<sup>11</sup> Atin non gétiga key i kégilake bé kékukum i Kadnane, télamané key féunurén i de étéw. Gétigay Tulusey de fédéw gey brab méuyot gey de so ké gétiga kom soy de fédéw gey. <sup>12</sup> I funa kuwe sémulat bé de ni kébéreh gu, békén inok dayéwé kom begey. Yamula inok gétiga kom i fiyowe rigoéné key brab inok gétiga kom i séumbulone bé de étéw dayéwé ro saén i falas i étéwe, békén i adat ne. <sup>13</sup> Wén keey i do étéw mégitung marok do bunég gey. Endob i funa ruwe marok bunég gey non toow fo rigoéné key témantuy kétayay Tuluse. Endob gétiga kom énda bunég gey, non gétiga kom gémalbék gey inok tabanga key begom. <sup>14</sup> Toow fo mégédaw i Kristowe begey funa key mégéror gémalbék. Gétiga key ménléhu i ni ségétéw étéw inok méuyag i kéluhanay de étéw. Mélaw maak ménléhu i kéluhanane sabaf bé kégantino Kristowe bero. <sup>15</sup> Ménléhu gémánantino bé kéluhanay étéwe inok i de méuyag, éndaén rigoéné roy kétaya ruwe. Yamula rigoéné roy kétaya Kristowe, sani ménléhue brab méntébulee inok éndaén mékukum ro.

<sup>16</sup> Mélaw i kérégitung geye békén loo bé kérégitung i de étéw énda munur ro bé Kristowe. Endob bé do géta, i kérégitung geye loo saén bé kéilawane, funa key makey

ké kéilawan saén i Kristowe. <sup>17</sup> I étéwe waléy dumo Kristowe sabaf bé kéunur ne de, ménwaléy mantu étéw. I tafaye adatén méntagakén atin ménwaléyén mantuy adat ne. <sup>18</sup> Tulus i réménigowe bé de ni, non sabaf bé Kristowe, féwaléyén betom éndaén sébanil dob Beene. Non séloyukén begey. Atin fégalbéké no begey inok féunuré key i de étéw inok waléy so séloyuk i Tuluse bero. <sup>19</sup> Mélaw ay niy kéuret geye: I Tuluse nusarén i Kristowe mémukas bé de kéilawan inok waléy tom séloyuk bé Tuluse atin fénsagadén i de sala tom. Atin sénarigo no begey muret fantag bé kéréwaléy ne betom séloyuk dob Beene.

<sup>20</sup> Mélaw begey i de sarigo Kristo muret bé kéongot i Tuluse. Féongoté no begey bé fagayun gomén bé kétaya nuwe. Non kétayay Tuluse féwaléy no begom do dumo no séloyuk. <sup>21</sup> Enda i sala Kristowe. Endob sabaf bé kéluhanay de sala tom, kékukum i Tulusey Kristowe, inok waléy tom méntintu loo bé Tuluse non bé kéwaléy tome do dumo Kristowe sabaf bé kéunur tome de.

## 6

<sup>1</sup> Non begey i do témabang bé galbék i Tuluse, ongoté key begom do téménggaf bé kégédaw i Tuluse, usar gom i kégédaw ne fégérigo bé fiyowe. Kagom miika de. <sup>2</sup> Non wén i Ménsulate Kébéreh i Tuluse mano, “Dob fatute gai, fénggélino guy de kédasalém, atin ténabang gu beem dob fatute gaiy kékukas guwe bé kéilawane.” Féngélino gom: Béleewe niy gaiwe fatut tayakufé kom i kégédaw i Tuluse. Béleewe niy gaiwe fatut fédaya gom i Tuluse mémukas begom bé de sala gom.

<sup>3</sup> Toow fo ingata key i de rigoéné key inok énda i géféika gey munur brab inok énda i gédowoy bé galbék gey lémgébé bé Fiyouwe Uret. <sup>4</sup> Yamula, do kéluhanay de rigoéné key, fégito gey begey i de sugu-suguéy Tuluse. Non fiyon fo ké kérégénéan gey brab kérésayan gey, témingkél gey. <sup>5</sup> Atin ménlubag gey, ménférisu gey, ménggésug-sug gey bé de mérimbur étéw. Atin wén i no taluwan geyén gémalbék, atin mélaw énda géama gey, brab énda géfidong gey. <sup>6</sup> Atin énda i réniigo gey mékérésik adat, brab géngsuto key i kébéreh i Tuluse, brab téméningkél gey, brab ténabanga key i de étéw. Atin Rémogor i Tulusey mémanduone begey brab toow gey fo ménggédaw. <sup>7</sup> Atin nuret gey i toowe kétoro, brab i barakatane Tulus tabanga no begey. Mélaw bé kéluhanay de ni fénggito gey, begey i de sugu-suguéy Tuluse. Atin i méntintuwe brab fiyowey maake kélung gey brab dilék gey. <sup>8</sup> Wén i do masanan begey, éndob wén soy do émfémala begey. Wén i do démayéw begey, éndob wén soy do méngiras begey. Wén i do ménbéreh do

tugién gey kun, éndob toow i de béréhé key.  
<sup>9</sup> Wén i de étéw émbéréh énda kun gélo ro begey, éndob toow fo gélon gey. Gédét geyén méléhu sénga tékélid, éndob méuyag gey so. Ménkukum gey éndob énda méléhu gey. <sup>10</sup> Fiyon fok wén i do émfétete bé de fédéw gey, éndob dé moyun moror gey. Maak toow geyén fo méskinan, éndob sabaf bé begeye, médooy de étéw ménwaléy ro maak kawasa taman sa taman. Maak énda i do kagey bé de éntingayén, éndob wén i kagey bé de kéluhanay de iray i Tuluse.

<sup>11</sup> Do dumo gey dob Korinto, bénréh geyén begom i kéluhanay dob de fédéw gey, brab énda i ménbunéy de. <sup>12</sup> Enda kulang i kéimu geye begom, éndob kulang i kagome kéimu begey. <sup>13</sup> Béréhé ku begom do maak nga gu, féimuén gey loo bé kéimu geye begom.

#### *Kagom mawag bé de énda munur*

<sup>14</sup> Kagom sébawag bé de étéw énda munur ro bé Kristowe. Non énda ségiléw i fiyowe brab tete, mélaw énda fakay ro waléy sébaan. Enda fakay sétifon i géfékayae brab délé mone. <sup>15</sup> I Kristowe brab Satanae énda géséfagayun ro. Atin énda waléy sétiman fédéw i étéwe munur bé Kristowe bé étéwe énda munurén bé Kristowe. <sup>16</sup> I lawi i Tuluse, sani gonone méngadaf, énda fakayén ké diyo so féngadafén i de kéninontow. Atin i betome maak lawi batioy méuyage Tulus. Non bénréh i Tuluse mano, “Batiu dob de kagén étéw brab modoru bero. Atin begén i féngadafé ruwe, brab beroy de étéw gu.” <sup>17</sup> Atin bénréh i Kadnane so mano, “Tagak gom i de étéw féngadafé roy de kéninontow brab sésuway gom bero. Férayu gom dob de mékérésik adat ro, atin tanggafé ku begom. <sup>18</sup> Waléyu Boh gom, atin waléy gom do nga gu do lagéy brab do libun. Been i niy bénréh i toowe fo barakatan Kadnan.”

## 7

<sup>1</sup> Do dumo gu, been i niy de fénsad i Tuluse betom rigo né no. Mélaw tagaké tom i kéluhanay de tete, dob lowoh tome taloo no dob fédéw tome. Atin linisé tom i de lowoh tom brab télamané tom rigo né i de malinis dob adafay Tuluse inok toow fo métintu tom. Rigo né tom i ni non féngadata tom i Tuluse.

#### *I kéoror Pablowe*

<sup>2</sup> Fatut toow gom féimu begey. Enda i rénigo gey tete dob ségétéwe étéw, taloo no fénsala gey, loo ké lénafis gey. <sup>3</sup> Enda béréhé kuy de ni ké dowoyé ku begom. Non loo bé bénréh guwe bé do gétahe, toow fo gulaané ku begom. Amuk méuyag gey look méléhu gey, mégdéw gey so begom. <sup>4</sup> Toow fo sémarig gey begom brab géfélangka-langka gey sabaf bé begome. Mélaw fiyon fo ké kérasayan gey, fiyoy de fédéw gey, brab toow gey fo moror sabaf bé begome.

<sup>5</sup> Atin amun énggumah gey dini dob Masedonia, énda fo énggétéren gey. Non toow fo ménkérégenan gey. Ménséédél begey i de sébanil begey. Atin ménbuku gey fantag bé de mantu munur bé Kristowe. <sup>6</sup> Endob i Tuluse toow fo gétiga noy émféfiyowe bé de fédéw i de étéw tete i de fédéw ro. Mélaw fénororén i de fédéw gey bé ké gumah Titoe. <sup>7</sup> Atin békén saén i ké gumah ney funa keye ménoror, non loo soy bénréh ne fantag bé kéféfiyo gome bé fédéw ne. Atin nuretén begey i kéuyot gome géségito begén. Brab toow gom fo kun énggésénuleu atin féngagay gom bénréh dob de étéw témo begén i kéamfilo kome begén. Mélaw toowu na fo moror.

<sup>8</sup> Non fiyon fo ké méntete i de fédéw gom bé sulat guwe, énda énggésénuleu de ménféuwit dob begome. Endob bé do gétahe, énggésénuleu de brab ménuyotu de damén ké éndaén fénuwit gu de dob begome amun énggétiga ku ménwaléy tete i de fédéw gom. <sup>9</sup> Endob béleewe ni toow fo mororu, éndob békén sabaf bé kététe i de fédéw gom. Yamula mororu béleewe ni non énggésénule gom. Non féngagak gom i de tete rigo né kom sabaf bé kététe i de fédéw gom. Fénsénule i Tuluse begom brab nusarén i kététe i de fédéw gom. Mélaw fiyoy rénigo geye dob begome bé nan sulat. <sup>10</sup> Non amuk fétetéy Tulusey fédéwe, muwit ké gésénule brab ké digur bé de sala. Brab beeniy muwite bé kéfukase bé kékukume. Mélaw toow fo fiyoy nan kététe fédéw. Endob i kététe i fédéw i de étéw énda munur bé Kristowe, muwit kéléhu. <sup>11</sup> Endob i begome, fégitung gom i fiyowe rénigo Tuluse dob begome sabaf bé kététe i de fédéw gom. Non sabaf bé kététe i de fédéw gom, tintu méuyot gom rénigo bé fiyowe, brab toow fo méuyot gom émfégito bé éndaén i sala gom béleewe ni. Atin ménkérít gom brab ménbuku gom bé salae rénigo ségétéwe begom. Atin méuyot gom émfésuwat begén. Mélaw, sabaf bé kététe i de fédéw gom, kénukum gom i ni sala, atin fénténgténg gom bé békén kagom sala i ni. <sup>12</sup> Mélaw i funa kuwe séménulat dob begome bé gétahe békén saén sabaf bé nan étéw ménsala, taloo noy étéwe énggésalaa no. Yamula gétigay Tuluse séménulatu inok fégétiga ku dob begomey ké dakél i ké gédaw gome begey. <sup>13</sup> Been i niy funay de fédéw gey ménfiyo. Atin ménumanan foy kéfiyoy de fédéw gey. Non i Titoe fénororén begey bé kéuret ne fantag bé kéféoror gome de. <sup>14</sup> Ménfélangka-langkau fo muret dob Titoe fantag bé begome, atin fénggito gom foy kétoow i kéuret guwe. Dé moyun gey émbéréh bé toowe dob begome. Atin ségiléw so énggito Titoey kétoow i funa keye félangka-langka fantag bé begome. <sup>15</sup> Mélaw minút dakél i kéimu ne begom, bé lala ne gétedém

bé kéuyot gome modor bé de sugu gu, brab kébasana kome de. <sup>16</sup> Toowu fo méoror non gésarigo ku fo begom toow.

## 8

### *I kéiraye dob Tuluse*

<sup>1</sup> Atin do dumo gey, méuyot gey de fo ké gétiga kom i ménrigowe dob de munur bé Kristowe dini dob Masedoniawe ni bé kégédaw i Tuluse. <sup>2</sup> Fiyon fo ké toow ro fo kérésayan brab kérégénan, toow ro fo moror. Mélaw fiyon fo ké toow fo méskinan ro, toow ro fo ménggédaw méniray kurta fégetabang bé de dumo ro munur. <sup>3</sup> Atin béréhé ku begom i toowe, niray roy gagané ruwe. Tidéw béno, ménuman ron man miray non been i niy kétaya ruwe rignoné ro. <sup>4</sup> Komon nongot ro fo dob begeye ké tungkasé key bero mamung témabang bé de dumo tom munur bé Kristowe dob ingéde Judea. <sup>5</sup> Toow gey fo ménggaif non rénigo roy békéne fo bantak fédéw gey gérigono ro. I sunguwe de niray roy de lowoh ro brab de fédéw ro dob Kadnane. Tidéw béno, non rénigo roy kétayay Tuluse, nodoro roy de sugu gey. <sup>6</sup> Atin non Titoe méngganaye bé ni rignoné, féngginau gey bé fétausé noy kétimu ne kurta fégetabang bé de munur dob Judea inok géfégilido kom i galbéke ni rénigo gom bé kégédaw gome. <sup>7</sup> Gétiga ku énda kulang gom bé de kéunur gom, taloo no de kéuret gom, loo soy de kégétiga kom, loo soy kétaya kome témabang, loo soy kégédaw gome begey. Mélaw méuyot gey de ké fégitto gom soy énda i kulang bé kégédaw gome bé kéiraye.

<sup>8</sup> Enda sugué ku de begom, éndob méuyotu de ké gétiga kom i fantage bé de dumo gom munur dob de ségiyo gonon. Témantu ro fo témabang. Beeniy funa kuwe émbéréh de dob begome béleewe, inok iringé kom bero. Mélaw gétiga ku ké toow gom fo mégédaw. <sup>9</sup> Gétiga tom i kégédaw i Kadna tome Jesu Kristo. Non fiyon fo ké toow fo kawasa dob lawayo, ménwaléy méskinan dob duniyae ni bé kéwaléy ne kélawan inok waléy gom kawasa dob lawayo sabaf bé kétérifantad ne.

<sup>10</sup> Atin féginauné ku begom béni, fiyo ké fégilidé kom i féngganaya kome galbéké bé no énggéétah bélintuwa. Begom i de sungu téménimu do kurta fégetabang, atin begom soy de sungu méuyot témabang. <sup>11</sup> Mélaw fatut fétausé kom taman géfégilido kom. Fatut méuyot gom magayas mégilid de ségiléw bé kéfagayas gome bé kébantak gome de. Atin iray gom i atiy wéne begom. <sup>12</sup> Amuk méuyot gom miray bé atiy wéne begom, mésuwat i Tuluse témayakuf bé nan. Endob i Tuluse énda méuyotén ké iray gom i éndaé gagané kom.

<sup>13</sup> Enda méuyot gey de ké kérégénan gom sabaf bé de kétabang gom miray dob de

ségiyo inok éndaén kérégénan ro. Endob kétaya key ké ségiléw-giléw i kéluhanane. <sup>14</sup> Béleewe ni gétabang gom bé de ségiyo non gaba-gabay kagome kéfaguyag. Endob kulang foy karowe de. Atin dob gaiwe kulang gom brab gaba-gaba roy berowe, tabangé ro so begom. Mélaw ségiléw-giléw i késétabang gome. <sup>15</sup> Non wén i Ménsulate Kébéréh i Tuluse mano, “I étéwe énggétimu médo, énda gaba-gaba no. Atin i étéwe énggétimu kloh saén, énda so kulangén.”

<sup>16</sup> Toow fo ménfésalamat gey dob Tuluse non bé kéuyot Titoe mégédaw begom loo bé kégédaw gey begom. <sup>17</sup> Amun nongot gey dob beene ké tabanga no begom, toow fo ményuyot de rémigo. Atin non toow fo méuyot témabang begom, mélaw méuyot mangéy diyaan. <sup>18</sup> Féodoré key bé Titoe ségétéwe dumo tom munur, mégéror fo muret bé Fiyowe Uret, funa no toow fo fégadatay de munur dob de ségiyo ingéd. <sup>19</sup> Atin saliyo na bé nan, beeney fénémili i de munur dob de séségiyo-giyo ingéd inok modor begey bé kéagéw gey mangéy muwit bé kurtae fégetabang bé de méskinan munur bé Kristowe. Rignoné key i ni galbéké inok médayéw i Kadnane de brab fégitto gey i kéuyot geye témabang.

<sup>20</sup> Méuyot gey ké modor i de ni étéw non toow gey fo mingat bé kéuwit gey bé ni dakél iray inok énda i témbo begey. <sup>21</sup> I kétaya keye rignoné key i fatute dob adafay Tuluse loo so dob adafay étéwe.

<sup>22</sup> Atin saliyo na bé ni, sugué key soy ségétéwe dumo tom munur. Médoonén fo gule ténéngkad gey atin mélaw gétiga key méuyot fo témabang. Atin béleewe ni toow na fo méuyot témabang begom non dakél foy késarig ne dob begome. <sup>23</sup> Atin i Titoe, beeney dumo guwe gémalbéké témabang begom. Atin i de étéw modor bé Titoe, beroy de sénarigoy de munur dob de séségiyo-giyo ingéd mangéy témabang begom inok médayéw i Kristowe. <sup>24</sup> Fégitto gom i kégédaw gome bero inok i de munur dob de ségiyo ingéd gétiga roy kégédaw gome brab gétiga ro so toow i funa keye géfélangka-langka fantag bé begome.

## 9

<sup>1</sup> Endaén kailanga kuy sémulate dob begome fantag bé kétabang gome bé de dumo tom munur do méskinan dob Judea. <sup>2</sup> Non gétiga ku toow gom fo méuyot témabang. Brab dénayéw gu begom dob de munur dini dob Masedoniawe ni. Bénréh gu bero maku, “I de dumo tom munur dob ingéde Akaya, tafay ron témabang tidéw bé no énggéétah bélintuwa.” Amun énggélíngoo roy ni, i kédoono ruwe ménwaléy méuyot témabang. <sup>3</sup> Mélaw béleewe ni, sugué ku mangéy dob

begomey de ni do dumo tom munur inok tabanga ro begom métuman i ni brab gétafaya komèn i tabang gome loo bé bènéréh geye. Giton mélaw toow i kédayéw geye begom. <sup>4</sup> Non amuk i de étéw tidéw Masedonia modor ro begén mangéy diyaan, atin amuk énda i ténafay gom kurta, toow fo mémala gey de, brab kémalanan gom de so. Non makey ké wén i ténafay gom kurta. <sup>5</sup> Mélaw, makuk fiyo ké sugué ku métah mangéy diyaan i de ni do dumo tom munur inok gétafaya kom i iray gome, sani fénasad gome. Mélaw amuk gégumahu diyaan, méntafayén i de iray gom. Mélaw giton i kéuyot gome miray énda ménfégés gom de.

<sup>6</sup> Fégtédém gom i ni, i étéwe mohok kloh, kémétéw so kloh. Atin i étéwe mohok médoó, kémétéw so médoó. <sup>7</sup> Mélaw, sénga ségétéw étéw fatut irayén i bénantak ne irayén. Atin békén fatut miray ké tete i fédéw ne de taloo no ké manok ménfégés de saén. Non toow fo mégédaw i Tuluse bé étéwe toow fo moror ké miray. <sup>8</sup> Atin i Tuluse géirayén begom i mas na médoó bé de kailanga kom inok démoyun gaba-gabay kéfaguyag gome atin géiray gom so tabang dob de ségiyo. <sup>9</sup> Non wén i Ménsulate Kébéréh i Tuluse mano, “Iraya no témantuy de méskinan, brab i kégdaw ne énda i tamana no.” <sup>10</sup> Atin i Tuluse irayén i de béne dob de mohok, inok mama i de étéw. Mélaw iraya no so begom do béne, sani de kétabang gom dob de ségiyo, inok dakél i gékétéwo kome, sani de médoó do fiyo rénigo gom sabaf bé dakéle kégdaw gom. <sup>11</sup> Démoyun iray i Tuluse begom i katabuwane inok gétantu gom miray tabang sénga tékélid, inok médooy fésalamate bé Tuluse sabaf bé tabange tidéw dob begome uwité key. <sup>12</sup> Non i ni galbék rignoné kom, békén saén i kétabange bé de munur, éndob been soy funay de médoó étéw fésalamat dob Tuluse. <sup>13</sup> Atin amuk gito roy dakéle kégdaw gom loo bé ni, médooy démayéwe bé Tuluse sabaf bé kéodor gome bé sugu Kristowe, brab sabaf bé kéégét i kéunur gome bé Fiyowe Uret fantag bé Kristowe, non mégédaw gom miray dob berowe brab dob kéluhanay de ségiyo. <sup>14</sup> Atin mélaw dasala ro begom dob Tuluse atin toow fo gulaané ro begom. Atin i funa ruwe gémulan begom non bé dakéle kégdaw gom bero tidéw dob Tuluse. <sup>15</sup> Mélaw fésalamat tom dob Tuluse non bé Nga ne Jesu Kristo toow fo mélaga nirayén betom.

## 10

### *Fantag bé Pablowe*

<sup>1</sup> Atin i begéne, sani Pablowe, wén i ongoté kuwe dob begome. Wén i de ménbéréh térifantadu kun ké diyoub dob begome. Endob amuk énda kun diyoub dob begome, toowu fo émaraw sémulat dob begome. Endob ongoté

ku dob begome bé toowe mélanat kébéréh loo bé kégdaw Kristowe. <sup>2</sup> Ongoté ku dob begome, féfiyo gom i de rignoné kom inok énda kailanga kuy fébarawe ké gégumahu dob begome, loo bé rignoné kuwe dob de étéw émbéréh bé i begeye kun ségiléw gey i de étéw énda munur ro bé Kristowe. Non rignoné key kun i de tete kétaya key. <sup>3</sup> Toow kélilawan gey saén, éndob énda sarigo key i kébagér i kélilawane fégésétiboh sébanil bé Satanase. <sup>4</sup> Non i kéuret geye énda ségiléwén bé kéuret i de tete étéw dob duniyae ni. Yamula i kéuret geye tidéw dob Tuluse brab wén i barakatén inok témaban gey bé de kétoro énda toowén. <sup>5</sup> Fégiyo gey énda toow i kéluhanay uret i de étéw sébanil bé Tuluse brab kébéréh i de étéw félangka-langka malang bé toowe kétoro fantag bé Tuluse. Atin fiyon i de kéfégitung ro énda toowén, fégaliné key inok modor so bé de sugu Kristo. <sup>6</sup> Atin amuk fégiyo gom tintu odoro kom i de sugu Kristo, tidéw béno kukumé key i de ségiyo munur amuk énda modor ro bé de suguén.

<sup>7</sup> Kagom téngténgén saén i falas i étéwe, yamula fatut fégitung gom soy fantage bé fédéw ne. Amuk wén i étéw gékaranga no been i sugu-sugué Kristowe, fatut karangé no so begey, do sugu-sugué Kristowe so. <sup>8</sup> Non énda mémalawu félangka-langka bé aturane niray i Kadnane begey. Non nirayén dob begeye inok féégété key i kéunur gome, énda mébinasa gom de. <sup>9</sup> Mikau ké fégitungé kom fégilaké ku saén begom dob de sulat gu. <sup>10</sup> Endob wén keeyén i étéw émbéréh mano, “Dob de sulat Pablo, toow fo émaraw brab émbagér. Endob amuk dini dob betome, toow fo mélanat i de kébéréhén brab énda furungén muret.” <sup>11</sup> Endob i étéwe mégitung loo bé nan, fatut gétiga noy ni. I de sémulat gey béleewe ni, fiyon fo ké sérayu tom, been soy nan i de rignoné key ké géséténgang tomén.

<sup>12</sup> Endob énda fésgiléwé key i begeye bé de étéw do félangka-langka. Toow ro fo du-fang, non marok bero saén i do gérotor, brab dayéwé ro soy de karo lowoh brab de étéw miring bé adat ruwe. <sup>13</sup> Endob i begeye, énda taluwan gey démayéw bé de lowoh gey, non béréhé key saén i de rénigo gey dob galbéke niray i Tuluse begey, loo bé de rignoné key dob begome. <sup>14</sup> Atin énda taluwan gey démayéw bé de lowoh gey, non begey i de sungu ménangéy diyaan muret dob begome bé Fiyowe Uret fantag bé Kristowe. <sup>15</sup> Enda félangka-langka gey fantag bé galbék i de ségiyo dob de ségiyo gonon énda sénugu i Tuluse begey. Endob méuyot gey de ké amuk minut émbagér i kéunur gome, gétabanga kom begey émféunur bé de dumo gom dob kagome ingéd. <sup>16</sup> Tidéw béno, géureto key i Fiyowe Uret dob de ingéd géliyu



begom. Mélaw énda fégefélangka-langka gey i galbék i ségiyowe étéw.

<sup>17</sup> Non wén i Ménsulate Kébéréh i Tuluse mano, “Fiyon atiy méuyote félangka-langka, fatut félangka-langka sabaf saén bé réniogy Kadnane.” <sup>18</sup> Non i étéwe dayéw noy kaane lowoh, énda i lanték i kedayéw ne. Endob amuk Tulus i demayéwe bé ségétéwe, giton médait médayéw.

## 11

### *Do ubo-ubo apostol*

<sup>1</sup> Méuyotu de damén ké tingkélo kom na begén kloh bé kéuret guwe ni fiyon fo ké maak dufangu. <sup>2</sup> Toowu fo médaléw fantag bé begome loo bé kédaléw i Tuluse. Non i begome ségiléw gom bé ségétéwe kénogon féntisingonén. Atin i Kristowe maak beeneey lagéye ménféntisingon bé ni kénogon. Atin begéney maake ménféntisingon de brab toow fo méuyotu de ké gésébawag ro. <sup>3</sup> Mégilaku de ké tagaké kom i Kristowe loo ké éndaén modor gom bé de suguén taloo no ké éndaén gulaané kom de. Embukuu ké fésélawéké kom i toowe fantag bé Kristowe bé tugi i de ségiyo kéféngadaf. Amuk rigoné kom i nan, géiringo kom moso i sala i sunguwe libun féndawét Eba, non méndurat bé kétugiéy ulée, sani Satanase. <sup>4</sup> Non amuk wén i ségétéw étéw gégumah dob begome, brab muret ségiyo kétoro fantag bé Jesuse bé kétoro geye, munur gom de wayo. Taloo no fiyon fo ké ureté roy ségiyowe rémogon brab ségiyowe kéféngintulus, munur gom de so wayo, fiyon fo ké énda ségiléwén bé kageye kétoro.

<sup>5</sup> Atin i do no étéw diyaan do ubo-ubo do gérotor do apostol ro, gétiga ku énda i ségétéw bero toow na fo gérotor begén. <sup>6</sup> Fiyon fo ké énda furungu muret, énda kulang i kégétiga kuwe. Fénggito gey begom médoonén gule i kéluhanay de réniogy gey.

<sup>7</sup> Nuret gu dob begomey Fiyowe Uret i Tuluse, éndob énda fénbayada ku de begom, fiyon kloh. Atin méntérfantadu inok waléy gom gérotor. Aw békén ba fiyoy nan réniogy gu? <sup>8</sup> Amun diyoy dob begome gémalbék, i de munur bé Kristowe dob ségiyowe gonon i ménayadane begén. Mélaw énggéédotu dob berowe inok gétabanga ku begom. <sup>9</sup> Atin amun diyoy dob begome, énda ménongotu kurta tidéw dob begome fiyon fo ké wén i kailanga ku. Yamula i de dumo tom munur dob Masedonia, nuwito ro begén bé kéluhanay de kailanga ku. Atin loo so bé do géta, énda fo doté ku mosoy tabange tidéw dob begome. <sup>10</sup> Atin been i niy funa kuwe félangka-langka. Non énda méndotu kurta tidéw dob begome loo so dob de udenén ingéd dob Akaya. Atin énda so médotu moso tidéw dob begome. Been i fasad guwe brab

gétiga ku fo toow loo bé kétoow i kétoro Kristowe. <sup>11</sup> Fégitungé kom keey énda méimuu begom non bé de ni kébéréh gu. Endob gétigay Tuluse, toow fo féimué ku begom.

<sup>12</sup> Fétausé ku rigonén i de rigoné ku béleewe ni, mélaw énda mongotu tabang tidéw dob begome, inok i de téfégérotor do ubo-ubo saén do apostol, énda i funa ro félangka-langka brab inok énda gébéréh ro ségiléw i karowe rigonén bé kageye de. <sup>13</sup> I berowe, békén tintu ro apostol Kristowe. Yamula do ubo-ubo ro saén, brab do témugi ro. Magakar ro saén inok makom ké do tintu ro do apostol Kristowe. <sup>14</sup> Endob énda mégaifu de, non gétiga ku fiyon i Satanase géfarino noy falas ne loo bé falas i télakiy Tuluse. <sup>15</sup> Mélaw énda mérégéno ké ubo-ubo i de sugu-sugué Satanase inok maak do tintu sugu-suguéy métintuwe Tulus. Endob mékukum ro moso loo bé fatute sabaf bé de ni do tete rigoné ro.

### *I kérasay Pablowe*

<sup>16</sup> Séguleé ku man béréhén, kagom fégitungén de ké dufangu. Endob amuk karangé kom begén dufang, tingkélou inok wén i funa ku géfélangka-langka loo bé ségétéwe dufang. <sup>17</sup> I ni béréhé ku begom béleewe ni, békén tidéw dob Kadnane, non fébantug-bantugu saén loo bé ségétéwe dufang. <sup>18</sup> Endob non médooy de émbéréh félangka-langka sabaf saén bé de étingayén dob ni duniya, fakay so félangka-langkau. <sup>19</sup> Atin non makom keey ké toow gom fo do métilédted, fatut moror gom témingkélou bé de dufang. <sup>20</sup> Non amuk wén i téfégérotor étéw sugué no begom, taloo no afasé noy de languntama kom, taloo no lifulé no begom, taloo no félangka-langka dob téngaanga kome, taloo no tamflingé no begom, tingkélo kom brab fédayaé kom saén. <sup>21</sup> Toow fo émaraw ro, éndob i begeye énda émaraw gey loo bé nan. Makom keeyén ké talaw gey non énda i réniogy gey tete loo bé nan dob begome.

Atin amuk félangka-langka ro, géfélangka-langkau so, fiyon fo ké dufang i ni kébéréh fégefélangka-langka. <sup>22</sup> Félangka-langka ro non do Judio ro. Endob ségétéwu so Judio. Atin béréhé ro do étéw Israel ro, éndob loo soy begéne. Atin béréhé ro do séfu Abraham ro, éndob ségétéwu so séfu Abraham. <sup>23</sup> Gétiga ku émbéréhu béni maak ségétéw buné, éndob énda gétérenu. Aw bénréh ro beroy de sugu-sugué Kristo? Endob i begéne ségétéw so sugu-sugué Kristowe, atin toowu na fo mégéror gémalbék bé berowe. Mas médoonén gule ménférisuwu sabaf bé kéuret guwe bé Kristowe. Mas médoonén so gule ténafésu, brab mas médoonén gule gédétun méléhu. <sup>24</sup> Limo gule bénadas i de Judio begén bé téléwe folo bra siyow gule badas. <sup>25</sup> Téléw gule bénadas i de Romano begén.

Atin wén i no gai, i de étéw nibéro ro begén batéw taman marok méléhuu nén. Téléw gule méndau barko falan ménrundas dob dogote, brab wén i no gai ségétérésangan brab ségékélungonon i kérantaw-rantaw guwe dob dogote. <sup>26</sup> Dob démonyone kéagéw gu, médooy de makakaid do énggéagéwo ku: do makakaid dob de wayég dunuk, do makakaid dob do tulisan, do makakaid sabaf bé de dumo gu Judio brab do békén Judio so, de makakaid dob de ingéd brab dob de gonon énda i do étéw de bati, brab do makakaid dob dogote. Atin wén soy do makakaid tidéw dob de ubo-ubo saén do dumo gu munur, éndob i toowe, sébanil ro begén. <sup>27</sup> Toowu fo géménalbék, brab wén i no énda géfidongu. Atin wén i no mélayafu brab téruménu, atin kulang i amaé kuwe brab kégal guwe, brab énda i batio ku. <sup>28</sup> Atin békén saén i nan, non démonyunu émbuku fantag bé kéluhanay de sélimud do munur bé Kristowe. <sup>29</sup> Non amuk wén i kérasayan sabaf mélubay i kéunur ne, mérasayu so bé kébuku guwe. Taloo no amuk wén i ségétéw munur gésala sabaf wén i ménfésala de, tete i fédéw guwe de brab mékéritu bé ménfésalae de.

<sup>30</sup> Enda méuyotu félangka-langka, éndob amuk félangka-langkau, béréhé ku saén i de fantag bé de kérégeno ku inok giton énda fo furungu. <sup>31</sup> I Tuluse sani Abay i Kadnane Jesus, médayéw damén i dawét ne taman sa taman. Gétiga no toow i kébéreh guwe. <sup>32</sup> Bé do géthak amun diyou de séna dob ingéde Damasko, wén i ségétéwe méguléw diyou fénéмили Datu Aretase. Atin sénuguén i de sundalo no mantay dob béngaway no ingéd inok kéfoé ro begén. <sup>33</sup> Endob wén do téménabang begén, nahur ro begén dob dakéle biton. Atin ténuntu ro begén dob falliluwangay didinge fénggélangkat bé no ingéd. Mélaw énggéféraréyu.

## 12

<sup>1</sup> Kailanga kuy fébantug-bantuge fiyon fo ké énda i lanték gu. Béréhé ku béleewe niy fantage bé de fénggitoy Kadnane begén loo soy de fénayagén dob begéne. <sup>2</sup> Wén i gélolo guwe lagéy munur bé Kristowe, atin ménfoloén bra fot gébélintuwa i kéuwit i Tuluse de mangéy dob toowe fo gérotor laway. Endob énda saén gétiga ku de ké toow énggéangéy diyou taloo no fénggitoy Tuluse de saén. Tulus saén i gétigane de. <sup>3</sup> Mélaw énda gétiga ku de ké ménangéy i lowoh ne dob bélowone fantad loo ké rémogor ne saén. Tulus saén i gétigane de. <sup>4</sup> Enggélangooy ni étéw diyou i de éntingayén énda gébérehoy de kéilawan de, brab énda fo fakayén béréhéy étéwe. <sup>5</sup> Mélaw fébantug-bantugu sabaf bé ni étéw, éndob énda fébantug-bantugu fantag bé kagéne lowoh saliyy saén bé de éntingayén fégito no énda fo furungu de. <sup>6</sup> Amuk fébantug-bantugu, énda

rigoné ku de loo bé ségétéwe dufang non béréhé kuy toowe. Endob énda fébantug-bantugu non mikau de ké karangéy de étéw begén toowu na fo gérotor bé fatute. Non fatut karangé ro begén sabaf saén bé de gito ro rigoné ku brab de gélingoo ro béréhé ku.

<sup>7</sup> Atin inok énda géfélangka-langkau sabaf bé de fiyo énggito gu, nirayén begén i déruune toow fo démawét. Atin i Satanase nusarén fégeférasayén begén inok énda géfélangka-langkau. <sup>8</sup> Téléw gule déménasalu dob Kadnane fantag bé ni ongoté ku ké kédané noy ni déruun. <sup>9</sup> Endob séménumbul i Kadnane mano, “Kégédaw guwe saén i kailanga muwe. Non toow fo minut dakél i barakat guwe témabang ké toow fo minut go mélubay.” Mélaw mororu félangka-langka sabaf bé de kélubay gu inok fébagéré Kristowe begén bé barakat ne. <sup>10</sup> Atin mélaw toow fo mororu sabaf bé de kélubay gu, brab kéingone begén, brab kédusawe begén, brab kéférasaye begén, brab de mérégén géagéwo ku sabaf bé kéunur guwe bé Kristowe. Non gétiga ku amuk mélubayu, wén soy gai fébagéré Kristowe begén.

<sup>11</sup> Béleewe ni rigoné kuy rigonéy ségétéwe dufang non fébantug-bantugu. Endob fénégés gom de begén rémigo non fatut damén begom i mamfilone begén. Non fiyon fo ké gérifantadu, toowu na fo gérotor bé da nan do ubo-ubo saén do apostol diyou dob begome, fénggito gu dob begomey ségétéwo fo tintu apostol. Non rénigo guy de mékégaif fiyon fo ké énggédádaya kuy de mérégén. <sup>13</sup> I rénigo guwe dob begome ségiléw so bé rénigo guwe dob de munur dob de ségiyo ingéd saliyy saén bé ni. Enda méndotu kurta dob begome fégétabang gom begén loo bé kéédot guwe dob de ségiyo. Amuk karangé kom énggésalau sabaf bé ni, fésgadanu!

<sup>14</sup> Beeniy gételéwoy kétafay guwe mangéy témukaw begom, éndob énda mongotu kurta fégefaguyag gu tidéw dob begome. Non begomey gulaané kuwe, békén i kurta gome. Ufama, i de nga békén fatut miray kéfaguyag dob de lukés ro, yamula i de lukés roy fatute miray kéfaguyag dob de nga ro. Atin begomey maake do nga gu non ménunur gom sabaf bé kéuret guwe. <sup>15</sup> Atin toowu de fo moror ké géétéyo ku miray i kéluhanay languntama kuwe brab férenawa guwe fégétabang begom. Endob maak minut kloh i kéimu gome begén bé lala guwe minut dakél i kéimu guwe begom.

<sup>16</sup> Gétiga kom bé énda fénrégéno ku begom non énda i nongot gu kurta dob begome. Endob wén keyén i émbéréhe begom mano, “I Pablowe toow fo tugién, fénegakara no betom, brab lénifulén betom.” <sup>17</sup> Endob ati étéwe fénegakara ku, taloo no ténugio ku, taloo no léniful gu? Enda! Aw wén i éndot

gu tidéw dob begome bé késugu guwe bé de sarigo ku mangéy dob begome? Enda! <sup>18</sup> Nongot guy Titoe magéw mangéy diyaan brab sénuwu gu modor soy ségétéwe dumo tom munur. Aw wén i éndot Titoe tidéw dob begome, taloo no lénafisén begom? Enda! Aw békén ba ségiléw i rénigo geye non sébaan saén i kétaya keye rignonén, sani témabange begom?

<sup>19</sup> Makom keey ké béréhé key i de ni inok féténgténg gey begom énda i sala gey. Békén i nan. Non gétigay Tulusey, béréhé key saén i fébéreh Kristowe begey. Do dumo gu, i kéluhanay de rignoné key, rignoné key inok émbagér i kéunur gome. <sup>20</sup> Toow fo émbukuu ké gégumahu dob begome, gito gu begom rémigo bé békéne kétaya ku. Atin gito gom mélaw begén rémigo bé békéne kétaya kom. Been ké gumaha ku begom, séédél, mésérédaléw, sékérít, séitung, séingon, ségéno, séfélangka-langka, brab sérímbur. <sup>21</sup> Atin mémbukuu amuk gégumahu diyaan, fémalanéy Tuluse begén dob téngaanga kome, non gékérewu sabaf bé de médoow begom do ménsala bé do gétah, éndob énda séna énggésénule ro témagak bé de tete rignoné ro loo bé de kébigaé ro brab de tete kétaya ro.

### 13

<sup>1-2</sup> Beeniy gétéléwe gule kétukaw gu begom. Atin wén i Ménsulate Kébéréh i Tuluse mano, “Amuk wén i ségétéw étéw ténébo ménsala, kailangan wén i ruwo gétéw taloo no téléw gétéw énggégito de atin fayage roy ati énggito ruwe fantag bé ni kétébo.” Mélaw amuk gégumahu diyaan, fégélíngóé kuy de kétébo gom brab kukumé kuy de étéw ménsala. Bénréh gun i ni dob begome bé do gétah amun nangéy gu begom ténukaw bé géruwo nuwe gule. Atin béréhé ku man ségule dob ni sulat. <sup>3</sup> Bé béno gai, amuk gégumahu diyaan, fégito gu begom i kéluhanay émféngintoowe bé de kébéreh gu, toow fo tidéw dob Kristowe. Amuk wén i rignoné no dob begome, énda mélubayén, yamula fégito noy barakat ne dob begome. <sup>4</sup> Non fiyon fo ké maak énda i barakat Kristowe bé kéléhu ne dob kruse, méuyag béleewe ni sabaf bé barakat i Tuluse. Atin ségiléw bé begeye, maak énda i barakat gey non kérégénan gey sabaf bé kéunur geye bé Kristowe. Endob sabaf so bé kéunur geye bé Kristowe, i barakat i Tulusey muyage begey inok taus i kétabanga keye begom.

<sup>5</sup> Séténgkad gom inok gétiga kom ké tintuy kéunur gome bé Kristowe loo ké énda. Atin gétiga kom damén ké bati i Kristowe dob de fédéw gom. Amuk énda bati i Kristowe dob begome, énda séna tintuy kéunur gome de. <sup>6</sup> Atin gétiga kom damén begey i de tintu apostol Jesu Kristowe. <sup>7</sup> Atin démasal gey dob Tuluse énda damén rignoné

kom i tete. I funa keye démasal loo bé ni békén ké fégito gey toow fo mégulit i kageye galbék ménféunur begom. Yamula démasal gey loo bé ni inok rignoné kom i fatute fiyon fo ké maak énda mégulit i de rénigo gey. <sup>8</sup> Non amuk modor gom bé toowe kétoro, énda fégito gey begom i atura keye. Non énda usaré key i atura keye rémigo sébanil bé toowe, yamula usaré key i atura keye témabang bé de étéw inok modor ro bé toowe kétoro. <sup>9</sup> Atin toow fo mororu amuk gito gu begom émbagér i kéunur gome atin mélaw énda fégito gey i atura keye. Mélaw démasal gey inok minut émbagér i kéunur gome. <sup>10</sup> Been i niy funa kuwe sémulat bé de ni amuk énda diyou dob begome. Mélaw amuk gégumahu diyaan énda damén kailanga kuy démusawe kémukom begom. Non niray i Kadnane begén i aturay ségétéwe apostol inok fébagéré kuy kéunur gome, békén kukumé ku begom.

<sup>11</sup> Taman saén dob niy sulaté kuwe begom. Féfiyo gom fo toow i de rignoné kom, odoró kom i de kétéfénginau gu begom. Séfagayun gom brab fétanék gom i fédéw gome. Mélaw i Tuluse, yamula toowe fo mégédaw begom brab mirayan begom bé métanéke, démayon diyo dob begome.

<sup>12</sup> Atin amuk séségifa gom fatut fégito gom i késégédaw gome.

I kéluhanay de munur bé Kristowe bati dob de ségiyo ingéd ségifaé ro begom.

<sup>13</sup> Atin mégédaw damén i Kadnane Jesu Kristo begom, brab mégédaw damén i Tuluse begom, loo soy Rémogor i Tuluse démayon damén bati dob kéluhanay de fédéw gom.

*Pablo*

## I Sulat Pablowe dob de Munur bé Kristowe dob Galasia

Ay niy sébaane bé de sénulat Pablo, sani mébantuge muret fantag bé Jesu Kristowe. Tafayén séménugud i Pablowe dob ingéde Galasia, atin médooy de étéw ménwaléy munur bé Jesuse sabaf bé kéuret ne. Séménulat i Pablowe dob berowe.

I kédoonoy de étéw do bati dob Galasia, békén Judio. Mélaw énda ménodor ro bé kitabe taloo no adat i de Judio. Endob dénowoy i de Judioy de munur bé Jesuse brab ténoro ro bé kailanga ro soy modore bé kitab i de Judio.

Endob i Pablowe, énggétiga no énda kailangay de étéw i modore bé kitab i de Judio inok méfukas ro dob de sala ro. Yamula kailanga ro saén i munure bé Jesu Kristowe. Mélaw séménulat i Pablowe dob de munur do bati dob Galasia inok toroé no bero bé énda kailanga roy modore bé kitab i de Judio.

<sup>1-2</sup> Begéney Pablowe, sulata ku begom do munur bé Jesu Kristowe dob de ingéd sakuf i Galasiawe. I begéne brab kéluhanay de dumo gu munur dini, ségifaé key begom. I begéne ségétéwu apostol békén sénugu i kéilawane, taloo no kéilawan saén i méniraye aturan dob begéne. Yamula i Jesu Kristowe brab Abay tome Tulus sani téménébulee bé Jesusey ménémilie begén, brab de ménféwaléy begén apostol brab de séménugu begén.

<sup>3</sup> I Abay tome Tulus brab Kadnane Jesu Kristo, mégédaw ro damén begom brab fétanéké ro damén i de fédéw gom.

<sup>4</sup> I Kristowe, nirayén i umul ne bé kéléhu ne dob kruse inok i de sala tom émfésagad, brab inok énda mékukum tom loo bé de étéw rémigo tete béleewe ni. I funa Kristowe nirayén i umul ne, non nodoro noy kétayay Abay tome Tulus. <sup>5</sup> Médayéw i Tuluse damén taman sa taman! Amen.

### Sébaan saén i Fiyowe Uret

<sup>6</sup> Toow fo ménggaifu bé rénigo gome. Sedek toow fo magad i kétagak gome bé Tuluse sani ménféunure begom sabaf bé kégédaw Kristowe. Non balengé kom i de fédéw gom brab munur gom bé ségiyowe “Fiyu Uret”. <sup>7</sup> Endob i toowe, énda i ségiyo Fiyu Uret non sébaan saén i toowe kétoro. Endob wén i do étéw diyaan fénbuku ro begom bé de tugién kétoro ro non méuyot ro mégalin bé toowe Fiyu Uret fantag bé Jesu Kristowe. <sup>8</sup> Endob amuk wén i muret atin i kéuret ne énda ségiléwén bé kageye kéuret fantag bé Jesuse dob begome, mékukum damén mangéy dob

emfernowo. Fiyon fo ké do télaki taloo no begey, amuk fégaliné key i toowe kétoro, mékukum gey so damén! <sup>9</sup> Bénréh geyén begom atin béréhé ku man ségule béleewe ni. Amuk wén i témoro fantag bé Jesuse atin énda ségiléwén bé kétoroe nunuro komén bé do géta, mékukum damén mangéy dob emfernowo!

<sup>10</sup> Enggito gomén dob ni sulat énda séléde kuy kédayéw i étéwe. Non méuyotu saén ké Tulus i démayéwe begén. Amuk méuyotu de saén ké mésuwat i de étéw begén, éndaén damén tausu waléy sugu-sugué Kristowe.

<sup>11</sup> Do dumo gu, méuyotu de ké gétiga kom i ni, i Fiyowe Uret ténoro gu begom békén tidéw dob kéilawane. <sup>12</sup> Non énda énggédot gu de tidéw dob étéwe, brab énda i ségiyo de téménoro begén. Yamula fénggétiga Jesu Kristowe begén.

<sup>13</sup> Enggélíngoo kom i fantage bé tafaye adat gu. Toowu fo ménodor bé kétoro i de dumo gu Judio. Atin i de munur bé Kristowe, fénrasay gu fo bero toow brab ténlama gu béninasay kéféngintulus ruwe inok éndaén i étéw munur bé Jesuse. <sup>14</sup> I kédooy de dumo gu do Judio ségiléw gey idad, énda géréféngo ro begén bé kéodoro kuwe bé kétoro i de Judio. Brab toow na fo nodoro kuy adat i de katufua key.

<sup>15</sup> Endob fiyon fo ké loo bé nan, i Tuluse toow fo mégédaw begén. Non bé énda séna ménumahu de, fénémili non begén inok waléyu sugu-sugué no. <sup>16</sup> Atin sabaf bé kétaya nuwe, fénggito no begén i Nga ne Jesus inok ureté kuy fantage bé Beene dob de békén Judio. Endob énda i féntoroo ku fantag bé Kristowe. <sup>17</sup> Atin énda ménangéyu dob ingéde Jerusalem inok ménginsau dob de sungu do apostol. Yamula ménagayasu mangéy dob ingéde féndawét Arabia. Tidéw béno, ménséfuleu mangéy dob ingéde Damasko. <sup>18</sup> Atin téléw gébélintuwa tidéw béno, ménangéyu Jerusalem inok tukawé kuy Pedrowe. Brab ménbatu dob beene ruwo géfadiyan. <sup>19</sup> Atin bé béno, énda i ségétéw énggito gu bé de dumo do apostol saliyo saén bé Santiagowe sani tuwaréy i Kadnane Jesus.

<sup>20</sup> Béréhé ku begom bé toow i ni sulaté ku begom, békén tugi. Gétigay Tuluse so toow i ni.

<sup>21</sup> Tidéw béno, ménangéyu dob de ingéd dob Siria brab dob Silisia. <sup>22</sup> Bé do no do gai, i de munur bé Kristowe dob Judea, énda séna énggéalaka ro begén taloo no gélolo ro begén. <sup>23</sup> Enggélíngoo ro saén i bénréh i de étéw fantag bé begéne maro, “I étéwe toow fo fénrasayén betom bé do géta brab ténlama no kédané i kéunure bé Kristowe, béleewe ni ménbalengén i fédéw ne brab

ménwaléyén wayo muret fantag bé Kristowe.”<sup>24</sup> Mélaw dénayéw roy Tuluse sabaf bé begéne ménwaléy munur bé Kristowe.

## 2

<sup>1</sup> Folo bra fot gébélintuwa tidéw béno, ménséfuleu man mangéy Jerusalem begey Bernabewe. Brab nuwit gu soy Titoe.<sup>2</sup> Ménséfuleu non fénggétigay Tuluse begén bé fatutu mangéy diyo. Atin ménsélimud gey i de odoroy de munur, éndob énda i ségiyo étéw diyo. Atin nuret gu dob berowey Fiyowe Uret ténoro gu dob de békén Judio. Réniyo guy ni inok énda mékédan i kéluhanay galbék guwe sani kéféunur guwe bé de békén Judio.<sup>3</sup> Éndob ménsuwat ro bé galbék guwe. Mélaw i dumo guwe Tito, fiyon fo ké ségétéw békén Judio, énda fénéngés ro de fétilu.<sup>4</sup> Éndob bé béno, wén i de étéw do ubo-ubo saén munur bé Kristowe brab ménamung ro dob begeye, méuyot ro de fo ké tulién. I de ni do étéw, i funa ruwe ménamung dob begeye, inok susiné ro saén ké modor gey bé kitabe niray Moisesese loo ké énda. Brab méuyot ro de ké féwaléy ro begey riféy kitabe, fiyon fo ké ménfukas geyén bé kéodorone bé kitabe tidéw dob Moisesese sabaf bé kéunur geye bé Jesu Kristowe.<sup>5</sup> Éndob énda fo ménagayun gey de, inok énda mésélawék i ségiyowe kétoro bé Fiyowe Uret ténoro gey begom.

<sup>6</sup> Atin i de odoron diyo, énda numana roy de kagén kétoro non katabuwanén. (Féndawét gu bero do odoron non bero kun i odoroy de munur bé Kristowe. Éndob ulandan dob begéne non gétiga ku énda i isu ramigoy Tuluse.)<sup>7</sup> Atin i de ni do odoron gétiga ro fénémili i Tuluse begén inok muret bé Fiyowe Uret dob de békén Judio loo bé kéfénmili i Tuluse bé Pedrowe inok muret dob de Judio.<sup>8</sup> Non i Tuluse fénwaléyén begén apostol dob de békén Judio ségiléw bé kéféwaléy ne bé Pedrowe apostol dob de Judio.<sup>9</sup> Atin i de odoron diyo ro Santiago, Pedro, brab Juan, énggésobuto ro niray i Tuluse begén i ni galbék. Mélaw ménséalamano ro begey Bernabewe fégétanda bé kégéséfagayu keye. Ménséfagayun gey bé i Bernabewe brab begéne magéw gey mangéy muret dob de békén Judio atin i berowe mangéy ro muret dob de Judio.<sup>10</sup> Wén i sébaane saén nongot ro, sani kétabange bé de méskinan do munur bé Kristowe bati dob Jerusalem. Éndob toow fo ményoytu nén témabang bero, bé énda séna ménongot ro.

<sup>11</sup> Éndob amun ménangéy i Pedrowe dob Antiokia, béréh gu dob beene dob adafay de munur bé békén fo fatut i réniyo nuwe.<sup>12</sup> Ay niy réniyo nuwe. Amun énda séna énggumah i de Judio sénugu Santiagowe, i Pedrowe séréngan mama bé de békén Judio. Éndob amun énggumah ron, éndaén

ménsérénga no mama bé de békén Judio. Non mégilak bé de Judio do témoro bé kailangan métuli i de békén Judio.<sup>13</sup> Tidéw béno, i kéluhanay de Judio do munur diyo, ménggilak ro so loo bé kégilak Pedrowe. Mélaw éndaén séréngan ro mama bé de békén Judio do munur so. Atin fiyon i Bernabewe ménamung so. Enda fiyoy réniyo ruwe fiyon fo ké gétiga roy fatute.<sup>14</sup> Amun énggito gu réniyo ruwe ménsébanil bé Fiyowe Uret, bérého kuy Pedrowe dob téngaangay kéluhana ruwe maku, “Pedro, fiyon fo ké i beeme ségétéw gu Judio, éndob ténagak mon i adat i de Judio. Sode mélaw ké féngésé moy de békén Judio modor bé adat i de Judio?” Beeniy kégelé guwe bé Pedrowe.

### *IKéunure*

<sup>15</sup> I begeye, ménumah gey do Judio, békén gey do étéw békén Judio do ménsala.<sup>16</sup> Gido loo, gétiga tom i funay étéwe waléy métintu dob adafay Tuluse. Békén sabaf bé kéodor ne bé kitabe tidéw dob Moisesese. Yamula sabaf saén bé kéunur ne bé Jesu Kristowe. Atin i begeye do Judio, ménunur gey so bé Jesu Kristowe inok waléy gey métintu sabaf bé kéunur geye dob Beene. Békén sabaf bé kéodor geye bé kitabe tidéw dob Moisesese. Non énda i ségétéw waléy métintu sabaf bé kéodor ne bé kitabe.<sup>17</sup> I de begey do Judio, amuk ménwaléy gey métintu sabaf bé Kristowe, giton ménsala gey so ségiléw bé de békén Judio. Éndob kagom fégitungén de ké Kristowey muwite bé salae. Békén i nan!<sup>18</sup> Éndob amuk séfuleu modor bé kitabe tidéw dob Moisesese fiyon fo ké ténagak gun, fégitu guy begéne ségétéwu toow fo ménsala, non énda ménodoru bé kitabe.<sup>19</sup> Maak ménléhuun, atin mélaw éndaén kailanga no modoru bé kitabe tidéw dob Moisesese. Éndob méuyagu non énggédot gu mantuwe umul tidéw dob Tuluse. Atin sabaf bé kéunur guwe bé Kristowe, maak ménsérénganu de méléhu dob kruse, non been i géménantion begén.<sup>20</sup> Mélaw békénén begén i méuyage, yamula méuyag i Kristowe dob begéne. Atin i kéuyag guwe béleewe ni, méuyagu non bé kéunur guwe bé Jesuse Nga i Tuluse. Toow fo mégédaw begén. Ménléhu inok méuyagu.<sup>21</sup> Enda mikau bé kéngédaw i Tuluse. Éndob amuk waléy métintuy kéilawane sabaf bé kéodor ne bé kitabe, énda i atag i kéléhu Kristowe.

## 3

### *Fantag bé kitabe*

<sup>1</sup> Do étéw dob Galasia, toow gom fo du-fang! Sedek fénggélino gom i de étéw man-angguwit begom témagak bé Fiyowe Uret? Toow fo ménkéntay i kétoro guwe begom fantag bé réniyo Jesu Kristowe amun ménléhu

dob kruse. <sup>2</sup> Wén i féngsaié kuwe be-  
gom, ati kégedot gome bé Rémogor i Tuluse?  
Aw sabaf bé kéodor gome bé kitabe tidéw  
dob Moise? Békén! Non gédoté kom i  
Rémogor i Tuluse sabaf saén bé kéféngé-  
lingo gome brab kéunur gome bé Fiyowe Uret  
fantag bé Jesuse. <sup>3</sup> Aw toow gom fo du-  
fang? Ménwaléy gom métintu sabaf bé  
késarig gome bé Rémogor i Tuluse. Aw  
makom ké géumana kom i kétintu gome sabaf  
bé késarig gome bé de lowoh gom? Enda  
fakayén! <sup>4</sup> Aw ménsinggula i de kéfyonon  
énggedot gom sabaf bé kéunur gome bé Je-  
suse? Enda fo damén ménsinggulaén. <sup>5</sup> Aw  
niray i Tulusey Rémogor ne dob begome  
brab rénigo noy de mékégaif galbék dob  
téngaanga kome non nodoro kom i kitabe  
tidéw dob Moise? Enda! Yamula sabaf  
bé kéféngélingo gome brab kéunur gome bé  
Fiyowe Uret fantag bé Jesuse.

<sup>6</sup> Ségiléw so bé ménrigowe dob katufua  
keye Abraham. Non wén i Ménsulate  
Kébéréh i Tuluse mano, “I Abrahame,  
ménunur bé Tuluse. Atin sabaf bé kéunur  
ne, kénarang i Tuluse métintu.” <sup>7</sup> Mélaw  
fatut gésobuto kom i ni: I de étéw munur bé  
Tuluse ségiléw bé kéunur Abrahame, beroy  
de ménwaléy do tintu séfu Abrahame, sani  
de tintu Judio. <sup>8</sup> Wén i Ménsulate Kébéréh  
i Tuluse bé féntunéy Tuluse soy de békén  
Judio sabaf bé késarig ruwe. Mélaw nuret i  
Tuluse dob Abrahamey Fiyowe Uret bé do  
gétah, mano, “Fénagéw dob beeme, féfyoné  
kuy kéluhanay de étéw dob duniyae.” <sup>9</sup> I  
Abrahame ménunur bé Tuluse, mélaw i  
beene fénfuyoy Tuluse. Atin ségiléw so bé ni,  
i kéluhanay de étéw munur, féfyonéy Tuluse  
so bero.

<sup>10</sup> Endob i de étéw sémarig bé kéodoro ruwe  
bé kitabe tidéw dob Moise, mékukum ro.  
Non bang i Ménsulate Kébéréh i Tuluse, “I  
étéwe énda dé moyuno modor bé kéluhanay de  
sugu dob kitabe, kukuméy Tuluse.” <sup>11</sup> Mélaw  
gésobuto tom bé énda i ségétéw ménwaléy  
métintu dob adafay Tuluse sabaf bé kéodor  
ne bé kitabe tidéw dob Moise. Non wén  
soy Ménsulate Kébéréh i Tuluse mano, “I  
étéwe ménwaléy métintu sabaf bé kéunur  
ne bé Tuluse, méuyag taman sa taman.”  
<sup>12</sup> Endob i étéwe sémarig bé kéodoro nuwe  
bé kitabe, békén ségétéw sémarig bé Tuluse.  
Non wén i Ménsulate Kébéréh i Tuluse mano,  
“I étéwe modor sénga tékelid bé kéluhanay  
de sugu i kitabe tidéw dob Moise, méuyag  
taman sa taman.”

<sup>13</sup> Endob gétiga tom bé énda i ségétéw  
gérigo bé nan. Gido loo, i Kristowe fénukasén  
betom inok énda mékukum tom bé kitabe.  
Non i Kristowe ménkukumén génantino no  
betom. Non wén i Ménsulate Kébéréh i Tu-  
luse mano, “I étéwe ménléhu bénitin dob  
kayéwe, ménrigo non kénukum i Tuluse.”

<sup>14</sup> Atin i funa Jesuse féndayaén i kéféléhue de  
loo bé nan, inok i kéfyonone fénasad i Tuluse  
nirayén dob Abrahame, irayén so dob de  
békén Judio sabaf bé Jesu Kristowe. Mélaw  
gédoté tom i Rémogor i Tuluse fénasadén  
sabaf bé kéunur tome bé Jesu Kristowe.

<sup>15</sup> Do dumo gu, ay niy ufamawe. Amuk  
wén i ruwo gétéw ménséfagayun brab rénigo  
roy fasade bé késulat ruwe bé de dawét  
ro, énda i gékédan de taloo no géuman de.  
<sup>16</sup> Atin loo so bé niy, rénigoy Tuluse fasad  
dob Abrahame brab dob séfu ne. I Ménsulate  
Kébéréh i Tuluse énda ménbéréhén mano,  
“de séfuém” non énda médo no. Ménbéréh  
saén mano, “séfuém”, atin i atag i ni ségétéw  
saén, sani Kristowe. <sup>17</sup> Atin ay niy atag i  
bénréh guwe ni. I Tuluse rénigo noy fasade  
dob Abrahame. Atin fot ratuh bra téléw folo  
gébélintuwa tidéw béno, énggumah i kitabe  
tidéw dob Moise. Endob i kitabe énda  
gékédana noy fasade non toow fo tumanéy  
Tulusey fasad ne. <sup>18</sup> Non amuk iray i Tu-  
lusey de kéfyonon sabaf bé kitabe, békénén  
sabaf bé fasade. Endob i toowe, niray i  
Tulusey de kéfyonon dob Abrahame sabaf  
saén bé fasad ne.

<sup>19</sup> Atin amuk loo bé nan, ati ulane bé  
kitabe? Niray i kitabe inok giton i sala  
i étéwe taman gégumah i séfu Abrahame,  
sani fénasad i Tuluse. I ni kitab i Tuluse,  
fénuwitén bé de télaki mangéy dob ségétéwe  
kéfédéwan sani Moise. <sup>20</sup> Endob amun  
niray i Tulusey fasad ne dob Abrahame énda  
kailanga noy kéfédéwane non ségétéw saén i  
réménigowe bé fasade, sani Tuluse.

<sup>21</sup> Aw makom ké énda géséfagayun i kitabe  
brab fasad i Tuluse? Kagom fégitungén de  
loo bé nan. Non amuk i kitabe muwit umul  
magufusa dob betome, fakay tom waléy  
métintu sabaf bé kitabe. <sup>22</sup> Endob wén i  
Ménsulate Kébéréh i Tuluse bé i kéluhana  
tome do kélawan dob duniyae ni mékukum  
tom sabaf bé de tete rigoné tom. Mélaw  
i Tuluse ténuma noy fasad ne dob betome  
sabaf saén bé kéunur tome bé Jesu Kristowe.  
Atin féfyoné no betom sabaf saén bé kéunur  
tome.

<sup>23</sup> Amun énda séna fénggétiga no betom  
i mantuwe aguwon mangéy dob lawayo,  
sani kéunure bé Jesuse, maak ménférisu tom  
dob kitabe. Atin énda géésut tom taman  
énda fénggito no betom i mantuwe aguwon.  
<sup>24</sup> Mélaw kitab i méguléw betom taman dob  
ké gumah Kristowe inok waléy tom métintu  
sabaf bé kéunur tome de. <sup>25</sup> Atin béleewe ni  
ménwaléy tomén munur bé Kristowe, mélaw  
i kitabe éndaén féguléwo no betom.

<sup>26</sup> Atin ménwaléy gom do nga i Tuluse  
sabaf bé kéunur gome bé Jesu Kristowe.”

27 Atin ménfébautis gom inok féténgténg gom i kéunur gome bé Kristowe. Mélaw ménwaléy gom loo bé Kristowe non ménwaléy gom do dumo no. 28 Mélaw i de Judio brab de békén Judio, ségiléw ro. Fiyon i de rifén brab de békén rifén, do lagéy brab do libun, falan ro ségiléw. I kéluhana tome do munur bé Kristowe ségiléw-giléw tom dob adafay Tuluse. 29 Amuk do kuyug Kristo gom, ménwaléy gom so do maak séfu Abrahame brab gédoté kom i kéluhanay fénsad i Tuluse.

#### 4

1 Ufama, amuk wén i kawasa étéw brab ménléhu atin wén i ségétéw ngaén fénledén. I nan nga, amuk ménguwéd séna, maak sugu-suguén saén, fiyon fo ké been i gefee bé kéluhanane. 2 Brab wén i do sénarigoy méntélatae bohén témalima de brab mégatur de. Endob amuk dakélén i ni nga brab gégumahén dob idade bénréh i boh ne, gédoté non i kéluhanane. 3 Ségiléw so bé betome, amun énda séna munur tom bé Kristowe, maak do rifén tom, non bé do gétah nodoro tom i de rémogor do uléw dob duniyae ni. 4 Endob amun énggumahén i fatute gai, i Tuluse sénuguén i Nga ne dob duniyae ni. Atin ménwaléy kéilawan bé kéumah ne dob ségétéwe libun. Tidéw béno, nodoro noy kitabe tidéw dob Moisesse. 5 Réningo noy ni inok fukase no betom do étéw maak do ménférisu dob kitabe inok waléy tom do nga i Tuluse.

6 Atin i Tuluse sénuguén i Rémogor i Nga ne mangéy bati dob de fédéw tom. Been i émbéréhe dob de fédéw tom mano, “Abay gu Tulus”. Réningoy Tulusey ni inok gétiga tom do ngaén so betom. 7 Mélaw békén tomén do rifén, yamula ménwaléy tom do nga i Tuluse. Mélaw gédoté tom i kéluhanay éntingayéne kay de ngaén.

8 Bé do gétah, énda séna gélolo gom i Tuluse. Mélaw bé do no gai, rifén gom dob kéluhanay de tabaré kom do tulus, éndob békén tintu Tulus. 9 Endob béleewe ni, gélolo gomén i Tuluse non fénémilién begom. Mélaw sedek méuyot gom séfule dob de tafay kéféngintulus gom, énda i lantékén? Aw méuyot gomén man waléy rifén ségule dob de ni? 10 Sedek fégadata kom i de gai, do bélintuwa brab do térésang kélungonon brab do térésang sabaf bé kitabe? 11 Ménbukuu fantag bé begome non maak ménsingula i kéluhanay de ténoro gu begom.

12 Ongoté ku begom do dumo gu, iring gom begén, loo bé kéiring guwe begom bé kétagak guwe bé kitabe tidéw dob Moisesse. Atin énda séniyaw gom begén, 13 fiyon fo ké énggétiga kom i kédéruu kuwe bé do no do gai. Endob been i niy funa kuwe énggéuret bé Fiyowe Uret dob begome bé gésunguwe.

14 Endob énda séniyaw gom begén taloo non ménika gom begén, fiyon fo ké ménkéregéngan gom fo toow sabaf bé kédéruu kuwe. Yamula ténayakuf gom begén maak ségétéw télakiy Tuluse look maak begéney Jesu Kristowe. 15 Brab toow gom fo ménoror bé béno. Tintu gétiga ku ké amuk fakay sa damén, fiyon i de moto gom iray gom fégétabang begén. Endob sedek ménbaleng i de fédéw gom? 16 Aw ménsébanil gom begén sabaf bé kéuret guwe bé toowe?

17 I de ségiyo étéw témoro begom bé de énda toow, fiyoy de rignoné ro dob begome, éndob énda fo fiyoy funa ruwe rémigo bé de ni. Méuyot ro de ké tagaké kom begén inok bero saén i de dumo gom séloyuk. 18 Enda tete i késédumone amuk fiyoy funane de. Méuyotu de ké séloyuk gom bé kéluhanay étéwe, békén ké begén saén. Brab amuk énda diyoy dob begome, fatut wén i do ségiyo do dumo gom séloyuk. 19 Maak do gulaané ku do nga gu begom. Ségiléw bé libune kéaran ongoté noy kéumah i nga ne, démawét i fédéw guwe sabaf bé begome taman ségiléw i adat gome bé Kristowe. 20 Toowu fo méuyot damén ké diyoy dob begome béleewe ni, inok séuret-uréte tom i fiyowe. Non émbukuu fo toow béni. Atin beeniy funa kuwe sémulat loo bé ni.

21 I begome do méuyot modor bé kitabe, fétuntay gom i atag i kitabe. 22 Non ménbéréh i kitabe bé i Abrahame wén i ruwo gétew ngaén lagéy. I ségétéwe de ngaén bé bawag ne rifén féndawét Agar, atin i ségétéwe de ngaén bé bawag ne békén rifén féndawét Sarah. 23 I kéumah i nga ne bé libune rifén ségiléw bé kéumah i kéluhanay de nga. Endob i kéumah i nga ne bé libune békén rifén, ménrigo non fénsad i Tuluse bé Abrahame fiyon fo ké toow fo lukésén i Abrahame brab bawag ne Sarah brab énda i nga ro. 24 I de ni do ruwo gétew libun maak binuwaya. Ay niy atag ne. Wén i ruwo gékélasi do étéw, do étéw riféy kitabe brab de étéw békén riféy kitabe. I libune féndawét Agar, ségiléw bé tafaye aguwon, sani kéodore bé kitabe énggédot Moisesse dob tuduke Sinai. Brab i kéluhanay de ngaén, do rifén non i Agare rifén. 25 I riféne ni libun Agar anlung i tuduke Sinai dob Arabia, ségiléw bé de Judio dob Jerusalem non beroy de riféy kitabe tidéw dob tuduke Sinai. 26 Endob i bawag Abrahame féndawét Sarah békén rifén. Maak do ngaén betom non békén riféy kitabe betom. 27 Non bang i Ménsulate Kébéréh i Tuluse, “I beeme libun énda énggéfégénga go, oror go! Fiyon fo ké énda ménkédawétan go bé kékéumaha muwe, fatut mékes go bé kéoror me! Non fiyon fo ké ténagak i bawag me beem, toow na fo médooy kaame do nga bé libune wén i

bawagén.”

<sup>28</sup> Mélaw do dumo gu, i begome do nga i Tuluse so sabaf bé fasad ne, ségiléw bé Isake ménumah dob Sarahe non fénasad i Tuluse bé Abrahame, fiyon fo ké lukés ron. <sup>29</sup> Atin bé béno, i nga Abrahamé ménumah loo bé kéumah i de nga dob duniyae ni, fénrasayén i tuwaréy ne ménumah sabaf bé tabang i Rémogor i Tuluse. Ségiléw so bé de mériqo dob betome béleewe ni non i de riféy kitabe férasayé ro betom. <sup>30</sup> Ay niy Ménsulate Kébéréh i Tuluse mano, “Féféraréyém i libune rifén brab nga ne, non i nga i riféne énda fakayén gégedot bé de languntamah iray dob nga i békéne rifén. Non i kéluhanane kay nga i békéne rifén.” <sup>31</sup> Mélaw, do dumo gu, békén tom maak do nga rifén. Yamula i betome maak do nga i békéne rifén.

## 5

<sup>1</sup> I Kristowe ténangéyén betom. Békénen do riféy kitabe betom. Non éndaén kailanga tom i modore bé kitabe. Mélaw kagom man waléy riféy kitabe ségule.

<sup>2</sup> Begéney Pablowe, mélaw fégélino gom i béréhé kuwe ni begom. Amuk sarigo kom i kétulie begom inok méfukas gom bé de sala gom, énda fukasé Kristowe begom. <sup>3</sup> Atin géléé ku man begom ségule. I étéwe fétuli inok méfukas bé de salaén, kailanga no soy modore bé kéluhanay kitabe. <sup>4</sup> I begome do sémarig bé kéodoro kome bé kitabe inok waléy gom métintu, énggésésuway gom bé Kristowe, brab énda tayakufé kom i kégedaw i Tuluse. <sup>5</sup> Endob i begeye, munur gey bé Kristowe. Mélaw sémarig gey bé Rémogor i Tuluse féwaléy no begey do métintu sabaf bé kéunur gey. <sup>6</sup> Non amuk munur tom bé Jesu Kristowe, ulanden ké métuli tom look énda. I toowe saén mélaga i kéunur tome bé de Jesuse. Atin giton i kéunur tome bé de kégedaw tom.

<sup>7</sup> Bé do géta, tintu fo munur gom bé toowe kétoro. Ati ménanangguwite begom sésuway bé toowe kétoro? <sup>8</sup> I kéfanangguwite begom sésuway bé toowe, békén galbék i Tuluse. Non Been i téménawage begom inok munur gom de. <sup>9</sup> I tugie kétoro begom ségiléw bé fégfééruke bé fane. Non fiyon fo ké kloh saén i fégfééruke de, mélégéb dob kéluhanay fane. <sup>10</sup> Endob fiyon fo ké loo bé nan, sémarigu bé Kadnane tabanga no begom inok énda munur gom bé de ségiyo kétoro saliyo bé kagéne kétoro. Atin fantag man bé nan étéw fénbukuén begom bé de tugi kétoro, gétiga ku kukuméy Tulusey nan étéw.

<sup>11</sup> Do dumo gu, wén keeyén i émbéréh begom bé toroé ku soy fatut gom fétuli. Endob amuk toow i nan, sedek taman so béleewe niy kéférasay i de Judio begén? Non taman so béleewe ni, mékérit ro begén bé kétoro

guwe fantag bé kéléhu Kristowe dob kruse, sani funa tome saén méfukas bé de sala tom. <sup>12</sup> I da nan do étéw ménfébuku begom bé de tugi kétoro ro bé fatut gom fétuli, méuyotu de damén ké fékafun ron fo!

<sup>13</sup> Do dumo gu, fénémili i Tuluse betom inok méfukas tom dob kitabe. Endob fiyon fo ké loo bé nan, énda fatut odoró tom i de tete kétayay de lowoh tom. Yamula fatut ségedaw tom inok démoyun tabanga tom i de dumo tom munur bé Jesuse. <sup>14</sup> Non i kéluhanay de sugu dob kitabe tidéw dob Moisee géodoron so amuk rigonén i ni sébaan sugu, “Fégedaw go bé dumo muwe, loo bé kégedaw me bé kaame lowoh.” <sup>15</sup> Endob amuk démoyun gom sédéel brab séfétete fédéw, binasané kom i kéféngintulus gome.

<sup>16</sup> Mélaw ay niy béréhé kuwe begom: odoró kom i fémandu i Rémogor i Tuluse, atin mélaw énda odoró kom i de tete kétayay de lowoh gom. <sup>17</sup> Non i de tete kétayay de lowoh tom toow fo sébanil bé kétayay Rémogor i Tuluse. Enda fo séfagayun ro. Mélaw wén i no, énda gérigono tom i fiyowe kétaya tom rigonén. <sup>18</sup> Endob amuk odoró kom i fémandu i Rémogor i Tuluse, énda kailanga kom i modore bé kitabe tidéw dob Moisee.

<sup>19</sup> Gélolo tom i de tete kétayay de lowoh tom, sani do kébigaén, brab do toow fo tete do rigonén, <sup>20</sup> brab kéféngadaf bé de kéninontow, brab do kébéliyan brab do rémamut, brab do étéw démoyun mérarék brab sétiboh, do médaléw, do sékérit, brab do arumén, brab do sébaad-baad atin do sébanil ro, <sup>21</sup> brab do mingar, brab do molon, brab do sérimbur, brab do ségiyo na tete do rigonén. Béréhé ku man begom ségule, i de ni do étéw énda géahur ro dob kéféguléw i Tuluse.

<sup>22</sup> Endob gélolo tom soy de étéw modor bé fémandu i Rémogor i Tuluse. Beroy de étéw gulaané roy de dumo ro, brab moror ro, brab fiyoy de fédéw ro, brab témingkél ro ongot-ongot, brab mégédaw ro, brab rigoné roy fiyowe, brab gésarigon ro, <sup>23</sup> brab térifantad ro, brab énda modor ro bé de tete kétayay de lowoh ro. Amuk rigoné tom i de ni, énda félisé tom i de sugu tidéw bé do géta. <sup>24</sup> Atin i kéluhana tome do étéw ka Jesu Kristowe, maak fénléhu tomén i de tete adat tom dob krus Jesuse. Mélaw ténagak tom i tafaye adat tom brab de tete kétaya tom. <sup>25</sup> I Rémogor i Tulusey mirayane betom bé mantuwe umul, mélaw fatut odoró tom i fémandu ne. <sup>26</sup> Katom félangka-langka, taloo no séfékérit taloo no séingar.

## 6

<sup>1</sup> Do dumo gu, amuk énggétékasa kom ménsala i dumo gome munur, fatut i de



begom fémanduoy Rémogor i Tuluse géle gom inok énda tausén mésala. Endob fatut mélémak saén i kébéreh gome de. Brab ingat gom so inok énda so gésala gom. <sup>2</sup> Atin fatut sétabang gom sénga tékélid, non amuk rigoné kom i ni, modor gom bé sugu Kristowe. <sup>3</sup> Atin amuk wén i étew manok tintunén fo fiyoy adat ne éndob énda fo toowén, tugio noy kaane lowoh. <sup>4</sup> I kéluhana kome fatut susi gom i de lowoh gom. Amuk fiyoy de rigoné kom, fatut moror gom de. Endob kagom usarén i adat i dumo gome fégétémbu gom bé kagome adat. <sup>5</sup> Non i séngae ségétéw étew mékukum dob adafay Tuluse sabaf bé de rénigo no. Mélaw kagom sékukum.

<sup>6</sup> I de étew ténoro fantag bé Jesuse, fatut tukidé roy kéfiyono ruwe dob témoroé de.

<sup>7</sup> Kagom munur bé éndae toow. Enda i ségétéw géfagakara noy Tuluse. Gétiga noy kéluhanane. Mélaw buluk atiy ohokéy ségétéwe, been soy nan i kétéwé nuwe. Atin loo so bé ni, i Tuluse irayén i fatute dob séngae ségétéw étew sabaf bé rénigo nuwe. <sup>8</sup> I étewe rémigo bé tete non odoro noy tete kétayay lowoh ne, gédoté noy kéléhue énda i tamana no. Endob i étewe rémigo bé kétayay Rémogor i Tuluse, gédoté noy umule magufusa tidéw dob Rémogor i Tuluse. <sup>9</sup> Mélaw katom lugotén rémigo bé fiyowe. Non amuk fédayday tom bé fiyowe rigoné tom, gédoté tom moso i fiyowe baras tom tidéw dob Tuluse. <sup>10</sup> Mélaw fatut dé moyun tom rémigo bé fiyowe dob kéluhanay étewe, brab labi na fo dob de dumo tom munur bé Jesuse.

<sup>11</sup> Téngténg gom i kédakél i de késulat gu, non begén i sémulat bé de ni géfuray kébéreh bé de kagén kémér. <sup>12</sup> I de étew fégésé ro begom fétuli, félangka-langka ro brab méuyot ro saén ké dayéwéy de dumo ro bero kéilawan. Méuyot ro fétuli begom non mégilak ro ké férasay i de dumo ro bero Judio sabaf bé késarié ruwe bé kéléhu Kristowe. <sup>13</sup> I de étew témoro bé fatut gom fétuli inok modor gom bé kitabe, i berowe énda so mon modor ro dé moyun bé kitabe. Méuyot ro de ké fétuli gom inok dayéwéy de dumo ro bero Judio sabaf bé kéfétuli gome. <sup>14</sup> Endob i begéne, i kagéne saén funan fédayéw-dayéw i Kadna tome Jesu Kristo sabaf bé kéléhu ne dob kruse. Non éndaén rifénu dob de tete kétayan dob duniyae ni brab éndaén géfégésoy de tete kétayan begén rémigo sala, sabaf bé kéléhu Jesuse dob kruse. <sup>15</sup> Ulanden ké métuli i ségétéwe étew, look énda. I toowe saén mélaga i kéwaléy i adate mantu sabaf bé Kristowe. <sup>16</sup> Atin i de étew modor bé ni ténoro gu, mégédaw damén i Tuluse bero brab iraya no damén bero bé métanéke fédéw, loo so dob kéluhanay étew i Tuluse.

<sup>17</sup> Atin ay niy tamfaday béréhé kuwe begom dob ni sulat. Tidéw béleewe ni, fiyo damén ké éndaén i ségétéw émférégenon

begén. Non i de laas gu dob lowoh guwe ni, beeniy émfégitowe bé begéney tintuwe sugu-sugué Jesuse. Non i de étew sébanil bé Jesuse bénadas ro begén médoé gule.

<sup>18</sup> Do dumo gu, mégédaw fo damén i Kadna tome Jesu Kristo begom kéluhanan. Amen.  
*Pablo*

## I Sulat Pablowe dob de Munur bé Kristowe dob Efeso

Ay niy sébaane bé de sénulat Pablo, sani ménbantuge muret fantag bé Jesu Kristowe. Tafayén séménugud i Pablowe dob ingéde Efeso, atin wén i do étéw diyo ménwaléy ro do munur bé Jesu Kristowe sabaf bé kéuret ne. Séménulat i Pablowe dob berowe.

Amun sénulat Pablowey ni, ménférisu de nén sabaf bé kéuret ne fantag bé Kristowe. I funa Pablowe séménulat bé ni, non énggélíngoo noy éndaén séodor-odor i de fédéw i de munur diyo. Endob mika i Pablowe de ké énda sétiman i fédéw i de kéluhanay de munur, fiyon fo ké do Judio ro look do békén Judio ro. Mélaw sénulatén i ni do de békén Judio do munur bé Kristowe. Ténoroén bero bé fatut sétiman fédéw i kéluhanay de munur bé Jesu Kristowe, non maak sébaan saén i lowoh ruwe, atin i Jesuse, Been i uléw ruwe.

<sup>1</sup> Begéney Pablowe, sani apostole sénugu Jesu Kristowe non beenyi ketaay Tuluse. Sulata ku begom do dumo gu munur bé Jesu Kristowe do bati dob Efeso, sani de énda témérén modor bé kétaya nuwe.

<sup>2</sup> I Abay tome Tulus brab Kadnane Jesu Kristo, mégédaw ro damén begom brab iray ro damén begom i métanéke fédéw.

<sup>3</sup> Toow fo fésalamat tom bé Tuluse sani Abay i Kadna tome Jesu Kristo. Non nirayén betom i kéluhanay kéfiyonone dob lawayo sabaf bé kéunur tome bé Kristowe. I de ni kéfiyonon kay de rémogor tom, békén kay de lowoh tom. <sup>4</sup> Bé do géta, amun énda séna ménlimbag i duniyae de, fénémili i Tuluse nén betom sabaf bé Kristowe inok waléy tom do méntintu étéw dob adafa nuwe énda i do sala tom.

<sup>5</sup> Atin non toow fo mégédaw betom, bénantakén i émféwaléye betom do ngaén sabaf bé rénigo Jesu Kristowe. Rénigo noy ni non been i niy kétaya nuwe. <sup>6</sup> Dayéwé tom i Tuluse non bé fiyowe kégédawén betom bé kéiray ne bé toowe fo gulaané no Ngaén, Jesu Kristo. <sup>7</sup> Non sabaf bé kéléhu Kristowe, fénukasén betom dob de sala tom, non fénsagad non i de sala tom. Toow fo mégédaw i Tuluse! <sup>8</sup> Enda gétémunon i kégédaw i Tuluse betom! Atin fénggétiga no brab fénggésobuté betom i fantage bé Beene. <sup>9</sup> Atin fénggétiga no betom i ménbunéye bantakén bé Kristowe. Fénggétiga no betom non been i niy kétaya nuwe rigoé no. <sup>10</sup> Atin ay niy bénantak ne rigoé no. Amuk gégumahén i fatute gai, féwaléy noy kéluhanane dob lawayo brab dob duniyae ni sétiman uléw, atin Kristowey uléw ruwe.

<sup>11</sup> I kéluhanay de rénigoy Tuluse, rénigo non non kétaya no brab bénantakén rigoé no. Atin been soy funa nuwe fénémilién betom bé énda séna ménlimbag i duniyae de inok waléy tom do étéwén sabaf bé kéunur tome bé Kristowe. <sup>12</sup> Mélaw i begeyo do Judio do sungu munur bé Kristowe, toow fo dayéwé key i barakatane Tulus.

<sup>13</sup> Ségiléw so dob begome. Non amun énggélíngoo kom i toowe kétoro sani Fiyowe Uret fantag bé kékufase dob de sala, ménunur gom so bé Kristowe. Mélaw i Tuluse ni-rayén begom i Rémogor ne inok bati dob de fédéw gom loo bé fénasad ne. Rénigo noy ni inok wén i tanda bé kékufas gome. <sup>14</sup> Atin i Rémogor i Tuluse ni, Been soy maake tising inok tintu gétiga tom tumanéy Tulusey kéluhanay fénasad ne irayén betom brab fégilidé noy kékufas ne betom dob de sala tom. Toow fo dayéwé tom i barakatane Tulus!

<sup>15</sup> Mélaw amun énggélíngoo kuy fantage bé kéunur gome bé Kadnane Jesus brab kégédaw gome bé kéluhanay de dumo gom munur, <sup>16</sup> énda fo témérénu fésalamat dob Tuluse sabaf bé begome. Atin dasala ku begom dob Tuluso. <sup>17</sup> Atin ongoté ku dob Tulus i Kadna tome Jesu Kristo sani barakatane Abay tom, bé irayén begom i Rémogor ne. Atin i Rémogor i Tuluse ni féwaléy no begom métilédted brab féfégétiga no begom i Tuluse inok toow fo waléy gétiga kom i Tuluse. <sup>18</sup> Ongoté ku so dob Tuluso, féfégésobuté no begom inok gétiga kom i de médo do kéfiyonon gédoté tom. Been i inam tome sabaf bé kékémili ne betom inok munur tom bé Kristowe. <sup>19</sup> Atin démasalu so inok waléy gétiga kom i kédakél i barakat i Tuluse témabang betom do munur. Atin i ni barakat i Tuluse, <sup>20</sup> funa no énggéfétibule bé Kristowe brab énggéfédijat de mangéy mésaréy dob kuwono nuwe. <sup>21</sup> I Kristowe, Beene foy toowe gérotor méguléw. Toow na fo gérotor bé kéluhanay de datu, do odoron, do amu, brab do barakatan étéw. Atin i dawét ne toow na fo gérotor bé kéluhanay de dawét dob de ni do gai brab dob de gai gégumah moso. <sup>22</sup> Atin i Tuluse, fénwaléyén i Kristowe méguléw bé kéluhanane inok tabangé no betom do munur de. <sup>23</sup> Atin i kéluhana tome do munur, maak betom i lowoh Kristowe brab Been i uléw tome. Enda i kulang dob Beene brab énda i kulang dob lawayo taloo no dob fantade sabaf bé Beene.

## 2

<sup>1</sup> Bé do géta, maak do ménléhu gomén sabaf bé de sala gom. <sup>2</sup> Bé béno, ménodor gom bé de tete adat i do étéw sébanil bé Tuluse. Brab ménodor gom bé Satanase sani datu i de barakatan saitan dob lawayo

brab méguléw bé de étéw énda modor ro bé Tuluse. <sup>3</sup> I toowe, bé gétahe, kéluhana tom ménamung bero modor bé de tete kétayay de lowoh tom brab de tete itunga tom. Atin bé béno, ségiléw tom so bé kéluhanay kéilawane, non mékérít i Tuluse betom, brab fatut mékukum tom.

<sup>4</sup> Endob i Tuluse toow fo ménuray i na nuwe betom brab toow fo mégédaw betom. <sup>5</sup> Mélaw fiyon fo ké maak ménléhu tom sabaf bé de sala tom, nirayén so betom i mantuwe umul séréngan bé kéfétébule ne bé Kristowe. Mélaw i funa tome saén méfukas dob de sala tom non bé kégedaw i Tuluse. <sup>6</sup> Sabaf ménwaléy tom do dumo Kristowe, maak méntébule tom séréngan de inok mamung tom so dob Beene méguléw dob lawayo. <sup>7</sup> I funa nuwe réménigo bé ni, inok féféngtengén taman sa taman i dakéle kégedawén betom bé Jesu Kristowe. <sup>8</sup> Non ménfukas tom dob de sala tom sabaf bé kégedaw i Tuluse amun ménunur tom. Ménkédan i kékukum ne betom békén sabaf bé galbék tome, yamula nirayén betom i umule magufusa sabaf saén bé kégedaw ne. <sup>9</sup> Mélaw énda géfélangk-langka tom sabaf bé kéfukas tome, non énda ménfukas tom dob de sala tom sabaf bé fiyowe galbék tom. Yamula sabaf saén bé gedaw i Tuluse. <sup>10</sup> Sabaf bé kéunur tome bé Jesu Kristowe, lémbag i Tuluse betom inok wén i mantu umul tom brab mantu adat tom. Fénwaléyén betom mantu inok rigoné tom i fiyowe galbék ténafayén rigoné tom.

<sup>11</sup> I de begom do békén Judio, féfétedém gom i sunguwe goho kom. I de Judio, rigoné roy adat ruwe fétuli (sani tanda i lowoh ruwe), atin fédawét ro begom do “Békén tuli”. <sup>12</sup> Bé béno, bé énda séna munur gom, ménsésuway gom bé Jesu Kristowe, brab énda mén-amung gom dob de étéw fénémili i Tuluse. Brab békén kagom i fasad i Tuluse bé de étéwén. Bé béno, fiyon fo ké méuyag gom dob duniyae ni, énda i inam gom brab énda gélolo gom i tintuwe Tuluse. <sup>13</sup> Endob béleewe ni, munur gomén bé Jesu Kristowe funa kom ménwaléy do dumo no. Mélaw éndaén mérayu gom dob Tuluse non féfégedét i Tuluse nén begom sabaf bé kéléhu Kristowe génantino no begom.

<sup>14</sup> Sabaf bé Kristowe, i begeye do Judio brab de begom do békén Judio, ménwaléyén sébaan i uléw tome. Mélaw éndaén sébanil tom brab ménwaléy tomén sédumon sabaf bé kéléhu Jesu Kristowe dob kruse. <sup>15</sup> Atin amun ménléhuén, fénukasén betom inok éndaén kailanga tom i modore bé de sugu i kitab i de Judio. Atin i betome do ruwo gékélassi do étéw, fénwaléyén betom sébaan mantu gékélassi do étéw ménodor dob Beene. Mélaw ménkédanén i késébanil tome. <sup>16</sup> Atin kéndá noy késékérít tome do Judio brab do

békén Judio sabaf bé kéléhu ne dob kruse. Atin fénwaléyén betom ségékélassi do étéw inok séfule tom méngadaf bé tintuwe Tuluse. <sup>17</sup> I Kristowe ménanagéy dob duniyae ni brab nuretén i Fiyowe Uret fantag bé kékéday kékérít i Tuluse. Nuretén i ni dob begeye do Judio do gédét dob Tuluse loo so dob begome do békén Judio do mérayu dob Tuluse. <sup>18</sup> Atin sabaf bé kéunur tome bé Kristowe, i betome, do Judio brab do békén Judio, fakay tom géfégedét dob Abaye Tuluse sabaf bé tabang i Rémogor ne.

<sup>19</sup> Mélaw i begome do békén Judio, éndaén sésuway gom bé de étéw i Tuluse. Yamula ménwaléy tom sédumon sétiman Abay sani Tuluse, sabaf bé kéunur tome bé Kristowe. <sup>20</sup> Atin i betome do munur bé Kristowe, ségiléw tom bé sébaane lawi féntindég i Tuluse dob sébaane dakél batéw. I Kristowe, Been i nan i maake batéw. Atin i de apostol brab de sénarigoy Tuluse muret bé kébéréh ne, beroy de maak do liléy i nan lawi. <sup>21</sup> Mélaw émbagér i ni lawi sabaf bé Jesu Kristowe, brab Beene funa tome ménwaléy lawi i Tuluse féngadafan de. <sup>22</sup> Atin i begome do békén Judio brab de kéléhana tom munur, féwaléyéy Tuluse betom sébaan lawi fébatio no bé Rémogor ne.

### 3

<sup>1</sup> Atin sabaf bé kéléhanay de ni, dasala ku begom dob Tuluse. Atin i begéne Pablo ségétéw munur bé Jesu Kristowe, ménférisuwu non féférisu ro begén amun nuret gu begom do békén Judioy fantage bé Jesuse. <sup>2</sup> Gétiga ku énggélíngoo kom i kégedaw i Tuluse begén bé sénarigén dob begéney ni galbék muret dob begome fantag bé Kristowe inok méfukas gom so. <sup>3</sup> Bé do gétahe, ménbunéy i bantak i Tuluse. Endob fénggétiga no begén. Sénulat gun begom i klohe fantag bé de ni. <sup>4</sup> Atin amuk gébasana kom i sulat guwe ni, gétiga kom i kégésobut guwe bé ni ménbunéy kétoro fantag bé Kristowe. <sup>5</sup> Bé do gétahe, i Tuluse énda fénggétiga no dob de étéw i fantage bé ni ménbunéy. Endob béleewe ni, dob kétabang i Rémogor ne, fénggétiga noy ni dob begeye do apostol brab dob de sénarigo no muret bé kébéréh ne. <sup>6</sup> Atin ay niy ni ménbunéy. I begome do békén Judio, féfiyonéy Tuluse so begom loo so bé de Judio, sabaf bé kéunur gome bé Fiyowe Uret. Atin mélaw ménwaléy tom maak sétiman lowoh brab Kristowe uléw. Mélaw waléy so kagom i de fasad iray i Tuluse bé de munur bé Jesu Kristowe.

<sup>7</sup> Atin i begéne, fénémili i Tuluse begén inok waléyu sugu-sugué no magéw mangéy muret bé Fiyowe Uret. Atin i Tuluse fériyo no begén i ni galbék sabaf bé kégedaw ne begén brab sabaf bé barakat ne ménggéféaléy begén sugu-sugué no.

<sup>8</sup> Begéney toowe fo gérifantad bé kéluhanay de munur bé Kristowe. Gido loo, fénfiyoy Tuluse begén bé késugu ne begén mangéy dob de bekén Judio muret bé Fiyowe Uret fantag bé de toow fo fiyo do kéfiyonon gédotén sabaf bé kéunure bé Kristowe. <sup>9</sup> Brab sénuguén begén inok féfégesobut gu dob kéluhanay de étéw i fantage bé kétumay Tuluse bé de bantakén. I Tuluse, sani léménimbage bé kéluhanane, bénunyéy i bantak ne bé do getah. <sup>10</sup> I funa nuwe bénunyéy i bantak ne, inok bé béleewe ni usaré no betom do munur bé Kristowe féfégétiga no dob de barakatan do odoron do méguléw dob lawayoy fantage bé de médoos do kégétigay Tuluse. <sup>11</sup> I funa nuwe réménigo bé ni, non tumané noy bénantak ne bé do gétaéh bé énda séna ménlimbag i de éntingayén de. Atin ténuma non béleewe ni nusarén i Kadna tome Jesu Kristo. <sup>12</sup> Atin ménwaléy tom do dumo Kristowe sabaf bé kéunur tome de. Mélaw éndaén mémala tom fégédét dob Tuluse. <sup>13</sup> Mélaw, do dumo gu, ongoté ku dob begome, bé kagom tete i de fédéw gom bé kérasay guwe ni bé kétabanga kuwe begom. Yamula fatut moror gom de non kéfiyono kom i funa kuwe mérasay inok féfiyonéy Tuluse begom.

<sup>14</sup> Amuk fégitungé kuy kéluhanay de rénigoy Abaye Tulus dob betome, lémingkuwédu brab démasalu dob Beene. <sup>15</sup> I kéluhanay de munur dob duniyae ni taloo no dob lawayo, ténawagéén betom do étéwén. <sup>16</sup> Atin ongoté ku dob Tuluse bé usaré noy dakéle barakatén féféfébagér bé de fédéw gom bé barakat i Rémogor ne. <sup>17</sup> Brab ongoté ku so bé fébatié noy Kristowe dob de fédéw gom sabaf bé kéunur gome. Atin ongoté ku so bé fébagéré noy de kégedaw gom, <sup>18</sup> inok i begome brab kéluhanay de dumo tom munur bé Kristowe gédoté tom i kégétigane inok gésobuto tom i kédakél i kégedaw Kristowe betom. <sup>19</sup> Hoo, méuyotu de ké gétiga kom i kégedaw ne, fiyon fo ké énda i ségétéw étéw tintu gésobut de fo, inok énda téméréén bati i Tuluse dob de fédéw gom brab énda so téméréén i Tuluse mémanduon begom inok maak ménféno gom bé tintuwe Tulus.

<sup>20</sup> Dayéwé tom i Tuluse, sani témabangane betom bé barakat ne, brab toow na fo médooy gérigono nuwe bé de ongoté tom brab de fégitungé tom. <sup>21</sup> I kéluhana tome do munur brab i Jesu Kristowe, dayéwé tom damén i Tuluse taman sa taman. Amen.

#### 4

<sup>1</sup> Mélaw i begéne, sani ménférisuwe sabaf bé rénigo guy galbék i Kadnane, ongoté ku dob begome bé rigo gom i fiyowe loo bé adate kétayay Tuluse, non begom

i de étéw fénémili i Tuluse inok munur de. <sup>2</sup> Fatut démoyun gom térifantad brab métanék i adat gome brab tingkél gom. Atin fatut fégito gom i kégedaw gome bé de késétingkél gom. <sup>3</sup> Atin tintu fo ingat gom inok énda fésesuwayén i de fédéw gom taloo no sébanil gom, non i Rémogor i Tuluse fénwaléyén betom sédumon brab ségiléw i de fédéw tom inok énda séédél tom. <sup>4</sup> Non sébaan saén i lowohe, sani de betom do munur bé Kristowe, atin Been i uléwe. Atin sébaan saén i Rémogore mémanduon betom kéluhanan. Atin sébaan saén i inam tome sani umule magufusa sabaf bé kéféмили i Tuluse betom. <sup>5</sup> Atin sébaan saén i Kadnane sani Kristowe, brab sébaan saén i unuro tome sani Kristowe, brab Been saén i funa tome ménbautis. <sup>6</sup> Sébaan saén i Tuluse, sani Abay i kéluhanay de étéw, sani Kadnay kéluhanane. Been i batie dob kéluhana tome do munur brab férigo no betom kéluhanan i kaane galbék.

<sup>7</sup> I séngae ségétéw betom munur de, iraya no kéfurung loo bé kétaya Kristowe iraya no de. <sup>8</sup> Non wén i Ménsulate Kébéréh i Tuluse mano, "Amun déméniyat mangéy dob lawayo, nuwitén i médoowe do férisu. Atin wén i de nirayén bé de étéwén." <sup>9</sup> Ati atag i "déméniyate mangéy dob lawayo?" Ay niy atag ne: bé sunguwe ménlus mangéy dob duniyae. <sup>10</sup> Mélaw i Beene ménlus, sani Kristowe, Beene soy déméniyate. Atin ménangéy dob toowe fo gérotor laway inok diyo dob kéluhanay de gonon. <sup>11</sup> Atin Beeney méniraye bé de kéfurungoy de étéw. I de dumo betom, fénémilién waléy apostol. Atin i de dumo de sénarigén dob berowey murete bé kébéreh ne. I de dumo de muret bé Fiyowe Uret. Atin i de dumo de, fénwaléyén do pastor. Brab i de dumo de, fénwaléyén do témoro. <sup>12</sup> Rénigo noy ni inok tafayé no betom kéluhanan dob galbék i Tuluse, inok waléy émbagé i lowoh Kristowe, sani de betom do munur de. <sup>13</sup> Mélaw waléy ségiléw i de fédéw tom bé kéunur tome brab kégétiga tome bé Jesu Kristowe Nga i Tuluse. Atin waléy méégét i kéunur tome de brab waléy géringo tom i tintuwe fiyo adat Kristowe. <sup>14</sup> Atin amuk mérigoy ni, békén tomén maak do nga, magad munur bé de séségiyo-giyo do tugi kétoro i de étéw do magakar. <sup>15</sup> Yamula, i betome fatut démoyun ureté tom i toowe bé lala tome mégédaw bé de dumo tom. Atin fatut maak méruk tom inok énda i kulang dob kéunur tome brab minut tom loo bé Kristowe sani uléw tome. <sup>16</sup> Non i betome do munur bé Kristowe, maak betom i sébaane lowoh, brab Beeney uléwe. Atin i kéluhanay de réfa i lowohe toow fo fiyoy késumfat ruwe sabaf bé Kristowe. Mélaw amuk sétabang i de réfaén, fiyo brab méruk i lowohe. I atag i ni, amuk rignoné tom i de séségiyo-giyo galbék

niray i Kadnane, waléy tom minut ségiléw bé Kristowe sabaf bé késégédaw tome.

<sup>17</sup> Amun begéney sénarigoy Kadnane muret, ay niy béréhé kuwe begom: Kagoméni rignonén i ségiléwe bé adat i de békén méngintulus, non énda i lanték i de itunga ro. <sup>18</sup> Brab délémón i de kéfégitung ro. Énda i karo bé mantuwe umul tidéw dob Tuluse non énda i gétiga-tiga ro sabaf bé kétégas i de uléw ro. <sup>19</sup> Énda mémala ro fantag bé de tete adat ro. Atin odoro ro saén i de tete kétayay de lowoh ro, brab témantu ro fo rémigo bé kéluhanay de udenén klasi do tete.

<sup>20</sup> Endob i begome, amun ménunur gomén bé Kristowe, békén i nan i ténoroé begom. <sup>21</sup> Non toow fo énggélango kom i fantage bé Jesuse. Brab amun ménwaléy gom do kuyugén, ténoroén begom i toowe tidéw dob Beene. <sup>22</sup> Mélaw tagak gom i tafaye itunga kom brab de tete adat gom brab de kétaya kom bé do gétah, non toow fo tete i de kétayay de lowoh gom témugion begom funa kom waléy mébinasa. <sup>23</sup> I de fédéw gom brab de itunga kom fatut fo waléy mantu. <sup>24</sup> Fatut féwaléy gom mantuy de adat gom lénimbag i Tuluse ségiléw bé Beene. Tidéw béno, giton méntintu gom brab fiyo gom.

<sup>25</sup> Mélaw kagoméni témugil! Fatut kéluhana kom béréhé kom i toowe dob de dumo gom. Non i begome do munur ségiléw tom do réfa i lowoh Kristowe atin Been i uléwe. <sup>26</sup> Atin amuk mékérít gom, kagom fédayaén de gésala gom bé kékérít gome. Atin kagom férugayén de ké mékérít gom, kagom féguhahén de témégén. <sup>27</sup> Inok énda fakayén fanangguwité Satanase begom. <sup>28</sup> I ménakawe fatut témérén ménakaw. Atin fatut gémalbék inok gédoté noy méntintuwe kéfaguyag atin inok gétabanga noy de méskinan. <sup>29</sup> Kagom émbéréhé tete. Yamula béréhé gom i fiyowe dob de dumo gom sani kébérehe gétabang bero brab géféégét bé kéunur ruwe. Témabang gom mélaw bé de méfélingo begom bé ati kailangay de fédéw ro. <sup>30</sup> Atin kagom rignonén i kéikaay Rémogor i Tuluse, sani funa nuwe tete i fédéw ne. Non i Rémogor i Tuluse, Been i tanda i Tuluse émfégito bé do étéw i Tuluse betom. Brab Been i maake tising émfégito bé fégilidéy Tuluse moso i kéfukas ne betom dob de sala tom. <sup>31</sup> Fatut kéda komén kéluhanan i kékérít gome brab kétete i de fédéw gom bé de dumo gom. Kagom fémalanén i de dumo gom taloo no bérého kom bero tete. Brab kagoméni sémiyaw. <sup>32</sup> Yamula fatut gom ségédaw brab séfésgad gom, loo bé kéfésgad i Tuluse begom sabaf bé Kristowe.

## 5

<sup>1</sup> Atin non ménwaléy gomén do nga i Tu-

luse toow fo gulaané no, fatut iring gom de. <sup>2</sup> Fatut démyoum gom ségédaw loo bé kéfégdaw Kristowe betom funa no nirayén i férénawa nuwe fénggéfukas betom. Ménwaléy maak dukah ténulak toow fo mamut, sani funay Tuluse ménsuwat.

<sup>3</sup> Atin non do étéw i Tuluse begom, kagom arumén, taloo no bigaén gom, taloo no rémigo gom bé tete. Atin kagom séuret-uret fantag bé de ni. <sup>4</sup> Atin kagom so labitén i de tete do mékérésik brab do dufang do késébéréhé. Yamula fatut usaré kom i de ba gom fésalamat dob Tuluse. <sup>5</sup> Non béréhé ku begom i toowe, i de étéw do bigaén taloo no do rémigo tete, énda géahur ro dob kéféguléw Kristowe brab Tuluse. Atin énda so géahur i de étéw do arumén non i kéaruméne ségiléw bé kéfégadafe kéninontow.

<sup>6</sup> Kagom munur bé de tugién uret énda i lantékén. Non wén i de étéw témoro bé ulanden ké tete i de rignonén. Endob been i de niy funay Tuluse mékérít brab kukumé noy de étéw énda modor ro bé de suguén. <sup>7</sup> Mélaw kagom séloyuk bé de ni do tete étéw. <sup>8</sup> Bé do gétah, rémigo gom i de tete brab maak ménagéw gom dob délémone. Endob amun ménwaléy gomén munur bé Kadnane, magéw gom dob géfékayae. Mélaw rigo gom i fiyowe loo bé fatute rignonéy de étéw i Kadnane. <sup>9</sup> Non amuk magéw gom dob géfékayae, gérigono kom i fatute brab méntintuwe brab toowe. <sup>10</sup> Féganad gom i adate émfésuwat bé Kadnane. <sup>11</sup> I de étéw bati séna dob délémone, sani de énda séna gétiga roy Kadnane, kagom mamung bé de tete rignoné ro énda i lantékén. Yamula fégito gom i fiyowe adat inok témérén ro damén bé de tete rignoné ro. <sup>12</sup> I de ménbunéy do tete fo rignoné ro, toow fo mékémalal fiyon fo ké labitén saén. <sup>13</sup> Endob amuk réméndaw i Soloe, giton tete foy de ni do ménbunéy. <sup>14</sup> Atin mélaw waléy ro bati dob géfékayae. Non wén i binuwayae fantag bé de tete étéw mano, "I beeme fidong, tékénal go, brab tébule go! Atin i Kristowe réméndaw dob beeme."

<sup>15</sup> Mélaw féuntay gom i de adat gom. Kagom iringén i rignonéy de étéw énda gétiga roy fatute. Yamula iring gom i rignonéy de étéw toow fo gétigan. <sup>16</sup> Toow fo tete i de rignonén dob de ni do gai. Mélaw amuk wén i fiyo gérigono kom, fagayas gom rigo. <sup>17</sup> Mélaw kagom rémigo kédufangan. Yamula féuntay gom i kétayay Tuluse, inok gétiga kom.

<sup>18</sup> Atin kagom molon bé arake funa kom mébinasa. Yamula fatut maak méféno gom bé Rémogor i Tuluse. <sup>19</sup> Atin amuk séuret-uret gom, sébérehe gom bé de kanta tidéw dob Ménsulate Kébéréhé i Tuluse. Brab kanta gom i de kanta démayéw bé Kadnane loo bé kéfémandu i Rémogor i Tuluse. Atin fatut

kémanta gom dob Tuluse bé de fédéw gom. <sup>20</sup> Fatut fésalamat gom bé Abaye Tulus sénga tékélid sabaf bé kéluhanay de kéfiyonon nirayén dob begome. Atin labit gom i dawét i Kadna tome Jesu Kristo ké fésalamat gom.

*Fantag bé de sébawag*

<sup>21</sup> Fatut térifantad gom brab sébasa gom inok giton i kébasana kome bé Kristowe.

<sup>22</sup> I begome do libun bawagan, fatut odoró kom i sugu i bawag gome, ségiléw bé kéodoro kome bé de sugu i Kadnane. <sup>23</sup> Non i lagéye, beeney uléw i bawag ne ségiléw bé Kristowey uléw i de munur. Non betom i maake lowohén brab Been i uléwe sabaf bé kékukas ne betom. <sup>24</sup> Mélaw i de libun do bawagan, fatut odoró roy de sugu i de bawag ro loo bé kéodoro tome do munur bé de sugu Kristo.

<sup>25</sup> Atin i begome do lagéye bawagan, fatut mégédaw gom bé de bawag gom loo bé kégedaw Kristowe betom do munur de. Gétiga tom i kégedaw ne betom non nirayén i férénawa nuwe bé kékukas ne betom. <sup>26</sup> Réningo noy ni inok waléy tom malinis dob adafay Tuluse, sabaf bé kéfébautis tome dob wayége brab kéodoro tome bé kébéreh ne. <sup>27</sup> Réningo noy ni inok i kéluhanay de munur maak bawag Kristowe, uwitén dob adafa nuwe toow fo malinis, brab métintu énda i salaén. Féwaléyé no betom fiyo inok gétaggafa no betom. <sup>28</sup> Fatut i de lagéye mégédaw ro bé de bawag ro loo bé kégedaw ruwe bé karowe lowoh. I lagéye mégédaw bé bawag ne mégédaw so bé lowoh ne, non ménwaléy ro maak sétiman lowoh. <sup>29</sup> Non énda i étéw ikaa noy kaane lowoh. Yamula féamaé no brab talimaé no, ségiléw bé kétalima Kristowe betom do munur de. <sup>30</sup> Non betom i de réfa i lowoh ne. Brab Beeney uléwe. <sup>31</sup> Non wén i Ménsulate Kébéréh i Tuluse mano, “Been i niy funay lagéye témagak bé boh ne brab idéng ne inok mawag. Atin i ni ruwo gétew étéw waléy sébaan i lowoh ruwe.” <sup>32</sup> Been i niy sébaane fo dakél toow fénggétigay Tuluse betom do Ménsulate Kébéréhén. Atin gésobuto kuy atag i ni fantag bé Kristowe brab de betom do munur de. <sup>33</sup> Gido loo, i atag ne fantag so bé késébawage. Non i séngae lagéy fatut mégédaw bé bawag ne. Brab i séngae libun fatut basana noy bawag ne.

## 6

*Fantag bé de nga brab de lukés ro*

<sup>1</sup> Atin i begome do nga, fatut odoró kom i sugu i de lukés gom, non been i nan i fatute rigonéy de munur bé Kadnane. <sup>2</sup> Wén i sugue dob kitabe mano, “Basana moy boh me brab idéng me.” Been i niy sunguwe sugu wén i fasade, <sup>3</sup> mano, “Amuk basana

moy de lukésém, féfiyoné ku beam brab méraru go dob duniyae ni.”

<sup>4</sup> Atin i begome do boh brab do idéng, amuk sugué kom i de nga gom, kagom fékérítén bero. Yamula fífit gom bero brab féginau gom bero dob kétoro i Kadnane.

<sup>5</sup> Atin i begome do rifén, fatut odoró kom i sugu i de amu gom, brab fatut basana kom bero brab mégilak gom bero. Rigo gom i ni tidéw dob fiyowe fédéw gom maak odoró kom i de sugu Kristo. <sup>6</sup> Fatut rigo gom i fiyowe sénga tékélid, békén saén dob gaiwe téngténgéy amu gome begom inok mésuwat begom. Yamula tidéw dob fiyowe fédéw gom, rigo gom i kétayay Tuluse maak begom i de rifé Kristo. <sup>7</sup> Atin fatut moror gom ké gémalbék gom, maak Kadnan i galbéko kome, békén saén kéilawan. <sup>8</sup> Atin fégétédém gom i ni, i Kadnane barasa noy séngae ségétéw étéw, fiyon fo ké rifén taloo no békén, sabaf bé fiyowe réningo no.

<sup>9</sup> Atin i begome do amu, fatut féfiyo gom i kérigo gome bé de rifé kom. Kagom fégilakén bero bé de tete kébéreh gom. Fégétédém gom i ni, i begome brab de rifé kom ségiléw gom so falan riféy Tuluse dob lawayo, brab énda i isu ramigo no.

*I de kulangén iray i Tuluse*

<sup>10</sup> Do dumo gu, ay niy tamfaday béréhé kuwe begom dob ni sulat. Fébagér gom dob barakat i Kadnane inok émbagér i kéunur gome. <sup>11</sup> Usar gom i kéluhanay de kulangén niray i Tuluse begom inok géatuh gom bé Satanase brab de tete akarén. <sup>12</sup> Non békén do kéilawan i dumo tome sétiboh. Yamula sétiboh tom bé de saitan brab do tete odoron dob délémone ni duniya brab dob lawayo. <sup>13</sup> Mélaw béleewe ni gamak gom i de kulangén tidéw dob Tuluse inok amuk gégumah i tete gai dunsukoy Satanase begom, géatuh gom de. Tidéw béno, amuk gilid i késétibohe, témaban gom.

<sup>14</sup> Mélaw ingat gom. Béréh gom i toowe. Been i niy maake légét gom kay sundalowe. Atin rigo gom i métintuwe. Been i niy maake futow fégékélung gom bé de kuméng gom. <sup>15</sup> Atin uret gom démoyon i Fiyouwe Uret fantag bé kétanéke tidéw dob Kristowe. Been i niy maake safatos gom kay sundalowe. <sup>16</sup> Atin féginugut gom bé Kadnane sénga tékélid. Been i nan i maake kélung gom. Mélaw énda guratén gom bé de mérino séléb fégefana Satanase begom. <sup>17</sup> Tayakuf gom i kékukas i Tuluse begom dob de sala gom. Non been i niy maake futow sayaf fégétéléb bé de uléw gom. Atin usar gom i kébéreh i Tuluse, non been i niy maake sundang gom tidéw dob Rémogor i Tuluse. <sup>18</sup> Dasal gom sénga tékélid ongot gom tabang dob Tuluse. Atin fédaya gom fédasaléy

Rémogor i Tuluse begom. Fatut mingat gom sénga tékélid brab dasala kom soy de dumo gom munur inok tabangay Tuluse so bero. <sup>19</sup> Atin dasala kom so begén inok fémanduoy Tuluse begén muret bé kébérah ne, brab inok énda mégilaku émfégétigan bé de Fiyu Uret ménbunéy bé do gétah. <sup>20</sup> Atin sabaf bé Fiyowe ni Uret, begén i ségétéwe sénarigon magéw mangéy muret. Gido loo, béleewe ni ay niwu dob férisunone sabaf bé kéuret guwe. Mélaw dasalanu inok émbarawu muret bé Fiyowe Uret loo bé fatute.

<sup>21</sup> I Tikikowe, sani kégédawa tome dumo tom munur brab gésarigone sugu-suguéy Kadnane rémigo bé galbék ne, beeney murete begom bé goho kuwe ni dini inok gétiga kom i ati rigoné kuwe. <sup>22</sup> Been i niy funa kuwe de sémuwu mangéy dob begome inok ureté noy fantage bé de goho key dini brab inok féfiyoné noy de fédéw gom.

<sup>23</sup> I Abaye Tulus brab Kadnane Jesu Kristo, mégédaw ro damén bé kéluhana kome do munur brab iray ro damén begom i métanéke fédéw brab émféégét bé de kéunur gom. <sup>24</sup> Atin mégédaw damén i Tuluse bé kéluhanay de énda témérén féimu bé Kadna tome Jesu Kristo taman sa taman.

*Pablo*

## I Sulat Pablowe dob de Munur bé Kristowe dob Filipos

Ay niy sébaane bé de sénulat Pablo, sani mébantuge muret fantag bé Jesu Kristowe. Tafayén séménugud i Pablowe dob ingéde Filipos atin wén i de étéw diyo ménwaléy ro do munur bé Jesuse sabaf bé kéuret ne. Séménulat i Pablowe dob berowe.

Amun sénulat Pablowey ni, ménférisunén sabaf bé kéuret ne fantag bé Kristowe. I de munur diyo bati dob Filipos, amun énggélíngoo ro ménférisuy Pablowe, séngu roy ségétéwe bero mangéy bati sétifon bé Pablowe dob férisunone inok tabanga no brab fagifaté no. Ménféuwit ro so kurta fégebayad bé fégefaguyag Pablowe amun ménférisu. Mélaw sénulat Pablowey ni sulat émfésalamat dob berowe sabaf bé tabang ruwe de.

Fiyon fo ké ménférisuy Pablowe, toow fo méoror sabaf bé kéunur ne bé Jesu Kristowe. Séménulat soy Pablowe dob de munur do bati dob Filipos inok énda témérén ro munur, fiyon fo ké ati kérasaye gégumah dob berowe. Ténoro Pablowe bero bé fatut ro méoror sabaf bé Kristowe.

<sup>1</sup> I begeye Pablo brab Timoteo do sugu-guagé Jesu Kristowe. Sulata key begom do munur bé Jesu Kristowe dob Filipos brab dob de odoro kom do munur brab do témabang.

<sup>2</sup> I Abay tome Tulus brab Kadnane Jesu Kristo mégédaw ro damén begom brab iray ro damén begom i métanéke fédéw.

<sup>3</sup> Fésalamatu dob Tulus tome sénga gétédémoo ku begom. <sup>4</sup> Atin sénga dasala ku begom kéluhanan, toowu de fo moror, <sup>5</sup> non bé kétabanga kome begén bé galbék guwe muret bé Fiyowe Uret tidéw fanay kéunur gom taman so béleewe ni. <sup>6</sup> Mélaw gétiga kuy ni: I fiyowe rignonén féngganay i Tuluse dob begome, fétausé no taman dob gaiwe séfule i Jesu Kristowe moso. <sup>7</sup> Toow fo gulaané ku begom kéluhanan. Fatut gulaané ku begom non ténabanga kom begén bé galbék guwe. Fiyon fo ké béleewe ni diniwu dob férisunone ni loo so bé do gétah bé kétoro guwe brab késumbul guwe fantag bé Fiyowe Uret, ténabanga kom so begén bé ni galbék niray i Tuluse non mégédaw betom. <sup>8</sup> I Tuluse gétiga no toow foy ni béréhé ku begom. Toowu fo mégundoy begom brab féimué ku fo begom loo bé kéimu Jesu Kristowe betom.

<sup>9</sup> Atin démasalu dob Tuluse bé minut dakél i késégédaw gome brab minut so dakél i kégétiga kome bé toowe brab fatute, <sup>10</sup> inok géfémilio kom i tintuwe fiyo. Mélaw énda i sala gom fégétébo begom dob gaiwe séfule

i Kristowe moso. <sup>11</sup> Atin gérido gom bé médoowe fiyo sabaf bé kéféwaléy Kristowe begom métintu, inok médayéw brab basanay Tuluse.

<sup>12</sup> Do dumo gu, méuyotu de ké gétiga kom i ni: I kéluhanay de ménrigo dob begéne, been i da nan i téménabange bé kélégéb i Fiyowe Uret. <sup>13</sup> Non i kéluhanay de sundalo mantay dob lawi i datue ni brab kéluhanay de étéw so dini, gétiga roy funa kuwe ménférisu dini non begén i sugu-sugué Kristowe. <sup>14</sup> Atin sabaf so bé kéférisu guwe, i kédoonoy de dumo gu munur ménwaléy émbagér i kesarig ruwe bé Kadnane. Mélaw méninut ro émbaraw brab éndaén mégilak ro muret bé kébéréh i Tuluse.

<sup>15</sup> I de dumo de ureté roy fantage bé Kristowe non médaléw ro begén brab méuyot ro de ké gélawana roy de rénigo gu. Endob i de dumo de, fiyoy funa ruwe muret fantag bé Kristowe. <sup>16</sup> Ureté roy fantage bé Kristowe sabaf bé kégédaw ruwe non gétiga ro fénémili i Tuluse begén muret brab sémumbulon bé de étéw sébanil bé Fiyowe Uret. <sup>17</sup> Endob i de dumo de, énda fo fiyoy funa ruwe muret bé Fiyowe Uret. Non muret ro sabaf saén bé kéuyot ruwe waléy émbantug. Atin marok géumana roy kékérégéné kuwe dob férisunone ni.

<sup>18</sup> Endob ulanden! Mororu sabaf bé kéuret ruwe fantag bé Kristowe. Fiyon fo ké tete i funa ruwe muret bé Fiyowe Uret loo ké fiyo, i toowe fo mélaça ké uretén i Kristowe. <sup>19</sup> Atin énda témérénu moror, non gétiga ku gégumah soy gaiwe métangéyu dob férisunone ni, sabaf bé de kédasal gom brab dob tabang i Rémogor Jesu Kristowe. <sup>20</sup> Atin i toowe fo kétaya ku brab wén i inam gu bé gétausu rémigo bé kétaya nuwe inok énda i funa ku mékala. Atin démoyan damén émbarawu fo toow inok i kéluhanay de rignoné ku, been i de niy funa Kristowe médayéw. Mélaw fiyon fo ké méuyagu taloo no méléhuu, médayéw i Kristowe sabaf bé kéluhanay de rignoné ku. <sup>21</sup> I karang guwe de, i funa kuwe méuyag inok médayéw i Kristowe. Endob amuk méléhuu, toow na fo fiyo, non diyow dob lawayo. <sup>22</sup> Mélaw énda gétiga kuy isuwe fémilie ku. Non amuk méuyagu, gétausu rémigo bé fiyowe galbékén. <sup>23</sup> Endob méuyotu méléhu inok gétékédanun dob duniyae ni brab inok géseloyukun bé Kristowe dob lawayo, inok toow na fo fiyoy kébati guwe. <sup>24</sup> Endob toow na fo fiyo ké méuyagu dini inok gétausu i kétabanga kuwe begom. <sup>25</sup> Atin sabaf bé ni, gétiga ku tausu séna méuyag. Atin batiu dob begome kéluhanan inok gétabanga ku begom émféégét bé kéunur gome bé Kadnane brab émfétaus bé kéoror gome sabaf bé kéunur gome, <sup>26</sup> inok amuk gésefuleu mangéy dob



begome, méumanan i funa kome démayéw bé Jesu Kristowe sabaf bé begéne.

<sup>27</sup> Endob fiyon fo ké ati mérigowe dob begéne, fatut féfiyo gom i de adat gom loo bé kétoro i Fiyowe Uret fantag bé Kristowe, inok fiyon fo ké énda géangéyu diyaan, gétiga ku énda émbaleng i de fédéw gom. Yamula gélingoo ku bé sébaan i de fédéw gom brab méuyot gom gémbalék bé galbék i Tuluse inok waléy médooy étéwe munur bé Fiyowe Uret fantag bé Jesu Kristowe. <sup>28</sup> Atin kagom mégilak bé de sébanil begom. Non amuk énda mégilak gom bero, gétiga ro niray i Tuluse begom i umule magufusa, atin gétiga ro so kukuméy Tuluse bero. <sup>29</sup> Non mégédaw i Tuluse begom, nirayén begom i kuwagibe munur bé Kristowe loo soy kérasaye sabaf bé Kristowe. <sup>30</sup> Non béleewe ni kéluhanan tomén mérasay. Enggito gomén i kérasay guwe sabaf bé ni galbék bé do gétah, brab énggélíngoo komén i fantage bé kérasay guwe béleewe ni. Atin béleewe ni, mérasay gom so loo bé ni.

## 2

### *Fantag bé Kristowe*

<sup>1</sup> Do dumo gu, ménwaléy émbagér i de fédéw gom sabaf bé kéunur gome bé Kristowe. Atin ménwaléy fiyoy de fédéw gom sabaf bé kégedaw Kristowe. Atin ménwaléy gom sédumon sabaf bé Rémogor i Tuluse. Atin ménwaléy gom ségedaw brab méséuray na. <sup>2</sup> Mélaw, sabaf bé de ni, ongoté ku dob begome, fésébaa kom saén i de fédéw gom brab de itunga kom, brab fésébaa kom saén i de kétaya kom, brab fébagér gom i késégédaw gome. Toowu fo moror begom amuk rignoné kom i de ni. <sup>3</sup> Atin kagom rémigo bé de éntingayén non bé kéuyot gome saén émbantug look inok waléy gom gérotor. Yamula térifantad gom brab kagom fégitungén de ké toow gom na fo gérotor bé de dumo gom. <sup>4</sup> Atin kagom saén fégitungén i fantage bé de kagom do kailangan. Yamula fégitung gom soy ati kétabanga kome bé de dumo gom. <sup>5</sup> Fatut iring gom i adat Jesu Kristowe brab itunga nuwe. <sup>6</sup> Non fiyon fo ké ségiléw bé Tulusey Kristowe, énda fégitungé no fatut témulama réméféng bé Tuluse. <sup>7</sup> Yamula ténagakén i kégérotor ne brab méntéféwaléy ségétéw sugu-suguén bé kéumah ne do kéilawane. <sup>8</sup> Atin amun ménwaléyén ségétéw kéilawan, toow fo méntérfantad bé kéodoro nuwe bé de sugu i Abay ne Tulus taman so bé kéféléhue de dob kruso. <sup>9</sup> Atin sabaf bé ni, toow fo féwaléy i Tuluse gérotor brab nirayén dey dawéte toow na fo gérotor bé kéluhanay de ségiyo dawét, <sup>10</sup> inok amuk labitén i dawét Jesuse, i kéluhanay de étéw dob lawayo, brab dob duniyae ni, loo soy dob fantad i duniyae, lémingkuwéd ro. <sup>11</sup> Atin kéluhana ro

fayagé roy Jesu Kristowe, Been i Kadnane, inok médayéw i Abaye Tulus.

<sup>12</sup> Mélaw do dumo gu, odor gom bé de sugu gu. Amun diyoy séna dob begome, toow fo nodoro kom i de sugu gu. Atin béleewe amun éndaén diyoy dob begome, fatut na fo odor kom i kéluhanay de sugu gu. Mélaw fédayday gom i kégalbék gome dob kéodoro kome bé Tuluse brab do dob kéfégedata kome de inok méfukas gom dob kékukume énda i tamana no. <sup>13</sup> Non démoyun i Tuluse diyoy dob begome brab tabanga no begom inok kétaya kom brab gérigono kom i késuwata nuwe.

<sup>14</sup> Rigo gom i kéluhanay kétaya nuwe, kagom riklamo de taloo no séédél gom de, <sup>15</sup> inok waléy gom do méntinu étéw nga i Tuluse brab énda i do sala gom fégétébo i de étéw begom fiyon fo ké sélawék gom bé de tete étéw bati dob délémane ni duniya. Ségiléw gom bé de giton dob lawayo, <sup>16</sup> non ureté kom dob berowey fantage bé mantuwe umul. Atin amuk rignoné kom i ni, toowu fo moror sabaf bé begome dob gaiwe moso séfule i Kristowe. Non giton énda ménsinggula i kéluhanay rénigo guwe bé kétabang guwe begom inok munur gom.

<sup>17</sup> Iray guy kéuyag guwe keeyén maak tulak dob Tuluse. Amuk lee, méororu séréngan begom, atin maak umanén dob kagome tulak iray gom dob Tuluse sénga fuweh bé kéunur gome de. <sup>18</sup> Atin loo soy begome, fatut so moror gom séréngan begén mérigoy ni.

<sup>19</sup> Sémarigu bé Kadnane Jesus bé fakay séko sugué kuy Timoteowe mangéy dob begome. Atin amuk séfule mélaw mangéy dini, gébéhého no begén i fantage bé begome funay fédéw guwe waléy fiyo. <sup>20</sup> Been saén i dumo guwe dini gulaan no so begom. <sup>21</sup> I de ségiyo étéw, fégitungé ro saén i fantage bé de karo kéfiyonon. Enda fégitungé roy fantage bé galbék Jesu Kristowe. <sup>22</sup> Endob i Timoteowe, gétiga kom toow fo fiyoy adat ne. Ténabangén begén lémgébbé bé Fiyowe Uret loo bé kétabang i ségétéwe nga bé abay ne gémbalék. <sup>23</sup> Mélaw, méuyotu de sémugu mangéy diyaan amuk toowén fo gétiga kuy mérigowe dob begéne. <sup>24</sup> Atin sémarigu so dob Kadnane bé énda mérugayén tidéw béni, i begéne so géangéyu so dob begome.

<sup>25</sup> Atin gékaranga ku kailangan fo sugué ku séfule mangéy dob begomey dumo tome Epafrodito. Beeney dumo guwe gémbalék muret bé Fiyowe Uret fiyon fo ké wén i do sébanil begey. Beeney sénugu gome mangéy dob begéne inok tabanga no begén, atin béleewe ni féséfuleé kun mangéy dob begome. <sup>26</sup> Toowén fo mégundoy begom kéluhanan brab mélidu i na nuwe non énggélíngoo kom i kédéruu nuwe. <sup>27</sup> Toow

fo ménfasang déméruun, gédétén fo méléhu. Endob toow fo ménuray i nay Tuluse de loo soy begéne. Non amuk ménléhu de, méuman i kététe i fédéw guwe de. <sup>28</sup> Mélaw toow fo méuyotu de ké géuleén mangéy diyaan non gétiga ku toow gom de fo moror ké géségito gom, brab éndaén mélaw i funa ku émbuku. <sup>29</sup> Mélaw fatut toow gom de fo moror témayakuf non beeney dumo tome munur bé Kadnane. Atin fatut basana kom loo soy de étéw loo bé beene ni. <sup>30</sup> Non géfédéw fo méléhu bé kégalbéko nuwe bé Kristowe. Nirayén i férénawa nuwe bé kétabanga nuwe begén bé galbék guwe énda gétabang gom de.

### 3

<sup>1</sup> Mélaw, do dumo gu, ay niy de tamfaday de béréhé ku begom dob sulat guwe ni. Oror gom sabaf bé Kadnane! Atin ulanden ké séguleé ku man sulatén i fantage bé de sénulat gun begom bé do géta. Non amuk séguleé ku man béréhén i de ni, mas klloh i kaid gome. <sup>2</sup> Ingata kom i de étéw tete i de rignoné ro. Fégsés ro begom mémali bé de lowoh gom non séngu i Tuluse kun. <sup>3</sup> Endob i toowe, betomey de tintu étéw i Tuluse, békén i berowe. Non maak ténuli i Tuluse betom sabaf bé késarig tome bé Jesuse. Non féngadafé tom i Tuluse dob Rémogor ne brab moror tom sabaf bé kéunur tome bé Jesu Kristowe. Enda sémarig tom bé de adat loo bé kétulie loo bé de rignoné ro. <sup>4</sup> Endob amuk fatut i késarige bé de adat loo bé nan, fakayu de so gésarig. Atin amuk wén i étéw gékaranga no toow fo nodoro noy adat i de kélawan brab gésarig de, labi na foy begéne. <sup>5</sup> Non amun ménségéfadiyan sénay kéumah guwe de, méntuliun. Begén i ségétéwe séfu Benjamene, séfu i katufua keye Israel. Tintuwu fo Judio. Atin fantag man bé kitab i de Judio, toow fo nodoro ku non ségétéwu Fariseo. <sup>6</sup> Atin non toow fo odoró kuy de adat i de Judio, fénrasay gu foy de munur bé Jesuse. Atin fantag so bé kéodore bé kitabe inok i étéwe waléy méntintu, énda fo énggéféliso ku de. <sup>7</sup> Bé do géta, makuk i kéluhanay de ni méumanan i kétintu guwe de. Endob béleewe ni gétiga ku fo énda i do lantékén. Atin ténagak gu de ni atin gésarigu bé Kristowe. <sup>8</sup> Atin békén saén i de niy de ténagak gu, non ténagak guy kéluhanane inok gédoté kuy toowe na fo fiyo, sani kégétiga kuwe bé Kadna kuwe Jesu Kristo. Sabaf bé Kristowe ténagak guy kéluhanay de éntingayén. I kéfégitung guwe de, maak do réhuk saén do nibér gu inok gédoté kuy Kristowe, <sup>9</sup> brab waléyu dumo no. Brab inok waléyu métintu dob adafay Tuluse sabaf bé kéunur guwe bé Kristowe. Enda waléyu métintu sabaf bé kéodoro kuwe bé kitabe. Mélaw i funa kuwe waléy métintu

békén tidéw dob lowoh guwe, yamula tidéw dob Tuluse sabaf bé kéunur guwe bé Kristowe. <sup>10</sup> I toowe fo kéuyoto ku béleewe ni ké gétiga ku fo toow i Kristowe brab barakat ne sani Kaane barakat sabaf bé kétébule ne. Atin méuyotu de so ké géamungu bé de kérésayén loo bé kéiray ne bé férénawa nuwe dob kruse, <sup>11</sup> inok i begéne so gétebuleu so moso.

<sup>12</sup> Enda béréhé kuy de ni ké ménwaléyun fo métintu loo bé ni taloo no éndaén foy sala gu. Békén! Endob fédaydayu brab télamané ku inok mériko moso i kéluhanay de ni, non been i niy funa Kristowe fénwaléyén begén kaan. <sup>13</sup> Do dumo gu, gétiga ku fo toow, énda séna méntuman i de ni dob begéne. Endob i sébaane télamané ku rignoné, sani lémfote bé de réni gu bé do géta inok géfégitungo kuy de gérigono ku moso. <sup>14</sup> I begéne ségiléwu bé ségétéwe sékuya. Fééntangu léméntu taman dob tamfaday sékuyaane inok témabanu brab gédoté kuy baras guwe, sani kébati guwe dob lawayo sabaf bé kétawag i Tuluse begén sabaf bé Jesu Kristowe.

<sup>15</sup> Loo bé nan i fatute fégitungéy kéluhanay de méégét munur. Endob amuk wén i dumo begom énda magayun no bé begéne, i Tuluse féfégétiga no begom i katabuwane. <sup>16</sup> Endob fatut odoró tom i kétoroe nodoro tomén taman so béleewe ni.

<sup>17</sup> Atin do dumo gu, fédayday gom iring begén, brab iring gom i de étéw ségiléw i adat ruwe bé begeye. <sup>18</sup> Médoonén gule béréhé guy ni bé do géta. Atin béleewe ni kérewo kuy kébéréhé guwe de man ségulee dob begome. Médooy de étéw toow fo tete i de adat ro. Brab sabaf bé de ni tete rignoné ro, giton dob niy sébanil ro bé kéurete fantag bé kéléhu Kristowe dob kruse. <sup>19</sup> Atin géangéy ro moso dob emfernowo, non i maake tulus ro sani de tete kétayay de lowoh ro. Atin félangka-langka ro bé de tete rignoné ro funa ro damén fatut mémala. Atin fégitungé ro saén i fantage bé de éntingayén dob duniyae ni. <sup>20</sup> Endob i betome, dob lawayo diyo i tintuwe ingéd tom. Atin ongot-ongoté tom i mémukase betom ké séfuleén mangéy dini tidéw dob lawayo, sani Kadna tome Jesu Kristo. <sup>21</sup> Amuk gégumahén i nan gai, fégaliné noy de ni gérifantad lowoh tom brab rignoné no loo bé kaane barakatan lowoh. Atin rignoné noy ni dob barakat ne sani barakat ne féféféguléwén bé kéluhanay éntingayéne.

### 4

<sup>1</sup> Mélaw do dumo gu, fédayday gom i késarig gome bé Kadnane brab odor gom bé de suguén. Toow fo gulaané ku begom brab mékundoyu fo begom. Mororu fo sabaf bé begome, brab géfédayéw-dayéwu fo sabaf bé begome.

<sup>2</sup> Atin i begome Eudia brab Sintiki, ongoté ku dob begome, séfagayun gomén non i begome sédumon sabaf bé Kadnane. <sup>3</sup> Atin i beeme so, sani tintuwe dumo gu gémalbék, ongoté ku dob beeme tabanga moy de ni libun inok géséfagayun ro. Non mégéror ro téménabangan begén bé galbéke lémégéb bé Fiyowe Uret, bero ro Klemente brab de ségiyo dumo gu gémalbék. I kéluhanay de dawét ro ménsulatén dob libroy Tuluse sani listanane bé de dawét i de étéw gégédot bé umule magufusa.

<sup>4</sup> Oror gom sénga tékélid sabaf bé Kadnane. Séguleé ku man béréhén: Oror gom!

<sup>5</sup> Atin fatut ségédaw gom non gédétén i késéfule i Kadnane. <sup>6</sup> Atin kagom émbuku. Yamula dasal gom dob Tuluse brab ongot gom i de kailanga kom brab fatut so fésalamat gom dob Beene ké mongot gom. <sup>7</sup> Atin i kétanéke tidéw dob Tuluse, diyagané noy de fédéw gom sabaf bé kéwaléy gome do dumo Jesu Kristowe inok énda émbuku gom. Toow fo fiyoy kétanéke tidéw dob Tuluse, mélaw énda gésobutoy de étéw de.

<sup>8</sup> Atin do dumo gu, umana kuy de ni sulaté ku bé ni sa: Fégitung gom i de éntingayén do fiyo, brab toow, brab métintu, brab malinis. I de ni éntingayén funay de étéw médayéw brab mébasanan amuk rigoné ro. <sup>9</sup> Atin rigo gom i de ténoro gu begom brab de énggito gom rénigo gu. Atin mélaw diyo dob begomey Tuluse, sani miraye bé kétanéke dob betome.

<sup>10</sup> Toow fo dakél i kéror guwe brab kédayéw guwe bé Kadnane non fénggito gom man i kégédaw gome begén. Ménrugayén énda fénggito gom de fiyon fo ké méuyot gom de émfégito, énda fakayén. <sup>11</sup> Békén béréhé kuy ni sabaf bé wén i kulang bé de kailanga ku. Non ténoroén begén i ni, bé fiyon fo ké atiy goho kuwe, fatut fo kasukudanu. <sup>12</sup> Enggéagéwo kuy mérasaye kéfaguyag loo soy gaba-gabawe kéfaguyag. Atin ténoroén begén bé fatutu kasukudan sénga tékélid dob séngae gonon, fiyon fo ké mélayafu taloo no bésoru, fiyon fo ké mérasay i kéfaguyag guwe taloo no gaba-gaba. <sup>13</sup> Gérigono kuy kéluhanane sabaf bé tabang Kristowe émfébagér begén.

<sup>14</sup> Endob toow fo fiyoy rénigo gome dob begéne, non ténabanga kom begén dob gaiwe ménkérégénanu. <sup>15</sup> I begome bati dob Filipos, gétiga kom fo toow bé begom saén i de munur téménabangan begén amun ténagak guy gono kome dob Masedonia dob gaiwe mantu séna nuret guy Fiyowe Uret. Enda i ségiyo do munur ménamung begom mirayan begén kurta. <sup>16</sup> Atin amun diyou séna dob Tesalonika, médoó gule fén-uwito kom begén tabang. <sup>17</sup> Enda béréhé kuy ni ké iraya kom man begén. Yamula kétaya

ku fo ké dakél i barase gédoté kom sabaf bé gédaw gome. <sup>18</sup> Enggédot gun i tabange fénuwit gom begén bé Epafroditowe. Atin toow fo gaba-gabay fénuwit gome begén. Mélaw ménwénén i kéluhanay kailanga kuwe béleewe ni. I nan do niray gom maak toow fo mamut tulak émfésuwat bé Tuluse brab gétanggafa no. <sup>19</sup> Atin i Tulus guwe, iraya no begom bé kéluhanay kailanga kome tidéw dob toowe fo kékawasa no sabaf bé Jesu Kristowe. <sup>20</sup> Médayéw damén i Abay tome Tulus taman sa taman. Amen.

<sup>21</sup> Ségifaé kuy kéluhana kome do munur bé Jesu Kristowe diyaan. Atin i de dumo gu dini ségifaé ro so begom. <sup>22</sup> Atin i kéluhanay de munur dob ni gonon ségifaé ro so begom, labi na foy de munur bati dob lawi i datue ségifaé ro so begom. <sup>23</sup> Mégédaw damén begom kéluhanan i Kadnane Jesu Kristo.

*Pablo*

## I Sulat Pablowe dob de Munur bé Kristowe dob Kolosas

Ay niy sébaane bé de sénulat Pablo, sani ménbantuge muret fantag bé Jesu Kristowe. I Pablowe ni, énda séménugudén mangéy dob ingéde Kolosas, éndob énggélolo noy odoroy de munur diyo féndawét Epafras. I Epafrase ni, ménwaléy munur non énggélinooy noy kéuret Pablowe dob ingéde Efeso.

Amun sénulat Pablowe ni, ménférisu de nén sabaf bé kéuret ne fantag bé Kristowe. Ménangéy i Epafrase dob Pablowe brab bénréhén dob beene bé wén i do tugién témoro énggumah dob de munur do bati dob ingéde Kolosas. Bénréh i de ni tugién témoro bé wén kun i de télaki do mas na gérotor bé Jesu Kristowe atin wén so kun i do étéw fatut féngadaféy de étéw. Atin i de ni tugién témoro, bénréh ro so bé de munur bé Kristowe, fatut ro kun modor bé kitab i de Judio.

Mélaw séménulat i Pablowe dob de munur do bati dob Kolosas inok toroé no bero bé i Jesuse, Been i tintuwe Nga i Tuluse, atin mélaw énda i mas na gérotor bé Beene. Ténoroén i Kristowe Beene saén i fatute féngadaféy de étéw, békén do télaki taloo no do ségiyo. Atin ténoroén bé i funay de étéw méfukas ro bé de sala ro, non bé kéunur ruwe saén bé Jesu Kristowe. Mélaw énda kailanga roy modore bé kitab i de Judio. Sénulat Pablowe ni dob berowe inok gétiga roy toowe fantag bé Kristowe atin inok énda munur ro bé de kétoro i de tugién témoro énggumah dob berowe.

<sup>1</sup> I ni sulat tidéw dob begéne, sani Pablowe ségétéw apostol sénugu Jesu Kristowe non been i niy kétayay Tuluse. I begéne brab dumo tome munur Timoteo sémulat gey mangéy dob begome <sup>2</sup> do munur bé Kristowe dob Kolosas, sani de dumo gey démayday fo modor bé Kristowe.

I Abay tome Tulus mégédaw damén begom brab irayén damén begom i métanéke fédéw.

<sup>3</sup> Sénga dasala key begom dob Tuluse, sani Abay i Kadna tome Jesu Kristo, dé moyun gey fo fésalamat dob Beene sabaf bé begome. <sup>4</sup> Non énggélinooy key i fantage bé mégéte kéunur gom bé Jesu Kristowe brab kégédaw gome bé kéluhanay de dumo tom munur. <sup>5</sup> Atin i funa kome munur brab mégédaw, non bé inam gome bé de baras gom gédoté kom moso dob lawayo. Atin énda mékédan i de ni baras gom. Enggétiga kom i fantage bé ni amun mén-uret dob begomey toowe, sani Fiyowe Uret fantag bé Jesuse. <sup>6</sup> Atin i ni Fiyu Uret énggélinooy

kom, been soy niy lémégébe dob médoowe do étéw dob duniyae ni. Atin sabaf bé kéunur ruwe de, waléy fiyoy adat ruwe loo bé begome tidéw dob sunguwe gai énggélinooy kom i kégédaw i Tuluse brab tintu gésoboto kom i ni kégédaw i Tuluse. <sup>7</sup> Enggélinooy kom i fantage bé ni kégédaw i Tuluse tidéw dob Epafrase, sani gulaané tome dumo tom sugu-sugué Kristowe. Beene mésarigone gémalbék témabangan begoy muret fantag bé Kristowe. <sup>8</sup> Bénréhén begoy i fantage bé kégédaw gome sabaf bé kéfémanduoy Rémogor i Tuluse begom.

<sup>9</sup> Mélaw tidéw fanay kégélingo gey bé de ni, dé moyun dasala key begom. Ongoté key dob Tuluse, féfégetiga no begom i kétaya nuwe rigoné kom, brab féfégsobuté no begom brab féfégetiga no begom i fatute dob kéfémandu i Rémogor ne. <sup>10</sup> Atin mélaw, gérigono kom i kétayay Kadnane inok mésuwat bé de adat gom. Gérigono kom i de kéluhanay de fiyo brab waléy gétiga kom i fantage bé Tuluse. <sup>11</sup> Atin démasalu bé fébagéré no begom bé barakat ne inok fédayday gom témingkél brab moror gom fiyon fo ké mérégén i de gétamana kom. <sup>12</sup> Atin géfésalamat gom dob Abaye Tulus non féndaitén so begom inok gégédot gom bé de irayén dob de étéwén, sani de étéw dob géfékayae munur bé Kristowe. <sup>13</sup> Non i Abaye Tulus, fénukasén betom tidéw dob délé mone, sani kéféguléw Satanase brab fénbatién betom dob géfékayae, sani kéféguléw i gulaané nuwe Ngaén Jesus. <sup>14</sup> Atin sabaf bé kéléhu i Nga ne, ménfukas tom tidéw dob Satanase brab ménfé sagad i de sala tom.

### Fantag bé Kristowe

<sup>15</sup> Enda giton i Tuluse, éndob i Kristowe, been i ménfégitowe bé atiy Tuluse non giton i Kristowe. Atin Beene sunguwe Ngaén non ménwénén bé énda séna lénimbag i Tulusey de udenén éntingayén. Atin Been i toowe na fo gérotor bé kéluhanay de lénimbag i Tuluse. <sup>16</sup> Non fénlimbag i Tuluse bé Kristowe kéluhanay éntingayéne, dob lawayo brab dob fantade, do giton brab de énda do giton, fiyon i de rémogor do énda gitono brab de odoro ro loo soy de méguléw bero, falan Kristoy léménimbage bé kéluhanay de éntingayén inok usaré noy kéluhanane. <sup>17</sup> Wénén i Kristowe bé énda séna ménlibag i de udenén éntingayén. Atin i kéluhanay de éntingayén diyo dob karowe gonon non Kristowe méguléwe béro. <sup>18</sup> I kéluhana tome do munur, betom i maake lowoh Kristowe atin Beene uléwe. Atin Been i miraye umul dob betome do munur de. Beene sunguwe Nga i Tuluse, atin Beene toowe na fo gérotor bé kéluhanay de tébule. Mélaw Beene toowe fo gérotor,

gérотор na bé kéluhanane. <sup>19</sup> Non sabaf fo dob kétayay Tuluse, tintu fo ségiléw soy Kristowe bé Beene. <sup>20</sup> Atin méuyot de so ké i kéluhanay éntingayéne dob duniyae ni brab dob lawayo géséfagayun de non bé Nga ne. Atin bé kéléhu i Nga ne dob kruse, énggéfawaléyoy Tulusey kéluhanane dumo no.

<sup>21</sup> Bé do gétaf, mérayu gom dob Tuluse brab sébanil gom bé Tuluse non bé de tete rénigo gom brab de tete kéfégitung gom. <sup>22</sup> Endob béleewe ni non bé kéléhu Kristowe, féwaléy i Tuluse begom do dumo no, inok waléy gom méntutu dob adafa nuwe énda i sala gom brab énda i gétebo begom. <sup>23</sup> Endob kailanga kom i émfédaydaye bé késarig gome bé toowe kétoro. Atin féégét gom i kéunur gome. Brab kagom térénon i kéginam gome bé de kéfiyonon fénasad i Tuluse begom amun énggélíngoo kom i Fiyowe Uret. Been i niy toowe fo Fiyu Uret énggumah dob begome atin béleewe ni léméngéb mangéy dob kéluhanay ingéde dob duniyae ni. Atin i begéne, sani Pablowe, been i galbék guwe non sénugu Kristowe begén mangéy muret bé ni Fiyu Uret.

<sup>24</sup> Atin béleewe ni, mororu sabaf bé kérasay guwe témabangan begom. Mororu non sabaf bé de kérasay gu, gétabangu émfégilid bé kérasay Kristowe inok waléy fiyoy lowoh ne, sani de munur de. <sup>25</sup> I Tuluse féwaléyén begén sugu-suguéy de munur inok gétabanga ku begom bé kéuret guwe bé kéluhanay de kébérehén. <sup>26</sup> Been i niy kébéreh i Tuluse ménbunéy dob kéluhanay de étéw bé do gétaf. Endob béleewe ni fénggétiga noy de étéwén. <sup>27</sup> Béleewe ni méuyot i Tuluse de ké fégétiga no dob kéluhanay de étéwén i ni toow fo fiyo kétoro ménbunéy bé do gétaf. Atin ay niy nan kétoro: Bati i Kristowe dob de fédéw gom, atin sabaf bé ni waléy gom toow fo fiyo dob lawayo loo bé kéfiyoy Tuluse. I ni kétoro kay kéluhanay de étéw. <sup>28</sup> Mélaw ureté key i fantage bé Kristowe dob kéluhanay de étéw. Brab féingaté key i kéluhanane brab toroé key beroy kéluhanay gétiga keye inok kéluhana ro munur bé Kristowe inok waléy ro énda i kulang dob kéunur ruwe. <sup>29</sup> Atin i begéne fégérору gémalbék inok mérigo damén i de ni. Atin fébagérey barakat Kristowe begén inok gérigono kuy de ni.

## 2

<sup>1</sup> Méuyotu de ké gétiga kom i kégérор guwe gémalbék témabangan begom brab de munur diyo dob Laodisea, loo soy kéluhanay de étéw énda séna gélolo ro begén. <sup>2</sup> Fégérору gémalbék inok émbagér i de fédéw gom brab inok waléy gom maak sédumon sabaf bé dakéle késégédaw gom, brab inok tintu munur gom bé toowe sabaf bé kégsobut gome bé toowe kétoro fénggétigay Tuluse

begom, sani fantage bé Kristowe. <sup>3</sup> Non Kristo saén i miraye bé tintuwe kégétigan brab tintuwe kégsobut.

<sup>4</sup> Béréhé ku begom i ni inok énda géunur gom bé de tugi do akar i de étéw fiyon fo ké maak toow i de kéuret ro. <sup>5</sup> Non fiyon fo ké énda diyou dob begome, démoyun so fégitungé ku begom. Atin mororu fo non gétiga ku émbagér i kéunur gome bé Kristowe, brab énda téréno kom de.

<sup>6</sup> Atin non ténayakuf gom i Kristowe Kadana kom, fatut rigo gom i tintuwe miring bé Beene non begom i de dumo no. <sup>7</sup> Ufama, i kayéwe déménarir dob fantade. Atin i begome, maak déménarir gom dob Kristowe. Mélaw kagom sésuway bé Beene. Rigo gom i kétaya nuwe brab fébagér gom i kéunur gome loo bé ténoroe nén begom. Atin fatut démoyun gom fésalamat dob Tuluse sabaf bé Kristowe. <sup>8</sup> Atin ingat gom inok énda i magakaran begom émféunur bé de tugi do kétoro énda i lantékén, fiyon fo ké maak toow i de ni. Non tidéw saén dob kéilawane, brab tidéw dob de saitan. Békén toow i nan kétoro non békén tidéw dob Kristowe. <sup>9</sup> I funa kuwe muret bé ni dob begome, inok gétiga kom i toowe fantag bé Kristowe. I Kristowe ménwaléy kéilawan. Gido loo, i Kristowe, tintu ségiléw bé Tuluse. <sup>10</sup> Atin i Tuluse niraya no begom bé tintuwe umul sabaf bé begom i de dumo Kristo. Beeny toowe méguléw, gérotor na bé kéluhanay barakatane méguléw brab do odoron. <sup>11</sup> Atin sabaf bé begom i de dumo Kristo maak do méntuli gomén. I kétuli gome, békén i kétulie rignéy de étéw loo bé adat i de Judio. Yamula Kristoy maake téménuli begom bé kékéda nuwe bé de tafayén tete do adat gom tidéw dob begome inok éndaén kailanga kom i rémigowe tete. <sup>12</sup> Brab amun ménbautis gomén maak ménlébéng gomén brab maak méntébule gom ménggéodor bé Kristowe, sabaf bé kéunur gome bé barakat i Tuluse ménfétébule de. <sup>13</sup> Bé do gétaf énda i umul gom magufusa, non médooy de sala gom brab non énda modor gom bé kitabe niray Moisee, loo bé kéodoroy de Judio de. Endob béleewe ni niray i Tulusey umule magufusa dob begome loo bé ménfétébulee bé Kristowe. Atin tintu fo fénsagadén i kéluhanay de sala tom. <sup>14</sup> Maak kénayasén i kéluhanay ménsulate do sala tom brab kitabe atin maak kénlabo no dob kruso séréngan bé Jesuse inok amun ménléhu i Kristowe ménkédan i nan sulat fantag bé de sala tom brab kitabe so. <sup>15</sup> Bé béno amun ménléhu i Kristowe, i Tuluse kénda noy kuwagib i de saitan méguléw brab de tete méguléw. Atin fénémala no bero dob téngaangay kéluhanay de étéw bé kétabana nuwe bero bé kéléhu

Kristowe dob kruse.

<sup>16</sup> Mélaw kagom fédayaén i de étéw sémugu begom bé atiy fatute amaé kom brab inémé kom, taloo no sugué ro begom bé fatut kun fégadata kom i de mékétéfu do gai, brab do mantu térésang kélunonon, brab do gai kétéréén. <sup>17</sup> Non i kéluhanay de ni maak do anlung i kéluhanay de éntingayén saén do gégumah mosoén, atin i tintuwe, been i Kristowe. <sup>18</sup> Kagom fédayaén i de étéw do félangka-langka kukumé ro begom sabaf bé de énggito ro kun tidéw dob Tuluse. Télamané ro begom féféngadafén bé de télaki. Endob kagom fédayaén de. I de ni do étéw do ubo-ubo saén do térifantad ro, éndob i toowe, do félangka-langka ro. Atin marok do gérotor ro sabaf bé de fiyo kégétiga ro kun, éndob i toowe, énda i funa ro félangka-langka. <sup>19</sup> I de ni do étéw éndaén ménsumfat ro dob lowohe, sani Kristowe. Endob i betome maak lowoh Kristo, atin Been i uléwe. Ménsumfat tom kéluhanan loo bé de réfa i lowohe, atin féérukéy Tuluse betom non ménsumfat tom kéluhanan dob Kristowe.

<sup>20</sup> Maak ménléhu gom énggéodor bé Kristowe. Mélaw méntangéy gomén tidéw dob de saitan brab éndaén géféguléwo ro begom. Mélaw kagomén modor bero. <sup>21</sup> Atin kagom odor-odor ké sugué ro begom maro, “Kagom kuwahén i ni”, taloo no, “Kagom amaén i nan”. <sup>22</sup> Non i amaéne waléy mékédan ké namaén. Mélaw kagom odoron i da nan do sugu non tidéw saén dob kéilawane. <sup>23</sup> I de ni étéw maak fiyoy de sugu ro, non fégésé roy de étéw méngadaf bé de télaki, brab ubo-ubo ro térifantad, brab do lubagé roy de lowoh ro. Endob i de ni do sugu énda fo fiyo no brab énda fo toowén. Non énda gétabanga ro betom miká bé de tete kétayay lowoh tome.

### 3

<sup>1</sup> Maak méntébué gomén ménggéodor bé Kristowe, non wén i umul gom magufusa sabaf bé Beene. Mélaw fatut fégitung gom i fantage bé de éntingayén dob lawayo diyo. Non diyo i Kristowe méguléw mésar dob kuwonoy Tuluse. <sup>2</sup> Fégitung gom i de éntingayén dob lawayo diyo, békén i de éntingayén dob fantade ni. <sup>3</sup> Non maak ménléhu gomén non éndaén modor gom bé de tete adat. Atin wén i tintuwe umul gom sétifon bé Kristowe dob lawayo. Atin énda mékédan i ni umul non sédumon i Kristowe bé Tuluse. <sup>4</sup> I tintuwe umul gom diyo dob Kristowe. Atin amuk séfule giton i kéfiyo nuwe, brab giton soy kéfiyoy mantuwe umul gom non géodor gom bé Kristowe.

<sup>5</sup> Mélaw fatut tagak gom i de tete kétayay de lowoh gom, loo bé de kébigaén, brab mékérésike rigoén brab do kéarumén.

Non i kéaruméne ségiléw bé kéféngadafe bé kéninontowe. <sup>6</sup> I de étéw rémigo bé de ni, kukuméy Tuluse bero non énda modor ro bé de suguén. <sup>7</sup> Atin fiyon i begome, rénigo gom i da nan bé do gétah, non tete sénay de adat gom bé béno.

<sup>8</sup> Endob béleewe ni, fatut tagak gom i kéluhanay de ni, loo bé kékérite, brab kéraréke, brab de ségiyo na do tete kébéréh. <sup>9</sup> Kagom tugion i de tafay do tete adat gom. <sup>10</sup> Brab ménfukas gomén bé kégedot gome bé mantuwe brab fiyowe adat. I ni mantu adat tidéw dob Tuluse. I Tuluse démoyon féwaléy no begom mantu brab fiyo loo bé Beene inok toow fo gétiga kom i fantage bé Beene. <sup>11</sup> Mélaw ségiléw-giléw i de mantu étéwén, fiyon fo ké do Judio taloo no do békén Judio, fiyon fo ké do méntuli taloo no énda, fiyon fo ké do énggéféngad taloo no énda, fiyon fo ké do rifén taloo no békén. Enda i ségiyo gérotor saliyo bé Kristowe, brab Been i batie dob kéluhana tome do munur de.

<sup>12</sup> Betomey de étéw fénémili i Tuluse waléy do étéwén sabaf bé kégedaw ne betom. Mélaw fatut mégedaw gom brab méuray i na gome, brab térifantad gom, brab métanék i de adat gom brab témingkél gom. <sup>13</sup> Atin fatut sétabang gom, brab séféssagad gom amuk wén i réménigo tete dob begome. Fatut féssagad gom i de dumo gom loo bé kéféssagad i Kadnane begom. <sup>14</sup> Atin saliyo na bé de ni, fatut ségedaw gom, non been i niy funa kome waléy sétiman i de féféw gom loo bé fatute. <sup>15</sup> Atin fédaya gom i Kristowe fétanéké noy de féféw gom, inok énda sékérít gom non been i niy funay Tuluse fénalayén begom sébaan lowoh. Atin fatut démoyon gom fésalamat. <sup>16</sup> Atin i kéluhanay de fiyo kétoro Kristowe fatut démoyun bati dob de féféw gom. Atin fatut sétoro gom brab séféginau gom loo bé kéfégétigay Tuluse de begom. Atin kanta gom i de kanta démayéw bé Tuluse brab de kanta émfésalamat dob Tuluse. <sup>17</sup> Mélaw i rigoéné kome, fiyon fo ké dob de kébéréh taloo no dob de rigoéné, fatut rigo gom sabaf begom i de kuyug i Kadnane Jesus. Atin sabaf bé kéunur gome bé Kristowe, fatut démoyun gom fésalamat dob Abaye Tuluse.

<sup>18</sup> I de begom do bawagan libun, odoró kom i de sugu i de bawag gom, non been i niy fatute rigoéné de munur bé Kristowe. <sup>19</sup> Atin i de begom do lagéy, fatut fégedaw gom bé de bawag gom brab kagom dusanén bero.

<sup>20</sup> I de begom do nga, odoró kom i kéluhanay sugu i de lukés gom, non been i niy késuwatay Tuluse. <sup>21</sup> Atin i de begom do boh brab do idéng, kagom fékélébuwanén i kéadowoy gome bé de nga gom taman waléy

ro mékérít brab éndaén méuyot ro rémigo fiyo.

<sup>22</sup> I de begom do rifén, odoro kom i kéluhanaysugu i de amu gom. Fatut rigo gom i fiyowe sénga tékélid, békén saén dob gaiwe téngtégéy amu gome begom inok mésuwat begom. Yamula tidéw dob fiyowe fédéw gom odoro kom i de sugu ro sabaf bé dakéle kébasana kom bé Kadnane. <sup>23</sup> Brab fiyon fo ké ati rigoné kome, fatut toow gom fo fégérór, maak békén saén kéilawan i galbéko kome éndob maak Kadnan i galbéko kome. <sup>24</sup> Fégétédém gom i ni, i Kadnane barasa no begom. Non i Kadnane barasa no begom bé de kéfiyonon irayén dob de étéwén. Non Kristowey tintuwe amu gom. <sup>25</sup> Atin i de étéw rémigo tete, kukuméy Tuluse bero loo bé kégétimal i de sala ro. Non i Tuluse, énda i isu ramigo no.

#### 4

<sup>1</sup> Atin i de begom do amu, fatut rigo gom i méntintuwe brab fiyowe dob de rifé kom. Fégétédém gom i ni, fiyon i begome, wén soy Amu gom dob lawayo.

<sup>2</sup> I kéluhana kome do munur, fatut fédayday gom i kédasal gome dob Tuluse. Brab kagom manat ké démasal gom. Atin fatut fésalamat gom dob Tuluse ké démasal gom. <sup>3</sup> Atin dasal gom so mongot dob Tuluse tabanga no begey inok wén i do gai géureto key i kébéréh ne brab gégégétiga key i Kristowe dob de étéw. Been i niy kétoroé ménbunéy bé gétahe. Atin ménférisuwu béleewe ni sabaf bé kéuret guwe bé ni Fiyo Uret. <sup>4</sup> Mélaw dasal gom inok fékétayéy Tulusey kéuret guwe loo bé fatute rigoné ku.

<sup>5</sup> Atin fatut fétuntay gom i de rigoné kom dob de étéw do énda séna munur bé Kristowe, atin tulama gom uret i Kristowe sénga gai fakay ureté kom. <sup>6</sup> Atin féfiyo gom démoyun i késéuret-uret gome bero brab i késéuret-uret gome fatut wén i lagaén. Brab fatut gétiga kom i fatute késumbul gom dob kéluhanay de étéw.

<sup>7</sup> I gulaané tome dumo tom Tikiko, sani mésarigone gémalbék brab dumo gu so ségiléw sugu-suguéy Kadnane, been i émfégétigane begom fantag bé begéne brab goho kuwe ni dini. <sup>8</sup> Been i niy funa kuwe de sému gu mangéy dob begome, inok féororé no begom bé kéuret ne begom fantag bé de goho key dini. <sup>9</sup> Atin wén soy ségétéwe lagéy dumo gom sébaan gonon féndawét Onesimo modor de. Beeney gulaané tome dumo tom munur bé Jesuse. Toow fo mésarigon i ni étéw. I berowe, ureté ro dob begomey kéluhanay de ménrigo dini.

<sup>10</sup> I Aristarkowe, ségifaé no begom. Been i dumo guwe ménférisu dini. Ségifaé Markose

so begom, sani dumo Bernabewe sétiman bebe. Fén-uwito kun begom kébéréh fantag bé Markose, bé fatut tayakufé kom amuk gé gumah dob begome. <sup>11</sup> Atin i Jesuse (féndawét so Justo) ségifaé no so begom. Enda i ségiyo do Judio mamungon begén muret fantag bé kéké guléw i Tuluse, saliyo bé de ni do téléw gétéw. Toow fo ténabanga ro begén.

<sup>12</sup> Atin i Epafrase, ségifaé no so begom, sani dumo gome sébaan gonon brab ségétéw so sugu-sugué Jesu Kristowe. Sénga tékélid démasal fo dob Tuluso inok méégét i kéumur gome brab énda téméréno, brab inok rigoné kom fo toow i kétayay Tuluse. <sup>13</sup> Enggito gu foy kégérór ne gémalbék, mélaw géureto ku dob begomey fantage bé kégérór ne témabangan begom brab de étéw dob Laodisea loo soy de étéw dob Hierapolis. <sup>14</sup> Atin i Lukase, sani gulaané tome muwa brab Demase so, ségifaé ro begom.

<sup>15</sup> Atin fésamfay gom so dob de munur dob Laodiseay késégifa geye bero brab dob libune féndawét Nímfas brab dob de munur sélimud méngadaf dob lawi ne. <sup>16</sup> Amuk gilid basané kom i sulat guwe ni, fatut fébasa gom so dob de munur bati dob Laodisea. Brab wén soy sulat guwe mangéy dob de munur dob Laodisea, fatut basa gom so. <sup>17</sup> Atin béréh gom dob Arkipowe bé fatut fétausé noy galbéke niray i Kadnane de.

<sup>18</sup> I begéne Pablo, sulaté kuy ni géfuray késégifa bé de kagén kémér. Kagom lifotén begén nikét bé sangkalie dob férisunone ni.

Mégédaw damén i Tuluse begom.

*Pablo*

## I Sunguwe Sulat Pablowe dob de Munur bé Kristowe dob Tesalonika

Ay niy sébaane bé de sénulat Pablo, sani ménbantuge muret fantag bé Jesu Kristowe. Tafayén séménugud i Pablowe dob ingéde Tesalonika, atin méndoo bé de étéw i ménwaléye do munur bé Jesuse sabaf bé kéuret ne. Endob i de Judio do bati diyo dénédél roy Pablowe mésut tidéw do ni ingéd, non ménika ro bé kétoro ne fantag bé Kristowe.

Amun tékédan i Pablowe tidéw dob ingéde ni Tesalonika, ménbuku fantag bé de mantu do munur bati diyo. Ménbuku bé témérén ro munur bé Kristowe sabaf bé kéférasay i de Judio bero. Mélaw sénugu Pablowe ségétéwe dumo no gémalbék féndawét Timoteo inok susiné no ké ati gohoy de munur. Amun ménséfule i Timoteowe mangéy dob Pablowe, nuretén i fantage bé de munur dob Tesalonika bé fétausé roy kéunur ruwe bé Kadnane Jesu Kristo, fiyon fo ké mérasay ro. Mélaw sénulat Pablowe ni inok ureté no dob berowey kéoror ne brab inok féfiyo noy fédéw ruwe. Dob ni sulat, ténoro Pablowe soy fantage bé késéfule Kristowe brab kétébule i Tuluse bé de munur moso.

<sup>1</sup> I begeye Pablo, Silas brab Timoteo, sénulat gey mangéy dob begome do munur bé Kristowe dob ingéde Tesalonika, do étéw i Abaye Tulus brab Kadnane Jesu Kristo.

Mégédaw damén i Tuluse begom brab irayén damén i métanéke fédéw.

<sup>2</sup> Démoyon gey fésalamat dob Tuluse sabaf bé begome kéluhanan, atin sénga tékélid dasala key so begom dob Tuluso. <sup>3</sup> Non buluk démasal gey dob Abay tome Tulus, gétédémó key i de fiyo rigoné kom sabaf bé kéunur gome bé Kristowe. Brab gétédémó key i kégéror gome gémalbék sabaf bé kéimu gome bé Kristowe. Brab gétédémó key i kéégét i inam gome bé késéfule i Kadna tome Jesu Kristo. <sup>4</sup> Do dumo gey, gétiga key méimu i Tuluse begom brab fénémilién begom waléy do étéwén. <sup>5</sup> Non amun nuret gey dob begomey Fiyowe Uret, énda nureto key saén begom, yamula fénggito gey so begom i de mékégaif rénigo gey dob barakat i Rémogor i Tuluse. Atin tintu énggétiga key toow fo fiyoy toowe dob Fiyowe Uret. Atin énggito gom i fiyowe adat gey amun diyo gey dob begome atin rénigo gey i kéluhanay de ni inok tabangé key begom. <sup>6</sup> Atin i begome, niring gom i adat geye brab adat i Kadnane. Fiyon fo ké ménggéagéw gom méndoo kérasay, ténayakuf gom i Fiyowe Uret. Atin toow fo ménoror gom, non fénoror i Rémogor

i Tuluse so begom. <sup>7</sup> Mélaw, ménwaléy gom do étéw fatut iringéy de munur dob Masedonia brab Akaya. <sup>8</sup> Non i kébéreh i Kadnane nuret gom békén saén ménlégéb dob Masedonia brab Akaya. Yamula i kéurete fantag bé kéunur gome bé Tuluse ménlégéb mangéy dob kéluhanay de ingéd. Mélaw éndaén kailanga key i murete fantag bé kéunur gome. <sup>9</sup> Non kéluhanay de étéw muret fantag bé kétayakuf gome begey bé kéangéy geye témukaw begom. Atin ureté ro soy kétagak gome bé kéféngadaf gome bé de kéninontow amun ménunur gomén bé tintuwe brab méuyage Tulus inok féngadafé kom brab rigoné kom i kétaya nuwe. <sup>10</sup> Atin ureté roy fantage bé kéongot-ongot gome bé késéfule i Nga ne Jesus tidéw dob lawayo. Beeney ténébule i Tuluse. Atin Beeney mémukase betom inok énda kukuméy Tuluse betom amuk kukumé no moso i de kéilawan.

## 2

<sup>1</sup> Do dumo gey, begom soy énggétigane de bé wén i fiyo rénigo kétukaw geye begom. <sup>2</sup> Gétiga kom i kéférasaye begey brab kéféngirase begey dob ingéde Filipos. Ménrigoy ni bé énda séna ménagéw gey de mangéy dob begome. Endob fénbaraw i Tuluse begey inok géureto key begom i Fiyowe Uret tidéw dob Beene, fiyon fo ké méndoo sébanile begey. <sup>3</sup> Atin i kéuret geye dob begome békén tidéw dob tugie kétoro, taloo no tete i funa keye témoro, taloo no fagakara key begom. <sup>4</sup> Yamula, doyuné key bérehén i kétayay Tuluse, non gékarangay Tuluse médaít gey muret bé Fiyowe Uret funa no sénarigén dob begeye. Atin énda télamané key fésuwatén i de étéw, yamula méuyot gey émfésuwat bé Tuluse sani gétigane bé de fédéw tom. <sup>5</sup> Gétiga kom i kageye kébéreh. I kageye kébéreh békén saén kékuwéy taloo no fégékurta gey. Gétigay Tuluse so toow i ni. <sup>6</sup> Atin énda séménléd gey bé de kédáyéw gom begey taloo no kédáyéw i de ségiyo. <sup>7</sup> Wén i atura key sémuğu begom témabang begey non do apostol Kristo gey, éndob énda rénigo gey de. Yamula amun diyo gey dob begome, mélémak i kérigo geye begom ségiléw bé ségétéwe idéng toow fo mélémak i kérigo nuwe bé de ngaén. <sup>8</sup> Atin sabaf bé kéféimu geye begom, nuret gey dob begomey Fiyowe Uret tidéw dob Tuluse. Atin békén saén i ni, yamula ményot gey so séloyuk begom bé kéluhanay de rigoné kom, non toow fo gulaané key begom. <sup>9</sup> Do dumo gey, gétiga key gétédémó kom soy kégéror geye gémalbék. Amun nuret gey dob begomey Fiyowe Uret tidéw dob Tuluse, fuweh na kélungonon i kégalbék geye inok gédoté key i kéfaguyag geye. Mélaw énda méngkéréngan gom begey.



<sup>10</sup> Gétiga kom brab gétigay Tuluse so bé fiyo brab méntintuy de rénigo gey dob begome do munur. Enda i rénigo gey funay ségétéwe gétébo begey. <sup>11</sup> Gétiga kom i de rénigo gey dob séngae ségétéw begom, ségiléw bé kériyog ségétéwe boh bé de ngaén. <sup>12</sup> Non fénbagér gey brab fénfioy gey i de fédéw gom. Atin nongot gey dob begome bé rigoné kom i fiyowe sénga tékélid loo bé fatute rigonéy de étéw i Tuluse. Been i ménémilie begom inok féguléwo no begom brab inok gétiga kom i kéfioy nuwe.

<sup>13</sup> Atin ay ni soy funa keye dé moyun fésalamat dob Tuluse. Amun nuret gey dob begomey kébéreh i Tuluse, fénggélino gom brab ténayakuf gom. Ménunur gom de bé békén saén kébéreh i kéilawane, yamula kébéreh i Tuluse. Atin tintu fo tidéw dob Tulusey kébéreh geye, non usaréy Tulusey kébéreh ne émfébagér bé kéunur i betome do munur bé Jesuse. <sup>14</sup> Atin do dumo gu, i ménrigowe dob begome ségiléw bé ménrigowe dob de étéw i Tuluse do munur bé Jesu Kristowe bati dob Judea. Fénrasy i de dumo ro bero do Judio. Atin ségiléw so bé begome, i de dumo gom bati dob kagome ingéd férasayé ro so begom sabaf bé kéunur gome bé Jesuse. <sup>15</sup> I de Judio dob Judea fénléhu roy Kadnane Jesus brab de sénarigoy Tuluse muret bé kébéreh ne. Atin fénrasy ro so begey. Toow fo énda mésuwat i Tuluse bero. Atin sébanil ro so bé kéluhanay étéwe. <sup>16</sup> Non ténlama roy géméléé begey muret bé Fiyowe Uret dob de békén Judio, funa ro méfukas dob de sala ro. Mélaw ségiléw bé gétahe, toow fo ménféno ron bé salae. Mélaw béleewe ni, toow fo mékérít i Tuluse bero.

<sup>17</sup> Atin do dumo gey, amun énggéséféka tom bé magade saén énda gélifoto key begom. Yamula toow fo mégundoy gey begom atin toow fo téménlama gey man mangéy diyaan inok géségito tom. <sup>18</sup> Méuyot gey séfule mangéy dob begome. Brab i begéne, Pablo, médoonén gule téménlamawu mangéy diyaan. Endob alangé Satanase fo begey. <sup>19</sup> I funa keye damén méuyot séfule mangéy sugud-sugud diyaan, non toow fo gulaané key begom. Atin gulaané key begom non sabaf bé begome, ménwaléy méégét i kéongot-ongot geye bé késéfule Jesu Kristowe. Atin sabaf bé begome, toow gey fo moror. Atin amuk diyo gey moso dob adafay Kadnane Jesu Kristo ké séfule, géureto key i fiyowe fantag bé de rénigo gey sabaf bé kéunur gome. <sup>20</sup> Toow, begom i funa keye moror brab géfélangka-langka.

### 3

<sup>1</sup> Amun éndaén foy fégifusa key bé kégundoy geye begom, ménséfagayun gey téléw gétéw bé i begeye ruwo gétéw bati gey

dob Atenas, <sup>2</sup> brab ségétéw saén i mangéye diyaan. Mélaw sénugu gey i Timoteowe, sani dumo tome munur brab dumo gey gémalbék dob Tuluse muret bé Fiyowe Uret fantag bé Jesu Kristowe. Sénugu gey i Timoteowe inok fébagéré noy kéunur gome brab féfioné noy de fédéw gom, <sup>3</sup> inok énda i ségétéw begom mébaleng i kéunur ne sabaf bé de kéférasay begom. Gétiga kom soy de ni do kérasay mériyo dob betome non beenyi bantak i Tuluse. <sup>4</sup> Non amun diyo gey séna dob begome, béréh geyén dob begome bé férasayén tom moso. Atin tintu gétiga kom so bé toow fo ménriyo. <sup>5</sup> Been i niy funa kuwe séménugu bé Timoteowe mangéy dob begome. Endob téningkél gey kébuku guwe fantag bé begome. Mélaw sénugu gey Timoteowe inok susiné noy fantage bé kéunur gome. Ménbukuu ké ténéngkad Satanase begom brab béalengén i kéunur gome atin mésinggula mélaw i kéluhanay galbék geye.

<sup>6</sup> Atin mantu séna énggumah i Timoteowe tidéw dob begome. Atin nuwitén i fiyowe uret fantag bé kéunur gome brab kégédaw gome. Atin béréhén begey i doyuné kom kun fégitungén i fiyowe fantag bé begeye. Brab béréhén soy kéuyot gome géségito begey loo bé kéuyot geye géségito begom. <sup>7</sup> Mélaw do dumo gey, fiyon fo ké béleewe ni médooy de mérégén géagéwo key brab kérasayan gey, ménfiyoy de fédéw gey sabaf bé begome. I kéunur gomey funay de fédéw gey ménfiyo. <sup>8</sup> Non bé do gétah, toow fo ménbuku gey fantag bé begome. Endob béleewe ni, moror gey non gétiga key méégét i kéunur gome bé Kadnane brab éndaén fo émbaleng i de fédéw gom. <sup>9</sup> Béleewe ni, géfésalamat gey dob Tuluso fantag bé begome. Fésalamat gey sabaf bé kéoror geye démasal dob Tuluso fantag bé begome. <sup>10</sup> Fuweh na kélungonon, démasal gey fo toow dob Tuluse ongoté key dob Beene tungkasé no betom géségito man ségule inok géféégéto key i kéunur gome amuk wén i kulang de.

<sup>11</sup> I Abay tome Tulus brab Kadna tome Jesus, tafayé ro damén i agéwone inok géagéw gey mangéy dob begome. <sup>12</sup> Atin féinutéy Kadnane fédakélén damén i késégédaw gome brab kégédaw gome bé kéluhanay de étéw, inok waléy ségiléw bé kédakél i kégédaw geye begom. <sup>13</sup> Mélaw fébagéré noy de fédéw gom, brab féwaléy no begom toow fo fiyo brab do méntintu inok énda métébo gom amuk diyo gomén dob adafay Abay tome Tulus bé gaiwe séfule i Kadnane Jesus beroy kéluhanay de étéwén.

### 4

<sup>1</sup> Atin do dumo gey, wén soy béréhé keye begom. Téno ro gey begom i fatute adat rignoné kom inok mésuwat i Tuluse de. Atin

been i niy rénigo gome. Atin béleewe ni sabaf bé atura keye tidéw dob Kadnane Jesus, ongoté key dob begome bé umana kom i da nan fiyo rigoné kom. <sup>2</sup> Gétiga kom i kétoro geye begom sabaf bé atura keye tidéw dob Kadnane Jesus. <sup>3</sup> Kétayay Tuluse ké métintu gom brab kagom bigaén. <sup>4</sup> I kéluhana kome fatut féfiyo gom i kébawag gome. Rigo gom i fatute loo bé kétayay Tuluse. <sup>5</sup> Mélaw féfiyo gom i kébawag gome loo bé fatute. Kagom iringén i de énda méngintulus, modor ro saén bé de tete kétayay de lowoh ro. <sup>6</sup> Mélaw fatut énda i ségétéw begom rémigo késalaan loo bé ni dob dumo gome munur bé Kristowe taloo no lafisé kom. Non i Kadnane kukumé noy de étéw rémigo tete loo bé ni. Bénreh geyén i ni dob begome bé do gétaf brab sulaté ku man béleewe ni. <sup>7</sup> Non i Tuluse fénémiélién betom inok waléy tom do métintu étéw. Enda fénémiélién betom inok sétayan tom bé békéne do bawag tom. <sup>8</sup> Mélaw amuk wén i étéw mika bé ni kétoro, békén étéw i kéikaa nuwe, yamula Tulus, sani miraye bé Rémogor ne dob betome.

<sup>9</sup> Enda kailanga kuy sémulatane begom fantag bé kégedaw gome bé de dumo gom munur. Non Tulus i téménoore begom bé fatut ségedaw gom. <sup>10</sup> Atin gétiga key mégédaw gom bé kéluhanay de dumo gom munur bati dob Masedonia. Gido loo do dumo gey, ongoté key dob begome bé umana kom i kégedaw gome. <sup>11</sup> Fatut fétanék gom i kébati gome, brab kagom furaya fédéw i de dumo gom. Brab fatut fégérór gom gémalbék inok gédoté kom i kéfaguyag gome, loo bé bénreh geye begom bé do gétaf. <sup>12</sup> Amuk rigoné kom i ni, fiyon i de énda munur fégadata ro begom, brab énda kailanga kom i mongote dob de ségiyo inok gédoté kom i kéfaguyag gome.

### *I késéfule Jesuse*

<sup>13</sup> Atin do dumo gey, méuyot gey de ké gétiga kom i fantage bé de ménléhuén kuyug Kristowe. Non amuk gétiga kom i toowe fantag bé ni, énda tete i de fédéw gom loo bé de étéw énda i inam ro. <sup>14</sup> Non munur tom bé i Jesuse, ménléhu, tidéw béno méntébule, atin séfule moso. Mélaw munur tom bé i de ménléhu munur bé Jesuse, tébule ro brab féséfuleéy Tuluse moso bero modor bé Jesuse.

<sup>15</sup> Ay ni sulaté key i kétoro i Kadnane: I de betom do méuyag séna dob gaiwe séfule i Kadnane, énda géétaf tom bé de ménléhu do kuyug Jesuse. <sup>16</sup> Non bé gaiwe séfule i Kadnane mélus tidéw dob lawayo, wén i mékes toow fo métanug, brab émbéréh i gérotore télakiy Tuluse, brab émbéréh i témburiy Tuluse. Tidéw béno, i de étéw munur bé Kristowe do ménléhuén, beroy de sungu tébule. <sup>17</sup> Tidéw béno, i de betom do kuyug Jesuse do

méuyag séna bé béno gai, sétimu tom betom i de mantu méntébule dob rawéno diyo. Atin sébalak tom bé Kadnane dob rotoro diyo. Tidéw béno, diyo tom dob Kadnane taman sa taman. <sup>18</sup> Mélaw séféfiyo gom fédéw bé de ni do kébéréh gu.

## 5

<sup>1</sup> Do dumo gey, énda kailanga key i sémulatane begom fantag bé gaiwe mérigoy de ni. <sup>2</sup> Non gétiga kom i fantage bé késéfule i Kadnane moso. Kétékowan moso i de étéw de loo bé kékétékowan ségétéwe étéw ké gégumah i ségétéwe ménakaw ké kélungonon. <sup>3</sup> Bé lala i de étéw émbéréh maro, "Métanék i ni gai brab énda i makakaid bé ni kébati," sonom béno tékow gégumah i gaiwe mébinasa ro. Atin énda géséliyaha ro de. Atin métékwon i kégumah i nan gai loo bé kégumah i gaiwe kéararan i ségétéwe libun obor. <sup>4</sup> Endob do dumo gu, énda bati gom dob délémoné loo bé de étéw énda gétiga roy fatute. Mélaw énda fatut gom kétékowan bé kégumah i gaiwe séfule i Kadnane loo bé ségétéwe kétékowan ké gégumah i ségétéwe ménakaw. <sup>5</sup> I kéluhana kome bati gom dob géfékayae sani dob fangangaturay Tuluse. Enda bati tom dob délémoné, sani dob fangangatura Satanase. <sup>6</sup> Mélaw katom démoyon féfidongén i de itunga tom loo bé de étéw énda ongot-ongoté roy kégumah i Kadnane. Fatut démoyon tom mingat brab féfiyoné tom i adat tome brab énda odoró tom i de tete kétayay de lowoh tom. <sup>7</sup> Kélungonon i kéfidongén i de étéw brab kélungonon soy kéolo ruwe. <sup>8</sup> Endob i betome do bati dob géfékayae énda fatut odoró tom i de tete kétayay de lowoh tom. I betome do munur, fatut iringé tom i sundalowe, non fatut kégalé tom i kéunur tome bé Tuluse brab kégedaw tome bé de dumo tom non been i niy maake futow kémélung bé de kuméng tom. Brab fatut féégété tom i inam tome bé kéfukas tome dob de sala tom non been i niy maake futow sayaf téméléb bé de uléw tom. <sup>9</sup> Non fénémieli i Tuluse betom békén inok kukumé no betom. Yamula fénémiélién betom inok fukasé no betom sabaf bé Kadnane Jesu Kristo. <sup>10</sup> Non i Jesuse génantino no betom méléhu inok méuyag tom bati dob beene taman sa taman fiyon fo ké ménléhu tomén taloo no méuyag tom séna dob gaiwe séfule mangéy dini. <sup>11</sup> Mélaw fatut fétaas gom i késéféfiyo gome fédéw brab késétaabang gome loo bé rigoné kome béleewe ni.

<sup>12</sup> Atin do dumo gey, ongoté key dob begome bé fégadata kom i de gémalbék dob begome, sani de odoró kom fénémieli i Kadnane témoro begom. <sup>13</sup> Basana kom bero brab féimu gom bero sabaf bé galbék ruwe dob begome. Atin kagom sétiboh bé de dumo gom munur.

<sup>14</sup> Atin do dumo gey, ongoté key dob begome bé béréh gom dob de faukén bé fatut ro gémbalék. Atin fatut fébagér gom i fédéw i de mégilak. Atin fatut tabanga kom i de étéw kailanga roy tabange. Atin fatut tingkéro kom i kéluhanay de étéw. <sup>15</sup> Féginau gom i de étéw bé békén ro sémuli ké wén i réménigo tete dob berowe. Yamula fatut rigo gom fiyo dob de dumo gom munur brab dob kéluhanay de étéw sénga tékélid.

<sup>16</sup> Atin fatut moror gom sénga tékélid.

<sup>17</sup> Brab fatut dasal gom démoyun. <sup>18</sup> Atin fiyon fo ké ati goho kome, fatut fésalamat gom dob Tuluse. Non been i niy kétayay Tuluse rigoné kom sabaf bé kéwaléy gome do dumo Jesu Kristowe.

<sup>19</sup> Atin kagom alangén i Rémogor i Tuluse. <sup>20</sup> Atin kagom mika bé urete tidéw dob Tuluse. <sup>21</sup> Téngkad gom i kéluhanane brab tayakuf gom i fiyowe. <sup>22</sup> Atin férayu gom dob kéluhanay tetee.

<sup>23</sup> I Tuluse, sani émfétanéke bé de fédéw gom, féwaléyé no damén begom métintu. Atin diyagané no damén i de lowoh gom brab de rémogor gom brab de fédéw gom inok énda i rigoné kom fatut sénditon gom de taman dob gaiwe séfule i Kadna tome Jesu Kristo. <sup>24</sup> I Tuluse, sani ménféwaléye begom do munur, rigoné noy ni non toow fo géсарigon.

<sup>25</sup> Do dumo gey, dasala kom so begey.

<sup>26</sup> Fatut ségifa gom i kéluhanay de dumo tom munur, brab fégito gom i kégedaw gome bero ké séségifa gom.

<sup>27</sup> Atin sabaf bé atura kuwe tidéw dob Kadnane, ongoté ku dob begome bé basa gom i ni sulat dob kéluhanay de dumo tom munur diyaan.

<sup>28</sup> Mégedaw damén begom i Kadna tome Jesu Kristo.

*Pablo*

## I GÉruwowe Sulat Pablowe dob de Munur bé Kristowe dob Tesalonika

Ay niy sébaane bé de sénulat Pablo, sani ménbantuge muret fantag bé Jesu Kristowe. Been i niy géruwowe sulatén dob de munur do bati dob ingéde Tesalonika. Dob sunguwe sulat Pablowe, ténoroen i fantage bé késéfule Jesuse. Endob i de dumo bé de étéw diyo, énda gésubuto ro de. Mélaw sénulat Pablowe man i ni sulat inok févétiga no beroy fantage bé késéfule Jesuse, non bé sungu-sunguwe, gégumah i Ségétéwe Sébanil bé Kristowe. I ni étéw, médooy fériyo nuwe tete bé de étéw énda munur ro bé Kristowe.

Dob ni sulat, féniyo Pablowe fédéw i de étéw do munur diyo inok fédayday ro munur fiyon fo ké mérasay ro sabaf bé kéunur ruwe.

<sup>1</sup> I begeye, Pablo, Silas brab Timoteo, sénulat gey mangéy dob begome do munur bé Kristowe dob ingéde Tesalonika, sani de étéw i Abay tome Tulus brab Kadnane Jesu Kristo.

<sup>2</sup> I Abaye Tulus brab Kadnane Jesu Kristo, mégédaw ro damén begom brab iray ro damén begom i métanéke fédéw.

<sup>3</sup> Do dumo gey, fatut gey démoyun fésalamat dob Tulse sabaf bé begome. Non toow fo minut méégét i kéunur gome brab minut fo dakél i késégédaw gome. <sup>4</sup> Been i niy funa keye émbéréh bé fiyowe fantag bé begome dob de munur bé Kristowe dob de simbaay Tulse dob de ségiyo ingéd. Ureté key i fantage bé kéunur gome brab kétingkél gome bé de kéférasay begom brab de mérégén géagéwo kom. <sup>5</sup> Dob kéluhanay de ni, giton méintuy kékukum i Tulse, atin waléy gom toow fo médaít féguléwo no. Atin i funa kome mérasay, sabaf bé kéféguléwoy Tulse begom. <sup>6</sup> Endob méintuy Tulse atin mélaw férasay no moso i de étéw émférasay begom béleewe ni. <sup>7-8</sup> Atin kédané noy kérasay gome brab de kagey so kérasay. Rigoné noy ni dob gaiwe féfégitto moso i Kadnane Jesu ké séfule tidéw dob lawayo kémégal mérino aféy, beroy de barakatan do télaki no. Atin bé béno kukumé noy de étéw mika ro bé Tulse brab de énda munur bé Fiyoew Uret fantag bé Kadna tome Jesu. <sup>9</sup> Mékukum ro mébinasa taman sa taman. Sésuway ro bé Kadnane brab dob barakat ne réméndaw. <sup>10</sup> Mérigoy ni dob gaiy késéfule ne inok dayéwéy kéluhanay étéw ne brab fégadatay kéluhanay de munur de. Atin géamung gom so dob berowe non ménunur gom bé kéureto keye begom.

<sup>11</sup> Been i niy funa keye démoyun démasal mongot dob Tulse bé féwaléy no fiyoew

de adat gom loo bé fatute rigonéy de étéw fénémili i Tulse. Ongoté key so dob Beene bé tabanga no begom bé barakat ne inok gérigono kom i fiyowe kétaya kom rigonén sabaf bé kéunur gome de. <sup>12</sup> Mélaw dayéwé kom i Kadna tome Jesu, brab i Beene dayéwé no so begom. Mérigoy ni sabaf bé késégédaw i Tulus tome brab Kadnane Jesu Kristo.

## 2

### *I késéfule Jesuse*

<sup>1</sup> Do dumo gey, févétiga key begom i fantage bé késéfule i Kadna tome Jesu Kristo brab kétimu ne betom inok diyo tom dob Beene. Ongoté key dob begome, <sup>2</sup> bé kagom magad mégilak taloo no émbuku i de fédéw gom amuk wén i gélingoo kom uret bé énggumahén kun i gaiy késéfule i Kadnane. Kagom munur de fiyon fo ké ségétéw kun sénarigoy Tulsey ménbérehe de taloo no bénréh i ségétéwe kun muret taloo no wén kun i sulat tidéw dob begeye fantag bé ni. <sup>3</sup> Mélaw kagom fo fédayaén i de étéw fagakara ro begom. Non i gaiwe séfule i Kadnane, énda gégumahén taman énda médooy de waléy sébanil bé Tulse brab féfégitoy Tete Etéw sani tintuwe fo sébanil bé Tulse, sani mangéye dob emfernowo moso. <sup>4</sup> Atin ay niy rigonéy nan étéw: Sébanil bé kéluhanay féngadaféy de étéw brab kéluhanay de mékétéfu kun. Atin toow fo féfégérotor dob kéluhanay de ni. Atin mahur so dob lawi i Tulse brab mésar diyo atin béréhé no been kun i Tulse.

<sup>5</sup> Aw énda gétédémo kom i de ni? Bénréh gun i ni dob begome bé do gétahe bé kédiyo guwe séna dob begome. <sup>6</sup> Endob béleewe ni wén i malang bé ni Tete Etéw, atin gétiga kom i malange de. Endob féfégitoy ni Tete Etéw dob fatute gai. <sup>7</sup> Béleewe ni, gémalbékén i barakat i ni Tete Etéw, éndob mébunéy i de rigoné no. Endob i malange de, taus i kéalang ne de taman mékédan. <sup>8</sup> Tidéw béno, i Tete Etéw féfégitto. Endob amuk gégumah i Kadnane Jesu, féléhué noy ni Tete Etéw bé kéiyuf ne de brab binasané no dob barakat i kéréndaw ne. <sup>9</sup> Endob amuk gégumah i ni Tete Etéw, wén i barakatén tidéw dob Satanase. Brab gérigono noy kéluhanay de séfégiyo-giyo do mékégaif do galbék do énda toowén non békén tidéw dob Tulse. <sup>10</sup> Brab rémigo do médooy do gékélaso do tete inok fagakara noy de étéw do méléhu. Méléhu ro non énda tényakuf roy toowe kétoro inok méfukas ro dob de sala ro. Yamula ménika ro de. <sup>11</sup> Been i niy funay Tulse féfégitungén bero bé békéne katabuwan inok munur ro bé de tugi. <sup>12</sup> Mélaw i kéluhanay de étéw énda munur ro bé toowe kétoro éndob méuyot ro rémigo tete, kukuméy Tulse bero.

<sup>13</sup> Do dumo gey, toow fo mégédaw i Kadnane begom. Fatut dé moyun gey fésalamat dob Tuluse sabaf bé begom. Non fénémili i Tuluse begom fukasé no bé sunguwe. Hoo, fénwaléyén begom do métintu do étéwén bé barakat i Rémogor ne brab dob kéunur gome bé toowe kétoro. <sup>14</sup> Atin sénéngkat i Tuluse begom munur dob Beene bé Fiyowe Uret nuret gey begom, inok kagom soy kéfiyoy Kadna tome Jesu Kristo. <sup>15</sup> Mélaw do dumo gey, féégét gom i kéunur gome brab lékafit gom dob de toow ténoro gey begom dob de kéuret gey brab dob surat geye.

<sup>16-17</sup> I Kadna tome Jesu Kristo brab Abay tome Tulus fébagéré ro damén begom brab féfiyoné ro damén begom inok dé moyun gom gériyo brab gébéréh bé fiyowe. Toow fo mégédaw i Tuluse betom, sani émfébagére bé de fédéw gom brab émféégéte bé kéginam tome bé de kéfiyonon irayén.

### 3

<sup>1</sup> Atin do dumo gey, ay niy tamfaday béréhé keye begom. Dasala kom begey inok magad mélégéb i kébéréh i Kadnane brab médooy de étéw munur dob Beene brab fégadata ro so ségiléw bé de réniyo gom. <sup>2</sup> Dasal gom so dob Tuluse inok énda fédayaé noy de tete étéw férasayé ro begey. Non médooy de étéw énda munur ro bé Fiyowe Uret.

<sup>3</sup> Endob toow fo gésarig tom bé Kadnane. Fébagéré noy de fédéw gom brab diyagané no begom tidéw dob Satanase. <sup>4</sup> Atin sabaf bé kéunur geye bé Kadnane, gésarigo key begom. Gétiga key rigo né kom béleewe niy de sénugu gey begom brab taus gom so dob de gétundug do gai moso.

<sup>5</sup> I Kadnane fanangguwité no damén begom inok minut méégét i kéféimu gome bé Tuluse brab inok fédayday gom fo toow sabaf bé kétabang Kristowe.

#### *Fatut gémalbék*

<sup>6</sup> Do dumo gey, sabaf bé atura keye tidéw dob Kadnane Jesu Kristo, sugué key begom férayu dob de faukén do munur, sani de énda modor bé de ténoro gey bero. <sup>7</sup> Gétiga kom fatut rigo gom i ségiléwe bé réniyo geye. Enda ménfaukén gey amun diyo gey dob begome. <sup>8</sup> Atin énda nongot gey saén i kéfaguyag geye. Yamula bénléy gey i de amaé key. Atin ménfégéror gey gémalbék fuweh na kélungonon inok énda kéréginan gom sabaf bé begeye. <sup>9</sup> Réniyo gey i de ni fiyon fo ké wén i kuwagib gey médot bé kéfaguyag geye tidéw dob begome. Endob i funa keye énda méndot bé kéfaguyag geye tidéw dob begome inok iringé kom i fiyowe adat fénggito gey begom. <sup>10</sup> Atin amun diyo gey séna dob begome, ténoro gey begom i ni: "I étéwe mika gémalbék énda fatutén féamaén."

<sup>11</sup> I funa keye sémulat bé ni non énggélino key wén i do faukén begom énda gémalbék ro. Enda kun i saliyo rigo né ro ké békén furaya fédéw roy rigo né de dumo ro. <sup>12</sup> Mélaw sabaf bé atura keye tidéw dob Kadnane Jesu Kristo, sugué keye dob de faukén étéw bé rigo né roy fatute. Fatut gémalbék ro inok gédoté roy kéfaguyag ruwe.

<sup>13</sup> Endob i begome, do dumo gey, kagom lugotén réniyo bé fiyowe. <sup>14</sup> Amuk wén i dumo gom énda modorén bé kétoro geye dob ni surat, fégilolo gom. Tidéw béno, kagom séloyuk de inok waléy mémala. <sup>15</sup> Endob kagom sébanil de, yamula féginau gom loo bé fatute rigo né kom dob de dumo gom munur bé Jesuse.

<sup>16</sup> I Kadnane, sani émfétanéke bé de fédéw tom, toow fo damén fétanéke noy de fédéw gom sénga tékélid fiyon fo ké ati goho kome. Atin diyo damén i Kadnane dob begome kéluhanan.

<sup>17-18</sup> Sulaté kuy ni bé kagéne kémér. Ségifaé ku begom. Loo bé niy kéfirmana kuwe bé kéluhanay de surat gu. Loo bé niy késulat guwe.

Mégédaw damén begom kéluhanan i Kadna tome Jesu Kristo.

*Pablo*

## I Sunguwe sulat Pablowe dob Timoteowe

Ay niy sébaane bé de sénulat Pablowe, sani ménbantuge muret fantag bé Jesu Kristowe. Sénulatén dob ségétéwe lagéy féndawét Timoteo. I Timoteowe ni, been i dumo Pablowe amun ménagéw mangéy muret fantag bé Kristowe. Ténabanga Timoteowey Pablowe atin beeney maake nga Pablowe.

Sénulat Pablowny ni inok féngaté noy Timoteowe fantag bé de tugién do émbéréh énda kun fakay i mamae bé de dumo amaén. Wén soy de ségiyo tugién kétoro ro.

Dob ni sulat, ténoro Pablowny fantage bé fiyowe kéféngintulus, atin ténoroén soy fantage bé ati klasiy étéwe fatut waléy odoroy de munur.

1-2 Timoteo,

Sulata ku beem, sani maake nga gu sabaf bé kéunur me bé Kristowe. I begéne Pablo, sani ségétéwe apostol Jesu Kristowe non i Tuluse brab Jesu Kristowe sénugu ro begén muret fantag bé Kristowe, sani mémukase betom dob de sala tom. Atin i Jesuse, Beene sarigo tome.

I Abaye Tulus brab Kadna tome Jesu Kristo mégédaw ro damén beem, brab méuray damén i na ruwe beem, atin iray ro damén beem i métanéke fédéw.

*Fantag bé tugiéne kétoro*

<sup>3</sup>Féginawé ku beem loo bé réniyo guwe bé do géta h amun ténagak gu beem bé kéagw guwe mangéy Masedonia. Kago tékédan dob Efeso, non wén i de étéw témoro diyo bé éndae toow. Mélaw méuyotu de ké géléé mo bero. <sup>4</sup>Béréhém bero bé békénén féganadé roy de kétutul brab de kélabit bé de médo do katufuan funa ro démoyun séédél. I de ni do éntingayén énda fégésobuté ro betom i bantak i Tuluse non i tintuwe aguwon, been i kéunure bé Kristowe. <sup>5</sup>I funa kuwe sému gu bé ni inok ségédaw ro sabaf bé kétagak ruwe bé de sala ro brab sabaf bé fiyoy fédéw ruwe brab sabaf bé tintuwe fo kéunur ro. <sup>6</sup>Endob wén i de étéw diyo béalngal roy de ni inok témantu ro séédél bé éndae lantékén. <sup>7</sup>Méuyot ro témoro bé kitabe tidéw dob Moisesese. Endob fiyon i karowe kébéreh, énda gésobuto ro de taloo no de kétoro ro do fégésé ro dob de ségiyo étéw.

<sup>8</sup>Endob i betowe, gétiga to fiyoy kitabe tidéw dob Moisesese amuk fiyoy kéusare de. <sup>9</sup>Gétiga to, i kitabe békén réniyo inok kay de fiyo do étéw. Yamula réniyo kitabe inok wén i gémélé bé de tete étéw, brab i de étéw do ménsala, brab de énda méngintulus, brab de étéw énda fégadata roy Tuluse, brab de méméléhu bé de lukés ro brab de méméléhu

do étéw, <sup>10</sup>brab de étéw sétayan bé de békén do bawag ro, brab de bakla, brab de miyag, brab de témugi, brab de témbo bé éndae toow, brab de étéw félisé roy toowe kétoro. <sup>11</sup>Atin i ni toow kétoro, tidéw dob Fiyouwe Uret i ménbantuge barakatan Tulus, sani Fiyouwe Uret sénarig dob begéne inok légébé ku.

<sup>12</sup>Fésalamatu fo dob Kadna tome Jesu Kristo, sani émfébagére begén inok gérigono kuy ni galbék. Fésalamatu dob Beene non kénarangén begén méсарigon funa no fénémilién begén inok waléyu sugu-sugué no. <sup>13</sup>Fénémiélién begén fiyon fo ké bé do géta h ménbérehu fo tete fantag bé Beene, brab fénrasy gu, brab fénéngiras gu. Endob i Tuluse toow fo ménuray i na nuwe begén non énda séna ménunuru, mélaw énda gétiga kuy fatute rigné ku bé béno. <sup>14</sup>Atin i Kadna tome toow fo ménggédaw begén brab fénunurén begén brab ménggédaw begén non been i de niy rigné nuwe dob de étéw do dumo Jesu Kristowe.

<sup>15</sup>Wén i toowe kébéreh, fatut tayakuf gom brab unuro kom mano, "I Jesu Kristowe méngagéw dob duniyae ni inok fukase noy de ménsala do étéw inok énda mékukam ro." Atin begéney toowe fo tete bero kéluhanan. <sup>16</sup>Endob been i niy funay Tuluse ménuray i na nuwe begén, inok giton i kédakél i kétingkél Jesu Kristowe bé kégédaw ne begén sani toowe fo tete étéw. Mélaw i kéluhanay de étéw munur dob Beene moso, sani de gégédot bé umule magufusa, gétiga ro toow fo mégédaw i Kristowe. <sup>17</sup>I tintuwe Tulus, sani éndae giton, brab sani méguléwe bé kéluhanane, brab sani énda i féganayay kéuyag ne taloo no tamana no, médayéw damén brab basanan taman sa taman. Amen!

<sup>18</sup>Timoteo, beemey maake nga gu, sugué ku beem bélewe, loo bé kébérehé bénréh i sénarigoy Tuluse fantag bé beeme bé do géta h.

Odor go bé de ni do kébéreh inok gétabana moy de békén toow kétoro loo bé ségétéwe sundalo tabana noy dumo nuwe sébanil. <sup>19</sup>Féégétém i kéunur me brab odoroy moy fatute. Non wén i do étéw énda rigné roy gétiga ruwe fatut, funay kéunur ruwe mébinasa. <sup>20</sup>I de dumo bero, been i ro Hime-neowe brab Alejandrowe. Endob ténagak gu bero brab kénukum gu bero bé kéiray guwe bero dob Satanase inok gétiga ro énda fakay ro émbéréh tete fantag bé Tuluse.

## 2

<sup>1</sup>I toowe fo sungu ongoté ku dob beeme, fatut dasala kom i kéluhanay étéwe. Fégédaw-gédaw gom ongot dob Tuluse atin fésalamat gom dob Beene bé kéluhanay de rigné no dob begome. <sup>2</sup>Fatut dasala kom i de datu brab kéluhanay de méguléw inok métanéki i kébatu tome atin énda i sétiboh bé lala

tome rémigo bé fiyowe loo bé kétayay Tuluse. <sup>3</sup> I funa kuwe mongot bé ni non fiyoy démasale. Been i niy funay Tuluse, sani mémukase betom, méswat. <sup>4</sup> I Tuluse méuyot de ké méfukas i kéluhanay de étéw inok énda mékukum ro. Brab méuyot so ké gétiga roy toowe kétoro. <sup>5</sup> Non sébaan saén i Tuluse brab sébaan saén i kéfédéway Tuluse brab kéilawane, Been i étéwe Jesu Kristo. <sup>6</sup> Non i Jesuse, nirayén i férénawa nuwe inok mékédan i kékukume bé kéluhanay étéwe. Mélaw dob fatute gai, fénggito noy kéuyot i Tuluse mémukas bé kéluhanay étéwe inok énda mékukum ro. <sup>7</sup> Atin been i niy funa nuwe ménémili begén inok waléyu apostol, atin sénuguén begén mangéy dob de békén Judio inok toroé ku bero inok munur ro bé toowe kétoro. Tintu fo béréhé kuy toowe, énda fo témugiu.

<sup>8</sup> Dob séngae gonon, méuyotu ké démasal i de lagéy. I de lagéy démasal, fatut fiyoy de adat ro. I de kémér ro tunggúlén bé lala ruwe démasal, békén fatut fégrégo sala. Atin i de ni lagéy, békén ro fatut mékérit bé de dumo ro taloo no séédél ro. <sup>9</sup> Atin méuyotu de so ké kémégali de libun bé fatute kékégal. Enda fatut ro miring bé de libun énda mémala ro. Fatut ro météméd. Mélaw énda fatut fékélébuwané roy émféfiyowe bé de buk ro bé de séségiyo-giyo kéfutus taloo no de kéfégono bé de bélowon do ono look perlas, taloo no de kékégal bé de balilaga do kégal. <sup>10</sup> Yamula i funa ruwe médayéw non fiyoy de riginolé ro loo bé fatute riginóy libune méngintulus. <sup>11</sup> Atin i de libun fatut mantés ro brab térifantad ro ké gai kéféganad. <sup>12</sup> Enda tungkasé kuy de libun témoro taloo no sugué roy de lagéy. Fatut mégélingo ro saén. <sup>13</sup> Non Adam i lénimbage sungu, tidéw béno Eba. <sup>14</sup> Atin békén Adam i fénggakara Satanase. Yamula, Eba i fénggakara Satanase inok géféliiso noy sugu i Tuluse. <sup>15</sup> Endob i de libun, tabangé no bero ké mégénga ro, amuk fédayday ro munur, brab mégédaw ro, brab térifantad ro, brab rémigo ro fiyo.

### 3

#### *Fantag bé de odoron*

<sup>1</sup> Toow i ni kébérehéh mano, “Amuk méuyot i ségétéwe waléy odoroy de munur, toow fo fiyo, non tintu fo fiyoy nan galbék kétaya no.” <sup>2</sup> I ségétéwe odoroy de munur fatut ségétéw lagéy énda i salaén funan de témbo. Atin fatut ségétéw saén i bawag ne. Atin fatut mééntang i kéfégitung ne. Atin fatut énda odoroy noy de tete kétayay lowoh ne. Atin fatut fo métintu, brab tayakufé noy de étéw dob lawi ne fiyon fo ké énda gélolo no bero. Atin fatut gétiga noy témoroe. <sup>3</sup> I odoroy de munur énda fatutén molon bé arake taloo no méuyot sétiboh. Yamula

fatut métanék i adat ne brab mika sétiboh. Atin énda fatutén ké toow fo méuyot bé kurtae. <sup>4</sup> I étéwe odoroy de munur, fatut fiyoy kéféguléw ne bé bawag ne brab de ngaén. I de ngaén fatut odoroy de suguén brab fatut fégadara ro démayun. <sup>5</sup> Non amuk énda gétiga noy méguléwe bé kaane kuréngon, énda so gétiga noy méguléwe bé de munur bé Tuluse. <sup>6</sup> Atin i étéwe mantu séna ménwaléy munur bé Kristowe, békén fatut waléy odoroy de munur. Non amuk mérigoy ni, waléy félangka-langka atin mélaw mékukum ségiléw bé Satanase. <sup>7</sup> Atin i étéwe waléy odoroy de munur, fatut ségétéw fégadatar de békén munur inok énda génoé ro de. Mélaw énda géfégakara Satanase de funa no géjala.

<sup>8</sup> Atin fantag man bé de témabang bé simbaane, sani de fédawétén do “dikon”, fatut so fiyoy de adat ro brab do métintu ro do étéw. Enda fatut ro molon bé arake taloo no arumén ro. <sup>9</sup> Atin fatut méégét i kéunur ruwe bé toowe kétoro, brab énda fatut ruwo-ruwoy de fédéw ro. <sup>10</sup> Amuk wén i ségétéw méuyot waléy témabang dob simbaane, fatut téngkadén na méta. Brab amuk énda i funan de témbo, fakay waléy “dikon”. <sup>11</sup> Atin i bawag i dikone, fatut fiyoy adat ne. Enda fatutén gémeno bé étéwe. Fatut mééntang i kéfégitung ne. Atin fatut fo méсарigon. <sup>12</sup> Atin i témabange, fatut ségétéw saén i bawag ne. Atin fatut fiyoy kéféguléw ne bé bawag ne brab de ngaén. <sup>13</sup> Atin i de témabang do gémenalbék fiyo, fégadatar de munur bero. Atin géfébaraw ro muret fantag bé kéunur ruwe bé Jesu Kristowe.

<sup>14</sup> I lala guwe ni sémulat dob beeme, wén i inam gu mangéy séko témukaw beem. <sup>15</sup> Endob amuk wén i malang begén, fégétigay ni sulat dob beemey fatute adat tom do étéw i Tuluse. Betomey simbaay méuyage Tulus. Betomey maake do liléy brab sérinan, brab i toowe kétoro féndiyoén dob betome. <sup>16</sup> Tintu fo gétiga tom i ni: Toow fo fiyoy kétoro i katome kéféngintulus fénggitoy Tuluse betom. Non been i ni: I Kristowe ménwaléy kéilawan. Brab i Rémogor i Tuluse fénggito noy Kristowe métintu. Atin énggitoy de télaki. Atin wén i do ménuret fantag bé Kristowe dob de békén Judio. Atin médooy de étéw dob duniyae ni ménunur de. Atin déméniyat mangéy dob lawayo.

### 4

#### *Fantag bé Amaéne*

<sup>1</sup> Ménkéntay i kébérehéh i Rémogor i Tuluse bé wén moso i do étéw témérené munur bé toowe, brab waléy ro munur bé de tugién do rémogor brab de kétoro i de saitan. <sup>2</sup> I de ni do kétoro tidéw dob de témugi étéw do ubo-ubo ro saén munur bé Kristowe. Enda tete

i de fédew ro ké rémigo ro tete non éndaén gétiga roy fatute. <sup>3</sup> I de ni do étéw toroé roy énda kun fakay i mawage brab énda kun fakay i mamae bé de dumo anaén. Endob sedek lénimbag i Tulusey de amaén? I funay Tuluse léménimbag bé de amaén inok i be-tom do gétigan brab munur bé toowe kétoro mama tom de. Mélaw fakaytom mama bé de ni amaén amuk gilid tom démasal fésalamat dob Tuluse. <sup>4</sup> Fiyoy kéluhanay de éntingayén lénimbag i Tuluse. I kéluhanay de séségiyo-giyo do amaén fatut amaén tom amuk gilid tom démasal fésalamat dob Tuluse. Enda fatut ikaa tom i lénimbag i Tuluse. <sup>5</sup> Gétiga tom féfiyonéy Tulusey de amaé tom non bé kéfésalamat tome de, atin non been i niy kétoro i kébéreh i Tuluse de.

<sup>6</sup> Toow go fiyo sugu-sugué Jesu Kristowe amuk toroé moy de ni dob de dumo mo munur bé Kristowe. Atin taus go minut waléy fiyo sugu-suguén bé kéféganad me bé Fiyowe Uret brab toowe kétoro nunuro mo. <sup>7</sup> Endob kago fégléngoen i de tutul énda médaitén uretén. Mika i Tuluse bé de ni non békén toow. Yamula fébagérm i kéunur me bé toowe kétoro inok rignoné moy kétayay Tuluse. <sup>8-9</sup> Wén i toowe kébéreh, fatut unuroy de étéw mano, “Fiyó ké fébagéré moy lowoh me. Endob toow na fiyo ké fébagéré moy kéunur me, non wén i lagaén dob de gai béleewe ni brab dob de gégumah do gai dob lawayo moso.” <sup>10</sup> Been i niy funa tome mégéror gémalbék, non sémarig tom bé méuyage Tulus, sani mémukase bé kéluhanay de étéw, brab tintuwe mémukas bé de étéw munur dob Beene.

<sup>11</sup> Mélaw toroém i de ni brab suguém dob de étéw. <sup>12</sup> Atin kago fédayaén i de étéw énda fégadata ro beem non ménguwéd go séna. Yamula féfiyo moy kébéreh me brab adat me brab kégdaw me brab kéunur me brab kérigo muwe bé lowoh me, inok i de munur bé Kristowe iringé ro beem. <sup>13</sup> Atin tantu go basa bé Ménsulate Kébéreh i Tuluse dob adafay de étéw taman gégumah diyaan. Atin toroém bero brab ureto mo bero. <sup>14</sup> Atin kago lifotén i kéfurunge niray i Tuluse beem amun ménbéreh i de sénarigoy Tuluse muret atin ténégy de odoroy de munur i bumbuna muwe. <sup>15</sup> Tantu mo rigoy de ni inok i kéluhanay de étéw gito ro minut méhintuy adat me rémigo bé kétayay Tuluse. <sup>16</sup> Ingata moy de rignoné mo brab de toroé mo. Non amuk taus go rémigo bé de ni, méfukas go bé de salaém brab méfukas soy de gégléngoe beem.

## 5

<sup>1</sup> Kago ugarén i de lukésén lagéy. Yamula féginau mo bero maak do bohém. Atin féginau moy de kénogo lagéy maak do dumo

mo sétiman idéng. <sup>2</sup> Atin i de lukés do libun, féginau mo bero maak do idéngém. Atin dob de kénogon, féginau mo bero maak do dumo mo sétiman, idéng, kago dufangén bero.

<sup>3</sup> Atin i de baléw énda i samung ro magifat bero, fégadata mo bero brab tabanga mo bero. <sup>4</sup> Endob amuk wén i do nga i de baléw taloo no do bebe ro, fatut do nga ro brab do bebe roy magifate bero inok baliwana roy kéfagifat i de lukés ro bero brab de bebe ro. Non been i niy kétayay Tuluse rignoné ro, sani kégdawe bé de lukés, tidéw béno bé de ségiyo étéw. <sup>5</sup> Endob amuk énda i samung i baléwe magifat de, sémarig dob Tuluse atin démasal fuweh na kélungonon mongot tabang dob Tuluse. <sup>6</sup> Endob i baléwe rignoné noy tetee kétaya no, maak ménléhuén fiyon fo ké méuyag séna. <sup>7</sup> Toroém beroy de ni bérreh gu inok énda i gétébo bero. <sup>8</sup> Endob amuk wén i ségétéw munur atin énda fagifaté noy de samungén brab énda fo fétintuné noy kéfagifat ne bé de dumo no sétifon lawi, ténagakén i kéunur ne brab ménwaléy toow na fo tete bé ségétéwe énda munur bé Kristowe.

<sup>9</sup> Kago listanén i baléwe dob listanay de baléw fatut tabangan amuk énda séna labi no ném folo gébélintuwa. Atin békén saén i ni, fatut so éndaén mawagé man. <sup>10</sup> Brab fatut toow fo gétigay de étéw fiyoy adat ne loo bé fiyowe kéfagifatén bé de ngaén, brab tanggafé noy de kana dob lawi ne, brab urahé noy sékéy i de dumo no munur, brab tabanga noy de étéw kérésayan, brab rignoné noy fiyowe sénga tékélid.

<sup>11</sup> Endob kago listanén i de baléw do ménguwéd séna. Non amuk méuyot ro man mawag sabaf bé kétayay de lowoh ro, gétagaka roy galbék Kristowe. <sup>12</sup> Atin amuk rignoné roy ni, énda gétumana roy sunguwe fasad ro bé Kristowe. <sup>13</sup> Atin saliyu na bé ni, waléy ro faukén brab démoyun ro saén sugud-sugud. Atin umana ro nay tetee bé kégéno ruwe bé de étéw bé éndae fatut béréhé ro, brab furaya fédew ro. <sup>14</sup> Mélaw dob kagéne de kéfégitung, fiyo ké mawag man ségule i de ménguwéd do baléw brab mégénga ro, brab fagifaté roy de dumo ro sétifon lawi inok i de étéw sébanil betom énda i gébérho ro tete fantag bé betome. <sup>15</sup> Non i de dumo do baléw ménbaleng i de fédew ro atin béleewe ménwaléy ro do kuyug Satanas.

<sup>16</sup> Amuk wén i libun munur bé Kristowe brab wén i do baléw do samungén, fatut fagifaté no. Fatut tabanga no bero inok énda kéréngan i de munur magifat bero. Mélaw i de munur géfagifata roy de baléw énda i do samung ro magifat bero.

<sup>17</sup> I de odoroy de munur, amuk toow fo fiyoy galbék ruwe, médait ro sémahud ruwo takéf, labi na foy de mégéror muret brab témoro bé kébéreh i Tuluse. <sup>18</sup> Non wén



i Ménsulate Kébéréh i Tuluse mano, “Kago ikétén i ba i safie amuk sad-sadé noy faréye inok mérek.” Non fatut mama i safie mérek bé de énrékén. Atin wén soy Ménsulate Kébéréh i Tuluse mano, “I gémalbéke, fatut gédoté noy sahud ne.”

<sup>19</sup> Atin kago fégingoén i kétéboe bé ségétéwe odoron taman énda i ruwo gétéw taloo no téléw gétéw émféngintoow de. <sup>20</sup> Atin géléém dob adafay de munur i ségétéwe odoron énda téméréno rémigo tete inok mégilak i de dumo de.

<sup>21</sup> I Tuluse brab Jesu Kristowe brab de télakiy Tuluse, fiyon fo ké énda gito tom bero béni, téngténgé ro betom béleewe ni. Mélaw sugué ku beem bé odoro moy de ni ténoro gu beem. Brab kago wén i isu ramigo mo bé de étéw. Yamula ségiléw-giléw i kériigo muwe bé kéluhanay de étéw. <sup>22</sup> Atin kago magad mémili do étéw inok waléy ro odoroy de munur. Non amuk mésala ro, beem soy méséndon de. Fatut énda i gétébo beem.

<sup>23</sup> Atin kago miném saén wayég. Fatut miném go so kloh arak fégeuwa bé sur me, non démoyon go démérurun.

<sup>24</sup> Wén i do étéw magad fo giton i de sala ro, mélaw magad ro so mékukum. Endob wén soy do étéw mébunéy i de sala ro atin énda gito no taman wén i sémusi de. <sup>25</sup> Atin ségiléw so bé ni, wén i do étéw toow fo magad giton i de fiyo rigoné ro. Endob wén soy do étéw énda fo magad giton i de fiyo rigoné ro, éndob giton so moso.

## 6

<sup>1</sup> I de munur do rifén, fatut toow fo fégadata roy de amu ro sénga tékélid, inok énda i gébéréh tete fantag bé Tuluse taloo no fantag bé kétoro tome. <sup>2</sup> Atin i de munur do rifén, amuk munur soy de amu ro, énda fatut ro mérarék bé de amu ro, non falan so bero do munur brab maak sétiman ro idéng. Yamula fatut umana roy kégéror ruwe gémalbék non i de tabangé ro, falan so bero do gulaané ro dumo ro munur.

Fatut toroém beroy de ni brab fériigo mo bero. <sup>3</sup> Amuk wén i étéw témoro bé ségiyowe kétoro brab énda magayu no bé toowe kébéréh i Kadna tome Jesu Kristo brab mika bé toowe kétoro fantag bé kétayay Tuluse, <sup>4</sup> toow fo félangka-langka i nan étéw brab énda i gétiga no. Wén i tete kétaya no séédél brab méngiras, brab mantém fiyon fo ké énda i funa no, <sup>5</sup> brab méuyot fo séédél bé de dumo étéw tete i de kéfégitung ro brab de étéw do éndaén munur ro bé toowe kétoro. I de ni do étéw marok waléy ro kawasa bé kéféngintulus ruwe.

<sup>6</sup> Endob i toowe, i de tintu do méngintulus maak do kawasa amuk fiyo ronén bé kéluhanay éntingayéne karo, énda mingar ro bé ségiyowe. <sup>7</sup> Non bé kéumah tome, énda i

nuwit tom. Brab amuk méléhu tom, énda soy uwité tom. <sup>8</sup> Mélaw, amuk wén i amaé tom brab kégal tom, fatut fiyo tom den. <sup>9</sup> Endob i de étéw toow fo méuyot waléy kawasa, magad ro fo métukawan mésala bé de tete brab do dufang kétaya ro, funa ro mébinasa brab méléhu. <sup>10</sup> Non i kétayane bé kurtaey funay étéwe rémigo bé kéluhanay kélasiy tete. Wén i do étéw toow fo méuyot ro bé kurtae, funa ro téméréno munur bé Kristowe brab funa ro toow fo tete i de fédew ro.

<sup>11</sup> Endob i beeme, Timoteo, ségétéw go sugu-suguéy Tuluse. Mélaw férayu go dob de ni do adat. Brab télama mo rigoy métintuwe brab kétayay Tuluse. Atin féégétém i kéumur me, brab fégedaw go bé de dumo mo, brab tingkél go, brab fétanékém i adat me. <sup>12</sup> Atin fégéror go rigo bé fatute sabaf bé kéumur me, loo bé ségétéwe toow fo méraan léméntu sékuya. Atin dotém i umule magufusa. Non i funay Tuluse beem ménémili waléy munur inok gédoté moy umule magufusa. Atin énggédotém i umule magufusa non fénayagém i Kristowe dob adafay médoowe étéw. <sup>13</sup> I Tuluse, sani muyage bé kéluhanay éntingayéne, brab Jesu Kristowe, sani ménbéréhe bé toowe dob adafa Ponsio Pilatowe téngténgé ro betom béleewe ni. Mélaw sugué ku beem bé <sup>14</sup> tintu mo fo odoron i de sénugu gu beem brab rigo mo inok énda i gétébo beem. Rigo moy ni taman dob késéfule i Kadna tome Jesu Kristo. <sup>15</sup> Fésefuley Tulusey Jesuse dob fatute gai. Atin i Tuluse, Beeney barakatane méguléw bé kéluhanane, brab Beeney odoroy de odoron brab Kadnay de datu. <sup>16</sup> Been say méuyage tidéw féganay brab méuyag so taman sa taman. Brab bati dob géfékayae énda i géfégedét de. Enda i ségétéw énggégito de taloo no wén i gégito de. Médayéw damén i Tuluse brab méguléw damén taman sa taman. Amen.

<sup>17</sup> Atin i de kawasa do munur, béréhém bero bé békén ro félangka-langka brab békén ro sémarig bé de kurta ro taloo no de éntingayén do karo, non magad so mékédan. Yamula fatut sémarig ro bé Tuluse, sani témantuwe mirayan betom bé kéluhanay éntingayéne inok fiyoy goho tome. <sup>18</sup> Toroém i de kawasa rémigo fiyo, inok maak kawasa ro bé fiyowe rigoné ro. Fatut ro mégédaw brab fatut miray ro tabang dob de ségiyo atin fatut tukidé roy de languntama ro. <sup>19</sup> Amuk rigoné roy ni, wén i gédoté ro tidéw dob Tuluse dob de gai gégumah moso funa ro tintu kawasa, brab énda mékédan no taman sa taman. Atin gédoté roy tintuwe umul magufusa.

<sup>20</sup> Timoteo, kago tagakén i toowe kétoro sénarig dob beeme. Kago fégingoén i de késéuret-uret ikaay Tuluse. Atin férayu go

dob de dufang kékégitung i de étéw fédawété  
ro “Kékétigan.”<sup>21</sup> Non wén i do étéw émbéréh  
wén kun i kékétiga ro. Endob been i niy funa  
ruwe téménrén munur.

Mégédaw damén i Tuluse begom.

*Pablo*

## I GÉRUWOWE SULAT PABLOWE DOB TIMOTEOWE

Ay niy sébaane bé de sénulat Pablo, sani ménbantuge muret fantag bé Jesu Kristowe. Been i niy géruwowe sulat Pablowe dob Timoteowe, sani téménabangane de lémégéb bé Fiyowe Uret. Amun sénulat Pablowej ni, ménférisunén sabaf bé kéuret ne fantag bé Kristowe. Gétiga no éndaén mérugayén taman féluhuénén. Mélaw sénulatén i ni sulat dob Timoteowe inok sarigé noy galbék ne dob beene, atin inok fébagéré noy fédew Timoteowe inok énda témérén no témoro bé toowe fantag bé Jesu Kristowe.

1-2 Timoteo,

Sulata ku beem maak ségétéw nga gu gu-laané ku. I begéne Pablo ségétéw apostol Jesu Kristowe non been i niy kétayay Tuluse. Sénuguén begén inok ureté kuy fantage bé mantuwe umul fénasadén betom, sani umule magufusa énggédot tom sabaf bé kéunur tome bé Jesu Kristowe. I Abaye Tulus brab Kadna tome Jesu Kristo mégédaw ro damén beem brab méuray damén i na ruwe beem brab iray ro damén beem i métanéke fédéw.

<sup>3</sup> Begén i ségétéwe sugu-suguéy Tuluse brab fiyoy fédéw guwe bé kérégo guwe bé galbék i Tuluse loo bé rénigoy de katufua ku. Atin fuweh na kélungonon fésalamatu dob Tuluse démasal ongaté ku dob Beene bé tabanga no beem. <sup>4</sup> Toowu fo mégundoy beem. Atin gétédémoy kuy kékérew me amun ténagak gu beem. Méuyotu géségito man beem inok mororu fo man. <sup>5</sup> Gétédémoy kuy tintuwe kéunurém, ségiléw bé kéunur i bebe me Loida brab idéng me Eunis. Gétiga kuy méégét soy kaame kéunur. <sup>6</sup> Atin sabaf bé ni, féfégétédém gu beem bé fatut fébagéré i kéfurunge niray i Tuluse beem amun ténégé ku beem. <sup>7</sup> Non i Tuluse énda nirayén betom i Rémogor ne inok talaw tom. Yamula nirayén betom i Rémogor ne inok émaraw tom brab inok ségédaw tom brab inok gérigono tom i fatute.

<sup>8</sup> Mélaw kago mémala muret fantag bé Kadna tome, brab kago mémala fantag bé begéne sani ménférisu sabaf bé kéunur guwe dob Beene. Yamula amung go bé kérésay guwe sabaf bé Fiyowe Uret. Gérigono moy ni non fébagéréy Tuluse beem. <sup>9</sup> I Tuluse fénukasén betom dob de sala tom, brab fénémilién betom waléy do étéwén. Rénigo noy ni békén sabaf bé fiyowe rénigo tom. Yamula fénukasén betom sabaf bé kaane funan brab sabaf bé kégédaw ne betom bé énda séna ménlimbag i duniyae de. Atin i kégédaw ne betom féngagéwén dob Jesu Kristowe. <sup>10</sup> Atin béleewe ni fénggito noy kégédaw

ne bé kégumah Jesu Kristowe sani mémukase betom dob de sala tom. Atin i Jesuse kenda noy barakat i kéléhue brab fénggétiga no betom i umule magufusa féngagéw dob Fiyowe Uret.

<sup>11</sup> Atin i Tuluse fénémilién begén waléy apostol inok ureté ku brab toroé kuy ni Fiyow Uret. <sup>12</sup> Been i niy funa kuwe mérasay béleewe ni. Endob énda mékédan i késarig guwe, non toow fo gétiga kuy Tuluse unuro ku brab gétiga ku diyagané no begén taman gégumah i gaiwe séfule i Kadnane inok gérigono kuy galbéke sénarigén dob begéne. <sup>13</sup> Fédaydayém i kéodoro muwe bé de toow kébéréh ténoro gu beem. Atin fédayday go unur bé Tuluse brab fégédaw go bé de dumo mo. Gérigono moy ni non begom i de dumo Kristowe. <sup>14</sup> Bantaya moy toowe kétoro sénarig dob beeme. Gérigono moy ni sabaf bé barakat i Rémogor i Tuluse bati dob betome.

<sup>15</sup> Gétiga moy kétagak i kéluhanay de dumo gu munur begén dob Asia, fiyon i ro Figelowe brab Hermogenese. <sup>16</sup> Endob féfiyonéy Tuluse damén i Onesiforowe brab de samungén. Non médooy fo gule fénoror ro begén. Enda mémala ro fantag begén ségétéwuy férisu. <sup>17</sup> Yamula, amun énggumah i Onesiforowe dob Roma, féngagayásén begén sénléd taman énggito no begén. <sup>18</sup> Toow fo gétiga moy kétabanga nuwe begén dob ingéde Efeso. Mélaw mégédaw damén i Kadnane de dob késéfule ne moso mangéy kémukum.

## 2

<sup>1</sup> Atin i beeme Timoteo, maak ségétéw nga gu, fébagéré i kéunur me. Gérigono moy ni sabaf bé kégédaw i Tuluse betom do dumo Jesu Kristowe. <sup>2</sup> Enggélíngoo moy de kétoro gu nuret gu dob de médooy do étéw. Mélaw i beeme, fatut toroém soy de étéw gésarigo moy inok gétoro ro so dob de ségiyo.

<sup>3</sup> Fatut amung go bé kérésay guwe sabaf bé kéunur guwe, inok waléy go so sugu-suguéy Jesu Kristowe mérasay ségiléw bé fiyowe sundalo. <sup>4</sup> I sundalowe énda furaya fédéwén i de rignonén békén kay sundalowe. Yamula rignonéy noy funay odoro nuwe mésuwat. <sup>5</sup> Atin i sugu-suguéy Tuluse ségiléw bé ségétéwe sékuya léméntu. Enda gétaba no saliyo ké odoro noy de sugu bé késékuyae. <sup>6</sup> Atin i sugu-suguéy Tuluse ségiléw so bé ségétéwe mégéror gémalbék dob fantade. Fatut been i sunguwe gégédot bé kéntéw ne. <sup>7</sup> Fétuntayém i de ni do sénulat gu, non i Kadnane féfégésobutén beem i kéluhanay de ni.

<sup>8</sup> Fégétédémém i Jesu Kristowe, sani séfu Datu Dabide. Ménléhuén, éndob méntébuté. Been i niy Fiyowe ni Uret toroé ku, <sup>9</sup> funa ku mérasay béleewe ni, níkétyu bé sangkalie maak ségétéw ménénakaw. Endob i kébéréh

i Tuluse énda ménikétén! <sup>10</sup> Been i niy funa kuwe ni fédayday témingkél bé kéluhanay de kérésay, inok gétabanga kuy de étéw fénémili i Tuluse, inok méfukas ro so bé de sala ro sabaf bé kéunur ruwe bé Jesu Kristowe brab inok toow fo fiyoy gohu ruwe beroy Tuluse taman sa taman. <sup>11</sup> Wén i toowe kébéréh mano, “Amuk séréngan tom de méléhu bé kégantino Jesuse betom, séréngan tom de so méuyag taman sa taman. <sup>12</sup> Atin amuk témingkél tom bé de kéférasay betom, gégumah so moso i gaiwe méguléw tom séréngan bé Jesuse. Endob amuk dirungé tom i Jesuse bé békén tom do kuyugén, dirungé no so betom. <sup>13</sup> Atin fiyon fo ké énda géfédayday tom rémigo bé kétaya Jesuse, fédayday so fo rémigo bé ati bénéréh ne rignoné no dob betome. Non énda fakayén ké énda tumané noy kébéréh ne.”

<sup>14</sup> Féfégétédémém bé de munur diyaan i fantage bé de ni. Suguém bero dob adafay Tuluse bé békén ro séédél fantag bé atag i kébéréhe saén. Non énda gédotén i kéfiyonone bé késéédéle loo bé ni, yamula mébinasa saén i kéunur i de mégélingo de. <sup>15</sup> Rigo moy kéluhanay gérigono muwe inok mésuwat i Tuluse bé galbék me. Mélaw énda i funa mo mémala brab katabuwan i kétoro me bé toow i kébéréh i Tuluse. <sup>16</sup> Férayu go dob de énda do lantékén késéuret-uret ikaay Tuluse, non i de étéw rémigo bé ni minut ro mérayu dob Tuluse. <sup>17</sup> I kétoro i de énda mégintulus, ségiléw bé de toow fo mékébinasa kélaing magad fo témunoh dob lowohe. Ro Himeneo brab Fileto i ruwowe gétéw dumoy de ni témoro. <sup>18</sup> Ténagak roy toowe aguwan brab bébinasa roy kéunur i de dumo bé de munur. Non bénéréh roy énggilidén kun i kétébule tome. <sup>19</sup> Endob i toowe kétoro i Tuluse ségiléw bé toowe fo dakél batéw non énda émarino. Non wén i Ménsulate Kébéréh i Tuluse mano, “I Kadnane, gétiga noy ati kaane do étéw.” Brab wén soy ségiyowe Ménsulat Kébéréh i Tuluse mano, “I étéwe émbéréh bé been i étéw i Kadnane, fatut tagaké noy de tete rignoné no.”

<sup>20</sup> Dob dakéle lawi, wén i do séségiyo-ségiyo do biléw brab do limfung diyo. I de dumo de do bélowon brab do filak. Atin i de dumo de do kayéw rénigo do biléw brab i de dumo de métégas fantad rénigo do biléw. Mélaw i gefee de, usaré noy de balilaga de amuk wén i do gérotor kana no. Atin i de dumo de usaré ro sénga fuweh. <sup>21</sup> Ségiléw soy de ni bé étéwe. Amuk toow fo malinis i fédéw i ségétéwe étéw bé kétagat ne bé de tete adatén, maak do bélowon tamuk i Tuluse usaré no dob fiyowe galbék, non médait usaréy Tuluse dob fiyowe galbék. <sup>22</sup> Mélaw, férayu go dob de tete kétayay lowoh i ménguwéde étéw. Atin télama mo rigoy métintuwe, brab fébagérem i

kéunur me, brab fégedaw go démoyun, brab fétanékém i de fédéw i de dumo mo inok énda i sétiboh. Non been i niy adat i de fiyo étéw démasal dob Kadnane mongot tabang. <sup>23</sup> Atin férayu go dob de dufang késéédél énda i lantékén. Non been i niy funay de étéw gésékérit. <sup>24</sup> Enda fatut séédél i sugu-suguéy Kadnane. Yamula fatut mégédaw bé kéluhanane. Brab fatut fiyo brab témingkél bé kétoro ne. <sup>25</sup> Enda fatutén mékérit, yamula fatut féfiyoné noy kétoro ne bé de sébanil de, inok fégalinéy Tuluse keeyén i de fédéw ro atin gésobuto ro mélaw i toowe. <sup>26</sup> Tidéw béno, mééntang i de kéfégitung ro brab géféraréy ro tidéw dob Satanase, sani kéménéfoe bero inok fégésé no bero modor bé kétaya nuwe.

### 3

<sup>1</sup> Fégétédémém i ni. Dob tamfaday de gai, toow fo moso mérégén. <sup>2</sup> I de étéw moso, do méitung brab arumén, brab do toow fo félangka-langka, brab do tete i de kégébaa ro, brab énda odoro roy de sugu i de lukés ro, brab do énda fésalamat ro, brab do mikra ro modor bé de sugu i Tuluse. <sup>3</sup> Atin énda fo mégédaw ro, brab énda méuray i na ruwe bé dumo ruwe, brab do émbagér géméno fégébinasa ro bé dumo ruwe, brab do magad sétiboh brab mékérit, brab mikra ro bé fiyowe. <sup>4</sup> Békén saén i de ni, do tugién ro fo, brab énda fégitungé roy de tete rignoné ro, brab do félangka-langka ro fo, brab énda méimu ro bé Tuluse éndob rignoné ro saén i de kétayay de karo lowoh. <sup>5</sup> Atin ubo-ubo féngadafé roy Tuluse, éndob énda munur ro bé barakat ne. Férayu go dob de ni do étéw. <sup>6</sup> I de dumo bero, mahur ro dob de lawi inok toroé ro brab féguléwo roy de libun énda émbagér i de fédéw ro brab mégilak ro sabaf bé de sala ro, atin médooy foy de tete kétaya ro. <sup>7</sup> Been i de niy de libun toow fo télamané ro féganadén i toowe éndob énda fo gésobuto ro de. <sup>8</sup> Ségiléw so bé késébanil ro Janese brab Jambrese bé Moisesey késébanil i de ni do lagéy bé toowe kétoro. Enda foy lanték i de kéfégitung ro brab békén toow i kéunur ruwe. <sup>9</sup> Endob énda mégulit i de rignoné ro, non gitoy kéluhanay de étéw i kédufang ruwe, ségiléw bé kégitoy de étéw bé kédufang ro Janese bero Jambrese.

<sup>10</sup> Endob i beeme Timoteo, gétiga moy kétoro guwe brab adat guwe brab funa kuwe gémalbék. Atin énggito moy kéunur guwe brab kétingkél guwe brab kégedaw guwe brab kéfédayday guwe fiyon fo ké gai mérégén. <sup>11</sup> Atin énggito moy kéférasaye begén. Brab énggétiga moy ménrigowe dob begéne dob Antiokia, brab dob Ikonium, brab dob Listra. Toow fo gétimal i kéférasaye begén dob de ni do ingéd. Endob ténabangay



## I Sulat Pablowe dob Ségétéwe Lagéy Féndawét Tito

Ay niy sébaane bé de sénulat Pablo, sani ménbantuge muret fantag bé Jesu Kristowe. Sénulatén i ni dob ségétéwe lagéy féndawét Tito, sani témabangane de bé kélégeb ne bé Fiyowe Uret.

Dob ni sulat, ténoro Pablowe ay ati klasiy étéwe fakay waléy odoroy de munur. Ténoroén soy fantage bé fiyowe adat i de munur bé Jesu Kristowe.

<sup>1</sup> Tito,

I begéne, Pablo sani sugu-suguéy Tuluse brab ségétéw apostol Jesu Kristowe. Begéney fénémili i Tuluse inok sugué no begén mangéy témabang émfébagér bé kéunur i de étéw fénémili i Tuluse brab inok féfégésobut gu beroy toowe kétoro i katome kéféngintulus. <sup>2</sup> I ségiyowe de funa ku sémugu, inok gésobuto ro gésarig ro bé méuyag ro taman sa taman. I Tuluse, been i niy fénasad ne dob betome tidéw féganay bé énda séna ménlimbag i duniyae de, bé irayén betom i umule magufusa. Atin gétiga tom énda fakayén ké énda tumanéy Tulusey fasad ne. <sup>3</sup> Atin béleewe niy gaiwe fégétiga noy kébéreh ne. Non sénarigén dob begéney kébéreh ne brab ureté ku non been i niy sénugu i Tulus tome mémukas.

<sup>4</sup> Sémulatu mangéy dob beeme, sani ménwaléye maak tintu nga gu bé kéunur tuwe bé Jesuse. I Abaye Tulus brab Jesu Kristowe, sani mémukase betom dob de sala tom, mégédaw damén beem, brab iray ro damén beem i métanéke féféw.

<sup>5</sup> I funa kuwe téménagak beem diyoan dob bungéde Kreta, inok géfégildo moy galbék tome, brab inok géfénmili go do étéw waléy odoroy de munur dob séngae ingéd diyo. Féfégétédmém i de kétoro gu fantag bé de ni. <sup>6</sup> I fémilie muwe odoron, fatut ségétéw lagéy énda météboén. Atin fatut ségétéw saén i bawag ne. Atin i de ngaén, fatut do munur ro brab énda karangéy de étéw bero do dufang taloo no mémélis bé de suguén. <sup>7</sup> I odorone, fatut ségétéw énda météboén, non beeney sarigone bé galbék i Tuluse. Enda fatutén félangka-langka, taloo no magad mékérit, taloo no miném arak taman molon, taloo no méuyot sétiboh, taloo no arumén bé kurtae. <sup>8</sup> I odorone, fatut féfiyoné noy kéfagifat ne bé de kana no. Brab fatut méuyot rémigo fiyo. Fatut méhintuy kérigo nuwe bé de dumo no atin rigoné noy kétayay Tuluse. Brab fatut énda odoroy de tete kétayay lowoh ne. <sup>9</sup> Atin fatut toroé no saén i atiy modore bé toowe kétoro, sani

mésarigone kétoro to. Amuk rigoné noy ni, waléy émbagéer i kéunur i de étéw bé toowe kétoro. Atin géfégito no énda katabuwan i kébéreh i de étéw sébanil bé toowe kétoro.

<sup>10</sup> Non médooy de étéw mika mégélingo bé toowe kétoro brab duraté ro soy de ségiyo étéw bé de tugi kétoro ro énda i do lantékén, labi na foy kétoro i de munur do Judio. <sup>11</sup> Fatut fo géléén ro inok éndaén témoro ro. Non gukéte roy de ségékuréng bé de kétoro ro énda fatutén toroén. I funa ruwe saén témoro loo bé nan non méuyot ro saén kémurta. Fatut ro damén mémala. <sup>12</sup> Bé gétahe wén i ségétéwe béliyan tidéw so diyaan dob Kreta, ménbérehéh mano, "I de étéw dob Kreta do toow fo tete brab do tugién. Faukén ro so, éndob do arumén ro mama." <sup>13</sup> Toow i nan bénréhén. Mélaw géléém fo bero toow inok waléy fiyoy kéunur ruwe. <sup>14</sup> Brab inok éndaén munur ro bé de békén toow do tutul i de Judio loo soy de sugu i de étéw mika bé toowe kétoro. <sup>15</sup> I étéwe malinis dob adafay Tuluse, karangé noy kéluhanay éntingayéne malinis. Endob énda i malinis dob de étéw énda séna malinis i de féféw ro brab énda séna munur ro bé Kristowe non énda séna mélinis i de itunga ro brab énda mémala ro bé de sala ro. <sup>16</sup> Béréhé ro gétiga ro kun i Tuluse, éndob giton dob de tete rigoné ro énda gétiga roy Tuluse. Toow fo tete i de adat ro brab énda modor ro bé fatute. Enda médait ro rémigo fiyo.

## 2

<sup>1</sup> Mélaw i beeme, fatut toroém saén i atiy modore bé toowe kétoro. <sup>2</sup> Béréhéhén dob de lukés lagéy bé fatut féfiyoné roy de rigoné ro brab fatut mégitung ro fiyo brab fatut énda odoroy de tete kétayay de lowoh ro. Atin fatut féfégété roy kéunur ruwe bé Kristowe, brab fatut mégédaw ro bé de dumo ro, brab fatut ro témingkél. <sup>3</sup> Atin loo so bé niy toroé muwe bé de lukés libun bé fatut ro rémigo fiyo loo bé kétayay Tuluse. Békén ro fatut géméno, taloo no démoyn ro miném arak. Atin fatut témoro ro fiyo, <sup>4</sup> inok métoro i de ménguwéd do libun bé féimué roy de bawag ro brab de nga ro, <sup>5</sup> brab fatut énda odoroy de tete kétaya ro taloo no de tete kétayay de lowoh ro. Brab fatut féfégor ro gémalbék dob de lawi ro, brab fatut odoroy roy sugu i de bawag ro, inok énda i émbéréh tete fantag bé kébéreh i Tuluse unuro tom.

<sup>6</sup> Atin loo so bé niy toroé muwe dob de ménguwéd do lagéy bé fatut énda odoroy de tete kétaya ro. <sup>7</sup> Atin i beeme, fatut féfiyo moy de rigoné mo, inok iringéy de dumo étéw beem. Fatut toroé moy toowe, brab kago séfokoy bé lala me témoro. <sup>8</sup> Atin usarém i fiyowe kébérehéh ké témoro go inok énda i gédowoy bé de béréhé mo. Mélaw i de sébanil beto mémala ro non énda géfébo ro beto.

<sup>9</sup> Toroém dob de rifén bé fatut odoro roy sugu i de amu ro brab fatut rigoné roy mékésuwate saén. Békén ro fatut séédél bé de amu ro. <sup>10</sup> Békén ro ménakaw. Yamula, fatut féténgténg ro bé de amu ro bé dé moyun ro rémigo fiyo brab mé sarigon ro. I de munur do rifén, amuk rigoné roy ni, médayéw i kétoroe fantag bé Tulus tome mémukas betom dob de sala tom.

<sup>11</sup> I kégédaw i Tuluse, sani funay de étéw méfukas, fénggito no dob kéluhanay de étéw. <sup>12</sup> Atin i ni kégédaw, fénggita no betom bé fatut tagaké tom i de tete rigonén kéikaay Tuluse, brab téréno tom i kéodoro tome bé de tete kétayay de lowoh tom, inok métintu tom brab rémigo tom fiyo loo bé kétayay Tuluse amuk bati tom séna dob duniyae ni, <sup>13</sup> bé lala i kéongot-ongot tome bé fiyowe fo gai séfule i toowe fo barakatan Tulus tom Jesu Kristo, sani mémukase betom. Bé béno, giton i kéréndaw ne. I késéfule ne, been i niy inam tome. <sup>14</sup> Nirayén i férénawa nuwe génantino no betom inok fukasé no betom dob kéluhanay tete. Atin inok féwaléyé no betom do malinis do étéwén méuyot rémigo fiyo.

<sup>15</sup> Toroém i de ni. Wén i atura mo méguléw bé de étéw diyoan. Mélaw usarém i atur me méginau bero brab géléém bero ké rémigo ro tete. Atin kago fédayaén bero énda fégadata ro beam.

### 3

<sup>1</sup> Féfégtédémém bé de munur diyaan bé fatut odoro roy de sugu i de méguléw do gémamak kukuman. Fatut mamung ro bé de udenén bé de fiyo rigonéy de gémamak kukuman. <sup>2</sup> Béréhém bero bé békén ro fatut émbéréh tete fantag bé de étéw taloo no sétiboh ro. Yamula fatut ro rémigo fiyo dob kéluhanay de étéw, brab fatut ro émbéréh fiyo dob kéluhanay de étéw. <sup>3</sup> Non i betome so do munur, bé do gétah, do dufang tom brab énda ménodor tom bé de sugu i Tuluse brab énda énggétiga tom i fatute. Brab ménodor tom fo toow bé kéluhanay de tete kétayay de lowoh tom. Dé moyun rénigo tom i tete, brab toow fo médaléw tom. I de dumo do étéw mérarék ro betom brab mérarék tom so bero. <sup>4</sup> Endob fukaséy Tuluse betom, non amun fénggito noy kégédaw ne betom, <sup>5</sup> kéndá noy de sala tom. Rénigo noy ni békén sabaf bé fiyowe rénigo tom, yamula sabaf bé kéuray i na nuwe betom. Fé nukasén betom bé kélinis i Rémogor i Tuluse betom, sani kéumah tome man ségule inok wén i mantu umul tom brab mantu adat tom taman sa taman. <sup>6</sup> I Tuluse ténantuno no betom nirayan bé Rémogor ne féngagéwén dob Jesu Kristowe, sani mémukase betom. <sup>7</sup> Rénigo noy ni inok waléy tom métintu dob adafay Tuluse sabaf

bé kégédaw ne betom, brab inok gédoté tom i umule magufusa, sani ongot-ongoté tome. <sup>8</sup> Toow i ni kétoro.

Méuyotu de ké toroé moy de ni dob de munur bé Tuluse diyaan inok waléy ro rémigo bé fiyowe galbék. Non amuk fiyoy galbék ruwe, been i noy fé gétabange bé de ségiyo étéw. <sup>9</sup> Endob kago mamung bé de késéédél énda i lantékén. Brab kago féngélingoén i toowe fo métaah kélabit bé de katufuan brab de késékérit fantag bé kitabe. I kéluhanay de ni do énda i lantékén. <sup>10</sup> Fatut géléém i étéwe émfésébanil bé de munur. Atin amuk énda téméré no, géléém man ségule. Atin amuk énda fo téméré no, kago nén séloyuk de. <sup>11</sup> Non toow fo gétiga mo tete i étéwe loo bé ni, atin giton ménsala non bé de tete rénigo no.

<sup>12</sup> Sugué ku mangéy diyaan i Artemase brab Tikikowe. Amuk gé gumah ro diyaan, toow fo télama moy mangéye dob begéne dob ingéde Nikapolis, non méuyotu bati diyo bé gaiwe mélégénéy. <sup>13</sup> Toow fo télama mo tabangan i Apolose brab Senase sani gétigane bé kitabe inok magad i kégégagéw ruwe. Brab tabanga mo bero bé kéluhanay de kailanga ro. <sup>14</sup> Toroém i de dumo to munur bé fatut ro fé géror rémigo fiyo inok gétabanga roy de étéw do mérasay. Békén ro faukén.

<sup>15</sup> Sé gifaéy kéluhanay de dumo gu beam dini. Atin i de dumo gey munur do méimu begey, fé samfayém dob berowey késégifa geye bero. Mégédaw damén i Tuluse begom kéluhanan.

*Pablo*

## I Sulat Pablowe dob Filemone

Ay niy sébaane bé de sénulat Pablo, sani ménbantuge muret fantag bé Jesu Kristowe. I Filemone ni, wén i rifé no féndawét Onesimo. Endob ténnulis Onesimowey kurta Filemone, atin ménraréy. Amun énggumah i Onesimowe dob ingéde Roma, énggéalaka noy Pablowe. Atin nuret Pablowny fantage bé Jesu Kristowe dob beene. Tidéw béno, énggésénule i Onesimowe bé de salaén atin ménwaléy munur bé Kristowe. Tidéw béno, ténabangén i Pablowe brab féngagifátén non diyo i Pablowe dob férisunone.

Dob kitab i de Romano, fatut féléhuén i Onesimowe non ségétéw rifén ménraréy. Mélaw sénulat Pablowny ni sulat dob Filemone, sani gefee bé Onesimowe inok ongoté no dob beene bé fésagadé noy Onesimowe. Tidéw béno, fénuwitén i ni sulat bé Onesimowe non séfule mangéy dob Filemon.

<sup>1</sup> Filemon,

Begéney dumo muwe Pablo. Ay niwu dob férisunone sabaf bé kéunur guwe bé Jesu Kristowe. I begéne brab Timoteowe, sani dumo tome munur, sulata key beam. I beeme, gulaané key beam dumo gey gémalbék bé galbék i Tuluse. <sup>2</sup> Atin sémulat gey so mangéy dob de munur sélimud méngadaf dob lawi me. Loo so dob Apiawe, sani maake libu key sabaf bé Kristowe, brab dob Arkipowe sani dumo geye maak sundalo gémalbék bé galbék i Tuluse.

<sup>3</sup> I Abay tome Tulus brab Kadnane Jesu Kristo, mégédaw ro damén begom brab iray ro damén begom i métanéke fédéw.

<sup>4</sup> Senga démasalu, dé moyunu fo fésalamat dob Tuluse sabaf bé beeme, Filemon. <sup>5</sup> Non énggélíngoo kuy fantage bé mégéte kéunurém bé Kadnane Jesus brab fantag bé kégédaw me bé kéluhanay de dumo mo munur. <sup>6</sup> Atin démasalu so dob Tuluso bé waléy gétiga kom non bé késédumo tome sabaf bé kéunur tome bé Jesuse. Mélaw gésobuto kom i de kéfíyonon gédoté tom sabaf bé kéunur tome bé Kristowe. <sup>7</sup> Atin i kégédaw me bé de dumo mo, been i niy funa kuwe toow fo moror brab fiyoy fédéw guwe. Atin moror soy kéluhanay de munur bé Kristowe sabaf bé beeme.

<sup>8-9</sup> Mélaw, wén i ongoté kuwe dob beeme. Fakay gésugoo ku beam rémigo bé fatute non bé atura kuwe tidéw dob Kristowe. Non begén i Pablowe, ségétéw sarigo Jesu Kristowe, atin béleewe ni ménférisuwu sabaf bé Beene. Gido loo, ongoté ku saén dob beeme non toow fo gulaané ku beam. <sup>10</sup> Mélaw,

ongoté ku dob beeme bé fésagadém i Onesimowe. Beeney maake nga gu sabaf bé kéunur ne bé Kristowe. Non amun diniwu dob férisunone ni, fénuwur gu. <sup>11</sup> Bé do gétah, énda i tabang Onesimowe beam. Endob béleewe ni toow fo énggétabangén dob beeme, loo so dob begéne.

<sup>12</sup> Atin béleewe ni féséfuleé ku mangéy dob beemey ni toow fo gulaané ku étéw. <sup>13</sup> Méuyotu de damén émfébati dob begéne bé lala guwe bati dob férisunone ni sabaf bé kéfélégéb guwe bé Fiyowe Uret. Non amuk bati dini, gétabanga no begén loo bé beeme amuk dini go damén. <sup>14</sup> Endob énda rignoné kuy ni amuk énda tungkasé mo de begén. Non énda méuyotu mémégés beam. Yamula méuyotu de ké tidéw fo dob kaame kétayan i kétabanga muwe begén.

<sup>15</sup> I funa nuwe keyén énggéséfékay Onesimowe beam bé magade saén, inok amuk séfule mangéy dob beeme, éndaén géséféka gom tidéw béleewe ni. <sup>16</sup> Atin béleewe ni, i Onesimowe, békénén rifé mo saén. Yamula ménwaléyén maak dumo mo sétiman idéng sabaf bé kéunur ne bé Kristowe. Toow fo gulaané ku éndob toow na fo gulaané mo non békén saén rifé mo, yamula ménwaléyén maak dumo mo sétiman idéng sabaf bé Kadna tome.

<sup>17</sup> Mélaw amuk fégitungé mo begén ségétéw dumo mo, tayakufém loo bé kétayakuf me damén begén. <sup>18</sup> Atin amuk réménigo tete dob beeme taloo no wén i utongén beam, dob begéne séden étukém. <sup>19</sup> Sulaté kuy ni bé de kagén kémér: I begéne, Pablo, bayada ku beam. (Endob kago lifotén de wén i utongém begén, sani mantuwe umuléw sabaf bé kéunur me bé Kristowe.) <sup>20</sup> Mélaw adih, toow fo damén méuyotu de ké tabanga mo begén bé rignoné moy nan nongot gu. Férorénu non sédumon tom sabaf bé kéunur tome bé Kristowe.

<sup>21</sup> Toow fo gétiga ku béleewe ni, rignoné moy kéluhanay ongoté kuwe beam dob sulat guwe ni, atin gétiga ku umana moy kérigo muwe bé éndae ongoté ku. <sup>22</sup> Atin wén nay ségiyo ongoté ku dob beeme. Tafayanu sibéy inok wén i batío ku ké mangéyu diyaan. Non wén i inam gu féséfuleéy Tuluse begén mangéy diyaan sabaf bé kédasala kome bé késéfule guwe mangéy diyoan.

<sup>23</sup> Atin i Epafrese dumo gu ménférisu sabaf so bé kéunur ne bé Jesu Kristowe, ségifaé no beam. <sup>24</sup> Atin ségifaéy de dumo gu so gémalbék beam, ro Markos, Aristarko, Demas brab Lukas.

<sup>25</sup> Mégédaw damén begom kéluhanan i Kadnane Jesu Kristo.  
*Pablo*



## I Sulate dob de Judio do Munur bé Jesu Kristowe

Enda gétiga tom de ké ati séménulate bé ni surat, non i séménulate de énda sénulatén i dawét ne. Endob gétiga tom sénulatén dob de Judio do munur bé Jesu Kristowe. Sénulatén i ni inok fébagéré noy de fédéw ro, non i de dumo ro do Judio fénsaray ro bero sabaf bé kéunur ruwe bé Jesuse funa ro éndaén odoro roy kitab i de Judio.

Dob ni surat, wén i kétoroe bé Jesuse, Been i Nga i Tuluse, atin mélaw toow na fo gérotor bé de télaki brab de sénarigoy Tuluse muret bé kébéreh ne brab fiyon i Moises. Wén soy kétoroe bé fénléhu i Jesuse fégétulak fégékédan bé de sala i de kéilawan. Mélaw éndaén kailangay de étéw i témulake do ayam taloo no do ségiyo éntingayén. Wén soy kétoroe bé toow fo kailangay de étéw i munure bé Jesuse non Been i kéfédéway de étéw mangéy dob Tuluse.

<sup>1</sup> Bé do gétah do gai, ménsébéréh i Tuluse bé de katufua tom do Judio féngagéwén dob de étéw do sénarigo no muret bé kébéreh ne. Fénbéréhén bero médo gule brab dob séségiyo-giyowe aguwon. <sup>2</sup> Endob béleewe ni, dob de ni géfuray do gai, ménsébéréh dob betome féngagéwén dob tintuwe Ngaén. I Tuluse, fénlimbagé bé Nga ne niy kéluhanay éntingayéne, atin fénémili i Tulusey Beene waléy so gefe bé kéluhanane. <sup>3</sup> Atin i Nga i Tuluse ni, réméndaw bé barakat i Tuluse, non ségiléw so bé Tulusey ni Nga. Atin i Nga i Tuluse ni, Beeney émfétause bé kéluhanay éntingayéne inok énda méalfa ro. Rigoné noy ni dob barakatane kébérehén. Atin amun énggilid kéndá noy sala i de kéilawan, ménséfule mangéy dob lawayo inok mésar fingé dob kuwonoy Tuluse inok méguléw.

<sup>4</sup> Mélaw i Nga i Tuluse, ménwaléy toow na fo gérotor bé de télaki. Loo so bé ni, bé kéfédawét i Tuluse Jesusey Nga ne, giton toow na fo gérotor i Jesuse bé de télaki. <sup>5</sup> Non wén i Ménsulate Kébéréh i Tuluse bénrhéh dob Jesuse mano, “Beemey Nga guwe, béleewe ménwaléy Bohém.” Bénréh i Tulusey ni dob Jesuse, éndob énda bénréhén de dob de télaki no. Atin wén soy Ménsulate Kébéréh i Tuluse mano, “Begéney Boh ne, atin Beeney Nga guwe.” Bénréh i Tulusey fantage bé Jesuse, békén fantag bé de télaki. <sup>6</sup> Atin amun gédétén i gaiwe féuwit i Tulusey toowe fo gérotor Ngaén mangéy dob duniyae ni, ménbéreh man mano, “I Beene, fatut féngadaféy kéluhanay de télaki gu.” <sup>7</sup> Endob ay niy kébéreh i Tuluse fantag bé de télaki no mano, “I de télaki gu, sani de sugu-sugué ku, féwaléyé ku bero do réfuruh brab

do aféy.” <sup>8</sup> Endob ay niy kébéreh i Tuluse fantag bé Nga ne mano, “Beemey Tuluse brab méguléw taman sa taman. Métintu foy kéféguléw me. <sup>9</sup> Atin méimu go bé fiyowe, brab mэрarék go bé tetee. Been i niy funa kuwe, sani Tulus me, ménémili Beem inok fégérotoré ku Beem bé de dumo mo. Atin fénoror gu so beem.” <sup>10</sup> Atin wén soy ségiyowe Ménsulate Kébéréh i Tuluse dob Nga ne mano, “I Beeme, Kadnan, bé féganayo Beemey léménimbage bé duniyae. Atin rénigo moy lawaye bé de kémérem. <sup>11</sup> I duniyae brab lawaye, méalfa ro moso, éndob i Beeme, méuyag go taman sa taman. I de ni waléy ro tafay ségiléw bé kégale. <sup>12</sup> Ségiléw bé kékédet me bé kégale inok baliwana mo bé mantuwe de. Endob i Beeme, énda méfégalin go, atin énda i tamanay kéuyag me.” <sup>13</sup> Atin ménbéreh soy Tuluse dob Nga ne mano, “Sar go fingé dob kuwono kuwe ni taman fétabané ku Beem bé de sébanil Beem.” Endob énda bénréh i Tulusey ni dob de télaki no. <sup>14</sup> Mélaw, i de télaki, beroy do sugu-suguéy Tuluse saén. Enda gito gey bero, éndob suguéy Tuluse bero témabang betom do étéw gégedot bé umule magufusa tidéw dob Beene.

## 2

<sup>1</sup> Mélaw fatut fo féntuntayé tom i de toow kétoro énggélungoo tom, inok taus i kéunur tome de. <sup>2</sup> Non toow i kitabe niray i Tuluse fénuwitén bé de télaki. Mélaw i kéluhanay de mémélis bé kitabe, ménkukum ro loo bé fatute. <sup>3</sup> Atin ségiléw so bé ni, tintu mékukum tom so amuk fédayaé tom brab énda odoro tom i kétoroe fantag bé fiyowe kéfukas i Tuluse betom bé de sala tom. I Kadna tome Jesus i sunguwe ménuret betom fantag bé ni kéfukas, sani amuk munur tom bé Jesuse, kédané noy de sala tom inok énda mékukum tom. Atin i de étéw énggélungoo bé ni kéuret i Kadnane, bénréh roy toow fo toow i kéuret ne de. <sup>4</sup> Atin i Tuluse, fénggito no so toow i ni kéuret bé kéférigo nuwe bero do ségiyogyo do mékégaif bé barakat ne. Atin nirayén dob de ni muret i de kéfurungon sabaf bé kéfémanduoy Rémogor i Tuluse bero. Niray i Tuluse beroy loowe bé kétaya nuwe de irayén dob séngae ségétéw bero.

<sup>5</sup> Atin béréhé ku begom i fantage bé mantuwe duniya gégumah moso. I Tuluse, énda fénémilién i de télaki méguléw bé ni mantu duniya. <sup>6</sup> Yamula fénémilién i de étéw. Non wén i Ménsulate Kébéréh i Tuluse mano, “Tulus, sedek énda lifoté moy de étéw? Non kéilawan ro saén. Sede mélaw ké fagifaté mo bero? <sup>7</sup> Fénggérifantadém bero bé de télaki singkow saén. Endob niraya moy de kéilawan bantugan brab féféngadata mo bero. <sup>8</sup> Atin fénémilién i de étéw méguléw bé kéluhanay de éntingayén.”

Been i niy Ménsulate Kébéréh i Tuluse. Mélaw gétiga tom fégluwéy kéilawaney kéluhanay éntingayéne, atin énda i éntingayén énda fégluléwo no de. Endob gétiga tom so, béleewe ni énda séna méguléw i kéilawane bé kéluhanay éntingayéne. <sup>9</sup> Endob gido loo, gétiga tom i Jesuse fénggérifantad i Tuluse bé de télaki bé singkowe saén inok méléhu gantino noy kéluhanay de étéw inok énda méléhu ro. Ménrigoy ni sabaf bé kégedaw i Tuluse. Atin béleewe, bantugén i Jesuse brab fégadatan fo toow sabaf bé kéfédaya ne bé kéféléhue de. <sup>10</sup> I Tuluse, lénimbagén i kéluhanay éntingayéne brab Beeney émfétause bé kéluhanane. Atin fiyoy rénigo nuwe bé kéfédaya ne bé Jesuse. Mérasay, non sabaf bé kérasay ne, énda i kulang dob kékufas ne betom. Rénigo Tulusey ni inok féwaléy no betom médoo do ngaén inok médayéw tom séréngan bé Jesuse taman sa taman. Non i Jesuse, Beeney aguwoy de étéw inok méfukas ro tidéw dob de sala ro.

<sup>11</sup> I Jesuse, linisé noy de étéw dob de sala ro. Atin i betome do ménlinisé dob de sala tom, sétiman tomén Boh bé Jesuse, sani Tuluse. Been i niy funa Jesuse énda mémala no fédawété no betom do tuwaréyén. <sup>12</sup> Non wén i Ménsulate Kébéréhén mano, “Tulus, béréhé kuy fantage bé Beeme dob de tuwaréy gu. Atin dayéw ku Beem dob kéluhanay de étéw sélimud féngadafé ro Beem.” <sup>13</sup> Atin bénréh Jesuse so mano, “Sémarigu dob Tuluse.” Atin bénréhén so mano, “Ay niwu, begey i de nga i Tuluse nirayén dob Begéne.”

<sup>14</sup> Atin i de betom do nga i Tuluse, méléhu tom non kéilawan tom saén. Been i funa Jesuse ménwaléy so kéilawan loo bé betome. Rénigo noy ni inok méléhu, inok bé kéléhu ne, énggébinašana noy Satanase, sani tidéwoy kéléhue. <sup>15</sup> Atin rénigo noy ni inok géfukasa noy kéluhanay de étéw bé ménrugayén i kégilak ruwe méléhu. <sup>16</sup> Atin békén do télakiy tabanga nuwe. Yamula betom do séfu Abraham i tabanga nuwe. <sup>17</sup> Been i niy funa nuwe kailanga noy waléye ségiléw bé betome do tuwaréyén, inok Beeney waléye toow fo mégédaw brab tintu fo gésarigon gérotor fadi tom dob adafay Tuluse, inok gékédana noy de sala tom do kéilawan. <sup>18</sup> Atin mélaw, gétabana noy de étéw téngkadé Satanase, non i Beene ténéngkad Satanase so brab toow fo fénrasyén.

### 3

<sup>1</sup> Do dumo gu do munur bé Kristowe, sani de sénéngkat i Tuluse bati moso dob lawayo diyo, fégitung gom i fantage bé Jesuse. Been i no sénugu i Tuluse mangéy dob duniyae ni. Sénuguén inok waléy gérotor fadi bé kéféngintulus tome dob Beene. <sup>2</sup> I Jesuse ni, toow fo nodoro noy kéluhanay de fénrigoy

Tuluse de, ségiléw bé kéodoro Moiseese bé kéluhanay de galbékén dob de étéw i Tuluse. <sup>3</sup> I étéwe rémigo lawi, mas na émbantug bé lawie. Ségiléw so bé Jesuse, mas na émbantug bé Moiseese. <sup>4</sup> I kéluhanay de lawi, wén i do réménigo bero. Atin Tulus i réménigowe bé kéluhanay éntingayéne. <sup>5</sup> I Moiseese, fiyoy rénigo nuwe amun sugu-suguén dob de étéw i Tuluse. Atin i rénigo nuwe ménwaléy maak anlung i rigonéy Tuluse moso. <sup>6</sup> Endob i Kristowe, Beeney Nga i Tuluse brab Been soy sarigone méguléw bé de étéw i Tuluse. Atin i betome do munur de, betom i de étéw i Tuluse, amuk mégéy i kéunur tome de brab amuk énda mékédan i késarig tome de bé kéongot-ongot tome de.

<sup>7</sup> Non wén i Ménsulate Kébéréh i Rémogor i Tuluse mano, “Amuk gélingoo kom i kébéréh i Tuluse béleewe ni, <sup>8</sup> kagom féfégasén i de uléw gom loo bé kétégas i uléw i de katufua kom amun ménika ro bé kétayay Tuluse dob gonone énda i étéw de bati. Non ténéngkad ro diyo i kétingkél i Tuluse. <sup>9</sup> Fiyon fo ké énggito roy de mékégaif do rénigo gu bé ménfote folo gébélintuwa,” bang i Tuluse, “ténéngkad roy kétingkél guwe bé de tete adat ro. <sup>10</sup> Mélaw ménkéritu bero brab bénréh gu maku, ‘Démoyun ro mika bé kétaya kuwe brab énda fo modor ro bé de sugu gu.’ <sup>11</sup> Mélaw ménkéritu bero, brab fénasada ku bero maku, ‘Enda géahur ro dob gono kuwe inok gétéren ro moso séréngan Begén.’” Been i niy kébéréh i Tuluse.

<sup>12</sup> Mélaw, do dumo gu, ingat gom inok énda i ségétéw begom waléy tete i itunga nuwe brab énda munurén bé Tuluse. Non amuk loo bé ni, diguré noy méuyage Tulus. <sup>13</sup> Yamula, fatut séféfiyo tom féféw sénga fuweh lokut wén sénay gai tom inok énda i ségétéw betom énggéfégakaran rémigo sala funa no waléy métégas i uléw ne. <sup>14</sup> Non amuk féfégété tom i késarig tome bé Kristowe taman sa taman loo bé gétauh, toow fo gétaus tom sédumon bé Kristowe.

<sup>15</sup> Been i niy bénréh i Ménsulate Kébéréh i Tuluse mano, “Amuk gélingoo kom i kébéréh i Tuluse béleewe ni, kagom féfégasén i de uléw gom loo bé kétégas i uléw i de katufua kom amun ménika ro bé kétayay Tuluse.”

<sup>16</sup> Ati de étéw énggégélingo bé kébéréh i Tuluse, éndob natuho roy Tuluse? Beroy de étéw do Judio do fénanangguwit Moiseese tidéw Egipto. <sup>17</sup> Ati de étéw kénritoy Tuluse bé ménfote gébélintuwa? Bero soy de Judio do ménsala dob Tuluse funa ro ménléhu dob gonone énda i étéw de bati. <sup>18</sup> Beroy de étéw fénasaday Tuluse mano, “Enda fakayén ké mahur ro dob gono kuwe inok gétéren ro moso séréngan Begén.” Non énda modor ro bé kébéréh i Tuluse. <sup>19</sup> Mélaw gétiga tom énda énggéahur ro non énda ménunur ro bé Tuluse.

## 4

<sup>1</sup> Fiyon fo ké énda géahur i de énggétah do étéw, énda mékédan i fasad i Tuluse bé fakay géahur i de étéw dob gonoy Tuluse témérén. Mélaw fatut mingat tom inok kéluhanan tom géahur diyoy. <sup>2</sup> Non énggélíngoo tom i Fiyowe Uret ségiléw bé kéggélingoo i de katufua tom de. Endob fiyon fo ké énggélíngoo ro, énda énggédot roy fiyowe non énda ménunur ro de. <sup>3</sup> Endob i betome do munur de, géahur tom dob gonoy Tuluse inok gétéren tom. Endob i de étéw do énda munur, énda fakayén mahur ro. Non wén i Ménsulate Kébéréh i Tuluse mano, “Ménwaléyu mékérít, atin réménigowu fasad bé énda géahur ro dob gono kuwe témérén.” Bénréh i Tulusey ni fiyon fo ké méntafayén i gono nuwe, non ménggilidén i galbék ne tidéw bé kélímbag ne bé duniyae ni. <sup>4</sup> Non wén i Ménsulate Kébéréh i Tuluse fantag bé géfitéw ne gétérésangan mano, “Amun énggilid i Tuluse bé galbék ne, téménrén dob géfitéw ne gétérésangan.” <sup>5</sup> Atin wén man i Ménsulate Kébéréh i Tuluse mano, “Énda fakayén ké mahur ro dob gono kuwe témérén inok gétéren ro séréngan Begén.” <sup>6</sup> I de sungu étéw énggélíngoo bé Fiyowe Uret, énda énggéahur ro dob gonoy Tuluse, non énda ménahur ro. Mélaw wén i do ségiyo étéw géahur dob gonoy Tuluse inok gétéren ro séréngan de. <sup>7</sup> Gétiga tom i ni non réménigo man ségiyo gaiy Tuluse inok géahur i de étéw dob gono nuwe témérén. Non amun ménifus i ménrugaye nén gai tidéw bé gaiwe énda ménunur i de sungu do étéw, fénbéréh i Tulusey Datu Dabide mano, “Amuk gélingoo kom i kébéréh i Tuluse béleewe ni, kagom fétégasén i de uléw gom.” <sup>8</sup> Atin fantag man bé de ni do sungu étéw, amuk énggéfangannguwito Josuehe bero mangéy dob tintuwe gonoy Tuluse inok tintu gétéren ro, éndaén damén ménbéréh i Tuluse fantag bé ségiyowe gai géahur i de étéw dob gonoy Tuluse inok gétéren ro. <sup>9</sup> Mélaw gétiga tom géahur soy de étéw i Tuluse dob gonoy Tuluse inok gétéren ro ségiléw bé kétéréy Tuluse dob géfitéw ne gétérésangan amun énggilid léménímbag. <sup>10</sup> Non i kéluhanay de étéw géahur dob gonoy Tuluse inok gétéren ro séréngan de, gétéren ro so dob de galbék ro ségiléw bé kétéréy Tuluse bé kélímbag ne. <sup>11</sup> Mélaw toow tom fo télamanén i mahure inok gétéren tom séréngan bé Tuluse. Katom félisén i kébéréh i Tuluse loo bé réngoy de énggétah do étéw funa ro énda énggéahur.

<sup>12</sup> I kébéréh i Tuluse toow fo barakatan brab miray bé umule magufusa. Ségiléw bé sundange toow fo murém. Non i kébéréh i Tuluse maak diléké noy de itunga tom brab de fédéw tom. I Nga i Tuluse gétiga noy kéluhanane fantag bé betome. Gétiga noy itunga tome brab fédéw tome. <sup>13</sup> I Tu-

luse gétiga noy kéluhanane, énda i éntingayén mébunéy dob Beene. Gito noy kéluhanane, fiyon i de rigoné tom. Mélaw wén mosoy gai kailanga tom téméndég dob adafa nuwe brab béréhén dob Beeney fantag bé kéluhanay de réngoo tom.

<sup>14</sup> Mélaw fatut fo fétausé tom i kéégét i kéunur tome bé Jesu Kristowe loo bé fénayag tome. Non wén i toowe fo fiyo gérotor fadi tom, sani Jesuse Nga i Tuluse, déménayat mangéy dob Tuluse. <sup>15</sup> Atin i ni gérotor fadi, toow fo gésobuto noy kélubay tome non kélilawan tom saén. Non i Jesuse ménwaléy kélilawan brab ténukaw Satanase bé séngae gékélasi kétukawan de ségiléw bé betome, éndob énda fo énggésala i Jesuse. <sup>16</sup> Mélaw, katom mégilak féggédét dob mégédawe Tulus. Non méuray i na ruwe betom brab mégédaw betom, atin tabanga no betom dob de gai kérégénan tom.

## 5

<sup>1</sup> I kéluhanay de gérotor do fadi, fénmilién bero inok waléy ro do kéfédéway de étéw mangéy dob Tuluse. I galbéké sénarig dob berowe, témulak ro dob Tuluse inok mékédan i sala i de étéw. <sup>2</sup> I de gérotor do fadi, do kélilawan ro saén atin mélubay ro. Mélaw gétingkéló roy de étéw ké gésala ro atin méuray i na ruwe bé de étéw gésala non énda gésobuto roy fatute. <sup>3</sup> Atin i de gérotor fadi, kélilawan ro saén, mélaw énda démoyan ro gérigo bé fatute. Mélaw kailanga roy témulake inok kédanéy Tulusey de karo sala ségiléw bé de sala i de ségiyo do étéw. <sup>4</sup> Atin i galbék i gérotore fadi, toow fo fégadatat de étéw. Atin énda i ségétéw étéw géfémilé bé kaane lowoh waléy gérotor fadi. Non Tulus saén i mémilie bé ati isuwé waléy gérotor fadi loo bé kéfémilé ne bé Aarone bé do géta.

<sup>5</sup> Atin ségiléw so bé niy Kristowe, békén Been i ménémilie bé lowoh ne inok waléy gérotor fadi. Yamula Tuluse i ménémilie de, sani ménbéréhe dob Beene mano, “Beemey Nga guwe, béleewe ménwaléyu Bohém.” <sup>6</sup> Atin wén soy ségiyowe kébéréh i Tuluse mano, “Beemey ségétéwe fadi taman sa taman, ségiléw bé Melkisedeke.”

<sup>7</sup> Amun mémbati sénay Jesuse dob duniyae ni, déménasal brab kéménrewe ménféggédaw-gédaw dob Tuluse, sani géfukase de bé kéléhue. Atin fénggélíngoo i Tuluse non bénasana noy Tuluse brab nodoro noy kétayay Tuluse. <sup>8</sup> Fiyon fo ké Nga i Tulusey Jesuse, féngganadén i kéodore bé de sugu i Tuluse bé kérasaye énggéagéwo no. <sup>9</sup> Atin amun énggilid non i kéluhanay sénugu i Tuluse de, ménwaléy Been i ménmukase bé kéluhanay de étéw modor dob Beene inok gédoté roy umule magufusa. <sup>10</sup> Atin tidéw béno, fénwaléy i Tulusey Jesuse gérotor fadi ségiléw bé fadie Melkisedek bé do géta.

<sup>11</sup> Médooy gébéreho keye fantag bé ni. Endob méréngén i kéfégesobute de dob begome non métana gom gésobut. <sup>12</sup> Ménrugay gomén ménunur bé Jesuse. Mélaw fatut gomén damén do témoro. Endob énda fakayén non taman so béleewe ni kailangan gom séna toroén inok gésobuto kom i de sungu kétoro fantag bé kébéreh i Tuluse. Fatut damén mama gomén bé de métégas do amaén, sani ménaléme kétoro, éndob taman so béleewe ni maak témutu gom séna. <sup>13</sup> I de témutu séna, do nga ro séna. Enda gésobuto roy kétoroe fantag bé kétintuwe. <sup>14</sup> Endob i de lukés, mama ron bé métégase do amaén. Atin gélolo ronén i fiyowe brab tetee sabaf bé kéféganad ruwe de.

## 6

<sup>1</sup> Mélaw katoméni séduli-dulién i de sungu kétoro fantag bé Kristowe. Yamula féganadé tom i de ménalém de. Endaén kailanga tom démoyun féganadén i de kétoro, loo bé fatut tagakéy de étéw i de rignonén énda géfukasa no bero, brab fatut munur ro bé Tuluse. <sup>2</sup> Endaén kailanga tom féganadén i kétoroe fantag bé kébautise, brab fantag bé kétégéne bé de bunbunan bé lala i kédasalane de, brab fantag bé kétébulé i de étéw, brab fantag bé kékukum i Tuluse taman sa taman. <sup>3</sup> Yamula féganadé tom soy de ménalém do kétoro, amuk tungkaséy Tuluse damén.

<sup>4</sup> I de étéw téménrén ro munur, éndaén gésénule ro man ségule. Bé do gétaéh, énggésobuto ronén i toowe kétoro fantag bé Jesuse. Brab énggédot ronén i niray i Tuluse féngagéw dob Kristowe brab énggédot ronén i Rémogor i Tuluse. <sup>5</sup> Bé do gétaéh, énggétiga ronén toow fo fiyoy kébéreh i Tuluse. Brab énggétérédama ronén i barakat i Tuluse fégito no moso dob de mantu do gai. <sup>6</sup> Gido loo, téngagak roy de ni. Mélaw éndaén fakayén fégésénuleén ro man. Non maak séguleé ro man féléhuén i Nga i Tuluse. Mélaw fémalané roy Nga i Tuluse dob adafay de étéw.

<sup>7</sup> Ufama, i betome tidéw dob fantade ni do kéilawan ségiléw tom bé fantade démoyun méranaan. Amuk témunoh i de fiyo ohokén do amaén, féfiyonéy Tulusey no fantad. <sup>8</sup> Endob amuk féérukéy fantadey de suwar brab de kéroon, énda i do lagaén. Mélaw tuwégéy gefee de. Ségiléw so bé ni, i étéwe miring bé fantade ni, kukuméy Tuluse.

<sup>9</sup> Mélaw, do dumo gu, fiyon fo ké loo bé niy kébéreh guwe dob begome, gétiga ku taus gom rémigo fiyo loo bé fatute rignonéy de étéw ménfukasa dob de sala ro. <sup>10</sup> Toow fo métintuy adat i Tuluse. Enda mélifotén bé de fiyo rénigo gom brab kéimu gome bé Tuluse fénggito gom bé kétabanga kome bé de dumo gom munur bé Kristowe. Atin taman so béleewe niy kétabanga kome bero. <sup>11</sup> Toow

fo méuyot gey de ké fétausé kom kéluhanan i kégeror gome taman bé kééséfule Kristowe, inok gédoté kom i kéluhanay inamé kome. <sup>12</sup> Mika gey de ké waléy gom faukén. Yamula fatut iring gom i de étéw do munur brab do témingkel. Beroy de étéw gégédot bé fénasad i Tuluse.

<sup>13</sup> Fégitung gom i katufua tome Abraham. Amun fénasaday Tulusey Abrahame, énda i ségiyo toow na fo gérotor bé Tuluse inok usaré noy dawét ne fégésafaén. Mélaw nusar i Tulusey kaane dawét fénggésafaén bé ni fasad. <sup>14</sup> Ménbéreh i Tuluse mano, “Fasada ku beem bé féfiyoné ku beem brab iraya ku beem médoos do séfému.” <sup>15</sup> Atin téméningkel i Abrahame, mélaw énggédotén i fénasad i Tuluse de. <sup>16</sup> Amuk sémafai i étéwe, usaré noy dawét i ségétéwe étéw toow na fo gérotor bé beene. Atin géunur mélaw i de étéw gégélino de. <sup>17</sup> Ségiléw so bé ni, i Tuluse toow fo fénbagérén i fasad ne bé kériyo nuwe bé safa ne, inok i de étéw fénasada no toow fo fégito no bero brab fégétiga no beroy énda émfégalin i fasad ne brab tintu ku tumané no. <sup>18</sup> Mélaw ruwo timan éntingayén i éndae fégaliné no. I sébaane de, been i fasad ne. Atin i géruwono nuwe, been i safa ne. Mélaw gétiga tom énda témugi i Tuluse. Mélaw i de betom do étéw fédiyaga bé Tuluse, toow fo méégét i kéunur tome dob Beene loo soy inam tome bé gédoté tom i fénasad ne dob betome. <sup>19-20</sup> Toow fo méégét i inam tome bé tumanéy Tulusey fasad ne betom. Non sénarig tom i nan dob Tuluse. Mélaw énda mékédan i kéunur tome de. Atin i funa nuwe énda mékédan i késarig tome de non wén i kéfédéwa tom dob sékuloy Tuluse, sani Jesu Kristowe. Maak ménahur dob sibéy i Tuluse mangéy fingé bala bé rindunge dob lawi i Tuluse. Atin diyo mélaw dob sékuloy Tuluse. Ménwaléy gérotor fadi tom taman sa taman loo bé fadie féndawét Melkisedek bé do gétaéh.

## 7

<sup>1</sup> I Melkisedeke ni, beeney datu i ingéde Salem bé do gétaéh. Atin been soy fadie méngadaf bé toowe fo gérotor Tulus. Atin wén i no gai, ménsetiboh i Abrahame bé de ségiyo datu, sani de kéménéfo bé samung ne, atin énggéféléhuo no bero. Atin bé lala Abrahame mule, énggéalaka noy Melkisedeke. Atin nongot Melkisedeke dob Tuluse, bé féfiyoné noy Abrahame damén. <sup>2</sup> Tidéw béno, niray Abrahame dey géfoloe bé ténaba nuwe énggédotén dob de datu fénléhuén. I atag i dawéte Melkisedek, “Métintu Datu”. Atin non datu i Melkisedeke dob Salem, i atag i dawét ne so, “Datu Kémédan bé Késétibohé”. <sup>3</sup> Enda ménsulatén ké ati boh Melkisedeke taloo no ati idéng ne taloo no ati katufua nuwe. Atin énda so ménsulat i

fantage bé kéumah ne taloo no fantag bé kéléhu ne. Mélaw maak Nga i Tuluse non énda gétigay de étéw de ké ati tidéwo nuwe de taloo no ati ténamana nuwe de. Mélaw i Melkisedeke fadi taman sa taman.

<sup>4</sup> Mélaw gétiga tom toow fo gérotor i Melkisedeke. Non fiyon i Abrahamame sani katufua tome do Judio, nirayén i géfoloe bé ténaba nuwe énggédotén bé késétiboh ne. <sup>5</sup> I de fadi i de Judio, sani de séfu Lébi, séfu ro soy Abrahamame. Sénugu i kitabe bero médot bé géfoloe tidéw dob de Judio. Mélaw éndot ro tidéw dob de dumo ro do Judio, fiyon fo ké do séfu Abraham ro so kéluhanan. <sup>6</sup> Endob i Melkisedeke békén séfu Lebiwe. Gido loo, éndotén i géfoloe tidéw dob Abrahamame, atin nongotén dob Tuluse bé féfiyoné noy Abrahamame. Réningo noy ni, fiyon fo ké Abraham i étéwe fénasaday Tuluse. <sup>7</sup> Atin gétiga tom, i étéwe ongoté no dob Tuluse bé féfiyoné noy ségétéwe étéw, toow na fo gérotor i nan étéw. <sup>8</sup> I de fadi i de Judio médot bé géfoloe tidéw dob de dumo ro Judio, méléhu ro. Endob i Melkisedeke, sani méndote bé géfoloe tidéw dob Abrahamame, énda ménsulatén dob kébéreh i Tuluse fantag bé kéléhu ne. <sup>9-10</sup> Atin amun niray Abrahamey géfoloe dob Melkisedeke, maak Lebi soy méniraye. Non fiyon fo ké énda séna ménumah i Lebiwe de, maak diyo séna dob lowoh i katufua nuwe Abraham bé kégbalak ne bé Melkisedeke. Atin Lebiy katufuay de fadi médot bé géfoloe tidéw dob de Judio. Mélaw giton bé ni, mas gérotor i kéfadi Melkisedeke bé kéfadi i de séfu Lébi.

<sup>11</sup> Amun niray i Tulusey kitabe dob de Judio, ménémili do fadi, sani de séfu Lébi, inok beroy de gémak bé kitabe. Endob amuk fakay waléy méhintuy kéilawane sabaf bé galbék i de fadi tidéw dob de séfu Lébi, éndaén damén kailangan i ségiyowe fadi loo bé Melkisedeke, békén loo bé kéfadi Aarone sani séfu Lebiwe. <sup>12</sup> Atin amuk fégalinén i fadie, fatu so fégalinén i kitabe. <sup>13-14</sup> Atin i Kadna tome Jesu Kristo, sani mantuwe fadi bérnh gu, békén séfu Lebiwe. Yamula, Beeney séfu Judahe, atin énda i ségiyo bé de séfu Judah do ménwaléy fadi. Mélaw bé kéluhanay de séfu Judah, Jesuse saén i ménwaléye de fadi. Non énda bérnhé Moisesse de ké waléy do fadi i de séfu Judah.

<sup>15</sup> Atin ménggiton fo toow bé amuk wén i mantu fadi loo bé Melkisedeke baliwana no bé de séfu Lébi, wén soy mébaliwanan bé kitabe niray Moisesse. <sup>16</sup> Atin i Jesuse énda ménwaléyén fadi sabaf bé kitabe sénugu bé i de séfu Lébi saén i waléye do fadi. Yamula ménwaléy fadi sabaf bé kébarakatay umul ne énda méléhuén taman sa taman. <sup>17</sup> Non wén i Ménsulate Kébéreh i Tuluse mano, “Waléy go fadi taman sa taman, loo bé fadie

Melkisedek.” <sup>18</sup> Mélaw i de tafay sugu fantag bé de fadi ménkédanén non énda i laga ro brab énda gétabanga ro betom. <sup>19</sup> Non i kitabe niray Moisesse, énda fakayén ké waléy tom méntintu sabaf bé kéodor tome de. Mélaw niray i Tuluse betom i mantuwe aguwon toow na fo fiyo. Atin sabaf bé ni, gétégédét tom dob Tuluse.

<sup>20</sup> Atin saliyo na bé ni, ay niy ségiyowe funan mas na fiyoy mantuwe ni agéwon. Amun réningoy Tuluse fadi i Jesuse, réménigo so safa dob Beene. Endob énda réningo noy ni safa bé kériyo nuwe bé de séfu Lébi do fadi. <sup>21</sup> Endob i Jesuse, ménwaléy fadi bé safa i Tuluse mano, “I Begéne Kadnan, rigoné kuy fasade bé waléy go fadi taman sa taman. Atin énda fégaliné kuy kétaya kuwe.” <sup>22</sup> Mélaw sabaf bé ni safa i Tuluse gétiga tom toow na fo fiyoy mantuwe aguwon réningoy Tuluse inok tanggafé noy de étéw, sani kéumur tome bé Jesuse.

<sup>23</sup> Atin ay ni ségiyowe funan mas na fiyoy mantuwe agéwon. I de fadi do séfu Lébi, kailangan médo ro non méléhu ro, atin amuk méléhu i ségétéwe de, kailangan wén i baliwa no. <sup>24</sup> Endob i Jesuse, ményag taman sa taman. Mélaw énda i baliwa no. <sup>25</sup> Mélaw fakay géfukasa noy de étéw tidéw dob de sala ro, sani de étéw modor de mangéy dob Tuluse. Gérigono noy ni sénga tékelid taman sa taman. Non ményag taman sa taman, atin mélaw wén i kénéféwéwa tom mongot dob Tuluse.

<sup>26</sup> Mélaw Jesus i gérotore fadi kailanga tom. I Jesuse, mékétéfu brab énda i salaén. Enda ségiléwén betom do gésala. Atin amun déméniyat i Jesuse, réningoy Tuluse toow fo gérotor. <sup>27</sup> Ségiyo foy Jesuse bé de ségiyo do fadi. Enda kailanga noy témulake dob Tuluse sénga fuweh inok mékédan i kaane sala, atin tidéw béno témulak man inok mékédan i de sala i de ségiyo étéw. Non nirayén i sébaane tulakén, sani lowoh ne. Mélaw éndaén kailanga noy témulake. <sup>28</sup> I kitabe niray Moisesse, mémili do gésala étéw inok waléy ro do gérotor fadi. Endob ménrugay tidéw béno, ménwaléy gérotor fadi i Nga i Tuluse non fénémili i Tuluse sabaf bé fasad ne bé safa ne. Atin i Jesuse ni, énda i salaén taloo no udenén kulang de. Atin ménwaléy gérotor fadi taman sa taman.

## 8

<sup>1</sup> Ay niy atag i kéluhanay de uret gey begom dob ni sulat. Wén i gérotor fadi tom loo bé nan nuret gu, Been i Jesu Kristowe. Diyo dob lawayo mésar fingé dob kuwonoy barakatane Tulus. <sup>2</sup> Mélaw diyo i Jesuse rigoné noy galbék i fadie dob tintuwe lawi i Tuluse dob lawayo. Békén étéw i réménigowe bé ni lawi, yamula Kadnan i réménigowe de.

<sup>3</sup> I kéluhanay de gérotor do fadi, fénwaléyén bero do fadi inok miray ro do ayam tulakén dob Tuluse. Mélaw ségiléw so bé ni, i katome gérotor fadi, fatut wén i tulakén irayén dob Tuluse. <sup>4</sup> Amuk diniy Jesuse dob fantade ni, énda fakayén waléy fadi. Non wénén i do fadi do miray tulak loo bé fatute dob kitabe niray Moisesse. <sup>5</sup> Endob i toowe, i galbéke rigonéy de fadi dob fantade ni, maak anlung i toowe galbék rigoné Jesuse dob lawayo diyo. Ségiléw so bé rénigo Moisesse. Non amun gédétén rigoné noy safute lawi i Tuluse, bénréh i Tuluse de mano, “Rigo mo loo bé falas i tintuwe simbaan dob lawayo fénggito gu beam dob tuduke.” <sup>6</sup> Atin i galbék Jesu Kristowe bé kéfadi ne toow na fo fiyo bé galbék i de fadi do séfu Lebiwe. Atin ségiléw so bé ni, i mantuwe aguwon rénigoy Tuluse inok tanggafé noy de étéw toow na fo fiyo dob tafaye aguwon. Non toow na fo fiyoy fasade fégrégo bé mantuwe aguwon.

<sup>7</sup> Amuk énda i kulang bé sunguwe aguwon, éndaén kailangan i mantuwe de. <sup>8</sup> Endob i Tuluse énda ménsuwatén bé de étéw modor bé sunguwe aguwon. Non wén i Ménsulate Kébéreh i Tuluse mano, “Gégumah i gaiwe, bang i Kadnane, rigoné kuy mantuwe aguwon inok tayakufé kuy de étéw do séfu Israel. <sup>9</sup> Békén loo bé sunguwe aguwon rénigo gu kay de katufua ro bé gaiwe fénananguwit gu bero mésut tidéw Egipto. Non énda ménodor ro bé no aguwon rénigo gu bero. Atin féndaya gu mélaw bero, bang i Kadnane. <sup>10</sup> Ay niy mantuwe aguwon rigoné ku kay de séfu Israel dob de gai moso, bang i Kadnane: Sulaté kuy de kitab gu dob de itunga ro brab dob de fédéw ro. Atin Begéney Tulus ruwe, brab beroy de étéw gu. <sup>11</sup> Atin mélaw, éndaén kailanga no moso toroé ro dob de dumo roy fantage bé Begéne maro, ‘Fatut gétiga kom i Kadnane.’ Non i kéluhanay de étéw, do gérotor brab do gérifantad, gétiga ron Begén. <sup>12</sup> Atin fésagadé kuy de sala ro, brab éndaén tédémé kuy de tete rénigo ro.” Been i niy kébéreh i Tuluse. <sup>13</sup> Atin mélaw gétiga tom i sunguwe aguwon tafayén brab éndaén i lagaén, non bénréh i Tuluse bé wén i mantu de. Mélaw gétiga tom éndaén méusar i tafaye de non ménkédanén.

## 9

<sup>1</sup> I sunguwe aguwon rénigoy Tuluse inok tanggafé noy de étéw, wén i do suguén fantag bé kéféngadafé brab fantag bé fatute lawi féngadafan rigonéy de étéw. <sup>2</sup> Rénigo roy safute lawi féngadafan. Atin wén i ruwo timan sibéyén. I sunguwe de, féndawét “Mékétéfu gonon”, atin wén i solo de brab ahayan brab fan tulakén dob Tuluse féndiyo dob ahayane. <sup>3</sup> Dob béngaway ni lawi wén i rindunge de. Atin wén soy rindung fégétéléb bé béngaway géruwonoy sibéy ne.

Atin i ni sibéy féndawét “Toow fo Mékétéfu Sibéy”. <sup>4</sup> Diyo wén i bélowone ahayan gonon témuwég bé dukahe. Diyo soy baule méntéléb bé bélowone. Atin i baule ni, been i niy tandae bé fasad i Tuluse. Dob ni baul wén i bélowone binangga nahuron bé amaéne féndawét “mana”. Atin diyo so dob baule niy tugé Aarone déménaun. Atin diyo soy de lumfayfay do batéw sénulatay Tuluse bé kitab ne. <sup>5</sup> Dob rotor i baule ni, diyo féntindég i de kéninontow i de barakatan do télaki émfégétigan bé diyo i Tuluse. Atin ménbékah i de fafak ro dob rotor i gonone firikon bé darae fégékédan bé de sala. Endob énda kailangan fégétiga key begom i kéluhanay de fantag bé ni gonon béleewe ni.

<sup>6</sup> Atin amun ménlosoén i kéluhanane loo bé ni, mahur i de fadi dob sunguwe sibéy féndawét “Mékétéfu gonon” sénga fuweh inok rigoné roy galbék ruwe. <sup>7</sup> Endob gérotor fadi saén i géahure dob géruwowe sibéy féndawét “Toow fo Mékétéfu Sibéy”. Atin ségule saén mahur sénga ségébélintuwa. Atin amuk mahur diyo, muwit dara tulaké no dob Tuluse inok mékédan i de salaén rénigo no do énda énggétiga no de, brab de sala rénigoy de dumo no do Judio sani de sala énda énggétiga ro rénigo ro. <sup>8</sup> I kéluhanay rigonéy de fadi ni, ténoro i Rémogor i Tuluse de betom bé amuk wén sénay sungu sibéy, énda séna fakayén géahur i de étéw dob géruwowe sibéy féndawét “Toow fo Mékétéfu Sibéy”. <sup>9</sup> I de ni maak do anlung i de gai saén béleewe ni. Fégétiga no betom bé i kéluhanay de iray dob Tuluse brab de ayam do tulakén, énda gékédana roy de sala. <sup>10</sup> Non i ni kéféngingtulus, fantag saén bé de sugu bé atiy géamaay de étéw brab géinémoy ruwe, brab fantag so bé de kéurah ro bé de lowoh ro. Endob i de ni do sugu kay de lowoh ro saén, énda gékédana noy de sala ro. Tafayén i de ni do sugu, mélaw usarén saén taman dob gaiwe fégalinéy Tulusey aguwone.

<sup>11</sup> Endob i Kristowe, énggumahén brab ménwaléyén gérotor fadi i mantuwe aguwon toow na fo fiyo bé tafaye de. Atin i lawie féngadafan galbéko no, toow na fo fiyo bé tafaye de. Békén rénigoy de étéw brab énda dini no dob fantade ni. <sup>12</sup> Atin ménahur i Kristowe dob Toowe fo Mékétéfu Sibéy ségule saén non éndaén kailanga noy mahure man. Atin békén do dara kambing taloo no do dara nati safi i uwité nuwe fégétulakén dob Tuluse. Yamula nuwitén i kaane dara fégétulakén dob Tuluse. Atin mélaw ménfukas tom tidéw dob de sala tom taman sa taman. <sup>13</sup> Bé do gétah, dara kambing brab dara safi brab awéw i natiwe safi i firikéne dob de étéw do mékérésik dob kéféngingtulus i de Judio. Atin tidéw béno, éndaén mékérésik ro. <sup>14</sup> Atin amuk waléy malinis i ségétéwe étéw bé dara i de ayam,

toow na fo fiyoy gérigonoy dara Jesu Kristowe. Non sabaf bé kétabang i Rémogor i Tuluse énda i tamana no, nirayén i lowoh ne fégétulak dob Tuluse. Non énda i tete dob Kristowe, fiyon kloh. Atin i dara ne, linisé noy de fédéw tom dob de sala tom atin kédané noy késarig tome bé adate énda i lagaén. Atin mélaw gérigono tom i galbék i méuyage Tuluse.

<sup>15</sup> Atin been i niy funa Kristowe ménwaléy kénéduwa tom inok rigoné noy ni mantu agéwon inok tanggaféy Tulusey de étéw. Mélaw i kéluhana tome do fénémili i Tuluse, gédoté tom i kéfiyonone taman sa taman loo bé fénasad i Tuluse. Fakay i ni mériyo non wén i kéléhu, sani kéléhu Jesu Kristowe, kémédan bé de sala tom rénigo tom bé lala tome séna ménodor bé tafaye agéwon.

<sup>16</sup> Ufama, wén i ségétéw étéw rémigo sulat bé lala ne séna méuyag. Sénulatén ké ati gégédote bé de tamukén féledé no ké méléhu. Atin amuk ménléhuén i ni étéw, kailangan wén foy émféféngintoow de ménléhuén. Tidéw béno, i étéwe gégédot bé tamuk ne, gédoté no loo bé kéberéh i sulate. <sup>17</sup> Endob amuk méuyag sénay ni étéw réménigo sulat, énda i laga i ni sulat. Non wén saén i atagén ké méléhuén. <sup>18</sup> Atin ségiléw so bé niy tafaye ni aguwon rénigoy Tuluse. Non kailangan wén i dara inok mékédan i de sala. <sup>19</sup> Dob sunguwe de, béréh Moisesé dob de étéw i kéluhanay de sugu tidéw dob kitabe. Tidéw béno, éndotén i dara i de nati safi brab kambing atin sénlawékén bé wayége. Tidéw béno, fénreén i bubul i bili-biliwe fénfuro no, brab fénreén soy klohe fongoy kayéwe féndawét isob. Atin tidéw béno, fénirikén dob de étéw brab fénirikén so dob librowe sénulatén bé kitabe. <sup>20</sup> Atin bé lala Moisesé mémirik, ménbéréh mano, “Ay niy daraé tanda i aguwone rénigoy Tuluse inok tayakufé no betom. Atin fatut odoroto ni ni agéwon non sénugu i Tuluse.” <sup>21</sup> Atin fénirik Moisesé soy daraé dob safute lawi féngadafan, loo so dob kéluhanay de gamit usarén bé kéféngintuluse. <sup>22</sup> Géfédéw kéluhanay éntingayéne ténoro i kitabe fatut firikon bé dara i ténulake inok waléy ro malinis dob adafay Tuluse. Atin amuk énda i dara ténulak, énda méfésagad i de étéw bé de sala ro.

<sup>23</sup> I kéluhanay de éntingayén ni dob lawie féngadafan kailangan firikon bé daraé. Endob i de ni maak do anlung i toowe gamit i féngadafane dob lawayo saén. Mélaw fatut toow na fo fiyoy tulakéne dob tintuwe gamit i féngadafane dob lawayo. <sup>24</sup> Mélaw ténulak Kristowey kaane dara. Atin énda ménahurén dob mékétéfuwe sibéy dob fantade ni non maak anlung i tintuwe féngadafan dob lawayo saén. Atin diyo béniy Kristowe rigoné noy galbék i kénéduwa tome

dob adafay Tuluse. <sup>25</sup> I gérotore fadi i de Judio mahur dob Toowe Fo Mékétéfu Sibéy sénga bélintuwa, muwit bé dara i ayame fégétulakén. Endob i Kristowe, énda kailanga noy mahure médoog gule témulak bé lowoh ne. <sup>26</sup> Non amuk kailangan rigoné noy ni sénga bélintuwa, kailangan so mérasay médoog gule tidéw bé gaiy kélimbage bé duniyae ni. Endob kailanga no saén i mahure ségule amun gédétén i tamfaday de gai. Atin méntéfégito inok kédané noy sala i de étéw sabaf bé kétulak ne bé lowoh ne. <sup>27</sup> I kéluhanay de étéw kailanga roy méléhue, tidéw béno kukuméy Tuluse bero. <sup>28</sup> Atin loo so bé ni, téménulak i Kristowe ségule inok mékédan i sala i de medoo étéw. Atin séfule mangéy dob duniyae ni. Endob énda séfuleén inok kédané noy sala i de étéw. Yamula séfule mangéy dini inok fégilidé noy kékukas ne bé de étéw mongot-mongot bé késéfule ne.

## 10

<sup>1</sup> I kitabe niray Moisesé, maak anlung i de tintu fo fiyoy iray Kristowe saén moso. Mélaw kulang i kitabe sémugu bé fatut témulak i étéwe sénga bélintuwa taman sa taman. Non i kitabe énda géféwaléyo no méntintuy étéwe fégédét dob Tuluse. <sup>2</sup> Mélaw i de étéw ménéngintulus loo bé sénugu i kitabe, amuk tintu ménwaléy ro damén malinis dob adafay Tuluse, éndaén tete i de fédéw ro fantag bé de sala ro, atin éndaén kailanga roy témulake man ségule. <sup>3</sup> Endob i toowe, gétedémo ro énda séna ménkédan i de sala ro, non kailanga roy témulake sénga bélintuwa. <sup>4</sup> Non i dara i de safi taloo no do kambing, énda fakayén kémédan bé de sala.

<sup>5</sup> Mélaw amun gédétén gégumah i Kristowe dob duniyae ni, béréhén dob Tuluse mano, “Enda méuyot go bé de ayam do tulakén dob Beeme. Yamula rénigo moy kagéne lowoh inok been i niy fatute tulakén dob Beeme. <sup>6</sup> Non énda mésuwat go bé de ayam tulakén do tuwégén dob ahayane féngadafan brab de tulak fégékédan bé sala i de étéw. <sup>7</sup> Mélaw, béréhé ku dob Beeme, Tulus, ay niwu inok rigoné kuy kétaya muwe loo bé ménsulate fantag bé begéne dob libro muwe.” <sup>8</sup> Ay niy sunguwe béréhé Jesuse, “Enda méuyot go taloo no mésuwat go bé de tulak taloo no do ayam tuwégén dob ahayane féngadafan taloo no do tulak fégékédan bé de sala.” Béréhén i de ni fiyon ké bé been i de niy sénugu i kitabe. <sup>9</sup> Tidéw béno, béréhé Kristowe mano, “Tulus, ay niwu inok rigoné kuy kétaya muwe.” Mélaw gétiga tom kénday Tulusey tafaye aguwon tulakay de étéw. Atin bénaliwana no bé tulak Kristowe. <sup>10</sup> Rénigo Kristowey kétayay Tuluse rigoné no. Mélaw i kéluhana tome ménwaléy tom malinis dob adafay Tuluse non ménkédané i de sala tom sabaf bé tulak

Jesu Kristowe, sani kaane lowoh. Mélaw éndaén kailangan i ségiyowe tulak.

<sup>11</sup> Dob tafaye aguwon, i de Judio do fadi témindég ro dob lawie féngadafan sénga fuweh inok rignoné roy galbék ruwe témulak médoos gule. Gido loo, i de féngatulak ro énda fakayén kémédan bé de sala ro. <sup>12</sup> Endob i Kristowe, téménulak saén ségule inok mékédan i de sala. Atin éndaén kailangan i ségiyowe tulak taman sa taman. Tidéw béno, ménsar i Jesuse fingé dob kuwonoy Tuluse inok méguléw. <sup>13</sup> Diyo so béni ongot-ongoté noy gaiwe fétabanéy Tuluse bé de sébanil de. <sup>14</sup> Mélaw sabaf bé sébaane saén tulak, ménlinis tom tidéw dob de sala tom, atin ménwaléy tom métintu taman sa taman.

<sup>15</sup> Atin wén soy kétoro i Rémogor i Tuluse fantag bé ni. Non bérénéhén dob Ménsulate Kébéréh i Tuluse mano, <sup>16</sup> “Begéney Kadnane, atin ay niy mantuwe aguwon rignoné ku inok géyakufo kuy de étéw moso. Sulaté kuy de kitab gu dob de fédéw ro brab dob de itunga ro.” <sup>17</sup> Atin bérénéhén man mano, “Éndaén féngétédémé kuy de sala ro taloo noy de tete rignoné ro.” <sup>18</sup> Mélaw amuk ménféasagan i de ni, éndaén kailangan i ségiyowe tulak féngékédan bé de sala.

<sup>19</sup> Mélaw, do dumo gu, sabaf bé kéléhu Jesu Kristowe, éndaén kailanga tom i mégilake ké mahur tom dob Toowe fo Mékétéfu Sibéy gonoy Tuluse. <sup>20</sup> Réniyo noy mantuwe aguwon bé kétulak ne bé lowoh ne. Atin i de étéw modor bé ni aguwon, méuyag ro taman sa taman. Amun ménbinasay lowoh ne maak rindung i béngaway Toowe fo Mékétéfu Sibéy ménkusi inok géahur i de étéw. <sup>21</sup> Atin wén i toowe fo gérotor fadi tom, sani Jesu Kristowe. Beeney uléw tome do étéw i Tuluse. <sup>22</sup> Mélaw fatut féngédét tom dob Tuluse énda ubo-ubo i kéféngadaf tome de, brab énda ruwo-ruwoy de fédéw tom bé kéunur tome de. Fakay i ni non maak ménfirikon tomén bé dara Kristowe féngékédan bé de sala tom inok éndaén fégitungé tom i de sala tom. Atin malinisén i de lowoh tom non bé kébautise betom. <sup>23</sup> Enda ruwo-ruwoy fédéw tome de. Yamula fatut fééngété tom i késarig tomé bé nan ongot-ongoté tom, sani fayagé tome dob de étéw sani kétumay Tuluse bé fasad ne. Non gésarig tom bé tumané noy fasad ne. <sup>24</sup> Atin fatut fétausé tom i késégédaw tome, brab késétabang tome, brab kérigo tome bé fiyowe. <sup>25</sup> Atin katom térénon i késélimud tome méngintulus loo bé adat tome. Katom iringén i de étéw témérén ron sélimud méngintulus. Yamula, fatut séfébagéré tom i de fédéw tom. Fatut fo rignoné tom i ni non éndaén mérugayén tidéw béleewe niy késéfulé i Kadnane.

<sup>26</sup> Endob amuk fétausé tom i kérigo tome sala fiyon fo ké gétiga tom i toowe kétoro, ménsinggula i kétulak Kristowe atin énda i

tulak féngékédan bé de sala tom. <sup>27</sup> Amuk wén i ségétéw réménigo bé ni, fatut mégilak bé kékukum i Tuluse. Non wén i gonone aféy féngébinasa bé de étéw sébanil bé Tuluse. <sup>28</sup> Bé gétahe, i étéwe géfélis bé kitabe niray Moiseuse, énda méuray i nay de kékumum de amuk wén i ruwo taloo no téléw gétéw témbo de. Mélaw féléhuén i ni étéw ménsala. <sup>29</sup> Amuk loo bé ni, ati keey i mérigowe dob étéwe mika bé Nga i Tuluse? Toow fo gétimal i kékukume de non fénggito noy kékarang ne bé énda i laga i dara Kristowe kémédan bé de salaén, sani tandae bé mantuwe aguwon kay de étéw inok waléy ro malinis dob adafay Tuluse. I étéwe mika bé Nga i Tuluse, maak fénéngirasén i Rémogor i Tuluse fiyon fo ké ménggédaw i Rémogor i Tuluse de. Mélaw i ni étéw médaif fo ké gétimal i kékukume de. <sup>30</sup> Non gétiga tom ménbéréh i Tuluse mano, “Begéney sémulie, Begéney kékumume.” Atin wén soy ségiyowe Ménsulat Kébéréh i Tuluse mano, “Kukuméy Kadnane de étéwén.” <sup>31</sup> Toow fo mékaid ké kukuméy Tulusey ségétéwe étéw. <sup>32</sup> Féngétédémé gom i de énggétah do gai, amun mantu séna énggésobuto kom i toowe kétoro fantag bé Tuluse. Fiyon fo ké ménrasay gom, énda téménrén gom munur. <sup>33</sup> Wén i do no do gai, i de énda munur fénéngiras ro begom dob adafay médoowe do étéw atin fénrasy ro begom. Atin wén i no gai fénrasy roy de dumo gom, brab ménamung gom bero non ménuray i na gome bero. <sup>34</sup> Atin ménuray i na gome bé de étéw do ménférisu sabaf bé kéunur ruwe. Atin amun éndot roy de tamuk gom, énda ménkérít gom de. Yamula moror gom non gétiga kom wén i toow na fo fiyo tamuk gom gédoté kom moso, atin énda mékédano taman sa taman. <sup>35</sup> Mélaw, kagom térénon i késarig gome bé Kadnane. Yamula fééngét gom i késarig gome de inok gédoté kom i dakéle baras. <sup>36</sup> Atin fatut fétingkél gom inok gérigono kom i kétayay Tuluse brab inok gédoté kom i fénasad ne. <sup>37</sup> Non wén i Ménsulate Kébéréh i Tuluse mano, “Éndaén mérugayén, gégumahén i nan ongot-ongoté kom. Énda mélisén. <sup>38</sup> Atin i de métintu do étéw gu, gédoté roy umule magufusa non ménunur ro Begén. Endob amuk wén i ségétéw bero ménbaleng i fédéw ne sabaf mégilak atin éndaén munurén, énda mésuwatu de.” <sup>39</sup> Endob i de betom, do dumo gu, békén betom i de ménbaleng do fédéwén brab do téménrén do munur do mékukum ro mélaw. Békén loo bé nan i de rignoné tom, non ménunur tom atin mélaw méfukas tom tidéw dob de sala tom.

## 11

<sup>1</sup> Ati kéunure? Wén i kéunur tom amuk tintu gétiga tom gédoté tom i de ongot-ongoté tom, sani de éntingayén énda séna gito



tom de. <sup>2</sup> I de énggéetah do étéw, fénsuwat roy Tuluse sabaf bé kéunur ruwe. <sup>3</sup> Sabaf bé kéunur tome bé Tuluse, énggésobuto tom i kélimbag ne bé duniyae ni dob kébéreh ne saén. Lénimbagén i kéluhanay de énggiton tidéw dob de énda do giton.

<sup>4</sup> I Abele bé do gétaah, sabaf bé kéunur ne, nirayén i toowe na fo fiyo tulak dob Tuluse bé tulake niray i ofo ne Kain. Sabaf bé kéunur ne, kénarang i Tuluse métintu, non tényakufén i tulak ne. Atin sabaf bé kéunur ne, wén soy kétoroén dob betome fiyon fo ké ménléhuén.

<sup>5</sup> Atin i Enoke, sabaf bé kéunur ne, énda ménléhuén. Yamula féndiyat i Tuluse atin éndaén énggitoy de étéw de non diyoén dob lawayo. Wén i Ménsulate Kébéreh i Tuluse fantag bé Enoke bé ménsuwat i Tuluse de bé énda séna déméniyatén de. <sup>6</sup> Atin amuk énda munur i ségétéwe étéw bé Tuluse, énda géfésuwata noy Tuluse. Non i étéwe fégedét dob Tuluse, kailangan munur bé wén i Tulus brab barasay Tulusey kéluhanay de séméléd de.

<sup>7</sup> Atin i Noehe bé do gétaah sabaf bé kéunur ne, réménigo barko. Non amun bénréh i Tuluse dob beene bé wén i gégumah dakél dunuk, ménunur de. Mélaw nodoro noy sugu i Tuluse rémigo barko. Atin énda mélaw ménléhé i Noehe brab de samungén fiyon fo ké kénukum i Tulusey de ségiyo étéw dob duniyae ni. Atin mélaw sabaf bé kéunur ne, fénggito Noehe bé tete i de kéilawan. Atin fénwaléy i Tuluse métintuy Noehe sabaf bé kéunur ne.

<sup>8</sup> Atin i Abrahame so, sabaf bé kéunur ne, nodoro noy kébéreh i Tuluse bé kétawag i Tuluse de brab sénuguén mangéy dob ségiyowe ingéd inok gédoté noy fantade fénasad i Tuluse irayén de. Mélaw téngakén i kaane ingéd sabaf bé kéunur ne, fiyon fo ké énda gétiga noy ayo nuwe de. <sup>9</sup> Atin sabaf bé kéunur ne, ménbati i Abrahame diyo dob fantado no, sani fénasad i Tuluse irayén de. Ménbati diyo maak ségétéw miloh saén fiyon fo ké been i niy fantade fénasad i Tuluse irayén de. Ménbati dob safute lawi réningo no loo so bé nga ne Isak brab bebe né Jakob. Bero soy fénasaday Tuluse de irayén i fantade ni. <sup>10</sup> I Abrahame ni, nongot-nongotén i ingéde dob lawayo, sani ingéde bénantak i Tuluse brab rignoné no brab énda mékédano taman sa taman.

<sup>11</sup> Atin sabaf bé kéunur ne, i Abrahame ménwaléy boh, fiyon fo ké toowén fo lukés loo soy bawag ne Sarah. Endob fiyon fo ké lukés ron fo toow, séménarig ro dob Tuluse bé tumané noy fasad ne. <sup>12</sup> Atin mélaw fiyon fo ké toow fo lukésén i Abrahame ni brab éndaén géféoboro noy bawag ne, ménwaléy so katufuay médoowe étéw. Ségiléw ro bé

kédooy de gitoon dob lawayo brab de farék dob dénsaane.

<sup>13</sup> I de ni do étéw ménunur bé Tuluse, ménléhu ro bé gaiwe énda séna énggédot roy fantade fénasad i Tuluse irayén bero. Gido loo, énda téménrén ro ménunur, non gétiga roy wén i gaiwe moso gédoté roy nan ongot-ongoté ro, sani fénasad i Tuluse bero. Atin fénggito ro bé békén tintu ingéd roy duniyae ni, yamula i tintuwe ingéd ro dob lawayo diyo. <sup>14</sup> Atin i de étéw béleewe ni loo bé niy kébéreh ruwe, fégitoy ro békén dob fantade niy tintuwe ingéd ro, yamula dob lawayo diyo. <sup>15</sup> Non i ro Abrahame, énda ménggundoy ro bé ingéde fénléd ro. Amuk ménggundoy ro de, wén soy gai géséfulé ro mangéy diyo. <sup>16</sup> Yamula, ménuyot ro fo mangéy bati dob ségiyowe ingéd, sani toowe na fo fiyo ingéd dob lawayo diyo. Atin i Tuluse énda mélaw mémala no ké fédawétén Tulus ro. Non ténafayén i ingéde batioy de ni étéw.

<sup>17-18</sup> Atin sabaf bé kéunur Abrahame bé Tuluse, irayén damén i nga ne Isak fégétulakén dob Tuluse. Toow fo fédéwén miray bé buntunge ngaén fégétulakén fiyon fo ké wén i fasad i Tuluse de mano, "Bé nga me Isak, waléy go katufuay médoowe étéw." Atin fiyon fo ké fénasaday Tulusey Abrahame loo bé ni, téngkadén soy Abrahame féléhué noy nga ne. Atin ménodor i Abrahame bé sugu i Tuluse. <sup>19</sup> Non gétiga Abrahame gétébuleoy Tuluse soy Isake. Atin maak ténébule i Tuluse so non amuk énda génlé i Tulusey Abrahame, féléhué noy nga ne Isak.

<sup>20</sup> Atin i Isake amun lukésén, sabaf bé kéunur ne bé Tuluse, nongotén dob Tuluse bé féfiyoné no mosoy de ngaén, ro Jakob brab Isaw.

<sup>21</sup> Atin i Jakobe, sabaf bé kéunur ne bé Tuluse, amun gédétén méléhu, nongotén dob Tuluse bé féfiyoné noy séngae bebeén, sani de nga i nga ne Jose. Réningo noy ni bé lala ne séménanday dob tugé ne fénéngadafén i Tuluse.

<sup>22</sup> Atin i Josehe so, sabaf bé kéunur ne bé Tuluse, amun gédétén méléhu, bénréhén i fantage bé kéésut i de séfuén, sani de Judio, tidéw Egipto. Atin bénréhén so bé fatut uwité roy bangkay ne ké mésut ro.

<sup>23</sup> Atin i de lukés Moises, sabaf bé kéunur ruwe, bénunéy roy nga ruwe Moises taman téléw gétérésang kélungonon i idad ne. Non i datue dob Egipto, sénuguén bé féléhuén i kéluhanay de nga lagéy i de Judio. Endob i de lukés Moisesé énda ménggilak ro mémélis bé ni sugu, non ménunur ro bé Tuluse. Atin énggito ro toow fo fiyoy nga ruwe.

<sup>24</sup> Atin i Moisesé ni so, sabaf bé kéunur ne bé Tuluse, amun métuwanén étéw, ménika de ké fédawétén nga i libune nga i Datue dob

Egipto. Rénigo noy ni fiyon fo ké toow fo fiyoy goho nuwe dob lawi i datue gono no ménruk. <sup>25</sup> Endob sabaf bé kéunur ne, mas ménuoyot mérasay séréngan bé de dumo no do étéw i Tuluse bé singkowe saén kéféguwaya muwit sala. <sup>26</sup> Fénggitungén, mas fiyo ké mérarék i de étéw de sabaf bé kéunur ne bé Kristowe gégumah moso bé kéluhanay de ungangén dob Egipto gédoté no. Non gétiga no toow na fo fiyoy baras ne gédoté no tidéw dob Tuluse moso.

<sup>27</sup> Atin sabaf bé kéunur ne, méntékédan i Moiseuse dob Egipto fiyon fo ké mékérít i Datue de, non énda méglakén. Atin ménfédayday dob de gai do mérégén non maak gito noy éndae giton Tulus mananguwit de. <sup>28</sup> Atin sabaf bé kéunur ne, rénigo noy kandulie féndawét “Témara”. Mélaw sénuguén i de Judio mémirik bé dara i bili-biliwe dob de fintu i de lawi ro inok i télakiwe méméléhu taraa no saén i lawi i de Judio atin énda féléhué noy de ofo nga dob séngae lawi loo bé rénigo nuwe dob de étéw dob Egipto.

<sup>29</sup> Atin sabaf bé kéunur ruwe bé Tuluse, amun ménsut i de Judio tidéw Egipto énggéifar ro dob dogote féndawét “Furo Dogot” maak ménagew ro dob tikare fantad. Endob amun ténundug i de sundalo tidéw Egipto bero atin téménlama ro mifar, ménléné ro kéluhanan non ménséfulé i wayége.

<sup>30</sup> Atin sabaf bé kéunur i de Judio, ménrundas i émbagere diding géliwét bé ingéd i de sébanil bero féndawét Jeriko. Non ménodor ro bé sugu i Tuluse bé agéwé ro liwétén sénga fuweh taman fitéw getérésangan. Tidéw béno, rénundas i Tuluse. <sup>31</sup> Endob bati diyo so dob Jerikoy sundalo libun féndawét Rahab. Atin sabaf so bé kéunur ne, énda ménléhuén séréngan bé de étéw dob ingéd ne do mémélis bé de sugu i Tuluse. Non ténayakufén i de sénarigoy odoroy de Judio, sani de sénugu ro témulik bé kébagér i no ingéd. Endob sénékém ro saén i kétulik ruwe de.

<sup>32</sup> Témérénun muret fantag bé de énggéétah do étéw ménunur bé Tuluse, loo bé ro Gideone, ro Barak, Samson, Jeffe, Dabid, Samuel brab sénarigoy Tuluse muret bé kébéreh ne. Non kulangi i gai guwe muret fantag bé kéluhana ruwe. <sup>33</sup> I de dumo bero, sabaf bé kéunur ruwe, ménsétiboh ro bé de ségiyo do dakél ingéd atin téménaban ro. Méngguléw ro méntintu, atin énggédot roy fénasad i Tuluse. Atin i de dumo bero énggétigémo roy ba i de mérayar brab do émaraw dakél binatag féndawét leon inok énda gékekeo ro bero. <sup>34</sup> Atin i de dumo bero sabaf bé kéunur ruwe, énda méntuwég ro dob de toow fo dakél do aféy. Atin i de dumo bero énda ménléhu ro bé de sundang i de sébanil bero. Fiyon fo ké mélubay ro,

ménwaléy ro émbagér sabaf bé kéunur ruwe inok gétabana roy de sundalo sébanil bero tidéw dob de ségiyo ingéd. <sup>35</sup> Atin wén soy de libun bero méntébule i de nga ro sabaf bé kéunur ruwe.

Atin i de dumo bero, ménléhu ro bé kéférasaye bero, non ménika ro tangéyén. Mas ménuoyot ro mérasay brab méléhu inok tébule ro brab gédoté roy toowe na fo fiyo kéfaguyag. Rénigo roy ni sabaf bé kéunur ruwe bé Tuluse. <sup>36</sup> I de dumo bé de munur, déniyangka ro bero brab bénadas ro bero. Atin i de dumo bero, níké ro brab fénrisu ro bero. <sup>37</sup> I de dumo bero, ménléhu ro bé kéibérone bero batéw. Atin i de dumo bero, sénuvak ro bero bé ragarie. Atin i de dumo bero, téniboh ro bero bé sundange atin ménléhu ro. Atin i de dumo bero, énda i do kégal ro saliyo bé kulit i de bili-bili brab do kulit kambing. Toow ro fo méskinan brab toow ro fo ménrasay. <sup>38</sup> Atin i de dumo bé de munur ni, énggétagaka roy de lawi ro brab ménangéy ro bati dob de gonon énda i do étéw de bati brab dob de tuduk, brab dob de takub brab dob de tosong fantad non férasayén ro. Enggiton énda fo médait i de tete étéw sétifon dob duniyae ni bé de ni do fiyo étéw munur bé Tuluse.

<sup>39</sup> Toow fo ménsuwat i Tuluse bé de ni do étéw sabaf bé kéunur ruwe. Gido loo, énda séna énggédot roy fénasad i Tuluse irayén bero. <sup>40</sup> Non bénantak i Tuluse betom i toowe na fo fiyo aguwon. Mélaw kailanga ro ongot-ongot betom do étéw béleewe, inok tumané noy fasad ne bero séréngan betom.

## 12

<sup>1</sup> Mélaw gétedémo tom i de médooy do énggéétah étéw do méégét ro munur bé Tuluse. Atin maak téngténgé ro betom béleewe ni. Atin i betome, maak sékuya tom bé lala ruwe téméngténg. Mélaw fatut tagaké tom i de éntingayén funa tom métana léméntu. I atag i ni kébéreh gu, fatut tagaké tom i de sala funa tom énda gériyo bé kétayay Tuluse. Atin fatut mégéror tom rémigo bé galbék i Tuluse. <sup>2</sup> Atin fatut féégété tom i kéfégitung tome fantag bé Jesuse, sani émféunure betom brab émféégéte bé kéunur tome. I Jesuse, féndayaén i de étéw kémélabo do dob kruse. Atin fiyon fo ké mékémalay kéléhu ne dob kruse, énda fégitungé no de. Yamula fénggitungén i kéror ne ké gilid i kérasay ne. Atin béleewe ni diyo ménsar fingé dob kuwonoy Tuluse méguléw.

<sup>3</sup> Fétuntay gom i ménrigowe dob Beene. Féndayaén i de tete étéw émférasay de. Mélaw i begome, fatut fébagér gom i de fédéw gom brab kagom témérén munur, fiyon fo ké wén i émférasay begom. <sup>4</sup> Non fiyon fo ké atuhoy kom i salae, énda séna féléhuén gom sabaf bé kéunur gome. <sup>5</sup> Aw énggélifoto komén i

kébéréh i Tuluse dob begome do ngaén, sani kébérehe émféfiyo bé de fédéw gom? Bang i Tuluse, “Nga gu, fétuntay go ké fífíté ku beem sabaf bé de salaém. Atin kago tete i fédéw me de ké fífíté ku beem. <sup>6</sup> Non i de étéw fífíté ku ké mésala ro, beroy de étéw kégédawa ku. Atin i de étéw fífíté ku ké rémigo ro tete, beroy de étéw ténayakuf gu maak do nga gu.” <sup>7</sup> Mélaw amuk mérasay tom, tingkél gom atin fégitung gom maak fífíté boh gome begom sabaf bé de sala gom. Non amuk kérésayan gom, gétiga kom i Tuluse ténayakufén begom maak do ngaén. Non i kéluhanay de boh, fífíté roy de nga ro amuk rignoné roy tete. <sup>8</sup> Atin amuk énda fífíté Tuluse begom ké mésala gom, békén gom do tinta ngaén, éndob do ngaén saén dob liyuwe. <sup>9</sup> I de katom boh dob fantade ni, fífíté ro betom ké rémigo tom tete. Atin mélaw basana tom bero. Mélaw, toow fo fatut ké fédayaé tom i Tuluse méguléw betom. Non Beeney Abay tome dob lawayo atin irayén betom i umule magufusa ké rignoné tom i ni. <sup>10</sup> I de katom do boh dob fantade ni, fífíté ro betom ké nga tom séna, loo bé gékaranga ruwe fiyo. Endob i Tuluse fífíté no betom inok tabanga no betom minut métintu loo bé kétintu nuwe. <sup>11</sup> Amuk fífíté Tuluse betom, mika tom de bé no gai brab tete i de fédéw tom de. Endob sabaf bé ni moror tom de moso ké gégumah i gaiwe waléy tom métintu brab métanék i de fédéw tom.

<sup>12</sup> Mélaw, do dumo gu, amuk maak lugotén gom rémigo bé kétayay Tuluse féégét gom i kéunur gome. <sup>13</sup> Taus gom agéw dob métintuwe aguwon inok i de étéw énda séna méégét i kéunur ruwe, amuk gito ro begom énda minut ro mélubay, yamula minut méégét i kéunur ruwe.

<sup>14</sup> Rigo gom i kéluhanay de gérigono kom dob kéluhanay de étéw inok énda gésékérit gom. Atin fétintu gom sénga tékélid, non amuk énda métintu gom, énda gito gom i Kadnane moso. <sup>15</sup> Atin ingat gom inok énda i ségétéw begom témérén témayakuf bé kégédaw i Tuluse. Non i étéwe loo bé ni ségiléw bé nohoke féla brab bisay onok ne, non mégukét i de munur. Atin been i niy funay de dumo no munur waléy so gésala. <sup>16</sup> Atin ingat gom inok énda i ségétéw begom waléy mékérésik i adat ne taloo no diguré noy Tuluse, loo bé rénigo Esawe bé do géta. Non énda génulaa noy kuwagib ne tidéw dob Tuluse. I kuwagibe ni kaan, non been i ofo. Endob fénbéléyén i kuwagib ne dob tuwaréy ne inok géama saén ségule. <sup>17</sup> Gétiga kom, tidéw béno ménuyot de ké ongotéy boh ne dob Tulusey féfiyoné no. Endob éndaén fakayén, non fiyon fo ké kémérew, éndaén méfégalin i rénigo nuwe bé kéféluluk ne bé kuwagib ne inok gédoté no saén i kaamae.

<sup>18</sup> I aguwo tome mangéy dob Tuluse, énda ségiléwén bé aguwoy de katufua tom do Judio. Non fénfégédét ro dob sébaane tuduk gito ro, sani tuduke féndawét Sinai gonoy mérinoe aféy. Délémon diyo non bé mégéfole rawén brab émbagére réfuruh. <sup>19</sup> Atin bé béno, ménbéréh métanug i témburiwe brab métanug i kébére h i Tuluse. Atin i de étéw diyo, amun énggélungoo roy ni émbéréh, nongot roy éndaén damén émbéréhén ségule, <sup>20</sup> non toow ro de fo ménggilak. Non ménbéréh mano, “Amuk wén i kémuwah bé tuduke ni, fiyon ayam, kailangan féléhuén ibéron batéw.” <sup>21</sup> Atin toow fo mékégilak i ro gonon gito ro. Mélaw ménbéréh i Moiseuse mano, “Lémukubu bé kégilak guwe.”

<sup>22</sup> Endob i betome, békén loo bé nan i kéfégédét tome dob Tuluse. Non maak magéw tom dob tuduke Sion gonoy ingéd i méuyage Dubus. I ni ingéd féndawét Jerusalem diyo dob lawayo, gonoy firoye ngibu télaki. <sup>23</sup> Maak fégédét tom dob de sungu nga i Tuluse, sani de étéw ménsulat i de dawét ro dob lawayo. Diyo ro ménimud toow fo moror. Atin fégédét tom dob Tuluse, sani kémukume bé kéluhanay de étéw. Atin ménfégédét tom so dob de rémogor i de ménléhu do métintu étéw, sani de fénwaléyén do toow fo métintu dob lawayo. <sup>24</sup> Atin ménfégédét tom so dob Jesuse, sani réménigowe bé mantuwe aguwon inok gétangafay Tulusey de étéw. Atin ménfégédét tom so dob dara Jesuse fénirik. Toow na fo fiyoy dara Jesuse bé dara Abele. Non i dara Jesuse been i tanda i kégédaw i Tuluse. Endob i dara Abele, been i tanda i kékukum i Tuluse.

<sup>25</sup> Mélaw ingat gom inok énda mika gom mégélingo bé kébére h i Tuluse. Non ménkukum i de énggééta h do étéw ménika mégélingo bé Moiseuse sani sénarigoy Tuluse muret bé kébére h ne dob duniyae ni. Mélaw i betome so, amuk énda munur tom bé kébére h i Tuluse tidéw dob lawayo, toow na fo énda géséliyah tom bé kékukum i Tuluse. <sup>26</sup> Bé do géta h, ménkuyung i duniyae non ménbéréh i Tuluse. Endob béleewe ni, wén i fasadén mano, “Kuyungé ku man ségule i duniyae brab lawaye so.” <sup>27</sup> Ay niy atag i ni kébére h: Mékédan i de éntingayén do mékuyung, sani de lénimbag i Tuluse. Mélaw i de éntingayén énda mékuyung ro énda mékédan ro.

<sup>28</sup> Mélaw fatut fésalamat tom dob Tuluse, non géahur tom dob kéféguléw i Tuluse énda mékuyungén taloo no mékédan. Fatut féngadafé tom i Tuluse loo bé kétaya nuwe de. Atin fatut basana tom i Tuluse brab mégilak tom mémélis bé de sugué. <sup>29</sup> Non aféy i fégékukum i Tuluse.

### 13

<sup>1</sup> I betome do sédumon munur bé Kris-towe, fatut fétausé tom i késégédaw tome.

<sup>2</sup> Katom lifotén i témayakufe bé de étéw énda séna gélole tom de dob de lawi tom. Wén i de étéw ténayakuf roy de étéw énda séna gélole ro bero, éndob i toowe, ténayakuf roy de télaki, éndob énda gétiga ro de. <sup>3</sup> Atin kagom lifotén i de férisu. Fatut méuray i na gome bero maak begom soy de ménférisu diyo dob berowe. Ségiléw so bé de mérasay, fatut méuray i na gome bero maak begom soy kérasayan, brab fatut fagifat gom bero.

<sup>4</sup> Atin fatut basana kom kéluhanan i késébawage. I de sébawag fatut énda sétayan ro bé de ségiyo. Non kukuméy Tulusey de étéw sétayan ro saliyo bé bawag ruwe brab de bigaén.

<sup>5</sup> Atin kagom fésubranén i kétaya kome bé kurtae. Fatut kasukudan gomén bé wéne dob begome. Non bénréh i Tuluse mano, “Énda tagaké ku begom, taloo no fédayaé ku begom.” <sup>6</sup> Mélaw sabaf bé késarig tome bé Tuluse, fatut béréhé tom matom, “Kadnan i témabangane begén. Mélaw énda mégilaku bé de étéw brab kériyo ruwe begén.”

<sup>7</sup> Féjétédém gom i de énggétah do odoron, sani de sénarigoy Tuluse muret bé kébéreh ne dob begome. Fégitung gom i de fiyo adat ro brab de rigoné ro taman kéléhu ro. Iring gom i kéunur ruwe. <sup>8</sup> Non i Jesu Kristowe, énda émfégalino. Yamula ségiléw so tidéw féganay taman béleewe ni, brab taman sa taman. <sup>9</sup> Atin kagom munur bé de ségiyo-giyo kétoro funa kom témérén munur bé toowe kétoro. I kégédaw i Tuluse fééjété noy kéunur tome. Éndob i kéodorone bé de sugu bé atiy de amaén énda géamaa tom de, énda fo fééjété noy kéunur tome. I de étéw odoro roy de ni do sugu, énda gétabanga no bero.

<sup>10</sup> I betome do munur bé Kristowe, wén i tulak tom, sani Jesu Kristowe. Éndob i de fadi i de Judio, sani de témulak séna dob lawie féngadafan dob Jerusalem, énda i kuwagib ro mama bé katome tulak.

<sup>11</sup> Gétiga tom amuk témulak i de Judio, i gérotore fadi i de Judio, muwit bé dara i ayame témulak mangéy dob Toowe fo Mékétéfu Sibéy inok irayén dob Tuluse inok kédané noy de sala. Éndob i de lowoh i de ayam do fénléhu, métuwég dob liyuy ingéde.

<sup>12</sup> Been i niy funa Jesuse ménléhu dob liyuy ingéde Jerusalem, inok kédané noy de sala i de étéw bé dara ne inok mélinis ro dob adafay Tuluse. <sup>13</sup> Mélaw fatut mangéy tom dob liyuy ingéde inok géfégedét tom dob Beene. I atag i ni, fatut tagaké tom i adat i de Judio inok sémarig tom saén bé Jesuse. Fatut rigoné tom i ni fiyon fo ké fémalané ro betom séréngan bé Kristowe. <sup>14</sup> Non énda i ingéd dob fantade ni gono tom bati taman sa taman. Yamula ongot-ongoté tom i tintuwe

ingéd tom batio tom moso. <sup>15</sup> Mélaw fatut dayéwé tom démoyun i Tuluse, atin fayagé tom i kéunur tome bé Jesuse. Non been i nan i maake kétulak tom bé Jesu Kristowe, sani fadi tome. <sup>16</sup> Atin kagom lifotén i rémigowe fiyo brab sétabang gom, non i ni adat maak tulak so émfésuwat bé Tuluse.

<sup>17</sup> Fatut odor gom bé de sugu i de odoro kom do munur bé Kristowe. Non beroy de démoyun témulama bé kéunur gome inok minut mégét. Non wén moso i gai susinéy Tulusey de galbék ro ké fiyo taloo no énda. Atin amuk modor gom bé de sugu ro, moror ro gémalbék. Atin amuk énda modor gom bé de sugu ro, waléy tete i de fédéw ro atin énda tabanga ro begom.

<sup>18</sup> Fétaus gom i kédasala kome begey. Gétiga key énda i réniyo gey tete non téménlama gey rémiyo fiyo sénga tékélid. <sup>19</sup> Atin ongoté ku dob begome dasala kom begén dob Tuluse inok géséfuleu magad mangéy dob begome.

<sup>20</sup> Ténébule i Tulusey Kadna tome Jesu Kristo. Atin amun ménléhu i Jesuse, i dara ne ménwaléy tanda i mantuwe agu-won réniyo Tuluse inok tanggafé noy de étéw. I ni aguwon énda mékédano taman sa taman. Atin sabaf bé kéléhu Jesuse maak Beeney toowe fo fiyo témalima begom do maak bili-bili. <sup>21</sup> I Tuluse fétanéké noy de fédéw, irayén damén begom i kéluhanay de kailanga kom inok gérigono kom i kétaya nuwe. Atin tabanga Jesuse damén betom inok gérigono tom i funay Tuluse mésuwat. Médayéw damén i Jesu Kristowe taman sa taman. Amen!

<sup>22</sup> Do dumo gu, ongoté ku begom bé fétingké gom mégélingo bé ni sénulat gu funay de fédéw gom émbagé. Non énda métaah i surat guwe ni begom. <sup>23</sup> Méuyotu de ké gétiga kom i fantage bé dumo tome Timoteo. Méntangyéén tidéw dob férisunone. Amuk magad damén i kégumah ne dini, géodor begén ké angéy ku begom tukawén.

<sup>24</sup> Ségifa gom begey i kéluhanay de odoro kom do étéw i Tuluse. Atin i de dumo gom munur bati dob ingéde ni Italiya, ségifaé ro begom.

<sup>25</sup> Mégédaw damén i Tuluse begom kéluhanan.

## I Sulat Santiagowe

Santiagoy dawét i lagéye séménulat bé ni sulat. Been i tuwaréy Jesu Kristowe. Sénulatén i ni sulat dob de kéluhanay de munur bé Jesuse.

Dob ni sulat, ténoero Santiagowe bé fatut féténgténg i de étéw i kéunur ruwe inok giton tintu ro fo munur. Ténoeroén bé fatut ro rémigo fiyo brab métintu émféténgténg bé kéunur ruwe. Ténoeroén bé amuk énda fiyoy de rignoné ro, énda i atag i kéunur ruwe.

<sup>1</sup> Begéney Santiagowe, sani sugu-suguéy Tuluse brab Kadnane Jesu Kristo. Sulata kuy kéluhanay de étéw i Tuluse do ménbéragar dob de séségiyo-giyo do ingéd dob duniyae ni. Ségifaé ku begom kéluhanan.

<sup>2</sup> Do dumo gu munur bé Jesuse, oror gom amuk kérésayan gom bé médoowe do kéténgkad begom. <sup>3</sup> Non gétiga kom amuk fédayday gom munur ké téngkadén i kéunur gome, waléy mélaw témingkél i fédéw gome. <sup>4</sup> Atin fatut fo féténgkél gom inok waléy gom toow fo métintu brab énda i kulang dob kétintu gome. <sup>5</sup> Endob amuk wén i ségétéw begom kulang sénay kégétiga nuwe bé fatute, ongot gom de dob Tuluse. Atin iraya no begom bé kégétigane non toow fo mégédaw i Tuluse brab méuyot fo témantu miray dob kéluhanane. <sup>6</sup> Atin amuk démasal gom mongot, fatut toow gom de fo munur bé gédoté kom i ongoté kome, kagom féruwo-ruwonén i de fédéw gom. Non i étéwe ruwo-ruwoy fédéw ne, dé moyun émfarin i itunga nuwe, ségiléw bé bagéle dob dogote magéw sabaf bé kéfanir i réfuruhe de. <sup>7</sup> I étéwe loo bé ni, békénén fatut kémarang bé iray i Kadnane dob beeney no ongoté no. <sup>8</sup> Non ruwo-ruwoy fédéw ne, énda sémarigén bé Tuluse. Brab énda fo gétiga no de ké atiy toowe fo kéuyoto no rignoné no.

<sup>9</sup> I de méskinan do munur bé Kristowe, fatut ro moror non fégérotoréy Tuluse bero. <sup>10</sup> Atin i de kawasa do munur bé Kristowe, fatut ro so moror non fégérifantadéy Tuluse bero. Non amuk méléhu i kawasawe, ségiléw saén bé kéléhu i de flores, non mékédan i tamuk ne dob beene. <sup>11</sup> Non i de flores, amuk sémbang i térésange, toow fo méduf atin méléhu i de flores. Mégangu ro brab éndaén fiyoy falas ruwe. Loo bé niy kébinasay kawasawe étéw bé lala ne fégéror gémalbék kémurta.

<sup>12</sup> Moror i étéwe fédayday témingkél brab sémarig bé Tuluse dob gaiwe téngkadén. Non amuk gilid i kéténgkade de, gédoté noy umule magufusa sani barase fénasad i

Tuluse irayén dob de étéw méimu bé Tuluse. <sup>13</sup> Atin amuk wén i ségétéw ménsala sabaf bé kéténgkade de, békén fatut béréhé no mano, “Tulus i téméngkade begén inok rignoné kuy salae.” Non i Tuluse énda téngkadé noy de étéw inok rémigo ro sala, atin énda i géténgkad bé Tuluse. <sup>14</sup> Endob i toowe, kéluhanay étéwe météngkad ro amuk féfanangguwit ro bé de tete kétaya ro. <sup>15</sup> Tidéw béno, amuk modor ro bé de tete kétaya ro, ménsala ro. Brab amuk démayday ro rémigo sala, méléhu ro. <sup>16</sup> Mélaw do gulaané ku do dumo gu, kagom fégitungén de ké fésalaéy Tulusey étéwe, non békén toow i nan.

<sup>17</sup> I kéluhanay iray i Tuluse, fiyo. Brab i kéluhanay toowe fiyo, tidéw dob Abaye Tulus, sani léménimbage bé kéluhanay réméndawe do lawayo. I de ni do éntingayén, émfarin i kéréndaw ruwe. Endob i Tuluse, énda émfarino. <sup>18</sup> Non been i niy kétaya nuwe, féwaléyén betom do ngaén bé toowe kébéréhén, inok waléy tom do toow fo gérotor bé kéluhanay de éntingayén do lénimbagé.

<sup>19</sup> Do dumo gu, fégétédém gom i ni, kagom magad mékérít. Yamula fégélingo gom na métah, tidéw béno, been nay no béréh gom. <sup>20</sup> Kétayay Tuluse ké rémigo gom fiyo, éndob énda gérido gom fiyo ké mékérít gom. <sup>21</sup> Mélaw tagak gom i de mékérésik do adat gom brab kagomé rémigo tete. Unuro kom i Tuluse brab rigo gom i kétaya nuwe. Enggélingoo komén i kébéréh i Tuluse. Atin béleewe ni, fatut munur gom bé kébéréh i Tuluse sani mémukase begom bé de sala gom.

<sup>22</sup> Mélaw odoro kom i kébéréh i Tuluse. Buluk fégélingoé kom saén i kébéréh i Tuluse éndob énda rignoné kom de, fagakara kom saén i kagome lowoh. <sup>23</sup> I étéwe mégélingo saén bé kébéréh i Tuluse éndob énda odoro no de, ségiléw bé étéwe téméngténg dob féngalungone, atin gito noy falas ne. <sup>24</sup> Endob amuk énggilid gito noy falas ne atin magéw, atin tékédan, sonom so béno mélifot bé falas ne. <sup>25</sup> Endob i étéwe toow fo féganadé no brab odoro noy kébéréh i Tuluse, békén saén fégélingoé no brab magad gélifoto no, gédoté noy de kéfiyonon tidéw dob Tuluse bé kéluhanay de rignoné no. Atin i kébéréh i Tuluse, been i niy tintuwe kukuman énda i kulang de, mémukas bé de étéw dob de sala ro.

<sup>26</sup> Amuk émbéréh i ségétéwe étéw méngintulus kun, éndob énda fo démilaén tuko ké émbéréh, énda i atag i kéféngintulus ne, atin tugio noy kaane so lowoh. <sup>27</sup> Dob karang i Tuluse, i toowe méngintulus do étéw, tabangé roy de kérégénan libun do baléw, brab tabangé roy de kérégénan nga énda i do lukés ro. Atin i de étéw do tintu fo

méngintulus énda odoro roy de éntingayén do tete dob duniyae ni, inok énda waléy ro tete.

## 2

<sup>1</sup> Do dumo gu munur, séménarig gomén bé Jesu Kristowe barakatan Kadna tom. Mélaw énda fatuténi ké wén i isu ramigo kom. <sup>2</sup> Ufama, amuk sélimud gom méngadaf bé Tuluse atin wén i ruwo gétéw étéw gégumah. I ségétéwe de fiyoy kégal ne brab téménising bélowon. Atin i ségétéwe de méskinan brab ménkusi i kégal ne. <sup>3</sup> Atin amuk toow fo fégadata kom saén i kawasawe de brab féésaré kom dob toowe fo fiyo ésaan, brab énda féésaré kom i méskinan de taloo no féésaré kom saén dob suduwe, énda fo fiyoy adat gome. <sup>4</sup> Amuk rénigo gom i ni, ménsala gom bé kéramig gome, atin tidéw dob de tete kéfégitung gom i de ni kékukum gom.

<sup>5</sup> Fégléngom gom do gulaané ku do dumo gu. Fénémili i Tulusey étéwe méskinan inok waléy ro maak kawasa sabaf bé kéunur ruwe. Non i kéunur ruwe, been i kékawasa ruwe. Atin waléy ro so do kaan étéw fégluléwo no. Fégluléwo no bero non been i niy fasad i Tuluse dob kéluhanay méimue bé Tuluse. <sup>6</sup> Endob i begome, siyawé kom i de méskinan. Ati de étéw do énda mégédaw ro begom brab fégésé ro begom uwitén mangéy sékukum dob de kéféédawan? Békén i de méskinan, yamula i de kawasa. <sup>7</sup> Been soy de niy de étéw béréhé roy teteé fantag bé fiyowe dawéé Jesuse sani gefee betom.

<sup>8</sup> Wén i toowe fo gérotor sugu gébasana tom dob Ménsulate Kéberéh i Tuluse mano, “Féimu go bé dumo muwe loo so bé kéféimu me bé kaame lowoh.” Amuk unuro kom, gérigono kom i fatute. <sup>9</sup> Endob amuk wén i isu ramigo kom atin basana kom saén i de étéw bé de fiyo kégal ro, taloo no bé kédooy de kurta ro, ménsala gom. Non fénlis gom i kukumane niray Moisesé. <sup>10</sup> Atin amuk énda odoro kom i sébaane sugu dob kukumane, maak énda so nodoro kom i kéluhanay de kukuman. <sup>11</sup> Ufama, békén saén bénréh i Tuluse mano, “Kagom sétayan bé ségiyowe saliyo bé bawag gome.” Bénréhén so mano, “Kagom méméléhu.” Mélaw fiyon fo ké énda dufangé kom i bawag gome, éndob ménméléhu gom étéw, énda so nunuro kom i kukumay Tuluse. <sup>12</sup> Ingata kom i de rigoné kom brab de béréhé kom, non i Tuluse kukumé no begom bé kukuma nuwe fégefukas bé de étéw dob de sala ro. <sup>13</sup> Non énda méuray i nay Tuluse bé de étéw énda méuray i na ruwe bé de dumo ro. Endob i de étéw méuray i na ruwe bé de dumo ro, éndaén kailanga roy mégilake bé kékukum i Tuluse.

<sup>14</sup> Do dumo gu munur bé Jesuse énda i lantékén ké émbéréh i ségétéwe étéw mano, “Munuru,” éndob énda giton i kéunur ne dob de rigoné no. Enda toow i kéunur ne, mélaw énda séna mékédan i de salaén. <sup>15</sup> Ufama, amuk wén i ségétéw munur, brab éngumah i de dumo no munur dob beene. Atin toow ro fo méskinan, kulang i de kégal ro brab énda i amaé ro. <sup>16</sup> Amuk béréhé no saén dob berowe mano, “Fiyo damén i de féédéw gom. Brab gégédot gom damén do kégal gom brab amaé kom,” éndob énda fo niraya no bero tabang, énda i lanték i de kéberéhén. <sup>17</sup> Ségiléw bé nan i étéwe béréhé no munur kun bé Jesuse, éndob énda fiyoy rigoné nuwe. Mélaw giton i énda toow i kéunur ne.

<sup>18</sup> Amuk wén i émbéréh mano, “Fakay méfukas i étéwe sabaf bé kéunur ne. Atin fakay so méfukas i étéwe sabaf bé de fiyo rigoné no.” Endob ay niy késumbulo kuwe de. Enda fakay méfukas i étéwe ké munur saén bé Jesuse atin énda fo fiyoy rigoné nuwe. Non i begéne, fégitto guy kéunur guwe dob fiyowe rigoné ku. <sup>19</sup> Amuk wén i étéw munur bé sébaan saén i Tuluse, fiyo, éndob kulang i nan kéunur. Non fiyon i de saitan, munur ro so loo bé nan, atin lé mukub ro bé kégilak ruwe de. <sup>20</sup> Toow fo dufang i étéwe loo bé nan, mégitung kailangan saén i munure. Toroé ku begom bé énda foylanték i kéunur i étéwe ké énda so giton i de fiyo rigoné no. <sup>21</sup> I katufua tome Abraham, ati funa nuwe ménwaléy métintu dob adafay Tuluse? Ménwaléy métintu dob adafay Tuluse sabaf bé rénigo nuwe, amun ménodor bé sugu i Tuluse tulaké no damén i nga ne Isak dob ahayane féngadafan. <sup>22</sup> Mélaw gésobuto tom énggéodor bé sugu i Tuluse sabaf bé kéunur ne. Mélaw fénggito no toow i kéunur ne bé rénigo nuwe. <sup>23</sup> Mélaw gétiga tom toow i Ménsulate Kéberéh i Tuluse mano, “I Abrahame ménunur bé Tuluse. Atin i Tuluse kénarangén i Abrahame métintu sabaf bé kéunur ne.” Mélaw i Abrahame féndawétén “Dumoy Tuluse”. <sup>24</sup> Mélaw gétiga tom, i étéwe waléy métintu dob adafay Tuluse sabaf so bé de rigoné no, békén saén sabaf bé kéunur ne.

<sup>25</sup> Ségiléw so bé niy libune sundal féndawét Rahab. Non ménwaléy métintu dob adafay Tuluse sabaf bé fiyowe rénigo no. Non tényakufén i de Judio do sénuwu, tidéw béno ténbanga no bero inok géféraréy ro mangéy bé ségiyowe aguwon.

<sup>26</sup> I lowohe, amuk éndaén bati diyo i rémogor ne, ménléhu i nan lowoh. Ségiléw so bé ni, i kéunur i étéwe énda gitono dob de fiyo rigoné no, maak ménléhu i kéunur ne non békén toow.

## 3

<sup>1</sup> Do dumo gu, fiyo ké énda médoos gom waléy témoro. Non i begeye do témoro, toow na fo méégét i kéfénginsaay Tuluse begey dob gaiwe kémukum moso. <sup>2</sup> I kéluhana tome do kéilawan, énda démoyun katabuwan i de rignoné tom. Amuk wén i étéw gébéreh katabuwan sénga tékelid, énda i gétebo de. Fakay géféguléwo noy lowoh ne non falan fiyoy de kébérehén. <sup>3</sup> Ufama, i gefee bé kuae, amuk rigo no kakang i ba i kua ne, gébalengo no fiyon udenén féayo no de. <sup>4</sup> Loo so bé niy dakéle barko féagéwéy émbagére réfuruf. I suwil i barkowe toow fo kloh, éndob been i niy usaréy kafitane bé barkowe fégefánangguwitén de dob kétaya nuwe ayo no. <sup>5</sup> Atin ségiléw so bé niy dilae. Non fiyon fo ké toow fo kloh, géusaran fégeféabantug-bantug.

Ufama, i bukae talun métuwég bé klohe saén aféy ké mélégéb. <sup>6</sup> Atin i dilae, mésut i médoowe gékélassi do tete, funay de itunga tom brab de fédéw tom waléy so tete. I dila i étéwe gétuwégo noy fédéw ne, non i aféy i dilae tidéw dob uleone emferno. <sup>7</sup> I kéilawane, géféguléwo noy kéluhanay de binatang, do kloh manok, do sédo, brab do ulé. Non gélayamay kéilawaney de ni. <sup>8</sup> Endob énda i étéw gélayama noy dila ne. I de dila tom toow fo gérigono roy tete brab énda méféguléwo no. Ségiléw bé bisawé non mékébinasa. <sup>9</sup> Usaré tom fégefésalamat dob Kadna tome brab dob Abaye Tulus. Endob usaré tom so fégefémula bé de dumo tom étéw, sani de lénimbag miring bé Tuluse. <sup>10</sup> I fiyowe kéfésalamat brab i tete kéfémula, ségiléw ro tidéw dob ba i étéwe. Do dumo gu, énda fatut mérigoy ni. <sup>11</sup> Enda i fiyo wayég brab féla wayég ké sébaan saén i séfute ésuto ro. <sup>12</sup> Atin do dumo gu, i sébaane kayéw énda géfégonokén saliyo saén bé kaane onok. Enda géfégonokén ruwo gékélassi onok, i sébaane de fiyo brab i sébaane de tete. Atin i séfute miray bé métimuse wayég énda géirayén bé fiyowe wayég énda métimusén.

<sup>13</sup> Amuk wén i ségétéw begom toow fo gétigan brab daké i kégésobut ne fatut fégito no dob de fiyo rignoné no ula-ula. Atin fatut térifantad bé lala ne rémigo fiyo inok féténgténgén i kégétiga nuwe. <sup>14</sup> Endob amuk médaléw, taloo no méitung énda fatutén félangka-langka taloo no béréhé noy tugie fantag bé toowe kétoro. <sup>15</sup> I kégétigane loo bé nan békén tidéw dob lawayo. Yamula tidéw saén dob duniyae ni. Békén tidéw dob Rémogor i Tuluse, yamula tidéw dob Satanase. <sup>16</sup> Non i étéwe médaléw brab méitung rignoné no soy médoowe gékélassi do tete brab fébuké noy de étéw. <sup>17</sup> Endob i étéwe wén i kégétiga no tidéw dob Tuluse, toow fo fiyo adat ne. Atin miika sétiboh.

Brab mégédaw bé de dumo no, énda kérito no bero. Tintu fo méuray i na nuwe bé de dumo no brab rignoné noy fiyowe dob berowe. Atin énda i isu ramigo no bé de étéw brab énda ubo-ubo saén i de rignoné no. <sup>18</sup> I étéwe kédané noy késétihohe, uwité noy de fiyo rignonén.

#### 4

<sup>1</sup> Ati tidéwoy de késétiboh gom brab de késéédél gom? Tidéw dob de tete kétaya kom démoyun sétiboh bé de fiyo kétaya kom dob de fédéw gom. <sup>2</sup> Wén i do kétaya kom, éndob énda gédoté kom de. Mélaw méuyot gom mémélehu. Wén i do kéingara kom, éndob énda gédoté kom de. Mélaw méuyot gom séédél brab sétiboh. Atin i funa kome énda gégédot bé de kétaya kom, non énda ongoté kom de dob Tuluse. <sup>3</sup> Atin amuk mongot gom, énda gédoté kom de, non tete i funa kom de mongot. Non ménongot gom inok gédoté kom i de éntingayén fégérigo gom bé de tete kétaya kom. <sup>4</sup> Ségiléw gom bé ségétéwe libun wén i ségiyo tayané no saliyo bé bawag ne. Aw énda fo gésoboto kom de ké amuk séloyuk gom bé de tete éntingayén dob duniyae ni, sébanil gom bé Tuluse? Non i étéwe méuyot rémigo tete, waléy sébanil bé Tuluse. <sup>5</sup> Kagom fégitungén de ké énda i lanték i Ménsulate Kébéréh i Tuluse mano, "I Rémogor i Tuluse bati dob betome toow fo médaléw." Mélaw miika de fo ké wén i ségiyo kétaya tom saliyo bé Tuluse. <sup>6</sup> Endob toow fo mégédaw i Tuluse betom. Non wén soy Ménsulate Kébéréhén mano, "I Tuluse sébanil bé de étéw félangka-langka, éndob mégédaw bé de étéw térifantad."

<sup>7</sup> Mélaw odor gom bé kétayay Tuluse. Atin atuh kom i Satanase, atin mélaw méraréy tidéw dob begome. <sup>8</sup> Fégedét gom dob Tuluse, atin i Tuluse fégedét so dob begome. I de begom do ménsala do étéw, tagak gom i de tete adat gom. I de begom do ubo-ubo saén do munur, félinis gom i de fédéw gom inok waléy gom tintu fo munur. <sup>9</sup> Fatut tete i de fédéw gom brab kérow gom non bé de tete adat gom. Térén gom oror, fatut gom émbuku. <sup>10</sup> Fatut térifantad gom dob adafay Tuluse, atin fégérotoré no begom.

<sup>11</sup> Do dumo gu munur bé Jesuse, kagom sédowoy. I étéwe dowoyé noy dumo nuwe brab kukumé noy dumo nuwe, maak dowoyé no brab kukumé no soy kitabe. Atin amuk kukumé noy kitabe, maak téfégérotor bé Tuluse, atin mélaw éndaén modorén bé kitabe. <sup>12</sup> Endob Tulus saén i miraye bé kitabe brab Been saén i kémukume. Been saén i gébinasawe bé étéwe brab Been soy gétabange de inok énda mébinasa no. Endob i betome, énda i kuwagib tom kémukum bé de dumo tom, non kéilawan tom saén.

<sup>13</sup> Fégélingo gom begén, sani de begom do émbéréh makom, “Béleewe ni taloo no démo mangéy gey dob sébaane ingéd. Atin diyo bati gey ségébélintuwa inok émfébéley gey brab gégédot gey médoó kurta.” <sup>14</sup> Kagom émbéréh loo bé nan. Non énda gétiga kom i mérigowe dob begome bé démoé. Non i de kéilawan, ségiléw saén bé ménifise rawén giton brab magad méalfa. <sup>15</sup> Ay niy fatute béréhé kom, “Amuk kétayay Kadnane, taus tom méuyag brab rigoné tom i ni taloo no rigoné tom i nan.” <sup>16</sup> Endob béleewe ni, félangka-langka gom brab fébantug-bantug gom. Enda fiyoy nan.

<sup>17</sup> Amuk wén i étéw gétiga noy fatute rigoné no, éndob énda rigoné no de, ménsala.

## 5

### *Fantang bé de kawasa*

<sup>1</sup> I begome do kawasa étéw, fégélingo gom begén. Fatut kérew gom brab ruung gom sabaf bé de kérasay gom gégumah moso. <sup>2</sup> Non i de balilaga do tamuk gom waléy do méréneh. Brab i de médoó do kégal gom amaéy de ifés. <sup>3</sup> Atin i de bélowon brab do filak do nitong gom, waléy do tangisén. Brab i kétangisé ruwe fégéto roy énda nusar gom i de kurta gom fégétabang bé de méskinan. Mélaw toow fo gétimal i kékukume begom. Non nitong gom i de médoó kurta gom taman dob tamfaday de gai. <sup>4</sup> Enda bénayada kom i de géménalbék dob fantad gome. Atin i de kurta énda fénggébayad gom de, been i de niy usaréne fégétebo begom dob adafay Tuluse. Atin i de kétébo i de étéw géménalbék dob fantad gome, énggélinooy toowe fo barakatan Kadnan Tulus. <sup>5</sup> Toow gom fo kawasa brab fiyoy goho kome dob duniyae ni. Endob ségiléw gom bé de ayam do fénbobo inok sumbalién. Atin i begome fénbobo gom i lowoh gome. <sup>6</sup> Non kénukum gom brab fénléhu gom i de métintu do étéw énda natuho ro begom.

<sup>7</sup> Endob i begome do dumo gu, tingkél gom taman dob gaiwe séfule i Kadnane. Iring gom bé mohoke toow fo témingkél ongot-ongot bé gaiwe rémana inok témunoh i nohok ne atin gékétéwo no. <sup>8</sup> Ségiléw so bé begome non fatut tingkél gom. Fatut féégét gom i késarig gome non gédétén i gaiwe séfule i Kadnane.

<sup>9</sup> Do dumo gu, kagom séséndit, inok énda kukuméy Tuluse begom. Enda mérayu i kémukume, éndaén mérugay i kégumah ne.

<sup>10</sup> Do dumo gu, iring gom i de sénarigoy Kadnane muret bé kébéreh ne bé do gétaéh, non toow ro fo témingkél démayday munur fiyon fo ké fénrasy ro. <sup>11</sup> Kénarang tom bero do toow fo moror non énggétinkél ro dob de gai do mérégén. Atin gétiga kom i fantage bé ségétéwe étéw féndawét Job bé do gétaéh.

Toow fo témingkél démayday munur fiyon fo ké toow fo ménrasay. Atin gétiga kom soy toowe fo kénéfiyoy Kadnane de amun énggilid ménrasay. Non i Kadnane toow de fo mégédaw brab méuray i na nuwe de.

<sup>12</sup> Atin do dumo gu, ay niy toowe fo balilaga sugu gu begom. Amuk rémigo gom fasad, kagom sémafa. Kagom béréhén de makom, “Gitoy lawayo” taloo no “Gitoy fantade”, taloo no udenén béréhé kom fégsafa gom. Sugatén i kébéreh gome, “Hoo” taloo no “Enda”, inok énda kukuméy Tuluse begom sabaf bé ni kébéreh gom.

<sup>13</sup> Amuk wén i ségétéw émbuku begom, fatut démasal. Amuk wén i ségétéw moror begom, fatut kémanta dayéwé noy Tuluse. <sup>14</sup> Amuk wén i ségétéw démérüun begom, fatut féta wagén i de odoroy de munur dob gono kome, inok dasala ro brab lula ro nor bé lala ruwe mongot dob Kadnane. <sup>15</sup> Non amuk tintu ro fo munur, i Kadnane féadi-adiné noy démérüune ni sabaf bé kédasal ruwe. Atin fé sagaday Kadnaney de salaén. <sup>16</sup> Mélaw, fatut séfayag gom i de sala gom, brab sédasal gom dob Tuluse, inok adi-adi gom. Non toow fo barakatan i kédasal i métintuwe étéw. <sup>17</sup> I Eliase bé do gétaéh, kéilawan so ségiléw bé betome. Atin amun ménbagér i kédasal ne mongot ké énda férana i Tuluse de, énda i rana bé méntéléwe gébélintuwa brab ném gétérésang kélungonon. <sup>18</sup> Tidéw béno, amun déménasal man mongot rana, férnana i Tuluse brab i de nohok téménunoh ro dob fantade.

<sup>19</sup> Do dumo gu, amuk wén i ségétéw begom ténagakén i toowe kétoro, atin wén i ménféfule de, <sup>20</sup> ay niy fatute fégétédémé kom: I étéwe énggébalengo noy fédéw i étéwe ménsala inok tagaké noy tetee aguwo no, toow fo ténabanga no inok énda mékukumén méléhu. Yamula fé sagaday Tulusey de médoó do salaén.

*Santiago*



## I Sunguwe Sulat Pedrowe

Ay niy sunguwe bé de sénulat Pedro, sani ségétéwe bé de kuyug Jesus brab dumo no amun dini séna dob duniyae niy Jesuse. Sénulat Pedrowey ni sulat dob kéluhanay de munur bé Jesuse.

Amun sénulat Pedrowey ni, ménrasay i de munur sabaf bé kéunur ruwe. Mélaw sénulat Pedrowey ni émfébagér bé de fédéw ro. Ténoroén bero bé barasay Tuluse bero dob lawayo amuk énda témérén ro munur. Mélaw ulanden ké mérasay ro dob duniyae ni.

<sup>1</sup> Begéney Pedrowe, sani séménulate bé ni. Begéney ségétéwe apostol Jesu Kristowe. Sémulatu mangéy dob de begom do fénéмили i Tuluse, sani de begom do ménbéragar dob de ingéd Ponto, Galasia, Kapadosia, Asia, brab Bitinia. Maak do iloh-iloh gom dob duniyae ni non i tintuwe ingéd gom diyo dob lawayo. <sup>2</sup> Fénéмили i Abaye Tulus begom sabaf bé kaane kétayan. Atin i Rémogor i Tuluse fénwaléyén begom do métintu inok modor gom bé de kétoro Jesu Kristo brab méfésagad gom sabaf bé kéléhu ne. Non maak ménfirikon gom bé dara ne funa kom mélinis.

Mégédaw i Tuluse damén begom brab irayén damén begom i métanéke fédéw.

<sup>3</sup> Fatut fésalamat tom bé Tuluse sani Tuluse brab Abay i Kadna tome Jesu Kristo. Non sabaf bé kégédaw ne betom, nirayén betom i mantuwe umul bé kétébule ne bé Jesu Kristowe. Mélaw wén soy inam tom tébule inok méuyag tom taman sa taman. <sup>4</sup> Atin ongot-ongoté tom mélaw i kégégédot tom bé de kéfilyonon nitong i Tuluse betom dob lawayo énda mékédano taman sa taman, taloo no mébinasa taloo no mérénég. <sup>5</sup> Non bé kéunur tome, diyaganéy barakatane Tulus betom inok géfégilido noy kéfukas ne betom moso dob géfuray gai.

<sup>6</sup> Mélaw fatut moror gom de, non fiyon fo ké tete i de fédéw gom singkow saén sabaf bé de kérasay gom, <sup>7</sup> kailanga kom soy mérasaye béleewe ni inok métukawan i kébagér i kéunur gome dob de ni do gai. Ufama, i kéunur gome ségiléw bé bélowone. Non i bélowone métukawan dob aféye inok giton ké tintu fo bélowon taloo no békén. Ségiléw so bé niy kéunur gome. Non i kéunur gome métukawan bé de mérégén géagéwon inok giton ké tintu gom fo munur taloo no énda. Atin toow na fo balilaga i kéunur gome bé de bélowon non do mébinasa ro. Atin amuk tintu gom fo munur, médayéw gom de, brab mébantug gom de, brab mébasanan gom de moso bé gaiwe séfule i Jesu Kristowe. <sup>8</sup> Fiyon fo ké énda énggito gom i Jesuse, féimu gom de. Atin

fiyon fo ké énda gito gom de béleewe ni, unur gom de. Atin sabaf bé ni, moror gom fo toow atin énda i fiyo kébéréh de émfégétigan bé kédakél i kéoror gome de. <sup>9</sup> I funa kome toow de fo moror loo bé ni non kédanéy Tulusey de sala gom inok gédoté kom i umule magufusa sani ongot-ongoté kome sabaf bé kéunur gome.

<sup>10</sup> I de sénarigoy Tuluse muret bé kébéréh ne bé do géta, féngganad ro fo toow i kéfukas i Tuluse bé étéwe. Atin nuret ro mélaw i fantage bé ni iray i Tuluse begom. <sup>11</sup> Toow fo féngganad ro ké ati kédiron i gaiwe mérigoy ni kéfukas i Tuluse brab ati kétuma nuwe de. Non fénémanduoy Rémogor Kristowe bero brab fénggétiga no bero bé férasayén i Kristowe, atin tidéw béno médayéw i Kristowe fo toow. <sup>12</sup> Atin i kéuret i de ni do sénarigoy Tuluse muret bé kébéréh ne, fénggésobutén bero bé i funa ruwe muret inok métabangan gom, békén bero. Non i kéuret ruwe fantag bé Kristowe, been i ni énggélíngoo komén béleewe ni tidéw dob de témoro bé Fiyowe Uret. Atin i Rémogor i Tuluse, sani sénugue tidéw dob lawayo, fénémanduo noy de ni témoro. Atin fiyon foy de télaki, méuyot ro de ké gésobuto roy ni kéuret ro.

<sup>13</sup> Mélaw fatut fébagéré tom i kéfégitung tome atin féfilyoné tom i kéfégitung tome. Atin fatut ongot-ongoté tom i de kéfilyonon gédoté tom dob gaiwe séfule i Jesu Kristowe. <sup>14</sup> Atin non betom i de nga i Tuluse, fatut odoro tom i de suguén. Atin fatut so diguré tom i de tete adat tom loo bé de rénigo tom bé do géta amun énda séna gétiga tom i toowe kétoro. <sup>15</sup> Bé kéluhanay de rigoné tom fatut métintu tom, miring bé kétintuy Tuluse sani ménémilie betom. <sup>16</sup> Non wén i Ménsulate Kébéréh i Tuluse mano, “Fatut toow fo métintu gom non toowu fo métintu.”

<sup>17</sup> Atin amuk démasal tom dob Tuluse, tawagé tom “Abay tom”, mélaw fatut basana tom fo toow i Tuluse bé lala tome méuyag dob duniyae ni. Non Beeney kémukume bé kéluhanay étéwe sabaf bé de rigoné ro, non énda i isu ramigoy Tuluse. <sup>18</sup> Gétiga kom ké atiy fénggébayade niray i Tuluse inok kédané noy de tete adat gom énggédot gom tidéw dob de katufua kom. Non i fénggéfukas ne betom énda loo no bé de bélowon taloo no do filak do fakay mébinasa. <sup>19</sup> Yamula Kristoy fénggéfukas ne betom. Beeney maake toow fo fiyo nati bili-bili fénléhu ténulak inok mékédan i de sala tom. Toow fo balilaga i ni kétulak. <sup>20</sup> Amun énda séna lénimbag i Tulusey duniyae ni, fénémilien i Kristowe inok mérigoy ni. Atin dob de ni énggéfuray do gai ménangéy i Kristowe dini inok fukasé no betom dob de sala tom. <sup>21</sup> Atin sabaf bé Kristowe, ménwaléy tom do munur bé Tuluse, sani téménébulee bé Kristowe brab ménfédayéwe de so. Atin mélaw Tulusey

sarigo tome brab wén i inam tom bé kétébule i Tuluse betom moso.

<sup>22</sup> Atin sabaf bé kéunur tome bé toowe kétoro, ménwaléy tom malinis dob adafay Tuluse atin ménwaléy tom tintu mégédaw bé de dumo tom munur bé Kristowe. Gido loo, fatut fo féégété tom i késégédaw tome. <sup>23</sup> Non ménumah tom man ségule inok waléy tom do nga i Tuluse sabaf bé kébéréh ne. I ni kébéréh i Tuluse énda mékédan no taman sa taman brab miray umul magufusa. <sup>24</sup> Non wén i Ménsulate Kébéréh i Tuluse mano, “I kéluhanay de kélawan ségiléw ro bé de kéroon, non méuyag ro singkow saén. I kéfiyoy de kélawan magad mékédan ségiléw bé de ulak i de kéroon magad mélaay brab mélawu. <sup>25</sup> Endob i kébéréh i Kadnane, énda mékédan no taman sa taman.” Atin i kébéréh i Kadnane, been i niy Fiyowe Uret nuretén dob begome.

## 2

<sup>1</sup> Mélaw non ménumah tom man ségule, fatut tagaké tom i kéluhanay de tete rigoné tom. Katom témuji taloo no ubo-ubo saén i kéféngintulus tome, taloo no médaléw, taloo no féngirasé tom i de étéw. <sup>2</sup> Fatut iringé tom i de kloh nga do témutu séna, non betom i de étéw do ménumah man ségule. Fatut méuyot tom mégélingo bé fiyowe kébéréh i Tuluse ségiléw bé klohe nga térumén témutu. Amuk rigoné tom i ni, i kéunur tome waléy dakél ségiléw bé kééruk i klohe nga taman waléy tom do gétuwan bé kéunur tome. <sup>3</sup> Non énggédot tom i kégédaw i Tuluse betom.

<sup>4</sup> Odor gom bé Kadnane Jesus sani méuyage taman sa taman. I Jesuse ségiléw bé batéwe nikaay de rémigo lawi. Endob fiyon fo ké ménika i de étéw de, fénémili i Tuluse fénggérigo no bé lawi ne non kénarang i Tuluse toow fo balilaga. <sup>5</sup> Atin i betome, méuyag tom so taman sa taman. Fatut modor tom bé Kristowe inok waléy tom so maak do batéw usaréy Tuluse fégérigo no bé maake lawiэн féngadafay de étéw de. Atin dob lawi ne ni, maak rigoné tom i galbék i fadi i Tuluse miray do tulak tayakuféy Tuluse. Atin i tulake iray tom, been i niy kéféngintulus tome. Atin i Jesu Kristowe, tabanga no betom méngintulus loo bé ni. <sup>6</sup> Non wén i Ménsulate Kébéréh i Tuluse mano, “Ménémiliu ségétéw waléy méguléw ségiléw bé toowe fo balilaga batéw. Non maak rémigowu lawi dob ingéde Sion, atin Beeney maake toow fo fiyo balilaga batéw fégérigo gu bé ni lawi. Atin i kéluhanay de munur dob Beene, énda gésénule ro bé késarig ruwe de.” <sup>7</sup> I ni méguléw, sani ni maak batéw, toow fo gulaané tom do munur ro de. Endob wén soy de étéw énda munur ro de. Atin énggétumana roy ni Ménsulat Kébéréh i Tuluse mano, “I batéwe nikaay de

rémigo lawi, ménwaléy na fo toow balilaga.” <sup>8</sup> Atin wén soy ni Ménsulat Kébéréh i Tuluse mano, “Been i niy batéwe émfébangkud bé de étéw inok mélawu ro.” Atin i atag i ni, énggébangkud ro non énda ménunur ro bé kébéréh i Tuluse, non been i niy bénantak i Tuluse mérijo.

<sup>9</sup> Endob i de betom, betom i de étéw fénémili i Tuluse. Betomey de fadi i Datue Kristo. Betomey de étéw i Tuluse. Been i méguléwe betom. Betomey de étéw fénémili i Tuluse inok muret tom fantag bé de fiyo rigonéy Tuluse. Sénéngkat i Tuluse betom tidéw dob délémane mangéy dob kaane géfékaya toow fo fiyo. <sup>10</sup> Non bé do géta, békén tom do étéw i Tuluse, éndob béleewe ni ménwaléy tom do étéwén. Bé do géta, énda gétiga tom i fantage bé kégédaw i Tuluse, éndob béleewe ni énggédot tom fo toow i gédaw ne.

<sup>11</sup> Do gulaané ku do dumo gu, i duniyae ni békén tintu ingéd tom. Maak do iloh-iloh tom saén dini. Mélaw ongoté ku dob begome, kagom modor bé de tete kétayay de lowoh gom. I de ni do tete kétayay de lowoh tom maak sétiboh bé de rémogor tom méuyot modor dob Tuluse. <sup>12</sup> Fatut toow fo métintuy de adat gom inok fiyon i de békén méngintulus do étéw gito ro. Atin amuk téboé ro begom, i toowe, gétiga ro toow fo métintuy de adat gom. Atin mélaw gédayéwo roy Tuluse dob gaiy kégumah ne dini.

<sup>13</sup> Fatut odoro tom i de sugu i de gémamak kukuman fiyon i toowe fo gérotor méguléw. Fatut rigoné tom i ni non been i niy kétayay Kadnane. <sup>14</sup> Fatut so odoro tom i de sugu i de gubernador. Non i toowe fo gérotor méguléw i sémgugue bero inok kukumé roy de rémigo tete atin inok dayéwé roy de rémigo fiyo. <sup>15</sup> Non méuyot i Tuluse de ké féantésén i de dufang do étéw témo betom, sani de émbéréh énda i lantékén. Non amuk gito roy de métintu rigoné tom, témérén ro démowoy betom. <sup>16</sup> Ménfukas tom dob kéodore bé kitabe tidéw dob Moises. Mélaw fakay gérigono tom i kétaya tome. Gido loo, katom usarén i kéfukas tome fégéséliyah tom rémigo tete. Yamula fatut odoro tom i kétayay Tuluse non betom i de sugu-sugué no. <sup>17</sup> Atin fatut fégadata tom i kéluhanay étéwe. Atin fatut mégédaw tom bé kéluhanay de dumo tom munur bé Jesuse. Fatut féngadafé tom i Tuluse. Atin fatut fégadata tom soy toowe fo méguléw.

<sup>18</sup> I begome do sugu-suguén, fatut odoro kom i de sugu i de amu gom, atin fatut fo fégadata kom bero toow. Atin békén saén dob de fiyo amu gom mégédaw begom. Yamula fégadata kom i kéluhanay de amu gom, fiyon fo ké dusa ro. <sup>19</sup> Non féfiyonéy Tulusey kéluhanay de étéw témingkél bé kédusawe bero fiyon fo ké énda i réniyo ro tete, amuk

témíngkél ro sabaf bé késarig ruwe bé Tuluse.  
<sup>20</sup> Endob amuk rémigo gom tete, fiyon fo ké tingkélo kom i de amu gom ké dusané ro begom sabaf bé kériigo gome tete, énda so médait gom gégédot bé barase. Endob amuk fédayaé kom bero ké dusané ro begom fiyon fo ké énda i rénigo gom tete, féfiyonéy Tuluse begom. <sup>21</sup> I Kristowe féndayaén soy kédusay de étéw de inok kédané noy de sala tom. Atin fatut iringé tom. Non i funay Tuluse ménféunur betom inok iringé tom i Kristowe. <sup>22</sup> Non énda i sala rénigo Kristowe, atin énda soy sébaan tugi bérhéén. <sup>23</sup> Atin amun féngiras i de étéw i Kristowe, énda séménulién méngiras. Amun fénrasay ro, énda fénémulaén bero. Yamula sénarigén saén dob Tuluse, sani métintuwe kémukum. <sup>24</sup> Ménkukum i Kristowe dob kruise noboén i de sala tom, inok tagaké tom i de tete rigoné tom atin inok gériigo tom métintu. Mélaw ménwaléy tom métintu sabaf bé kékukume bé Kristowe. <sup>25</sup> Bé do géta, ségiléw tom bé de méntadin do bili-bili. Atin i Kadnane Jesus, ségiléw bé témalimae bé de bili-bili. Maak sénlédén betom atin amun énggito no betom, nuwitén betom mule mangéy dob Beene, sani magifate betom.

### 3

<sup>1</sup> Atin i de begom so do libun do bawagan, fatut odoro kom i de sugu i de bawag gom inok amuk wén sénay do énda munur bero bé kébéréh i Tuluse, waléy ro géunur sabaf bé fiyowe adat gom. Enda kailanga kom ureton bero, <sup>2</sup> non gito roy fiyowe adat gom brab kéféngintulus gome funa ro waléy munur. <sup>3</sup> Atin kagom saén féfiyonén i de falas gom loo bé de kéféfiyo gom bé de buk gom, taloo no de ono gom, taloo no de kégal gom. <sup>4</sup> Yamula fatut féfiyo gom i de kébéréh gom brab de rigoné kom inok métanék i de adat gom. Been i niy funay Tuluse méswat begom. Atin énda méréngé i métintuwe adat loo bé kéréngé i fiyowe falas. <sup>5</sup> I de énggétah do fiyo libun séménarig ro dob Tuluse, féfiyo roy de lowoh ro bé kéodor ruwe bé de sugu i de bawag ro. <sup>6</sup> Loo bé Sarahe, nodoro noy de sugu i bawag ne Abraham brab féndawétén “Amu”. Atin i de begom do libun béleewe ni, maak begom i de nga Sarah amuk iringé kom i de fiyo rénigo no brab énda mégilakén bé de udenén éntingayén.

<sup>7</sup> Loo so bé begome do lagéy do bawagan, fatut talima gom i de bawag gom bé lala gome sétifon bero dob duniyae ni. Non gétiga kom i de karo lowoh toow na fo mélubay bé de katom de. Gido loo, ségiléw so bé betome, non nirayay Tuluse so bero bé umule magufusa. Mélaw fatut basana kom bero inok fégélingoéy Tulusey de kédasal gom.

<sup>8</sup> Mélaw ay niy géfuraye béréhé ku begom. Fatut féwaléy gom sébaan i de itunga kom brab fésetima kom i de fédéw gom. Fatut ségédaw gom non maak do sétuwaréy gom. Atin fatut séuray gom na brab térifantad gom. <sup>9</sup> Atin amuk wén i réménigo tete dob begome, kagom sémuli rémigo tete dob berowe. Amuk wén i ménémula begom, kagom sémuli mémula. Yamula ongot gom dob Tuluse féfiyoné no bero. Non amun fénunurén begom, fénasad i Tuluse féfiyoné no begom. <sup>10</sup> Non wén i Ménsulate Kébéréh i Tuluse mano, “I de étéw méuyot ro ké fiyo de goho ro brab méuyot ro moror, fatut béréhé ro saén i fiyowe atin témérén ro témugi. <sup>11</sup> Fatut tagaké roy de tete do adat ro atin méganay ro rémigo bé fiyowe. Atin fatut rigoné roy kéluhanay gagané ruwe inok énda mékérít i de étéw de. <sup>12</sup> Non bantayay Kadnane de métintu do étéw atin fégélingoé noy de kédasal ro. Endob diguré noy de rémigo tete.”

<sup>13</sup> Amuk mégéror gom rémigo bé fiyowe, énda i gésug-sug begom. <sup>14</sup> Gido loo, amuk mérasay gom sabaf bé kéténtuy de adat gom, fatut moror gom de. Kagom mégilak bé de kéilawan saén. Atin kagom émbuku. <sup>15</sup> Yamula, féngadaf gom i Kristowe dob de fédéw gom, atin unur gom Beeney Kadnane. Atin fatut démoyon gom témafay sénga tékélid inok amuk wén i ménginsaan begom fantag bé késarig gome bé Tuluse, gétiga kom i késumbulo kome bero. <sup>16</sup> Endob amuk sémumbul gom, fatut félanat gom i kébéréh gome atin basana kom i de étéw mégélingo. Atin sabaf bé begom i de kuyug Kristo, fatut fétintu gom i de adat gom inok énda waléy tete i de fédéw gom. Fatut rigo gom i ni inok amuk wén i émbéréh tete fantag bé begome, mémala ro mélaw. <sup>17</sup> Amuk kétayay Tuluse ké mérasay gom sabaf bé de fiyo rigoné kom, fakay so. Békén saén mérasay gom sabaf bé de tete rigoné kom. <sup>18</sup> Non i Kristowe ménléhu inok fukasé no betom. Ménléhu ségule saén inok mékédan i de sala tom. Métintuy Kristowe, éndob ménléhu génantino no betom do tete étéw inok féwaléy no betom do étéw i Tuluse. Fénléhu roy lowoh Jesuse, éndob énda énggéféluo roy Rémogor ne. <sup>19</sup> Atin non méuyag sénay Rémogor ne, ménangéy dob de rémogor do méfórisu atin nureto no bero. <sup>20</sup> Been i de niy de rémogor i de énggétah do étéw énda ménodor ro bé Tuluse bé gaiwe téningkélo no bero bé de tete rigoné ro bé lala Noehé rémigo bé dakéle barko. Tidéw béno, waléw gétéw saén i éndae ménléné non énggéahur ro dob barkowe. Mélaw ténabangay Tuluse bero inok énda ménléné ro dob wayégo no. <sup>21</sup> Atin i wayégo ni, maak anlung i wayégo fégébaubis betom funa tom méfukas dob de sala tom. I atag i kébaubis ni, békén kéurah bé lowohe inok mékédan i luwéde. Yamula been i

niy kéongot tome bé Tuluse bé kédané noy de sala tom inok malinis i de fédéw tom. Fakay i ni sabaf bé kétébule Jesu Kristowe. <sup>22</sup> Atin ménule i Jesuse mangéy dob lawayo inok diyo dob kuwonoy Tuluse, sani gonone toow fo basanan, atin méguléw bé kéluhanay de télaki brab kéluhanay de étéw do barakatan diyo brab de wén atura ro.

#### 4

<sup>1</sup> Gétiga tom, amun dini sénay Kristowe dob duniyae ni, ménrasay bé kékédawéta nuwe. Mélaw fatut tom témafay bé kékérasay i de étéw so betom. Non i de étéw do mérasay éndaén méuyot ro ménsala. <sup>2</sup> Mélaw, tidéw béni, taman méuyag gom séna dob duniyae ni, fatut odoro kom saén i kétayay Tuluse atin kagoméni odoron i de tete kétayay de lowoh gom. <sup>3</sup> Non bé gétahe, ménrugayén i kétete i de adat gom ségiléw bé de tete rigonéy de békén méngintulus. Non toow fo mékérésik i de rénigo gom, brab tete i de kétayay de lowoh gom, brab ménolon gom, brab mékémala-malay de rénigo gom dob de mékéolon do karagiya kom, brab fénggadaf gom i de kéninontow funay Tuluse mérume. <sup>4</sup> Endob béleewe ni, ménggaif i de énda méngintulus non éndaén mamung gom bé de toow fo tete do mékérésik rigoné ro. Atin mélaw féngirasé ro begom. <sup>5</sup> Endob fétingégéy Tulusey séngae étéw dob adafa nuwe inok ureté roy kéluhanay de rénigo ro. Non i Tuluse, Been i kémukume bé de méuyag étéw brab de ménléhuén. Atin tafayén kémukum béni. <sup>6</sup> I de étéw do ménléhuén, mén-uret soy Fiyowe Uret dob berowe, inok fiyon fo ké ménkukum ro bé kéléhu ruwe ségiléw bé kéluhanay de kéilawan, géunur ro so, atin méuyag mélaw i rémogor ruwe ségiléw bé kéuyag i Tuluse.

<sup>7</sup> Gédétén i tamfaday duniyae. Mélaw fatut féfiyo gom i kékégitung gome fo toow inok fiyoy kédasal gome. <sup>8</sup> Atin ay niy toowe fo mélaga féginaw gu begom: Ségédaw gom fo toow. Non amuk ségédaw tom, magad saén i kékésagada tome bé de énggésala dob betome. <sup>9</sup> Atin fatut moror gom sétayakuf dob de lawi gom. <sup>10</sup> Atin i kéluhana kome, fatut usar gom i de kékéfungon niray i Tuluse begom. Fatut usar gom fégétabang gom bé de dumo gom munur. Non i funay Tuluse de méniray dob begome inok gétabanga kom i de ségiyo. <sup>11</sup> Atin i de begom do muret, fatut uret gom i kékébérah i Tuluse. Atin i de begom do témabang, fatut usar gom i bagére niray i Tuluse begom inok démoyun médayéw i Tuluse de féngagéw dob Jesu Kristowe sabaf bé de tabang rigoné kom. Been damén i médayéwe brab méguléwe taman sa taman. Amen!

<sup>12</sup> Do gulaané ku do dumo gu, kagom mégaif sabaf bé ni toow fo démawét

téméngkad begom béleewe ni. Non been i niy kailangane mérigo dob betome kéluhanan do munur bé Jesuse. <sup>13</sup> Kagom mégaif de, yamula oror gom de non gétukidon gom bé kérasay Kristowe. Oror gom inok toow fo moror gom bé gaiwe séfule brab médayéw moso. <sup>14</sup> Oror gom amuk wén i méngiras begom sabaf do begom i de kuyug Kristo. Non amuk mérigoy ni, gétiga kom fénémanduoy barakatane Rémogor begom, sani Rémogor i Tuluse. <sup>15</sup> Enda damén mérigo no ké wén i mérasay begom sabaf bé de tete rigoné no loo bé méméléhue étéw, taloo no ménakaw, taloo no rémigo bé de ségiyo tete rigonén, taloo no furaya fédéwén i rigonéy de dumo no. <sup>16</sup> Endob amuk mérasay gom sabaf bé kéunur gome bé Kristowe, kagom mémala de. Yamula fatut fésalamat gom dob Tuluse sabaf féndawét gom do munur bé Kristowe.

<sup>17</sup> Enggumahén i gaiwe méganayén kémukum i Tuluse. Atin kukumé noy de kaan do étéw sani de betom. Atin amuk betom do étéwén i sunguwe kukumé no, toow na fo gétimal i géfuraye kékukumén bé de étéw énda munur ro bé Fiyowe Uret tidéw dob Beene. <sup>18</sup> Non wén i Ménsulate Kékébérah i Tuluse mano, "Amuk mérégén i kékúkase bé de métintu do étéw dob de sala ro, ati keey i mérigowe dob de tete étéw énda méngintulus ro?" <sup>19</sup> Mélaw amuk mérasay gom sabaf been i niy kétayay Tuluse, sarig gom fo toow bé Tuluse, sani méсарigone léménimbag begom, atin rigo gom saén i fiyowe.

#### 5

<sup>1</sup> I de begom do odoroy de munur, wén i ongoté kuwe dob begome, non i begéne ségétéw so odoron. Enggito guy kérasay Kristowe, atin médayéwu so séréngan de dob gaiwe séfule moso. <sup>2</sup> Mélaw, ongoté ku dob begome, toow gom fo talima i de kuyug Jesus sénarig i Tuluse begom. Begom i de maak do témalima bé de bili-biliy Tuluse. Fatut méuyot gom témalima bero non méuyot gom modor bé kétayay Tuluse. Kagom rigonén de ké maak méfégés gom de saén. Yamula rigo gom i galbék gome tidéw fo dob kékéfiyo fédéw gome. Enda fiyo no ké been i sahud gomey funa kome rémigo bé ni galbék. <sup>3</sup> Kagom féguléwon i de ni do munur sénarigén dob begome. Yamula fanangguwit gom bero inok iringé roy adat gome. <sup>4</sup> Atin mélaw, amuk séfule i Kristowe, sani maake gérotor témalima bé de bili-biliy Tuluse, gédoté kom i toowe fo fiyo baras gom énda mékédano taman sa taman.

<sup>5</sup> Atin loo so bé ni, i begome do ménguwéd séna, fatut odoro kom i de sugu i de lukés. Atin fatut térifantad gom kéluhanan, inok gésétabang gom. Non wén i Ménsulate Kékébérah i Tuluse mano, "Sébanil i Tuluse bé

de félangka-langka do étéw, éndob mégédaw bé de térifantad.”<sup>6</sup> Mélaw fatut térifantad gom dob adafay barakatane Tulus inok Beeney émfégérotore begom dob gaiwe kétaya no.<sup>7</sup> Atin kagom émbuku, yamula sarig gom i kéluhanay de bukué kom dob Tuluse, non fagifaté no begom.

<sup>8</sup> Atin ingat gom brab féfiyo gom i de kéfégitung gom. Non i Satanase, sani sébanile betom, dé moyun sé mugud ségiléw bé mérayare binatang séléde noy ati géafasa nuwe betom inok amaé no.<sup>9</sup> Fatut féégét gom i de kéunur gom inok géatuho kom i Satanase. Non gétiga kom i de dumo tom munur bé Kristowe do bati dob de séségiyo-giyo ingéd dob duniyae ni, fénrasayén so bero ségiléw bé begome.<sup>10</sup> Endob amuk mérasay gom singkow, féégétéy Tulusey kéunur gome dob Beene. Atin fébagéré noy de fédéw gom brab tabanga no begom bé kéluhanay de kailanga kom. I kéluhanay tabange begom, tidéw dob Beene non mégédaw fo betom. Beeney émféunure betom bé Kristowe inok gédoté tom i umule magufusa. Bé no gai, séréngan tom moso médayéw bé Jesuse.<sup>11</sup> Médayéw i Kadnane taman sa taman. Amen!

<sup>12</sup> Silbanoy téménabangane begén séménulat bé ni foko sulat mangéy dob begome. Beeney maake gé sarigo ku tuwaréy gu sabaf bé Kristowe. I funa kuwe séménulat dob begome inok méégét i kéunur gome. Atin méuyotu de so émfégétigan begom bé toow i kétoro guwe fantag bé kégedaw i Tuluse. Mélaw kagom térénon i témayakufe de.

<sup>13</sup> I de munur bati dob Babilonia ségifaé ro begom. Fénémili i Tuluse so bero ségiléw bé begome. Atin i Markose ségifaé no so begom. Been i maake nga gu.<sup>14</sup> Fatut fégito gom i késégédaw gome ké séségifa gom.

I Tuluse irayén damén dob begome kéluhanan do munur bé Kristowey métanéke fédéw.

*Pedro*

## I Géruwowe Sulat Pedrowe

Ay niy géruwowe sénulat Pedrowe, sani ségétéwe bé de kuyug Jesus brab dumo no amun dini séna dob duniyae niy Jesuse. Sénulat Pedrowey ni sulat dob kéluhanay de munur bé Jesuse.

Dob ni sulat, féningat Pedrowey de munur fantag bé de tugién témoro. Atin ténoroén so bé tintu fo séfule i Jesuse, fiyon fo ké mérugay séna.

<sup>1</sup> I séménulate bé ni, been i begéne sani Simon Pedrowe ségétéw sugu-sugué Jesu Kristowe brab apostolén. Sémulatu mangéy dob begome do munur bé Jesu Kristowe. Beeney Tulus tome sani ménémukase betom dob de sala tom. Sabaf bé énda i ramigo no bé étéwe, féwaléyén begom do munur dob Beene ségiléw bé kéféwaléy ne begey do munur dob Beene.

<sup>2</sup> Toow fo damén mégédaw i Tuluse begom brab irayén damén begom i métanéke fédéw sabaf bé kéfégélolo gome bé Tuluse brab Kadna tome Jesus.

<sup>3</sup> I barakatane Tulus nirayén dob betomey kéluhanay kailanga tome inok fiyoy kéféngintulus tome bé lala tome séna méuyag dob duniyae ni. Fakay gérigono tom i de ni non gétiga tom i Jesu Kristowe, sani séméngkate betom mangéy dob Beene inok géamung tom bé kéfiyono nuwe brab kégérotor ne. <sup>4</sup> Bé ni, nirayén betom i kéluhanay fiyowe do gérotor éntingayén fénasadén irayén, inok sabaf bé de ni, géséliyaha tom i de tete kétayay de lowoh tom fégébinasa bé de étéw. Atin waléy i adat tome ségiléw bé adat i Tuluse. <sup>5</sup> Atin mélaw fatut rignoné tom taman gagané tom inok méégét i kéunur tome sabaf bé de fiyon rignoné tom. Atin i de ni do fiyon rignoné tom, fatut féégété tom bé kéhésobut tome bé kétintuwe. <sup>6</sup> Atin i kéhésobut tome de, fatut féégété tom bé de kéika tom bé de tete kétaya tom. Atin fatut féégété tom i ni bé kéfédayday tome. Atin i kéfédayday tome, fatut féégété tom bé kéodor tome bé Tuluse. <sup>7</sup> Atin i kéodor tome bé Tuluse, fatut féégété tom bé késégédaw tome. Atin i késégédaw tome, fatut féégété tom bé kéimu tome bé de dumo tom. <sup>8</sup> Amuk tintu gérigono kom i de ni, minut fo médooy de rignoné kom sabaf bé kéunur gome bé Kadna tome Jesu Kristo. <sup>9</sup> Endob amuk wén i ségétéw munur békén loo bé niy adat ne, maak langafén i kéfégitung ne non énda gésobuto noy toowe, atin énggélifoto noy kékéday de salaén funa no malinis i fédéw ne.

<sup>10</sup> Mélaw do dumo gu, fatut toow tom fo télamanén fégitoy kéféмили i Tuluse betom brab kéféunur ne betom. Amuk rignoné tom

i ni, énda fo fakayén ké tagaké tom i kéunur tome dob Beene. <sup>11</sup> Atin moror mélaw i Tuluse témayakuf betom dob kéfégüléw i Kadna tome Jesu Kristo, sani ménémukase betom dob de sala tom. Enda mékédan i kéfégüléw ne taman sa taman.

<sup>12</sup> Mélaw démooyon fo féfégétédém gu begom i de ni fiyon fo ké énggésobuto komén brab méégétén i kéunur gome bé toowe kétoro. <sup>13</sup> Non dob karang guwe de, fiyon fo ké féfégétédém gu begom i fantage bé de ni bé lala guwe séna méuyag dob duniyae ni. <sup>14</sup> Gétiga ku éndaén mérugay i kéuyag guwe dob duniyae ni, loo bé fénggétigay Kadna tome Jesu Kristo begén. <sup>15</sup> Mélaw rignoné kuy kéluhanay gagané kuwe béleewe ni inok énda gélifoto kom i de ni kétoro gu, fiyon fo ké éndaén diniwu dob duniyae ni.

<sup>16</sup> Toow foy kétoro geye begom fantag bé kégumah i Kadna tome Jesu Kristo. Békén do tutul saén nuret gey begom tidéw dob de kagey saén kéfégitung, non énggito gey i kéréndaw ne. <sup>17</sup> Diyo gey de bé gaiwe fénggitoy toowe fo barakatan Abay Tulus i kéréndaw Kristowe brab kégérotor ne brab ménbéréh manó, "Ay niy Nga guwe toow fo méimuu de, brab toow fo mésuwatu de." <sup>18</sup> Enggélingoo key i ni kébéréh tidéw dob lawayo amun diyo gey dob Beene dob uruk i mékétéfuwe tuduk.

<sup>19</sup> Mélaw tintu fo gétiga key toow i kéuret i de énggétah do sénarigoy Tuluse muret bé kébéréh ne. Atin fatut fo unur gom de so, non i kéuret ruwe maak solo réméndaw dob délémone taman géfuwén. Atin amuk gumah i géfuwéne, réméndaw i solo mubode dob betome. Non i Kristowe maak Beeney solo mubode atin séfule mangéy dini moso. <sup>20</sup> Atin ay niy toowe na fo gérotor féginaw gu begom: I toowe, énda i ségétéw étéw gétoroo noy atag i de kébéréh i de sénarigoy Tuluse dob Mésulate Kébéréh i Tuluse, amuk énda témabang i Tuluse de. <sup>21</sup> Non i kéuret i de sénarigoy Tuluse muret bé kébéréh ne békén tidéw dob kéfégitung i kéilawane saén. Yamula fénbéréh i Tuluse bero dob kéfémandu i Rémogor ne.

## 2

<sup>1</sup> Bé do gétah, wén i do étéw do tugién do ubo-ubo sénarigoy Tuluse muret bé kébéréh ne. Atin ségiléw so bé béleewe ni, wén soy tugién do témoro do gumah séko dob begome. Toroé roy de tugi fégébinasa bé kéunur gome. Toroé roy békén kun Kadnan i Jesuse fiyon fo ké ménléhu i Jesuse inok kédané noy de sala ro. Mélaw métékow ro mékukum. <sup>2</sup> Gido loo, médooy modore bé de mékérésik do adat ro. Atin sabaf mélaw bé ni, médooy méraréke bé toowe kétoro. Non i de étéw, marok do dumo tom i de ni tugién témoro. <sup>3</sup> I de ni do tugién do témoro, ureté

ro dob begomey de tugi do tutul tidéw dob de karo saén itungan. Rigoné roy ni inok gégedot ro saén kurta, non do arumén ro fo toow. Endob ménrugayén i kétafayay Tuluse bé kékukum ne bero.

<sup>4</sup> Non i Tuluse, énda féndayaén i de télaki do ménsala, yamula nibéran bero dob emfernowo. Diyo ronén béni dob déléme nikét ro dob de sangkali, ongot-ongot ro taman dob gaiwe tintunén fo kékukum i Tuluse. <sup>5</sup> Atin énda so féndaya i Tulusey de énggétah do étéw do ménsala. Yamula fénléhuén i kéluhanay de étéw do énda méngintulus féngagén dob dakéle dunuk. Enda i ségétéw té nabangén bero saliyo bé Noehe, sani téméroroe bé tintuwe, brab de fitéw gétéw do dumo no. I kéluhanay de ségiyo étéw ménléné ro. <sup>6</sup> Atin kékukum i Tuluse soy de étéw ménbati dob de ingéd féndawét Sodom brab Gomora. Fénléhuén bero bé aféye taman métuwég ro. Réniyo noy ni inok fégiyo noy kériyo nuwe bé de étéw do énda méngintulus ro. <sup>7</sup> Atin i ségétéwe lagéy féndawét Lot saén i té nabang i Tuluse inok énda méléhuén bé béno. Enda kékukum i Tuluse de non méntintu étéw brab ménika mamung bé de mékérésik rigonéy de étéw do énda modor bé de sugu i Tuluse. I de tete rigoné ro ménwaléy tete i fédéw Lote de. <sup>8</sup> Non ménsétifon beroy Lote dob no ingéd atin énggito noy de tete réniyo ro sénga fuweh brab énggélinooy noy de tete kébéreh ro. Mélaw méntete i fédéw ne bé de tete adat ro, non méntintuy beene. <sup>9</sup> Mélaw gétiyay Kadnaney ati kétabang ne bé de étéw do méngintulus inok énda ménsala ro ké téngkadén ro. Atin gétiyo no soy ati kédu sawe bé de tete étéw taman dob gaiwe tintu mékukum ro. <sup>10</sup> Atin toow na fo gétiyo i kékukum i Tuluse bé de étéw odoroy de mékérésik do kétayay de lowoh ro atin mika ro bé aturay Tuluse.

I de ni do tugién do témoro do énggélabito ku, do félangka-langka ro fo brab do émbaraw. Enda fégadata roy de barakatan do étéw dob lawayo diyo. Yamula féngirasé ro bero. <sup>11</sup> Atin fiyoy i de télakiy Tuluse, do toow na fo barakatan bé de ni do tugién do témoro, énda fo ménéngiras ro témébo bé de ni do barakatan do étéw dob lawayo dob adafay Kadnane. <sup>12</sup> Endob i de ni do tugién do témoro, énda mégilak ro réniyo tete non been i niy de adat ro, maak do mérayar ro binatang fatut fo kéfoén brab féléhuén. I de ni do étéw féngirasé roy éndae gésobuto ro. Tintu fo féléhuén ro non ségiléw ro bé de mérayar do binatang. <sup>13</sup> Atin médu sa ro fo toow non déménusa ro bé de ségiyo étéw. Méuyot ro fo réniyo bé de tete do mékérésik kétayay de lowoh ro fiyoy ké fuweh. Fatut fo mémala gom séréngan bero mama non mékérésik foy de rigoné ro brab tugiyo ro begom bé lala ruwe séréngan begom mama. Been i funa

kome méduwoy. <sup>14</sup> I de ni do tugién do témoro, amuk gégiyo ro do udenén do libun, méuyot ro de fo lémamfa. Atin énda fo téméren ro réniyo sala. Fagakara roy de étéw énda séna méégét i kénuur ruwe inok génsala ro. Atin i de ni do tugién do témoro, toow ro fo do arumén. Mélaw toow fo kékukuméy Tuluse bero. <sup>15</sup> Ténagak roy tintuwe aguwoon atin maak do méntadin ro mélaw béleewe ni. Nirring roy Balaame réniyo sani nga Basore. I Balaame ni, toow fo génuulaa noy kurtaa énggédotén bé de tete réniyo no. <sup>16</sup> Mélaw fénbéreh i Tulusey kuda Balaame maak ségétéw étéw gémiélé de sabaf bé de salaen. Atin téméren mélaw i Balaame réniyo bé de kédufanga no.

<sup>17</sup> I de ni do tugién do témoro, ségiléw ro bé de méniroy do séfut. Ségiléw ro bé de rawén faniréy réniyo inok énda rémana ro dob de nohok. Ténafayay Tuluse bero gono ro toow fo délémon dob emfernowo. <sup>18</sup> Toow fo do félangka-langka. Maak do ménalém i de kébéreh ro, éndob énda foy atag i de kéuret ro. Méduo damén i de étéw géféduw tagaké roy de tete adat ro brab sésuway ro damén bé de tete étéw. Endob i de ni do tugién do témoro, fénsala ro bero bé de tete kétayay de lowoh ro. <sup>19</sup> I de ni do tugién do témoro, fasada roy de étéw bé fakay ro kun méfukas dob kitabe ké modor ro bero non toroé roy fakay kun rigonén i kéluhanane. Endob i toowe, i de ni do tugién do témoro maak riféy de tete adat bero funa ro mébinasa. Non i étéwe, maak riféy de udenén éntingayén méguléwon de. <sup>20</sup> Amuk wén i do étéw géloloy Kadna tome Jesu Kristo, sani mémukase betom, gétagaka roy de tete adat i de étéw dob duniyae ni féngébinasa bé de étéw. Endob amuk séfuleo ro man ségule i de ni do tete adat atin waléy ro man maak do riféy salae, toow na fo gétiyo i goho ruwe bé sunguwe de. <sup>21</sup> Toow na fo fiyo ké énda damén séna énggétiga roy méntintuwe aguwoon bé gétiyo ronén atin tagaké roy sugu i Tuluse fénggétiga no bero. <sup>22</sup> Mélaw dob de ni do rigoné ro, giton toow i kébéreh i Tuluse mano, “I itue, séfuleo noy suwah ne atin amaé no man. Atin i babuye féndiyoh séfule so man mangéy témuna.”

### 3

<sup>1</sup> Do gulaané ku do dumo gu, been i niy géruwowe sulat gu begom. Dob ni géruwo sulat gu, toow fo ténlama gu fénggétédém begom i toowe inok fiyoy kéfégitung gome. <sup>2</sup> Non méuyotu de ké démiyoy gétiyo kom i kébéreh i de énggétah do sénarigoy Tuluse muret bé kébéreh ne. Atin méuyotu de ké gétiyo kom i sugu i Kadna tome mémukas betom sani sugue niray gey do apostol dob begome. <sup>3</sup> Dob sunguwe, fatut gétiyo kom i ni: Dob de géfury do gai, wén i do tete étéw odoroy ro saén i de tete kétaya ro, brab diyangkaé ro begom. <sup>4</sup> Bérehé

ro begom maro, “Hon i gono Kristowe de? Aw békén ba fénasadén i séfule kun mangéy dob duniyae ni? Enda fo munur gey bé nan, non i de sungu do munur bé Kristowe, ménléhu ro nén. Tidéw bé kélimbage bé duniyae ni taman so béleewe ni, énda so ménfégalino.”<sup>5</sup> Endob i de ni do étéw, lénifot roy kélimbag i Tuluse bé fantade brab lawayo bé kébéreh ne saén. Atin lénimbag i Tulusey duniyae tidéw dob wayége brab tidéw dob kéréra i wayége.<sup>6</sup> Atin bénnasay Tuluse soy de étéw méuyag bé gétahe bé wayége non féndunukén.<sup>7</sup> Atin féntaus i Tuluse soy duniyae ni bé kébéreh ne inok amuk gégumah i gaiy kékukum i Tuluse, binasané no bé aféyey ni duniya brab de békén do méngintulus do étéw.

<sup>8</sup> Endob i de begom do gulaané ku do dumo gu, kagom lifotén i ni: Dob antaf fédéw i Tuluse, i ségétérsangane maak séngibu gébélintuwa, atin i séngibuwe gébélintuwa maak ségétérsangan saén.<sup>9</sup> Mélaw énda toow i kéfégitung i de étéw bé métana kun i kétumay Kadnane bé fasad ne séfule mangéy dini. Yamula tingkéloy Kadnane saén begom, non énda damén méuyotén kémukum fiyon ségétéw. Yamula méuyot de ké tagakéy kéluhanay de étéw i de sala ro.

<sup>10</sup> Gido loo, i kégumah i gaiwe séfule i Kadnane ségiléw bé kégumah i ménakawe non métékow i kégumah ne énda gétigay de étéw de. Atin bé béno gai, tékow méalfa i lawaye bé lalae wén i toow fo mékégilak dégu. Atin i kéluhanay de éntingayén dob lawayo diyo, métuwég brab mébinasa. Atin méalfa soy duniyae ni brab kéluhanay de éntingayén de.<sup>11</sup> Atin non mébinasay kéluhanay de ni moso loo bé ni, fatut métintu tom atin modor tom bé kétayay Tuluse.<sup>12</sup> Non ongot-ongoté tom i gaiwe kémukum i Tuluse. Mélaw fatut rigoné tom i tamay gagané tome inok magad gégumah. Bé béno gai, métuwég brab mébinasay lawayo diyo, atin mélagang i kéluhanay éntingayéne sabaf bé kééduf ne.<sup>13</sup> Endob i betome, ongot-ongoté tom i fénasad i Tuluse betom, sani mantuwe laway brab mantuwe duniya. Diyo bati i de métintu do étéw.

<sup>14</sup> Mélaw do dumo gu, i lala tome ongot-ongot bé nan gai, fatut fo rémigo tom saén fiyo inok énda i téboéy Tuluse betom, atin énda mélaw mékérítén betom.<sup>15</sup> Kagom lifotén i funay Tuluse témingkélon betom, non iraya no betom gai inok méfukas tom dob de sala tom. Been soy niy atag i sulat i gulaané tome dumo tom Pablo dob begome. Fénggétigay Tuluse de.<sup>16</sup> Been i niy dé moyune fénggétiga no begom dob kéluhanay de sulatén fantag bé kékukum i Tuluse. Atin wén soy do dumo bé de kétoro dob de sulatén toow fo mérégén gésobuton. Atin i de dumo

do étéw énda i gétiga-tiga ro, toroé roy békéne katabuwan atag i de sulat Pablo. Loo so bé niy rénigo ruwe bé de ségiyo do Ménsulat Kébéreh i Tuluse. Mélaw been i niy funa ruwe mébinasa.

<sup>17</sup> Endob i de begom do dumo gu, gétiga komén i de ni. Mélaw ingat gom inok énda géunur gom bé de békén katabuwan do kétoro i de étéw do énda modor ro bé de sugu i Tuluse. Non amuk énda mingat gom, gésésuway gom bé toowe kétoro nunuro kom.<sup>18</sup> Fatut fo minut waléy méégét i kéunur gome sabaf bé kétayakuf gome bé kégédaw i Tuluse brab kéngétiga kome bé Kadna tome Jesu Kristo, sani mémukase betom dob de sala tom. Médayéw fo damén béleewe ni taman sa taman. Amen!

*Pedro*



## I Sanguwe Sulat Juane

Ay niy sébaane bé de sénulat Juan, sani ségétéwe bé de kuyug Jesus brab dumo no amun dini séna dob duniyae niy Jesuse. Sénulat Juane ni sulat dob de kéluhanay de munur bé Kristowe.

Dob ni sulat, ténoro Juane bé fatut ségédaw i de munur bé Kristowe.

<sup>1</sup> Sulata key begom fantag bé Kristowe, sani miraye bé umule magufusa. Wénén i Kristowe tidéw féganay. I Beene tintu énggito gey, brab énggélíngoo key i kébéréh ne, atin énggékúwaha key i lowoh ne. <sup>2</sup> Amun méntéfégítóy Jesu Kristowe dob duniyae ni, énggito gey. Mélaw ureté key dob begomey fantage bé Beene. Been i fédawéténe "Umul Magufusa". Been i dumoy Abaye Tulus atin ménwaléy kéilawan méntéfégító dob begeye. <sup>3</sup> Ureté key dob begomey fantage bé énggito geye brab énggélíngoo keye inok géunur gom de so inok waléy tom sédumon sabaf bé késédumo tome bé Abaye Tulus brab Nga ne Jesu Kristo. <sup>4</sup> Sulaté key i ni inok toow fo méégét i kéoror tome de.

<sup>5</sup> Ay niy kéurete bénréh i Nga i Tuluse begey atin béréhé key dob begome: I Tuluse maak Solo réméndaw, atin énda i délémon dob Beene. Non toow fo fiyoy Tuluse, énda i tete dob Beene. <sup>6</sup> Mélaw amuk béréhé tom dumo tom i Tuluse, éndob tete sénay de adat tom, témugi tom. Témugi tom dob de kébéréh tom brab dob de rigoané tom so. <sup>7</sup> Endob amuk fiyoy adat tome ségiléw bé kéfiyoy Tuluse, sédumon tom brab malinis tom dob adafay Tuluse non mékédan i séngae sala tom sabaf bé kéléhu Jesuse Nga i Tuluse dob kruse.

<sup>8</sup> Amuk béréhé tom énda i sala tom, tugio tom saén i de lowoh tom, énda munur tom bé toowe kétoro. <sup>9</sup> Endob amuk fayagé tom i de sala tom dob Tuluse, fésgadé no betom bé de sala tom atin linisé no betom dob kéluhanay de tete adat tom. Rigoané noy ni non i Beene méntintu brab tumané noy fasad ne betom bé fésgadé no betom. <sup>10</sup> Endob amuk béréhé tom énda i sala tom, maak fédawété tom i Tuluse ségétéw témugi, atin énda munur tom bé kébéréh ne.

## 2

<sup>1</sup> I begome maak do gulaané ku do nga gu, sulaté kuy ni dob begome inok énda rémigo gom sala. Endob amuk wén i gésala betom, wén i méntintuwe kéfédéwa tom dob adafay Tuluse, sani Jesu Kristowe. <sup>2</sup> Atin i Jesu Kristowe ni, Beeney tulake fégékédan bé de sala tom. Atin békén saén i de katom do sala, éndob loo soy de sala i kéluhanay de kéilawan.

<sup>3</sup> Amuk modor tom bé de sugu i Tuluse, gétiga tom betom i de dumoy Tuluse. <sup>4</sup> Endob amuk wén i ségétéw émbéréh mano, "Begéney dumoy Tuluse", éndob énda modorén bé de suguén, toow fo tugién i ni étéw brab énda munurén bé toowe kétoro. <sup>5-6</sup> Endob i étéwe modor bé kébéréh i Tuluse, tintu fo méégét i kéféimu ne bé Tuluse. Non i étéwe béréhé no dumo noy Tuluse, fatut iringé noy adat Jesu Kristowe. Amuk rigoané tom i ni, gétiga tom dumoy Tuluse betom.

<sup>7</sup> Do gulaané ku do dumo gu, békén mantu sugu i ni sulaté ku dob begome. Yamula tafayén i ni sugu énggélíngoo kom tidéw féganay. Been i niy sugue ténoroén betom bé fatut tom ségédaw. <sup>8</sup> Gido loo, maak mantu séna niray Jususey ni sugu dob betome. Atin i Kristowe brab begome modor gom bé ni sugu. Gétiga kuy ni non béleewe ni minútén mékédan i délémoné atin réméndaw i tintuwe solo, sani Jesu Kristowe.

<sup>9</sup> Amuk wén i ségétéw étéw émbéréh munur kun bé Jesu Kristowe, éndob mérarék bé dumo nuwe, bati séna dob délémoné, non énda tintu no munur. <sup>10</sup> Endob i étéwe mégédaw bé dumo nuwe munur, beeney tintuwe munur bé Kristowe. Atin énda i rigoané no funay dumo nuwe gésala. <sup>11</sup> Endob i étéwe mérarék bé dumo nuwe, énda toow i kéunur ne bé Jesu Kristowe atin maak magéw dob délémoné. Enda gétiga noy ayo nuwe non maak langafén non énda munurén bé Jesu Kristowe.

<sup>12</sup> Do nga gu, sulata ku begom non ménfésagadén i de sala gom sabaf bé Kristowe. <sup>13</sup> I de begom do lukés, sulata ku begom non énggélolo gomén i Kristowe ménwéné tidéw féganay. I de begom do ménguwéd séna, sulata ku begom non ténabana komén i Satanase.

<sup>14</sup> I de begom do nga, sulata ku begom non ménwaléy gom sédumon bé Abaye Tulus. I de begom do lukés, sulata ku begom non ménwaléy gom sédumon bé Kristowe, sani ménwéne nén tidéw féganay. I begome do ménguwéd do étéw, sulata ku begom non émbagé i kéunur gome, atin énda mékédan i kébéréh i Tuluse tidéw dob itunga kome, atin ténabana komén i Satanase.

<sup>15</sup> Kagom féimuén i de tete do éntingayén taloo no do tete adat dob duniyae ni. Non amuk féimué kom i de tete do éntingayén dob fantade ni, énda féimué kom i Abaye Tuluse. <sup>16</sup> I kéluhanay de tete dob duniyae ni, békén tidéw dob Abaye Tulus. Yamula tidéw dob fantade niy tete loo bé de tete kétayay de lowoh i de étéw, brab de kéingar, brab de kéfélangka-langka. <sup>17</sup> Endob i duniyae ni, méalfa moso, loo soy de tete do éntingayén kétayay de étéw. Endob i de étéw rigoané roy kétayay Tuluse, méuyag ro taman sa taman.

<sup>18</sup> Do nga gu, gédétén i tamfadane. Énggélíngoo komén i kéngumah i ségétéwe étéw moso féndawét “Sébanil bé Kristowe”. Atin béleewe ni wénén i do énggumah do étéw do sébanil bé Kristowe. Mélaw gétiga tomén gédétén i tamfadane. <sup>19</sup> I de ni do étéw sébanil bé Kristowe, békén ro do tintu dumo tom munur bé Kristowe. Atin been i niy funa ruwe téménagak betom. Amuk do tintu ro do dumo tom, énda damén téngagak ro betom. Endob sabaf bé kétagak ruwe betom, énggétiga tom békén ro do tintu dumo tom munur bé Kristowe.

<sup>20</sup> Endob i de begom, fénémanduo Kristowe begom bé Rémogor i Tuluse. Atin mélaw gétiga kom kéluhanan i toowe kétoro. <sup>21</sup> Mélaw i funa kuwe sémulatan begom békén sabaf bé énda gétiga kom i toowe kétoro. Yamula sabaf bé kégétiga kome de, atin gétiga kom soy énda i tugí dob toowe kétoro.

<sup>22</sup> Ati mélaw i témugie? I témugie, beeney émbéréhe bé békén kun Kristoy Jesuse. Been i niy étéwe tintu fo sébanil bé Kristowe non mika bé Abaye Tulus loo so bé Nga ne Jesus. <sup>23</sup> I étéwe mika bé Nga i Tuluse, mika so bé Abaye Tulus. Endob i étéwe munur bé Nga i Tuluse, munur so bé Abaye Tulus.

<sup>24</sup> Mélaw, kagom témérén munur bé Urete énggélíngoo komén bé do gétah. Non amuk énda témérén gom munur bé ni kétoro énggélíngoo komén bé do gétah, gétaus gom sédumon bé Abaye Tulus brab Nga ne Jesu Kristo taman sa taman. <sup>25</sup> Non been i niy umule magufusa fénsad Kristowe irayén betom.

<sup>26</sup> Sulata ku begom inok géngata kom i de étéw télamané ro begom féunurén bé békéne toow kétoro. <sup>27</sup> Endob i de begom, iraya Jesu Kristowe begom témantu bé Rémogor ne. Atin amuk bati i Rémogor ne dob de féféw gom, énda mélaw kailanga kom i témoroe begom. Non i Rémogor ney témoroe begom bé kéluhanane. Atin toroe noy toowe, békén i tugie. Mélaw odoró kom i kétoro i Rémogor ne, atin kagom tagakén i Kristowe.

<sup>28</sup> Mélaw do nga gu, kagom tagakén i Kristowe inok énda mégilak gom taloo no mémala gom de dob gaiwe séfule moso. <sup>29</sup> Gétiga tomén métintuy Kristowe. Mélaw fatut gétiga kom soy kéluhanay de rémigo bé métintuwe, beroy de nga i Tuluse.

### 3

<sup>1</sup> Fégitung gom, i Abaye Tulus toow fo gulaané no betom! Non féndawétén betom do ngaén. Atin i toowe, ménwaléy tom mon do ngaén. I funay de étéw sébanil bé Tuluse énda gélo ro betom do nga i Tuluse, non énda so gélo ro Tuluse. <sup>2</sup> Do gulaané ku do dumo gu, ménwaléy tomén do nga i Tuluse. Endob énda séna gétiga tom de ké ati moso i kéwaléyo tome. Endob gétiga tom i ni: Amuk séfule i

Kristowe, waléy tom loo bé Beene, non gito tom moso i tintuwe fo falasén. <sup>3</sup> Mélaw, i kéluhanay de ongot-ongot bé késéfule Kristowe, fatut dé moyun ro rémigo fiyo loo bé kéfiyo Kristowe.

<sup>4</sup> Amuk wén i ségétéw réménigo sala, fénlisén i kukumay Tuluse, non i atag i salae, been i kéfélice bé kukumay Tuluse. <sup>5</sup> Gétiga komén ménwaléy kéilawan i Kristowe inok kédané noy de sala i de kéilawan. Atin énggétiga kom soy énda i sala Kristowe, fiyon sébaan. <sup>6</sup> Mélaw i kéluhanay de dumo Kristo, énda fakayén ké taus ro rémigo sala. Endob i étéwe dé moyun rémigo sala énda séna gélo noy Kristowe brab énda séna munurén de.

<sup>7</sup> Do nga gu, kagom fédayaén i de étéw émféunur begom bé tugie kétoro. Ay niy toowe kétoro: I de étéw rémigo ro fiyo, beroy de métintu do étéw ségiléw bé kétintu Kristowe. <sup>8</sup> Endob i de étéw dé moyun rémigo sala, beroy de kuyug Satanase. Non i Satanase tidéwén féganay i kérigó nuwe sala. Atin i Nga i Tuluse ménangéy dob duniyae ni inok kédané noy tetee galbék Satanase.

<sup>9</sup> I de étéw ménwaléy do nga i Tuluse, énda dé moyun ro rémigo sala non ménwaléy ro miring bé adat i Tuluse. Enda fakayén dé moyun ro rémigo sala non Tulus i Abay ruwe. <sup>10</sup> Endob i de étéw énda mégédaw ro bé dumo ruwe, békén beroy de nga i Tuluse. Been i niy fégélolonone bé de nga i Tuluse brab de nga Satanase.

<sup>11</sup> Fatut tom ségédaw. Been i niy kétoroe énggélíngoo komén tidéw féganay. <sup>12</sup> Enda fatutén iringé tom i étéwe féndawét Kain. Non beeney ségétéwe kuyug Satanase, atin fénléhuén i tuwaréy ne Abel. Atin i funa nuwe ménméléhu bé tuwaréy ne non métintuy rignóy tuwaréy ne, éndob i beene tete i kaane rignón.

<sup>13</sup> Mélaw do dumo gu, kagom mégaif de amuk mérarék begom i do étéw sébanil bé Tuluse. <sup>14</sup> Gétiga tom i ni: I de kéilawan méuyag ro taman gégumah i gaiwe méléhu ro. Endob békénén loo bé niy betome, non énggédot tomén i umule magufusa. Mélaw fiyon fo ké méléhu tom dob duniyae ni, méuyag tom so dob lawayo. I funa tome gétigan bé ni non mégédaw tom bé dumo tome. Endob i de étéw do énda mégédaw ro, méléhu ro fo toow. <sup>15</sup> Amuk wén i étéw mérarék bé dumo nuwe, i ni étéw ségétéw ménméléhu étéw dob féfégitung i Tuluse de. Atin gétiga tom i de ménméléhu do étéw énda séna énggédot roy umule magufusa. <sup>16</sup> I funa tome gétigan bé atag i “kégedawe” non féndaya Kristowey de étéw ménméléhu de bé kégantino nuwe betom inok kédané noy de sala tom. Mélaw fatut iringé tom soy rénigo nuwe. Iray tom soy férenawa tome féfétabang tom bé de dumo tom. <sup>17</sup> Ufama,

wén i ségétéwe kawasa, atin gito noy dumo nuwe méskinan médooy foy kailanga nuwe. Endob amuk énda méuray i na nuwe de atin énda tabanga no de, giton énda tintu no méimu bé Tuluse. <sup>18</sup> Do nga gu, énda fatutén ké mégédaw tom saén dob de kébéreh tom saén. Non fatut féngito tom i kégédaw tome dob de fiyo rignoné tom. Been i niy tintuwe kégédaw.

<sup>19</sup> Mélaw amuk rignoné tom i ni, gétiga tom bé betom i de étéw i tintuwe Tulus. Atin éndaén mélaw mégilak tom bé Tuluse ké diyo tom dob adafa nuwe. <sup>20</sup> Fiyon fo ké féngitungé tom médaít tom mékukum, gétiga tom mas na fo gétigan i Tuluse bé betome, non gétiga noy kéluhanane. <sup>21</sup> Mélaw, do gulaané ku do dumo gu, gétiga tom énda i funa tom mégilak, atin mélaw géfébaraw tom démasal dob beene. <sup>22</sup> Fiyon atiy ongoté tome dob Tuluse, irayén dob betome. Non odoro tom i de suguén, atin rignoné tom i késuwata nuwe. <sup>23</sup> Atin ay niy sugu ne betom: Fatut munur tom bé Nga ne Jesu Kristo atin ségédaw tom loo bé sénugu Kristowe betom bé gétaho. <sup>24</sup> I de étéw modor bé de sugu i Tuluse, bati ro dob Tuluse, atin i Tuluse bati so dob de fédéw ro. Atin gétiga tom bati i Tuluse dob de fédéw tom non nirayén betom i Rémogor ne.

#### 4

<sup>1</sup> Do gulaané ku do dumo gu, kagom munur bé kéluhanay de étéw émbéreh ro fénémanduoy Rémogor i Tuluse kun bero. Yamula téngkad gom bero inok gétiga kom ké tidéw dob Tulusey rémogore taloo no békén. Non wén i médooy do étéw ubo-ubo sénarigoy Tuluse muret bé kébéreh ne, atin ménangéy ro dob de médooy do ingéd dob duniyae ni. <sup>2</sup> Atin wén i féngélonon de inok gétiga kom i tidéw rémogore de. Amuk fayagéy ségétéwe étéw i Jesu Kristowe ménwaléy kéilawan, Rémogor i Tuluse bé bénoy ménémanduone de. <sup>3</sup> Endob i de étéw bérehé ro énda kun ménwaléy kéilawan i Jesuse, énda bati i Rémogor i Tuluse dob berowe. Yamula fénémanduoy rémogor i Ségétéwe étéw Sébanil bé Kristowe. Enggélungoo komén i kégumah ne, atin bérehé ku begom énggumahén dob duniyae ni béleewe ni.

<sup>4</sup> Endob i de begom, do nga gu, begom i de étéw i Tuluse. Atin ténabana kom i de ubo-ubo sénarigoy Tuluse. Non i Rémogor i Tuluse bati dob de fédéw gom mas na barakatan bé Satanase bati dob de fédéw i de tete étéw. <sup>5</sup> I de ubo-ubo sénarigoy Tuluse, toroé roy tete. Atin i de tete étéw dob duniyae ni féngélingoé ro bero non sébanil ro so bé Tuluse. <sup>6</sup> Endob i de betom, do étéw i Tuluse betom. Atin i de étéw gélooy roy Tuluse, féngélingoé roy kétoro tome. Endob i de békén do étéw i Tuluse,

énda féngélingoé ro betom. Mélaw been i niy féngélonone bé de étéw fémanduoy Rémogor i Tuluse sani témoroé bé toowe, brab i de étéw fémanduoy Satanase sani de témoro bé tugie.

<sup>7</sup> Do gulaané ku do dumo gu, fatut ségédaw tom non i kégédawe tidéw dob Tuluse. I de étéw mégédaw ro bé dumo ruwe, beroy de étéw do ménwaléy do nga i Tuluse brab dumoy Tuluse bero. <sup>8</sup> Atin i de étéw énda mégédaw ro, beroy de énda séna géngélooy bé Tuluse, non mégédaw foy Tuluse. <sup>9</sup> Atin fénggitooy Tulusey kégédaw ne betom bé késugu ne bé buntunge Ngaén dob duniyae ni inok gédoté tom i umule magufusa sabaf bé Beene. <sup>10</sup> Mélaw ay niy tintuwe kégédaw: Békén ké betom i ménggédawe bé Tuluse. Yamula, Tulus i ménggédawe betom. Been i niy funa nuwe séménugu bé Nga ne dob duniyae ni inok féléhuén féngétulak inok émfésagad i de sala tom.

<sup>11</sup> Do gulaané ku do dumo gu, amuk loo bé nan i kédakél i kégédaw i Tuluse betom, fatut fo ségédaw tom so. <sup>12</sup> Enda i ségétéw énggégito bé Tuluse. Endob amuk ségédaw tom, bati i Tuluse dob de fédéw tom, atin i kégédaw tome waléy toow fo dakél miring bé kaane kégédaw.

<sup>13</sup> Atin i Tuluse nirayén i Rémogor ne dob betome. Been i niy funa tome gétiga tom bati tom dob Tuluse atin i Tuluse bati dob de fédéw tom. <sup>14</sup> Atin i begeye do apostol, énggito gey i Nga i Tuluse brab de réngoo no. Mélaw ureté key i fantage bé késugu i Tuluse bé Nga ne dob duniyae ni inok fukasé noy de kéilawan dob de sala ro. <sup>15</sup> I de étéw fayagé roy Jesuse Nga i Tuluse, bati i Tuluse dob de fédéw ro, atin bati ro dob Tuluse. <sup>16</sup> Atin gétiga tom mélaw toow fo mégédaw i Tuluse betom. Mélaw gésarig tom de.

Non i Tuluse toow fo mégédaw. Atin i de étéw do mégédaw, bati ro dob Tuluse atin i Tuluse bati dob de fédéw ro. <sup>17</sup> I Tuluse féwaléy no tintu fo dakél i kégédaw tome inok énda mégilak tom bé gaiwe kémukum i Tuluse. Mélaw éndaén mégilak tom bé no gai, non ménwaléyén ségiléw i adat tome bé Kristowe. <sup>18</sup> Enda i funa tom mégilak non mégédaw i Tuluse betom. Amuk toow fo mégédaw i Tuluse betom, mékédané i funa tome mégilak. Non i funay de étéw mégilak, been i kékukum i Tuluse. Mélaw i de étéw mégilak, énda séna méégét i késarig ruwe bé kégédaw i Tuluse.

<sup>19</sup> I funa tome méimu bé Tuluse non fénimu i Tuluse betom sungu. <sup>20</sup> Amuk wén i étéw émbérehé mano, "Féimué kuy Tuluse", endob mérarék bé dumo nuwe, témugi. Non amuk énda féimué noy dumo nuwe gito no, ati kéfingé-fingé i kéféimu ne bé Tuluse énda gito no de? <sup>21</sup> Mélaw ay niy sugue niray Kristowe

betom: I de étéw féimué roy Tuluse, fatut féimu ro so bé de dumo ro étéw.

## 5

<sup>1</sup> I de étéw munur bé Jesuse Beeney Kristowe, sani fénéмили i Tuluse méguléw, beroy de ménwaléy do nga i Tuluse. Atin i de étéw féimué roy Abaye Tulus, féimué ro soy de dumo ro nga i Tuluse. <sup>2</sup> Atin amuk féimué tom i Tuluse brab odoro tom i de suguén, gétiga tom féimué tom soy de dumo tom do nga i Tuluse. <sup>3</sup> Non amuk féimué tom i Tuluse, odoro tom i de suguén. Atin énda mérégén i kéodoro tome bé de suguén. <sup>4</sup> Non kéluhana tomén do ménwaléyén do nga i Tuluse, gétabana tom i Satanase, sani méguléwe bé duniyae ni. Atin i funa tome gétabana tom i Satanase non bé kúnur tome bé Jesuse. <sup>5</sup> Ati de étéw gétabana roy Satanase? I de étéw saén munur bé Jesuse Nga i Tuluse.

<sup>6</sup> I Jesu Kristowe sénugu i Tuluse mangéy dob duniyae ni. Gétiga tom i ni sabaf bé wayége brab dara ne. Non énda saén ménbautisén dob wayége, yamula réménanas soy dara ne amun ménkélabo dob kruse. Atin i Rémogor i Tuluse fégétiga no betom toow i de ni, non i Rémogor i Tuluse dé moyun béréhé noy toowe saén. <sup>7</sup> Mélaw wén i téléw émféféngintoow fantag bé Jesu Kristowe: <sup>8</sup> I sébaane de, been i Rémogor i Tuluse. Atin i sébaane de, been i kébautise bé Jesu Kristowe. Atin i sébaane de, been i kéranas i dara Jesuse bé kéléhu ne. Atin falan séfagayun i de ni do téléw. <sup>9</sup> Munur tom bé kéuret i de étéw saén, éndob mas na gérotor i kéuret i Tuluse funa tom tintu fo fatut munur. Atin nuret i Tulusey Jesuse Ngaén. <sup>10</sup> Mélaw i de étéw munur ro bé Nga i Tuluse, ménunur ro bé toow i kéuret i Tuluse. Endob i de étéw énda munur ro bé Tuluse, maak fédawét roy Tuluse ségétéw tugién. Non énda ménunur ro bé kébéreh i Tuluse fantag bé Nga ne. <sup>11</sup> Atin ay niy toowe kétoro fantag bé Nga ne. Niray i Tuluse betom i umule magufusa tidéw dob Nga ne. <sup>12</sup> I de étéw ménwaléy do dumoy Nga i Tuluse, wén i umul ro magufusa. Endob i de étéw énda ménwaléy ro do dumoy Nga i Tuluse, énda énggédot roy umule magufusa.

<sup>13</sup> Sulaté kuy ni dob begome do munur bé Jesuse Nga i Tuluse inok gétiga kom wénén i kagom bé umule magufusa. <sup>14</sup> Enda mégilak tom démasal dob Tuluse non gétiga tom fégélíngoé no betom amuk mongot tom bé ati kétaya nuwe irayén. <sup>15</sup> Gétiga tom dé moyun fégélíngoé no betom ké démasal tom mongot dob Beene. Atin mélaw gétiga tom irayén betom fiyon fo ké ati ongoté tome dob Beene.

<sup>16</sup> Amuk wén i ségétéw begom gito noy dumo nuwe énggésala, atin énda ménléhuén bé nan sala, fatut dasal gom dob Tuluse inok

irayén i umule magufusa dob nan dumo gom. Béréhé ku begom i fantage bé de sala békén fégéléhu i étéwe. Endob wén soy do sala funay de étéw méléhu. Atin énda féginauné ku begom démasal fantag bé de ni. <sup>17</sup> I kéluhanay de tete rigonén, sala. Gido loo, wén i do sala énda méléhu i de étéw de.

<sup>18</sup> Gétiga tom i de étéw do ménwaléy nga i Tuluse énda dé moyun ro rémigo sala. Non i Jesuse Nga i Tuluse, diyagané no bero inok énda géférigono Satanase bero tete.

<sup>19</sup> Gétiga tom betom i de étéw i Tuluse fiyon fo ké Satanase i méguléwe bé kéluhanay de étéw sébanil bé Tuluse dob duniyae ni.

<sup>20</sup> Gétiga tom ménangéy i Nga i Tuluse dob duniyae ni, atin fénggésobutén betom inok gétiga tom i toowe Tulus. Ménwaléy tom do dumoy toowe Tulus brab Nga ne Jesu Kristo. Been i niy tintuwe Tulus atin tidéw dob Beeney umule magufusa.

<sup>21</sup> Do nga gu, kagom féngadafén i de kéninontow.

## I Géruwowe Sulat Juane

Ay niy sébaane bé de sénulat Juan, sani ségétéwe kuyug Jesuse brab dumo no amun dini séna dob duniyae niy Jesuse.

Dob ni sulat, féningat Juaney kéluhanay de munur fantag bé de tugién témoro.

<sup>1</sup> Begéney lukése odoroy de munur bé Kristowe. Sémulatu mangéy dob beeme, sani libune fénémili i Tuluse brab dob de ngaém. Toow fo gulaané ku begom. Atin békén saén i begéney gémulaane begom, non i kéluhanay gétigane bé toowe kétoro gulaané ro so begom. <sup>2</sup> I funa keye gémulaan begom non munur gey bé toowe kétoro, atin énda mékédan i kéunur geye de taman sa taman.

<sup>3</sup> I Abaye Tulus brab Nga ne Jesu Kristo, mégédaw ro damén betom, atin méuray damén i na ruwe betom, atin iray ro damén i métanéke fédéw dob betome. Mérigoy ni dob betome non munur tom bé toowe kétoro brab ségédaw tom fo toow.

<sup>4</sup> Toowu fo moror non énggétiga kuy de dumo bé de ngaém munur ro bé toowe kétoro loo bé sénugu i Abaye Tulus betom. <sup>5</sup> Mélaw, Di, ongoté ku dob beeme bé fatut tom ségédaw. Békén mantuy ni sugu labité ku dob ni sulat. Yamula tafayén i ni sugu niray dob betome tidéw féganay. <sup>6</sup> Non amuk ségédaw tom, modor tom bé de sugu i Tuluse. Atin ay niy sugue nirayén betom bé féganaye: Fatut tom ségédaw.

<sup>7</sup> Médooy de mégakar do témoro ménangéy dob de séségiyo-giyo do ingéd dob duniyae ni. Ténoro roy békén kun toow i Jesu Kristowe ménwaléy kéilawan. I de ni do étéw téménoro bé ni, tintu ro fo tugién brab sébanil ro bé Kristowe. <sup>8</sup> Mélaw ingat gom inok énda mésinggula i kélugoté kome gémbék. Atin mélaw gédoté kom i kéluhanay baras gome tidéw dob Tuluse.

<sup>9</sup> I de étéw téménagak bé toowe kétoro Jesu Kristowe atin ménunur bé ségiyowe kétoro, békén ro dumoy Tuluse. Endob i de taus munur bé toowe kétoro, beroy do dumoy Abaye Tulus brab Nga ne so. <sup>10</sup> Mélaw amuk wén i gégumah dob begome atin témoro bé ségiyowe kétoro bé kétoro Kristowe, kagom tayakufén de dob de lawi gom taloo no ségifaé kom. <sup>11</sup> Non amuk ségifaé kom i nan étéw, géamung gom bé de tete galbékén.

<sup>12</sup> Médooy na damén i de kétaya ku béréhén dob begome, éndob énda méuyotu de sénulat. Yamula méuyotu damén mangéy témukaw begom inok géséténgaang tom séuret-uret brab géséoror tom fo toow.

<sup>13</sup> I de nga i dumo muwe sétiman idéng libun fénémili i Tuluse, ségifaé ro so begom.

## I Gétéléwe Sulat Juane

Ay niy sébaane bé de sénulat Juan, sani ségétéwe bé de kuyug Jesus brab dumo no amun dini séna dob duniyae niy Jesuse.

Sénulat Juaney ni sulat dob ségétéwe féndawét Gayo, sani ségétéwe so munur bé Jesuse.

<sup>1</sup> Begéney lukése odoroy de munur bé Kristowe. Sémulatu mangéy dob beeme, Gayo. Beemey toowe fo gulaané ku dumo gu.

<sup>2</sup> Adih, démasalu dob Tuluse bé féfiyoné no beem brab iraya no beem fiyo kégélowohon loo bé kéiray ne beem bé mégéte kéunur.

<sup>3</sup> Toowu fo moror amun énggumah i de dumo to munur bé Kristowe atin nuret roy fantage bé kéfédayday me munur bé toowe kétoro, loo soy adate nodoro mo bé ni toow kétoro. <sup>4</sup> Toow fo dakél i kéoror guwe bé gélingoo kuy fantage bé kéodoroy de nga gu bé toowe kétoro. Been i funa kuwe moror béni, non énggélíngoo kuy fantage bé beeme.

<sup>5</sup> Adih, i kétabanga muwe bé de dumo tom munur ménawet diyaan i féglolonone bé toow i kéunur me. Non fiyon fo ké énda séna gélolo mo bero, tényakufém bero.

<sup>6</sup> I de begey do munur bati dini, amun ménlimud gey méngintulus, nuret i de ni do étéw i kégedaw me bero. Atin amuk géawét ro man diyaan, fiyo ké tabanga mo man bero loo bé fatute mésuwat i Tuluse de inok gétaus ro magéw. <sup>7</sup> Non i funa ruwe magéw inok légébé roy kétoro Kristowe. Atin énda tayakufé roy tabang i de étéw do békén munur bé Kristowe. <sup>8</sup> Mélaw i betome do munur, fatut tabanga tom i de ni do étéw inok géamung tom bé galbék ruwe lémgégb bé toowe kétoro.

<sup>9</sup> Séménulatu sébaan foko sulat mangéy dob de munur diyaan, éndob énda fénggélíngoo Deotrefesey kéféginaw guwe. Méuyot de ké been saén i méguléwe bé de munur diyaan. <sup>10</sup> Atin amuk géangéyu diyaan, ureté ku beem i kéluhanay de réningo no, brab kéluhanay de tete tugi bérnhén fantag bé begeye. Atin békén saén i ni, non amuk géawét diyaan i de dumo tom munur, énda fo tayakufé no bero. Atin géléé noy de fiyo étéw méuyot témayakuf bero, atin énda féahuré no dob lawie féngadafan i de étéw témayakuf bero.

<sup>11</sup> Adih, kago iringén i tete adatén. Yamula iringém i fiyowe adat. I de étéw rémigo fiyo, beroy de étéw i Tuluse. Endob i de étéw rémigo tete, beroy de énda séna géglolo bé Tuluse.

<sup>12</sup> I kéluhanay de étéw émbéréh ro fiyo fantag bé Demetriowe. I métintuwe adatén i émféféngintoowe bé i beene, fiyo fo étéw.

Been soy niy funa keye de démayéw. Atin gétiga mo toow i kéuret geye.

<sup>13</sup> Médofo damén i kéuyoto kuwe uretén beem, éndob mikau de sémulat. <sup>14</sup> Méuyotu damén ké géségito to bé magade ni inok géséténgaang to séuret-uret.

<sup>15</sup> Métanék damén i fédéw me. I kéluhanay de dumo to dini ségifaé ro beem. Ségifaém so begén i kéluhanay de dumo to diyaan.

## I Sulat Judase

Judas i dawét i séménulate bé ni sulat, sani tuwaréy Jesu Kristowe. Sénulat Judasey ni sulat dob kéluhanay de munur bé Kristowe.

Dob ni sulat, féningat Judasey kéluhanay de munur fantag bé de tugién témoro.

<sup>1</sup> Begéney Judase, sani dumo Santiagowe sétiman idéng, brab sugu-sugué Jesu Kristowe.

Sémulatu mangéy dob begome do étéw fén-unur i Tuluse bé Jesuse. Begomey de étéw kégedaw Abaye Tulus brab do diyagané Jesu Kristowe.

<sup>2</sup> Mégédaw damén i Tuluse begom, brab méuray damén i na nuwe begom, brab irayén damén begom i métanéke fédéw.

<sup>3</sup> Do gulaané ku do dumo gu, bé gétahe, i toowe fo kéuyotu ku sulaté ku dob begome, been i niy fantage bé kéfukas Jesuse betom dob de sala tom. Endob kailangan fo sulaté ku na métah i kéféginau guwe begom bé fatut fo fétaus gu i kéatuhu kome bé de étéw méuyot mégalin bé toowe kétoro ni-ray i Tuluse. Non sénarig i Tulusey kétoro ne dob betome do étéwén. Atin kailangan énda fo mégégalino. <sup>4</sup> Kailangan fo féginauné ku begom lee non wén i do étéw do békén méngintulus énggésélawék betom, éndob sékéme ro saén. Fégaliné roy toowe kétoro fantag bé kégedaw i Tulus tome. Non toroé roy fakay kun i de étéw do rémigo bé de mékérésik do adat loo bé de rigoné ro, non énda kémukum i Tuluse kun non toow saén mégédaw. Atin béréhé ro békén kun Kadna tom i Jesu Kristowe brab békén kun Jesus i méguléwe betom. Endob ménrugayén ménbéréh dob Ménsulate Kébéréh i Tulusey fantage bé kékukume bero.

<sup>5</sup> Gétiga komén i kéluhanay de ni béréhé ku begom. Gido loo, féfégétédém gu begom i ni: Bé do gétahe, téngangéy i Kadnaney de Judio mésut tidéw Egipto, sani ingéde gono ro ménrifén. Endob amun énggésut ron, fénléhu i Kadnaney de dumo bero sani do énda munur dob Beene. <sup>6</sup> Féfégétédém gom i de télaki bé do gétahe. Amun méntéfégérotor ro brab téngagak roy fatute gono ro, fén-angéy i Tuluse bero dob délémoné brab nikétén bero bé sangkalie énda mékédano taman sa taman. Atin diyo béleewe ni féngongot-ongot i Tuluse beroy gaiwe mékukum ro fo toow. <sup>7</sup> Féfégétédém gom i de étéw ménbati dob Sodoma brab dob Gomorah brab dob de ingéd gédét diyo. Ségiléw i rénigo ruwe bé de ni do télaki, non tete i de adat ro atin ménwaléy ro bakla. Mélaw kénukum i Tuluse bero bé kéfédiyo ne bero dob gonoy aféye taman sa taman inok émféngat bé de ségiyo

étéw ké atiy mérigowe dob berowe ké ségiléw i de rigoné ro.

<sup>8</sup> Atin ségiléw so bé niy de tugién do témoro. Rigoné roy de toow fo mékérésik dob de karo do lowoh, atin béréhé roy odoro ro saén i kéfémandu i de téginéf ro. Endob mika ro modor bé de sugu i Tuluse atin féngirasé roy de barakatan do étéw dob lawayo. <sup>9</sup> Fiyon foy toowe fo gérotor télakiy Tuluse féndawét Miguel, énda rénigo noy loowe bé ni. Bé do gétahe amun ménléhu i Moisehe, ménséédél i ro Miguele bero Satanase fantag bé ati isuwe bero gégédot bé bangkay Moisehe. Endob énda fo ménfébaraw i Miguele méngirasé Satanase. Yamula ménbéréh saén mano, “Kadnan i géméléé beem.” <sup>10</sup> Endob i de ni do tugién do témoro, féngirasé roy éndaé gésobuto ro. Ségiléw ro bé de mérayor do binatang non énda i gétiga-tiga ro saliyo bé de tete adat ro funa ro mébinasa. <sup>11</sup> Mékukum ro fo toow, non méniring ro bé adat Kaine, sani sunguwe ménméléhu bé gétahe. Atin méniring ro so bé adat Balaame, sani réménigowe bé békéne katabuwan. Non i de ni do tete témoro, rémigo ro tete inok gégédot ro kurta. Niring ro soy adat Korehe non rénigo noy sébanile bé Tuluse funa ro ménbinasa. <sup>12</sup> Amuk sélimud gom inok mama gom brab méngintulus gom, mamung ro begom. Maak do mékérésik bérétik, non rigone roy tete do kétaya ro saén atin énda mon mémala ro de. Rigoné ro saén i de karo kétayan. Ségiléw ro bé de rawén énda muwit ro rana, atin faniréy réfuruhe saén. Atin ségiléw ro so bé de kayéw énda mégonok ro ké gai ro damén mégonok. Maak do ménrandutén do kayéw do mégangu. <sup>13</sup> I de ni do tugién do témoro, ségiléw ro bé de dakél do bagél dob dogote ké wén i défuk, non i de tete do mékémala do rigoné ro, maak do mékérésik buro-buro dob rotor i wayége. Ségiléw ro bé de gitooon énda modor ro dob fatute aguwu ro, non tagaké roy toowe kétoro. Mélaw ténafay i Tulusey toowe fo délémon gono ro méférisu taman sa taman.

<sup>14</sup> Atin i Enoke, sani gééneé katufuan tidéw dob Adame, nuretén i kébéreh i Tuluse sénarigén dob beene fantag bé de ni do étéw mano, “Téngténg gom! Gégunah moso i Kadnane beroy firoye ngibu do télaki no, <sup>15</sup> inok susiné noy de rénigo kéluhanay de étéw. Atin kukumé noy de békén méngintulus do étéw do ménsala non bé kéluhanay de tete rénigo ro brab kéluhanay de tete kébéreh ro béréh ro sébanil bé Tuluse.”

<sup>16</sup> I de ni do tugién do témoro, démayun ro butédbutéd brab démowoy. Modor ro saén bé de tete kétaya ro. Atin do fébantug-bantug ro brab kémuwéy bé de étéw inok mérigu saén i de karo kétayan.

<sup>17</sup> Endob do dumo gu, fégtédém gom i bénréh i de apostol i Kadna tome Jesu Kristo begom fantag bé ati mérigowe dob de gai moso. <sup>18</sup> Bénréh ro begom maro, “Amuk gégumahén i tamfaday de gai, wén i do étéw démiyangka begom. Been i niy de étéw odoro roy de tete kétaya ro sébanil bé Tuluse.” <sup>19</sup> Been i niy de étéw émfésébanil begom. Odoro ro saén i de tete kétaya ro. Atin i Rémogor i Tuluse énda batién dob berowe. <sup>20</sup> Endob i de begom do dumo gu, fétaus gom i késétabang gome inok méégét i kéunur gome bé kétoroé tidéw dob Tuluse. Atin fédaya gom i barakatane Rémogor i Tuluse témabangan begom démasal. <sup>21</sup> Atin fétaus gom i kétangaf gome bé kégedaw i Tuluse bé lala gome ongot-ongot bé kéirayay Kadna tome Jesu Kristo betom bé umule magufusa sabaf bé kéuray i na nuwe betom.

<sup>22</sup> Atin fatut mégedaw gom bé de étéw ruwo-ruwoy fédéw ruwe munur. <sup>23</sup> Tabanga kom i de ségiyo étéw inok énda mékukum ro, maak fégayasé kom bero fégawitén tidéw dob aféye. Atin fatut mégedaw gom bé de ségiyo étéw. Endob fatut mérarék gom bé de mékérésik do adat ro atin ingat gom inok énda géiring gom bero.

<sup>24</sup> Toow tom fo fésalamat bé Tuluse. Beeney gétabange betom inok énda gésala tom, atin Been soy géuwite betom dob adafa nuwe. Atin bé béno, mékédan i de sala tom brab moror tom bé lala tome gégitó bé réndaw ne. <sup>25</sup> Dayéwé tom fo toow i Tuluse féngéw dob Kadna tome Jesu Kristo. Tulusey mémukase betom dob de sala tom. Beeney barakatane méguléw atin kaan i kéluhanay aturane tidéw féganay taman sa taman. Amen.

*Judas*



## I Kéfégétiga Jesu Kristowe bé Juane

Ay niy sébaane bé de sénulat Juan, sani ségétéwe bé de kuyug Jesus brab dumo no amun dini séna dob duniyae niy Jesuse.

Sénulat Juaney ni sulat dob de fitéw timan simbaan dob dakéle ingéd Asia. Dob ni sulat, nuret Juaney fantage bé ati fénténgténg i Tuluse dob beene dob téginéfe. Binuwaya i kédoonoy ni sulat atin fantag so bé ati mérigowe moso. Fénggétigay Tuluse bé Juane bé tabanay Tulusey Satanase moso atin rigoné noy mantuwe duniya brab laway gonoy de munur bé Kristowe bati sétifon bé Tuluse.

<sup>1</sup> Been i niy librowe fantag bé kéfégetiga Jesu Kristowe. I Tuluse sénarigén dob Beene ni inok fégetiga no dob de sugu-suguéy Tuluse ké atiy mérigowe énda mérugayén tidéw béni. Fénggétiga Kristowey ni bé késugu ne bé de télaki no mangéy dob begéne, sani sugu-sugué nuwe féndawét Juan. <sup>2</sup> Atin i begéne, sulaté kuy kéluhanay de énggito gu. Mélaw i ni libro, been i niy kébéreh i Tuluse brab toowe kétoro Jesu Kristowe. <sup>3</sup> Toow fo moror i étéwe masa bé ni libro, atin moror soy de mégélingo bé ni uret tidéw dob Tuluse atin modor bé ni kébéreh. Non éndaén mérugayén métuman i ni uret.

<sup>4-5</sup> Begéney Juane, atin sulaté ku dob begomey de fitéw lumfuk do munur dob de fitéw timan ingéd dob sakuf i dakéle ingéd féndawét Asia.

I Tuluse brab Rémogor ne brab Jesu Kristowe, mégédaw ro damén begom atin irayén damén begom i métanéke fédéw. I Tuluse, ménwénéntidéw féganay, atin wén so béleewe ni, atin énda mékédano taman sa taman. Atin i Rémogor i Tuluse bati dob adafay Tuluse atin wén i fitéw fiman barakatén. Atin i Jesu Kristowe, méсарigon i kébéreh ne. Beeney Nga i Tuluse loo soy sunguwe méntébule inok méuyag taman sa taman. Been soy méguléw bé kéluhanay de méguléw dob duniyae ni.

Mégédaw foy Jesuse betom. Atin fénukasén betom dob de sala tom bé kéléhu ne dob kruse. <sup>6</sup> Atin fénwaléyén betom do fadi, atin Been i méguléwe betom. Rigoné tom i galbék i fadie méngadaf bé Abay ne Tulus. Mégédaw damén i Jesu Kristowe atin méguléw damén taman sa taman. Amen!

<sup>7</sup> Séfule moso i Jesu Kristowe giton gégumah dob de rawén. Atin gitoy kéluhanay de kéilawan, fiyon i de étéw ménméléhu de bé do géta. Atin i kéluhanay de étéw dob

duniyae ni, kémérew ro sabaf bé Beene. Méri go damén. Amen.

<sup>8</sup> I toowe fo barakatan Kadnan Tulus, wénén tidéw féganay, atin wén so béleewe ni, atin énda mékédano taman sa taman. Bénréh i Tuluse mano, “I Begéne Alfa brab Omega, sani féganayane brab tamanane.”

<sup>9</sup> Begéney Juane, sani ségétéwe dumo gom munur bé Jesu Kristowe. Téméningkélu bé kéférasaye begén ségiléw bé kéluhanay de étéw féguléwo Jesu Kristowe. I Begéne, sabaf bé kéuret guwe bé kébéreh i Tuluse brab kétoro guwe bé kéuret Jesuse, féngagéyén begén fénbati maak férisu dob ni bungéd féndawét Patmos. <sup>10</sup> Wén i no sébaan gai kéféngadaf bé Kadnane, fénémanduoy Rémogor i Tuluse begén. Atin énggélingoo kuy métanuge béréh maak témburi tidéw dob ségang guwe. <sup>11</sup> Ménbéreh mano, “Sulatém i énggito muwe, atin féuwitém mangéy dob de ni do fitéw lumfuk do munur Begén do bati dob Efeso, Esmirna, Pergamo, Tiatira, Sardis, Filadelfia, brab Laodisia.”

<sup>12</sup> Tidéw béno méntékélidu inok téngténgé kuy ni émbéreh dob begéne. Atin énggito guy fitéwe timan bélowon solo. <sup>13</sup> Atin wén i ségétéwe téménindég dob kérara i de fitéw ni timan solo. I falas ne maak kéilawane. Métaah i kégal ne taman dob de sékéyén. Atin lénégétén i bélowone dob kuméng ne. <sup>14</sup> Toow fo fute i buk ne maak fute safut, atin i de moto no maak rino aféy. <sup>15</sup> Atin i de sékéyén sémélinang maak galang métunag dob aféy. Atin i béréh ne maak érok samfaw. <sup>16</sup> Atin wén i fitéw timan gitooon génamak i kuwonone kémérén. Atin wén i sundang mésut dob ba ne maak dila. Atin i ni sundang, murém i de baén sébala-bala. Atin toow fo géfékaya i rangih ne maak térésang ké géutuh. <sup>17</sup> Amun énggito guy ni étéw, méntélingkébu dob adafa nuwe maak ménléhuun. Endob nahayén i kuwonone kémérén dob begéne atin ménbéreh mano, “Kago mégilak. Begéney féganayane brab tamanane. <sup>18</sup> Begéney méuyage. Ménléhuu, éndob méntébuleu, atin méuyagu taman sa taman. Wén i atura ku méguléw bé kéléhue brab gonoy de ménléhu. <sup>19</sup> Mélaw sulatéw i de énggito mo, sani de méri go béleewe ni brab de méri go moso. <sup>20</sup> Béréhé ku beam i atag i de fitéw timan gitooon gito mo dob kuwonone kémér gulo i de fitéw timan do bélowon solo. I de fitéw timan do gitooon, beroy de maak télaki bantaya roy de fitéw lumfuk do munur. Atin i de fitéw timan do solo, beroy de maak do fitéw lumfuk do munur.”

## 2

<sup>1</sup> Atin féntaus Kristowey kébéreh ne mano, “Sulatém dob télakiy Tuluse démiyaga bé de munur bati dob ingéde Efeso mamó, ‘Ay niy kébéreh Jesuse. Begéney gémamake bé de fitwé timan gitoon dob kuwonone kémér gu brab magéwe dob kérara i de fitwé timan bélowon solo. <sup>2</sup> Gétiga kuy de rigoné kom, atin gétiga ku mégéror gom gémalbék brab gétiga kuy kétingkél gome. Atin gétiga ku so mika gom sélawék bé de tete étéw. Atin ténéngkad gom i de étéw béréhé ro do apostol ro kun funa kom énggétigan bé békén ro do tintu apostol. Atin gétiga kom tugién i kétoro ruwe. <sup>3</sup> Atin gétiga ku so témingkél gom bé kéférasay i de étéw begom sabaf bé kéunur gome Begén. Atin fiyon fo ké mérasay gom, énda mékédan i kéunur gome. <sup>4</sup> Gido loo, wén i téboé ku begom. Béleewe ni, éndaén féimué kom Begén loo bé do géta. <sup>5</sup> Fégétédém gom i sunguwe kéimu gom Begén. Fatut gésénule gom brab tagak gom i de sala gom atin rigo gom fiyo loo bé do géta. Non amuk énda rigoné kom i ni, mangéyu dob begome brab kédané kuy soloe tidéw dob gono nuwe. <sup>6</sup> Endob wén soy fiyo rénigo gom kétaya ku. Non ménkérít gom bé de tete rigonéy de Nikolaita ségiléw bé kékérito kuwe bero.

<sup>7</sup> “Kéluhana kom, fégélíngo gom i kébéreh i Rémogor i Tuluse dob begome do munur.

“ I de étéw gétabana roy Satanase, iraya ku bero kuwagib mama bé onok i kayéwe miray bé umule magufusa, sani kayéwe dob bélowone fantad i Tuluse. ”

#### *Esmirna*

<sup>8</sup> Atin féntaus Kristowey kébéreh ne mano, “Sulatém dob télakiwe démiyaga bé de munur bati dob ingéde Esmirna mamó, ‘Ay niy kébéreh guwe, sani Nga i Tuluse. Mérino i de moto gu maak aféy atin sémilinang i de sékéy gu maak galang métunag dob aféye. <sup>9</sup> Gétiga kuy de rigoné kom, brab kégédaw gome, brab kéunur gome, brab de galbék gom, brab de kétingkél gom. Atin gétiga ku so toow na fo fiyoy de rigoné kom béleewe ni bé do géta. <sup>10</sup> Gido loo, wén i téboé ku begom. Wén i libune féndawét Jesebel, sani ménbérehe been kun i sarigoy Tuluse muret. Atin féndaya gom i ni libun témoro bé bigae dob de kuyug gu brab fénamaén bero bé de amaén ténulak dob adafay de kéninontow. <sup>11</sup> Téningkélo ku, brab iraya ku gai inok gésénule brab tagaké noy ni tete rigoné no. Endob mika fo témagak bé de ni do tete rigoné no. <sup>12</sup> Mélaw féderuuné ku inok énda géétékén tidéw dob iroo nuwe, loo soy de dumo no ménsébiga. Rigoné kuy ni béleewe ni, amuk énda tagaké roy de tete rigoné ro. <sup>13</sup> Atin féluhué ku soy de kuyugén. Tidéw béno, i de munur dob kéluhanay de ingéd, gétiga ro mélaw i Begéne, gétiga kuy kéfégitung i kéluhanay de étéw brab de kétaya ro. Atin iray gu moso i fatute dob séngae ségétéw étéw sabaf bé de rigoné no.

<sup>11</sup> “ I kéluhana kome, fatut fégélíngo gom i kébéreh i Rémogor i Tuluse begom do munur.

“ I de étéw gétabana roy Satanase, énda mékukum ro bé géruwowe kéléhu. ”

#### *Pergamo*

<sup>12</sup> Atin féntaus Kristowey kébéreh ne mano, “Sulatém dob télakiwe démiyaga bé de munur bati dob Pergamo mamó, ‘Ay

niy kébéreh guwe, sani wéne sundangén murém i de baén sébala-bala. <sup>13</sup> Gétiga kuy Satanás i méguléwe bé ingéd gome, gido loo ménfédayday gom munur dob Begéne. Atin énda ténagak gom i kéunur gome fiyon fo ké fénléhu roy Antipase sani méсарigone muret fantag bé Begéne. Fénléhu ro diyaan dob ingéde féngguléwo Satanase. <sup>14</sup> Gido loo, wén i de téboé ku begom. Non wén i do dumo begom modor bé kétoro Balaame bé do getah. Non i Balaame, ténoroén i Balake émfésala bé de Judio bé kéféama ne bero bé amaéne ténulak dob de kéninontow. Brab ténoroén bero bigaén. <sup>15</sup> Atin loo so bé ni, wén i do dumo begom modor bé kétoro i de Nikolaita. <sup>16</sup> Fatut gésénule gom brab tagak gom i de sala gom. Amuk énda, mangéyu dob begome énda mérugayén tidéw béni brab tibohé ku begom bé sundange mésut dob ba guwe maak díla.

<sup>17</sup> “ I kéluhana kome, fatut fégélíngo gom i kébéreh i Rémogor i Tuluse dob de munur.

“ ‘Dob de étéw gétabana roy Satanase, iray gu beroy amaéne féndawét mana nitong dob lawayo diyo. Atin iraya ku soy séngae ségétéw bero bé futee batéw. Atin dob séngae sébaan batéw wén i ménsulate de mantu dawét énda i gégélolo de saliyo bé étéwe gégédot bé ni batéw. Bero saén i de gégélolo de. ”

#### *Tiatira*

<sup>18</sup> Atin féntaus Kristowey kébéreh ne mano, “Sulatém dob télakiy Tuluse démiyaga bé de munur bati dob Tiatira mamó, ‘Ay niy kébéreh guwe, sani Nga i Tuluse. Mérino i de moto gu maak aféy atin sémilinang i de sékéy gu maak galang métunag dob aféye. <sup>19</sup> Gétiga kuy de rigoné kom, brab kégédaw gome, brab kéunur gome, brab de galbék gom, brab de kétingkél gom. Atin gétiga ku so toow na fo fiyoy de rigoné kom béleewe ni bé do géta. <sup>20</sup> Gido loo, wén i téboé ku begom. Wén i libune féndawét Jesebel, sani ménbérehe been kun i sarigoy Tuluse muret. Atin féndaya gom i ni libun témoro bé bigae dob de kuyug gu brab fénamaén bero bé de amaén ténulak dob adafay de kéninontow. <sup>21</sup> Téningkélo ku, brab iraya ku gai inok gésénule brab tagaké noy ni tete rigoné no. Endob mika fo témagak bé de ni do tete rigoné no. <sup>22</sup> Mélaw féderuuné ku inok énda géétékén tidéw dob iroo nuwe, loo soy de dumo no ménsébiga. Rigoné kuy ni béleewe ni, amuk énda tagaké roy de tete rigoné ro. <sup>23</sup> Atin féluhué ku soy de kuyugén. Tidéw béno, i de munur dob kéluhanay de ingéd, gétiga ro mélaw i Begéne, gétiga kuy kéfégitung i kéluhanay de étéw brab de kétaya ro. Atin iray gu moso i fatute dob séngae ségétéw étéw sabaf bé de rigoné no.

<sup>24</sup> “Endob médoo gom dob Tiatira, énda ménodor gom bé ni tete kétoro. Atin énda gétiga kom i de féndawét do ménalém kétoro Satanase. Atin mélaw énda umana kuy kékérégena kome. <sup>25</sup> Endob fatut fééégét gom i kéunur gome taman séfuleu. <sup>26</sup> Atin dob de étéw gétabana roy Satanase atin modor ro bé kétaya kuwe taman dob tamanane, iray gu beroy aturane méguléw bé de ingéd dob duniyae ni. <sup>27</sup> Iray guy ni aturan non i Abay guwe Tulus nirayén so dob Begéne. Atin émbagér i kéfégüléw ruwe, atin énda i géatuh bero. <sup>28</sup> Atin iray gu so dob berowey solo mudobe.

<sup>29</sup> “I kéluhana kome fatut féégélingo gom i kébéreh i Rémogor i Tuluse dob de munur.”

### 3

#### *Sardis*

<sup>1</sup> Atin féntaus Kristowey kébéreh ne mano, “Sulatém dob télakiwe démiyaga bé de munur bati dob Sardis mamó, ‘Ay niy kébéreh guwe, sani gémamake bé Rémogor i Tuluse wén i fitéw timan barakatén brab do fitéw timan gitoo. Gétiga kuy de rigoné kom. Atin gétiga ku so médooy étéwe émbéreh bé wén kun i umul gom magufusa. Endob énda toowén, non énda gitono dob de rigoné kom. <sup>2</sup> Mélaw, tékénal gom! Atin fébagér gom i kéunur gome, non amuk énda, mékédan. Non gétiga ku kulang sénay adat gome funay Tulus guwe énda méswatén. <sup>3</sup> Féégétédém gom i ténoroe nén begom brab nunuro kome nén bé do géta. Odor gom de brab fatut gésénule gom atin tagak gom i de sala gom. Non amuk énda gésénule gom, mangéyu dob begome bé gaiwe énda karangé kom de, loo bé kégumah i ménakawe. <sup>4</sup> Endob wén soy do dumo begom dob Sardis, énda dénungiso roy de kégal ro, sani de énda ménamung dob de tete adat. Mélaw géodor gom Begén kémégal fute non médait gom de. <sup>5</sup> I kéluhanay de gétaban bé Satanase, fékégalé ku bero fute loo bé ni, atin énda kédané kuy de dawét ro tidéw dob librowe sénulata ku bé de dawét i de étéw gégédot bé umule magufusa. Atin béréhé ku dob téngaangay Abay guwe Tulus brab de télaki no, bé beroy de kuyug gu.

<sup>6</sup> “Kéluhana kom, fatut féégélingo gom i kébéreh i Rémogor i Tuluse dob de munur.”

#### *Filadelfia*

<sup>7</sup> Atin féntaus Kristowey kébéreh ne mano, “Sulatém dob télakiwe démiyaga bé de munur bati dob Filadelfia mamó, ‘Ay niy kébéreh guwe, sani mékétéfuwe brab toowe. Wén i atura ku méguléw loo bé kéfégüléw Datu Dabide bé do géta. Atin amuk féahuré kuy ségétéwe étéw dob kéfégüléw guwe, énda i géalang de. Atin amuk énda féahuré kuy ségétéwe étéw, énda i géféahur de. <sup>8</sup> Gétiga

kuy de rigoné kom. Atin fiyon fo ké énda médoo gom, ménfédayday gom munur Begén brab ménodor gom bé kétoro guwe. Mélaw unkaé kuy bégawane fingé dob begome inok géahur gom, atin énda i géfintu de. <sup>9</sup> I de étéw do émbéreh do Judio ro kun, tugién ro non beroy de kuyug Satanase. Félingkuwédé ku bero dob adafa kome, atin gétiga ro mélaw mégédawu begom. <sup>10</sup> Sabaf téméningké gom loo bé sénugu guwe, diyagané ku begom inok énda gésugsug gom dob de mérégén do gai gégumah moso dob duniyae ni féégéngkad bé kéluhanay kélawane. <sup>11</sup> Séfuleu énda mérugayén tidéw béni. Lékafit gom dob toowe kétoro unuro kom inok énda métaadin i barase iray gu begom. <sup>12</sup> I de étéw gétaban bé Satanase, féwaléyé ku bero do maak liléy i lawi i Tuluse atin éndaén tagaké ro de. Atin sulaté ku dob berowey dawét i Tuluse guwe, brab dawét i ingéd i Tuluse, sani mantuwe ingéd féndawét Jérusalem mélus moso tidéw dob Tuluso dob lawayo. Atin sulaté ku so dob berowey mantuwe dawét gu.

<sup>13</sup> “I kéluhana kome, fatut féégélingo gom i kébéreh i Rémogor i Tuluse dob de munur.”

#### *Laodisea*

<sup>14</sup> Atin féntaus Kristowey kébéreh ne mano, “Sulatém dob télakiwe démiyaga bé de munur bati dob Laodisea mamó, ‘Ay niy kébéreh guwe, sani féndawéte “Amen” non toow i kéuret guwe funay de étéw gésarig. I Tuluse fénlmbagén Begén i kéluhanane. <sup>15</sup> Gétiga kuy de rigoné kom. Enda mon méduf gom brab énda mon mélégénéy gom, sani de békén kuyug gu taloo no sébanil Begén. Endob toow fo damén méuyotu de ké méduf gom taloo no mélégénéy gom. <sup>16</sup> Atin sabaf bé énda mon méduf gom taloo no mélégénéy gom, duraé ku begom tidéw dob ba guwe. <sup>17</sup> Béréhé kom makom, “Kawasa gey, wén gey bé kéluhanay kailanga keye.” Endob i toowe, mékégedaw-gédaw gom, éndob énda gétiga kom de. Non sabaf bé kékulang i kéunur gome, maak do méskinan gom brab do félawas brab do langafén. <sup>18</sup> Mélaw féginauné ku begom, béléy gom bé fiyowe bélowon, sani tintuwe kéunur dob Begéne, inok waléy gom kawasa. Atin béléy gom so bé futee kégal sani métintuwe rigonén inok éndaén maak félawas gom mémala. Atin béléy gom so bé uwa motowe inok gégito gom. <sup>19</sup> I de étéw kégedawa ku, géléé ku brab fífíté ku bero ké mésama ro. Mélaw fatut gésénule gom atin tagak gom i de sala gom. <sup>20</sup> Féégélingo gom, diyogu dob bégaway lawi gome témawag. Amuk wén i géégélingo bé béréhé guwe atin unkaé noy fintue inok géahuru, mahuru atin sérénganu de mama. <sup>21</sup> Dob de étéw gétabana roy Satanase, iray gu beroy kuwagibé méсар dob sékulo kuwe

amuk méсарu nén méguléw, ségiléw bé kétaba kuwe brab kéсар guwe dob sékuloy Abay guwe Tulus bé lala ne méguléw.

<sup>22</sup> “I kéluhana kome, fatut fégléngo gom i kébéréh i Rémogor i Tuluse dob de munur.”  
Beem i niy bénréh Kristowe.

#### 4

<sup>1</sup> Tidéw béno, wén man i fénggitoy Kadnane begén. Atin énggito guy fintue ménungka dob lawayo. Atin ménbéréh man i étéwe ménbéréh dob begéne bé gétahe de. Atin ménbéréh man maak béréh témburi mano, “Enggon, nik go angéy dini, atin fégito gu beem i kailangane mériго moso.”  
<sup>2</sup> Sonom béno, féngagéw i Rémogor i Tuluse begén mangéy diyo. Atin diyo dob lawayo, wén i saray datue. Atin wén i étéw de ménsar diyo. <sup>3</sup> Sémélinang i rangih ne loo bé de balilaga do batéw féndawét haspe brab kornalina. Atin wén i mélnéwe béluntu loo bé falas i ballagae batéw féndawét esmeralda géliwet dob sarane ni. <sup>4</sup> Atin wén soy ruwo folo bra fot sara datu géliwét bé ni saran. Atin diyo ménsar i ruwowe folo bra fot do lukés odoron. Kéménégal ro fute brab wén soy do bélowon do lakay diyo dob de uléw ro. <sup>5</sup> Atin tidéw dob sarane dob kэрarae, mésut i kilote brab déguwe brab létee. Atin diyo dob adafay sarane ni, wén i do fitéw timan mérino solo. Beroy de fitéw rémogor i Tuluse. <sup>6</sup> Dob adafay sarane ni, wén i maake dogot maak féngalungon non toow fo métiyéw.

Atin wén i fot gétéw barakatan étéw géliwét bé sarane ni. Atin ménféno motoy de lowoh ro dob de saréwo ro brab dob de ségang ro. <sup>7</sup> I sunguwe de loo bé falas i binatange féndawét leon. Atin i géruwowe de maak falas i tuduwe safi. Atin i gétéléw ruwe maak falas i lagéye kéilawan i uléw ne, atin i gééfot ruwe maak falas banug lémayang. <sup>8</sup> I séngae ségétéw bé de ni fot gétéw étéw barakatan, wén i do ném timan do fafak ro, atin i de lowoh ro ménféno do moto fiyon i fantad i de fafak ro. Atin fuwéh na kélungonon, énda témérén ro kémanta maro, “Mékétéfu, mékétéfu, mékétéfuy barakatane Kadnan Tulus. Wénén i Tulus tidéw fénganay, wén so béleewe, atin énda so mékédano taman sa taman.”

<sup>9</sup> Atin i de ni do fot gétéw do barakatan étéw, kémanta ro dayéwe ro brab bantugé ro brab fésalamat ro bé ménsare dob sarané ni, sani Tulusé méuyag taman sa taman. I lala ruwe rémigo bé ni, <sup>10</sup> i de ruwo folo bra fot gétéw do lukés odoron méntédunsum ro dob adafay Tulusé, féngadafé roy Tulusé méuyag taman sa taman. Atin fédiyoé roy de lakay ro dob adafay saray Tulusé ni, atin émbéréh ro maro, <sup>11</sup> “Kadna key Tulus, Beem i médaite dayéwén brab bantugén. Atin Beem i

médaite méguléw brab bantugén. Non Beem i léménimbage bé kéluhanane, atin méwén i kéluhanane béleewe ni sabaf saén bé kétaya muwe.”

#### 5

<sup>1</sup> Tidéw man béno, énggito guy déniline sulat dob kuwonone kémér i ménsare dob saray Tulusé ni. Atin méntéléb bé sulate sébala-bala. Atin wén i fitéw timan tandaén inok énda i géungka de. <sup>2</sup> Tidéw béno, énggito guy barakatane télaki. Atin méntanug fo toow i kébéréh ne mano, “Ati médaite kémédan bé de ni do tanda atin unngaé noy ni sulat inok basané no?”  
<sup>3</sup> Endob énda i ségétéw étéw médait géungka de taloo no géténgténg dob bukap ne, fiyon dob lawayo diyo taloo no dob fantade atin wén mélaw no dob fantad i fantade. <sup>4</sup> Atin kéménrewu fo toow non énda i ségétéw étéw giton géungka bé ni sulat taloo no géténgténg dob bukap ne. <sup>5</sup> Tidéw béno, i ségétéwe bé de lukés odoron ménbéréh dob begéne mano, “Kago kémérew. Téngténgém. I Jesuse, sani fédawéténe ‘leon’ séfu Judah, séfu Datu Dabid so. Beeney téménabanane bé Satanase atin wén mélaw i kuwagibén kémédan bé de fitéw tanda atin unngaé noy ni sulat.”

<sup>6</sup> Tidéw béno, énggito guy Natiwe Bili-bili téménindég dob kэрara i saray Tulusé ni. Atin sénliwétoy fote gétéw étéw barakatan brab do lukés odoron. Atin i Natiwe ni Bili-bili, énggito guy de falién fénggéléhuén bé do gétahe. Atin wén i fitéwe sidungén brab fitéw timan moto no, sani fitéwe rémogor i Tulusé fénuwitén dob kéluhanay de ingéd dob duniyae ni. <sup>7</sup> Atin i Natiwe ni Bili-bili, ménangéy fégédét brab éndotén i sulate ni dob kuwonone kémér i ménsare dob sarane ni. <sup>8</sup> Bé lala ne rémigo bé ni, i de fot ni gétéw do barakatan étéw brab de ruwo folo bra fot gétéw do lukés odoron, méntédunsum ro dob adafay Natiwe ni Bili-bili. Atin i séngae ségétéw bero, wén i génamakén baatén féndawét alpa, brab génamakén sé bélowone biléw ménféno dukah, sani kédasal i de étéw i Tulusé. <sup>9</sup> Atin kéménanta ro mantu kanta maro, “Beem i médaite médot bé sulate ni atin médait go kémédan bé de tanda. Non fénléhuén Beem, atin daraém i fégbébéye bé de étéw inok méfukas ro atin géséfule ro mangéy dob Tulusé tidéw dob séngae tribo, dob séngae késébéréh, brab dob séngae kélasé étéw, brab dob séngae ingéd. <sup>10</sup> Fégléwo mo bero brab fénwaléyém bero do fadi inok féngadafé roy Tulusé geye. Atin féfégléwéwé mo bero moso dob duniyae ni.”

<sup>11</sup> Tidéw béno, ténéngténg gu man ségule atin énggélíngoo kuy béréh i de laksaén do télaki. Téménindég ro géliwét bé sarane ni brab de fot gétéw do barakatan étéw brab de lukés odoron. <sup>12</sup> Atin kéménanta ro toow fo

métanug maro, "I Natiwe Bili-bili fénléhuén médaít fo dayéwén brab bautugén. Atin toow fo barakatan, brab toow fo gétigan, brab toow fo kawasa, brab toow fo émbagér." <sup>13</sup> Atin énggélíngoo kuy kantay kéluhanay de étéw dob lawayo brab dob fantade brab dob fantad i fantade brab dob dogote, brab kéluhanay de étéw dob kéluhanay de gonon. Kémanta ro maro, "I Beene mésar dob saray Tuluse ni brab i Natiwe ni Bili-bili, médayéw ro damén brab émbantug ro fo toow taman sa taman. Atin méguléw ro so taman sa taman." <sup>14</sup> Atin bang i de fot ni gétéw do barakatan étéw, "Amen!" Atin i de lukés odoron méntédunsum ro méngintulus.

## 6

### *I de tanda*

<sup>1</sup> Tidéw béno, énggito guy Natiwe Bili-bili kédané noy sunguwe bé de fitéw timan do tanda. Atin énggélíngoo kuy ségétéwe bé de fot gétéw do barakatan étéw ménbéréh maak léte mano, "Enggon!" <sup>2</sup> Atin amun ténéngténg gu, énggito guy futee kuda. Atin i étéwe de kéménuda, géménamak bohor. Atin wén i ménirayan de lakay. Atin ménagéw méngangéy sétiboh inok tabané noy de kéilawan.

<sup>3</sup> Tidéw béno, kénday Natiwe Bili-biliy géruwowe bé de tanda dob sulate ni. Atin énggélíngoo kuy béréh i géruwowe bé de barakatan do étéw mano, "Enggon!" <sup>4</sup> Tidéw béno, ménsut i furowe kuda. Atin i étéwe de kéménuda, nirayan kuwagib méganay bé késégirawe dob duniyae ni inok sétiboh i de étéw brab séféluhu ro. Atin niray de soy dakéle sundang.

<sup>5</sup> Tidéw béno, kénday Natiwe Bili-biliy gétéléwe bé de tanda dob sulate ni. Atin énggélíngoo kuy gétéléwe bé de barakatan do étéw mano, "Enggon!" Atin amun ténéngténg gu, énggito guy mitame kuda. Atin i étéwe de kéménuda, géménamak timbangan. <sup>6</sup> Atin wén i énggélíngoo ku maak béréh étéw tidéw dob kérara i de fot ni barakatan do étéw mano, "Gétéléw saén baad bé ségantange arinah i mébéléye bé ségétérésangane sahud, atin ségantang faréy féndawét 'barley' saén i mébéléye bé ségétérésangane sahud. Atin kagom singgulaén i nore taloo no arak."

<sup>7</sup> Tidéw béno, i Natiwe Bili-bili kénda noy géfote tanda tidéw dob sulate ni. Atin énggélíngoo kuy géfote barakatan étéw mano, "Enggon!" <sup>8</sup> Atin amun ténéngténg gu, énggito guy mérégunire kuda. Atin i dawét i étéwe de kéménuda "Kéléhu". Atin wén soy ségétéwe étéw énggétundug de féndawét "Emferno". Niray beroy aturane méméléhu bé géfote baad bé de kéilawan dob duniyae ni. Féléhué ro bero dob késégirawe brab

dob lénggobe brab dob déruune brab dob de mérayar binatang.

<sup>9</sup> Tidéw béno, i Natiwe Bili-bili kénda noy gélimowe bé de tanda tidéw dob sulate ni. Atin énggito guy de rémogor i de étéw fénléhuén sabaf bé kéunur ruwe bé kébéreh i Tuluse brab kéuret ruwe fantag bé ni. Diyo ro dob fantad i ahayane tulakan. <sup>10</sup> Ménkes ro métanug maro, "Barakatan Kadnan, i Beeme mékétéfu go brab toow i kébéreh me. Kédiron nay kékukum me sémuli dob de tete étéw dob duniyae ni sabaf bé kéféléhu ruwe begey?" <sup>11</sup> Atin i séngae ségétéw bero nirayan fute kégal. Atin wén i ménbérehé dob berowe bé fatut témérén ro na singkow saén taman féléhuén nay kéluhanay de dumo ro do sugu-suguéy Tuluse kailangan féléhuén so loo bé berowe.

<sup>12</sup> Atin énggito guy Natiwe Bili-bili kédané noy géneme bé de tanda. Tidéw béno, wén i toow fo mémbagér luba, atin i térésange ménwaléy mitam maak mitam safut. Atin i térésang kélungonone ménwaléy furo maak dara. <sup>13</sup> Atin i de gitooon ménlawu tidéw dob lawayo mangéy dob fantade maak do mata onok kayéw ménlawu bé kégérumfak i émbagére de réfuruh. <sup>14</sup> Atin i lawaye ménalfa maak sulat méndilin. Atin i kéluhanay de tuduk brab de bungéd méntéfégalin ro tidéw dob de gono ro. <sup>15</sup> Tidéw béno, i de datu dob duniyae ni, brab de méguléw, brab de odoroy de sundalo, brab de kawasa, brab de mégatur, brab kéluhanay de étéw fiyon fo ké do rifén taloo no do békén rifén, ménrékunéy ro dob de takub brab dob fantad i de batéw dob de tuduk. <sup>16</sup> Atin ménkes ro dob de tuduk brab dob de batéw maro, "Tamfurén gey inok énda gitoy étéwe ménsar dob saray datue dob lawayo begey atin inok énda gégumah dob begeyey kékérit i Natiwe Bili-bili. <sup>17</sup> Non énggumahén i gaiwe kémukum ro, atin énda i géatuh bero."

## 7

<sup>1</sup> Tidéw béno, énggito guy fote télaki téménindég dob fote sugud i duniyae ni. Atin nalang roy fote réfuruh dob duniyae ni inok énda géiyuf ro dob fantade taloo no dob dogote taloo no dob de kayéw. <sup>2</sup> Atin énggito guy ségyowe télaki énggumah tidéw sébangan nuwitén i tanda i méuyage Tulus. Atin ténawagén métanug i de fot ni télaki sénarigoy Tuluse minasa bé fantade brab dogote. <sup>3</sup> Ménbéreh i ni télaki dob de dumo no télaki mano, "Kagom binasanén i fantade brab dogote brab de kayéw taman énda gétandaa tom i de rangih i de sugu-suguéy Tuluse." <sup>4</sup> Atin énggélíngoo kuy kédooy de méntandaan, mératuh bra fot folo bra fot ngibu gétéw. Atin falan ro tidéw dob kéluhanay triboy de Judio. <sup>5</sup> Atin folo bra ruwo ngibu méntandaane tidéw dob de séfu

Judah. Atin folo bra ruwo ngibuy tidéwe de dob de séfu Ruben. Atin folo bra ruwo ngibuy tidéwe de dob de séfu Gad. <sup>6</sup> Atin folo bra ruwo ngibuy tidéwe de dob de séfu Aser. Atin folo bra ruwo ngibuy tidéwe de dob de séfu Naftali. Atin folo bra ruwo ngibuy tidéwe de dob de séfu Manase. <sup>7</sup> Atin folo bra ruwo ngibuy tidéwe de dob de séfu Simeon. Atin folo bra ruwo ngibuy tidéwe de dob de séfu Lebi. Atin folo bra ruwo ngibuy tidéwe de dob de séfu Isakar. <sup>8</sup> Atin folo bra ruwo ngibuy tidéwe de dob de séfu Sabulon. Atin folo bra ruwo ngibuy tidéwe de dob de séfu Jose. Atin folo bra ruwo ngibuy tidéwe de dob de séfu Benjamen.

<sup>9</sup> Tidéw béno, énggito guy toowe fo dakél ménlimud do étéw. Enda gébilangan ro non toow ro fo médoos. Tidéw ro dob kéluhanay de séségiyo-giyo gékélasi do étéw, brab do tribo, brab do ingéd, brab do késébéréh. Atin téménindég ro dob adafay saray Tuluse ni brab dob adafay Natiwe ni Bili-bili. Atin kéménégal ro fute brab gémenamak ro do dau bongo. <sup>10</sup> Atin ménbéréh ro métanug maro, “Dayéwé tom i Tulus tome ménsar dob sara nuwe, brab dayéwé tom i Natiwe ni Bili-bili non fukasé ro betom dob de sala tom.” <sup>11</sup> Atin i kéluhanay de télaki téménindég ro lémiwét bé saray Tuluse brab de lukés odoron brab de fot gétéw do barakatan étéw. Tidéw béno, méntédunsum ro dob adafay sarane méngadaf bé Tuluse. <sup>12</sup> Ménbéréh ro maro, “Hoo, féngadafé tom i Tuluse non médait dayéwén brab bantugén brab basanan brab fésalamatan. Beoney tintuwe gétingan brab barakatan, brab Beoney méguléwe. Médayéw damén taman sa taman. Amen!”

<sup>13</sup> Tidéw béno, i ségétéwe bé de lukés odoron fénénginsaa no begén mano, “Ati de ni do étéw kéménégal fute, ati tidéwo ruwe de?”

<sup>14</sup> Atin séménumbulu maku, “Idih. Endob i beeme, gétiga mo.”

Atin ménbéréh mano, “Beroy de étéw tidéw dob dakéle kérégènon dob duniyae. Ténumak roy de kégal ro dob dara i Natiwe Bili-bili inok fute, sani kémédane bé de sala ro. <sup>15</sup> Been i niy funa ruwe téménindég dob adafay saray Tuluse brab diyo ro dob lawi i Tuluse fuweh na kélungonon rémigo bé kétayay Tuluse. Atin i Tuluse, sani ménsare dob sara nuwe, diyagané no bero, non diyo dob berowe. <sup>16</sup> Atin éndaén mélayaf ro taloo no térumén ro. Atin éndaén kéédufan ro bé térésange taloo no do ségiyo na méduf. <sup>17</sup> Non i Natiwe Bili-bili dob kèrara i saray Tuluse, Beoney maake mantayan bero brab magifat bero. Atin fananguwité no bero dob de séfut i wayége miray bé umule magufusa. Atin kédanéy Tulusey de kétete i de fédéw ro inok éndaén kémérew ro.”

## 8

<sup>1</sup> Atin amun kénday Natiwe Bili-biliy géfitéwe bé de tanda tidéw dob sulate ni méntané k fo toow i lawayo bé rugay i ségéréfae uras. <sup>2</sup> Tidéw béno, énggito guy de fitéw adafay télaki, sani de démonyun témindég dob adafay Tuluse. Atin wén i ménirayan bero fitéw timan témburi.

<sup>3</sup> Atin wén man i ségiyowe télaki énggumah ménuwit bélowon fédéngon dukah. Atin ménangéy dob ahayane tulakan brab téménindég dob sékulo nuwe. Atin niray dob beoney médoowe dukah inok sélawéké no bé de kédasal i de munur. Atin tulaké no diyo dob bélowone tulakan dob adafay saray Tuluse. <sup>4</sup> Atin i bé i dukahe ni ménsélawéké bé kédasal i de munur, ménangéy rotor tidéw dob fégonone de génamak i télakiwe ni téménindég dob adafay Tuluse. <sup>5</sup> Tidéw béno, i télakiwe ni, éndotén i fégonone bé dukahe atin fénoén bé barawe tidéw dob ahayane tulakan, atin nibérén dob duniyae. Atin léménéte brab déménégu brab kéménilot brab léménuba.

### *I de fitéw témburi*

<sup>6</sup> Tidéw béno, i de fitéw ni gétéw télaki do wén i do témburi ro, téménafay ron inok iyufé roy de témburi ro.

<sup>7</sup> Atin amun iyuféy sunguwe télakiy témburi nuwe, réménana yelo brab aféy ménsélawéké bé darae. Atin i gétéléwe baad bé duniyae méntuwég, loo soy gétéléwe baad bé de kayéw, loo soy kéluhanay de mélunéw do kéroon.

<sup>8</sup> Tidéw béno, niyuf i géruwowe télakiy kaane témburi. Atin ménlawu dob dogotey maake dakél tuduk ménrino bé aféye. Atin waléy dara i gétéléwe baad bé dogote. <sup>9</sup> Atin i gétéléwe baad bé de sédo brab do binatang dob dogote ménléhu ro. Atin ménbinasa soy gétéléwe baad bé de barko.

<sup>10</sup> Tidéw béno, niyuf i gétéléwe télakiy kaane témburi. Atin i dakéle gitooon ménrino maak félatut ménlawu tidéw dob lawayo mangéy dob gétéléwe baad i fulangiwe brab de séfut. <sup>11</sup> I dawét i ni gitooon, “Féla”. Atin i gétéléwe baad bé de wayég ménwaléy féla. Atin médooy de étéw ménléhu non énggèiném ro bé ni wayég féla.

<sup>12</sup> Tidéw béno, niyuf i géfote télakiy kaane témburi. Atin téléw baad bé térésange brab térésang kélungonone brab de gitooon i ménbinasawe de. Mélaw téléw baad i ménkédane bé kégéfékaya ruwe. Atin déménlémon i gétéléwe baad bé fuwehe loo soy kélungone de.

<sup>13</sup> Tidéw béno, bé lala guwe de séna téméngténg, énggélíngoo kuy métanuge béréh i banuge lémayang dob kèrara fuwehe mano, “Toow fo mékégedaw-gédaw i de étéw dob duniyae ni amuk émbéréh sékoy téléwe

timan témburi iyuféy de ménsama télév gétéw télakil”

## 9

<sup>1</sup> Tidéw béno, niyuf i gélimowe télakiy kaane témburi. Atin énggito guy gitooone, sani télakiwe ménlawu mangéy dob duniyae ni tidéw dob lawayo. Atin niray dob beeney gunsie fégeungka bé toowe fo ménalém liyung.

<sup>2</sup> Atin nungkaén i liyunge ni. Sonom béno, ménsut i béle loo bé bél i dakéle aféy. Atin déménlémon i duniyae non nalang i ébéley réndaw i térésange.

<sup>3</sup> Atin ménsut i de kasuk tidéw dob béle ni, atin méntébéragar ro dob fantade. Atin nirayén beroy toowe fo démwawét kékeke maak sifitan. <sup>4</sup> Sénugo ro bé békén binasané roy de kéron taloo no do kayéw taloo no do udenén do nohok. Géfédawéto ro saén i de étéw énda méntandaan i de rangih ro bé tanda i Tuluse. <sup>5</sup> Endob i de kasuk ni énda ténungkasén bero ké féléhué roy de ni do étéw. Yamula, fédawéto ro saén bero taman méifus i limowe gétérésang kélungonon. Atin i kédawét i kékérasaya ruwe loo bé kédawét i kékeke i de sifitan. <sup>6</sup> Atin bé no limo gétérésang kélungonon i de ni do étéw toow fo mérasay, toow ron méuyot damén méléhu, éndob énda fo méléhu ro de.

<sup>7</sup> I falas i de kasuk ni, maak do kuda kudaay de sundalo inok sétiboh. Atin wén i do maak do bélowon do lakay dob de uléw ro. Atin i de falas i de uléw ro maak do lagéy kéilawan. <sup>8</sup> I de buk ro maak do buk libun. Atin i de kifé ro loo bé kiféy de mérayar bi-natang féndawét do leon. <sup>9</sup> Atin i de kuméng ro méntéléb bé maake futow. Atin i béréh i de fatak ro maak béréh i da médoo kalesa magayas mangéy sétiboh. <sup>10</sup> Atin i de igor ro maak igor i da sifitan non kémeke ro. Atin been i ni de igor roy émfédawétone bé de étéw bé rugay i limowe gétérésang kélungonon. <sup>11</sup> Atin i datue méguléw bero, beeney télakiwe mungka bé ménaléme liyung. I dawét ne dob Hebreowe “Abadon”, atin dob Griegowe “Apolion”, I atag ne, “Beeney Minasawe”.

<sup>12</sup> I sunguwe kékérasayan ménggilidén. Atin wén sénay ruwo de énda séna ménrigo no.

<sup>13</sup> Tidéw béno, niyuf i géénéme télakiy kaane témburi. Atin énggilingoo kuy émbéréhe tidéw dob fote sugud i bélowone ahayan tulakan dob adafay Tuluse.

<sup>14</sup> Ménbéréh dob géénéme ni télaki wén i témburi no mano, “Tangéyém i de fot gétéw télaki níkét dob dakéle wayég féndawét Eufrates.” <sup>15</sup> Tidéw béno, ténangéyén i de fot ni gétéw télaki. I de ni do télaki ténafay non bero bé gétahe inok féléhué roy gétéléwe baad bé kéilawane béleewe ni dob tintuwe ni gai. <sup>16</sup> Atin wén i ménbéréhe dob begéne bé i kédooy de sundalo kéménuda ruwo ratuh

laksa. <sup>17</sup> Atin dob ni fénggiton dob begéne, énggito guy de kuda brab de kéménuda de. I de ni do sundalo, wén i de futow fénggétéléb bé de kuméng ro. Furoy de falasén maak aféy brab gadung maak safiro, brab mérégunir maak asupre. Atin i de uléw i de ni do kuda maak do uléw leon. Atin mésut tidéw dob de ba roy aféye brab béle brab asuprewe. <sup>18</sup> Atin fénléhu roy gétéléwe baad bé kéluhanay de kéilawan bé aféye brab béle brab asuprewe mésut tidéw dob de ba ro. <sup>19</sup> I de ni do kuda, dob de ba ro brab dob de igor roy bagér ruwe méméléhu. Non i de igor ro maak do uléw wén i do uléw ro émfédawéton bé de étéw.

<sup>20</sup> Atin i de étéw énda méléhu ro, énda gésénule ro bé kféngadaf ruwe bé de bélowon, do filak, do galang, do batéw, do kayéw do rénigo ro do kéninontow. I de ni do éntingayén énda do gégito ro taloo no do gégélino taloo no do géagéw. Atin i de ni étéw énda so gésénule ro bé de kféngadaf ro bé de saitan. <sup>21</sup> Enda so gésénule ro bé de kféléhu ro, loo soy de kébéliya ro, loo soy de kébigaé ro, loo soy de kféfénakaw ro.

## 10

<sup>1</sup> Tidéw béno, énggito guy ségiyowe barakatan télaki ménlus tidéw dob lawayo. Kéménégal bé rawéne atin léniwét i béluntuwey uléw ne. Atin i rangih ne maak térésang, atin i de sékéyén maak liléy aféy. <sup>2</sup> Atin wén i klohe sulat méndilin dob kémér ne. Atin féndiyoen i kuwonone sékéyén dob dogote, atin i biwonge de dob fantade. <sup>3</sup> Atin téménawag toow fo métanug maak béréh i de leon. Amun téménrén témawag, sénumbuloy fitéwe do métanug léte. <sup>4</sup> Amun téménrén ro, géfédéw sulaté ku damén i de énggélino ku. Endob énggélino kuy émbéréhe tidéw dob lawayo mano, “Kago sulatén i kébéréh i de fitéw timan léte, non fatut sékémén saén.”

<sup>5</sup> Tidéw béno, i télakiwe ni, sani énggito guwe téménindég dob dogote brab dob fantade, ténunggulén i kuwonone kémérén saréw dob lawayo. <sup>6</sup> Atin séménafa dob dawét i Tuluse méuyag taman sa taman, sani léménimbage bé lawaye brab kéluhanay de éntingayén de brab fantade brab kéluhanay de éntingayén de so brab dogote brab kéluhanay de éntingayén de so. Atin ménbéréh i télakiwe ni mano, “Endaén i anggaén! <sup>7</sup> Endob amuk iyuféy géfitéwe télakiy témburi nuwe, féagéwéy Tulusey nékém ne bantakén, loo bé bénréh ne dob de sugu-suguéw do sénarigo no muret bé gétaho.”

<sup>8</sup> Tidéw béno, ménsébéréh man begén i émbéréhe tidéw dob lawayo bé gétahe de mano, “Fégédét go dob télakiwe téménindég dob dogote brab dob fantade atin dotém i méndiline sulat dob kémér ne.”

<sup>9</sup> Mélaw ménfégedétu dob télakiwe ni atin nongot gu dob beene ké irayén begéni klohe ni sulat. Atin ménbéréh dob begéne mano, “Dotém atin amaém. Amuk amaé mo toow fo meh dob ba me maak téné, éndob waléy mélétis dob sur me.”

<sup>10</sup> Tidéw béno, éndot guy klohe ni sulat dob kémér ne, atin nama gu. Amun diyoén dob ba guwe, toow fo meh maak téné. Endob amun énggélino kun, ménwaléy mélétis dob sur guwe. <sup>11</sup> Tidéw béno, wén i ménbéréhe dob begéne mano, “Kailangan ureté mo man ségule i kébéreh i Tuluse fantag bé de médo do ingéd, brab de médo do kélasé étéw, brab de klasi-klasi késébéréh, brab de datu.”

## 11

<sup>1</sup> Tidéw béno, wén i niraye begén fégétémbu maak tugé. Atin wén i ménbéréhe dob begéne mano, “Tindég go atin témbu moy lawi i Tuluse brab ahayane tulakan. Atin bilangém i de étéw diyo dob lawi i Tuluse méngadaf. <sup>2</sup> Endob kago témbunén i de fésayawan non nirayén dob de békén Judio. Gédaa roy mékétéfuwe ingéd Jerusalem taman méifus i fote folo bra ruwo gétérsang kélungonon. <sup>3</sup> Atin sugué ku mangéy diyo muret i de ruwo gétéw sénarigo ku. Kémégál ro do saku atin ureté roy kébéreh i Tuluse diyo taman méifus i séngibuwe bra ruwo ratuh bra ném folo gétérsangan.”

<sup>4</sup> Atin i de ni ruwo gétéw muret, beroy de maak do ruwo timan kayéw féndawét Olibo, atin maak do ruwo ro timan solo diyo dob adafay Kadnay fantade. <sup>5</sup> Atin amuk wén i témulama émfédawéton bero, mésut i aféye tidéw dob de ba ro brab binasané roy de sébanil bero. Mélaw atiy témulamawe bero minasa, féléhuén. <sup>6</sup> Wén i kuwagib ro malang bé ranae bé gaiwe muret ro bé kébéreh i Tuluse. Wén soy kuwagib ro émféwaléy dara bé wayége. Wén soy kuwagib ro kémukum bé de étéw bé de udenén do gékélasé fégédusa dob de udenén do gai kétaya ro. <sup>7</sup> Atin amuk gilidén muret i de ruwo ni gétéw, sétiboh i nagawe bero, sani mé sute tidéw dob liyunge. Atin tabana no bero brab géféléhuo no bero. <sup>8</sup> Atin i de bangkay ro fédiyoén dob kalsaday dakéle ingéd, sani ingéd i Kadna ruwe ménléhu dob kruse. I ménaléme dawéti nan ingéd “Sodoma” taloo no “Egipto”. <sup>9</sup> Atin bé rugay i téléwe gétérsangan bra géraraan, i de étéw tidéw dob kéluhanay de ingéd brab do tribo brab do kélasé-kélasé késébéréh i de étéw, tuliké roy de ruwo ni timan bangkay, atin énda tungkasé ro de ké lébéngén. <sup>10</sup> Atin i de étéw dob duniyae ni, toow ro fo moror sabaf bé kéléhu i de ruwo ni gétéw. Atin rémigo ro do karagiya atin séiray ro do éntingayén sabaf

bé kéoror ruwe de. Non i de ni do ruwo gétéw sénarigoy Tuluse muret bé kébéreh ne ménférasay ro fo toow bé de étéw dob duniyae ni. <sup>11</sup> Endob amun ménifus i téléwe gétérsangan bra géraraan, fénféranaway Tuluse bero inok tébule ro. Atin téméndég ro. Atin i kéluhanay de énggégito bero, toow ro fo ménggilak. <sup>12</sup> Tidéw béno, i de ni do ruwo gétéw sénarigoy Tuluse, énggélino roy métanuge émbéréh dob berowe tidéw dob lawayo mano, “Enggomén, nik gom mangéy dob lawaye ni.” Atin bé lala i kéténgténg i de sébanil ni bero, déméniyat ro mangéy dob lawayo dob rawéne. <sup>13</sup> Sonom béno, léménuba toow fo émbagér. Atin i géfoloe baad bé no ingéd ménbinasa. Atin ménléhu i fitéwe ngibu étéw bé lubae ni. Atin i de ségiyo do étéw toow ro fo ménggilak, atin dénayéw roy barakatane Tulus dob lawayo.

<sup>14</sup> I géruwowe mékégedaw-gédaw gérigonon ménggilidén. Endob gégumah sékoy gétéléwe de.

<sup>15</sup> Tidéw béno, i géfitéwe télaki niyufén i témburi nuwe. Atin wén i de métanug do émbéréh tidéw dob lawayo maro, “I Kadna tome brab Kristo nuwe ménwaléy méguléw bé duniyae. Atin féguléwo no taman sa taman.” <sup>16</sup> Tidéw béno, i de ruwo folo bra fot gétéw lukés odoron sani de ménsar dob de saray de datu dob adafay Tuluse, méntédunsum ro méngadaf bé Tuluse. <sup>17</sup> Atin ménbéréh ro maro, “Toow fo barakatan Kadnan Tulus, Beem i Tuluse bé féganayo atin Tulus go so béni. Fésalamat gey dob Beeme non nusarém i barakat me atin féngganaya moy méguléwe bé duniyae. <sup>18</sup> I de étéw do békén méngintulus, ménkérít ro toow non énggumahén i gaiwe kukumé mo bero. Atin kukumé moy de ménléhu do étéw. Atin been soy niy gaiwe binasané moy de étéw minasa bé duniyae ni.”

<sup>19</sup> Tidéw béno, i lawi i Tuluse dob lawayo, ménungka. Atin i baule fégonon bé de ménsulat fasad i Tuluse énggiton diyo. Tidéw béno, kéménilot brab léménéte brab déménégu brab léménuba brab réménana do dakél yelo.

## 12

<sup>1</sup> Tidéw béno, méntéfégito maake anlung i mérigowe moso mérigob dob lawayo. Wén i libune kéménégal térsang, atin ménutuh dob térsang kélungonone. Atin wén i lakay dob uléw ne fitéw i de gitoo de. <sup>2</sup> Obor i ni libun brab gédétén kéumahan. Atin mélaw ménkes sabaf bé kédawéti i kéféngénga ne.

<sup>3</sup> Tidéw béno, wén man i ségiyowe ménrigo méntéfégito dob lawayo maak anlung. Wén i dakéle diwat-wat furoy falas ne. Fitéw timan i uléw ne brab folo timan i sidung ne. Atin wén i lakay dob séngae uléwén.



<sup>4</sup> Atin i igor ne génuyudén i gétéléwe baad bé de gitoon brab nibérén dob duniyae. Atin diyo téménindég dob adafay libune ni gedét kéumahan inok amaé noy nga ne ké mumahén. <sup>5</sup> Tidéw béno, i libune ni énggégéngga nga lagéy. Beeney méguléwe bé kéluhanay de ingéd atin énda i géatuh bé kéfégléw ne. Endob wén i ménafas bé ngae ni brab nuwitén mangéy dob Tuluso dob lawayo dob sara nuwe. <sup>6</sup> Atin i libune ni ménraréy mangéy dob gonone énda i étéw de bati, dob sébaane gonon ténafay i Tuluse de. Diyo fagifatéy Tulusey ni libun bé séngibuwe brab ruwo ratuh bra ném folo gétérésangan.

<sup>7</sup> Tidéw béno, wén i gira dob lawayo. Atin i ségétéwe bé de télakiy Tuluse féndawét Miguel brab de kuyugén do télaki, ménsétiboh ro sébanil bé diwat-wate. Atin i diwat-wate ni brab de kaan télaki, ménatuh ro. <sup>8</sup> Endob ténabanan i diwat-wate ni brab de télaki no. Mélaw éndaén ténungkasén bero bati dob lawayo. <sup>9</sup> Atin i dakéle ni diwat-wat brab de télaki no nibérén bero tidéw dob lawayo. Beeney Satanase, sani saitane fénggagara noy kéluhanay de kéilawan bé kétéféaléy ne ulé bé gétaho. Atin nibérén mangéy dob duniyae beroy de tete télaki no.

<sup>10</sup> Tidéw béno, énggélíngoo kuy métanuge béréh dob lawayo mano, “Béleewe ni métumanén i kéfukas i Tuluse bé kéilawane. Béleewe ni fénggitoy Tulusey atura nuwe méguléw. Béleewe ni, i Kristoy Tuluse fénggito noy atura nuwe méguléw. Non i témboe bé de dumo gey fuweh na kélungonon, dénédelén tidéw dob lawayo. <sup>11</sup> I de dumo gey ni, ténabana roy Satanase bé dara i Natiwe Bili-bili, atin sabaf bé toowe kétoro nuret ro. Atin énda gulaané roy de karo do férenawa, yamula féndaya roy de étéw méméléhu bero sabaf bé kéunur ruwe. <sup>12</sup> Mélaw, i de begom do bati dob lawayo, oror gom. Endob i de begom do bati dob fantade brab dob dogote, mékégedaw-gédaw gom. Non i Satanase ménlus mangéy dob begome. Atin toow fo mékérít, non gétiga no éndaén mérugay i gai nuwe rémigo tete.”

<sup>13</sup> Atin i diwat-wate ni, amun énggétiga no nibérén mangéy dob duniyae, ménségéta i libune ni ménggéngga nga lagéy. <sup>14</sup> Endob nirayén dob libune niy ruwowe fafak i dakéle banug inok lémayang mangéy dob gonone énda i étéw de bati. Diyo féngifatéy Tuluse bé rugay i téléwe bra géraaran gébélintuwa. Atin énda géugsugén bé Satanase sani diwat-wate. <sup>15</sup> Tidéw béno, i diwat-wate ni fénésutén tidéw dob ba ney médoowe wayég inok anuré noy libune ni dob dunuke.

<sup>16</sup> Endob ténabangay fantadey ni libun atin kéménla brab néséfén i wayége. Mélaw énda ménggégus-sug i libune ni. <sup>17</sup> Tidéw béno, toow fo ménkérít i diwat-wate ni bé libune ni. Atin ménagéw brab ménangéy sétiboh

dob de ségiyo nga i libune ni brab kéluhanay de modor bé de sugu i Tuluse brab de énda témérén munur bé toowe kétoro Jesusé. <sup>18</sup> Atin i diwat-wate ni téménindég dob dénsaane.

## 13

<sup>1</sup> Tidéw béno, énggito guy nagawe géménaun tidéw dob dogote. Folo i sidung ne brab fitéw i uléw ne. Atin wén i lakay dob séngae sidungén. Atin dob séngae uléwén wén i ménsulate de mékémurka dawét. <sup>2</sup> I nagawe ni énggito gu maak falas i mérayare binatang féndawét leopard. Atin i de sékéyén maak sékéy i mérayare binatang féndawét oso. Atin i ba ne maak ba i mérayare binatang féndawét leon. Atin i diwat-wate nirayén dob beeney barakat ne brab atura nuwe méguléw. <sup>3</sup> Atin i sébaane bé de uléw i nagawe ni maak ménléhuén, éndob ménadi-adiy falé ne funa no damén méléhu. Atin i kéluhanay de étéw ménggaif ro de atin ménfuray ro bé nagawe ni. <sup>4</sup> Atin i kéluhanay de étéw fénggadaf roy diwat-wate ni non nirayén dob nagawe niy atura nuwe méguléw. Atin fénggadaf ro soy nagawe maro, “Énda i ségiyo gérotor bé nagawe. Atin énda i géatuh de.”

<sup>5</sup> Atin i nagawe ni, féndaya i Tuluse ménfédayday émbéréh do toow fo tete brab do féféfélangka-langka, méngiras bé Tuluse. Atin ténungkasén méguléw taman méfús i fote folo bra ruwo gétérésang kélungonon. <sup>6</sup> Atin fénémulaén i Tuluse brab dawét ne brab gonoy Tuluse bati brab kéluhanay de étéw bati diyo dob lawayo. <sup>7</sup> Atin féndayaén so sétiboh sébanil bé de étéw i Tuluse, atin féndayaén so ténabana no bero. Atin nirayén dob beeney aturane méguléw bé kéluhanay de étéw tidéw dob de séségiyo-giyo do tribo brab do ingéd brab do késébéréh brab do étéw. <sup>8</sup> Atin fénggadaféy kéluhanay de étéw bati dob duniyae ni, sani de étéw énda ménsulat i de dawét ro dob librowe lénistanan bé de étéw gégedot bé umule magufusa. Sénulatén i de dawét ro bé énda séna ménlimbag i duniyae de. Atin i fénléhue Nati Bili-bili, Been i gefee bé ni libro.

<sup>9</sup> Fatut féngélingo gom kéluhanan i ni: <sup>10</sup> I de étéw kailangan férisunén, waléy ro man méférisu. Atin i de étéw kailangan féléhuén bé sundange, féléhuén ro bé sundange. Mélaw i de begom do étéw i Tuluse, fatut fédayday gom sémarig bé Tuluse atin fétingkél gom dob gaiwe kéréngan gom.

<sup>11</sup> Tidéw béno, énggito guy géruwowe naga ménsut tidéw dob fantade. Ruwo timan i sidung ne maak do sidung bili-bili atin i kébéreh ne maak béréh diwat-wat. <sup>12</sup> Atin i géruwowe ni naga, nusarén i aturay sunguwe naga méguléw dob adafa nuwe. Atin fénggésén i kéluhanay de étéw

dob duniyae méngadaf bé sunguwe naga, sani wéne falién géfédewén damén méléhu éndob ménadi-adi. <sup>13</sup> Atin i géruwowe ni naga, réménigo do médoos do mékégaif. Léménawu aféy dob duniyae ni tidéw dob lawayo dob téngaangay kéluhanay de étéw. <sup>14</sup> Atin énggéfégakara noy kéluhanay de étéw dob duniyae ni sabaf bé de mékégaif ténungkasén rignoné no dob adafay sunguwe naga. Tidéw béno, sénuguén i kéluhanay de étéw dob duniyae ni rémigo kéninontow fégebantug bé sunguwe naga, sani ténibohe bé sundange éndob énda ménléhuén de. <sup>15</sup> Atin i géruwowe naga, ténungkas dob beeney mirayane férénawa bé kéninontowe inok gébérah i kéninontow i sunguwe ni naga brab inok géféléhuo roy kéluhanay de étéw énda féngadafé ro de. <sup>16</sup> Atin i géruwowe ni naga, fénégésén i kéluhanay de étéw, fiyon i de gérotor loo soy de gérifantad, brab de kawasa loo soy de méskinan, brab de rifén loo soy de békén do rifén, fénégésén bero fériigo tanda dob de kuwonon do kémér ro taloo no dob de rangih ro. <sup>17</sup> Amuk énda méntandaan i ségétéwe, énda gébéléyén brab énda so géfébéléyén. Atin i ni tanda, been i dawét i sunguwe naga taloo no rumeroy dawét ne. <sup>18</sup> I de étéw gésobut bé ni, bero saén i de féntilétdéd i Tuluse. Mélaw i de métilétdéd do étéw, fakay gétiga roy atag i ni rumero non tanda i dawét i ségétéwe étéw. Ném ratuh bra ném folo bra ném i ni rumero.

## 14

<sup>1</sup> Tidéw béno, énggito guy Natiwe Bili-bili téménindég dob tuduke féndawét Sion. Atin diyo dob Beeney mératuhe bra fot folo bra fot ngibu étéw. I de ni do étéw, ménsulat dob rangih ruwey dawét i Natiwe ni Bili-bili brab Abay ne Tulus. <sup>2</sup> Atin énggélingoo kuy émbéréhe tidéw dob lawayo maak érok dakél samfaw atin maak métanug léte. Atin i kébérah ne maak béréh i de baat féndawét do alpa. <sup>3</sup> Atin i de mératuh bra fot folo bra fot ngibu do étéw, téménindég ro dob adafay saray Tuluse bra de fot gétéw do barakatan étéw brab de lukés odoron. Atin kéménanta ro sébaan mantu kanta, sani kantawe énggétigay de ni do étéw saén do mén-aun tidéw dob duniyae. <sup>4</sup> Beroy de lagéy do énda ménsala bé késétaya ruwe bé de ségiyo do libun saliyyu bé de bawag ro, non malinis i de adat ro. Atin furay ro bé Natiwe Bili-bili dob séngae ayo no. Beroy de mén-aun tidéw dob de ségiyo do kéilawan inok beroy de sungu do niray dob Tuluse brab dob Natiwe Bili-bili. <sup>5</sup> Énda téménugi ro fiyon ségule. Énda i réniigo ro tete.

<sup>6</sup> Tidéw béno, énggito guy ségiyowe télaki lémayang dob toowe fo gérotor. Atin bé béno so, nuretén i Fiyowe Uret énda mékédano

taman sa taman. Nuretén dob séségiyoyowe gékélassi do étéw brab do tribo brab do késébéréh brab do ingéd. <sup>7</sup> Ménbéréh métanug mano, “Basana kom i Tuluse brab dayéw gom. Non énggumahén i gaiwe kukumé noy de kéilawan. Féngadaf gom i Tuluse, sani réménigowe bé lawaye brab fantade brab dogote brab de séfut.”

<sup>8</sup> Atin ménfuray i géruwowe télaki brab ménbéréh mano, “Ménbinasa nén. Ménbinasa nén i dakéle ingéd Babilonia. Fénolo noy kéluhanay de étéw bé arak ne. Atin i ni arak, been i niy mékérisike adatén émfésala bé de ségiyo étéw.”

<sup>9</sup> Tidéw béno, ménfuray i gétéléwe télaki. Ménbéréh mano, “I de étéw méngadaf bé nagawe brab kéninontow ne, brab méntandaan i de rangih ro taloo no do kémér ro bé tanda i nagawe, <sup>10</sup> mékukum ro fo toow. Non mékérít fo toow i Tuluse bero. I de rémigo bé ni, férasayé no bero bé aféye brab asuprewe dob adafay de télakiy Tuluse brab Natiwe Bili-bili. <sup>11</sup> I aféye fégedusa bero, mégébéh taman sa taman. Fuwéh na kélungonon, énda téméré no démasa bé de étéw méngadaf bé nagawe brab kéninontow ne, sani de étéw méntandaan bé dawét ne.”

<sup>12</sup> Mélaw i de étéw i Tuluse, sani de modor bé sugu i Tuluse brab de énda témérén munur bé Jesuwe, fatut témingkél ro.

<sup>13</sup> Tidéw béno, énggélingoo kuy émbéréhe tidéw dob lawayo mano, “Sulatém i ni: Moror i de munur bé Kadnane ké méléhu ro tidéw béleewe ni.” “Non témérén ron gémalbék atin gédoté roy barase sabaf bé de réniigo ro.”

<sup>14</sup> Tidéw béno, énggito guy futee rawén. Atin wén i ménsar de maak falas kéilawan. Wén i bélowon lakay dob uléw ne atin wén i génamakén murém sanggut. <sup>15</sup> Tidéw béno, wén i ségiyowe télaki ménsut tidéw dob lawi i Tuluse dob lawayo. Atin téménawag toow fo métanug dob étéwe ni ménsar dob rawéne mano, “Usarém i sanggute fégéketéwém. Non énggumahén i gaiwe kémétéw, togothén i duniyae.” <sup>16</sup> Tidéw béno, i étéwe ni ménsar dob rawéne, sénayugén i sanggute dob duniyae. Atin kéntéwén i duniyae.

<sup>17</sup> Tidéw béno, énggito guy ségiyowe télaki ménsut tidéw dob lawi i Tuluse dob lawayo. Wén soy murém sanggut génamakén.

<sup>18</sup> Tidéw béno, i ségiyowe télaki, sani méguléwe bé aféye, ménagéw tidéw dob ahayane tulakan. Ménkes métanug dob télakiwe géménamak murém sanggut mano, “Usarém i sanggut ma nan fégékeléngém bé onok i nohoke féndawét ubas dob safade dob duniyae. Non togoth ron.” <sup>19</sup> Mélaw i télakiwe ni, sénayugén i sanggut ne dob duniyae, atin kénléngén i de ubas tidéw dob safade atin nibéréh dob kalute gonoy Tuluse kémérés

bero non mékérít bé de ni do tete étév.  
<sup>20</sup> Atin ménkérés i de ni do tete étév dob kalute dob liyuy ingéde. Atin ménsut i de dara ro maak dunuk gédét ruwo gémitroy kénalém ne atin téléw ratuh bra ruwo folo gékilomitroy kérayu ne.

## 15

<sup>1</sup> Tidéw béno, énggito guy ségiyowe mékégaif ménrigo dob lawayo maak anlung. Wén i do fitéw gétéw do télaki ménuwit fitéw timan fégedusa bé de kéilawan. Been i niy de gefuray fégedusa non fégefégilid bé kékérít i Tuluse.

<sup>2</sup> Atin énggito guy maake dogot maak féngalungon ménsélawék bé aféye. Atin énggito guy de étév ténabana roy nagawe brab kéninontow ne. Beroy de énda méntandaan bé rumeroy dawét ne. Téménindég ro dob doror i dogote maak féngalungon. Génamak roy de baat féndawét alpa niray i Tuluse beroy. <sup>3</sup> Kénanta roy kanta Moisesse, sani ségétéwe sugu-suguéy Tuluse bé do gétah, sani kantay Natiwe Bilibili maro, “Barakatan Kadnan Tulus, toow fo fiyo brab daké i rénigo muwe! Beem fo méguléwe bé kéluhanay de ingéd. Toow fo métintuy adat me brab toow. <sup>4</sup> I kéluhanay de étév basana ro Beem, Kadnan. Atin i kéluhanay de étév fayagé roy kégérotor me. Beem saén i mékétéfuwe. I kéluhanay de étév tidéw dob séngae ingéd, mangéy ro méngadaf dob Beeme. Non i kéluhanay de étév gétiga roy de métintu do rénigo mo.”

<sup>5</sup> Tidéw béno, énggito guy lawi i Tuluse dob lawayo ménungka. Atin diyo dob bukagey mékétéfuwe sibéy gonoy tanda i Tuluse. <sup>6</sup> Tidéw béno, i de fitéw gétéw do télaki ménuwit bé de fitéw timan fégedusa, ménsut ro tidéw dob lawi i Tuluse ni. Kéménégal ro bé toowe fo malinis fute safut. Atin lénibéno ro bélowon i de kuméng ro. <sup>7</sup> Tidéw béno, i ségétéwe bé de barakatan do étév nirayén dob de fitéw gétéw do télakiy fitéwe timan bélowon biléw ménféno bé kékérít i Tuluse méuyag taman sa taman. <sup>8</sup> Atin i lawi i Tuluse ni ménféno bé béle tidéw dob kéréndaw i barakat i Tuluse, atin mélaw énda i géahur dob lawie taman gilid i de fitéw timan fégedusa nuwit i de fitéw gétéw télaki.

## 16

### *I de fitéw timan biléw*

<sup>1</sup> Tidéw béno, énggelingoo kuy métanuge émbéréh tidéw dob lawi i Tuluse dob de fitéw gétéw do télaki mano, “Agéw gom atin luka gom dob duniyaey de fitéw timan do biléw ménféno bé kékérít i Tuluse.”

<sup>2</sup> Atin i sunguwe télaki ménagéw brab lénukaén i biléw ne dob duniyae. Atin i toowe fo féde brab mékérésik do kélaing

téménunoh dob kéluhanay de étév do méntandaan bé nagawe brab de méngadaf bé kéninontow ne.

<sup>3</sup> Atin i géruwowe télaki lénukaén soy kaane biléw dob dogote, atin i wayége ménwaléy maak dara i ménléhue étév. Atin ménléhu i kéluhanay de sédo brab de binatang dob dogote.

<sup>4</sup> Tidéw béno, i gétéléwe télaki lénukaén i kaane biléw dob de séfut brab dob de wayég, atin ménwaléy ro dara. <sup>5</sup> Atin énggelingoo kuy béréh i télakiwe méguléw bé de wayég mano, “O mékétéfuwe Tulus, i Beeme ménwén gon tidéw féganay atin wén so béleewe ni, métintuy kékukum me. <sup>6</sup> I de tete ni étév, fénléhu roy de étévém brab de sénarigo mo muret. Mélaw féninémo mo bero dara. Médait ro mékukum loo bé ni.” <sup>7</sup> Tidéw béno, énggelingoo kuy émbéréhe tidéw dob ahayane tulakan mano, “Barakatan Kadnan Tulus, métintuy kékukum me brab toow.”

<sup>8</sup> Tidéw béno, i géfote télaki lénukaén i kaane biléw dob téréssange. Atin féntuwégén bé téréssangey de étév sabaf bé kééduf ne. <sup>9</sup> Atin méntuwég i de étév sabaf bé kééduf ne. Atin fénémula roy dawét i Tuluse, sani wéne aturan bé de ni fégedusa. Endob énda gésénule ro bé de sala ro brab énda dayéwé roy Tuluse.

<sup>10</sup> Tidéw béno, i gélimowe télaki lénukaén i kaane biléw dob saray datue kay nagawe. Atin ménwaléy délémon i kéféguléw i nagawe. Atin toow fo ménrasay i de étév atin gékekeo roy de dila ro bé kékédawéta ruwe. <sup>11</sup> Atin fénémula roy Tuluse dob lawayo sabaf bé kékédawéta ruwe brab de kélaing ro. Endob énda gésénule ro bé de tete adat ro.

<sup>12</sup> Tidéw béno, i géénéme télaki lénukaén i kaane biléw dob dakéle wayég féndawét Eufrates. Atin méntikar i dakéle ni wayég inok wén i aguwoy de datu tidéw sébangan.

<sup>13</sup> Tidéw béno, énggito guy téléwe gétéw tete rémogor maak do falas fak ménsut tidéw dob ba i diwat-wate brab dob ba i nagawe brab dob ba i ségétéwe ubo-ubo sénarigoy Tuluse muret. <sup>14</sup> Beroy de rémogor i de saitan do rémigo do mékégaif. Atin i de téléw ni gétéw do saitan ménangéy ro dob kéluhanay de datu dob duniyae ni inok limudé ro bero atin inok rémigo ro gira dob gaiwe kémukum i barakatane Tulus.

<sup>15-16</sup> Bé béno gai, i de saitan limudé roy de datu dob gonone féndawét Armagedon dob késébérehe Hebreo. Atin bang i Kadnane Jesus, “Fégingoo gom! Séfuleu bé gaiwe énda gékaranga kom de loo bé kégumah i ménakawe. Moror i de étév mingat brab téménafay ro kémégal bé kéongot-ongot ruwe bé késéfule guwe. Non énda félawas ro bé késéfule guwe funa ro mémala.”

<sup>17</sup> Tidéw béno, i géfitéwe télaki lénukaén i kaane biléw dob kérara fuwehe. Atin wén i émbéréh métanug tidéw dob saray méguléwéw dob lawi i Tuluse mano, “Enggilidén.” <sup>18</sup> Atin kéménilot brab déménégubrab léménéte brab léménuba émbagér. Énda i ségiyo émbagér luba loo bé ni tidéw bé kélimbage bé kéilawane, non toow na fo gétimal i kébagér i ni luba. <sup>19</sup> Atin i dakéle ingéd Babilonia ménséfarak téléw baad. Atin ménbinasay kéluhanay de ingéd dob duniyae ni. Non gétédémoy Tulusey ingéde Babilonia atin kukumé no sabaf bé kékérit ne de. <sup>20</sup> Atin i kéluhanay de bungéd brab de tuduk ménalfa. <sup>21</sup> Atin ménlawu i de dakél do yelo dob de étéw. Atin limo folo gékiloy kébégat i de yelo. Atin i de étéw fénémula roy Tuluse sabaf bé de yelo non toow fo gétimal i kékérit ne.

## 17

<sup>1</sup> Tidéw béno, i ségétéwe bé de télaki ménuwit bé de fitéw timan do biléw, ménangéy dob begéne brab ménbéréh mano, “Enggon, fégitu gu beam i kékukume bé ménbantuge sundal, sani ingéde gédét dob médoowe do wayég. <sup>2</sup> I de datu dob duniyae ni ménsétayan de. Atin i de étéw dob duniyae ni, fénsalaén bero bé mékérésike adatén.”

<sup>3</sup> Tidéw béno, i Rémogor i Tuluse toow fo fénémanduo no begén, atin nuwit i télakiwe begén mangéy dob gonone énda i étéw de bati. Diyo énggito guy libune kéménuda dob furowe naga. Wén i de mékémurka dawét ménsulat dob kéluhanay lowoh i nagawe ni. Atin fitéw timan i uléw ne brab folo timan i sidung ne. <sup>4</sup> Atin i libune ni kéménégal furo brab rambayung. Atin ménggono do bélowon brab do perlas brab do ségiyo balilaga batéw. Atin génamakén i bélowone tabu ménféno bé de mékérésik brab do mékémurka do éntingayén, sani galbé i sundale. <sup>5</sup> Atin ménsulat dob rangih ney kébéréhe wén i ménbunéy atagén. I sulate ni mano, “I ménbantuge Babilonia, idéng i kéluhanay de sundal brab de mékérésik do étéw dob duniyae ni.” <sup>6</sup> Atin énggito guy ni libun ménolon sabaf bé kéiném ne bé dara i de ménléhuén do munur bé Jesuse do ménléhu sabaf bé kéuret ruwe fantag bé kéunur ruwe.

Amun énggito guy ni, toow fo ménggaifu de. <sup>7</sup> Atin i télakiwe ni ménénginsa dob begéne mano, “Sedek mégaif go? Fégitiga ku beam i ménbunéye atag i libune ni brab nagawe kénudaa no fitéw i uléw ne brab folo i sidung ne. <sup>8</sup> I nagawe énggito mo méuyag bé gétaho, éndob ménléhuén béleewe ni. Gido loo, mésut moso tidéw dob toowe fo ménalém liyung brab mébinasa. Atin i de étéw dob duniyae ni, sani de étéw énda ménsulat i de dawét ro dob librowe listanan bé de étéw gégédot bé unule magufusa, mégaif ro ké gito roy

nagawe ni. I ni libro ménsulatén bé énda séna lénimbag i Tulusey duniyae de. Atin i nagawe ni méuyag bé gétaho, ménléhuén béni. Éndob téfégitu man moso.”

<sup>9</sup> Atin féntaus i télakiwey kébéréh ne mano, “Do gétigan saén do étéw i gésobute bé ni: I atag i de fitéw timan uléw, been i de niy de fitéw timan burur gonoy ni libun mésar, sani de burur ténindégoy ménbantuge ingéd. Atin i atag ne do fitéw gétéw datu. <sup>10</sup> Atin i limowe bé de datu ni ménléhu ron. Atin i ségétéwe de méuyag méguléw béni. Atin i ségétéwe de énda séna méguléwén. Amuk méguléw i géfitéwe ni datu, méguléw saén singkow. <sup>11</sup> Atin i nagawe ni, sani méuyage bé gétaho éndob ménléhuén béni, beeney géwaléwe datu gétundug bé de sungu do fitéw datu atin mébinasa moso.

<sup>12</sup> “Atin i de folo do sidung énggito mo, beroy de folo gétéw do datu énda séna méguléw ro. Éndob irayén beroy aturane méguléw bé rugay i ségúruse saén beroy nagawe. <sup>13</sup> Atin i de folo ni gétéw do datu, ségiléw i kétaya ruwe, atin iray roy bagér ruwe brab atura ruwe méguléw dob nagawe ni. <sup>14</sup> Atin sétiboh ro sébanil bé Natiwe Bili-bili. Éndob i Natiwe Bili-bili brab de fénémilién do kuyugén sani de fénunurén dob Beene brab de rémigo bé kétaya nuwe, tabana roy de ni do folo gétéw do tete datu. Témaban i Natiwe Bili-bili non Beeney Kadnay de méguléw brab Beeney Datu i de datu.”

<sup>15</sup> Atin ménbéréh man i télakiwe ni dob begéne mano, “I de wayég énggito mo, sani gonoy sundale ménsar, beroy de kéléw dob de séségiyo-giyo do ingéd brab do kélasi-klasi do étéw brab do késébéréh. <sup>16</sup> Atin i de folo timan do sidung do énggito mo, brab nagawe, mérarék ro bé sundale ni. Atin nafas roy kéluhanay de éntingayé no. Atin tagaké roy sundale ni félawas. Atin amaé roy ungé ne brab tuwégé ro dob aféyey sama ruwe de. <sup>17</sup> Rigoné roy ni non fékétayéy Tuluse beroy rémigo de inok métuman i bantak ne. Mélaw sébaan saén i kéfégitung ruwe, atin iray roy atura ruwe méguléw dob nagawe taman métuman i kébéréh i Tuluse.

<sup>18</sup> “Atin i énggito muwe libun, beeney ménbantuge ingéd méguléw bé de datu dob duniyae ni.”

## 18

<sup>1</sup> Tidéw béno, énggito guy ségiyowe télaki ménlus tidéw dob lawayo. Wén i dakél atura no. Atin ménggéfékaya i kéluhanay sugud i duniyae bé késélinang ne. <sup>2</sup> Atin ménkes i télakiwe ni toow fo métanug mano, “Ménbinasa! Ménbinasay ménbantuge ingéd Babilonia. Ménwaléy béni batioy de saitan brab do tete do rémogor. Atin médo do gékélasi do tete brab mékérésik do kloh

manok bati diyo. <sup>3</sup> Non fénsalaén i kéluhanay de étéw bé mékérésike adatén, sani teteé kétayay lowoh ne. Atin i de datu dob duniyae ni ménamung ro bé de tete rigoné ro. Atin i de démagang ménwaléy ro kawasa sabaf bé de tete kétayay libune ni.”

<sup>4</sup> Tidéw béno, énggélíngoo kuy émbéréhe tidéw dob lawayo mano, “Enggomén do étéw gu. Sut gom tidéw dob tete anan ingéd inok énda géamung gom bé de salaén. Mélaw énda mékukum gom séréngan de. <sup>5</sup> Non toow fo médooy de salaén maak mén-untud mangéy dob lawayo. Atin i Tuluse énggétédémoo noy teteé adatén. <sup>6</sup> I kéférasay ne begom, fatut sulio kom ruwo takéf kéférasay de so. Féno gom i tabu ne ruwo gule bé inéméne toow fo féla loo bé féniném ne begom. <sup>7</sup> I kédooy kébantug ne bé lowoh ne brab kéféfiyo nuwe bé lowoh ne bé gétahe, iring gom bé kéférasay gome de brab kéfébuku gome de. Non énda téméré no félangka-langka mano, ‘Begonéy baiwe, békénu baléw. Enda fakayén ké tete i fédéw guwe.’ <sup>8</sup> Sabaf bé ni kébérehén, wén i gai moso tékew mérasay. Non mékukum bé déruone brab kébukue brab lénggobe. Atin métuwég fo toow bé aféye non toow fo barakatan i Kadnane Tulus kémukum de.”

<sup>9</sup> Atin i de datu dob duniyae ménamung bé de mékérésik rigoné no brab kékawasawe kétaya ro, kémérew ro, brab rémuung ro sabaf bé kébinasay ni ingéd amuk gito roy bél i aféye témuwég de. <sup>10</sup> Ténulik ro tidéw dob mérayue non mégilak ro méamung bé kérasay ne. Atin béréhé ro maro, “Mékégédaw-gédaw i ménbantuge ingéd Babilonia. Ségéurase saén i kékukume de.”

<sup>11</sup> Atin i de démagang kémérew ro so brab rémuung ro sabaf bé kébinasay ni ingéd non énda i méléy bé de daganga ro. <sup>12</sup> Endaén i méléy bé de bélowon do fébély ro brab do filak, brab do balilaga do batéw, brab do perlas, brab de fiyo fute brab do furo brab rambayung safut, brab do balilaga do mamut kayéw, brab do éntingayén do rénigo garing, brab do balilaga do kayéw, brab do galang, brab do futow, brab do marmol, <sup>13</sup> brab do kanela brab do ségiyo fégféfaninu, brab do dukah, brab do fégféamut, brab do uwa, brab do arak, brab do nor, brab do arinah, brab do safi, brab do bili-bili, brab do kuda, brab do kalesa, brab do rifén, brab fiyon i de rémogor i de étéw. <sup>14</sup> Atin ménbéréh i de démagang dob ingéde ni maro, “Endaén i kéluhanay de fiyo do éntingayén do kétaya mo. Atin ménkédané i bantuga muwe brab kékawasa muwe. Atin éndaén géséfuléén mangéy dob beeme.” <sup>15</sup> Atin i de démagang do ménwaléy kawasa sabaf bé de kédagang ro, dob nan ingéd, tuliké roy de tidéw mérayu non mégilak ro méamung bé kérasay ne. Kémérew ro rémuung. <sup>16</sup> Atin béréhé

ro maro, “Mékégédaw-gédaw i ménbantuge ni ingéd. Bé gétahe i de étéw de kéménégal ro fiyo safut fute brab furo brab rambayung. Atin ménggono do bélowon brab balilaga do batéw brab do perlas. <sup>17</sup> Endob bé ségéurase saén méntékow ménkédan i kékawasa nuwe.”

Atin i kéluhanay de kafitan bé de barko brab de étéw de ménda brab kéluhanay de gémalbék dob de barko, ténulik roy de tidéw mérayu. <sup>18</sup> Atin ménkes ro bé lala ruwe téméngténg bé bél i aféye témuwég bé ingéde ni maro, “Tidéw féganay, énda i ségiyo ménbantug ingéd loo bé ni!” <sup>19</sup> Atin rénigono ro réhuk i de uléw ro brab rémuung ro maro, “Mékégédaw-gédaw i ni ménbantug ingéd! Non sabaf bé kékawasa nuwe, waléy so kawasay de gefe barko. Endob bé ségéurase saén méntékow ménbinasay kéluhanane.”

<sup>20</sup> I de begom do étéw bati dob lawayo, oror gom sabaf bé kébinasay ni ingéd. I de begom do munur bé Jesuse, brab begom do apostol brab do sénarigoy Tuluse muret, oror gom. Non kénukum i Tulusey nan ingéd sabaf bé de tete rénigo no dob begome.

<sup>21</sup> Tidéw béno, i barakatane télaki fénurutén i dakéle batéw brab nibéréh dob dogote. Atin ménbéréh mano, “Loo bé niy kéibére bé ménbantuge ingéd Babilonia inok mébinasa. Endaén gito no non toowén fo ménbinasa. <sup>22</sup> Atin éndaén gélingoo no dob ni ingéd i béréh i de baat do alpa, do suling, brab do témburi. Atin éndaén giton i de fanday gémalbék dob ni ingéd fiyon udenén klasi fanday, atin éndaén gélingoon i béréh i gilingane. <sup>23</sup> Endaén réméndaw i soloe dob ni ingéd. Atin éndaén i uyot dob ni ingéd. Bé do gétahe, toow fo ménbantug i de démagang do étéw. Atin i de béliyan bati diyo, énggéfégakara roy de étéw dob séngae ingéd dob duniyae.”

<sup>24</sup> I funay ingéde Babilonia ménkukum, non fénléhuén i de étéw sénarigoy Tuluse muret bé kébérehé ne brab fénléhuén i de munur bé Jesuse. Atin i kéluhanay de étéw fénléhuén dob duniyae ni ménléhu ro sabaf bé ni ingéd.

## 19

<sup>1</sup> Tidéw béno, énggélíngoo kuy métanuge béréh i maake médooy étéw ménlimud dob lawayo maro, “Dayéwé tom i Tuluse! Been i mémukase bé de étéw, Beeney barakatane, Beeney ménbantuge. <sup>2</sup> Méntintu brab toow i kékukum ne. Kénukumén i ménbantuge sundal non fénsalaén i kéluhanay de étéw dob duniyae bé mékérésike adatén. Kénukum i Tuluse non fénléhuén i de sugu-sugué no.” <sup>3</sup> Atin ménkes ro man maro, “Dayéwé tom i Tuluse! Mégébé i aféye témuwég bé ni ingéd taman sa taman.” <sup>4</sup> Atin i de ruwo folo bra fot gétéw lukés odoron brab de fot gétéw do barakatan étéw méntédunsum ro

méngadaf bé Tuluse ménsar dob sara nuwe. Atin ménbéréh ro maro, “Amen! Dayéwé tom i Tuluse.”

<sup>5</sup> Tidéw béno, wén i ménbéréhe tidéw dob saray Tuluse mano, “I kéluhana kome do sugu-suguéy Tuluse brab begome do masanan de, fiyon gérotor taloo no do gérifantad, fatut dayéwé kom.”

<sup>6</sup> Tidéw béno, énggelingoo kuy béréh i maake dakél ménlimud do étéw brab maake érok dakél samfaw brab maake métanug léte maro, “Dayéwé tom i Tuluse non Been saén i barakatane Kadnan Tulus méguléw betom. <sup>7</sup> Fatut moror tom. Fatut dayéwé tom i Tuluse sabaf bé kégérotor ne. Non énggumahén i gaiy uyot i Natiwe Bili-bili béleewe ni. Atin méntafayén i mawage bé Natiwe ni Bili-bili. <sup>8</sup> Kéménégal sémélingang malinis fute safut.” I atag i ni, been i niy de métintu rigonéy de munur bé Jesuse.

<sup>9</sup> Tidéw béno, i télakiwe ni ménbéréh dob begéne mano, “Sulatém i ni: Toow fo moror i de étéw ménséngkat dob uyot i Natiwe Bili-bili.” Atin ménbéréh man mano, “Been i niy toowe kébéreh i Tuluse.”

<sup>10</sup> Atin méntédunsumu dob adafa nuwe inok féngadafé kuy télakiwe ni. Endob ménbéréh mano, “Kago féngadafén begén. Non dumo mo so begén sugu-suguéy Tuluse brab dumoy kéluhanay de munur bé kétoro Jesuse. Fatut Tulus saén i féngadafé muwe.” I funa nuwe ménbéréh bé ni non ségiléw i kétoro Jesuse bé de sénarigoy Tuluse muret.

<sup>11</sup> Tidéw béno, énggito guy lawaye ménungka. Atin énggito guy futee kuda. Atin i dawét i étéwe de kéménuda, “Sarigon” brab “Toow”. Métintuy kékukum ne, atin métintu soy késétiboh ne. <sup>12</sup> I de moto no maak mérino aféy, atin médooy de lakay dob uléw ne. Atin wén i dawéte ménsulat dob Beene, endob énda i géttigan de saliyy saén bé Beene. <sup>13</sup> Atin i kégal ne maak nérém dob darae. Atin i dawét i ni étéw, “Kébéreh i Tuluse.” <sup>14</sup> Atin i de médo do sundalo tidéw dob lawayo ménfuray ro bé ni étéw. Kéménuda ro dob de fute kuda, atin kéménégal ro bé toowe fo malinis fute safut. <sup>15</sup> Atin i sunguwe ni étéw, wén i muréme sundang mésut tidéw dob ba ne fégtaba no bé kéluhanay de ingéd dob duniyae ni. Atin féguléwo no bero atin énda i géatuh de. Atin fégitto no beroy kékérit i barakatane Tulus non binasané no bero loo bé kékérés i ségétéwe étéw bé de ubas. <sup>16</sup> Atin wén i ménsulate dob kégal i étéwe ni brab dob foo ne mano, “Datu i de datu, Kadnay de méguléw.”

<sup>17</sup> Tidéw béno, énggito guy télakiwe téméndég dob kérara i térésange. Atin ménkes métanug dob kéluhanay de kloh manok lémayang dob fuwehe mano,

“Enggomén. Sétimu gom inok géama gom bé kanduli i Tuluse. <sup>18</sup> Enggomén, ama gom bé ungé i de datu, brab de odoroy de sundalo, brab de sundalo de so, brab de kuda, brab de kéménuda de so, brab kéluhanay de étéw fiyon do rifén loo soy de békén de, brab de gérotor de so, loo soy de gérifantad de.”

<sup>19</sup> Tidéw béno, énggito guy nagawe brab de datu dob duniyae ni brab de sundalo so. Ménsélimud ro inok sétiboh ro sébanil bé étéwe ni kéménuda fute brab de sundalo no tidéw dob lawayo. <sup>20</sup> Atin kénéfo roy nagawe beroy ubo-uboe sénarigoy Tuluse, sani rémigow do mékégaif dob adafay nagawe ni. I de rénigo no do mékégaif, been i niy funay de étéw ménfégakaran méntandaan bé tanda i nagawe, sani de étéw méngadaf bé kéninontow i nagawe ni. Atin i nagawe brab ubo-uboe sénarigoy Tuluse, ménibér ro méuyag séna dob ranawe aféy mérino bé asuprewé. <sup>21</sup> Atin i de sundalo ro, fénléhu ro bero bé sundange mésut tidéw dob ba i kéménudae fute. Tidéw béno, i de kloh manok, nama roy de ungé ro taman ménbésor ro.

## 20

### *I séngibu gébélintuwa*

<sup>1</sup> Tidéw béno, énggito guy ségétéwe télaki ménlus tidéw dob lawayo. Atin génamakén i dakéle sangkali brab susie bé ménaléme liyung. <sup>2</sup> Atin kénéfoéni i diwat-wate, sani ulée bé gétaho sani saitané féndawét Satanas. Atin nikétén inok férisuné no bé séngibuwe gébélintuwa. <sup>3</sup> Atin i télakiwe ni nibéréh i Satanasé dob liyunge atin kénandado no, atin ténlébéh bé tandae. Mélaw éndaén géfagakara Satanaséy de étéw dob duniyae ni taman méifus i séngibuwe gébélintuwa. Tidéw béno, kailangan tangéyén man singkow.

<sup>4</sup> Tidéw béno, énggito guy saray de méguléw, brab de étéw de so ménsar. Atin niray dob berowey kuwagibe kémukum. Atin énggito guy soy de rémogor i de étéw fénléhuén sabaf bé kéuret ruwe bé toowe tidéw dob Jesuse brab kébéreh i Tuluse. Enda fénéngadaf roy nagawe taloo no kéninontow ne. Atin énda méntandaan i de rangih ro taloo no do kémér ro bé tanda i nagawe. Atin méntébuile ro brab méguléw ro séréngan bé Kristowe taman méifus i séngibuwe gébélintuwa. <sup>5</sup> Been i niy sunguwe kétébuile. I de dumo ro énda tébuile ro taman énda gilid i séngibuwe gébélintuwa. <sup>6</sup> Toow fo moror i de étéw tébuile dob sunguwe kétébuile, atin féfiyonéy Tuluse bero. Enda géamung ro bé géruwowe kéléhu. Atin beroy de waléy do fadi i Tuluse brab Kristowe. Atin méguléw ro bero ro Kristo bé ni séngibuwe gébélintuwa.

<sup>7</sup> Amuk gilid i ni séngibuwe gébélintuwa, tangéyén i Satanasé tidéw dob kaane

férisunon. <sup>8</sup> Atin mangéy dob kéluhanay de ingéd dob duniyae inok géfagakara no bero, sani de ingéd féndawét Gog brab Magog. Atin i Satanase, limudé no bero inok sétiboh ro sébanil bé Tuluse. Atin toow ro fo médo loo bé kédooy de farék dob dénsaane. <sup>9</sup> Atin ménbéragar ro dob duniyae atin lénangkat roy ingéde gulaanéy Tuluse gonoy de étéwén bati. Endob ménlawu i aféye tidéw dob lawayo funa ro ménbinasa kéluhanan. <sup>10</sup> Tidéw béno, i Satanase, sani magakarane bero, nibérén dob ranawe aféy brab asuprewé sani gonone nibéron bé nagawe brab ubo-uboe sénarigoy Tuluse bé gétahe. Atin dusanén ro fuweh na kélungonon taman sa taman.

<sup>11</sup> Tidéw béno, énggito guy dakéle brab futee saray méguléwe. Atin énggito gu soy ménsare de diyo. Atin i fantade brab lawaye ménalfa ro dob téngaanga nuwe atin éndaén giton ro. <sup>12</sup> Atin énggito guy kéluhanay de ménléhu, do gérotor brab do gérifantad. Téménindég ro dob adafay sarane ni. Ménungka i de libro atin ménungka soy librowe lénistanan bé de étéw gégédot bé umule magufusa. Atin i de ménléhu ménkukum ro loo bé de rénigo ro, sani ménsulate dob de libro. <sup>13</sup> Tidéw béno, i de ménléhu do étéw tidéw dob dogote ménsut ro, atin ménsut soy de ménléhu tidéw dob fantade brab tidéw dob gonoy de ménléhu. Atin kéluhana ro ménkukum sabaf bé de rénigo ro bé kéuyag ruwe séna. <sup>14</sup> Tidéw béno, i kéléhue brab gonoy de ménléhu, nibérén bero dob ranawe aféy, sani géruwowe kéléhu. <sup>15</sup> Atin i kéluhanay de étéw énda ménsulat i de dawét ro dob librowe listanan bé de étéw gégédot bé umule magufusa nibérén so bero dob ranawe aféy.

## 21

### *I de mantu*

<sup>1</sup> Tidéw béno, énggito guy mantuwe laway brab mantuwe fantad. Ménalfa i tafaye de loo soy dogote. <sup>2</sup> Atin énggito guy mékétéfuwe ingéd, sani mantuwe Jerusalem, ménlus tidéw dob lawayo tidéw dob Tuluse. Téménafay maak témérima libun kéménégal fyo inok balaké noy témérimawe lagéy. <sup>3</sup> Atin énggélingoo kuy métanuge béréh tidéw dob saray méguléwe ni mano, “Béleewe ni bati i Tuluse sétifon bé de kéilawan. Bati dob berowe atin beroy de étéwén. Beeney dumo ruwe atin méngintulus ro dob Beene. <sup>4</sup> Atin kédané noy de tete dob de fédéw ro inok éndaén kémérew ro. Atin éndaén i méléhu taloo no rémuung taloo no démawét non ménkédanéni i de éntingayén do tafayén.”

<sup>5</sup> Tidéw béno, ménbérah i ménsare dob saray Tuluse mano, “Béleewe ni, féantuné kuy kéluhanane.” Atin ménbérah dob begéne

mano, “Sulatém i ni non toow i ni kébéréh brab gésarigon.” <sup>6</sup> Atin ménbérah man mano, “Méntumanén. I Begéne Alfa brab Omega, sani féganayane brab tamanane. Iray gu dob de térumén do étéw i wayége énda i bayadén tidéw dob séfute wayég miray bé umule magufusa. <sup>7</sup> I de étéw ténabana roy Satanase, waléyu Tulus ro atin waléy ro do nga gu. <sup>8</sup> Endob i de étéw do talaw brab do ménwaléy sébanil Begén brab de réménigo do mékérésik brab do ménmléhu brab do béliyan brab do ménéngadaf do kéninontow brab do téménugi, géangéy ro dob ranawe aféy brab asuprewé, sani géruwowe kéléhu.”

<sup>9</sup> Atin i ségétéwe bé de fitéw gétéw do télaki ménuwit do fitéw timan do biléw bé de géfuray do fégédusa, ménangéy dob begéne brab ménbérah mano, “Enggon, fégito gu beem i témérimawe libun, sani mawage bé Natiwe Bili-bili.” <sup>10</sup> Tidéw béno, i Rémogor i Tuluse fénémanduo no begén atin nuwit i télakiwe ni begén mangéy dob uruk i gérotore tuduk. Atin fénténgténgén begén i ingéde Jerusalem, sani mékétéfuwe ingéd, bé lala ne mélus tidéw dob lawayo tidéw dob Tuluse. <sup>11</sup> Sémélinang i ni ingéd non diyo i barakatane Tulus. Sémélinang loo bé ballilgae batéw féndawét haspe toow fo métiyéw maak féngalungon. <sup>12</sup> Atin wén i gérotore diding fénggélangkat bé ni ingéd. Atin folo bra ruwo timan i béngawa nuwe. Atin folo bra ruwo gétéw i télakiwe mantay bé de béngawa no. Atin ménsulat dob de fintuén i dawét i de folo bra ruwo triboy de Judio. <sup>13</sup> Atin téléw timan i fintue dob séngae sébaan bé de fot timan diding. Téléw i fingée de sébangan, atin téléw soy fingée de déligdigan. Atin téléw soy fingée de tégénon, brab téléw soy fingée de élédon. <sup>14</sup> Atin i de diding i ni ingéd rénigo dob rotor i foloe bra ruwo batéw. Atin diyo ménsulat i dawét i foloe bra ruwo do apostol i Natiwe Bili-bili.

<sup>15</sup> Atin i télakiwe, sani ménbérahé dob begéne, wén i bélowone fégétémbu no inok témbuné noy ni ingéd brab de béngawa no, brab de didingén fénggélangkat de. <sup>16</sup> Atin i ni ingéd ségiléw foy kédakél i kébuka ne bé kédakél i kétaaha nuwe. Non i télakiwe ni ténémbu noy ingéde ni bé bélowone fégétémbu no. Atin ruwo ngibu bra fot ratus gékilometry kétaah ne loo soy kébuka ne loo soy kégérotor ne. <sup>17</sup> Atin ténémbuy télakiwe ni soy diding, atin ném folo gémitroy kégérotor ne dob kétémbuy kéilawane de, been i niy nusar i télakiwe ni. <sup>18</sup> Bélowon i ni ingéd toow fo métiyéw maak féngalungon, atin déninging haspe. <sup>19</sup> Atin wén i de toow fo ballilaga do batéw fénfyo bé de batéw féntindégon bé de diding ni. I sunguwe de fénfyo bé haspewe, atin i géruwowe de bé safirowe, atin i gétéléwe de bé kalsedoniawe, atin i

géfefote de bé esmeraldawe. <sup>20</sup> I gélimowe de bé onise, i génème de bé kornalinawe, i géfitéwe de bé krisolitowe, i géwaléwe de bé berile, i gésiyowe de bé topasyowe, i géfoloe de bé krisapasowe, i géfoloe de bra sébaan bé hasintowe, atin i géfoloe de bra ruwo bé amatistawe. <sup>21</sup> Folo bra ruwo timan do perlas i fénggérigowe bé de ni do folo bra ruwo timan fintu. Sénga sébaan fintu, sébaan so perlas i fénggérigowe de. Atin bélowon i aguwone dob ni ingéd métiyéw maak féngalungon.

<sup>22</sup> Enda gito guy lawi i Tuluse dob ni ingéd non dob séngae gonon, i kéluhanay de étéw féngadafé roy barakatane Kadnan Tulus brab Natiwe Bili-bili. <sup>23</sup> Atin i ni ingéd, éndaén kailanga noy réndaw i téréssange taloo no téréssang kélungonon. Non réméndaw i barakatane Tuluse funa no géfékaya. Atin i Natiwe Bili-bili maak solo. <sup>24</sup> Atin i de étéw dob duniyae ni, gégito ro sabaf bé ni réndaw. Atin i de datu dob duniyae ni, uwité roy kékawasa ruwe mahur dob ni ingéd. <sup>25</sup> Atin i de béngawan dob ni ingéd, méungka ro sénga tékélid. Enda méfintuén non énda i kélungonon diyo. <sup>26</sup> Atin i de fiyo do éntingayén brab kékawasay kéluhanay de ingéd, féahurén dob ni ingéd. <sup>27</sup> Endob énda i tete géahur de, taloo no do tugién do étéw taloo no do étéw do mékémalay de rigoné ro. I de géahur saén dob ni ingéd, beroy de étéw ménlistay de dawét ro dob libroy Natiwe Bili-bili listanan bé de étéw gégédot bé umule magufusa.

## 22

<sup>1</sup> Atin i télakiwe ni, fénggito no begén i dakéle wayég miray bé umule magufusa. Sémélinang maak kristal. Tidéw i ni wayég dob saray Tuluse brab Natiwe Bili-bili. <sup>2</sup> Atin mangéy dob kérara i aguwone dob ni ingéd. Atin wén i dakéle kayéw miray umul dob doror i wayége ni sébala-bala. Mégonok folo bra ruwo gule sénga ségébélintuwa. Ségule mégonok sénga ségéteréssang kélungonon. Atin i de dau ro féguéwa bé de étéw dob duniyae. <sup>3</sup> Atin énda i éntingayén mémula bé Tuluse dob ni ingéd.

Atin i de saray Tuluse brab Natiwe Bili-bili diyo dob ni ingéd. <sup>4</sup> Atin gito roy falas ne atin dob de rangih ro ménsulat i dawét ne. <sup>5</sup> Atin éndaén i kélungonon, mélaw éndaén kailanga roy soloe taloo no téréssang non i Kadnane Tulus, Beeney solo ruwe. Atin méguléw ro taman sa taman.

<sup>6</sup> Tidéw béno, ménbéréh i télakiwe dob begéne mano, "Toow i ni kébéréh énggélíngoo mo brab gésarigon. Atin i Kadnane Tulus, sani miraye bé Rémogor ne dob de étéw sénarigo no muret bé kébéréh ne, sénuaguén

i télakiwe ni inok fégito no dob de sugu-sugué noy atiy mérigowe énda mérugayén tidéw béni."

<sup>7</sup> Atin bang Jesuse, "Séfuleu énda mérugayén tidéw béni! Moror i de étéw modor bé de kébéréh fénggétiga ku begom dob ni libro."

<sup>8</sup> Atin i begéne Juan. Enggélíngoo ku brab énggito guy de ni. Atin amun énggilid énggélíngoo ku brab énggito gu, méntédunsumu dob adafay télakiwe ni ménféténgténg begén bé de ni, inok féngadafé ku. <sup>9</sup> Endob ménbéréh dob begéne mano, "Kago féngadafén begén. Non i begéne dumo mo so sugu-suguéy Tuluse, beroy kéluhanay de dumo mo sénarigoy Tuluse muret, brab de modor bé de kébéréh dob ni libro. Féngadafém saén i Tuluse." <sup>10</sup> Atin ménbéréh man dob begéne mano, "Kago bunyéyén i de ni kébéréh fénggétiga ku beem dob ni libro. Non gédétén métuman i kéluhanay de ni. <sup>11</sup> I de tete étéw, kailangan fétausé roy de tete rigoné ro. I de mékérésik do étéw, kailangan fétausé roy de mékérésik do rigoné ro. Atin i de fiyo do étéw, kailangan fétausé roy de fiyo rigoné ro. Atin i de étéw rémigo bé kétayay Tuluse, kailangan fétausé ro."

<sup>12</sup> Atin bang Jesuse, "Séfuleu énda mérugayén tidéw béni! Atin uwité kuy de baras inok iray gu dob de étéw médaít gégédot de sabaf bé de rémigo ro. <sup>13</sup> I Begéne, Alfa brab Omega, sani féganayane brab tamanane."

<sup>14</sup> Moror i de étéw ténusak i de kégal ro inok malinis, sani de étéw ménkédanén i de sala ro, non wén i kuwagib ro mama bé onok i kayéwe miray bé umule magufusa, atin géahur ron dob mantuwe ingéd. <sup>15</sup> Endob dob liyuy ingéde ni, diyo i de rémigo do mékérésik brab de béliyan brab de rémigo bé de tete kétayay de lowoh ro, brab de méméléhu, brab de méngadafé bé de kéninontow, brab de tugién, brab de rémigo bé békéne toow.

<sup>16</sup> Atin ménbéréh i Jesuse mano, "Begéney Jesuse, atin fénuwit guy télaki guwe mangéy dob begome inok fégétiga noy de ni dob de munur. Begéney séfu datu Dabide. Begéney géfékayae solo mubod."

<sup>17</sup> I Rémogor i Tuluse brab i mawage bé Natiwe Bili-bili, ménbéréh ro maro, "Enggon!"

I kéluhanay de mégélingo bé ni, fatut émbéréh gom "Enggon!"

I kéluhanay de étéw térumén, brab méuyot ro miném, fatut doté roy wayége énda i bayadén miray bé umule magufusa.

<sup>18</sup> I begéne, Juan, fégété kuy kébéréh guwe dob begome do mégélingo bé ni libro fénggétiga ku begom. Amukwén i mumanan bé de kébéréh dob ni libro, umanay Tulusey kékérít ne de bé de kékérít ménsulat dob ni



libro. <sup>19</sup> Atin amuk wén i kémédan bé dumoy de kébéréh dob ni libro fénggétiga ku begom, kédanéy Tulusey de kaan baad bé de onok tidéw dob kayéwe miray umul, brab kaane kuwagib bati dob mékétéfuwe ingéd sani de ménsulat dob ni libro.

<sup>20</sup> Atin i Jesuse, sani ménbéréhe toow i de ni, ménbéréh mano, “Hoo ba, séfuleu énda mérugayén tidéw béni.”

Amen. Enggon, Kadnan Jesus!

<sup>21</sup> Mégédaw fo toow i Kadnane Jesus begom. Amen.